

國家文物局

清代傳記叢書



明文書局印行

鄧之誠撰

清詩紀事初編

前言

鮑正鵠

以一代爲限，采擇名篇，兼著本事，詳作者生平，自計有功撰唐詩紀事八十一卷，遂爲中國文學文獻創始了一種重要體制。其後厲鶚撰宋詩紀事一百卷，陳田撰明詩紀事十籤二百零七卷，陳衍撰遼金元詩紀事七十三卷，陸心源爲宋詩紀事作補遺一百卷^①，小傳補正四卷。諸書掇拾繁富，網羅賅備，共收唐人一千一百五十家，宋人六千八百家，遼人八十家，金人二百家，元人八百家，明人四千家。所收的詩自一句一聯以至長篇巨著約計在四萬條以上。所紀之事包括朝政時事，文壇流變，以至作者的世系爵里，出處梗概，人品風格等，都作出扼要的綜述或羅列原始材料。這給中國文學史研究提供了一份既集中又豐富的資料。至於清代三百年的詩人，僅據晚晴簃詩匯所收即達六千一百餘家，而目前尙可得見的專集估計不下四千種，雖有各種不同的選本、評論和傳記資料，但還缺乏一種與前述諸書同一體制的輯集。現在編輯所出版清詩紀事初編，固然僅及清初八十年，究竟填補了空白的部分，給予文學史研究者以許多方便。

清詩紀事初編是已故北京大學教授鄧之誠的遺著。全書八卷，以明遺民列爲前集，順治、康熙兩朝的作者按地區分編爲甲、乙、丙、丁四集，共收作者六百人，錄詩二千餘首。體制約略與各種詩紀事

① 清羅以智另有宋詩紀事補遺之作，這稿見存東京圖書館。

相同，而撰述宗旨則各具特色。

原來那幾種詩紀事體制雖相沿襲，目的却並不一致。有的旨在鈎沈發微，有的旨在品藻得失。計有功的唐詩紀事蓋感于一代作者滅沒失傳而作。厲鶚有見于明人崇尚唐音，輕忽宋調之弊，想借紀事之作以改變風氣。陳田于明詩心矜別裁，則藉紀事論流變。而陳衍着眼于無專集的作家和專集以外的作品，因之選錄篇什就往往爲無多事可紀之作，即使有其事，其事也往往無關宏旨。陳衍雖認爲詩紀事之體有詩史之義，但遼詩紀事等三種所注意的還不脫舊時所謂掌故的範圍。這樣，宋詩紀事、明詩紀事儼然具有總集性質，陳衍撰述的三種亦與斷代的詩話沒有明顯的區別了。由此可見，詩紀事這一性質的著作固然有比較共同的體制，可是並沒有嚴格的共同的標準。

著者本黃宗羲以詩證史之說，撰集此書，自與諸家紀事相異。首先，他是從『證史』出發來讀詩的，故所選的二千多首詩都屬有『事』的篇什，所謂『事』，如著者自序所說：

此八十年間，南明弘光隆武、永曆相繼撐柱者十八年，臺灣鄭氏至康熙二十二年始絕，其間若李赤心、若交山、若其他連什繼起者，更僕難數。康熙中葉以後，復用兵西北，蓋兵革之事，未嘗一日或息。黨爭則滿漢有爭，南北有爭，廢太子之爭幾互三十年。當玄黃未判之際，爲商遺殷頑者，不能無恢復之望，因以事以文字獲罪死徙者多矣。兵

○ 黃說見南雷文定前集卷一萬履安先生詩序：『今之稱杜詩者以爲詩史，亦信然矣。然注杜者但見以史證詩，未聞以詩補史之闕。雖曰詩史，史固無藉乎詩也。』

餉不繼，胥吏苛求；更若水旱地震之災，奢侈貪黷之習，商賈之操縱盈絀，巨室之爲患鄉里。是時兵、刑、河、漕，號爲大政，而不能無得失利病。又值海通，梯航遠至，西學西器，漸入中土。

因爲『但取其事』，所以在選擇上，一則不限于名家，一則不僅着眼於文學的標準。惠周惕條選贈吳縣 王明府卽是一個很好的說明，而尤侗條選其漕船行、兵船、又見歲暮口號等作，給我們真切的看到其時官吏的橫暴和驕奢，顯然不是從尤侗詞華富瞻的風格來考慮的。王士禛條選彰義門、養馬行、抱栗歌、丹陽十字碑等詩，詞意激楚，也都不是什麼與會神到，清淡閒遠之作。

其次，著者以爲詩史相證的關係，不在乎詩（文學）與史（史書記載）的相吻合，而貴乎詩能記史外之事。從這一主張出發，本書所選的作品，其內容有不少是史籍所不載或史籍所不詳的，或與史籍的記載互有出入。看來這些詩並非都有可以坐實的本事，但參照時世，大都是有着紀實的根據的。這就提供了許多過去被忽視的史料，提供了許多發掘史料的綫索，而收『補史之闕文』的功効。尤其是清初史事，曾經周密的塗改，當順康之際，文網已嚴，雍乾以後，禁忌更多，只有在詩人的詠歎中，還能時一流露。因此，這些詩所反映的，在某些事件上，其信實就比一般史籍爲可靠；在某些事件上，因爲出發點與一般史籍不同，就有可能使人看到較全面的情況。比如清政府常常誇張康熙中獨免江南錢糧爲英明的德政，讀本書所選反映清初江南遭受敲剝痛苦，怨聲載道的詩篇，將恍然有悟於『皇仁』幌子之下的不得已的隱衷。讀王撰條聞鴈有感一詩，可見其時以文字得禍者決不止是後世所知道的那幾件

大獄而已。而從周肇條的雜感、黃與堅的擬古中，又可見其時所興大獄不僅是文字獄而已。凡此種種，正是一般史籍所未會記載的或是語焉不詳的。

第三，本書的小傳，除博采生平，綜述經歷，著者並從自己的見地，就某一作家整個著作或某一專集作了學術的和人品的評論。迥異於鄭方坤國朝名家詩鈔小傳的旨在讚美，也不同於張維屏國朝詩人徵略的徒具事實。對歷來議論有所異同的人物，有些也能提出比較客觀的看法。又因著者熟識近古史事，小傳中由各家專集鈎稽出過去未被注意的史料，如法若真條中提到南溟史案橫被牽累有七百家之多，這是歷來談清代文字獄所未悉者。如李果條提到的女仙外史作者的籍貫與生平，是劉廷璣在園雜志以至中國通俗小說書目所未詳者。又如劉子壯條中述及劉曾刻印水滸傳改名爲宋元春秋，這亦是研究中國小說史的一種新材料。小傳中頗多是正舊說的考證，例如卓爾堪條中辨其非漢軍旗人和萬壽祺條中辨顧炎武行賈事都是很久以來無定論的。洪昇條臚列不少材料說明洪昇得罪與當時朝局的關係，澄清了歷來歸結爲個人恩怨的說法。至於小傳中所著佚聞遺事，大抵采自專集，不流於話柄談助。如吳庭楨條中所說康熙間文士情狀，對所謂崇儒右文的誇眩，實爲一大揭露。如丁耀亢條陳洪殺死於非命，雖目前尚無旁證，但從丁耀亢的詩及小註來看，可給研究陳洪添一資料，而劉榛條中述侯方域以力士劫徐作肅應試一事，給評論侯方域變節提供了一項重要佐證。小傳中對各家專集的題目、分集子目、卷數篇數多寡、輯刻年代與前後雕板異同，尤爲注意。清初文集，遭乾隆朝禁毀之

禍，傳存不廣，各家著錄難免蹈襲而失實，即以四庫總目提要而言，錯謬雜出，令人詫異。著者所記多由目驗，辨別審慎，間加糾正，於清代文獻考訂大有幫助。

本書的這些特點使其與諸家詩紀事有所不同，而『證史』之說與通常對詩紀事這一體制的著作的概念亦有出入。然而究竟詩紀事並無嚴格的共同的標準，以文學的作用而言，以詩證史說也自有其根據的。而著者心力貫注的小傳，對於研究清初八十年的社會政治、學術思想和文學所提供的豐富而又經過一定整理的資料，在目前還缺少與之類似的撰集，對於研究者而言，是有着一定的參考價值的。

此外，本書在選擇篇什時還有許多缺點，有時不免失之於晦，如何焯條選壬午二月朔日夜紀所見一詩，當有所見，但不加案語，無從知其所指。有時又失之於碎小，如胡香吳條選釘鞋生日一詩，吳祖修條選瀨頭兩首，梁錫珩條選偶詠美人吃烟一詩等。也有由於『存人』而拘於體制，所選之詩不盡符合『端資紀事』之旨，如范國祿條的辛酉九日邗江公集紫翠亭分賦一首，金之俊條的送張聲子南還一首皆是。至於評論詩派流變，品第甲乙，頗多沿襲舊文，有時也有鑿空之論（如論李宗渭瓦缶集謂『詩多模齊梁、嘉慶之後盛行選體，降及清末，此風猶盛，而宗渭實爲開端』），都是值得商榷的。

總之，本書的長處、特色與缺點錯誤都很分明。是在讀者。這裏所列舉的，僅僅是個人的理解和覺察所及的一些例證而已。

020-008

清詩紀事初編序

黃宗羲嘗謂當以詩證史。不當以史證詩。小年讀此。深喜其說。時正讀吳梅村集。因據詩中之事。舉以詔人。資爲笑樂。唐宋人詩集編年者。足盡其一人一生之事。卽非編年而爲分體。時地人物。偶一及之。出于親述。視後人紀載爲有別矣。詩有異于史。或爲史所無者。斯足以證史。最爲可貴。其與史合者。詩略而史詳。史固專行。何勞辭費。若辭旨隱約。以史證之。類于商譚。錢謙益讀杜小箋。事事徵實。不免臆測。近人辨論李商隱詩。各申其說。終無定論。史證之與證史。得失判然。于斯可見。昔修清史時。湘中有創議輯詩中自注以庀史材者。其說固是。然自注者少。且有爲避指摘。故布疑陣。飾以他語者。安能執一以概之。

憶自成童。卽耽文辭。喜讀史。塾師教爲八家文。篇摹句擬。苦其難似。稍長。略習六代書史。縱筆爲之。以爲狀物抒情。莫善于此。年少氣盛。遂薄視唐宋人徒工議論。研讀既久。乃知其謬。卽桐城陽湖尙不能窺其塗轍。他復何言。終由才識低下。詩文皆不能工。三十以後。專意尋考近代史事。別其異同。發其隱微。徵引甚繁。筆端繚繞。遂棄辭章不爲。亦實無暇爲之。丁丑之秋。遭逢變亂。念明清之際。先民處境。有同于我者。不識何以應變。乃取其詩時時觀之。欽其節操。憂患中賴以自壯焉。

辛巳罷講閒居。愈益搜求順康人集部。先後所得踰七百種。近時藏家著名者。宿遷王相嘗取稀見者百

種。勸爲清詩匯。其書辛亥後歸馮煦。東莞倫明以書爲性命。專收清人集部幾備。嘗見語所藏原刻順康人集。凡十二木箱。其書皆歸北京圖書館。吳興劉承幹所藏歸復旦大學。上海王培荀奔藏至富。今歸上海文獻圖書館。以寒齋所有較此數家。殆不足道。然省衣節食以求之。不則以佳籍易之。天幸所得亦有爲彼數家所無者。大約絕無僅有者五六十種。可遇而不可求者五倍之。坊肆之書。日益寥落。欲再求此七百種。恐亦非易事也。每讀竟一種。作爲題識。錄于書衣。朋從皆知有此識語。每相憇思。哀爲一集。如鄭堂讀書記之例。輒謝未遑。

年來老病侵尋。不能造述。偶觀所爲識語。亦間有發揮。享帚自珍。未忍捐棄。因思清詩紀事之作。尙未有人。蓋以順康先之。繼計有功厲鶚陳田而作。僭妄之譏。知難幸免。然三家名爲紀事。而詩多泛采。無事可紀。今之採摭。但以證史。不敢論詩。聊符紀事之實。或者不爲大雅所棄乎。若以詩論。順康兩朝爲最盛矣。初則虞山常熟錢謙益雲間松江陳子龍李雯宋徵輿分派角立。而莫東太倉吳偉業左右其間。莫不才氣浩瀚。運以健筆。稱爲大家。錢吳兼祧白陸。下啓朱華尊王士頤。風氣既開。而西泠十子。太倉十子。金臺十子。嶺南三家。雲蒸霞起。各有門庭。草野之士。方崎嶇兵革之間。呻吟鞭扑之下。艱于一飽。動觸網羅。寄其鬱陶。行歌相答。山河有淚。花鳥添悲。然舉業既捐。肆力學古。意深辭雅。多有足觀。最足以廉頑立懦救敝起衰者則推亭林顧炎武。蓋莫之能比也。臺閣之上亦附庸風雅。延攬孤寒。于是新城王士禛善于修飾。倡爲神韻之說。遂爲一時領袖。然己未鴻博以後。老成凋謝。爲韻語者。代怨誹以歌誦。易弁服以冠冕。詩教頓衰。猶賴

朱^傳查^慎行^慎老壽。長爲後生楷式。風流不墜。終非雍乾以後所能企及。故紀事論詩。皆必于是焉取之。姑題爲初集云爾。

是集之作。端資紀事。滄桑諸老。若概以清人目之。彼不任受也。然入清已三四十年。其詩皆作于清時。今采清事。自不能以其明人也而屏之。因別爲前編以示微意。此八十年間。南明弘光隆武永曆相繼播柱者十八年。臺灣鄭氏至康熙二十二年始絕。其間若李赤心若交山若其他連仆繼起者。更僕難數。康熙中葉以後。復用兵西北。蓋兵革之事。未嘗一日或息。黨爭則滿漢有爭。南北有爭。廢太子之爭。幾互三十年。當玄黃未判之際。爲商遺殷頑者。不能無恢復之望。因以事以文字獲罪死徙者多矣。兵餉不繼。胥吏苛求。更若水旱地震之災。奢侈貪黷之習。商賈之操縱盈絀。巨室之爲患鄉里。是時兵刑河漕。號爲大政。而不能無得失利病。又值海通。梯航遠至。西學西器。漸入中土。書史但稱是時之盛。民生疾苦。不能盡知。唯詩人咏歎。時一流露。讀其詩而時事大略可睹。是集采詩即依此爲準。但取其事。不限名家。率皆取自全集。寒齋所無。或從通假。其集已佚。間錄諸選本。猶冀得其專集也。小傳纂列朝詩集而作。略著其人。軼聞逸事。間亦敘列。前人紀載有訛則略予是正。其詳見于書史者。不再贅及。詩文但標舉有關係者以備參稽而已。不加論斷。以見其慎。亦自恨疏劣。未敢妄下雌黃。若錢書摹中州集。以史自命。更非所願聞也。

寒齋所藏集部。一人而有數集。一集而有數本則并之。其集爲駢散文而無詩者汰之。總集亦汰之。合之

所借得者。凡六百家。采詩二千餘首。列朝詩集爲傳一千七百。而有詳有不詳。詩多取于選本。謂得集三千種者妄也。謙益與人書。力述明初集部難得。求人錄詩示之。是有未見其書而哀錄者矣。唯宋徵璧詆之。謂盡出程嘉燧手則非。明詩綜凡三千餘人。以清初之人。盡歸于明。故幾倍錢書。是集錄八十年之人。差同錢氏。以較詩綜。則爲漏略。然詩綜特詳者。亦在萬曆以後。默念海內公私藏書中。求順康集部。當尙有四五百種。唯糾集不易。拾遺補闕。或將待之他日矣。

凡例

- 一 小傳備列名字別號。爲備參考。
- 二 小傳紀年。不用甲子。凡不能改者。注年于甲子之下。
- 三 傳唯稱名。偶有別稱。皆注原名。
- 四 卒年大抵皆由鈎稽得之。其無可考者暫缺。若從公曆。須減一歲。
- 五 采詩皆注明本集卷數。
- 六 詩中事有須釋者。間附案語。
- 七 所采古體爲多。以較近體爲質實之故。
- 八 帝號一從舊稱。爲資易曉。非必尊崇。
- 九 地理略依清初之制。江南人文較盛。以之首列。純爲分卷方便起見。別無用意。
- 十 頌聖之詩。概從屏棄。其通篇紀事。唯中間及篇末偶有諛辭者。初意爲之刪改。繼思此是當時體製使然。李杜集中有名之作。亦復不免。遂過而存之。

020-014

清詩紀事初編目錄

卷一 前編上

- | | | | | | |
|---------|---------|---------|---------|---------|---------|
| 顧炎武(一) | 歸莊(八) | 徐開任(二) | 潘樾章(二四) | 周篆(一七) | 顧夢游(一六) |
| 紀映鍾(一九) | 潘高(二) | 冷士崐(三) | 徐枋(二四) | 梁逸(三〇) | 顧涓(三) |
| 朱 嵎(三) | 趙士春(三) | 任源祥(三) | 顧景文(三) | 安璿(三七) | 陸楣(三) |
| 惲 格(四) | 楊宗發(四) | 胡香吳(四) | 楊昌言(四) | 李 寄(四) | 李 崧(四) |
| 薛 瓊(四) | 李天根(四) | 王時敏(五) | 王 挺(五) | 陸世儀(五) | 陳 璠(五) |
| 許 旭(六) | 毛師柱(六) | 朱鶴齡(六) | 吳祖修(六) | 黃翼聖(七) | 馮 舒(七) |
| 馮 班(七) | 嚴 熊(七) | 楊 炤(七) | 顧文淵(八) | 吳 歷(八) | 邵 陵(八) |
| 萬壽祺(七) | 閻爾梅(九) | 張 昭(九) | 徐孚遠(九) | 沈 寓(九) | 邢 昉(九) |
| 吳嘉紀(九) | 李 盤(一〇) | 李 瀚(一〇) | 王仲儒(一〇) | 陶 季(一〇) | 潘問奇(一〇) |
| 田 登(一〇) | 姚孫棐(二) | 姚士晉(二) | 蕭雲從(二) | 湯燕生(二) | 劉 城(二) |
| 蔣 臣(二) | 方 文(三) | 錢秉鐙(三) | 許 楚(三) | 吳肅公(三) | 方中通(三) |
| 陳舜英(三) | 吳銘道(三) | | | | |

卷二 前編下

- 孫奇逢(二五九) 孫望雅(二四二) 張鏡心(二四二) 申涵光(二四四) 殷岳(二四七) 張蓋(二四七)
- 劉逢源(二四) 趙湛(二四) 胡或(二四) 王忻(二五) 杜越(二五) 王餘佑(二五)
- 姜琛(二五) 徐振芳(二五) 李煥章(二五) 徐夜(二六) 張實居(二六) 高瓌(二六)
- 傅山(二六) 傅眉(二六) 李生光(二七) 王弘撰(二六) 孫枝蔚(二六) 李柏(二七)
- 賈開宗(二七) 田蘭芳(二七) 費密(二七) 王夫之(二七) 黃周星(二八) 杜濬(二八)
- 陶汝鼎(二六) 陶之典(二八) 張仁熙(二九) 顧景星(二九) 胡承諾(二九) 嚴首昇(二九)
- 魏禧(二九) 魏際瑞(二四) 魏禮(二六) 魏士傑(三〇) 彭士望(三〇) 朱議霽(三二)
- 李騰蛟(三四) 曾燦(二五) 陳孝逸(二七) 傅占衡(二八) 王猷定(三三) 陳允衡(三三)
- 傅振鐸(三三) 黃宗羲(三四) 萬斯同(三七) 宗誼(三九) 李鄴嗣(三三) 李暉(三三)
- 許令瑜(三六) 陳確(三六) 張履祥(三九) 呂留良(四二) 張遂辰(四四) 魏耕(四七)
- 李天植(二五) 謝泰宗(二五) 來集之(二五) 胡介(二五) 陸圻(二七) 陳廷會(二五)
- 沈謙(二五) 陳祚明(二六) 陸弘定(二六) 吳景旭(二六) 董說(二六) 馮景(二六)
- 李標(二九) 李燁(二七) 李光堯(二七) 李應機(二七) 李復夔(二七) 周質(二七)
- 馮愷愈(二九) 楊賓(二〇) 林古度(二二) 李世熊(二三) 余思復(二五) 余賓碩(二七)

劉坊(二八) 鄺露(二九) 屈大均(二九) 釋成鷺(二四) 陳子升(二九) 陳恭尹(三一)
卷三 甲編上 江南

錢謙益(三五) 錢陸燦(三〇) 歸允肅(三一) 嚴虞惇(三二) 汪繹(三三) 蔣漣(三四)
蔣廷錫(三四) 王譽昌(三六) 尤侗(三七) 尤珍(三〇) 汪琬(三二) 許虬(三四)
韓 葵(三五) 彭定求(三六) 陸瞻洪(三七) 汪士鋐(三八) 吳廷楨(三六) 顧嗣協(三九)
顧嗣立(三〇) 何焯(三一) 陸 淹(三三) 陳學洙(三三) 陳學泗(三四) 金人瑞(三六)
吳 綰(三九) 釋曉青(四〇) 釋大汕(四二) 翁 澍(四七) 惠周惕(四九) 李 果(五一)
吳士玉(三五) 石 龐(三五) 葉方藹(三七) 盛符升(三五) 徐乾學(三三) 徐 駿(三五)
徐元文(三六) 徐昂發(三七) 金奇玉(三四) 黃中堅(三五) 王蒼璧(三七) 金之俊(三七)
計 東(三七) 葉 燮(三七) 鈕 琇(三六) 潘 耒(三六) 徐 鉉(三六) 吳兆騫(三七)
吳樹臣(三九) 周之方(三九) 吳偉業(三九) 吳 曠(三九) 王 揆(三九) 王 撰(三九)
王 攄(四〇) 王 抃(四二) 王 揆(四三) 周 肇(四四) 沈受弘(四五) 崔 華(四八)
黃與堅(四九) 王 昊(四〇) 王綢修(四二) 王曜升(四二) 唐孫華(四三) 王時憲(四六)
王時翔(四八) 郁汝楫(四二) 顧陳圻(四二) 趙 俞(四三) 張大受(四四)

卷四 甲編中 江南

- 龔 策(四三) 龔士薦(四六) 董以寧(四九) 董大倫(四三〇) 邵長蘅(四三二) 楊文言(四三四)
- 曹夢真(四四) 董文驥(四九) 陳玉璣(四二) 唐惲宸(四三) 陳 鍊(四三三) 莊天錦(四三三)
- 錢二白(四四) 徐永宣(四五) 錢名世(四七) 楊士凝(四四) 沈 鍾(四三〇) 莊 歆(四三二)
- 管 楡(四五) 秦松齡(四五) 曹 禾(四五) 嵇永仁(四五) 季麒光(四六一) 朱 襄(四五九)
- 陶孚尹(四五) 蔣中和(四六〇) 陳維崧(四六三) 任繩隗(四六三) 周茂源(四六四) 周 綸(四六五)
- 沈 荃(四六) 王鴻緒(四六) 王九齡(四九) 沈宗敬(四八九) 王圖炳(四七〇) 畢大生(四七〇)
- 黃之雋(四七) 高不羈(四七五) 李 雯(四七五) 王 原(四七七) 葉映榴(四八一) 張 宸(四八二)
- 張永銓(四八三) 蔡 湘(四八四) 姚 淑(四八五) 王文治(四八五) 何 棗(四八七) 陳名夏(四九〇)
- 馬世俊(四九) 魏譽徵(四九二) 宜重光(四九四) 蔣 超(四九五) 吳 綺(四九五) 卓爾堪(四九六)
- 宗元鼎(四九) 汪 楫(四九九) 汪懋麟(五〇〇) 許承家(五〇二) 史申義(五〇三) 顧圖河(五〇四)
- 熊維熊(五〇六) 章性良(五〇七) 郭元鈺(五〇九) 退耕老農(五一〇) 范國祿(五一) 季開生(五二二)
- 王國璉(五三) 成永健(五四) 李必恆(五七) 陳忠靖(五八) 繆 沅(五九) 釋元玉(五三〇)
- 孫宗彝(五三) 李 枏(五三) 李國宋(五四) 徐用錫(五七)

卷五 甲編下 江南 直隸

陶蔚(五二) 喬萊(五五) 王式丹(五七) 朱經(五八) 稽宗孟(五九) 靳應昇(五〇)
杜首昌(五四) 丘象升(五四) 李時震(五四) 阮晉(五四) 戴晨(五八) 許志進(五七)
姚文然(五二) 龔鼎華(五二) 李天馥(五四) 李孚青(五五) 許夢麒(五五) 田實發(五七)
姚文燮(五八) 張英(五九) 張茂稷(五二) 姚宛(五三) 方孝標(五三) 方登輝(五八)
方式濟(五七) 方都秦(五七) 方貞觀(五三) 曹燁(五三) 吳苑(五四) 江闈(五五)
洪鈇(五七) 汪樹琪(五七) 施閏章(五〇) 高詠(五二) 梅清(五三) 梅文鼎(五四)
袁啓旭(五五) 巫之櫟(五六) 張扶翼(五七) 許登逢(五八) 趙吉士(五九) 江銘勳(五九)
汪森(五〇) 程瑞祜(五二) 黃文彪(五四) 余光耿(五五) 章永祚(五九) 鄧旭(五九)
劉凡(六〇) 李煜(六二) 程鑾(六二) 范士楫(六三) 梁清標(六五) 梁清遠(六八)
梁穆(六八) 崔岱齊(六九) 王崇簡(六〇) 王熙(六一) 李爵(六二) 楊思聖(六四)
郝浴(六五) 郭葵(六六) 魏裔介(六九) 張衡(六二) 馬之驥(六二) 顧沂(六三)
閻中寬(六三) 袁佑(六三) 龐壇(六五) 陳信(六六) 邊汝元(六九) 龍震(六三)
成文昭(六三)

卷六 乙編 八旗 山東 山西

鄂貌圖(六三) 岳端(六四) 博爾都(六五) 索芬(六六) 文昭(六七) 塞爾赫(六八)

- 胤 禮(六九) 范承謨(六〇) 吳興祚(六二) 盧 震(六二) 施世綸(六三) 納蘭成德(六四)
揆 欽(六四) 修世思(六〇) 曹 寅(六三) 李興祖(六五) 劉廷璣(六五) 郎廷槐(六六)
高其倬(六五) 劉正宗(六九) 孫廷銓(六〇) 孫廷鐸(六一) 馮 溥(六二) 趙執信(六三)
唐夢賚(六五) 高 珩(六六) 李呈祥(六八) 法若真(六九) 冷玉娟(七二) 杜 濬(七二)
宋 琬(六七) 王士祿(六七) 王士禛(六七) 傅 辰(六八) 何世璠(六一) 丁耀亢(六二)
丘石常(六六) 丘志廣(六八) 李澄中(六九) 曹申吉(六九) 曹貞吉(六九) 王曰高(六九)
毛漪秀(六六) 盧世灌(六七) 蕭惟豫(六九) 謝重輝(六九) 程先貞(七〇) 李 泂(七二)
田 雯(七二) 田 霽(七三) 馮廷樾(七四) 趙善慶(七五) 安致遠(七六) 安 箕(七七)
董 訥(七八) 董 訪(七八) 孔傳鈺(七〇) 孔尙任(七二) 顏光敏(七三) 顏光猷(七五)
王 萃(七六) 林之喬(七九) 朱之俊(七三) 石鳳臺(七五) 于成龍(七六) 白胤謙(七六)
上官鉉(七七) 馮如京(七九) 魏象樞(七九) 魏學誠(七三) 仇昌祚(七二) 程康莊(七三)
陳廷敬(七三) 侯七乘(七四) 范鄙鼎(七五) 郭九會(七六) 閻若璩(七六) 吳 雯(七六)
梁錫珩(七九) 王道直(七〇) 王震龍(七〇)
- 卷七 丙編 浙江 江西
曹 溶(七二) 蔣 薰(七二) 曾王孫(七四) 李明密(七四) 李宗涓(七六) 朱彝尊(七七)

徐嘉炎(七五) 李繩遠(七五四) 李良年(七五八) 李符(七五九) 鄒天嘉(七六一) 曹爾堪(七六一)
 魏坤(七六二) 柯煜(七六四) 勞之辨(七六五) 吳之振(七六八) 李永祺(七六九) 彭孫適(七七〇)
 徐豫貞(七七三) 馬維翰(七七五) 陳之遴(七七八) 陳殿桂(七七七) 陳奕禧(七八二) 陳元龍(七九五)
 朱嘉徵(七六六) 查慎行(七八八) 查嗣琛(七九一) 查嗣庭(七九二) 丁澎(七九四) 王益朋(七九五)
 沈峻曾(七九六) 戴梓(七九七) 湯右曾(七九八) 沈近思(八〇〇) 王錫(八一〇) 毛先舒(八一〇)
 高士奇(八〇三) 顧永年(八〇五) 卓允基(八〇六) 王廷燦(八〇七) 洪昇(八〇八) 章撫功(八二一)
 胡榮(八二二) 陸進(八二三) 洪若臯(八二四) 徐倬(八二八) 許汝霖(八二九) 蔡升元(八三〇)
 嚴我斯(八三〇) 沈涵(八三三) 沈季友(八三三) 陸奎勳(八三四) 汪文柏(八三七) 李昌祚(八三八)
 汪爲熹(八三九) 毛奇齡(八三〇) 單隆周(八三三) 張遠(八三四) 姚祖振(八三五) 傅仲辰(八三七)
 章大來(八三九) 陳至言(八四〇) 曹恆吉(八四二) 宋起鳳(八四二) 余縉(八四三) 王舟瑤(八四七)
 毛際可(八四八) 方象瑛(八四九) 徐士訥(八五二) 吳宗愛(八五三) 陳錫嘏(八五三) 范廷諤(八五五)
 裘璉(八五七) 鄭梁(八五九) 姜宸英(八五九) 徐文駒(八六〇) 李元鼎(八六一) 李振裕(八六二)
 李來泰(八六五) 游東昇(八六五) 游恢(八六七)

卷八 丁編 陝西 河南 湖廣 四川 雲南 貴州 福建 廣東
 李因篤(八六九) 張表(八七二) 楊素蘊(八七三) 王又旦(八七三) 屈復(八七五) 周燦(八七九)

- 釋如乾(八七九) 宋 權(八八〇) 宋 肇(八八一) 宋 至(八八二) 薛所蘊(八八三) 劉世燧(八八七)
彭而述(八八八) 周亮工(八八九) 趙 賓(八九〇) 蕭家芝(八九一) 賀振能(八九二) 馬上驥(八九三)
傅而師(八九四) 韓程愈(八九六) 徐作肅(九〇〇) 侯方域(九〇一) 劉 榛(九〇三) 湯 斌(九〇五)
李繼白(九〇六) 劉體仁(九〇八) 梁 熙(九一〇) 呂履恆(九一二) 呂謙恆(九一三) 萬如洛(九一三)
何彝光(九五) 高一麟(九六) 殷元福(九六) 劉青藜(九一九) 程正揆(九三三) 劉友光(九三六)
王 岱(九三八) 黃師憲(九三九) 劉子壯(九三二) 熊伯龍(九三三) 盧 絃(九三三) 王澤弘(九三五)
王材任(九三七) 熊賜履(九三六) 車萬育(九三九) 金德嘉(九四〇) 陳大章(九四一) 張明先(九四二)
陳鵬年(九四三) 王 戩(九四四) 胡 煦(九四四) 胡世安(九四六) 李 蕃(九四九) 李鍾璧(九五二)
李鍾峨(九五二) 釋讀徹(九五三) 趙士麟(九五四) 許賀來(九五七) 趙 河(九六〇) 周起渭(九六一)
黎士弘(九六二) 毛鳴岐(九六三) 魏 憲(九六四) 林雲銘(九六六) 陳常夏(九六六) 陳夢雷(九六九)
丁 煒(九七二) 謝亦驥(九七三) 張 遠(九七三) 林 佶(九七五) 李開葉(九七七) 蕭正模(九七六)
李光坡(九七九) 易 弘(九七九) 程可則(九八一) 蘇楫汝(九八二) 方殿元(九八二) 梁佩蘭(九五五)
王 隼(九八九) 廖 燕(九九一) 梁以壯(九九三) 鄧廷詰(九九四)

清詩紀事初編卷一

前編上

顧炎武 亭林文集六卷詩集五卷亭林餘集一卷蔣山傭殘稿一卷

顧炎武。本名繼紳。更名絳。字忠清。乙酉弘光元年後。更名炎武。字寧人。號亭林。學者稱亭林先生。其隨事舉名。居神烈山下。則曰蔣山傭。或曰傭。或曰鷹揚弟子。變姓名渡江至淮陰。曰圭年。爲顧寧人之音轉。崑山人。弘光之立。以貢生薦授兵部司務。乙酉五月。清兵破南都。下荆髮令。閏六月十日。明兵科給事中陳子龍。舉人徐孚遠章簡。起兵于松江。與陳湖陸世鏞及總兵吳志葵海上兵合。一時義師蜂起。華亭則總督兵部侍郎沈猶龍。下江監軍道荆本徹。中書舍人李待問。嘉定則左通政司侯峒曾。進士黃淳耀。總兵蔣若來。崑山則鄧陽巡撫僉都御史王永祚。編修朱天麟。吳江則兵部主事吳易。總兵黃蜚。太倉則總兵張士儀。宜興則行人盧象觀。江陰則典史閻應元。是謂江上之師。謀以松江兵攻浙。嘉定太倉兵攻沿海。吳志葵攻蘇州。而宜興兵急趨南京。一時聲勢甚盛。崑山知縣楊永言及炎武歸莊。皆在王永祚軍中。適清兵薄崑山。乃歸與永言守城。十日而城破。死者枕藉。天幸得脫。母貞孝竟以絕食死。遺戒炎武毋得事二姓。時隆武新立于福州。大學士路振飛薦炎武爲兵部職方司主事。是後四五年間。管東至海上。北至

王家營。僕僕往來。蓋受振飛命。糾合淮徐豪傑。初振飛巡撫淮揚。嘗團練鄉兵。得兩淮間勁卒數萬。後爲劉澤清散遣。炎武實倚萬壽祺爲東道主人。故贈詩曰。何人調北方。處士才無兩。又送歸高士之淮上詩曰。攜書還就故人齋。又曰。窗下聽雞舞亦佳。高士爲歸莊。亦授官于閩者。主壽祺家。以訓蒙爲名。實代炎武當連絡之任。炎武每從淮上歸。必詣洞庭告振飛之子澤溥。或走海上。謀通消息。非真欲入海也。又有贈路光祿太平詩。爲振飛仲子。後奉永曆命徵兵于外者。振飛既沒。必由粵中主持此事。故太平自粵入吳。乙未^{順治十年}爲仇家葉方恆所中。澤溥兄弟盡力營救。歸莊且說錢謙益脫炎武於難。謙益亦與海上有連者也。丁酉^{順治十四年}北行。徘徊于登萊之間。又北至永平。登孤竹。出榆關。或海上尙有義從。有待撫輯。閱三載。始南歸揚州。旋復北上。又二載。南歸入越。似南中預有期約。壬寅^{康熙元年}以後。西南既覆。鄭成功亦沒。乃浩然長往。以讀天下書友天下士爲事。是後二十年間。踪跡多在山左右。嘗出雁門。兩至大同。蓋明亡邊兵多有存者。姜瓖之變。募邊兵事攻戰。期年清人不能克。李因篤屈大均走塞上。意即在此。知炎武始終不忘恢復。潘耒贈炎武六十壽序。言事功不成當以著述傳世。可謂不知炎武者。因篤詩云。世易繁霜應有道。天留碩果定何心。晨星落落長蒿目。忍使尋盟負斷金。勉以有爲。故炎武將易簣矣。猶答之云。一從聽七發。欲起命巾車。喜其有同心也。遂以壬戌正月。卒於曲沃。年七十。事具清史儒林傳下。及全祖望亭林先生神道表。炎武之學。以博學於文。行己有恥爲主。是合學與行爲一。載書出游。復卽其地卽其事卽其人以求之。見夫典制文獻文集方志之有關於民生國計者。輒手錄之。蠅頭細

楷。始終若一。山川亭障。道途險要。古蹟沿革。土物民風。下至草木鳥獸魚蟲之微。無不身經目驗之。發書覆案以爲信。然後筆之以待異日之用。所至交其賢豪長者。期於共濟艱難。是又合治學與經世爲一。畢生精力。盡於日知錄一書。初刻八卷本於庚戌。康熙九年自序若其所學。欲明學術。正人心。撥亂世以興太平之事。則有不盡於是刻者。絕筆之後。藏之名山。以待擇世宰物者之求。至乙亥。康熙十四年潘耒始爲編刻三十二卷本。其書上篇經術。中篇治道。下篇博聞。程先貞稱其本于經而不泥于昔聞。原于史而不拘於成說。潘耒以爲歎禮教之衰遲。傷風俗之頹敗。則古稱先。規切時弊。尤爲深切著明。大約居今以證古。酌古以準今。明其得失。而意不在復古。此所以爲通儒也。音學五書三十九卷。爲三百篇而作。炎武自謂與日知錄皆足以啓後王垂來學。蓋漢魏而後。四裔之人。入居中土。聲音始雜。茲編微意。在復中華之舊而已。引自衛反魯然後樂正雅頌各得其所爲喻。蓋光復之功。不在衣冠禮樂之下。肇域志一百卷。經始于崇禎十二年己卯。取一統志方志。復取二十一史參互書之。意在考沿革。天下郡國利病書一百二十卷。同時所作。多採當世紀載及文集。所以見一時之利病。兩書未經刪訂。體例不一。然有用之書。整頓民物者。所必採錄也。其他撰述。得見於今者。左傳杜解補正三卷。九經誤字一卷。五經同異三卷。韻補正一卷。顧氏譜系考一卷。歷代帝王宅京記二十卷。營平二州地名記一卷。昌平山水記二卷。京東考古錄一卷。山東考古錄一卷。譙觚十事一卷。求古錄一卷。石經考一卷。金石文字記六卷。菴中隨筆三卷。救文格論一卷。亭林棟錄一卷。亭林文集六卷。亭林詩集五卷。亭林餘集一卷。蔣山傭殘稿一卷。炎武史

學最精。集中三朝紀事闕文序。言其祖誨以當求實學。凡天文地理兵農水土。及一代典章之故。不可不

熟究。又時時爲之言朝局門戶。故炎武于庚申

萬曆四十八年

至戊辰

崇禎元年

邸報。皆曾寓目。雖所著史事之書。盡以

資潘檉章。後來力辭熊賜履助修明史之招。然未嘗不留心此事。既爲其祖補纂紀事闕文。復撰熹廟諒

陰記。南都時事。

見集中與戴振野書

及皇朝修文備史。

見趙懷玉亦有生齋文集卷六。備史無卷數。四十帙。七十五種。

此具可信者也。不知何人。竟以聖

安本紀歸之炎武。無論識解卑下。文筆陋劣。卽摹綱目有書法發明。豈炎武所屑爲耶。他尙有託名者二

三種。宜盡屏之。詩文集皆潘耒所編刻。誤以通考隋論入集。後乃易之。詩觸忌諱者。多經刪削改字。乾

隆時仍列爲禁書。餘集爲彭紹升所輯。蔣山傭殘稿。皆酬應簡札。末附熹廟諒陰記。炎武少爲詞章有名。

中年始留意著述。自貴其文。不輕作表幽之文。李願請爲母傳。亦竟不許。集中郡縣論。錢糧論。生員論。

指陳時弊。與日知錄參看。誠不朽之作。詩稍寬假。然投贈亦必擇人而施。朱彝尊評云。詩無長語。事必

精當。詞必古雅。抒山長老所云。清景當中。天地秋色。庶幾似之。實則其詩足貴。正由字句間皆有事可

指。且甚顯豁。箋詩者。不于此尋經。惜哉。

李定自延平歸齋至御札

春風一夕動三山。使者持旌出漢關。萬里干戈傳御札。十行書字識天顏。身留絕塞援枹伍。夢在行朝執

戟班。一聽綸言同感激。收京恭待翠華還。

李林詩集一

隆武二年八月。上出狩。未知所之。其先桂王卽位于肇慶。改元永曆。時太子太師吏部尙

書武英殿大學士路振飛在廈元造隆武四年大統曆用文淵閣印頒行之九年正月

臣顧炎武從振飛子中書舍人臣路澤溥見此有作

夏后昔中微。國絕四十載。但有少康生。卽是天心在。曆數歸君王。百揆領冢宰。路公文貞公識古今。危難心不怠。屬車乍蒙塵。七閩盡戎壘。粵西已建元。來歲直丁亥。侵尋一年半。迫蹙限匡海。廈門絕島中。大澤一空曩。新曆尙未頒。國疑更誰待。遂命疇人流。三辰候光彩。印用文淵閣。丹泥勝珠琲。龍馭杳安之。台星隕衡箚。猶看正朔存。未信江山改。在昔順水軍。光武戰幾殆。子顏獨奮然。終竟齊元凱。叔世乏純臣。

公卿襟鄙猥。持此一冊書。千秋戒僚采。

亭林詩集二

謁夷齊廟

言登孤竹山。愾焉思古聖。荒祠寄山椒。過者生恭敬。百里亦足君。未肯滑吾性。遜國全天倫。遠行辟虐政。甘餓首陽岑。不忍臣二姓。可爲百世師。風操一何勁。悲哉尼父躋。每歷邦君聘。楚狂歌鳳衰。荷蕢譏擊磬。自非爲斯人。棲棲無乃佞。我亦客諸侯。猶須善辭命。終懷耿介心。不踐脂韋徑。庶幾保平生。可以

垂神聽。

亭林詩集三

重謁孝陵

舊識中官及老僧。相看多怪往來曾。問君何事三千里。春謁長陵秋孝陵。

亭林詩集三

十九年元旦

平明遙指五雲看。十九年來一寸丹。合見文公還晉國。應隨蘇武入長安。驅除欲淬新礪劍。拜舞思彈舊賜冠。更憶堯封千萬里。普天今日望王官。亭林詩集四

汾州祭吳炎潘樾章二節士

露下空林百草殘。臨風有慟奠椒蘭。非溪二子所居血化幽泉碧。蒿里魂歸白日寒。一代文章亡左馬。千秋仁

義在吳潘。巫招虞殯俱零落。欲訪遺書遠道難。亭林詩集四

楚僧元瑛談湖南三十年來事作四絕句

共對禪燈說楚辭。國殤山鬼不勝悲。心傷衡嶽祠前道。如見唐臣望哭時。

孤墳一徑楚山尖。鐵石心肝老孝廉。流落他方餘惠遠。撫琴無語憶陶潛。先兄同年友長沙陶君汝嘉

督師公子竟頭陀。詩筆崢嶸浩氣多。兩世心情知不遂。待誰奮發魯陽戈。武陵楊公

夢到江頭橘柚林。衲衣桑下愜同心。不知今日滄浪叟。鼓枻江潭何處深。亭林詩集五

歲暮

平生慕古人。立志固難滿。自覺分寸長。用之終已短。良友日零落。悽悽獨無伴。流離三十年。苟且圖飽煖。壯歲尚無聞。及今益樛散。治蜀想武侯。匡周歎微管。願一整頽風。俗人謂迂緩。孤鏡照遺經。雪深坐空館。

一歲倏道盡。我行復何如。何爲窮巷中。悄然日閒居。未敢聽輪扁。且讀堂上書。糟粕雖已陳。致治良有餘。典謨化刀筆。衣冠等猿狙。孰令六代後。一變貞觀初。四海皆農桑。弦歌徧井閭。我亦返山中。耦耕伴

長沮。亭林詩
集五

河上作

龍門下雷首。自古稱西河。入自積石來。出塞復逶迤。呂梁懸百仞。孟門高峨峨。遠矣大禹功。山澤得所宜。靈蹟表華巖。金行鎮西垂。黃虞日已遠。曩怒尋干戈。去年方鬪爭。掘壕守朝那。車騎如星流。衣裝兼橐駝。狼弧動箭鏃。參伐揚旂麾。嗟此河上軍。來往何時罷。今年暫寢兵。邏卒猶譏訶。手持一尺符。予錢方得過。追惟狄泉陷。地底生蒼鵝。窻窻來攫人。遠路橫長蛇。寰區恣刀俎。飛走窮網羅。萬類不足飽。螻蟻其奈何。仰希神明眷。下戢陽侯波。行將朝白帝。一訴斯民罹。猿鳥旣長吟。窮人亦悲歌。歌止天聽回。

勿厭辭煩多。亭林詩
集五

酬李子德二十四韻

戴雪來青鳥。開雲見紫書。故人心不忘。旅叟計何如。上國嘗環轍。浮家未卜居。康成嗟耄矣。尼父念歸與。忽枉佳篇贈。能令積思摠。柴門晴旭下。松徑谷風舒。記昔方傾蓋。相逢便執祛。自言安款段。何意辱干旟。適楚懷陳軫。游燕弔望諸。詎驚新寵火。肯與舊交疎。不磷誠師孔。知非已類蘧。老當爲圃日。業是下帷初。達夜抽經笥。行春奉板輿。誅茅成土室。闢地得新畬。水躍穿冰鯉。山榮向日蔬。已衰耽學問。將

隱悔名譽。客舍輕彈鋏。王門薄曳裾。一身長瓠落。四海竟淪胥。契闊頭雙白。蹉跎歲又除。空山清澗曲。喬木綠郊餘。不出風威滅。無營日景徐。但看堯典續。莫畏禹陰虛。地闊分津版。天長接草廬。一從聽七發。欲起命巾車。亭林詩集五

歸莊歸元恭文續鈔七卷歸玄恭遺著不分卷

歸莊。字玄恭。號恆軒。崑山人。有光曾孫。諸生。入清後。更名祚明。或稱歸藏。歸妹。歸乎來。字或稱元功。園公。懸弓。尔禮。亦號恆軒。普明頭陀。塵鑿鉅山人。晚歲居僧舍又號圓照。順治二年六月。縣丞閻茂才攝縣事。下令薙髮。莊白衆殺之。嬰城固守。事敗亡命。自謂首難之人。逃竄久之乃免。欲求全身濟世之策。又云。投筆仗劍之志。無日無之。上吳鹿友開老書與顧炎武最相善。稱爲同里同學。一心一嚮。炎武至淮

上。招納豪傑。莊亦屢詣之。又訓蒙萬壽祺家。實覘北來消息。事不得當。乃教授以給衣食。猶援朱祐都講自比。世言莊喜罵人。炎武與葉方恆搆難。莊爲書責方恆。戕其奸謀。錢謙益身後家難作。不保妻子。謙益莊之師也。爲書責錢會。使錢朝鼎不敢爲惡。此所謂仗義執言。非尋常人所能爲。不得謂之爲罵。唯與朱用純齟齬。爲不可解。既目之市僧無賴。復云。十餘年來。窮困流離。零丁孤苦。于是見侮于親戚。見欺于宗族。前年遂至見辱於叛奴。不意繼叛奴之後者。復有朱致一也。所謂毒口。與汪琬爭校勘太僕集事。兩人皆卞急負氣。遂至口不擇言。若季振宜正宜有此一罵。雜著中難壬。謂吳修齡依倚徐乾學兄弟。

作正錢以詆謙益。不唯莊罵之。錢陸燦亦罵之。修齡作圍爐詩話以罵七子雲間。強辭尤甚于莊。至不容于鄉里。則莊無是也。誅邪鬼以罵金聖歎。謂其貪戾放肆。不知有禮義廉恥。粗有文筆。足以濟其邪惡。批評水滸傳。名之曰第五才子書。又批評西廂記。名曰第七才子書。惑人心。壞風俗。考其生平。則嘗奸有服之婦人。誘美少年爲生徒。鬻之巨室爲奴。乙酉之亂。匪人三千金。蘇州人述其邪淫之事尤多。嘗見一馮姓者。知其爲門人。語之曰。幸致意君之師。有同郡歸玄恭者。見其書。聞其行。必欲殺之。乃悟汪琬謂莊能殺人。蓋即指此。一以爲常語而道之。一執之以爲口實。未免兩失。晚年屏居僧舍。窮愈甚。罵愈烈。二子一爲僧。一出亡。可謂天之僂民。然稍自給。則作草書畫竹賦詩飲酒如故。卒於康熙十二年。年六十一。所著有懸弓集三十卷。恆軒詩集十二卷。恆軒文集十二卷。皆失傳。道光中太倉季錫疇得恆軒稿六冊。輯其文百有五首爲六卷。詩四十八首爲一卷。刻爲歸元功文鈔。未幾板毀。錫疇別輯不見文鈔者一百七十八首爲七卷。光緒末。稿歸歸氏後人。增筆記二十四則。刻爲歸元恭文續鈔。曰續者。冀文鈔之得見也。同時崑山朱紹成。亦輯成詩文十卷。附萬古愁曲子于後。稿歸徐崇恩。略有增益。爲文一百七十七首。詩二百二十七首。無次第不分卷。刻爲歸玄恭遺著。於是莊之文大略具于此矣。其文胎息深厚。不務紆徐有致。可謂善於學有光者。詩述家難。意酸辭苦。至於登臨游覽。神氣飛騰。奇乃在骨。萬古愁據魏禧所撰恆軒壽言。乃知爲莊所作。禧能擊鼓歌之。或莊親授。今傳世本。辭多變易。徐樹丕識小錄所載有遍數者。當是最先傳本。

崑山被圍甚急兩嫂暨諸從子女皆在城中

諸兄不可據。嫂叔誼應親。緩急關千慮。晨昏奪一身。孤城危不敵。盡室仗何人。竊慕同居世。安危事得均。歸玄恭遺著

傷家難作

翩翩梁上燕。雖離雲中雁。羣匹不相離。往來歲時慣。傷哉人事違。參辰兩隔間。仲氏遠從戎。叔氏羈薄宦。鋒鏑交江浙。先後嬰憂患。千里問存亡。消息半真贗。鬱鬱深園思。戚戚門閭盼。三覆脊令詩。中宵淚欲漣。

皇天與祖宗。降禍何其酷。男兒既流亡。死生難可卜。婦人復何罪。盡室罹荼毒。貴者謀不臧。富者愛錢穀。士民怯戰鬪。城破宜顛覆。哀哉崑岡篋。不辨石與玉。相率赴九原。守身誓不辱。行路爲惻傷。況乃在骨肉。出門西北望。臨風長慟哭。

芳蘭生庭除。叢桂列邱園。高下含異質。灌溉待滋繁。一旦野樵至。折之炊朝餐。主人自外來。荆棘滿衡門。行行視衆芳。斬伐罕有存。恨不移之去。植彼高山原。原上鬱青青。桑梓與椿萱。柯葉能蔽蓋。四圍足藩垣。物情多安土。往來頗憚煩。竟罹斧斤患。永斷雨露恩。桃李猶相代。何況生同根。死生下相保。負負復何言。歸玄恭遺著

避難

中林張羅網。羣鳥皆高飛。深山多虎狼。白日行人稀。吾生何不辰。舉足逢百罹。浩浩乾坤內。蹙蹙靡所之。夜半驚禍患。獨身走荒蹊。月黑急雨至。道滑津渡迷。破帽怯薄寒。短衣溼淋漓。村墅越七八。天明得招提。招提實舊館。爲復且羈栖。適會藏亡覺。艱脆非我宜。微聞我同姓。僑居張浦涓。敢憚行路難。去去還相依。逢人問前途。回首忘東西。勁風吹敝蓋。足力不自持。十步九顛蹶。鼻額沾塗泥。更苦傷右脛。行步益遲迴。晡時至浦上。苦飢甚於疲。尋訪杳無蹤。踟躕將安歸。舅氏有蒼頭。一廬良在茲。窮途且投止。叩門色忸怩。其家見我狀。怪問所從來。憐我遭多難。引我進茅茨。趣爲具湯沐。以次更裳衣。斯須陳酒食。得解凍與飢。尋捧衽席至。與我息勞罷。體蘇魂來復。始覺身艱危。亂世風俗惡。凡事皆逆施。臣則賣其君。主亦受奴欺。况非親隸役。又當危苦時。情厚執禮恭。良亦世所希。世人讀詩書。荆棘滿胸懷。田父不識字。往往見天機。居家既多懼。遠行又無資。於茲託孤蹤。庶幾免憂疑。夜夢遊四方。忽復在庭闈。覺來若有失。中情愴以悲。開戶天蒼茫。風雨寒淒淒。長吟寫我心。涕下霑雙扉。

歸玄恭
遺著

徐開任 愚谷詩稿六卷

徐開任。字季重。崑山人。入清後。棄諸生。以隱逸終。崑山三徐。科名鼎盛。開任與其父爲同祖兄弟。獨標高節。嘗輯刻明名臣言行錄九十五卷。朱鶴齡稱其輯數千年隱士。人爲之傳。撰愚谷詩稿六卷。載詩迄康熙九年。當卽其時所刻。開任年已七十有一矣。卒年俟考。集中雖無夷狄胡虜犬羊腥羶醜詆之辭。

而遇先朝皆擢頭書寫。若癸巳順治十年三月十九日二首。夏日書懷。哀金陵。憫時。烈皇帝諫。和紅豆詩。哀長平公主辭。雜感六首。感事書懷五十韻。七哀詩。兩窗雜詠四首。壬寅康熙元年紀事。隴西將軍諸篇。字字皆關詩史。即無一字不具故國之思。與易堂魏禮彭士望酬唱。非不與密謀者。其自述若并州不切神州夢。萱草難忘杞國憂。若江山不是無情物。呼吸風雲在運籌。若勿爲年暮。老驥千里。勿謂時艱。河清可俟。若男子身經烽火健。加餐努力俟河清。若縱橫謀不遂。放逸志終堅。皆慷慨悲憤。他人不敢涉筆者。故錢謙益稱其有夏聲無死聲。當乾隆禁書時。使有人告發。族矣。竟得幸免。亦僅事也。其詩學杜。蓋不隨時流爲轉移者。言行錄尤詳天崇及滄桑間事。頗有體裁。開任年輩與顧炎武相若。獨不相知。未得其解。豈以開任厚于葉方恆耶。

感事書懷五十韻

時值滄桑變。猶存老伏處。家陳先世籍。身坐舊時甍。憶昔寒窗苦。曾懷赤幟寧。三冬錐欲刺。乙夜硯將穿。並挾相如藻。兼鈎向秀文。彈琴明月裏。說劍白雲邊。賦就甘泉獻。才同朽質捐。桑榆期晚景。曆數竟新遷。殺氣侵宸極。妖星指御筵。火延長樂樹。矢及未央顛。貴主揮戈泣。中宮仗節堅。龍髯攀莫返。馬革裏何先。拜表新供奉。趨班舊從員。狂徒吹玉笛。綵女落花鈿。鶴駕知何在。龍樓忽已燃。萬方爭賈勇。一旅策難驚。雖有專征將。翻成屬國天。深宮歌玉樹。要路市金錢。爵進先迎駕。仇同後執鞭。邊書沈御榻。王氣恃長川。無復千尋鎖。徒修百翅船。鯨衝京口進。戰鼓石頭懸。相國無遺表。將軍有棄鉞。衣冠神慘

慘。野老涕漣漣。已矣天難問。悲哉志可憐。焚山懷介子。辭漢悼銅仙。雖抱中原恨。難消故國愆。荒陵穿
十二。殘騎倒三千。每欲聞雞舞。深期躍馬前。縱橫謀不遂。放逸志終專。擬種千竿竹。歸耕五畝田。朝吟
諸葛表。夕詠少陵篇。蘭死香猶戀。石移薛自妍。理憂杯酒足。寄興寓言全。種菜園中老。藏書井底傳。寧
違時匿影。勿學少磨肩。雄白無心競。雌黃任口宣。低徊留故宅。高敞建新阡。臘自尊前代。瓜瓞望後綿。
恥爲衣食計。甘與柄瓢緣。忠孝吾家訓。簪纓世上聯。雄豪無久據。文賦有長延。自愧雕蟲鈍。空懷附鳳
翮。蒼生雖肯待。白首抑何過。松柏凌霜古。蒲葵帶露鮮。息方當六月。氣已壯千年。歷盡風塵苦。深知進
退牽。陰雲猶密布。漢月幾時圓。困極思鴻鵠。愁來拜杜鵑。十洲如可到。健翮奮前褰。愚谷詩 稿三

壬寅紀事

天地無情白日沈。夏家共主失樹尋。山川實下攀髯淚。朔漠空懸碎首心。望帝有魂成杜宇。苗人何怨肆
鴉音。昆明劫火千年恨。留與巫陽作楚吟。愚谷詩 稿六

隴西將軍

十年羣盜尚披猖。百戰猶爭大義匡。盡道少康能祀夏。俄驚帝子遠沈湘。渡河力竭宗留守。報本身先李
侍郎。欲奠國殤何處是。點蒼山下月茫茫。愚谷詩 稿六

潘樞章 觀物草廬焚餘稿

潘樞章。字力田。吳江人。入清棄諸生。與吳炎私修明史。既購得實錄。復旁搜人家所藏文集奏疏。懷紙吮筆。早夜矻矻。所書盈牀滿篋。炎致書錢謙益述其事。謙益深許之。助以藏書。顧炎武許其有史才。盡以所藏關於史事之書千餘卷歸之。兩人撰爲紀表志傳。歷十餘年未就。先刻今樂府以示作書之意。會吳與莊氏史獄興。莊廷鑑者富家。嘗得朱國禎所錄國事公卿誌狀疏草數十帙。因招致賓客。編輯爲明書百餘帙。多忌諱語。廷鑑沒。其父胤城爲刻之。慕吳潘盛名。列名參閱。爲吳之榮告發。成大獄。胤城及子廷鉞子弟列名於書者皆論死。凡修書刻書鬻書藏書及官吏之不發覺者亦坐之。死者七十餘人。吳潘與焉。家屬依叛案例發遣寧古塔爲奴者七百餘家。是時有所謂江南十大案。知者莊史及金壇迎降。無爲州迎降。長洲哭廟抗糧。魏耕通海而已。康熙初元。四輔臣秉政。以江南士人多爲誹謗之言。故興大獄。遣大臣窮治株連。所殺戮數百人。皆文學知名之士。吳潘尤可惜。其事見顧炎武書吳潘二子事。及翁廣平所撰史案始末。廣平聽鶯居文鈔不傳。幸范鏞錄此文入潯溪紀事詩注。爲人所稱。然亦不免小舛。初二人修史。呂留良實資藉之。事後求遺稿不得。蓋兩家懼禍。盡火之矣。然從今樂府注中及潘耒文集所述者。知已成者十之六七。紀傳及參預修志者。皆可約略得之。樞章嘗著國史考異。炎武服其精審。謙益自以所撰太祖實錄辨證。遠不及之。所修史若行。必較明史爲可觀。後來遂無及之者。信乎史才不易。樞章有

觀物草廬焚餘稿。本以辭章著名。故其詩格律深穩。難中所作未載。卽平時咏歎。詞旨悲憤。已足使忌者欲殺矣。炎詩尤工。今不傳。傳文稿一卷。亦吳江人。沒時年皆四十餘。吳稍長。

和陶乞食贈乞食諸公

辛卯秋。村民十百爲羣。逼門投食。予謂救災卹鄰誼也。况上無所呼籲。下不爲割剗。而俯首一飯。猶良民也。淵明云。蠶穀既沒。新穀未登。日月尙悠。爲慮未已。乞食賢者之事。乃

衆人僂爲之。慨然有作。

溝壑勢所迫。賈賈行安之。促步望烟火。低頭好言辭。善悉主人貧。高義無嗟來。升斗竭所餘。滿腹輒廢。感激話疇昔。內熱胖羊時。同里無賑卹。曷云濟世才。媿客供給薄。強飯以相貽。觀物草廬焚餘稿

吳農嘆

刺促復刺促。垂老吞聲倚橋木。江南數郡本下洼。豐登猶苦食不足。去年十月連四月。淫雨淅淅壓坤軸。物情錯莫掩朱光。龍蛇劃起驕平陸。四顧桑田城郭非。山顛渦圻翻銀屋。百年以來罹此災。築堤塞之薪不屬。手足皴裂耒相斷。瘴霧酸眸不得觸。萬井無烟釜有魚。天意轉驅盜賊速。斗米四千贏三百。妻兒何處充糠粥。流離不暇他方去。叩門時有衣冠族。言辭蹇拙步趨起。道逢相識猶縮胸。我見但對子孫悲。倉皇寧赴江魚腹。安能低頭向富豪。女爲人妾男人僕。東家估客利百倍。北走荆揚脚大軸。雁鴦餘糧不苦饑。朽腐莫肯分半菽。始悔力耕非本計。反憶昔者良宰牧。吏不呼門風雨時。一犁纔足徐驅犢。世事變化何所無。引領遙山放朝旭。觀物草廬焚餘稿

擬收京

天家旌旆下重關。朝會花冠震百蠻。兩觀已懸新鈇鉞。羣官猶戀舊行班。風雲驟捲邊沙靜。日月重開社稷還。喜聽謳歌同屬啓。鼎湖有泣不能攀。

觀物草廬
焚餘稿

登金山望孝陵有感和韻

擬同草檄問波臣。望氣龍蟠自有真。獵騎已聞驅夢澤。樓船可但割全閩。曉瞻松柏神靈在。夜擁魚龍壁壘新。桃葉渡頭休用楫。便當北指出天津。

觀物草廬
焚餘稿

虎林軍營漫成四首

抱膝年來學避名。無端世網忽相嬰。望門不敢同張儉。割席應知愧管寧。兩世先疇悲欲絕。一家累卵杳難明。自憐腐草同湮沒。漫說雕蟲誤此生。

吳關一路作羈縻。棘木庭前聽五詞。已分殘形輕似葉。却憐衛足不如葵。下堂真愧先賢訓。抱壁幾同楚客悲。從使平反能苟活。他年應廢蓼莪詩。

園土初經二月春。薰風又到繫維身。流螢夜度綈袍冷。採蕨朝供麥飯新。敢望左驂歸越石。還期長珮擬靈均。多情最是他鄉侶。閒譜龜茲慰苦辛。

閱歷風霜祇自疑。難將身世問時宜。窮愁只合吾儕事。姓氏羞爲獄吏知。見說成書刑鑄鼎。不聞有夢石胥靡。南山此去躬耕好。未可重題酒後詩。

案鈕琇風牋吳佩虎林軍營唱和。載鍾章漫成四首。爲授命前所作。不載本集。蓋編者爲避禍計。刪之唯恐不力也。茲附錄於此。又楊鳳苞秋室集。記吳楚。謂史案諸人鉅盤杆遊。忱愷賦詩。後輯爲圓扇鼓吹編。潘詩當出于此。惜其書不傳。

周 篆 草亭先生文集二卷詩集四卷

周篆。字籀書。號草亭。著蜀漢書八十卷。杜詩集說二十卷。詩四卷。文二卷。皆未刻。嘉慶庚申。吳江翁廣平先後得其詩三百七十三篇。文六十三篇。爲刻成草亭先生詩集四卷。文集二卷。顧炎武亭林集有答周籀書書。蓋與其父澧交好。篆因以文請益。炎武婉謝之。年譜謂與炎武訂交非也。年輩遠不相及。然篆有經世之志。一寓于文與詩。實私淑炎武。得其微旨。因居吳江。世遂與潘耒並稱。亦爲不倫。澧字禹功。號天頑。其人實高士。父子皆客游於外。不慕榮利。苦志危行。必有超乎尋常者。惜記載不詳。本青浦人。徙南潯華亭吳江。最後篆僑丹徒。卒於康熙四十五年。年六十五。因葬焉。數數遷徙。此其事之所以易湮歟。廣平一生表章遺逸。此集幸賴之以傳。而廣平所著聽鸞居文鈔三十卷。多論順康間事。姚鼐嘗爲之序。竟無刻本。至於不可踪跡。其子維大年均著書有傳本。而不刻其父集。後之人亦無如廣平之好事者。爲可歎也。

熟西北

三吳不薄徵。私家何由足。公室無積儲。薄徵未可卜。蓄積非無因。在生西北穀。穀亦豈易生。生從棄地

熟。此細彼不贏。彼伸此可縮。用意鳩鳩平。豐亨如轉轂。大驅游惰民。終身入檢束。非惟益正供。亦令實其腹。萬古鷓鴣場。烟烟和鬼哭。一旦風雨時。蓬茅成菽粟。取一豈為貪。餘九恩已濕。何用費不貲。舟車遙督促。但恐古廢弛。攢眉或瞑目。自非經天才。勿蒙千載戮。草亭先生詩集一

可憐荒亂後復過
火災長沙作

亂餘楚地非無材。世俗淺見忘遠災。比屋棟梁架青竹。多年茅茨生蒼苔。天道何曾示悔禍。鬼物況復多

嫌猜。時傳有
物為祟可憐忍死忽變計。相將頓足悲寒灰。草亭先生詩集三

蘇東南

六服不再分。賦敢望輕重。但願要荒人。祇輸畿田貢。任土固有宜。寧辭萬里送。吳越緩輸將。誰備賓祭用。周官三百六。十倍今予俸。必準往古行。能移寸步動。獨憐侯衛民。食德不瘳痛。賦半出東南。杼軸為誰空。民力且徐論。會計須折衷。豈知輸太倉。倍蕘浮正供。千錢轉斗粟。無乃未合綜。吳楚輿輓入京。道途車船人力之費。斗米不下千錢。其治河築倉。官學吏稱。為漕運而駁者。尙不在此數。若能使府藏充足。必自減漕運始。草亭先生詩集補遺

顧夢游 顧與治詩八卷

顧夢游。字與治。江寧人。崇禎十五年歲貢生。入清以逸民終于順治十七年。年六十二。有顧與治詩八卷。平生樹名好義。有東漢人風。千里赴宋珏之喪。割宅居費筆山。沒為營葬。周旋姜子蕩釋函可之難。嘗為

蘇武子于司直費筆山刻遺集。皆末世所不能爲也。其詩清真絕俗。出于郊島。石倉詩選有其詩一卷。

秦淮感舊

淮流雨足波光賦。詞客停船午相遲。文園多病阻清歡。坐起尋思溯洄意。此時落日酒初酣。望裏悠悠總
詩思。何人對此最深情。風前獨下鍾山淚。遊子皆言風景殊。居人倍感河山異。余生曾作太平民。及見神
宗全盛治。城內連雲百萬家。臨流爭傲笙歌次。一夜扁舟價十千。但恨招呼不能致。佳人向晚傾城來。只
貴天然薄珠翠。不知蕩澤自誰邊。樓上舟中互流視。采龍鬪罷喧未已。蜿蜒燈光夜波沸。偶將一葉到中
流。半夜移舟無繫地。當時只道長如斯。四十年中幾遷易。渡頭猶是六朝烟。畫閣珠簾久顛顛。鷓首全隨
戈甲人。馬嘶亂入王侯第。卽今月好幾船開。惟有空明照酣醉。繁華旣往莫重陳。幕燕搖搖定猶未。但願
遊人去復來。再見太平全盛事。順興治
詩二

紀映鍾 蕙叟詩鈔四卷

紀映鍾。字伯紫。又作伯子。藥子。號蕙叟。自稱鍾山遺老。上元人。父青字竺遠。能詩。少爲諸生。棄去入
天台爲僧。復舍去。映鍾尤以詩稱。與同里顧夢游齊名。夢游不出里門。映鍾豪筆游四方。晚客於龔鼎
孳。鼎孳沒。南歸。移家儀真。遂卒。映鍾負一世盛名。及沒乃無人爲之表幽。卓爾堪遺民詩選其詩。削其
姓名。俱不可解。所著真冷堂集。世無傳本。蕙叟詩鈔四卷。儀真石樁于乾隆五十一年。得其手稿。選爲

四卷。清末繆荃孫得石本傳錄。以贈傅春官。刻入金陵叢刻。映鍾之詩始有刻本。雖非全豹。而故宮兵至錄別諸篇。以寓黍黍之感者。在禁書之後。竟未刪削。亦頗爲難得。其邊氓行。爲傷海禁而作。樂府。女姬姜。海濱優。三婦泣。海濱吏。運糧難。運草苦。雜歌。漁父怨諸作。一字一淚。力陳疾苦。真詩史也。映鍾卒年未詳。集中憶金陵舊游云。憶我往觀年十二。袞衣珠襖羨真龍。自注庚申萬曆四十八年六月。觀大內麗鑾架。當生於萬曆三十七年。詩始順治六年己丑。迄康熙十年辛酉。若卒於是年。則七十三矣。妹映淮。字阿男。適莒州杜李。李死壬午崇禎十五年。兵難。竟撫孤以終。亦能詩。王士禛爲賦棲鴉流水真蕭瑟。不見題詩記阿男者也。柳絮集諸書。傳其詩數首。楚楚有致。似過其兄。

女姬姜

女姬姜。買自漳。去衲衣。膚築脂。着眼看。無疤痕。買如一犢。賣得一斛。魏東詩 鈔二

海濱優

海濱暴買。朝歌暮舞。鐵甲聞風月十五。烏鵲壓渡優爲虜。一紙入公門。遷怒思覆楚。嗚呼一紙入公門。十年坐囹圄。魏東詩 鈔二

三婦泣

三婦聚頭泣。各傷夫作賊。黃堂喚官媒。變價充兵食。一婦五貫贏。一婦十貫抑。一婦稍姿容。白金一銀直。九年閉幽室。一朝見天日。大府羽書來。估價不以實。仍驅入幽室。不得見天日。魏東詩 鈔二

潘 高南邨詩彙二十四卷句溪詩彙三卷

潘高。字孟升。金壇人。撰南村詩彙二十四卷。起順治十三年丙申迄康熙十六年丁巳。先後二十二年。凡爲詩千餘首。幽深古逸。不落凡近。少歷關河。志存經世。知無可爲。始寂莫自甘。讀其詠懷諸作。具見苦心。以方邢昉吳嘉紀。高尚略同。行迹頗異。早歲受知錢謙益。後與龔鼎孳崑山三徐交游。王士禛由陳維菘以知之。選其詩入感舊集獨多。然踪跡殊落落。詩足成家。聲施轉寂。清史列傳文苑傳以附于翁照之後。而不知其知名甚早。輩行甚高也。子玠。字長卿。有高行。以詩繼其父。高卒年不詳。似卽卒于康熙十七年戊午。觀辛丑順治十八年所作書感詩。有三十七番黃花秋句。推其年只五十四五耳。

雜感

陰山沙礫捲雲飛。戰罷秋風咽鼓鼙。隴上空歸都護馬。城南盡哭羽林妻。蕭關明月悲笳動。遼海孤煙雜部齊。遠戍議添新介冑。不知獵騎過安西。

誰家少婦控金羈。上馬含悲下馬啼。曉逐征鷗玄菟路。暮營野竈白狼泥。琵琶幽恨兼刁斗。首宿天涯盡鼓鼙。寄語江南同伴子。落花時節到遼西。

機軸江南賦大東。漕河進艦鼓逢逢。線車五月鳴花繭。寒杼三更伴草蟲。驅馬塵凝附注紫。射雕血污裯榴紅。只愁沙漠嚴霜曉。不及旄裘勁朔風。

東南亡命嘯巖阿。飛艦排空奉尉陀。睥睨日深江上壁。舳艫夜轉海門歌。霜枯薊北來騶馬。水漲天南渡橐駝。聞說章邯先下楚。只因返顧內讒多。

江南江北擣征衣。惆悵秋風瀚海西。月下女牆人已去。草深官舍鳥空啼。前朝耆舊遷流盡。故國宮垣禾黍齊。應是春陵佳氣少。枉將溝壑殉旄倪。南鄭詩一

冷士帽 江冷閣文集四卷續集二卷詩集十二卷詩集續編十二卷

冷士帽。字又涓。丹徒人。諸生。入清絕意進取。終身不入城市。以授徒自給。大學士張玉書過訪之。不報。及還朝招之不往。或勸之仕。士帽曰。吾仕無害于義。然不欲負初心也。生平篤友誼。與魏禧魏禮宗元豫盛遠文點攀交。晚益貧。寄居焦山僧舍。卒于康熙五十年。年八十六。其集舊刻入宗冷二子合刻。爲宗子發焚餘草三卷。冷又涓江冷閣文集四卷。續集二卷。詩集十二卷。首末各一卷。緒風吟三卷。又各分上下共六卷。有章性良序。不署年月。未知何時所刻。集中有甲申康熙四刻集成置之焦山詩。或二子合刻。卽成于甲申也。道光二十六年重刻江冷閣集。爲文正續共六卷。詩十二卷。詞一卷。詩只得其半。後又補爲續編。而缺緒風吟。此爲近年重刻本。一仍道光本之舊。士帽以古文自負。然紀事之文不多。喜論經史。不免學究氣。詩中古風別孝陵下作。輓史忠正。岳墓。黃將軍墓諸作。極有關繫。官怨諸絕。明言董嬌嬈。知亦詠董鄂妃。特不如梅村蘊藉有致耳。東南六高士吟。曰宋末有沈畊巖徐昭法汪魏美吳楚人魏

冰叔。皆一時真隱。無毫髮遺議者。可以知其自居何等矣。楊寶暉髮堂詩集。亡友詩。于士帽云。冷氏舉義旗。全家著忠烈。秋江百死餘。穆穆滿頭雪。朋舊化異物。往事向誰說。終身白衣冠。表此一生節。垂老乃識君。又復與君別。贈言井中詩。看君語悲咽。此別亦尋常。何以遂永訣。維舟哭草堂。傷哉魂欲絕。此詩足概士帽生平。所云冷氏舉義旗者。其兄之曦。字子晉。爲史可法牙將。高傑進軍歸德爲參將。後死曲阿之難。見楊榮冷參戎歌。但不應云全家著忠烈。疑士帽亦別參義軍。故曰百死餘也。縣志稱其義衣弱笠。竹杖芒鞋。晦明寒暑不易。或怪之曰。吾戴弱笠。痛勝國之天不復見。著芒鞋。痛勝國之地不復履。是又一鄭所南矣。故曰贈言井中詩也。黃中堅著齋集。秋江散人小傳。曦糾集烏合得數千人。奉宗室起義。襲金壇據之以求君。因往依焉。不兩月。大清兵至。則衆鳥獸散。曦被執不屈死。親屬僅免。由此家破。先生感家國之變。遂服古衣冠而隱。鄉黨苦禁之。不得已變服。然終身未嘗著赤纓。按此所述較楊榮爲詳。

海天別

己亥之難。余郡慘焉。懷涕興懷。因感無家別等作而成。

江南七月飄風發。海上縷縷走吳越。乘波直指京江來。快艫輕風恣超忽。官軍屢戰時鬱蒸。驍騎三千一時沒。江頭枕藉紛如麻。流血青郊蔽枯骨。揚帆直上抵龍關。盛氣凌憑欲拔山。豈料前車先失利。萬艘飛下一時還。夜半殺聲城外起。城裏紛紛出城死。兩岸人家百餘萬。盡被戈兵擁都市。京江焚劫夜如朝。烈焰騰空照江水。奔號投竄城東西。萬姓倉皇火煙裏。斯須擄盡三山空。滿船良家少年子。海天一去何時歸。死別生離斷鄉里。父兮叫號母兮啼。欲歸無歸哭江涘。縱橫涕泗出如流。不敢相親只相視。江冷閣詩集三

夢叔子

戰鬪滿中原。風塵莽頽洞。而君臥深山。閉戶日吟諷。憶昔越游歸。扁舟遠相送。乘輿造吾廬。清琴江上弄。昨夜南窗下。幽魂入我夢。何意竹林遊。竟作山陽慟。南望翠微峯。烟波渺難控。江冷閣詩 集續編二

文太史椅歌爲姜仲子賦

憶昔明當嘉靖時。四海平寧無亂離。衡山名德重天下。揮毫對客常于斯。衡山既沒存此椅。付與隆池門下子。隆池奄忽此椅存。復歸故物衡山孫。衡山之孫爲相國。坐此謀謨補衰職。吁咄嗟。誰知相公沒後成永嘉。國難崩奔亂似麻。門閥一時漂沒盡。此椅流入堯峯家。堯峯文章天下著。置此堯峯讀書處。起居不或暫相離。把酒賦詩常此據。一朝謝去作修文。堯峯之子持贈君。追維想像前朝物。異代興亡安可云。此椅雖微百餘載。兵火身經幾更改。世間無事不滄桑。此物依然尚猶在。嗟君之家向來亦是飄零後。對此能無不懷舊。椅乎椅乎。倘君傲然擁書萬卷坐其旁。能令白屋生輝光。而今雖伴烏皮几。他日曾陪綠野堂。避世若非徐孺榻。逃時端是管寧牀。從茲千頃雲樓上。高對南窗注老莊。衡山即太史公徵明。隆池太史門人彭公年。相國寶孟公。堯峯汪若文。山齋千頃雲。江冷閣詩。虎邱仲子山樓處。集續編二

徐枋居易堂集二十卷

徐枋。字昭法。號俟齋。長洲人。崇禎十五年舉人。父汧官少詹事。南都破。死事甚烈。明史有傳。枋自是

隱居。終其身不入城市。初避地分湖。已遷蘆區。遷金墅。往來靈巖支硎間。終居天平山麓曰澗上草堂。自謂二十年不入城市。二十年不出庭戶。非故衣冠者不能登其堂。湯斌爲巡撫往謁之。叩門至暮無應者。歎息而去。乃爲泚立祠虎丘。落成。徐氏之子畢集。唯枋不至。家貧至日不再食。一衣外無他衣。子若女衣不蔽體。然不改其操。一絲一粟。不輕受人。唯沙門洪儲晨必詣之。有所饋不辭。久之乃賣畫。不畧款。強之但署秦望山人。門人潘耒。遭世難。年十八。以辭賦動當世。力戒以立言不朽與德功齊。及舉鴻博授官歸。跪門外三日。然後進之曰。吾不圖子之至于斯也。耒進一研。不受。涕泣以請。乃命懸之梁上。示不用。卒于康熙三十三年。年七十三。餘一嫠婦。一孤孫。貧不克葬。有戴易者。本名冠。字峨仲。號南枝。山陰人。崇禎間諸生。棄去作浪游。喜爲詩。多七律。嘗作孝陵二十首。釣臺六百首。吳門春感百六首。年六十餘至吳。自爲生壙蓮花峯下。作墓田三千里外。自書刻石其旁。與枋善。枋沒。爲求葬地真如塢。鬻字得金以給費。未復資之。乃得舉葬事。且就草堂立詞以祀枋。世頗多易及耒之義矣。枋撰居易堂集二十卷。詩文不苟作。志傳尤有關係。自題其文曰。四十年中。崩天之敵。稽天之波。彌天之網。靡所不至。靡所不邁。又與王生書。僕于今日。實貴苟全。既欲苟全其餘生。復欲苟全其微尚。大要日與世遠。日與世疎則全。否則必不能全也。所謂彌天之網。究何所指。及讀吳子墓誌銘。證以楊賓所撰徐昭法吳稽田兩先生合傳。乃知枋與姊婿吳祖錫有居者行者之不同。而圖謀恢復則一。監國及永曆時。祖錫皆授兵部職方司郎中。出入張煌言鄭成功軍中。能以兼金購清帥使爲己用。又嘗客于總督麻勒吉。以脫其禍。

數爲奇計。皆瀕于成而敗。康熙十六年。迎周府鎮國將軍麗中至膠州大珠山。將起兵奉麗中監國。會以嘔血死。其死也天下知與不知。皆爲流涕。而中原義士爲之起墳墓。祭伏臘。每臨其墓。無不哭失聲者。枋愈沮喪。與魏凝叔書。所謂操舟之人已逝。苟有人心。能不痛絕。即指祖錫。亦即詩中所謂遠人。洪儲亦非常人。順治八年。以東南義師牽連被繫。僅而獲免。其日至枋所。必爲之供奔走。通消息。外此當尙有人。其曾燦姜寓節乎。然後知枋杜門絕人。匪以鳴高。陽若無與世事。而實有大謀。用心良苦。

懷人詩

嗚呼魯仲連。屈強不帝秦。區區蹈東海。大義終能伸。胡然天帝醉。金符被強竄。眇焉匹夫節。而與天帝爭。十年遍天涯。四海誰情親。一心貴有託。豈敢輕死生。故人在畎畝。攬涕爲屏營。念子不成寐。落月空盈庭。願言入我夢。夢見遙吞聲。

遠人。遠遊之人也。死生契闊。數年不一面。嘗夢見之。而不能一言。居易堂若存若亡。猶如隔世。亦竟不能舉其名字矣。遂以遠人稱之。可憐也已。集十七

懷舊篇長句一千四百字

平居懷舊意。愴怳五十年。間似反掌。耆舊於今無一存。音容歷歷猶堪想。余年十四歌采芹。蜚聲早擅青雲上。鄭莊有客大父行。張楷造門皆父黨。經學淵源從申公。圻父尊嚴亟私獎。安車枉過吳趨里。品題一及人矜仰。

申公謂文定也。先祖贈翰林雲淵府君諱。少受經於文定公。以經學名家。文定著書經釋章一部。獨列先祖姓名。盛行於世。大司馬申公用懋與先祖爲通家兄弟。余十四歲入學。先文增公率余往謁大司馬。極加獎。隨至吳趨報。謂先公曰。此子非常人也。次年十五始觀場。金陵文戰爭秋爽。三試秋闈年廿一。名場得雋馳塵缺。渭濱垂釣獲鉅鱉。天水

甲族稱人豪。吏蹟時推天下最。一朝掃跡棲蓬蒿。王午余爲房師姜爾孫先生所得士。時知事國麟。麟蓋林。忽然喪亂。傾家國。痛哭天崩復地坼。先公殉國汨羅游。止水無從居土室。人師獨羨紫陽尊。嬰城亦繼彭咸則。當年貽

詩勸忠孝。臨風讀罷還悲泣。先師崑山朱以發先生。諱集璜。崇禎乙亥貢士。乙酉夏崑山城守。城陷赴雅齒即多長者遊。水死。壬午秋。贈余詩。夙昔承家學。忠孝天所紀。載先生親復堂集中。

況今避世荒江陬。曾下常懸仲舉榻。曾臥百尺元龍樓。雲間給諫最相愛。忘年降分爲朋儔。胡然兵解騎箕尾。欲歸天上驅旄頭。雲間陳給諫臥子先生子龍。乙酉歿。同避難。橫渠虎皮昔摳侍。關西鍾堂從講求。張翰林天如先生廷樞。竝叨國士無雙譽。共擬囊賢第一流。逝水其江不可返。遺音阜里空千秋。縞素一時同會葬。舟車

千里爭相投。湖濱崖廣往一哭。風悲雨泣餘荒丘。余受知於兩先生最早。亦最深。稱翹若一。不啻口出。翰林卒。桐巷夫子真壽豈。桃塢先生自魁磊。往來二老誠風流。鬚眉皓白衣冠偉。問年八十相後先。歲寒朋情終不改。輕

身歲歲必經過。終始周旋三十載。襖被攜尊每極歡。圍棋賭墅頻爭采。草堂題署墨猶新。至今彷彿聞警

效。先師鄭孝廉士敏先生諱敷教。別號桐菴。李侍御瀛略先生模。居桃塢。每歲兩先生必同舟過宿草堂。飲酒話舊之餘。則二老對弈也。明農通隱遇年華。頌言初度敷天葩。激賞因言爲

禦侮。松楸勿剪交情除。少司農申公紹芳。亂後自稱明農。以六十壽徵余詩。辛時推黃閣能傳笏。共道青門好種瓜。司農爲文定公。草堂賓從嘗履屨。素交頻來矜舊雨。周袁交我紀羣間。周儂部玉鼎先生之與。袁貢士公白先生。楊萬求於翰墨裏。

孫。號青門。 巖如斷山千載人。臥雪高風百世士。山頭蔽蔽每同甘。慷慨分憂生死誼。亂後心期稱最

深。伯仁邵公真莫比。儂部周急。袁先生。樊涇遺言心怒如。隰西絕筆吾師矣。古人交情十二年。千里同心書一紙。

隱君亂後居樊涇。乙酉至丁酉。與余契誼無間。謂余畫得古人正脈。臨終遺言。以其家所藏畫歸余。孝廉精繪事。亦亟稱余畫。尺書見寄。贈我畫幅。乞爲作隰西草堂圖。及歸彭城。遽卒。

之亦孔彌。同被恒矜孝友偏。聯牀常妬壙篋美。流連風景悼興亡。寄託離騷同怨誹。兩賢前後赴修文。敬

亭竺塢垂青史。萊陽姜如須行人談。與余爲通家兄弟。交最善。如農給諫探。因亦莫逆。給諫以當年譴戍宜城。葬敬亭山。行人遺音。以延陵爲法。即葬吳門。墓在竺塢。鍾磬山人時命駕。淋漓歌哭人

爭訝。百六徵書絮未休。十千沽酒罰無赦。高士例須憐麴蘖。銜杯每欲窮晨夜。時人盡道次公狂。坐客時

遭禰衡罵。崑山歸玄恭處士莊。性放達。嗜飲酒。自號鍾靈鍾山人。每草堂爲酒令。嚴古事人物之極。避地當時亦屢遷。數椽茅屋天池邊。買山空囊苦差澀。卜鄰喜得逢名賢。徐攜年老愛泉石。落木菴中啓禪窟。竺塢天池稱比鄰。徵

詩問字相絡繹。詩人徐元歎波。隱居天有。築室名落木菴。余移家竺塢與相鄰。元歎老而好學。時時書方寸紙。令童子持來池所徵考。余立答之。或有言在某卷某葉者。元歎嘗詩之同人。余則時以詩政元歎。元歎亦喜爲論說。澄江尚書

蓮社賢。開封太守髡華顛。澄江大司農張公有譽開。薛那伯采毗陵人。尙友每尋高士傳。登仙獨上孝廉船。居士現身棲寶地。頭

陀說法飯金仙。大圓鏡中續無垢。堆山米汁眞逃禪。郡伯凱後勸髮爲頭陀。居玄墓眞如塢僧舍。自謂百名家。今不冠。當

眞爛然。飲酒終日不醉。與余最善。余嘗載酒飲之。過其宿處。室中惟有高士傳一卷。司農自號大圓居士。嘗居我禪心耽寂滅。天界遙聞大導師。鄧山更有彌天釋。天界覺派和尚盛禪師。一笠披雲出石頭。一葉浮杯來震

澤。再宿湖莊惠話言。十年湖畔踰阡陌。灑杖人素未識面。乙亥春。從金陵至吳門。特過金墅訪余。安其隨行諸師於蓮華寺。道至。紫雲仙人不可求。黃面瞿曇今再出。慈心爲結人外契。時時清盼成莫逆。山中丘壑啓津梁。烟雲供

養披昕夕。剖師與余最契。嘗留余參紫雲仙人公案。明方丈門云。直須悟却纒。放出。其真切如此。諸方謂剖師爲古佛。余畫鄧尉十景冊以贈師。天上靈巖一退翁。蔚然忠孝開宗風。瀟空

慈雲覆世界。亙古正氣蟠心胸。欲令大地出火宅。欲令長夜聞晨鐘。顧我尤深知己感。一言一笑心無窮。

揮戈煉石有精意。隻履雙樹垂芳蹤。靈巖繼起和尚諸禪師。晚號退翁。山頭。巖巖黃山氣無上。徵音無忝明師匠。

殿屋金書天上靈巖四字。其過余尤異。

昔在朝端現鳳麟。後歸法苑稱龍象。過余土室何殷勤。自謂當仁誠不讓。黃山傑菴和尚名正志。靈巖嗣。故給諫翁公開元也。建言廷杖。亂後出家。前往華山。嘗與靈巖先後過草堂。論交欲得意氣真。交滿天下無多人。延州後人稱國器。咄哉現歎斯其倫。時推俊傑纔弱冠。身

投湖海常垂綸。矢心欲醒天帝醉。出沒生死忘酸辛。胡天沉酣不愁遣。使我涕淚徒霑巾。吳子佩遠名祖錫。更有布

衣一村叟。捐金解厄稱吾友。回首當時跨八廚。東京名士亦何有。姓字依稀三影間。歌吟惆悵四愁後。天

道無知劇可憐。孤墳片碣期不朽。布衣張英甫名樹。嘗爲余充官逋。一日而捐七十餘金。余爲作傳。英甫無後。將勒石樹其墓。親朋凋謝歲月馳。懷人拊景寧能

追。當時垂髫今白首。俯仰歎忽成吾衰。歲寒後凋意自勉。碩果不食心相期。中原遺民竟誰在。獨立宇宙

能委蛇。偶然苟全幸無恙。敢云獨抱凌霜姿。嗟我生平多轆轤。更傷骨肉多崎嶇。遂令衰遲益老醜。不覺

憔悴增臙頰。龍鍾飴背同耄耋。霜髭雪鬢何繁鬣。陽和亦凜冰霜慘。豐歲長茹草木滋。無酒自憐真獨醒。

閉門不厭遭長饑。余居空山。又復禁足。每笑井邊無半李。誰肯牆頭過一卮。前年悼亡五十九。天胡阨我喪吾偶。居

恆悵悵若無之。閨中又失一良友。枵然一室稱老嫗。今年已是六十三。低徊形影自相弔。無端老淚嘗漣

漣。靜中八九數往事。寧能一二開歡顏。回首淪亡悼知己。餘生倔強自世間。生平友朋爲性命。那知造物

偏吾慳。情深一往不能已。緬懷邈若悲河山。黃公酒壚山陽笛。人生有情淚霑臆。諸公往矣那復得。草堂

寂寂無顏色。居易堂集十七

梁逸 紅葉村稿六卷

梁逸。字逸民。號春隱。崑山人。伯龍曾孫。隱居蘇州紅葉邨。有紅葉村稿六卷。五言學陶。悠然意遠。葉方謫獨賞集錄其詩甚多。惜不傳。沈歸愚別裁集僅選三首。非其至者。蓋肥遁自甘。不驚聲名。然此集山齋梅花云。攬鏡非昔容。明時感悽惻。沽酒吟云。生不逢堯與舜禪。露隱南山看豹變。七十自壽云。死知前路易。生見後人難。春到南枝上。年年拭淚看。生日有感云。無成非一事。有恨獨千秋。元旦云。梅抱寒香苦。松含古韻多。雜詩云。一身唯強飯。中夜獨悲歌。又云。瓠落甘時棄。支離幸自全。中懷鬱勃。是豈忘世者哉。所與往還者。徐枋。朱用純。爰丹生。呼谷。歸莊。姜實節。吳喬。皆高士也。歲除寄呼德下云。憤世情何激。憂時志未伸。哭董正叔云。華表漫言天地闊。歸來須認舊河山。寄吳修齡云。猶作雲龍望。誰知將帥沈。修齡工于詆訶。與世齟齬。歸莊自爲僉壬。作難壬以罵之。而孰知其爲密圖光復者。逸之友若此。則逸之志行可知矣。其他姓名。見于此集。若韓君望。殷偶來。陸天涸。諸新益。侯兼山。范野人。張定三。陳予蕃。朱既霽。朱雪鴻。汪長魚。李東嶼。李西被。周令儀。晉卹功。朱霍明。張方瓢。吳君球。諸乾一。朱心水。易師中諸人。度皆野遺。而姓字闕然。猶賴此集得傳。何其幸也。此集近有重刻本。多朱謹一序。稱逸年幾八十。集中新歲試筆云。入春甲子逢初度。七十六年轉眼過。未知卒于何時。

卜居未定感懷漫賦

壯不如人今老大。癡頑物外一閒民。柴桑向慕陶彭澤。谷口空懷鄭子真。往事尚餘幾兩屐。勝情徒負百年身。未能師事延陵叟。擬欲移家託比鄰。紅葉村稿

哭葉正叔

十年故舊盡凋殘。半載羈人去不還。華表漫言天地闊。歸來須認舊河山。紅葉村稿

顧涓太倉十子詩選水鄉集

顧涓。字伊人。諸生。師事陳瑚爲高弟。慎交同聲社與。皆以得涓爲重。值奏銷罣誤。絕意進取。專力詩古文。崑山徐乾學慕其名。延館於家。時刻通志堂經解。涓較讎之力爲多。

弔許潛忠

慷慨書生膽氣真。攀號無路獨傷神。儒門一死仍孳迹。草野孤忠竟殞身。入海尙能銜木石。在天應作見星辰。首陽去後無窮恨。麥飯誰人動甲申。太倉十子詩選水鄉集

己亥六月雜詩

歲己亥之六月。予里兵戈格釋。竄伏無常。東西鄰負老孺幼。作風雨散去。子母病不獲行。散廬子影。聞馬足聲。則心怔忡若春。如是者凡兩匝月。漫興口占得五言今體十二首。題曰己亥六月雜詩。

偷生逢世難。局促敢求安。南國蟲沙異。西風禾黍殘。身孤餘涕淚。親老迫飢寒。豈不懷朋好。其如行路難。

戎馬江鄉路。搜牢日再過。隱逃三劫少。貧計一身多。沙磧喧刁斗。柴門繫薜蘿。空餘飛動意。擊楫更

誰歌。

避迹居無定。當秋感自多。艱難懷弟妹。搖落向關河。歲月堂堂去。民言轉轉訛。一尊風雨夜。誰與話兵戈。

喪亂銷何日。遭逢隨此生。巢車望遠道。窟室避殘兵。夜冷風雲氣。秋高鼓角聲。感時悲野老。頭白話

昇平。太倉十子詩
遇水鄉集

朱 嵎 窺園詩鈔一卷

朱嵎。字草孫。號與西。長洲人。諸生。卒于康熙十七年。年五十。朱彝尊爲之傳。稱嵎牽車服賈。孝養父母。而肆力于詩。與陳太僕濟生金處士俊明以古道共砥。景其流風。足以興起。俊明爲作詩序。謂馳驅南朔。無以異于巖栖谷汲。撰窺園詩鈔一卷。手訂二百餘篇。其子岳壽復搜殘稿百篇。授張大受論定百四十二首刻之。其詩上摹六朝。下迄溫李。有擬昭明十二月錦帶詩。又有古詩爲翁登墀妻高細宋作。長一千四百九十言。詞旨高古。他作多如俊明所稱爲西崑溫麗協律幽奇者。然非時流所向。尙者宋詩。大受蓋以此爲去取。所刊落者。必多有關避忌。寓意深遠之什。爲可惜矣。

贈金孝章

愁禪欲向靜中收。作賦閒居有故侯。薛雨瀟疎懷楚佩。月光澹蕩夢羊裘。薰爐鎮日縈絲篆。虛幌無人背

小樓。知是江南高臥客。思君遙欲寄吳鉤。魏園詩鈔

野步

久陰晴足喜。杖策正相依。蕭寺僧同寂。荒園樹不肥。橋通野水曲。塔近夕陽微。聞說追呼急。漁郎履迹

稀。魏園詩鈔

燕城

落日過荒城。蒼然天地陰。寒雲蔽上下。霜猿相追尋。况當秋風起。孤鴻日夜吟。城崩壓白骨。新鬼發哀音。飢鳥葉上走。餓獸當林吼。離明不得見。鬼火大於斗。古道無行徑。良田變荒畝。大野何蕭條。翻悲骨

未朽。魏園詩鈔

趙士春 保間堂集二十六卷

趙士春。字景之。號蒼霖。常熟人。用賢孫。崇禎十年進士。官編修。進中允。爲黃道周稱賞。以與同官劉同升共劾楊嗣昌忘親害理。謫歸。錢謙益賦玉堂雙燕行以美之。後以薦復原官。入清不仕。數爲清吏齟齬。集中癸巳生日詩。側聞走薦剡。幾家彈冠起。又聞捕反側。幾家歐刀死。堪嗟林下賢。紫陌異青史。知其託身有在。而顛危亦已甚矣。子瑞南。以丁酉科場之獄。謫戍遼左。會赦。士春得免于行。卒于康熙乙卯。年七十七。著保間堂集。詩凡十四卷。曰玉堂草。南還草。作于明季。曰閩游草。洗心草。東田草。東游

草。勞山游草。天全草。入室草。蓬客詩草。皆入清所作。文凡十二卷。士春。世以文學擅名。故其詩文皆有準繩。詩多哀怨。不則但道服食長生之事而已。處境使然。固不必以荒渺責之。

東海李琳枝按吳半載忽被急徵灑淚攀車眞盈萬指讀其到部詩有空攜滿袖吳民淚之句輒綴雜言用申紀贈

吳民淚。難具陳。大者不可訴。小者聊可論。卽如里中豪。鯁鯁狐鼠形。高門相依倚。齧嚙遂猖獗。往者殲渠魁。賢哉御史奏。懼伏幾何時。餘孽日縱橫。繡斧從東來。攬轡思澄清。名捕悉此輩。荷校無輕刑。已死填牢戶。未死猶支撐。起行巷陌間。天日爲光晶。幾年一歡笑。扶杖看花成。豈知赫隲下。翻就廷尉徵。牽衣復攔道。反袂徒吞聲。是時暮春初。爛熳鶯花晨。橫塘無簫鼓。盡作悲風鳴。吳民淚。難具陳。深山虎豹逝。藜藿將焉存。况復疾苦繁。誰歎叫九閭。詰朝征車發。百萬擁長津。公去不得止。空霑血淚痕。淚痕將何補。庶感皇天仁。吾聞古直指。大節在埋輪。輿情惜元禮。朝命借寇恂。佇公旦暮來鎮撫。吳民謳吟馬前舞。

保間堂集八

案李森先。字琳枝。山東平度州人。崇禎庚辰進士。順治丙申丁酉間。巡按蘇松。持法嚴。窮治貪官。羈役幾盡。優人王紫稼美麗善歌。錢謙益吳偉業龔鼎孳爲賦。王耶行者也。旣姦婦女無算。與三選和尚同付立枷。竊於闔門。不便者以賄進當路。竟達問森先。

盛以革囊。僅露頭面。挾之馬上而馳。以困苦之事得白。卒於康熙壬寅。年五十四。陝西道饒面冰心扁。卽其所書。賢哉御史素。

謂素世植。

任源祥鳴鶴堂詩集十一卷文集十卷

任源祥。本名元祥。字王谷。號息齋。又號善權子。宜興人。入清棄諸生。精研經世之學。無所得食。乃入州縣幕理刑名錢穀。卒于康熙十□年。年五十□。事具清史列傳文苑傳。及任啓運所爲息齋先生傳。有鳴鶴堂詩集十一卷。文集十卷。詩刻于康熙二十六年。妻黃氏積蠶績織績之資爲之刻行。距源祥之沒十餘年矣。又十餘年而其文始出。詩不薄七子。而上窺漢魏。取徑三唐。以李杜爲宗。謂李本國風。杜兼二雅。文初學六朝。折而爲韓歐。浸淫于兩漢。得其樸茂。侯方域魏禧亟致傾服。禧稱其神明古人之法而有真氣。同時常州善爲古文者。邵長蘅董以寧陳維崧陳玉瑾皆不及源祥。有志于用世。集中制科保舉職官銓政制祿賦役錢法漕運屯田馬政鹽法諸議。究心利弊。皆立可見諸施行。世頗惜其不遇矣。

熟荒嘆

人言熟年好。那知熟年加倍苦。荒年積逋熟年取。傾倉倒箱不滿數。錢糧星火官差猛于虎。有米不得賣。得賣賤如土。賣米一石完官不數錢。更有差人相熬煎。上官連比四五年。彙粟火籤敲朴之聲上通天。吁嗟。鹽貴米賤。銀貴田賤。方今世人尙可爲。惟有農家苦難支。

昔在萬曆石米四五錢。百貨皆賤國課時見調。人生此間官民晏然。方今米價似曩時。民力倍艱亦何爲。今年出米如糞土。明年索飯如珠玉。珠玉雖貴。糞土雖賤。飛彈何以逐我肉。有虎磨牙在山之阿。熟尙如

此荒奈何。鳴鶴堂詩集三

過陳黃門殉難處

亂後春潮急。兵前晝鷁高。湍流衝霧露。日色湧波濤。斷岸催邊馬。西風泣戰袍。悠悠芳草暮。存沒愧吾曹。

此地哭黃門。千秋慷慨存。文章當變亂。詩賦滿乾坤。報主生平志。捐軀國士恩。扁舟湖海客。蕭颯擬

招魂。鳴鶴堂詩集七

案此詩悼陳子龍而作。子龍于順治四年五月十三日。帶續投水死。

顧景文顧景行詩集二卷附楚游詩匏園詞

顧景文。字景行。號匏園。無錫人。憲成曾孫。憲成生與淳。與沐。淳生柄。沐生樞。樞生景文。廷文。及貞觀。皆有文名。廷文早卒。景文有顧景行詩集二卷。為庚午康熙二十九年辛未三十二年所作。今存辛未詩。附楚游詩。匏園詞。光緒中顧綬珊刻彈指詞補遺。求匏園詞。僅從選本中得一首。然則此本雖缺庚午詩。亦至難得可貴矣。詩淒涼激越。居然老杜。尤喜述滄桑間事。有句云。二十已心灰。考康熙戊辰二十七年景文年六十。則順治之初。已屏棄一切矣。綬珊稱為明經恐誤。明亡後。淳沐及樞。一門高尚。柄乙酉弘光元年起義死難。于此足徵憲成之教。獨貞觀沾微祿。為愧于祖父。

鴨城莊

方池渾渾石鑿鑿。云是并州太守作。宦成得意買田園。坐見汚邪滿村郭。鴨城去家十餘里。猶有邸第連雲起。橘樹千頭竹萬竿。蟹螯就斷魚蝦美。河。大有魚蝦。團池皆通外。可奈織兒撞壞何。萬金只博笑顏醜。此老力能移陸海。至今人說溲沱河。張江陵母渡河。聯。願景行。實列肆。無過不覺。詩集上。

京口阻兵

漸辭殘臘入春城。到處兵戈有送迎。月黑悲笳吹九疊。雪晴孤棹下三更。全消裘馬顏空厚。漫卷詩書意不平。日日思歸歸較晚。懶夫何計遂縱橫。楚游詩

安 璿 審 畫 樓 詩 草 二 卷

安璿。字蒼涵。號孟公。無錫人。祖希范官光祿卿。為名臣。明史有傳。父廣居。字無曠。著率意吟。而高文憲為之外祖。里中高顧理學。華秦文采。安氏與之韻頗。稱為世族。璿工書畫。敏于詩。入清後。隱居審畫樓。藏書萬卷。以高士稱。猶子夏。匿文乘之孤。著俠義名。可謂雙嫩。撰審畫樓詩草二卷。詩起順治初元。迄康熙三年甲辰。二十年辛酉。復改一過。甲辰以後。不應無詩。或已散佚歟。卷首有吳本泰序。本泰字若子。一字藥師。仁和人。崇禎七年進士。除行人。選授吏部主事。有海粟堂等集。即此集稱為梅里吏部者也。

雜感

倏忽歲云暮。霜刀刮地皮。錦帳漫嫌熱。村豎寒無衣。同在天地間。苦樂誰爲之。願君重德業。榮耀自有時。此生不可必。來生以爲期。增畫樓詩草上

陸楣鐵莊文集八卷疏快軒詩二卷

陸楣。字紫宸。原名梁。字子任。無錫人。廬墓鐵莊。因以爲號。爲人巨肩曷鼻。不類南士。少孤貧力學。善爲詩古文辭。爲秦松齡嚴繩孫所知。名譽始盛。不慕榮利。授徒自給。嘗北走燕趙。南踰嶺嶠。里中黃庭顧祖禹。寧都魏禧。大興王源劉獻廷。是皆號爲遺佚。有心當世者也。與之納交。則楣志行可知。歸而著書。于易禮皆有撰述。別有詩文集。光緒乙未^{二十}其後人曹燾得王史鉅所訂六卷本。合他本校之。釐爲鐵莊文集八卷。疏快軒詩二卷。集中雲貴總督蔡公征西紀略。紀蔡毓榮平吳三桂事。覈實可以補史。旅淮私記。述以工代振之得計。知其留心世務。異于高談利病者矣。他文深純雅健。根柢經史。無抑揚挑剔之習。與黃瑚劉齊齋名。黃劉不可知。若秦嚴當遠遜之。惜文多散佚。百五十篇中。代人作者三之一。皆可不存。擬表四篇。支離膚闊。非楣所作。不應存而必有足存者。昔學部圖書館善本書目。有鐵莊文集稿本十二卷。今不知所在。不然。必有足以補此本之未備者。其詩原目一起已未^{康熙十}去冬免喪迄丁卯。^{八年}六十二起卯夏迄辰春。^{二十}七^年三辰夏迄壬申。^{三十}一^年四酉至子。^{三十二}五^年五丑寅。^{三十六}七^年六寅臘盡辰。^{三十七}九^年

七已迄未夏。四十至四十二年八未至申。四十二至四十四年九酉春至亥秋。四十四至四十六年續起庚寅秋。四十九年有庚辰。三十年自序。謂

無詩材無詩境。三十年羈孤流浪之迹。並在此卷。楣詩不名一家。有感即發。詞旨悽愴。與啼髮集醇肆不

同。而足以發人神志則一。得前中丞湯公潛菴詩以志感。自注云。公偶見予文。屬邑令傳語。勿示要

人。恐觸諱也。今示人者亢厲如此。則不以示人者更可知矣。懷徐君俟齋云。桃花三代樹。黃菊百年心。

足概徐枋生平。寄顧景行自注云。來詩有云。時平未用王景略。懷刺不慚禰正平。以王猛喻楣。正足見其

才略。哭朱子西安詩云。客偶傳狂草。君偏賞謬悠。姓名煩記注。物色到荒陬。委巷逢傾蓋。晴溪得放舟。

又云。移日過花嶼。輕陰愛麥秋。念舊曾懸劍。分甘及敝裘。傾囊寧復慮。指困動相調。又云。孤蹤輕抵

觸。平地乍戈矛。意在忘親申。情殷絕悔尤。聊城終藉魯。北海為呼劉。又云。天水論交密。養子 夷門結契

稠。侯子 禮日是即世所豔稱孝廉朱旂西安始識楣于陋巷者。吳趨行刺當日官府極意聲色。競求姑蘇女子演

劇事。五月二十日紀事。紀陷于縲絏。未知所坐何事。或即哭朱子西安詩所謂孤蹤抵觸。賴朱以脫者歟。

世紀楣事。不具本末。錫金識小錄。謂其父力農。尤誤。據過葺莊詩自注。長洲錢司寇有威撰先高祖府君

墓志。城南故居自注。施太僕策撰先曾祖陸光 陸原墓志。謁高公止水祠自注。先王父從受業。秦邦瞻表兄六

十自注。乙酉弘光 元年鄉飲賓介為祖姨丈及王父。梅里自注。先君嘗避地于此。又黃守中墓志云。守中景范

兩先生。皆余父執。敘次釐然。未知載筆者何以不省。楣生卒之年未詳。據黃守中墓志云。生明天啓乙

丑。五年余生後先生二十四年。然則楣當生于順治六年己丑。下至戊戌。康熙五十七年適七十年。集中詩止于戊

戊。有旅吳生日詩。寂寞七十年前夢可證。或即卒于此後不久也。

遇野旭道人

問俗姓曰無。年及臘日忘之矣。語多楚音。談黃增南事甚悉。

道人來何許。隆準雙眉龐。不肯道姓氏。況復尋鄉邦。毀形脫塵械。忍力摧驕幢。把茅傍略約。門外溪流淙。披榛乍相見。聞唄心俱降。西風下庭梧。敗葉紛打窗。猶疑烽火夜。鐵騎相摩撞。歎息黃將軍。劍氣橫

秋江。

疏快軒詩上

題獨往亭詩

吳陵金鄉明嘗嘗靜嘉山荷花橋。邑人呼爲道學。余未之識面也。及讀其詩。知爲襄邁士。思一見而廓明沒久矣。邑人亦無道其詩者。爲錄而存之。并題其後。

滄海遺民事渺茫。劫灰無恙見靈光。全身白髮心俱短。回首青雲翅已傷。嘗從軍陸馬傷臂故國魚龍悲夜壑。空郊

蒲柳怨秋霜。小橋流水孤吟處。幾樹歸鴉占夕陽。疏快軒詩上

吳趨曲

己卯春吳門感事

江上東風吹百花。鞦韆上苑爭妍華。珠簾繡柱千金鈔。錦幄魚軒七寶車。羯鼓聲高借顏色。歲歲春春下求索。嫣紅姹紫鬪嬋娟。穠李夭桃望恩澤。闔閭城下產孤芳。葦屋筠籬久自藏。愛向山中衣木葉。不聞天上舞霓裳。使君乍見驚奇絕。不信風塵有冰雪。但使回眸百媚生。萬蕊千葩豈堪折。躊躇無計動朱顏。青鳥銜情數往還。傾城一笑何由致。十斛珍珠視等閒。何況炎炎勢炙手。覆雨翻雲靡不有。莫教瓶觸轟雷震。坐見青青變薪樵。丁寧向花花不語。咽露凌霜心自許。瓊姿一夕羽毛生。水遠山長不知處。徘徊明月戶空局。流水桃花兩杳冥。回首山塘買花路。迎風爭自銜娉婷。疏快軒詩下

雨後泛秦淮

水榭虛傳畫鼓催。扁舟聊復共沿洄。接天峯影中流見。夾岸泉聲衆壑來。燕語任喧新巷陌。鶴歸難問舊池臺。此間亦有沉湘恨。寂寞魚龍故國哀。

中書舍人龔廷祥。字伯馨。無錫人。弘光乙酉之變。投秦淮河水死。

疏快軒詩下

五月二十日紀事

狂飈呼徹四更時。噩夢驚回暗自悲。每以存亡推劇孟。誰將緩急問袁絲。蠅思點壁知難滅。蠅慣含沙巧共吹。一樹荆花風雨夜。鶉鴿原上起相思。

老屋居然匹士衡。銀鐙何意滅柴荆。林猿亡後偏移禍。池雁烹來爲不鳴。縱道啄丁無遜色。誰知摺脅已吞聲。還家漫逐兒童戲。依倚高堂無限情。

已判鴻溝隔比隣。參差門巷異朱陳。鼓刀弄政惟呼母。投杼曾參豈殺人。今日何嘗知吏貴。當時空解論錢神。人間倚伏誰能料。好向瞿曇問往因。

疏快軒詩下

集華翁商原齋限韻

昔與宛溪子。悲歌野史亭。勝遊成闊絕。良會喜重經。髮短今垂白。篇殘未殺青。滄江遺老在。寂寞少微星。

往與宛溪商路方輿紀要。子疏快軒及見之。忽忽三十年矣。詩下

卽事四首

乘槎使客遞分符。水國車船並算租。幾見卉裳來翡翠。何勞鐵網冒珊瑚。雲迷屐氣成墟市。風引鮫人識

版圖。卻笑秦庭枉驅石。麻姑曾話海天枯。

旌麾一夕徧津頭。挾策儒生苦運籌。縱有文章能徙鱷。忍教羽檄漫驚鷗。桑畦麥隴連戎伍。蟹舍漁莊間戍樓。寄語緯蕭江上客。驪龍未寤莫深憂。

天南誰道接扶桑。屈指孫盧跡渺茫。祇借鯨波爲窟宅。難憑鼉足紀封疆。排空濁浪搏雌霓。捲地腥風盪夕陽。可憶石頭城下路。楚歌聞罷久蒼涼。

極目滄瀛不計程。雲帆從此餉吳粳。勞山近逼田橫島。碣石平臨箕子城。地擁波濤分絕域。天留鎖鑰鞏神京。閒緡海賦寒燈炮。遮莫鄰雞報歲更。疏快軒詩下

惲格 南田詩鈔五卷甌香館集十二卷補遺一卷

惲格。字壽平。又字正叔。亦曰叔子。號南田。後以字行。武進人。日初第三子。少從日初與閩中王祈義師。事敗。年方十五。爲總督陳錦所虜。養之爲子。錦死。求爲僧于靈隱。王抃爲之作鷲峯緣傳奇者也。旋歸。以賣畫養父。初寫山水。讓王翬獨步。改作花卉。出神入妙。窮古今之變。夙工爲詩。復善楮書。人稱三絕。實則三絕中一點一滴。皆故國之思。非異識者不能辨也。若僅目爲高逸。未免泯沒烈士苦心。卒于康熙二十九年。年五十八。事具惲鶴生南田先生家傳。詩爲莊令與徐永宜選刊于五十六年者。曰南田詩鈔五卷。謂其詩率幽渺悽辰。然其大者不可得而錄也。錄贈酬題畫諸小什。又不足以盡南田。則俟後之

論世而知其心者。于是其詩之當傳者皆不傳矣。道光中。蔣生沐增輯爲甌香館集。凡詩十卷。題識二卷。補遺一卷。所增仍贈酬題畫之什。其驚心而動魄者。渺乎不可得而遇也。蔣本有丙寅庚辰二顧祖禹序云。叔子既歷喪亂。少壯時。多與畸人俠士游。常奔走千里。恍惚死生。他人色沮神喪。而叔子意氣如常。故其詩中多豪宕感激之什。此言未經人道。祖禹與格朏交。宜能知格心事。即其言以求于今存之詩。往往能遇之。

雜感

斷簡留秦劫。無糧說禹餘。琴寒桑扈雨。金養范公魚。對案慚妻子。呼門畏吏胥。朝生當暮死。不待歲云除。

長夜誰同舞。荒雞不肯鳴。雕蟲心自悔。折翼夢猶驚。絕險觀奇士。通都聚客卿。豈因吾髮白。早晚報河清。南田詩
鈔二

楊宗發白雲樓詩鈔一卷

楊宗發。字起文。武進人。從惲日初學經世之學。工詩古文辭。獨酌謠云。英雄既已老。木石皆可親。乞食贈惲大壽平云。英雄失路歸田廬。咳唾蕭條甘乞食。又云。君今懷才泣知己。我亦東西苦行李。執手大笑歌嗚嗚。去揖吳江浣紗女。自負若此。蓋日初嘗舉兵閩越。後雖伏居里廬。所以教人者。未忘初志。故其

徒皆有壯心。早卒。年四十二。事具蔣金式所爲楊起文小傳。有白雲樓詩鈔一卷。胎息極厚。境界絕高。造語詠奇。而自具名理。篇章不富。同時輩流。鮮有能及之者。

辛亥大旱七月不雨楊子憫之作望雲歌

雲如魚兮追北斗。白鬚農夫跪隴首。雲如家兮飲天漢。黃毛小兒跳田畔。山之雲。何田田。藉我東西南北天。三更發風五更止。明日出門問天雨。白雲樓詩鈔一

胡香吳 香草堂詩鈔五卷

胡香吳。字竹紆。號芋莊。武進人。不事帖括。家貧訓蒙賣文爲活。欲築香草堂三楹。憚格羅收爲之作圖。二十年而堂不成。胸懷夷曠。視貧富貴賤一也。與之無忤。其品節可與格並論。卒于康熙四十六年。年七十三。事具莊楷胡芋莊小傳。撰香草堂詩鈔五卷。不名一家。歌行似蘇。五言似杜。七律工細似陸。工力甚深。絕無摹擬之迹。

釘鞦生日

謠言九月十三晴。釘鞦掛斷繩。占書亦謂是日晴。主冬晴柴賤。故有釘鞦生之語。老人感彼蒼之賜。戲成二律。一二同好。所然和之。

爭將兩具驗冬晴。旬又加三菊候生。名士每於高閣束。散材如借曲轅成。波紋遠蹙從縣置。蠟澤兼施任豫營。配取黛眉紅錦並。雙尖儘上畫屏行。香草堂詩鈔三

楊昌言 梧岡集十二卷

楊昌言。字大聲。武進人。父瑀有高位。顧炎武嘗謂讀書爲己。探賾洞微。吾不如楊雪臣。昌言少承父教。不事科舉。教讀爲生。爲詩宗陶潛杜甫。參以蘇陸。及見諸老。與之酬唱。故不失先正矩矱。康熙四十三年。年六十。始訂其詩。自戊戌順治十五年迄癸未康熙四十二年爲梧岡集十二卷。自題云。閒來檢點平生句。猶喜曾無世俗詩。論詩謂近時言詩者。莫不惡僞而喜真。然真與率有辨。真可也。率不可也。平淡語出之須極錘鍊。家常語出之須極風雅。不然。俗語俚言。任情信口。此打油腔耳。又謂詩中用古。亦須清空一氣。無使事之迹乃佳。其言甚確。可以知其所詣。唯節物詠七十三首。詠古詩百首。人物詠十八首。及菊花百詠。雖時尙詠物。自可不存。

紀異丁丑

歲維丁丑春。閏三月朔日。日有食之既。天地黯無色。漫漫遂若夜。仰視大星出。恍惚墮鬼國。魑魅嘯儻匹。復憂世混沌。日月從此畢。余時客京華。目覩心慘慄。春秋昔紀異。茲事甫見一。七月壬辰朔。煌煌聖人筆。楚子僭王號。鄭伯抗王室。事應非偶然。天心詎難測。陰陽遞反覆。物盛戒其極。日爲衆臨宗。光輝豈終蝕。行看燭龍駕。照耀臨萬國。爲語此下民。桑榆未爲失。

陰陽有常理。坤道恒主靜。京師首善地。胡爲地震震。憶昔客都門。己未歲秋孟。大地忽簸蕩。累月尙靡

定。室廬半傾圯。露處敢言病。主人莊庶子。顛墜殞厥命。晨鳴金門珂。夕掩總帷幃。銀箏敗壁壓。寶瑟頽垣亘。悲歡在須臾。榮落止一瞬。去年復遊燕。坤軸猶未正。疾如風霆馳。勢若兵車隣。聆音互奔竄。竚立仍眩暈。異變翻似常。一再未爲甚。地厚敢不踏。詩言亮足信。古皇斷齏足。力弱懼弗任。何當四極安。永使萬方慶。格四 集一

和京口錢馭少先生寄懷令兄大錯和尚久客滇中卽用原韻

仗策蠻荒幾度春。干戈不老歲寒身。家留海嶽荆榛徧。人臥羅浮草木新。一紙冰霜垂翰墨。時以錯公所書大字見貽 集二年涕淚落君親。白匡亦是銘勳地。千古風流想葛巾。

萬里從王事已非。連天烽火幾時歸。丹心東海空銜木。白首西山自採薇。錫杖攜來方悟錯。蒲團坐去亦忘機。試聽夜半鳴雞處。讀罷楞伽靜掩扉。格四 集五

九日兵行

首宿連山戰馬肥。清秋百里見旌旗。荒煙遠戍晨吹角。細雨孤城晝掩扉。上將樓船歡羈幕。疲民驛路泣絺衣。愁看此日登高處。殺氣偏隨冀北飛。格四 集五

維揚感舊

竹西歌吹不勝春。亂後經過倍愴神。邨店晚風喧獵騎。野田寒月泣流民。梅尋官閣人何在。柳問隋堤迹半湮。保障江淮思相國。百年遺恨向誰陳。格四 集六

寄祝徐埃齋先生六十四首錄三

先生諱枋。字昭法。與禎壬午舉人。

三吳名士數南州。鏡裏流光漸白頭。案上詩編新甲子。井中書續舊春秋。閒雲野鶴扶筇得。賸水殘山撥墨收。縱有千金渾不顧。看囊那用一錢留。

香徑琴臺迹半淹。伊人高臥碧山尖。亂餘漸少諸耆舊。江左猶存一孝廉。蓬戶止容禪客叩。綵毫不爲俗人拈。紅塵咫尺閭門士。四十年來足未黏。

公車入洛年纔冠。拂袖歸來便耦耕。三月銅駝亡國恨。百年金馬舊家聲。尊君勿齋先生諱沂。乙酉死之。人倫不改傳忠孝。

吾黨相依識姓名。莫向東風傷往事。且攜斗酒共聽鶯。梧岡集六

李 寄李介立詩鈔三卷

李寄。字介立。號因菴。由里山人。崑崙山樵。萍客。甕裏書。白眼狂生。三因居士。皆其隨事異名。黃冠出游。則曰後陽子。江陰人。徐弘祖孕妾改嫁所生。不欲復徐氏。故曰寄。少讀書有志節。不求仕進。以游幕爲食。通知當世之事。尤喜談兵。著兵鑑百二十卷。又有天香閣筆記二卷。記明季事。皆有根據。性喜游涉。歷東南殆遍。嘗北至燕。西入秦。所不至者滇黔而已。初弘祖徒步游宇內。在滇中最久。著有徐霞客游記。塾師李夢良字會明。爲編次寫定十二冊。因亂失去一冊。宜興曹駿甫有傳鈔本。寄展轉求得之于史夏隆家。鈔出游太華顏洞諸記及盤江考。以補季本。彙爲訂正。游記始得傳世。寄孤蹤坎壤。妻死無

子。卒年七十二。以弘祖沒于崇禎十四年。是年寄始生推之。當沒于康熙五十二年。撰天香閣文集七卷。外集一卷。詩有停車。髡春。谷口。附游。借隱。晴川。鳴蟬。聽雨。孤筇。息影。搔首。一笑。□□諸集。凡二十四卷。皆未見。見者聽雨孤筇息影三集。錄爲李介立詩鈔三卷。詩不以摹擬求工。而真氣包舉。卽景生情。弔古諸作。尤致意于明季興亡得失之故。知其拳拳者在此也。

西施山戲占

山在紹興城外二里。越王教西施歌舞處。

魯國君臣燕雀娛。共言嘗膽事全無。越王自愛看歌舞。不信西施肯獻吳。

魯監國之在紹興也。以錢塘江爲邊界。聞守江諸將日置酒唱戲。歌吹聲連百餘里。

當是時。余固知其必敗矣。丙申入秦。一紹興婁姓者同行。因言曰。余邑有魯先王故長史某。聞王來。畏有所費。匿不見。後王知而召之。因讓張樂設宴。啓王與各官臨家。王曰將而賈。吾爲爾設。因上數百金於王。王乃召百官宴於庭。出僮人歌伎以侑酒。其妃亦隔簾窺宴。余與長史親也。馮其家人得入。見王平巾小袖。顧盼輕瀟。酒酣歌作。王鼓頤張唇。手象箸擊座。與歌妓相應。已而投箸起。入簾擁妃坐。笑語雜。聲聞簾外。外人咸目射簾內。須臾三出三入。更闌燭換。冠履交錯。僮僕而舞。僮僕不能辨矣。王之調弄聲色。君臣兒戲。概可見矣。何怪諸將之沈酣江上哉。期年而敗。李介立非不幸也。余登西施山。實感此而作。言戲而意則苦矣。詩鈔二

感時

時傳揚陳諸人皆禍及

白盡阮生眼。閒看此市朝。窟三眞善擊。網四竟何逃。騎虎終遭噬。低棋不自饒。蘇張雖有舌。難解九原

嘲。李介立詩鈔三

李崧芥軒詩草一卷夕陽村詩鈔一卷

李崧。字靜山。號芥軒。江陰人。高隱無錫鵝湖之浣香園。後徙梅里。工詩。善畫草蟲蘆雁。初娶于吳。繼

薛。並能詩。草衣木食。而有閨房韻事。七十餘喪明。不廢吟詠。八十餘始卒。已在乾隆之初矣。

戴南枝八十

熱血難消白髮新。滄桑閱歷幾番塵。獨書甲子依彭澤。老向乾坤哭富春。畫裏無人元隱士。井中有史宋遺民。一竿何處堪垂釣。流水桃花護舊津。芥軒詩草

薛 瓊 綠窗小草一卷絳雪詞一卷

薛瓊。字素儀。長洲人。工詩。善畫竹。適江陰李崧爲繼室。有唱隨之樂。世傳其細剝瓜仁排雁陣。輕移杯底印連環句。具見慧心。撰綠窗小草一卷。絳雪詞一卷。詩才若水。類不食人間烟火。沈德潛選入別裁集。爲之竄改。不止靈慧之別而已。清人選詩。多喜加墨。朱彝尊沈德潛皆有此癖。王士禛感舊集所改字句。翁方綱且奉之爲準的。唐宋人似不若此。

己未寒食

一樣鶯花二月天。可憐風景異當年。郁荒日日晨炊少。不獨今朝是禁煙。綠窗小草

李天根 雲墟小蕘一卷

李天根。原名大本。字雲墟。崧子。亦不應試。詩學陶韋。有稱于時。撰雲墟小蕘一卷。別撰燭火錄三十二

卷。自序丙戌之春。門人集惜字會。以素紙刷印蟲魚草木花板。裝訂成書。易城鄉婦人女子夾針線破書。數年間。得野史彈詞小說因果謗揭一千五百餘種。又于敗紙中得計六奇南北略草稿。缺南略一至六卷。丁卯秋。紬繹前所錄書。復借鈔友人祕本。編次成書。自甲申崇禎十七年迄于壬寅。康熙元年弘光永曆之事。大略具備。凡七閱月畢事。崧爲忠毅再從孫。故其生雖晚。不忘先朝。天根繼之。遂有此撰。又善製曲。有黃金環。白頭花燭。顛倒鴛鴦諸劇。

題九峯三逸圖

鸞鶴同一羣。三隱寄遐矚。龍峯此棲託。長嘯激林木。冷然世外味。寒泉漱甘菊。於焉契道深。千秋足空谷。雲壑小蘊

王時敏 王烟客集十卷

王時敏本名贊虞。字遜之。號烟客。晚號歸村。世稱西田先生。太倉人。祖錫爵。萬曆時官大學士。父衡以進士第二人及第。告終養歸。先後卒。時敏年十九。獨當門戶。以廕爲尙寶丞。累官太常寺少卿。崇禎庚辰以病歸。爲人有智計。錫爵以請三王并封。爲世詬病。時敏刻錫爵密揭及神宗御札以釋疑。雖門戶各別。不免依傍馮銓。稱門下士。頗與聞機事。然不樂美宦。易代後以父執事錢謙益。請業甚謹。時與吳偉業酬唱往還。皆東林也。累世富厚。而居鄉頗言地方利弊興革。爲民請命。鼎革之際。獨能保其家。蓋善

以術自全者。諸子皆富文采。而掞獨貴。以遺老終于康熙十九年。年八十九。事具程穆衡太倉耆舊傳。著述傳者曰偶諧舊草一卷。續草一卷。爲當官奉使四方之作。曰西廬詩草二卷。補二卷。則里居所作。曰西廬詩餘一卷。曰遺訓一卷。尺牘二卷。自傷失學。不敢言詩。然筆調橫恣。故是作者。特爲畫名所掩。畫能立宗開派。一代畫人。鮮有能越其範圍者。別行家書一卷。康熙初與第五子抃者。晚景蕭條。家計甚窘。讀之知其時征斂之苦。

秦雨歌

婁江湯湯勢逶迤。民淳俗樸家安乎。海邦由來號樂國。土膏和潤豐年多。一自江煙形勝改。陰陽易位天薦瘥。田疇磽确鮮耕稼。沴氣蟠結生人疴。胥徒與阜爭放毒。齒牙爪距交搓摩。笑談翻掌布危械。酒杯作劇張虞羅。羣飛翼虎望屋食。含沙蜮矢乘人過。黨類繁滋逼臺府。蛛傳蝶肖成巢窠。橫征暴斂百如意。舞文枉法誰嗔訶。數年狂飈振郊邑。長林撼蕩無停柯。遺黎骨碎心膽墮。但知若輩遑知佗。況兼鳳里有冤獄。巧詆周內緣讒囹。孱生闔門陷罟阱。猶如弱鳥罹罾罟。樸陽禍猾斲民脈。東海怨抑干天和。去年商羊舞原隰。今年赤魃來江沱。鄉農耕蒔劇焦土。常憂天澤終蹉跎。幸逢秦公馳馭至。冰心鐵面持金科。炯然神光照毫髮。但除蠹賊蠲煩苛。深知此冤繙故牘。連宵秉燭惟凝睽。一朝霆斷沉墮豁。脫枷破杻加兇魔。士民傾城擁門闌。歡呼歌舞羣傒傒。時方中天麗杲日。油雲忽合旋滂沱。須臾甘霖遂盈尺。街衢潦集如傾河。大有從茲可預卜。會看九穗登嘉禾。三農盡拜秦公賜。遠邇齊賡秦雨歌。往古平原御史雨。佳話相

傳並不磨。且聞封章達帝闕。行開平陸仍洪波。挽回風氣氛祲息。善良鼓腹長婆娑。嗚呼神人威德何巍巍。百辟爲憲福不那。從政者不師秦公將若何。西廬詩
草上

案此爲蘇松巡按秦世禎作。世禎捕殺蠶役把持錢糧者。嚴劾巡撫士國寶拿問自盡。一時頌聲大作。

亥秋書事

柳帆如霧集。海水怒爭飛。貝冑森霜戟。犀渠間鐵衣。鼙鳴戰鼓急。鳥過陣橋稀。豈意京江險。傷痕血
濺磯。

方驚烽火急。忽報習流奔。霧布朝傳數。鐘歌夕奏繁。江邊空戰骨。海外漫羈魂。京口士民。有
隨海船去者。不識蒼天意。

同驅入死門。

擾攘風塵後。中秋月更明。天心難付度。人事乍欣驚。幾處笙歌席。千家慟哭聲。亂離逢令節。願景倍
傷情。

鼙鼓無時息。輸將苦四應。戍兵終日至。田稅疊年徵。竈冷虛晨釜。機殘暗夜燈。閭閻貧到骨。何以佐軍

興。西廬詩
草下

王 挺 減菴詩存一卷

王挺。字周臣。號減菴。時敏長子。崇禎末以廕補中書。未幾請養歸。入清不再起。與陸世儀陳瑚相師友。

目盲。著書皆由口授。有減菴文鈔。不盲集。離憂集。皆不傳。傳減菴詩存四十四首。蒼勁不趨時習。卒于康熙十□年。年五十九。

觀海篇

地維缺後無人補。導厥洪流賴神禹。瀦爲大澤在東南。東南盡處茲吾土。五十里外水湯湯。晦冥時見馮夷舞。溟漲無端衆水歸。尾閭洩之如漏卮。山經神怪不勝記。於今水母稱天妃。極目蒼茫空一碧。中有影山萬千笏。沐日浴月蕩天涯。陰雲疑入蛟龍窟。風摧怒吼若雷霆。水蟲驚起波濤聲。夜半水痕赤如血。天公震死鯨魚脰。海客飄飄越險阻。東南西北不知處。問君何事蹈危機。曰出天下有樂所。亡命那思妻與兒。千金在腰忍別離。生爲島夷葬魚腹。遊魂萬里君何知。古稱人世曰苦海。豈有神仙至今在。當年漢武好長生。方丈蓬萊盡虛繪。某言觀海難爲水。遊者爲能獨解之。放眼始覺天地闊。且知逝者亦如斯。橫襟遐覽尋絕域。何必拘拘守咫尺。我欲縱觀滄海東。滄海之東復何極。減菴詩存

案此詩重在亡命數語。蓋爲營王從亡諸人詠。

陸世儀桴亭先生文集六卷詩集十卷

陸世儀。字道威。自號剛齋。晚又號桴亭。世稱桴亭先生。太倉人。諸生。入清不事科舉。專意講學著述。卒于康熙十一年。年六十二。事具陳瑚所撰尊道先生陸君行狀。世儀爲學。務求實用。自天文地理。禮樂

農桑。井田學校。封建郡縣。以至河渠貢賦。戰陣刑法。鄉飲賓射。祭祀喪紀。無不源流畢貫。著思辨錄前集二十二卷。論學酬答四卷。宗祭禮四卷。儒宗理要六十卷。格致編一卷。古文一卷。性善圖說。庚子東林講義。雲漢升沈。山河兩戒。分野圖說。月行九道等圖。未刻者。尙四五十種。藏于家。同治二年。安道書院刻其詩鈔八卷。文鈔六卷。光緒三年。蘇州書局重刻思辨錄輯要三十五卷。二十六年。唐受祺始刻梓亭先生遺書三十二種。文集六卷。詩集十卷。論學酬答四卷。志學錄一卷。性善圖說一卷。虛齋格致傳補注一卷。四書講義輯存一卷。淮雲問答輯存一卷。八陣發明一卷。月道疏一卷。分野說一卷。治鄉三約一卷。制科議一卷。甲申臆議一卷。蘇松浮糧考一卷。真江條議一卷。桑梓五防一卷。常平權法一卷。家祭禮一卷。支更說一卷。避地三策一卷。觀其所著書。多酌古準今。斟酌時宜。期能見諸施行。蓋未嘗須臾忘天下事。而尤寄意于治鄉三約。三約者。一曰教約。以訓鄉民。一曰卹約。以惠鄉民。一曰保約。以衛鄉民。而社學保甲社倉卽括于其中。以鄉爲王道之始。其志可謂切矣。聲名旣廣。京師貴人。屢折簡招之不應。與噉名者行徑有別。然爲救飢不能不訓蒙自給。且嘗一客于安義令毛如石。卽爲之刻思辨錄之晚復客巡撫馬祐。爲之教子弟。集中別母詩云。五日征帆去路遙。半爲負米半征徭。公家若肯寬時日。豈忍庭幃隔暮朝。與陳瑚交最篤。瑚在楚中登善校士。世儀自安義寄詩云。廿年學道共艱辛。一夕風塵盡隱淪。何意鵝湖登座客。半爲蓮幕捉刀人。亦自傷也。瑚稱其善爲詩歌。有漢唐之遺音。其遇亂有感遇詩。而近日則有梅花歎。芍藥歎諸作。以傷物變。有庚戌_{庚辰}大水歌以志天災。皆可備國風。陳太史。不

徒如世之以風雲月露爲工者也。自今觀之。詩筆特明秀。不類學人之作。而語語愴惻。悲閱之懷如見。匿不授梓。殆卽由此。文極平實有法。惜原本爲張伯行所刻。凡志傳紀事之作。皆已削去。或亦爲避忌諱歟。

乙酉元夕婁城盛張燈火戶皆懸綵有感而賦

塞北旌旗亂。江南采色多。數天猶有淚。薄海但聞歌。遊女拖珠履。王孫曳玉珂。太平誠足樂。九世奈仇何。桴亭先生詩集二

江寧謠

三吳割據此專居。一統經營定鼎初。門闕猶存宮寢廢。野翁擔糞自澆蔬。天壇享殿迴成荒。牧豎樵童上下狂。拾得殿頭黃瓦子。夏天權作枕頭涼。酒肆茶坊處處開。迎賓館客巧安排。不愁風雨柴薪少。自有鍾陵雜樹來。桴亭先生詩集五

水田謠

水田農夫勝水軍。九月下水無衣裙。腰鎌三尺長於劍。草屨還拖四十斤。水鄉割稻人。結草爲屨。高二三尺。蹠以入水。今年米賤好豐年。每石收來價七錢。上田二石一兩四。下田五斗也堪憐。數賤傷農。桴亭先生今始驗之。詩集五

錢塘行

海門光發曙星上。舟人解維候潮長。數舟相傍參差行。捩舵開頭水聲響。天邊日出光溟濛。曉起不辨江

西東。青山兩岸斷復續。千里百里來羣龍。聞昔錢塘形勢壯。怒濤如雪兼天浪。奔流直至富陽山。商賈雲屯魚鼈旺。何年沙漲江形蹙。三尺清波侵馬腹。潮聲不上湧金門。城邑蕭條生氣薄。只今時事尙多艱。絡繹兵車互往還。虎牌日日驚船埠。馬矢朝朝滿市闌。更聞清海人蟾沸。處處山頭望廷尉。舟人相戒過溪灘。談虎猶看色驚威。民生憔悴久無聊。況是今年早魃驕。江南江北數十郡。六月無雲土盡焦。我發吳閩向東浙。場圃從無禾稼列。村村罷市避兵行。門闌泥封煙火絕。人生值此總堪傷。如火征徭迄未央。何時得覩太平樂。青山綠水恣徜徉。

大雪口號十首自順治甲午後此景不可復見今歲兩得之大寒中誠瑞徵也但時勢多

殊觸目成感聊爲俚言述其大概前七首以歎世後三首以自歎也

案此詩作于康熙六年

閒道蝗災不可治。共憂蝗種土中遺。而今入地應千尺。不赦應無出土期。

江南北蝗災特甚。風陽至敵天四日。日色俱無。劉歆曰。此食殘害政所致。今幸

值

河魚臘雪向稱珍。飽食常愁悶殺人。清海頻年軍令急。貪夫不用更憂辛。

其中以海爲利。數年來江海之味俱絕。

掃雪烹茶興味真。年來學士苦無薪。遙看美酒羊羔客。盡是磨牙吮血人。

杼亭先生詩集九

水沒頭歌

水沒頭。沒頭水。災沴從來未有此。今春春水滿四澤。梅雨又來人盡喜。陡然一雨四十日。平地波濤三尺起。高鄉低鄉成陸海。堅厚如城亦傾圮。天晴水未退尺寸。怪風忽動雲如駛。海水直立高於山。奔入平田

幾十里。大倉嘉定常熟沿海十里盡壞屋廬漂沒花稻空。人畜浮沈半生死。誰知天意更奇哉。東北風。西北來。太湖三萬六

千頃。捲空白雪聲如雷。湖隄東東不得過。抵排激鬪魚龍簸。沖村撲舍村舍空。蕩郭摧城城郭破。吳江一

城如小孟。中邊皆水民爲魚。畫樓百間沈水底。縱橫棺槨浮邱墟。吳江城北有百間樓。爲水衝倒。民間棺槨皆漂亂。奔騰東出出不得。

三江故道皆溷塞。迴旋散漫浸平疇。阡陌疆圍都不識。可憐三吳賦重民力殫。豫徵久悲骨髓乾。惟望秋

成十分好。卒歲猶自多艱難。豈料民窮天不恤。罪孽既深難解釋。積荒十載荒又荒。吳中自辛丑歲起。連歲荒歉。此番定

作溝中瘠。被災死者不必言。惟有生存苦更冤。先要支持七分限。粉身碎骨誰來援。沿塘水淺稍可救。盡

力增圍夜復晝。無端殃及往來船。亂搶蓬桅如殺鬪。沿塘數十里。皆搶往來船。上廬廢作岸。得延一線。救苗廢盡無限力。水中作肚苗

不實。苗將實曰做肚。水深而寒故不實。徒看兩岸葉青青。粧點豐稜虛景色。沿海高鄉更不情。木棉水退葉仍生。大倉嘉定俱種木棉。根

幹已傷無子結。聊作薪芻燕釜鑪。朝廷餉急不輕赦。部文日夜魚鱗下。報荒不報兩遲疑。造冊里區先索

謝。叩關無路天宇深。思量往事多酸辛。勘荒費。不可說。總有蠲減還欺侵。欲歌不能哭不可。萬轉千迴

愁殺我。干戈寧息四海平。反使斯民重罹禍。遙思昔日帝堯慈。九載洪波靡孑遺。未識君臣用何道。遺種

猶存到此時。桴亭先生詩集十

案此詩康熙九年作。

前旱

赤屋如拳耀斗邊。去年巨浸猶稽天。大水之後必大旱。逆知此歲多迍邐。詎意夏初頗雨水。五月插秧農

事喜。自從大暑雨澤竭。兩月纖雲都不起。不惟無雨兼無風。絳霞如火朝朝紅。池塘水竭魚鼈死。樹頭葉盡蕩飛蟲。翻車老農背如楮。流血津津裂雙踝。擊鼓燒山龍不醒。暴炷焚祝神空下。村中父老心怛絕。五步一拜脛欲折。柳枝盤頂手擎香。萬口叫天天不徹。三吳古來號澤國。不憂旱暵憂溼塞。三江成陸百川平。縱值豐年常菜色。今年獨賦開劉河。飢黎百萬舞且歌。江流初復遽遭旱。杯水難救車薪多。况復渾潮挾沙入。海強河弱沙還集。水利名成難報荒。仰頭空對蒼天泣。杼亭先生詩集十

案此詩康熙十年作。

陳瑚 確庵詩鈔八卷 文鈔六卷

陳瑚。字言夏。號確庵。太倉人。崇禎十六年舉人。入清。絕意仕進。隱居崑山之蔚村。少與陸世儀定交。年少于世儀二歲。而爲諍友。論學相辨駁。必無毫髮疑義。兩人當明季知天下將有事。學橫槊舞劍彎弓。弄刀戰鬥之具。各作名利酒色四箴。瑚之學博大精深。尤講求經濟大略。以天下爲己任。惜非其時。間出緒餘。如救荒治水。小試無不效。著聖學入門以教人。入孝出悌。謹行信言。親愛學文。是爲小學。格致誠意。正心修身。齊家治國。是爲大學。化行于鄉里。立孝弟力田爲善三約。他著有求道錄。淮雲問答。築園說。治病說。救荒定議。共五十八卷。兼工詩文。毛子晉嘗刻確庵詩文集。今不易得。同治中葉裕仁合輯爲確庵詩鈔八卷。文鈔六卷。詩有去取。文僅七十九篇。所謂安道書院本。非其全也。詩辭酸意苦。寄託

深遠。其文廉悍。尤善紀事。卒于康熙十三年。年六十三。學者私謚安道先生。巡撫湯斌卽其居立安道書院。世知世儀以思辨錄。而知翔者少。不知兩人之學。本相成者也。同里共學者。尙有盛敬字聖傳。江士韶字虞九。人稱陸陳盛江四君子。士韶不著書。而爲世儀編思辨錄輯要以行世。

對酒述懷座客有泣下者

南冠相對不勝悲。甚矣吾衰鬢欲絲。海角颶風天有恨。風雨大作。舟師驚焉。江頭潮信地無知。錢塘江潮不至。破愁酒盡沾千

日。避俗歌成續五噫。何處尙餘乾淨土。此心應與首陽期。確庵先生詩鈔一

乙酉九月劉河所郭純一婦朱蹈海死友人張元樸簡予曰此婦人中魯仲連也因爲之

歌歌曰

於乎魯仲連。蹈海不帝秦。高義千古傳。哀哉古今人。相去何天淵。况乃一女子。生死如浮煙。獨有郭婦朱。矢節以自全。時當乙酉之九月。□□殺人東海邊。玉帛載馬後。子女羅馬前。忍辱圖苟活。行道皆哀憐。朱乃從容蹈海死。仰天含笑歸黃泉。有女義不顧。有夫情不牽。江南丈夫幾百萬。此舉偏讓婦人先。吁嗟乎。婦人之中魯仲連。確庵先生詩鈔一

悲洪都

擊鼓莫擊少卿鼓。拭劍莫用南昌土。蛇不成龍虎變鼠。猥偷大笑天公苦。馬騰騰。旗翻翻。營後戶。失前門。矢折鏃。車敗轅。南昌城頭鬪體哭。鶴鷗夜夜啼人屋。烏鷺公然食人肉。確庵先生詩鈔一

過吳門有感

不泊吳門下。星霜又幾回。轎車新使舫。烟草舊歌臺。易入王維恨。能令庾信哀。桃花緣底事。還傍戰場開。確庵先生詩鈔二

湖南

芻狗天心恐未仁。湖南聞說亂離頻。燕求巢處晴依樹。虎穴城中畫噉人。湘潭城中有虎何必湘君纒下淚。縱非賈傅亦傷神。蕭條萬里無煙火。祇見風沙不見春。確庵先生詩鈔五

磨兜堅哀潘吳也

裕仁案。潘力田。建章。吳亦漢炎。皆吳江人。遭湖州莊氏私史之難。顧亭林先生有書吳潘二子事。

磨兜堅。慎勿言。言之輸國情。挾筆硯。慎勿書。書之殺其身。有耳不如聾。有舌不如瘖。將隱焉用文。自昔以為箴。定哀多微辭。絕筆於獲麟。大聖尚慎哉。何況我後人。君不見宋范曄。魏崔浩。一朝鼎烹天下笑。獨有昌黎韓退之。人禍天刑兩不知。不見鄭所南。井中心史鐵為函。不見陶南邨。輟耕之錄埋樹根。逃名養晦盡如此。君獨何為闕斯理。嗚呼歌未終。淚如雨。確庵先生詩鈔五

蠶婦怨

出門采柔桑。入門飼蠶忙。桃花已落盡。夏景日初長。家家禁乞火。戶戶早凝粧。有郎不同宿。有酒不能嘗。中宵頻起看。攬衣獨徬徨。初眠蠶在房。再眠蠶在堂。三眠蠶欲老。纍纍滿盈筐。雖則繭盈筐。焉得遂成章。五日纒為絲。十日織為錦。杼機夜雨寒。刀尺秋風緊。雙眼花。雙手眠。千辛萬苦一絲絲。來朝

剪取攔街賣。賣向吳門遊冶兒。遊冶兒。驕且癡。子無袴。妻無襦。虎丘花柳楓橋月。換得紅顏一解頤。

雅庵先生
詩鈔六

許旭秋水集十卷

許旭。字九日。太倉人。諸生。嘗客范承謨幕。撰秋水集十卷。五七律各三卷。刻于康熙二十八年己巳。時年七十。未幾卒。五七古五七絕各一卷。則身後所刻。故卷數參差。旭詩爲梅村所重。刻入太倉十子詩選。詩格闌入宋元。雄深渾折。誠一時作手。雖非高逸。而不慕仕宦。國門集周肇人日詩云。丁卯橋成詩萬首。甲申龍去淚三千。蓋贈旭作也。

懷寄徐季重

憶昔己丑歲。君從婁上居。予年甫三十。九齡君長予。愛君富縹緗。家有萬卷書。時時造君室。蒐討窮歡娛。旨酒爲我設。食肉兼有魚。坐對只兩人。歡洽同友于。君隘等伯夷。予性嵇康疎。相背各契合。謂是儕黨無。酒酣歌獨漉。痛哭或與俱。懷抱無由宣。君乃諒區區。白眼視輩流。恥同轅下駒。所許獨猶子。才堪奪螿弧。壯志並終軍。丹山出鳳雛。予時聞此言。矯首天一隅。無何折簡迎。平頭送來趨。驚謂阿咸至。傾蓋殷相須。平生未謀面。一見心已輸。坦然道情懷。豁達無牽拘。酒肴旣以陳。漏箭如須臾。剪燭試聯吟。風雲起儲胥。興酣矜手捷。思敏嗟毫枯。鼎力各爭能。詎肯獨後遺。膨脝陋石鼎。剗竅羞之乎。連翩百韻

就。紅日騰東隅。此樂何敢忘。契闊良不虛。從此各參辰。君仍返故廬。老大俱無成。在苒憐居諸。屈指聚散辰。卅載已有餘。君齒及古稀。精強異澤壤。所羨著書盈。幾尺忘勤劬。編削一代成。可以佐石渠。吾生愧勞攘。跼蹐焉所如。茅屋四五間。時時乏樵蘇。鼓腹快糠粃。短髮落篋梳。跋履軍幕中。竊笑同蓬除。買山洵寡營。牽舟無乃迂。遙瞻老人峯。林塘多鬱紆。君方坐其下。清詠同笙竽。徐步馬鞍麓。爽氣西來舒。高寄託水石。遐想馳蓬壺。念舊與懷新。優游諒弗殊。兼葭長蒼蒼。吾與何能孤。秋水集一

贈許宜生

虞山人。尊人子洽先生。崇禎間以黨題觸時相幾死。所著五陵志略。爲當時所忌。

君家嚴君擅著作。一編紀載常盈削。觸忌全忘權相猜。大書不避通侯惡。斷斷爲犯當時怒。完卵全憂在門戶。一時牙咀共喉搖。謂殺孔融同腐鼠。逃生老作江南隱。布衣無恙門常屏。天移地改事全非。浩歌對酒忘形影。傳家文體羨弓裘。萬卷遺君付校讎。荀氏尙能成漢紀。孫家不改晉陽秋。荒江賣膽三間屋。猶是先人舊時築。長蘅畫壁孟陽題。欲棄徘徊不忍鬻。席帽衝寒污滿塵。一盃重與話飄零。傷心詞賦今無用。同是東西南北人。秋水集二

毛師柱端峯詩選六卷端峯詩續選八卷

毛師柱。字亦史。號端峯。少從陸世儀究心程朱及當世之務。家貧。游食四方。所至以詩名。晚始歸老。卒于康熙五十年。年七十八。平生所爲詩近萬首。初自定其詩九百餘首。刻爲端峯詩選六卷。身後王吉武

選刻六百餘首。爲端峯詩續選八卷。其詩不矜標格。亦無激語。而自然高遠。頗耐人思。如秦淮寓樓云。燕子風光餘舊巷。龍蟠山影自神州。再過東臯訪巢民。先生次其年奮韻云。由來天地沙鷗健。到處江山戰馬屯。贈胡石莊云。湘竹舊斑愁易老。江離長綠恨難銷。追感杜茶邨先生云。白髮幾人懷故國。青山何地葬遺民。題王隨菴小影云。七十餘年何限事。問天無路問空王。皆王據所謂甚于匪風下泉之悲者也。早受知于吳偉業。而詩格與太倉十子不類。晚與同里唐孫華沈受宏王吉武並稱。三人自以爲不如。人品亦不如也。蓋可以無愧于世儀矣。

田父詞

東臯社集賦

老農生長婁江邊。自言力作思逢年。那知年豐更愁苦。令我不得中宵眠。箱中有粟囊無錢。公庭敲骨眞可憐。傾箱不足了官稅。依然土銼無炊烟。嗚呼人生筋力百可用。慎莫歸種江南田。端峯詩選二

催花謠乙亥十月作

吳鄉高臯可種木棉者。謂之花田。每年入秋。捉花。公私賴以接濟。今尙杳然。眞怪事也。

公家租賦由田家。低田種稻高種花。吳鄉連年遭水旱。不獨無收價還賤。今年稻田水接天。活人祇靠棉花田。從來八月花如雪。怪事偏偏歎奇絕。秋盡冬交一朵無。眼穿隴畝淚俱枯。長官仁慈意良苦。昨日虔誠祭田祖。着意催花花不開。開遲只怕有霜來。幸緩征輸賴賢牧。四野嗷嗷待花捉。也知無暇救饑寒。醫瘡須有心頭肉。端峯詩選二

大雨歎

九月十九夜

夢回聞雨聲。駭絕起長歎。翻盆抵黃梅。勢實雄且悍。滂沱不少休。昏暮幾至旦。低田方薄收。水復過堤岸。高田木棉稀。前日早已爛。未暇謀糶殮。征輸嚴可憚。吳鄉邀屢豐。遂使羣情玩。修省人不知。天心有更換。請看齊魯疆。頻年經水旱。老弱竟溝壑。壯者則逃竄。原野多空村。遺黎僅存半。何曾三吳人。終始荷天眷。災荒此流行。南北理一貫。祇愁崑岡火。玉石未嘗判。凍餒猶尋常。得毋致離亂。垂老還遭逢。安危豈人算。吉占乃豚魚。只守中孚象。

端峯詩
續選五

西鄉歎

高田草多憂木棉。西鄉田低尤可憐。插秧宜早已插未。那知水長俄如川。十日十夜雨不止。平沈想不輸前年。本因謀食乃無食。何可戀此西鄉田。苦遭災青非意外。天心每與人心連。審時度勢古所尚。鹵莽豈得無虞焉。老夫憂煎也何益。人生事總由蒼天。

端峯詩
續選八

朱鶴齡 愚菴小集十五卷

朱鶴齡。字長孺。吳江人。明諸生。入清以高尙終。清史儒林有傳。稱鶴齡卒于康熙二十二年。年七十八。據集中傳家質言。甲申年三十七。則享年當七十六。否則卒年必有參差。詩近香山。文醇而不肆。乃謂王烟客稱其文可繼虞山。又謂人比之亭林梨洲二曲。爲海內四大布衣。不知何人誑之。稱亭林爲畏友。亭

林集有朱處士長孺寄尙書埤傳一詩。與徐乾學交游。猶可云貞不絕俗。奉王士禛兄弟則近名矣。書元裕之集後一文。明爲錢謙益而作。乃他文推崇備至何也。傳家質言有云。拳拳著述。橫遭讒忌。又云。見一越友選時賢詩。嗤薄豔體。另爲一編。故借西崑以曉正之。而不知者。疑義叢生。蓋爲所撰李義山箋注而發。汪琬鈍翁續稿跋箋注云。常熟釋道源解義山詩未成而沒。朱長孺作箋注。頗采用之。錢夕公馮定遠陳氏潘氏諸說附焉。未嘗揜沒其姓氏。于道源亦然。長孺示予道源注原本頗多蕪累。且間有遺漏。長孺剪裁哀益。不啻十之六七。吳人不察。往往竊議以爲郭竊向注。此爲鶴齡辨白甚力。然謂道源注未成而沒則不然。錢謙益有學集道源注李義山詩集序。累年削稿。出以示予。吾家夕公爲考新舊書。尙論時事。推見其作爲之指意。豈有書未成而先作序之理。謙益朱長孺箋注李義山詩序。予取源師遺本以畀長孺。長孺先有成稿。取源師注擇其善者。爲之剟其瑕礫。審其蕭稂。更數歲而告成。是鶴齡之箋。本于道源。序已明言。何至復生疑議。牧齋尺牘與朱長孺云。義山改竄之後。尙多剝啄。意者不沒姓氏之說。未必盡然。不然。鶴齡注杜亦本於謙益。何以不橫遭疑忌乎。

湖翻行

太湖西來天目源。七十二溪波濤奔。震蕩有時溢原野。未聞浩瀚迷乾坤。五月稻秧齊插蒔。三旬霖雨水澎湃。方憂漏天移澤國。忽駭狂瀾卷平地。颶風猛發神鬼愁。火龍擲火驅潮頭。漂砂礫石失根岸。發屋拔樹蟠蛟虯。聲如列缺鬪霹靂。勢如共工傾不周。乘陵城郭塔欲倒。千廬萬竈皆洪流。巨浪翻騰高屋過。大

魚撥刺平衢游。更憐人畜死無數。浮糶塞港漂難求。百歲老翁驚歎久。此災邑志從未有。乘船入市何足云。地軸翻天浸星斗。我時惶遽無竄逃。急上高樓守簞數。竟日魚釜無炊煙。澆愁何處沽村酒。變不虛生豈偶然。撫時感事心欲嘔。盛朝蠲賑久不聞。長吏敲榜肯停否。欲訴真宰天茫茫。九關虎豹猙獰守。吁嗟蒼生爾奈何。但見號咷走童叟。愚菴小集補遺一

案本集孫義士鳴災記。歲在庚戌夏。雨浹三旬不止。至六月十二日。颶風西來。太湖水橫溢。平地湧丈餘。浸城郭。漂屋廬。人畜溺死無算。浮糶以千百計。風猛濤翻。聲如萬弩齊發。竟日夕乃稍殺。誠百年未有之變云。庚戌爲康熙九年。

刈稻行

老農腰鎌趁晴穫。短禾滿把歎聲作。今年雨暘頗失調。飛蝗雖過未爲虐。苗莖苗葉無損傷。臭蟲潛生根底蠹。臭蟲名負蠶。見爾雅注。芒粒稀疏穗不垂。禾根涸爛氣殊惡。田家無望困粟登。終歲辛勤空錢釘。兼之縣官急索租。簿吏登堂恣烏攫。脫粟一飯抵玉炊。敢希春杵得精鑿。老農切切陳哀詞。問我何法充朝饑。我聞此言再三歎。由來荒歉非一貫。大無麥禾紀春秋。其年無水亦無旱。土膏不發穀不成。魯史特書關治亂。三國孫吳亦有之。沈約宋志文可按。民生三代後。性命全倚天。天若不憐徒顛連。我曹槁餓不足道。恐兆兵氣心焦然。明年果有。愚菴小集補遺一。溟南之變。

詠史

海錄遺編手自披。百年丁運欲何之。鐵函怨史文難滅。釣瀨狂歌鬼亦悲。匹馬居庸符白雀。雙丸淮右整

朱旗。不知王戴諸山叟。王逢戴良肇底事終身痛黍離。愚菴小集補遺一

吳祖修柳塘詩集十二卷

吳祖修。字慎思。吳江人。諸生。著柳塘詩集十二卷。自序少從江右胡悅之陳伯璣。燕山周伯衡問詩法。後受知汪鈍翁。謂可與言詩。又謂朱愚菴許其論詩與錢宗伯有合。知其瓣香終在虞山。昔藏初有學集箋注。傳錄祖修評語。頗釋詩中之事。愚菴小集有贈祖修詩六十韻。望其爲科名中人。而祖修僅以詩教于鄉里。其詩不甚工。而于時事無所避忌。剃髮及詠得勒蘇冠。詞雖和平。意實憤激。知康熙之世。文網不密。故不爲禍。僅刻去齊罵武昌余閣老。黑心讒害殺忠良二句。蓋恐得罪于余國柱也。祖修卒于甲戌。康熙二十三年未得其年。集中投老一首。有孔融過二似同庚句。此詩次于孝陵二十六韻之後。似是己巳年康熙二十八年所作。若然。其卒年當爲五十七。

剃頭二首

吾生適值鼎將遷。卅載頭毛未許全。四角不妨芟似草。中央何必小於錢。偶然梳篋誠爲贅。時復搔爬也覺便。此後蕭蕭人莫笑。黑頭搖落到華顛。

共遵王制剪鬚髻。數日無端又鬱興。一撮尙留原屬我。週遭都去媿逢僧。臨風喜試吹毛刃。束髮難施綰髮繩。最是青春兒戲日。屋簷初覆記吾曾。柳塘詩集二

武林舊事有感

仕宦曾傳車耳謠。子公力在帝城遙。先生一霎登仙夢。贏得人間訟鹿蕉。
朔風蕭颯貫城秋。憶到鄉關觸緒愁。金斗風光良不惡。此時纔解望山頭。
自詫容公術更精。且將此味敵公卿。燈前細讀蒙莊注。單豹何曾解養生。
舉幡聞昔訟陽城。青史于今尙有聲。魯國諸生千百輩。何無一箇肯西行。

柳塘詩集五

雜題

令甲初嚴轉粟程。五年閩楚苦論兵。司農仰屋無他策。額外新添郡縣生。

案此首指捐納生員。

星沙諧價仕途新。冠蓋峨峨儼縉紳。拜袞仲華曾未識。莫將才語向斯人。
公車章滿薦宏詞。若箇磨甍解勒碑。三禮賦成君第獻。只堪鼓吹太平時。
此日方知廉吏難。嚶城聲價滿長安。臺班已解相推重。政拙催科合左官。

案嚶城指臨離其。

綵筆能將氣象干。潛郎頭白主知難。嚇蠻諭蜀尋常事。第一人須第一官。

家公昔日喜談兵。海外曾成君子營。今向落楓江上住。一雙老手種燕青。

柳塘詩集五

感織婦勞因述其事

木棉絕塞來。中國甚利便。開花鬪秋葵。一望高原遍。結子復垂垂。功敵純綿半。枝吹朔風悴。色暴秋陽變。買人死射利。穢載歷鄉縣。健婦勤女紅。十指苦疲倦。買歸喜孜孜。長幼圍坐揀。核車設機械。脚翻轆轤轉。精光無纖瑕。如玉出于闕。爰有文木弓。其弦直于線。一彈花爲飄。柳絮因風旋。再彈雪大作。糝徑目雙眩。鼓聲響噌吰。空中鳴騂箭。况復續續彈。兩軍正酣戰。鏗爾寂無聲。豈琴絃忽斷。劃然分手中。抽條世稱善。紡車張一弦。宮羽更移換。一起復一止。音節覺促短。弱女小解事。學母手屢牽。積久作一團。經緯皆中選。如棗銳兩頭。纍纍珠貫串。理緒入扣中。邊幅稍逾絹。日織三丈餘。兀兀忘歲晏。催科吏打門。貨市完公限。終歲飽辛勤。短褐不及綻。好語天下人。尺布慎勿賤。柳塘詩集六

近事

巖廊客似絮沾泥。彼此焉能無町畦。共恨南衙人叵測。須知北寺獄端倪。宦情近日歸豐沛。黨論當年起越齊。只有知幾歸策早。故園何異武陵溪。

緇塵化後盡歸田。抵死難亡灰復燃。田寶相傾何未已。孫劉雖罷不無權。杏花春雨詩中景。蓴菜秋風世外緣。消得此時閒領略。幽情不到達官邊。

案此首第二聯上句似指索額圖明珠之爭。下句似指徐乾學高士奇王鴻緒罷歸。

此生那便免飢寒。南北民生力並殫。每遇流民安儉歲。喜聞酷吏忽遷官。何曾輓粟爲平糶。未必贏金可當餐。贏得兒童驕項領。相逢不覺慶彈冠。柳塘詩集十一

賦得得勒蘇冠

運值桑田海乍乾。簪裙俱作昔賢觀。白胎草織圍成屋。紅緯絲纒覆似繁。纓欲結時風近古。角思墊去雨偏難。順時久已遵王制。此亦中朝劉氏冠。柳塘詩集十二

案張靈章樸村集。之唐東江家。姜西溟冠屢于案云。夢符金屈屐。醉脫紅纓帽。似當時士庶常服。皆紅纓帽也。孔東塘亦有風裏烟筒噴腦麝。雨中纓帽濕櫻桃句。皆見雪橋詩話。

黃翼聖 黃攝六詩選二卷

黃翼聖。字子羽。號攝六。太倉人。崇禎八年。以貢生廷試。授新都知縣。升安吉知州。干戈之際。以幹濟稱。乙酉弘光元年後。棄官歸。築蓮蕊樓。飯心淨土。自號蓮蕊居士。然集中有兩粵道中詩。疑曾官于永曆朝。易代後。諱莫如深。今無可考矣。卒于順治十六年。年六十四。事具錢謙益所撰蓮蕊居士傳。黃子羽墓誌銘。有黃攝六詩選二卷。手自刊定。沈潛有年。造語獨絕。謙益既標舉江明無月夜。猿喚不眠人。以擬少陵四更山吐月句。復稱爲么弦哀玉。自有天韻。其集久佚。清季翁同龢始得之。謂如秋雁唳空。不見其影。而有餘音。可謂善喻。蓋行安節和。而終不能揜其哀怨。視慷慨悲歌者。又一境界。而心則彌苦矣。

寄懷陸退菴

別來蹤跡各飄蓬。故國河山涕淚中。老我鬢絲禪榻冷。長君髀肉壯年空。飯牛人起茅堂月。放鴨船歸荻

浦風。信國旌旗猶在眼。西臺一慟與誰同。黃攝六
詩選下

秋杪同莊宜稗金孝章祖生哀重其家兄奉情況虎丘用陽字

淹留市館不成觴。愁裏相攜一笑彊。楓早半山明晚照。菊遲十月作重陽。劍光消歇空池在。鹿跡縱橫古
寺荒。莫歎錦官遙萬里。只今吾地是他鄉。黃攝六
詩選下

案末句與亭林今日大梁非舊國句。命意同而更婉。

馮舒默菴遺稿十卷

馮舒。字己蒼。常熟人。諸生。與弟班皆擅文學。以玉臺新詠才調集教人。又多藏書。校勘異同。極有識
解。縣志稱舒直腸快口。軀幹偉然。遇事敢爲。不避強勢。小人嫉之如讎。順治初相與構釁于縣。指所選
懷舊集爲謗訕。曲殺之。後虞書則云。瞿知縣四達殺諸生馮舒于獄。邑中各項錢糧。唯舒獨知其弊。諸生
黃啓耀等合辭上瞿貪狀。瞿以賄飾。疑辭出舒手。故殺之。子亦諸生。默默而已。按後虞書所言爲得實。
蓋姑以懷舊集爲罪名耳。舒遺詩止于己丑。時爲順治五年。遭禍當卽其時。以遺稿和錢履之詩推之。卒
年五十有七。所撰默菴遺稿十卷。凡空居集二卷。北征集二卷。浮海集一卷。避人集二卷。幽遠集一卷。
雜文二卷三十五首。避人幽遠兩集。作于乙酉弘光
元年以後。爲縣志所未及。集當刻于康熙初。詩多缺字。以
避忌諱。然抵觸尙時有之。懷舊集有傳鈔本。別撰虞山妖亂志。述崇禎十年錢謙益瞿式耜爲張漢儒所訐

下獄始末。兼及翁顧淫亂事。事奇文奇。然文康烈皇小識稱舒爲謙益持四萬金賂馮銓。事始得解。遺稿北征集有至涿州詩。小識所言未爲無因。舒獨諱之。安得爲直筆乎。書中歷述在事諸人皆不得其死。而不知己亦不免。與人翻覆之局。鮮不敗者。舒于謙益可謂厚矣。獨怪瞿四達素附謙益爲門人。舒之死。謙益竟無一言解之何也。張溥倡復社。招舒不往。是秀才爭閒氣。恥居人後。不得言志節。

丙戌歲朝二首

投老餘生又到春。蕭蕭短髮尙爲人。世情已覺趨時便。天道難言與善親。夢裏山川存故國。劫餘門巷失比鄰。野人憶著前年事。洒淚臨風問大鈞。

喔喔荒雞到枕邊。魂清無夢未安眠。起看曆本驚新號。忽覩衣冠換昨年。華岳空聞山鬼信。緹羣誰上蹇人天。年來天意渾難會。剩有殘生只惘然。默老遺稿六

雪夜歸村中卽事

前年擾擾驚北兵。城南萬室成秦荆。先人敝廬二百載。劫灰一旦無留贏。妻兒奔迸走村落。窮鄉岌嶮如浮萍。今年兵鋒似稍息。還思丘首乘新正。提攜襍被覓我室。門巷盡燬餘一楹。牆頽迎面逼城郭。瓦破觸脚爭踴颺。傷心世事遽如此。欲哭不可還吞聲。徘徊日落四壁靜。屏當寢具心忡忡。空中忽聞響浙瀝。側耳傾聽何瓊瑤。驚呼童子問何事。云是漫天飛六翼。質明披衣出啓戶。但見遍野生瑤瓊。我家童子頗好事。問我此日將何營。袁安高臥亦徒耳。諒少履跡窺門闕。不如策杖出門去。豈無客右居長卿。老人捫心

只悲歎。眼前有幾弟與兄。孫公廊樓足水石。窈窕幾欲方蓬瀛。遐想主人聞我至。披帷炙炭歡相迎。錢家懷古亦軒敞。長松偃蹇多高情。悲哉吾友今已矣。孤子肅客傷覺驚。最喜陸二頤志堂。梅花百樹方含英。孟虜寓居亦自好。兩地難踏冰崢嶸。石林開士吾老友。詩篇白業久與盟。傳聞新年去東塔。不知何處煨折鐘。先人北山有傑閣。低頭正與虞山平。大羊牛馬恣蹴踏。曲池已塞朱闌傾。弓刀彘褐塞滿路。行不得也空鵝鳴。不如歸我窮村去。還帶老婦斟藜羹。千錢賃得舟一葉。乘興鼓楫憑縱橫。抵村野犬吠如豹。迎門孺子驚喜併。亟呼煖水濯我足。還傾濁酒浮深觥。楫拙火紅山芋熟。老幼圍坐忘深更。老人忽然志不得。舉杯欲飲淚已盈。憶昨前年七月半。殺人不異屠犧牲。祇今白骨竟何在。無乃冰雪相支撐。血流徧地未可洗。白雪得無今亦頽。吾聞北人耐寒冷。旃裘憤與冰霜爭。天公意或驕此虜。故借深雪添淨瘳。吁嗟此意良未曉。管窺自笑真硜硜。眼前有飯且飽吃。來朝看取赤日東方生。默菴道稿六

有中蜚語不良死者傷之

良金自躍歎非祥。魂魄雖雄鎮可傷。斗北昔看長劍氣。桓東今見少年場。箴中折鏃猶粘血。櫪下花廳憶放羈。剩有寡妻何所托。梨花空說十年鎗。其妻能用鎗 默菴道稿六

吳農嘆

吳農賦命薄。下田盡沮洳。況此經亂離。連歲商羊舞。出門泥滑滑。舉趾無乾土。豈期五月初。預征急於火。吏呼一何怒。官符紛似雨。銀鐺入縣署。縣吏冠而虎。吮劍竭膏血。蹂踐若俘虜。手足掛桁楊。臂背遞

鞭楚。鞭楚不敢辭。但憂死囹圄。急與鄉里計。賣船併機杼。留釜難留鋤。飄豚兼鬻帖。轉展未足償。分張及兒女。心傷血淚迸。欲言不敢吐。鄉人忽來報。昨夜軍媿伍。封船載軍資。篙艣一時取。雞犬無留餘。狂竄翁與姥。聞言腸遽斷。舌橋不得舉。嗟我吳中農。時命遽如許。呼天天不聞。叩地地不語。嗟彼輿上人。有言吾告汝。民以食爲天。君足民所與。民窮至於斯。托國將何所。莫恃弓矢威。須憂天意去。天意亦昭昭。斯民忍終苦。默菴遺稿八

馮班 鈍吟全集二十三卷

馮班。字定遠。號鈍吟居士。明諸生。少與兄舒齊名。稱海虞二馮。卒於康熙十年辛亥。年六十有八。清史列傳文苑有傳。撰鈍吟全集二十三卷。曰馮氏小集三卷。毛子晉所刻。有錢牧齋序。曰鈍吟集三卷。曰鈍吟別集一卷。曰鈍吟餘集一卷。曰鈍吟老人集外詩一卷。曰鈍吟樂府一卷。曰游仙詩二卷。曰鈍吟文稿一卷。皆陸敕先編刻。敕先爲鈍吟集序。在戊申。康熙七年其餘集序則在定遠方沒之時。曰鈍吟雜錄十卷。猶子武所編。刻于己未。康熙八年距定遠沒且八年矣。牧齋稱其沈酣六代。出入溫李小杜。以玉臺新詠教人。今觀其詩字字錘鍊。無一淺率語。置之中晚人集中。幾無可辨。功候深純。一時無二。蓋矯七子鍾譚之窳。而不墮宋人之直率者也。宜吳父趙執信服膺不忘。然通知其意而已。不能繼嫩也。雜錄論詩文。識解精闢。經史小學。極有根柢。謂爾雅爲詩書義訓。此豈荒疎者所能道乎。譏宋人喜以近事裁量古人。可謂深中其病。他

所論列。非讀書有得者不能道。惜未成專書。然已開清初漢學風氣之先矣。誥誠子弟之言。懇款動人。如讀顏氏家訓。蓋先後不同。而傷離念亂則一也。定遠卒于辛亥。明見陸敕先序及嚴熊白雲詩集。而鈍吟文稿書吳浩然逸事。署壬子康熙十一年八月。爲不可解。又雜錄重複處過多。不爲排比整齊。編訂者之過也。

過拂水山莊

三徑荒涼草色迷。一聲鄰笛日平西。人間多少傷心處。縱是莊周也不齊。鈍吟餘集

兵後經郡齊門故人廢園有感

雀亂鴉啼燕不回。曲池平後劫成灰。雲離巫峽知無定。地失桃源莫再來。蔓草江淹何限恨。青楓宋玉有餘哀。故人泉下如相念。白首余生賴不材。鈍吟餘集

嚴熊嚴白雲詩集二十七卷

嚴熊。字武伯。常熟諸生。入清後。以高隱終。撰嚴白雲詩集二十七卷。自丁未康熙六年以前。爲雪鴻集三卷。戊申康熙七年以後。歲爲一集。至辛未康熙三十年止。熊年十九。明亡。至是當年六十有五。嘗受詩法于錢謙益。以香山放翁爲宗。其詩自抒胸臆。頗喜紀事。集中年月首尾不闕。最足以考見當時之事。

拜文烈士應符母舅旅殯

悠悠渭水去無期。猶憶追隨最小時。靜遠齋東探柳色。石經堂北嗅梅枝。烏衣作伴他生事。白首難同後

死悲。七尺形骸千歲計。白雲明月是心知。勇臨刑有忠魂今夜歸何處。明月灘頭臥白雲之句。 殿白雲詩集一

楊 炤 懷古堂詩選十二卷

楊炤。字明遠。常熟人。父補。字無補。工詩畫。入清以高逸終。炤亦不事進舉。奉金孝章為師。徐氏枋柯昆弟為友。少以詩受知于錢謙益。稱其高才盛年。遁迹自引。蔬布不厭。妻子凍餒。長篇短詠。矢詩遂歌。聲滿天地。振林木。謝皋羽之撰詩。長留天地間者。徹斯人其誰與歸。炤詩自謂學樂天東坡。其實似汪水雲。同時方文亦工此體。邵陵稍後。同有會心。皆能詞淺意深。質而有文。又謂詩以作譜。實則篇篇所紀。皆時事也。懷古十詠。足以明志。每念不忘先朝。其見于上元者云。崇禎初載尙堯天。莫說嘉隆萬曆年。辛亥康熙十年三月十九日云。身是崇禎士。生從萬曆年。衣冠叨聖代。毛髮長堯天。癸丑康熙十年三月十九日云。龔開久化碧。臯羽尙吞聲。歲歲宣陵淚。寧求孝子名。今日云。偶見嘉隆萬曆錢。長懷全盛淚漣然。請看今日人情惡。箇箇都成薄小穿。自注諺謂錢之惡者曰薄小穿。生平有詩千五百首。身後刻為懷古堂詩選十二卷。卒于康熙三十一年。年七十六。

吳儂謠

二月三月雨不止。大麥小麥春爛死。誰知入夏雨絕無。上官救旱惟斷屠。只今川竭三農困。安得甘霖三五寸。眼見青苗日就槁。公家征斂恐不早。條編已足又催糧。不管吳儂田土荒。於戲剝肉醫創敢流涕。但

愁無肉將安繼。懷古堂詩選一

紀異庚戌

西北方苦旱。東南則病潦。良田成巨浸。一望白浩淼。縣官來勘災。恣意鞭里老。或贖供億薄。或怒迎不早。一圖災淺深。全憑賄多少。米價貴未極。人情已擾擾。憶昨亥子間。穀貴如珠寶。石米銀四兩。室家獲相保。今者頓思亂。皇皇如立稿。可知骨髓乾。生事窮大小。不辦歷凶荒。誰能更爲好。烈風復震撼。湖邨忽蕩埽。六月十日高卷太湖水。排擊牆屋倒。流棺觸塘坳。浮屍飼魚鳥。存者半死生。折肱兼破腦。西北昨如此。聞之心如擣。今茲一方民。亦被此苦惱。同爲吳郡人。此時得安飽。對此能不念。何以答蒼昊。旱潦未可期。循環是天道。病潦有魚鰕。病旱無青草。不見江淮間。有田未種稻。苦旱又告始。病水猶未了。

懷古堂詩選三

雪壬子

雨晴天又雪。雪又何時霽。殘年無多日。時已迫冬至。田租不得入。何以輸井稅。沍寒城門塞。官倉輸不易。冰凍頓一身。何人替一臂。誰言有田好。有田恆爲累。百指爭仰食。性命佃農寄。子粒既減收。瑟縮滋姦僞。雨雪相繼作。佃貧漸耗匱。開窗獨對雪。對雪懷憂悻。閉門欲僵臥。披氈倦遊戲。安得酒三杯。昏然忘一醉。懷古堂詩選四

百日不雨歌

癸丑

百日不雨井爲枯。闔閭城中水盡沽。我雖外求不用錢。竈下緩急恆疾呼。平日狼藉取汲便。此時衣垢不敢污。甕中梅水幸百斛。飯後煮茶仍數壺。人皆嗜酒不嗜茶。醇醪易得此水無。始知積貯不可虛。凶年不殺有以夫。安得積穀如貯水。眼前慎勿輕田租。

懷古堂詩選四

甲寅元夕

元朝雲擁日。相傳有龍見。自後三尺雪。大霧繼雷電。老夫擁絮眠。凜凜畏天變。家貧食口衆。稼圃率未練。久思早避地。力弱不能先。聞道漢陽口。流血事征戰。春秋秉直筆。於義寧彼善。天心夫何如。正恐亂方煽。孱懦奚苟延。哀哉命如綫。只今元宵節。燈月何由見。日瘦風力猛。慘澹對冰霰。有懷興亡事。試一

檢書傳。

懷古堂詩選五

紀事

紀四月七八九日事也。甲寅

地未遭兵火。人如際亂離。轟然爭出郭。急若欲登陴。包裹仍懷璧。輕盈尙畫眉。紛紛舟楫去。三歎爲君

危。

懷古堂詩選五

五月廿二日

戊午

吁嗟行年六十有一翁。未見霹靂冰雹兼狂風。房闔動搖屋瓦碎。驚走婦女啼兒童。轟雷再震暴雨歇。黃雲如柘漫高空。斯須變幻似五色。丹青不減圖畫工。翻江倒海昨日雨。聞道噴薄飛神龍。正愁疫癘病四

境。且喜甘澍安三農。祇合計較年豐凶。是何災祥莫問儂。天下治亂由天公。慎勿語及豫章楚粵連兵戎。坐令此老憂撞胸。懷古堂詩選七

客自燕歸者爲余略悉地震時情形紀五絕句戊午

高天忽陰慘。厚地頻震蕩。聲如崩轟雷。勢若翻巨浪。

萬姓房屋傾。三門城樓倒。得勝安定西直三門生靈爭頃刻。性命多不保。

連日鼇極翻。大小四十震。天昏黃沙走。地裂黑水迸。

馬爭出馬坊。象爭出象房。人亦爭出屋。盜賊乘時忙。

於戲通州城。蕩盡如曠野。地裂人忽陷。往往騎在馬。懷古堂詩選七

甘澤歌己未

萬人一口稱甘澤。盡道皇天雨菜麥。皇天此舉非無心。酷見蒸黎食糠覈。若非汲汲救春熟。會見林林徧溝瘠。天公恤災肯具文。要與斯民真有益。卽今四境施官粥。有識皆言非善策。蟻聚游惰溷男女。蝨侵糧粒飽廝役。救荒不是沾名地。牧民誰盡當官責。庶幾憑仗天心仁。民命苟全陽九厄。昨日北風寒氣嚴。夜來瓦礫雪片積。街頭餓夫僵幾人。屋底達官醉一石。老夫晨炊稻米白。冰池舉網得鮮鯽。素盥盛來長徑尺。飽餐香飯吸茗汁。足煖爐紅撫研席。請看南阡與東陌。天公厚汝亦破格。懷古堂詩選八

雷雨己未

南風吹雨急。亂點射牕紙。獵獵驚夜眠。淙淙及晨止。瞥見東日紅。旋掣西電紫。霹靂飛一聲。滂沱又如此。以此測天意。吳儂可不死。卽今田畔谿。處處涸見底。假令如去春。餘黎其盡矣。何幸甘澤沛。春田大可喜。青青起菜麥。可以慰婦子。勸農食有待。惰農困無倚。亂世阻百爲。莫若秉耒耜。堅心去力田。吾亦從茲始。

輓季士農分。風俗安得美。中古之良農。其人卽髦士。漢代去古近。敦本重廉恥。孝弟力田者。始許出而仕。奈何廢鄉舉。鹵莽試片紙。明時暗摸索。濁世冒貨賄。一朝起爲吏。視農草菅比。不乏孝弟人。顧以力田鄙。居然民父母。著行等犬豕。催科虐田農。不難伐人髓。將以遷其官。究之罰厥死。何曾閱其勞。勘產貸妻子。何如此田農。仰不愧天理。天亦何負農。豐歉惟力視。惠此好風雨。四郊得舉趾。不逢堯舜君。無慕田間起。懷古堂詩選八

久陰感時述事三首錄一己未

異域死刀兵。至今死不已。於戲五年間。流毒幾萬里。淮民死河決。晉民死大雪。燕民死地震。種種不忍說。吳民近死飢。去歲猶見稀。富家喧鼓笛。盡爲病禱祈。無病食有粟。豈非天所福。涇鹽有不給。無爲心不足。懷古堂詩選八

宇宙己未

海水東走今西行。江水不流河水平。蘭陵堂皇水七尺。谿壑臭穢尸從橫。幽薊白虹天狗墮。又道昨日天鼓鳴。吳會甚雨一晝夜。眼看苗秀亡秋成。即今十室九室病。白露節屆翻朱明。吾坐斗室汗如漿。人遭憂患馳鄉城。能不民病接踵生。俯仰宇宙空怛怛。懷古堂詩選八

顧文淵海粟集六卷

顧文淵。字文寧。號湘沅。又號雪坡。亦曰海粟居士。有畸行。善畫山水。因王鞏獨步。改寫枯木竹石。人以方夏仲昭朱白民。游食四方。賴以資給。蓋惲格之流也。卒于康熙三十六年。年五十一。無子。從子榮售所藏古書畫得資。雍正八年。爲刊行海粟集五卷。補遺一卷。王材任稱其詩格高調逸。誠非虛譽。高涼雜詩四十五首。紀山川風俗氣候草木鳥獸民生疾苦甚備。歸途日記六十七首。以紀歸程。詩思無端。愈出愈奇。山居雜興三十首。自述壯心。示未忘世。其他多慨歎饑饉兵戈之作。舟之東海贈吳野人句云。能有幾人安草野。從無一字及公卿。隱以自負。畫竹石寄壽關中王山史徵君七十云。閒窗落筆倚微燠。石丈嶙峋并竹君。遠寄老仙供一笑。未知換得華山雲。讀之覺愴然物外。正自有入。

驅蝗詞

山田早稻憂殘暑。蝗飛陣陣來何許。叢祠女巫欺里氓。伴以杯玻身僵僕。曰此蟲神能主輿。神弭災。非輕

悔。東陸西壠請巡徧。急整旗幟添簫鼓。神之靈。威且武。獻紙錢。陳酒脯。女巫歌。小巫舞。豈知賽罷神
進祠。蔽天蝗又如風雨。里氓望稻空頓足。爛醉女巫無一語。海粟集一

憂麥行庚寅

大麥小麥本備荒。穗頭四月抽長芒。欲求顆顆無秕粒。祇要少雨多晴暘。今春雨暘輒相反。二麥大半先
萎黃。可憐農夫貧徹骨。日望麥熟鬻飢瘡。安得老天賜乾燥。留與斗石登上場。搗搗飯餉活性命。辱水滿

田爭插秧。海粟集一

玻黎花畧歌

蕃客慕我墨竹名。捧送兩篋玻黎畧。開時光彩炫人目。疑是堅冰鑄鍊成。細看表裏殊皎潔。洞照毫髮踰
水精。擬寫琅玕報其意。案頭留此聊娛情。不將貯酒試養花。注以勺水中空明。可意時花巧位置。透漏嫩
葉分纖莖。花香露浥添馥郁。花骨寒沁憐嬌嬰。終朝對之翫不足。使我詩思冷然清。無花之時卽歸篋。屢
觸指爪聲琤琤。憐渠脆質入中國。踰十萬里波濤程。傳聞外洋此爲寶。却賤審器加嘲評。賦詩題畫請捲
去。未識與竹孰重輕。爲語花畧亦珍重。花枝插得真縱橫。海粟集一

水田謠卯巳

南畝東區稻不多。牽犂月夜喜農歌。譬如生在高郵口。濁汊中無一把禾。
通稅難將罅漏填。邨邨稻挂夕陽邊。西成悔卜神祠玆。秣穀偏生大有年。

冷竈無煙日過中。機頭小婦撥忙工。拾歸遺穗無餘粒。暮雀啾啾噪棘叢。
蘆笆壁破北風鑽。補得新泥凍未乾。月出柳灣天作冷。疲牛引犢始歸欄。
寒瓜摘盡留枯蔓。苦菜挑來半塌窠。數米和炊搯過日。團欒骨肉受飢多。

黃昏風聒起林鴉。破屋門將木槩叉。那得篝燈供夜作。辟纊織屨亦生涯。海粟集一

吳墨井秉泰西教於膠川有六十吟寄示敬倚原韻

西學闢館巧莫過。其爲結構。多用磚石沙灰。少用木柱板壁。防火患也。爲問敷教夫如何。僉曰彼國進修士。考選出入如機梭。西士自幼入

婚官。經考選者。先進文科。復進格物窮理之學。始進天學科。若優取。乃許中國敷教。名成持節上海舶。大洋歷險鬚爲皤。魚龍風雨赤黑道。驚怪詭異三年

多。地中海有騰空飛魚。有大魚。從角中噴水。能覆舟。其性嗜油。國九萬里。所冀中邦邀寵眷。少持筐篋

貢大廷。世運隆平珍貨賤。前朝萬曆九年辛巳。利瑪竇始見朝。進耶穌聖像西琴自鳴鐘等於大內。生賜饌。沒賜葬地。明末利

寺。聖恩寬大柔遠人。優養俾伊沒無怨。其爲文字傳象胥。彼國之風洞然見。吾曹碌碌昧物欲。墨井吳生

稱疾足。授其大要際天人。那歎衰遲悲歲促。臯比一席食彼俸。中邦修士主其席。者例食泰西俸。泰西以二

爲主。當三十二筆法。以三十二筆法互相配合。則成人物之名目。仁義禮智信。稍拂規範爲恥辱。門庭不傍佛與仙。操勵今踰耳順

年。仰瞻高峻真卓立。俯視鹵莽殊相懸。何時鼓棹過膠水。請發所采先知篇。神遊歐羅巴一度。大西洋彼

使我開拓胸中天。海粟集一

紀水 癸酉仲夏

清詩紀事初編卷一 顧文淵

粵自周東遷。凌夷至戰國。有地界漳衛。往往憂墊溺。自聞瓠子歌。尠有曠厥職。潞洩爲之備。迺安不毛宅。平陸墾爲田。耕種賴蓄積。每歲邀豐稔。貿易成利窟。其土高以燥。騁望有荒陌。不比吾吳中。每慮窪雨厄。此說竟大謬。兩憤亦綿密。陰雲布成陣。助暴轟霹靂。五月六月交。晝夜不停息。通塗漲行潦。洶湧連郡邑。譬猶遇狂寇。那暇堅壘壁。紛紛性命憂。小家及鉅室。柳堤禦外河。豈料內泛溢。風濤撤屋去。糜爛粟與麥。如逢吳中水。令我廢寢食。欲借君前箸。所籌無上策。朝愁岳吐雲。夜恐月離畢。除非戮商羊。惜哉疎劍術。竊幸天聽卑。須臾獲昭格。遂決土囊口。掃蕩馳慘色。林鳩各呼婦。杲杲東出日。旬餘水勢退。迅速若驅叱。馬牛越溝澮。驗水不盈尺。邨場洗碌礪。土垣挂襤褸。黍稷苗芘然。如人起疴疾。至竟因何故。致彼陰陽逆。天道寧改常。多恐下情激。若曰弭水患。枝派易分擘。還在長民者。勵己嚴於律。從茲召和氣。災不限南北。

海粟集五

紀異 癸酉六月中旬

淫霖匝月陽氣渙。屋柱菌生礎流汗。黑風吹樹錯昏晝。簷溜牀牀亂沐幔。空中有物勢蜿蜒。霹靂驅之遠逃竄。水高平地二三尺。車馬通塗人跡斷。漳河衛河水驟漲。百姓蒼黃築堤捍。豈堪山東方被災。又報江南遭亢旱。由來天用莫如龍。曷不變化分靈蹤。我欲奏綠章。精誠枉填胸。東南連郡田百萬。稻苗焦槁將傷農。雲霓渴望刻難緩。神龍效職應當從。龍兮何由聽我語。不返深山蟠水府。隱然乘我思恍忽。王者冠珮來庭宇。我知爲龍遂趨揖。復告此事言觀縷。迺云行雨各按方。敢抗天帝命私爲主。但今旱潦幸可挽。移

此易彼晴爲雨。時余聞之喜且驚。雷電風雨摧軒楹。須臾雲霧涌而去。鱗爪閃爍迴雙睛。余非葉令卒致汝。是夢非夢何分明。開門蟬噪槐日午。天色清明炎飈生。頗欣此徵殊不惡。臆料神靈不差錯。爾龍誠能禦災患。眞是一呼而應諾。捲却山東雨。遍向江南落。兩邊禾稼致有秋。億萬蒼生出溝壑。從教腐粟積太倉。眼中永睹田家樂。海粟集五

吳 歷 墨井集三卷

吳歷。字漁山。常熟人。從陳瑚學經世之略。瑚刻其詩入從游集。謂能共適冥漠之鄉。學詩于錢謙益。謙益稱其詩思清格老。命筆造微。與王鞏同學畫于王時敏。以爲歷之所作。刻刺神技。斲輪妙手。冥心默契。不可思議。鞏與歷同里同歲生。畫爲皇太子所賞。賜額清暉。因以名其堂。而歷荒寒寂寞。賣畫養母。晚歲好道。遂棄家入天主教。居澳門七年。復歸鄉里。卒于康熙五十七年。年八十有八。事具張雲章所撰墨井道人傳。有墨井集三卷。爲墨井詩鈔。題跋。三巴集各一卷。三巴者澳門所居天主堂也。歷詩爲畫名所掩。而人品又爲詩畫所掩。今稱歷者又重其傳教。豈知當日入道。含辛茹苦有不可喻人者哉。

無端次韻

十年萍跡總無端。慟哭西臺淚未乾。到處荒涼新第宅。幾人惆悵舊衣冠。江邊春去詩情在。塞外鴻飛雪

意寒。今日戰塵猶不息。共誰沈醉老漁竿。墨井集二

兵過後南陽道中

林空惟落日。地僻少殘春。欲問南陽路。前村未有人。墨井集二

好雨

墨雲起崇朝。好雨遍南畝。新禾鬱將興。慰此亢旱久。隔隴聞農歌。沮溺歎攜手。念彼逃亡人。冒雨歸八九。彷彿涸轍魚。乍得西江澗。吾欲賦歸來。去伴綠簑友。理荒不憚勞。濕雲帶鋤走。暮色岡壟分。牛羊認

門柳。地無虞芮爭。欣占歲其有。墨井集二

邵陵青門詩集五卷

邵陵。字湘南。號青門。別號雪虬。又曰孩叟。常熟人。長身修髯。目光閃閃。狀貌如羽人劍客。家貧。游食依人。嘗客泰州十年。又客鎮江廬州。歸里後。益放廢嗜酒。同里後輩汪繹蔣廷錫時周給之。不能繼。康熙四十六年。竟以貧死。年六十五。所著青門詩集八卷。自康熙二十三年甲子。迄四十五年戊子。每卷爲一集。今存者疎園集。樵話菴稿。釣艇集。歸來集。不珠集。凡五集。其庚辰以後三集不傳。疎園樵話兩集。嘗梓于泰州。餘皆未刻。王應奎海虞詩苑。錄其詩爲此集所無者十四首。疑別有傳本。陵與同時武進邵長蘅同號青門。同以髻著。同負詩名。長蘅長于陵者六歲。青門三稿盛行于時。而陵之詩。至今無人過

問。所謂有幸有不幸。然陵詩不事雕琢摹擬。元氣浩汗。深情一往。自題疎園集云。安用雕鏤鑲肺腸。辭能達意即文章。性情原自無今古。格調何須辨漢唐。人道鳳笙諧律呂。誰知牛鐸有官商。少陵甘作村夫子。不害光芒萬丈長。自道甘苦。恐非長蘅所能省。人品似亦遠不及之。

送呂半隱先生歸蜀次黃仙裳韻

金閨通籍夢華年。萬里烽煙阻蜀川。

先生自癸未通籍後。鄉關間阻。流寓江浙四十餘年矣。

作賦仲宣長去國。休官陶令不歸田。鬢經歷亂

應衰矣。話到間關欲泫然。歸向東屯尋舊宅。草堂元在浣溪邊。

青門詩集一

廬州竹枝詞

羊頭車子四邊黃。鵲脚旗兒插兩旁。一道紅塵三十里。雨前馳驛進頭綱。

數雨前十日。六安霍山等邑。例貢御茶。車馬馳逐于路。牛月乃止。

青門詩集三

萬壽祺 隰西草堂詩集五卷文集三卷遜渚唱和集一卷

萬壽祺。字年少。一字介若。又字內景。晚年僧服。易名慧壽。稱明志道人。或曰壽道人。或但曰壽。或曰若。或曰若若。銅山人。崇禎三年舉人。卒于順治九年。年五十。事具所撰自志及孫運錦明孝廉萬先生傳。其集爲呂維揚刻于康熙二十四年者久佚。道光四年。運錦爲輯刻隰西草堂詩集五卷。文集三卷。遜渚唱和集一卷。近人刻明季三孝廉集。復爲增輯遺文九首。詩二十九首。壽祺多能藝事。詩文之外。書畫

雕刻。以及刺繡。無不精妙。詩直入大曆十子之室。一時甚罕儔匹。然其人實有志節。不當僅以詩文傳。自志述起義事云。崇禎十七年甲申三月。京師陷。五月南渡。其明年乙酉五月。江以南郡縣皆陷。炳備芑起陳湖。瑞龍起泖。易起笠澤。皆來會。八月潰。被執不屈。將加害。有陰救之者。囚繫兩月餘。得脫還江北。作泛湖圖第四。所謂炳者沈自炳。備者戴之備。芑者錢邦芑。瑞者黃家瑞。龍者陳子龍。易者吳易也。劉湘識其後云。共有八圖。亡其二。猶以不見圖爲恨。彭士望山居感逝詩自注云。隰西嘗寫真六幅。其六披紅僧衣。袒右。牽一小驢怒視。士望曾親見此圖。無所謂八圖也。牽驢怒視。何曾忘世。顧炎武于順治八年訪之淮上。炎武亦乙酉共義者。贈以詩云。何人詞北方。處士才無兩。知炎武區畫山東。欲邀壽祺共事。其謀當甚密。今傳世秋江別思圖。有壽祺跋語。乃以舍商賈求所以爲寧人者。反覆言之。蓋爲塗飾耳目。淺人不察。竟謂炎武眞作商賈。舉此爲證。不亦僞乎。

鬼鴟

丙戌二月。江南長老以書至云。荻蘆間鳥聲如虎吼。或傳見形。尾大於羣。焚之車。頭猶目鷹。畢翼蔽日。兩足舒後。更兩足縮縮如也。又或大案不得擊。從水出。以爲鬼鴟。

吳江十里飛塵埃。堤長日短營門開。殺人如麻二百日。骸骨纍纍高崔嵬。四面大湖盡葭荻。西風瑟瑟吹徘徊。沈檣破艣鬼聚哭。往往白晝生陰慄。有鳥有鳥翼蔽日。四足張弛隨毳毳。猿頭鷹背踞水上。尾拂湖底驅雲雷。怒如乳虎嘯風穴。悲如鬼車吟夜夜。羣飛肅肅送明月。向人幽訴聲何哀。百年丈人測往事。羽蟲沴隱金爲災。去秋坑卒東葑址。今歲屠城西湖隈。機槍竟天不肯去。何時日月光昭回。天時人事已如此。五行變化空移推。我歸楚州已三月。日夕罷釣登嘯臺。占星望氣不復驗。持竿促艇歸去來。溶溶坐上

青花甕。且盡人間濁酒杯。隰西草堂詩集一

字內

宇內兵戈滿。山川涕淚盈。浮雲傷老大。落日且縱橫。浦市人烟合。湖城鳧雁生。共憐不得意。濁酒說平

生。隰西草堂詩集二

有贈

回首蕭條徐泗空。百年多難此從容。雞鳴津吏關仍閉。龍戰鹽官路未通。郡縣索人游敬衆。江湖滿地羽

儀同。冥冥避弋將焉往。又向東南涉大瀛。隰西草堂詩集四

閻爾梅 白奎山人詩集十卷文集二卷

閻爾梅。字用卿。號白奎山人。又號古古。沛縣人。崇禎三年庚午舉人。爲復社魁碩。有重名。埒于二張。甲乙之間。屢以奇計說史可法。不能用。乃散家財萬金。結豪傑。往來山東河南。數有兵起。旋皆破滅。事連爾梅。順治九年。官發兵繫之至大名質證。移濟南獄。再逾年。有左右之者。得回籍聽勘。明年攜子出亡。十餘年間。遍游西北。會事解乃歸。復爲人所告。康熙四年。入京師。援恩詔詣獄自首。龔鼎孳時爲刑部尙書。與有舊。爲之疏通。竟得寬免。是獄言者不詳。黃宗羲謂以詩禍亡命。爾梅亦有買禍詩文盡數刪之句。然被逮時。其弟爾羹父子同下江寧獄。經年始釋。亡命之先。妻妾自殺。慮發冢。預平先墓。獄情

嚴急。知與詩未嘗無關。而不盡由于詩。性不耐家居。歲歲出遊。年七十始不再出。猶以足迹未至閩粵滇黔爲憾。同時顧炎武營營秦晉間。出入關塞。魏禧徘徊吳越。瞻眺及于粵閩。爾梅踪迹視炎武尤遠且久。而各不相謀。皆有所待。卒于康熙十八年己未。年七十四。事具其孫圻所撰文節公白奪山人家傳。爾梅有白奪山人詩集十卷。文集二卷。刻于康熙十四年乙卯。多所芟削。出于手定。詩才若海。茫無涯涘。說者謂似太白。蓋論其古體。若律絕不薄七子。而格律謹嚴。聲調沈雄。純以史事隸之。與靡靡者異。當時無不重之。呂留良睥睨一世。聞人譽之半似閻古古而喜。計東數康熙初京師耆舊。依年爲次。舉孫承澤及爾梅炎武三人。獨爲王士禛所輕。有戴廷杖者。祁縣富商。喜藏書畫古器。謹事傅山。嘗匿炎武藏金。亦醜詆爾梅。以附于士禛。是所謂螻蛄不知春秋者矣。

原亂詩八章

四錄

邈矣河流。滄海是徂。窮彼崑崙。實荒實迂。渭洛漣漪。淮泗委輸。燕雲開障。天子之居。會同有繹。載車載書。禹績萬年。冠裳魚魚。爾桑爾耕。迺衣迺租。哀我人斯。允懷厥初。

肅肅元老。父事中涓。鼠依於社。刀幣流泉。奴隸六卿。凡肉九邊。入告匪衷。功罪覆顛。藥寇迫庭。驅馬

控弦。田廬煨燼。婦子倒懸。喪師盛國。伊誰之愆。匪朝伊夕。蓋亦有年。

此指逆案諸奸

人怨孔鸞。天怒斯頻。饑饉斯仍。疫癘斯臻。有司貪威。方燎益薪。殍積周道。土無舊民。遇諸中野。疑獸疑神。去兮靡歸。控兮靡親。亦已焉哉。我生不辰。我生不辰。徒爲匪人。

嗟爾廟堂。九卿三事。伴食容容。曾莫慚愧。豈惟不慚。方且得意。斷斷詩書。揚揚科第。自謂文人。弗識忠字。內外宦途。滔滔皆是。聞有嘉客。秉德勿二。箕奴干剖。豈云乖異。西山有薇。東籬可醉。明月照心。

何妨顛顛。

白奎山人詩集二

苦旱行

滄州道中

潞河數百里。家家懸柳枝。言自春至夏。雨澤全未施。燥土既傷禾。短苗不掩陂。鞭轆乾以破。井涸園菜萎。舊米日增價。賣者尚猶夷。貧者步壠頭。悵然安所之。還視釜無烟。束腰相對飢。欲貸東西隣。隣家先我悲。且勿計終年。胡以延此時。樹未盡蒙災。爭走餐其皮。門外兼催租。官府嚴呼追。大哭無可賣。指此抱中兒。兒女况無多。賣盡將何爲。下民抑何辜。天怒乃相罹。下民卽有辜。天怒何至斯。視天非夢夢。召之者爲誰。嗚乎雨乎安得及。今一滂沱。救此未死之遺黎。

白奎山人詩集二

苦蝗行

結茆十里城東隅。老農老圃共晨夕。經年跡不到城中。疎懶相宜久成癖。枯旱塵絲掛野田。豆花憔悴無光液。乍聞有物空中鳴。蝗飛如蟻經天赤。翅聲剝啄墜紛紛。縱橫百里積盈尺。婦子嗷嗷爭不及。千村萬村淨如碧。三時勞苦殊可憐。飽茲螟螣誰愛惜。官吏追呼急於焚。中夜思之若芒刺。嗟我人斯安所逃。追呼不償死無益。君不見。古人苑中自吞蝗。兆民之災我躬嘗。又不見。宓令卓子康。蝗不入境號循良。非其人兮民何臧。我行其野歌旁皇。

白奎山人詩集二

惜揚州

有引。予勸閣部西征。徇河南。不聽。勸之渡河北征。徇山東。又不聽。一以退保揚州爲上策。蓋公左右有事諸人家悉在南中故也。未幾而揚州破矣。公之死與不死。固未可知。揚州之慘。則深有可惜者。作惜揚州。

揚州今古稱繁麗。本朝輪轉吭喉地。時當南渡守長江。陰雨更勤桑土計。議守長江先兩淮。守淮先自河南議。河南江淮之上流。河南不守江淮棄。渡河徑北是山東。江淮北藩於此寄。恢復中原豈易言。大抵兩河均首事。史公督師入彭城。兩河義士壺漿迎。人心如此卽天意。命將西征或北征。縞素臨戎直且壯。兩河義士悉精兵。西收羣塞圖函谷。北聯濟鄴指神京。左右有言使公懼。披營退走揚州去。兩河義士雄心灰。號泣攀轅公不駐。公退揚州予奈何。攜家遠遁下邳阿。下邳人說揚州信。憤極無音涕泗沱。傷哉胡騎渡河南。殺人惟獨揚州多。揚州習尙素驕奢。屠僧僮奴褲絳紗。塵市利穠耕稼嬾。貴介羣爭煮海鱉。炊異烹鮮陋吳會。園池宅第擬侯家。綺筵歌妓東方白。畫船簫管夕陽斜。揚州巨商坐金穴。青鏹朱鏤千擔列。舳艫潮汐喧驚雷。開關唱籌中外徹。揚州游覽競文章。蕪城短賦割離腸。謝公碁墅梅花嶺。永叔詩勒平山堂。揚州仕宦衆耽耽。廉者不來來者貪。銓部門前懸重價。黃緣蚤夜不知慚。揚州女兒肌如雪。珠翠羅紈恣嫵。深閨初未識桑蠶。碎剪猶嫌機匠拙。快意不從勤苦來。暴殄徒增脂粉孽。一朝旗纛廣陵飛。笳鼓聲悲簫鼓歇。鳴刀控矢鐵鋒殘。僵尸百萬街巷填。邗溝泉流京觀塹。亂漂腥血賦紅滯。掠盡巨商掠貴介。裘馬郎君奔負戴。繒帛銀錢水陸裝。香奩美人羶卒配。婦男良賤苦鞭瘡。疾驅枯骨投荒塞。死者未埋生者死。鴨綠江頭哭不止。長江全恃兩淮籬。籬破長江今已矣。與其退守倖功難。毋寧決戰沙場裏。誰實厲階問蒼天。謀之不臧禍至此。公退揚州爲公羞。公死揚州爲公愁。死與不死俱堪惜。我爲作歌惜

揚州。白華山人詩集二

張 昭 張亟齋遺集一卷

張昭。字力臣。山陽人。父致中。字性符。諸生。爲復社眉目。卒于崇禎末。昭刻其符山堂詩一卷。手書極精。久佚。清季山陽段朝端求之數十年。始幸獲之。昭致力金石文字。所考訂者。有濟州學碑釋文。瘞鶴銘辨。昭陵六駿贊辨。同治三年。丁晏輯錄之。益以鈔本棧行圖詩。及全祖望題漢隸字原校字釋文。中有昭和荆公四絕句。棧行圖有自題七古一首。七絕十首。合爲張亟齋遺集一卷。付吳棠刻之。其詩爲朱彝尊明詩綜遍索未得者。雖篇章無幾。頗有韻致。正可見先蠶風規。晏序委曲。昭嘗爲顧炎武刻音學五書。親書上木。炎武廣師所謂精心六書。信而好古。吾不如張力臣者也。不識何故晚年攜家走京師。至奉王士禛爲師。其子若弟皆能文。昭沒後。音學五書書板。竟質于人。以致遺失。潘耒深致歎恨。故五書傳世不多。爲人所貴也。

題棧行圖

紅妝陟巖尙能馳。稚子蹇裳過澗湄。却笑閉門人說險。何曾放眼到斯時。張亟齋遺集

徐孚遠 釣璜堂存稿二十卷 交行摘稿一卷

徐孚遠。字闇公。晚號復齋。華亭人。諸生。桂王時拜左副都御史。沒于康熙四年。年六十七。孚遠與夏允彝陳子龍結幾社。忠義與之同。而文采則不逮。有釣璜堂存稿二十卷。交行摘稿一卷。皆海外所爲詩。傳世只交行摘稿。存稿近二十年始得好事者刊行之。顧已無人貴重。其詩雖非當行。而海外遺事。不難考見。惜編者意爲分合耳。

白足婦謠

島上諸健兒。長技在戈船。舉體被番衣。紅布裹其顛。紅布何從出。家家有丁錢。丁錢既已徵。望屋算突煙。尙有無名稅。飛檄正紛然。抹額者誰子。連伍到門前。東家婦新嫁。小姑亦隨肩。爾家不飽飯。何用雙行纏。傾筐復倒篋。但怨行步妍。俄而到西鄰。西鄰長跪言。我家婦白足。不繼粥與饘。正賦久已畢。便可過別阡。爾勿嫌白足。白足勝嬋娟。汲水數里外。以薪復以佃。白足亦輸餉。有何負皇天。嗟爾島居民。娶婦良爲難。有婦須有足。巨細兩辛酸。釣璜堂存稿二

裂嶼

余昔自北來。始卜居此嶼。茅屋四五間。局曲如穴鼠。地偏少穀食。半倚薯爲糲。飯已出捕魚。家家有網罟。其俗頗敬客。傾筐兼倒甌。鮭菜進所鮮。日給不須沽。時或進香醪。草間設樽俎。老夫感淳風。經過相

爾汝。閒徵此嶼名。土人爲余語。茲山本連縣。閩粵同處所。趙宋末帝時。南奔避胡虜。萬馬方崩騰。天忽開此瀨。宋帝乘舟行。蛟起天吳舞。風雷震百靈。咫尺那得取。自爾數百年。一裂不復補。嗟哉當此時。宋曆亦可睹。首尾四年間。神物猶環扈。天意多徘徊。未絕猶須護。茲言或虛傳。事往何從溯。劉翁與張翁。維皇誰去取。鈞瑣堂存稿三

重歎

歎息懷神州。高賢久已逝。卽有吞炭人。薄祜少根蒂。門族坐參夷。丘隴積涕淚。所以游魂驚。總作全軀計。湛盧少光芒。姬姜失貞嫗。真人樹豹尾。一絲九鼎係。雖開赤社符。猶同小星嚙。孤客望沅湘。蹇足何迢遞。悲涼十載心。蕭瑟九皋唳。常愁夸父杖。終就鄧林瘞。筋力誠爲疲。願以餘生誓。婉孌天南雲。長途無我騷。鈞瑣堂存稿四

聞沈崑銅變感賦

太白何時能入月。江南義士年年沒。黨籍株連可奈何。竟無片地安薇蕨。沈子意氣素蛻生。好奇藏俠有英名。蠟丸數達宸輿側。結伴期扶天座傾。惜哉計畫未能就。事洩瘐死天無情。前年遺我書一緘。墮水不戒馮夷驚。正聞齊晉有同盟。相期握手石頭城。豈意今來得此訊。海水盡作悲涼聲。生旣無聊死亦輕。不如聯袂上玉清。鈞瑣堂存稿七

重哭蒙難諸賢

天傾地蹋十年餘。草間義士時相呼。前車已覆後仍驅。得算便有風雲勢。失身豈關智略疏。一妄男子行告密。當門之蘭隨見鋤。李公握椒命已盡。沈子榜掠無完膚。卽此捐軀亦不悔。周家九鼎誰爲扶。嗟余坐老滄海上。功無一寸禍不俱。眼看英賢相繼歿。往者笑我爲非夫。隱忍無名何爲乎。釣璜堂存稿七

沈寓 寓白華莊藏稿鈔二十二卷

沈寓。字□□。號寄廬。崇明人。以叔父廷揚死國。遂高隱不求仕進。卒于康熙五十六年。年七十有九。著有烟波筆嘯詩嘯各六十編。太倉程穆衡爲選刻文十六卷。詩六卷。穆衡頗知理董清初之事。于寓高尚之志。峻潔之行。務爲表章。不使湮沒。其文有觸忌諱者。皆未刪芟。寓亦樂天知命。故爲異語。然其意所在。不難一覽而知。所記廷揚事。尤足補史。其詩文境界不高。而于錢謙益汪琬皆有微辭。自負可知。光緒吳江縣續志。引顧疇五筆記。謂沈德潛聞其名。扁舟訪焉。叩其學。前明三百年掌故瞭如也。後數年遇之吳江佛寺。狀甚頹然。藜藿不繼。德潛爲之慨然。後亦不復知也。此集有德潛序。稱寓享安閒。臻老耄。穆衡序更稱其後嗣繁衍。皆守先人之莊。耕讀自好。然則筆記晚境困窮之說。爲流傳失實矣。

我生

亂離值斯世。我生纔七歲。衣冠成一代。依稀記前輩。忽忽五十年。文獻俱凋謝。天寶說開元。兀兀如長

夜。空讀萬卷書。五行較耕稼。把酒坐隴畝。風雲起叱咤。此亦胡庸爲。乾坤不用假。春草多生意。秋菊自
醞藉。肥種十畝田。農夫作烟媪。子孫有餘饒。素位而行舍。四十九年非。到彼六十化。笑我諸葛公。管蕭
徒匹亞。白華莊藏
稿鈔二

五月二十二日記事

晝長倦坐啓書帷。日色初西正未時。陡下一聲雷動壁。忽搖幾陣地傾維。王家有道勤修省。野士無勞發
嘆噫。莫說江南桑土樂。海潮歸處盡抽絲。江南海稅甚
嚴。故云。
白華莊藏
稿鈔二

過周皇親墓

曾見王朝肺腑親。墓門赫奕動行人。萬千里內家無敵。十七年來國並淪。石馬跡荒摧舊塚。流鶯啼處下
西鄰。金張許史歸何地。玉匣珠襦賜紫宸。白華莊藏
稿鈔二

邢昉石臼詩前集九卷後集七卷

邢昉。字孟貞。高淳人。明諸生。少有詩名。卒于順治十年。年六十四。詩刻于崇禎八年者。曰魯稽齋詩。
沒前一年。自定其詩。爲范印心所刻。今皆未見。此石臼詩前集九卷。後集七卷。以前後分明清。刻于康
熙末。前集五律中乙酉弘光
元年詩。列于己卯崇禎十
二年前。若出手訂。不應漫無序次。其詩王士禛以爲韋柳。施
閏章以爲郊島。皆皮相之論。唯宋犖稱具體少陵。實爲得之。至工力深厚。以詩法論。錢謙益吳偉業猶當

避舍。則諸人所不及知者。集中念亂傷離之作。讀之令人感歎。田圃閔雨憂旱諸章。一賦再賦。蓋有慨于民食之艱。不啻爲民請命。與東臺吳嘉紀同爲善于學杜者。時錢吳聲名。奔走一世。片言可以爲人輕重。獨有不肯隨之俯仰者。則昉與嘉紀二人。集中無一投贈詩可證。石白陋軒兩集。各不下四五刻。孰謂世間無公論耶。

水次見饑人

繫舟求岸火。到岸煙火寂。高樹水侵腹。敗茅波動壁。雞犬一朝無。舊畚三歲絕。窮簷一餒老。向我語歷歷。言茲所居屋。得賣充粒食。不見廣川涓。巨棟連舸纒。爾茅易升斗。何以繼釜鬲。此意絕悲愴。所圖朝與夕。微生復幾何。重壤豈云遂。石白後集一

白骨

水濱積人骨。往往蔽秋草。云此新戰死。雪色猶髑髏。見者雖嘆息。一過罕傷抱。良以所遭多。泯然無復道。草根及沙際。衆骼莽顛倒。楓林寒未丹。江月白已早。豈無泣游魂。哀哀向清昊。石白後集一

廣陵行

客從廣陵來。言城中人精僧作佛事。薦去年兵死者。哭聲慘不忍聞。賦此。

客言渡江來。昨出廣陵城。廣陵城西行十里。猶聽城中人哭聲。去年北兵始南下。黃河以南無鬪者。泗上諸侯捲旆旌。滿洲將軍跨大馬。馬頭滾滾向揚州。史相堂堂坐敵樓。外援四絕誓死守。十日城破非人謀。揚州白日聞鬼嘯。前年半死鱗山鶴。此番流血又成川。殺戮不分老與少。城中流血迸城外。十家不得一

家在。到此蕭條人轉稀。家家骨肉都狼狽。亂骨紛紛棄草根。黃雲白日晝俱昏。彷彿精靈來此日。椒漿慟哭更招魂。魂魄茫茫復何有。尙有生人來酌酒。九州不肯罷干戈。生人人生人將奈何。石白後集二

丙戌五日卽事

吹簫盪槩事闌珊。此日秦淮烟靄間。每憶少年看競渡。便臨綠水想朱顏。更無屈子嗟沈汜。祇有懷王怨入關。三戶不知人在否。莫教虛望九疑山。石白後集四

哭麻孟璇

笑看頭顱只自如。衝冠髮在蛻形初。鄉人莫話琴高事。不學長川跨鯉魚。孟璇臨歿詩。怒衝千丈髮。笑看百年頭。石白後集七

哭吳次尾

九死聊將一羽輕。齊山真共首陽名。乾坤此日猶長夜。枉使夷齊號劣生。時移文稱次尾爲劣生。石白後集七

再哭趙以卿

頸血鮮鮮百日中。握拳透爪氣如虹。平生陋巷誰知者。死後方同顏魯公。以卿死逾百日。其家始得其屍葬之。肌肉如生。以鍼刺之血出。石白後集七

吳嘉紀 陋軒詩六卷 陋軒詩十二卷 續集二卷

吳嘉紀。字賓賢。號野人。泰州人。明諸生。能忍飢。有志節。卒于康熙二十三年。年六十七。專具清史列傳。有陋軒詩。據康熙十八年汪懋麟序。野人詩初集爲周櫟園所刻。汪華斯分司東淘爲再刊其集。方于

雲復哀其前後詩刊之。懋麟所序即此本也。計東序初集之刊在康熙戊申。七年先于于雲十二年。吳周祚序于雲所刊共四百餘首。今六卷本。蓋嘉紀沒後。其友程岫所刊者。後于于雲凡五年。陸廷掄江村詩序。甲子秋客廣陵。再過雲家。則野人已前死數月。遺稿多放失未梓。雲家悉拮拾排續。付其友汪悔齋太史發梓爲陋軒集六卷。凡一千十二首。江村詩者岫所撰。雲家爲岫之字。嘉道間宿州王相有信芳閣活字重刻本。泰州繆中有十二卷本。夏荃得未刻詩三百六十餘首。選出百二十首。編爲續集二卷。于是嘉紀之詩。先後凡七刻。其詩學杜。得其神。遺其貌。若風潮行。朝雨下。殘夜不寐聞傭者鞭碾稻。東家行。糧船婦。歸東淘答汪三韓過訪。催麥村。挽船行。歸里與胡石明。德政詩五首。采葑行。隄決詩十首。望君來三首。諸詩字字皆血淚也。彼賦冶春詞者烏能知之。近人有以之擬盧仝者。亦非。

臨場歌

雖曰竊窬戶。往歲折價。何曾少過。胥役謂其道也。趨官長沿場繳比。春秋兩巡。邇來竟成額例。兵荒之餘。嗚呼。誰憐此竊窬戶。

據豺隸狼。新例臨場。十日東淘。五日南梁。趨役少遲。場吏大怒。騎馬入草。鞭出窬戶。東家貰醪。西家割麩。彈力供給。負却公稅。後樂前鉦。鬼咤人驚。少年大賈。幣帛將迎。帛高者止。與笑月下。來日相過。歸比折價。答撻未歇。僂人喧闐。危笠次第。賓客登筵。堂上高會。門前賣子。鹽丁多言。筆折牙齒。陋軒詩一

鄰翁行

鄰翁皓首出門去。慟哭悔作造船匠。仲無故舊囊無錢。此去前途欲誰傍。聞道沿江防敵兵。造船日夜聲丁丁。工師困憊不得歇。張燈把炬波濤明。監使還嫌工弗速。如霜刀背鞭皮肉。肉爛腸饑死無數。拋却潮

邊飽魚腹。力役人稀大將嘔。遠近嚴搜及老身。眼看同輩死亡盡。衰羸焉有生歸辰。回望故鄉妻與子。蕭蕭落木西風裏。爨下連朝方斷炊。柴門寂寞無鄰里。常憑微技日圖存。微技誰知喪一門。君不見。船成蕩漾難舉步。千櫓萬櫂蘆灘住。增金急募獨舟人。有司又派江南賦。

一錢行贈林茂之

先生春秋八十五。芒鞋重踏揚州土。故交但有丘塋存。白楊摧盡留枯根。昔遊候過五十載。江山宛然人代改。滿地干戈杜老貧。囊底徒餘一錢在。桃花李花三月天。同君扶杖上漁船。杯深顏熱城市遠。却展空囊碧水前。酒人一見皆垂淚。乃是先朝萬曆錢。隨軒詩二

難婦行 壬寅六月瓜州事

寧爲野田莠。不爲城中婦。莠生雨露培。婦命如塵埃。江頭六月舉烽燧。東南風吹戰艘至。官長首嚴出城禁。嬌娃豔婦縮無地。愚者爭向船槍匿。覆木覆石水關出。木下石下填人膚。日蒸氣塞人叫呼。舟子耳聞眼不顧。往來邏卒逢無數。短篙刺刺漸離城。岸上骨肉喜且驚。夫來挈妻父挈女。開槍十人九人死。吁嗟乎。城外天地寬如此。此身得到已爲鬼。家人畏罪不敢啼。紅顏亂葬青蒿裏。隨軒詩二

李家孃

乙酉夏。兵陷郡城。李氏婦被掠。掠者百計求近。不風。越七日夜。聞其夫歎。婦哀號撞壁。頭碎腦出而死。時掠者他出。婦乃怒裂婦尸。剖腹取心肺示人。見者莫不驚悼。咸稱李家孃云。

城中山白死人骨。城外水赤死人血。殺人一百四十萬。新城舊城內有幾人活。一妻方對鏡。夫已墮首。腥刀入箭。紅顏隨走。西家女。東家婦。如花李家孃。亦落強梁手。二手牽拽。語□□。笳吹團團日。低歸擁

曼睩蛾眉。獨有李家孃。不入□□栖。三豈無利刃。斷人肌膚。轉嗔為悅。心念彼姝。彼姝孔多。容貌不如

他。四豈是貪生。夫子昨分散。未知存與亡。女伴何好。髮澤衣香。甘言來勸李家孃。五李家孃。腸崩摧。

箠磨滅。珠玉成灰愁思結。衣帶千結萬結解不開。六李家孃。坐軍中。夜深起。望不見故夫子。唯聞戰馬

嘶悲風。又見邗溝月清輝。漾漾明心胸。七令下止殺殘人生。塞外人來殊似鼻聲。云我故夫子。身沒亂刀

兵。勸仆厚地。哀號蒼冥。八夫既歿。妻何求。腦髓與壁。心肺與鱗。不嫌剖腹截頭。俾觀者殼餼若羊牛。

九若羊若牛何人。東家婦。西家女。來日撤營北去。馳驅辛苦。鴻鵠飛上天。龜兔不離土。鄉園回憶李家

孃。明駝背上淚如雨。十 陋軒 詩十

李盤 李小有詩紀二十五卷

李盤。原名長科。字根大。號小有。興化人。春芳孫。兄弟皆登科。獨盤落拓不第。崇禎末。以荐授廣西懷

遠知縣。入清以隱逸終。明清之際。興化諸李。皆有文采。盤輩行較尊。聲名尤盛。其詩專摹唐賢。同時與

鍾惺陳子龍為友。而無與于派別之爭。撰李小有詩紀二十五卷。曰饑驅拙言。曰仗友隨鷗。曰葭園唱和。

曰瞻鳥歎。曰羈游譜。曰蕪關吟。曰秋浦詠。曰茅城秋蘂。曰牧懷。曰十六景。曰巡隘。曰桂游。曰感懷。曰

楮草。曰悼亡。曰燕合。曰燕離。曰香山憶。曰汴州夢。曰青谿草。曰吳吟。曰晨風吟。曰游子意。曰水雲

瓢。曰京江詠。大約為己卯崇禎十至丁亥順治四年之詩。以入清所作居首。逆數而上。以至崇禎。編次之法。

從來罕見也。

姚永言感賦

清和九日驅返秦蜀。姚永言至。執手相哭失聲。譚申酉年事。歎歎欲絕。因共商避地之策。

煙餘雲剩失桃源。我已吞聲君未諼。祖帳辭都傷賦鵬。帝星下殿哭聞猿。敢因厭亂耽鋤棘。祇爲忘憂學種萱。相對不須悲往事。自分簞箸老田園。李小有詩紀 饑驅拙言

輓先兄維曼大司農

太息時艱三拜疏。誰知天墜力難扶。君恩不逐愁雲散。臣節甘同落日徂。止水夜涼清徹骨。文山朝墮淚成朱。千年精衛無消歇。歲歲春風叫鷓鴣。

不向青山正首丘。願傾熱血灑刀頭。出師表上風雷動。轉餉籌空日月愁。蝴蝶三更思漢鼎。子規萬里怨吳鉤。英魂到海流無盡。張陸應同把臂游。李小有詩紀 饑驅拙言

李 瀚 嚴菴稿一卷

李瀚。字士翔。號籀史。又號嚴菴。興化人。貢生。入清不事進取。喜讀書。談名理。于釋道陰陽醫卜無不該覽。工吟咏。不多作。作亦不存稿。僅傳嚴菴稿一卷。凡詩七十一首。七絕爲多。然字字傷心。勝于人之連篇累幅。子國宋。工詩爲大家。女國梅。字芬子。號韞菴。九歲賦荷花詩。有鶯聲喚轉夢中人句。瀚書聯賜之云。題詩雲起珊瑚架。作字烟飛鸞鳳箋。長適解學鼎。夫婦偕隱。有林下風清集。興化李氏。自春芳

以來。代有撰述。瀚兄清。棄官杜門。著南北史合注三垣筆記諸書。皆未刻。潛字啓美。亦有文名。再從兄沛。字平子。有平菴詩集。沂字子化。號艾山。又號壺菴。與從子麟國宋號稱三李。著鸞孝堂集。方外十力爲刊于江西。門人張師孔重刻于揚州。麟有虬峯集。乾隆中與王仲儒西齋集同列禁書專案。至戮尸梟示。仕新朝者。澄字鏡月。有敦好堂詩鈔。清子栢。有樂圃詩。今于瀚父子及麟栢外。皆求其集未得。

傷春曲 七首 錄一

隔城三里水之涯。中有秦人幾百家。未許外來窺渡處。至今不肯種桃花。 嚴著 稿

春日雜詠 三首 錄一

四海正干戈。鶯花此地多。一春新物色。萬古舊山河。得景仍添恨。當杯且放歌。脫巾憐短髮。顧影亦婆娑。 嚴著 稿

王仲儒西齋集十八卷

王仲儒。字景州。號西齋。興化人。諸生。祖繼美。萬曆三十二年進士。官山東布政司參議。父貴一。字式玉。號象山。性高伉。姊夫吳姓。官大學士。不事請祈。明亡。棄諸生。妻李恐其未決。焚所選時文以激之。敬仲儒及弟薰。儒勿習功令文。故仲儒終身不忘故國。蓋有所自也。仲儒卒于康熙三十七年戊寅。不悉其年。據集中甲戌 康熙三十三年 秋感詩云。六十支離頭白翁。則卒年當爲六十有五。撰西齋集十八卷。自順治十八

年辛丑迄康熙三十六年丁丑。凡三十六年之詩。爲之作序者。李麟字西駿。李國宋字湯孫。與其叔沂號艾山。皆工詩稱高士。爲文定裔孫。仲儒母族也。麟有虬峯集。身後戮屍。受禍與仲儒同。仲儒身後得禍最烈。列入禁書專案。自今觀之。略無抵觸。僅故國之思。偶一流露。視同時諸人之作。或尙蘊藉。乃有禁有不禁。殆亦偶值其會耳。乾隆時禁書幾以全力爲之。及今所禁之書依然流布世間。知爲徒勞也。

贈何龍若

滄桑之後闔闔關。天下豪雄在耕釣。白頭遺民今欲盡。未銷間氣出年少。何子初生洛鼎遷。一珠暗吐京江耀。韶姿異質超輩流。不肯低眉逐時好。多才嗜古藝事工。詩歌篆籀尤神妙。但逢窮交無所惜。趨趨豈屑依權要。壯遊夢走大漠還。朔雪霑裳倚天嘯。閒將佳句寫作圖。向人指點蘇卿廟。只今僑居海陽郭。空囊刺促誰堪告。我來霜天生暮寒。君過旅屋相看笑。高談英偉四座驚。多時塵俗君爲掃。舉手恨無沽酒錢。摩挲細石親雕鑿。更許雲山落素舫。天機絕技知難報。踟躕獨夜傷此情。銀塘月墮疎窗明。起行感念昨年事。結交須記螺隱生。茫茫異縣正離索。欸門相就匏樽傾。燈前屈指天下事。早聞京江何鐵名。萍蹤忽聚胡公里。其時岸柳垂春水。別去憂愁萬端集。兩年契闊荒湖裏。我鬢全班君正青。乾坤血戰將傾否。休言三十不得志。膂力方剛望吾子。因君慷慨心復哀。蟄龍何日生風雷。故人海內並搖落。皇天用意藏奇才。人生悲歡忽異態。區區且莫摟胸懷。

西齋丁巳至巳未詩

陶季舟車集二十卷

陶季。本名介。字昭萬。明亡棄舉子業。更名澂。字季深。後以一字行曰季。寶應人。一生以游爲事。詩皆成于舟車。撰舟車集二十卷。有神似太白者。與顧景星爲友。詩格亦相類。此集刻于康熙三十二年癸酉。其慈寧宮禁長莓苔一首。至今膾炙人口。他作不能悉稱。集中陟江後寄衍公二首。登清涼臺四首。擬游仙四首。過天壽山諸陵三首。定陵一首。寓拙政園。蠻觸行紀。開淮水溢。重觀洗象忽一象逸。重登狼山二首。皆有刺譏。顧景星白茅堂集。有陶季深詩集序。作于順治十年癸巳。舟車集起于八年辛卯。前集恐未刻。其舟車後集十卷。其孫曾凱。雍正中所刻。詩起康熙三十二年癸酉十月。迄三十八年己卯十月。似卽卒于此年。三十五年丙子有今年詩云。今年開八秩。然則卒年七十四也。晚年之作。辭筆尤抗。讀史雜感四首。作于三十三年甲戌。是咏徐乾學。以叔文王伉爲比云。僉佞一轍。視今猶古。何其深惡而痛絕也。哀故人一首。作于同時。故人者。喬萊也。所云南陽貴人獨含怒。決計無繇置之死。浸尋搆譏嚴譴成。將謫□□數千里。豈期往例引未協。差喜羈旅近天咫。似萊初擬戍。後乃令入都居住。憔悴以死也。戊寅^{康熙二}讀新唐書云。唐業中衰進叔文。簾帷奏事日紛紛。堂餐徑去誰高郢。入座能言只寶羣。餅肆酒爐容踟躕。宦官宮妾正殷勤。杜公樹議原忠直。僉佞承風不可聞。詠高士奇以廢事告歸也。卷終草草一首云。草草百年貧。勞人倍苦辛。舟車空自老。筆石耗吾真。結舌從誰語。攢眉竟莫申。平生黃綺志。猶喜未

稱臣。是絕筆亦自傳也。末附集唐五十五首爲一卷。

饑民謠

高原託羣命。化離無安居。三日僅一食。誰復計其餘。大府方南來。宣言發倉糈。皇皇感且泣。提挈滿路衢。里正仍作奸。公然雜追呼。終歲重剝肉。不得寬須臾。蒼天聽彌高。吞聲行次且。艱難已盡骨。願乞身

爲奴。舟車集五

紀聞

己未七月二十八日。京師地。拆摧民居。旬月猶未止。

郵置分明直北來。爲傳陵陸盡傾摧。不知七日網緼後。劫雨嵐風又幾回。舟車集十

擊柝謠

擊柝復擊柝。城中居民半蕭索。去年冬初食糠稷。今年春盡煮藜藿。富家貫朽粟糜爛。猶慮田園未充拓。兒孫紈綺差勝人。實類乘軒懿公鶴。城中之豪怨久積。相與鉤連暗抄掠。滿城警備不敢臥。伏處皇皇如避瘴。崇墉大屋究難入。肱篋探丸意殊惡。何時使君新政成。再見買牛共耕鑿。舟車集十四

潘問奇拜鵠樓詩集四卷

潘問奇。字雪帆。錢塘人。家貧棄諸生。游食四方。集中有年可紀者。戊申康熙七年客稀歸。庚戌九年客大梁。甲寅十三年客昌平。丙辰十五年客海陵。戊午十七年歸晉陵。甲戌三十年自京師南歸。乙亥三十四年客揚州。知府傅

澤洪爲刻此集。兼爲江都田登刻埋照集二卷。題曰二家詩。澤洪字育菴。漢軍旗人。喜吟咏。能爲此舉。且欲爲田登買田歸老。仕宦中亦頗難得也。問奇行事不具。阮葵生茶餘客話云。先徵君鶴緜先生。手錄同社應社倡和詩。內潘雪帆七律最多傑作。雪帆客居淮上。與石霞舉紫嵐劉昭華爲忘形之交。後客死天寧寺。揚州守傅澤洪葬之平山堂側。爲文誌其墓。查二瞻書丹。遺稿甚富。石氏舊有藏本。此集無早年詩。澤洪作序云。全集有待。不知以何時故去。庚午康熙二十九年除夕詩云。身到三更是六句。是生于崇禎五年壬申。至是已六十四歲。母妻尙在江南。不知何以即葬揚州。其詩意境深厚。節調沈雄。尤工七律。秋柳二首。論者謂丰神寄託遠在新城之上。唯戊午雜興。頗及時事。餘多異代禾黍之悲。如燕京感舊。讀吳梅村宮詹蕭史青門引感而有作。今日傷甲乙間南都事。蕪城弔史可法。玉容歌爲長平公主作諸詩。幾欲與婁東爭席。嘗客昌平。有天壽山。望天壽諸陵。思陵。營平雜感。戊辰康熙二十六年再謁長永諸陵詩。眷戀先朝。至欲祝髮天壽。晚又欲爲僧孝陵。問奇客居僧舍三十年。與僧無異。而詩中無一飯心語。知祝髮之說。聊以寄其悲憤而已。

憫蝗

農夫不可爲。去歲值陽九。布穀一石餘。秋收不盈斗。春來仍苦飢。田家無雨久。因之兆飛蝗。類與蠹賊耦。其性尤貪饕。食禾不食莠。薨薨來蔽天。所過輒空畝。傳聞河以南。此物村村有。鳴鉦且揭竿。驅捕喧童叟。禱祀遍里閭。願言具雞酒。詛祝一以窮。東西但狂走。籽粒恐艱虞。安能望瓶甌。吾將罪昆蟲。昆蟲

昧分割。或謂造物讎。造物曰否否。我思災祲端。其故必非偶。吞聲不敢宣。仰面一搔首。拜臨堂詩集二

灌畦

褊性厭市廛。村居最幽獨。晨興不著冠。余髮亦稍沐。抱甕趨井幹。汲泉就清旭。深鄉復貧家。豈能常食肉。因之闢庭蕪。藝此葵與菽。紆徐透畦行。灌漑及草木。有時還荷鋤。趁此土膏足。筋骸幸未衰。不敢課僮僕。半畝固嘉生。春秋繁品目。筐筥擷且烹。新陳頗相續。計口日三餐。每飯需一束。餘把及鄰翁。豈惟充我腹。嗟彼豪富家。盤殮盛雞鶩。何曾日萬錢。下筋眉仍蹙。物理固不齊。吾生諒非福。役罷日已炎。槐陰展書讀。拜臨堂詩集二

伐木歌

臨江古樹蛟龍守。劫火頻移根未朽。我愛餘涼趁午陰。團團蔭此空山叟。忽見江邊數騎來。里胥導引州官走。傭徒數十頗追隨。刀鋸在腰斧在手。距陰十步始停驂。衆目睚盱羣指柳。云是荆湘大用兵。王師隔岸相持久。水戰尤需巨艦多。美材合向江南取。輪困離奇悉中程。但憑人力窮川叢。從來法令細于毛。官司不怕神靈吼。頤指生風意氣豪。各解衣衫露雙肘。先伐枝柯後輪驅。留得根蟠大于斗。須臾牽挽費長繩。邪許之聲動山阜。老人無語獨吞聲。似對春風別良友。明日聽鶯我再來。此地蕭條復何有。拜臨堂詩集二

長安舊第行

東華門外新豐左。十萬樓臺雜烟火。誰家門第獨荒涼。蠶蛸網絡葳蕤鎖。我停驢背問居人。居人未語先

露巾。爲言昔日此門內。鈿車金犢常紛紛。粉黛最數何平叔。墻齋天潢顏似玉。婦咏含章殿裏花。阿翁更領安西纛。安西斧鉞下青冥。銅柱遙遙自勒銘。鵠印龍旂親護國。彤弓蜚矢舊專征。是時炎方稱半壁。三苗五嶺皆迴席。功名遠邁郭汾陽。才望爭誇嚴僕射。明珠從此盡蠻王。翡翠依然致越裳。更輦黃金三十萬。歲輸年例入平陽。平陽第裏誇歌扇。紅牙白紵朝朝宴。夜永金盤蠟淚紅。鵝笙象管千金面。有時小隊出青郊。蹀躞平原好射雕。鞞上角鷹雙臂健。珠弓玉靶馬蹄驕。亦有詞人兼狎客。西園北海俱膠漆。賭墜毬場日幾回。分曹射覆無虛夕。如此豪華春復秋。烏飛兔走兩悠悠。箏傳素手香猶膩。月落朱門客已愁。聞道軍心變南服。白衣蒼狗多反覆。馳道朝看尺組來。秦樓夜聽冤魂哭。況復侯家寶器多。冰綃步障奈君何。宮奴攫去玉跳脫。曠騎來收金叵羅。自此歡娛一朝歇。寒蛩敗砌聲嗚咽。月波樓上晚鴉啼。金谷園中春草沒。可知日月有盈虧。古來富貴多傾危。何似田家老翁嫗。婆婆白首相追隨。不信試看歌舞地。昔聞車馬今憔悴。爲問當時授簡人。何人更灑西州淚。拜臨堂詩集四

田登埋照集二卷

田登。字春帆。江都人。家貧游食四方。三藩之變。嘗從軍湖湘者數年。撰埋照集二卷。傅澤洪以與潘問奇詩合刻爲二家詩。登與問奇其類而工詩同。遠游及所主同。丁卯客都門值予初度示姚葉二子云。百戰乾坤剩此身。今宵重對啓禎人。白頭紅燭千行淚。重向樽前話甲申。則年亦與問奇略同。丙寅誌懷詩。記

所與唱酬者八人。曰杜茶村蔣前民潘雲客冒辟疆姚仲潛沈天士張孺子沈方艸。皆窮士也。其詩不似間奇之激昂頓挫。而一唱三歎。引人悲緒。筆墨超脫處。正不可及。詩自乙巳康熙四年迄乙亥康熙三十四年二十年間。篇章未富。編排或嫌失次。豈通脫不自收拾歟。

江村雜感

驅犢上東臯。草枯豆苗死。苗死犢不肥。秋糧何所抵。

屋前捲寒濤。屋後叫飢鬼。出門復入門。袖手對妻子。

東隣解音柳枝。西隣送皇木。東隣賣男行。西隣無女鬻。

採薪薪有主。釣魚魚有稅。歸來枕書眠。青天竹扉閉。埋照集一

姚孫棐亦園詩集六卷

姚孫棐。字繩甫。號戊生。桐城人。崇禎十三年進士。官浙江蘭溪知縣。調繁東陽。許都事平。敍兵部職方主事。阮大鍼修怨。以殺降罪之。與巡撫左光先同時被逮。會清師南下。事始解。歸隱小龍山。康熙二年正月卒。年六十六。著亦園詩集六卷。桐城姚港姚氏。自之芳始大。之芳字汝芳。號芳麓。萬曆二十九年進士。由海澄令入爲禮部郎。出守杭州汀州。陞副使以歸。子孫棐。字前甫。早卒。其妻方維儀。字仲賢。方十八歲。至八十四而卒。著清芬集。與方孟式初蘭集。同爲桐城閨閣之秀。次孫棐。字心甫。天啓二年進士。

龍游知縣。調晉江。擢御史。出爲漳南兵備道。官至尙寶丞。與孫棐同祀鄉賢。孫棐八子。文烈字觀侯。順治八年舉人。官至楚雄知府。文勳字集侯。文然字若侯。崇禎十六年庶吉士。入清官至刑部尙書。卒于康熙十七年。年五十九。諡端恪。文燾。文燕字翼侯。順治十八年進士。德安知縣。文彙字聲侯。文慶字介侯。早卒。有竹齋詩。文良字夏侯。年二十餘卒。有瑞隱草。孫棐長女鳳儀。適方于宣。二十一而寡。卒于康熙二年。年三十六。著蕙網閣詩集。次女鳳喈。適江寧吳兆武。文烈第二子士荃字嵩聲。有如舫齋草。一門文采。亦足多也。

山行有感

鞭驢負擔尙逡巡。鐵騎長驅忽若神。固國山谿雖曰險。當關虎豹必需人。孤臣慷慨塗肝腦。比戶蕭條斷粒薪。若使功成枯萬骨。英雄何用淚沾巾。亦園詩集四

感懷

地稱佳麗忽烽煙。骨肉江城嘆各天。信杳魚鴻馳意馬。訛傳兵燹閃雷鞭。秋留溽暑捐涼久。人以多愁怯老年。兀坐騰騰如夢裏。且攜餘醉覓高眠。亦園詩集六

姚士晉休那遺稿十七卷

姚士晉。字伯康。更名康。桐城白荅里人。是爲白荅姚氏。萬曆中諸生。早受知何如寵。如寵入相。禮爲上

寶。史可法巡撫廬州。單騎詣之問計。遂參軍謀。可法奏議書檄多出其手。揚州陷。適先期歸。得不與難。順治十年。悲憤以卒。年七十六。事具姚鼐所撰休那先生墓表。所著安危注。借紅堂本草。籌債堂稿。宋史改本。江淮小草。掌慧軒集。俱不傳。唯太白劍二卷。貨殖傳評一卷有刊本。此集刻于光緒十四年。裔孫灼編集。凡爲文十二卷。詩一卷。貨殖傳評一卷。外集三卷。又太白劍二卷。援黃巢事以論闖獻。間涉政事及兵禍之烈。聞見頗有足存。議論則得失互見。康爲文有奇氣。特患才多。墓志至數千言。蓋由不識體要。意其爲人。必血性男子。豪邁不可一世。艱難之際。唯深心至計。兢兢自矢者。或可有濟。若雄談驚坐。特快意耳。史公深致敬禮。不能共救時艱。爲可悲也。

重弔左少保

持歸骸骨與灰殘。貫日長虹氣正寒。血在獄中荒草碧。心懸闕下暮雲丹。碑銘成帙千篇哭。鼎鑊當前一死難。拜手讀公行狀略。移宮兩疏更衝冠。休那詩集

憶史相國

十年推赤盡心憂。臺閣生風遜壯猷。天下兒童知司馬。誰問精魂貫斗牛。羣生不造唯天命。一傳困難勝衆咻。鼎沸未能成席捲。不無遺恨裂雙眸。休那詩集

蕭雲從 蕭湯二老遺詩

蕭雲從。字尺木。又曰默思。號無悶道人。晚又號鍾山老人。蕪湖人。崇禎丙子壬午兩科副榜。入清不仕。卒于康熙七年。年七十八。著易存□卷杜律細□卷。工畫山水人物。太平山水圖。離騷圖。皆鏤板以傳。嘗于采石太白樓下四壁。畫泰山華岳峨眉匡廬。乾隆中葉猶存。所居尚名蕭家巷。僅餘屋址。黃鉞訪其後人。得一擔水夫。詩文集舊藏蕪湖沈氏。不傳。鉞求得七律一體。選三十首。入蕭湯二老遺詩。

鍾山梅下詩

蕭子性喜梅花。無如鍾山之麓之盛。少時縱遊其處。遇王孫築草閣數椽。引余登之。仰望鍾山。丹楹金瓦。鱗戩聳飛。瓏雲而麗日。俯瞰其下。則梅花萬樹。恣放縱橫。一望十餘里如坐霄航浮玉海也。辛卯夏初。復往訪之。鞠為茂草矣。王孫亦不知所之。荒涼之中。因感成詩。他無所及。

老去芳遊興未刪。愁多白日淚猶漣。人瞻北闕春千里。香過西鄰水一灣。望帝不來翻玉樹。洛神何處贈瑤環。東風漸已回天地。鵝鵲空殘冷霧間。

三楹在昔築湖陰。舊植梅花何處尋。一折不堪傷歲暮。衰年空欲臥霜林。南朝古木交龍氣。西浦高人放鶴心。簾杖經行山路徧。迢迢此恨白雲深。蕭湯二老遺詩

移居詩

曠昔小築於東臬。則通王處仲夢日亭也。甲申後。為鎮兵是據。遂毀精舍為園廬。至丁亥秋。始得攜兒子。擔書筍。移檝緝垣。略蔽風雨而家焉。惟亂離遷播。親友凋殘。觸景內傷。愀然哀憤。觀其懷民。橫集無端。况予老矣病矣。無能為矣。窮途日暮。情見乎詞。得詩六首。求故人書之光矣。倫

鹿門見寄一行書。悲滯風塵萬里餘。未靖干戈中外警。當途冠蓋往來疎。天高猿嘯松枝落。籬折雞棲月

影虛。鬢短霜繁潦倒甚。杖藜揮淚過荒墟。

卜築黃塵盡草注。於時深媿自爲家。樹高不隔蟬聲切。牆短猶留駒影斜。老病風前猶種藥。傷心雨後亦栽花。生長貧賤原非隱。未許青門學種瓜。蕭湯二老遺詩

湯燕生蕭湯二老遺詩

湯燕生。字玄翼。號巖夫。太平人。僑居蕪湖。入清。棄諸生。致蒙自給。工詩。赭山懷古四章。爲吳偉業激賞。以爲詩史。尤精篆籀。與鄭篋齊名。不知卒年。吳肅公街南續集。有湯巖夫先生傳。謂乙酉弘光元年以後。

逆天衡命。岸然于出處興亡之際。沈徵君遁迹遠舉。湯君謨沈崑銅俞去文諸先輩。暨管子無疑。陳子吉裘。梅子周文。徐子小范。湯子巖夫。梅子木山。聖占。杜子朋李。相與勵名節。詩歌激憤。或舉事觸時網。戮身弗卹。崑銅嬰禍最烈。君謨坐海獄殞命。小范吉裘後先窮餓死。又率不中壽。獨木山八十餘。聖占七十有六。而窮餓且無子。獨巖夫優游垂八十以終。蓋雖與崑銅諸老游。然慎感善自匿。故不罹于難。龔鼎孽嘗通書問。詩以招之。弗應亦弗答。其介特又如此。有商歌集不傳。黃鉞輯其詩一卷。爲蕭湯二老遺詩。

赭山懷古

赤鑄山頭鳥不飛。上皇曾此易青衣。無多侍從爭投甲。有限生靈但掩扉。五國城西邊月苦。景陽樓下夜鐘微。心傷莫唱淋鈴曲。未得生從蜀道歸。

涇逐天風向北揮。山僧指點舊重圍。素車東駐泉偏咽。代馬南來草不肥。野老久知今日事。先臣猶護昔年非。延秋門外王孫盡。司馬元戎自錦衣。蕭湯二老遺詩

案此詩原題緒山懷古。明詩綜去懷古二字。并改字句之觸忌者。今依遺民詩。尙有三四兩首。并錄之云。嗚咽江流繞故關。北轍不見有南還。宮車夢想來闐闐。高廟歌思在里闐。澗夾青絲環萬騎。崖懸烏帽侍雙鬟。亦知帝座傾危久。古井苔紋淚已斑。直上孤峯似劍筓。鴻濤那復割秦疆。山花終古不成笑。離月重來黯獨傷。夜宿天低金鷲寺。晨炊夢冷玉麟堂。青城山下無多地。白草黃泥御道荒。疑惑歎弘光北狩而作。

劉城嶧桐集文十卷詩十卷

劉城。字伯宗。晚號存宗。貴池人。諸生。崇禎九年以保舉廷試授知州不就。少與同里吳應箕齊名相善。同爲復社眉目。城爲人美姿容。好吟誦。溫恭折節。不爲放言高論。家富于資。篤于朋友姻戚。多所振貸。又聚書三四萬卷。以至貧薄。而應箕鐵面紫髯。伉爽悍驚。喜陵侮人。數爲大言。不矜細行。家世貧窶。而服食逾侈。揮手千金立盡。然城終以天下方亂。非繩尺拘謹之士所能奏功。益心善應箕。冀其有成。崇禎十二年。應箕集諸生百四十餘人。出留防亂揭。以逐阮大鍼。大鍼聞黨禁廢。爲時論所不與。檄出一時快之。然有識者。慮黨禍之終不免也。南都之立。馬士英方巡撫鳳陽。有權略。挾劉澤清劉良佐之衆。以迎立功入閣。東林防其擅權。命史可法督師。以封四鎮籠兵權。朝中則以高弘圖姜曰廣制士英。黨爭既烈。

四鎮不爲可法用。然後東林復主張召左師。左師東下。本就食安慶。然以救太子清君側爲名。則必有召之者。清師南下。四鎮迎降恐後。南都于是不守。東林之計。未必決于書生。而書生涉世太淺。出言太易。好爲奇計。人人自命陳同甫。使有其議固不可。無其議而危疑之際。以口舌起猜嫌尤不可。應箕果預此議與否未可知。然讀其子孟堅輯刻樓山堂遺集八卷。多甲乙間事。蓋縱橫捭闔有出于意表者矣。獨城與可法書。責其不應封四鎮。謂桀驚不臣。或起降子。主弱必叛。敵強則降。主敵皆弱則專制自爲。互相吞併。後來竟如所料。其識或過于應箕。弘光元年。應箕起兵貴池。響應金聲。兵敗。死事甚烈。城爲營葬。兼撫其孤。憔悴自傷。未幾卒于庚寅。順治七年年五十三。事具蔣臣所爲徵君劉公伯宗行略。著曝桐集文十卷詩十卷。朱彝尊嘗目城與應箕爲貴池二妙。兩人皆喜讀史。應箕有著述之志。所撰東林本末三卷。啓禎兩朝剝復錄十卷。留都見聞錄二卷。復社姓氏二卷。今并有其書。城有後通志略。及後樂苑專選明代章布詩。皆未成。應箕文勝于詩。城詩流暢而文則艱澁。雖皆非深于此事者。然議論紀事。未嘗不足以觀覽焉。

哭黃先生

三月五日之事。余有哀歌矣。以用謝顯哭史公。遂廣之。先生廷杖之歲。余親禮于獄。其戍楚過白門也。余問道于靜海寺。海涵地負之著。既累扣而必鳴。寒冰冷鐵之神。亦時觀而若語。故些語備見之。

裹屍傳娘子。漆篋出燕臺。天上星歸舍。江頭浪欲迴。死來成一笑。事去不關才。滿目梁江總。無人國可哀。死後以蒲包裹屍。傳觀江上。就義時。或貽以好語。先生一笑曰。吾事畢矣。碑桐詩集七。

哭戴敬夫

敬夫名重。和州人。有古學。敦行道。不希同俗。余與交十餘年。道義相劘如一日。甲申以次貢于廷試第一。時讓授京官。敬夫落落失要人歡。弗與也。乙酉四月。擊余同避兵。轉徙至湖州。余歸而敬夫有所事。遂中箭洞腹。乃難變爲僧。卒以創死。余以哭史公黃公例哭之。即敬夫可知矣。

創深冤刻骨。鬢禿恨無涯。不死難酬國。空門豈問家。鳴鐘撼楚怨。翻偈送暉斜。靈隱吟詩好。賓王跡未遐。癘髮令下。敬夫曰。我不如僧也。遂僧于吳興。已乃歸里。

乘舟方訪戴。入里哭空臺。精衛魂難斷。沅湘身不迴。留書心有友。遺恨世無才。客子長號處。驢鳴一座

哀。兒子鑾。約張文伯具舟往問敬夫。及至。則捐館矣。遺書訣余父子。辱許以高蹈語。書辭古勁。墨蹟精華。遂爲絕筆。時鑾伏哭。殆不能起。

青山來此赴。白日欲成陰。已痛故人絕。更傷節士心。衣冠猶就殮。宗祏不俱沈。洞腹逃禪事。千秋名自

今。敬夫治命曰。吾易質時。神志不亂。則以初服。纏桐詩。殮。長公道行之。先是中箭洞腹。竟死。此創云。 集七

蔣 臣 無他技堂遺稿十六卷

蔣臣。本名姬胤。字子卿。晚號誰菴。桐城人。諸生。崇禎九年以拔貢生應廷試。應得知縣。辭不就。嘗著足國三議。謂漕鹽與鈔。先後爲大學士范景文戶部尙書倪元璐以奇才薦。召對平臺。力請復祖制鈔法錢法三分兼行。得允。授戶部司務。擢主事。爲言者所沮。事不行。北都破。披剃釋名道用。弘光元年。史可法督師揚州。屢書趨之。乃說可法奈何以一羊將五狼。又與書不必應酬紛沓。簿書繁猥。以收拾中州。聯合左帥爲立定脚跟。自做家當。而謂北爲急著。西北當緩圖。皆切近事勢。可法不能用。辭歸。益佗僚不合。憤悒以卒。時順治九年。年五十六。事具方拱乾原戶司徒郎誰菴蔣公傳。著無他技堂遺稿十六卷。刻于康熙四十七年。詩文如天馬行空。不可羈勒。稿多散佚。蓋不欲以文辭自見。遜荒紀略記北都失守。較

他書紀載爲詳。且最可信。江皋序謂稿中有召對紀略。今無之。知刪削者多矣。臣聲稱與姚士晉沈壽民齊名。而學差不及壽民。禪悅之篇。皆晚年所作。

脫粟行

戊子三冬白門住。僧廚突冷茶煙汨。風雪經旬門晝關。鼻觀忘言自成趣。城中驕奢者誰子。齟齬情親稱肺腑。玄狐抹額金縷衣。怨我饑寒莫我顧。有時曳杖過隣叟。慟哭相持傾一斗。手抱溼薪熨我寒。兒爲下食孫擁肘。隣叟舊日東陵侯。賓從如雲花滿樓。於今弗次不容膝。忍饑饉客時淹留。以茲感激發長喙。蘭芷葦蕒各自媚。青松何用指明心。紈扇誰能不捐棄。或謂先生太狷潔。柳下爲工首陽拙。逝梁聞語不過門。豈獨谷風傷斷絕。先生聞言深自訟。懷刺何期漫滅送。剝啄良久主人出。坐深還覺談鋒縱。行行欲去更彳亍。白日欲沒儻從促。援而止之具餐飯。蕪菁一盂飯脫粟。杜陵老衲癡且頑。欣然一飽無慚顏。童子旁睨眦數裂。饑死猶當深閉關。笑謝童子汝豈識。君子愛人惟以德。雞骨傷心食稻甘。彼疏宜稱藥粿棘。前堂尊俎列千盤。牆壁簇錦絲管繁。坐中上客發清歡。迭起爲壽與闌珊。上客幾時嗟未遇。望塵僕拜猶含怒。主人豈乏雕胡炊。今日新歡他日故。童子微喙先生旨。數日掃迹良有以。自到但覺田文賢。飾詐寧代孫弘恥。已焉哉。歸去速。杜甫長鑱深自劬。龐公妻子呼作粥。蘇李河梁嗟異域。仲尼去魯眞爲肉。

無他技堂
遺稿十六

讀心史偶題其後

四首
錄三

萬古共彝倫。肩承仗一身。填膺惟恨事。開眼盡仇人。歲月因循老。河山涕淚新。敷天甘左祖。之子獨含辛。

已信天難問。何辭拙與愚。同羣憐匪兇。識字媿爲儒。堯舜空焉聖。巢由亦豈徒。所求惟一是。精衛諒非

汪。先生云。堯舜雖聖非吾君也。有一是居士傳。

吞聲無可說。淚迸自淫淫。易朽千年骨。難灰一寸心。黃泉埋積憤。白日照孤吟。止畢生平事。寧論稱到

今。先生云。骨縱已成土。心終不肯灰。履善先生云。妾無他技堂。孀生何益。男兒死未休。以知一死原。不了丈夫事也。遺稿十六

方文 方 文 龕山集十二卷續集四卷再續集五卷

方文。字爾止。號龕山。桐城人。入清。棄諸生。自題其像云。山人一耒字明農。別號淮西又忍冬。年少才如不羈馬。老來心似後凋松。藏身自合醫兼卜。溷世誰知魚與龍。課板藥囊君莫笑。賦詩行酒尚從容。可抵一篇自傳。遨遊四方。康熙八年。客死無錫。或云入鄂道卒。年五十八。所著龕山集。爲崇禎九年丙子至順治十三年丙申之詩。曰續集四卷。亦曰四游草。四游者。北游。徐杭游。魯游。西江游。爲順治十四年丁酉至康熙元年壬寅之詩。曰再續集五卷。爲康熙元年壬寅至八年己酉之詩。文明季卽以工詩著。錢謙益爲序其集。後與孫枝蔚姚佺合刻爲三家詩。三人詩格略相近。皆由香山以窺杜陵。王士禛既賞其烏衣

巷口多芳草。明日重過是早春。以爲名句。又譏其流爲俚鄙淺俗。如所謂打油釘鉸者。唯陳維松字字精工費剪裁。篇篇陶冶極悲哀之句。爲能得文真際。蓋專撫汪水雲。真情實事。皆見詩中。不煩自注。且有深識。如燕京竹枝詞云。雄心盡向蛾眉老。爭肯捐軀入戰場。獨能窺八旗勁旅已衰。後來平三藩之亂。卒賴張勇趙良棟之力。使中國有人。恢復之事。當非甚難。以此知文非忘世者也。其他篇章。時作深語。禁書書目。只禁續集。而不知前集牴觸尤多。文有抱鴛圖。遍徵題詠。蓋聞人金鴛。爲豪宗奪田所毆。墮胎而死。鴛者冤也。不能報冤。而報之以圖詠。海宇鼎沸之際。似此橫逆。當復不少。世間正有茶苦耳。錢秉鑑年譜。頗詆文與阮大鍼交好。秀才爭是非。似不足據。

都下竹枝詞

十謁朱門九不逢。所期杯酒話情悰。無端醞會俱裁革。四字紅單密密封。四字者來日候光也

投認師生法不輕。其初只爲杜逢迎。因而場屋真知己。懷刺無他止姓名。

新法迷人律最嚴。如何逃者轉多添。一家容隱九家坐。初次鞭笞二次黥。

牛車無數塞天街。俱是兵兒運草柴。科道相逢誰敢喝。欠身立馬任擠排。

詞林相見首言貧。欲結穹廬未有因。借債先尋保債者。無如戶部點差人。

自昔旃裘與酪漿。而今嚼茗又焚香。雄心盡向蛾眉老。爭肯捐軀入戰場。

滿粧羣婢概無夫。鍼線傭工立路隅。每日百錢持送主。無錢罰餓使樵蘇。

老婦樵蘇力已衰。日尋牛馬糞盈箕。晚來頭戴箕歸舍。小雨濛濛萬淚垂。
故老田居好是閒。無端薦起列鴛班。一朝謫去上陽堡。始悔從前躁出山。金山續集一

大水歎

癸卯九月中。大水來江右。陪京當末流。汎濫如海口。既漲入石城。秦淮乃淵藪。更穿金陵闢。直至我門首。牆垣悉已頽。畦蔬復何有。羣樹淹且死。不死惟楊柳。始猶犯堦庭。漸乃逼戶牖。牀闔不自保。何論井與臼。幸有兩小樓。可以容我婦。盡室徙其上。譬如升培塿。俯觀鄰舍人。負戴東西走。江南多水田。淪沒已八九。眼見今冬荒。無處求升斗。餛粥且艱辛。安望得杯酒。臨觴忽不豫。嗟歎爲之久。金山再續集一

南潯歎

南潯一邨當一縣。財貨雲屯商賈便。中間鉅富者誰子。擁貲百萬人所羨。百萬金錢是禍胎。片時飛滅如浮埃。匹夫無罪懷璧罪。盡室誅夷亦可哀。金山再續集二

錢秉鐙藏山閣集二十卷

錢秉鐙。字飲光。粵歸後。更名澄之。號田間。桐城人。早入社盟。有名諸生間。以留都防亂揭幾爲馬阮所中。南都破。與錢棟起兵震澤。不克。乃入閩。其師大學士黃道周疏薦之。由貢生考授漳州府推官。福京破。入粵授禮部儀制司主事。考授翰林院庶吉士。知制誥。數言事。頗與五虎通聲氣。廣州桂林相繼陷。

崎嶇兵間。順治八年間道歸鄉里。自後南北謀食。不廢問學。然無意于世事矣。卒于康熙三十二年。年八十二。事具清史列傳儒林傳。所著書刻行者。田間易學十二卷。田間詩學十二卷。莊屈合詁一卷。田間詩集三十卷。田間文集二十八卷。未刻者曰藏山閣集。爲過江集二卷。生還集七卷。行朝集三卷。失路吟一卷。行脚詩一卷。文六卷。起崇禎十一年。迄順治九年。生還行脚二集。曾刊行。後以滄桑間事。與時抵觸。遂皆祕之不出。秉鐙頗負文名。詩文有法。吐辭駿快可喜。尤善論事。四十以後與海內名流酬酢。輩行日尊。篇翰益富。然徵考舊事。則不如藏山。秉鐙自貴其文。意在庀史。署年月唯謹。有皖髯紀略及鞞絕篇。錢與左阮世爲昏姻。左阮成仇。而秉鐙親于左氏。故與大鉞交惡。述其降清事甚醜。明史因之。馬阮衆惡所歸。降清可以意揣得之。然實無確證。不能遽作定論。他所撰所知錄。亦多傳聞未審之言。知紀事之作。爲最難矣。

三吳兵起紀事答友人問

昔迎戎帥至。兵驕馬亦疲。三吳望風附。弓矢棄不持。劉生名履丁。閩人。總戎客。陳洪船插使清旗。泊船秀水上。奔競人恐遲。劉生不肯仕。心識髮且披。雍髮令朝下。相顧爲髮悲。三吳同時沸。紛紛起義師。爭言舟楫利。長技不得施。劉生奔武水。父子就誅夷。陳梧蜀人錢塘至。旋登嘉禾陴。頗聞黃鎮南。將軍名駐舟太湖湄。樓船號萬艘。勝兵焉可知。吳興饋軍糧。晝夜相追隨。壯士爭激烈。富室願獨贖。姑蘇城門外。匹馬不敢窺。可憐陸太學。陳墓陸士倫同戴之僑始事破產供軍炊。七月入姑蘇。搏戰還同嬉。此輩本烏合。一潰豈復支。賴有吳

職方。名稍能出計奇。伏甲吳江岸。所忌惟在茲。諸將無鬪志。同舟自相疑。日費千黃金。空養搖尾兒。嘉禾一夜破。嵩江累卵危。乞師鎮南壘。搖手不可爲。如何十萬兵。曾無一矢遺。括餉旣以飽。海口潛奔馳。海口窄不出。鐵騎追及之。可憐熊虎姿。盡爲魚腹死。三吳遍焚戮。試問戎首誰。藏山閣 集三

沙邊老人行

母聲求子妻求夫。雨中藉藉走且呼。沙邊老人叩頭訴。言是四營兵過城東隅。四營萑苻小盜賊。竄伏谿峒逃天誅。自下黃紙招降詔。召集鄉里千百俱。昔掠村野不近郭。今移全營逼通都。又聞受撫不受約。白晝帶刀街頭趨。街頭公然掠小兒。劫奪不與盜賊殊。滿郊耕牛脯作飯。官家秋來寧獨租。往時交戰被我俘。今名激叛罹罪辜。梅林截渡不放过。空廬遭毀人遭屠。誰爲朝廷畫此策。云欲招拊收兩湖。此輩小醜何足戰。徒虐鄉里榮其軀。老人不必涕交鬚。綠林青犢古來用。功成不擾理所無。爾不聞詔書久懸晉賢爵。乘輿早晚蹕洪都。爾訴所病何區區。藏山閣 集四

留髮生

新城有書生。不肯離髮。囚之。令其自擇。死與髮離善。詰朝謂曰。寧死不願髮。遂斬之。

黎城外癡男子。誓斷此頭髮不毀。一夜囹圄千載心。明朝裹幘赴西市。藏山閣 集八

許楚青巖集十二卷

許楚。字芳城。號旅亭。後得鍾山青山巖硯石。因以爲號。不忘舊也。新安人。明諸生。入清後棄去。隱于

黃山以終。年七十二。著有明遺民詩文。新安外史。汪洪度爲之傳。謂楚有攬轡澄清之志。數往來吳越燕趙間。以詩文結交高人奇士。坐鄱陽棗。執訊皖城。過大楓嶺題詩。有四海知張儉。千秋憶孔褒。巡撫李棲鳳義而釋之。貳臣傳洪承疇傳。朱由棧冒稱金華王。據饒州。順治三年。禽朱由棧。及其族人朱常洵。朱常泚。朱常涖。于饒州鄱陽。楚牽連受累。當卽此事。棲鳳順治三年十月撫院。四年九月降調。楚坐事當在此時。又謂楚喪明後。居寢繭室中十餘年始卒。集中失子喪明。約在戊申。康熙七年梅清天延閣後集。丙辰有弔許青巖詩云。黃岳秋聲急。驚聞失子將。然則卒年當在康熙十五年丙辰之秋矣。撰青巖集十二卷。詩六卷。其孫象縉刻于辛卯。康熙十年文六卷刻于乙未。康熙十四年其詩聲情激楚。託跡幽竊。幾與謝翱蹄髮同其悲憤。文有法度。多表章忠義之作。下筆可謂不苟。楚少以白社與張溥復社相呼應。輩行甚尊。晚以詩文與湯燕生黃周星林古度杜燮沈壽民諸人唱酬。皆遺老也。若周亮工龔鼎孳施閏章輩。文采官位。足以奔走一時。特閒與燕游而已。不藉其餘蔭。人品甚峻。明詩綜明詩紀事俱未采其詩。蓋行世甚晚。楚能書畫。皆見集中。世亦無知者。

六月六日無書可晒有感於里門之焚掠也

此日幸無事。荒苔照草堂。晒書慚郝腹。儲谷遜王倉。久病聚詩債。慳錢檢藥方。一棍殊免俗。狂語見清

涼。青巖詩集二

閱常山志感賦

萬戶凋傷戰伐餘。登豐舊里盡丘墟。浮空石爛思遺履。清獻巖深蹇著書。瘦馬半飡鄰縣草。哀鴻常擁令君車。靈符縱革南山虎。澤竭誰援泣釜魚。青巖詩 集六

娘船歌

三衢上通閩廣。灘港淺隘。土人操小舟爲業。足當肩輿。以運百物。登聚巨艘。名曰娘船。娘船者。乾公善難家。長子孫。操舟婦志願俱畢于此。

記儂十年前。跟郎在水邊。不憐儂命薄。翻嫌儂少年。少年亦何益。費盡灘頭力。終日坐娘船。與郎共安逸。青巖詩 集六

吳肅公街南文集二十卷續集七卷律陶一卷

吳肅公。字雨若。號晴巖。一號逸鴻。宣城人。諸生。入清不事進取。賣字行醫兼授徒自給。自題其像云。翩翩者五十年韋布之身。峨峨者三百年方角之巾。預作墓誌云。幅衣皂帽。衣袂軒舉。宋遺民四先生林鸞山鄭所南謝昂羽梁陸吉詩序云。宋之天下亡于蒙古。而人心不與之俱亡。可以知其所志矣。善病多廢疾。目眇。臂攣。疝痔鼻淵。晚而喘咳足痿。而著述勤劬不肯休。卒于己卯。康熙三十八年七十四。事具自撰街南遺老吳晴巖暨配麻氏合葬墓誌銘。有明誠錄。正王或問。大學述。五行問。易問。讀書論世。葬惑論。皇明通識。皆未刻。刻行者街南文集二十卷。續集七卷。附讀禮問三卷。律陶一卷。李清爲之序。稱其文探源經術。貫穿古今。所表章非理學之微。卽綱常之大。王方岐稱與古人參會于芒忽之間。而亦未嘗步趨繩尺。求肖乎

古人。肅公自作東渚詩文集序云。吾所從事者沈姑山師。予叔父季野兩人。他所知若南州王于一。餘姚黃太沖。吳門徐昭法。雲間蔣太鴻。寧都彭躬菴魏凝叔。四明李杲堂。而不及呂留良。晚村文集有兩與吳晴巖書。蓋肅公嘗以正王或問示之。而不肯尊朱。故留良苦相詰難。此集亦有與留良書。或因此參差。遂致絕交耳。文不苟作。同時唯顧炎武能之。志節之士賴其文以傳者。初集有臨江公傳。吳宗周五人傳。張大夫傳。星姜前山傳。明給事中萊陽貞毅姜公墓誌銘。塚吳懋修先生墓誌銘。明庠生傳日章先生墓誌銘。明義士文臺吳公墓表。期二集有參議沈公傳。龍太僕寺卿十洲麻公傳。溶明大司寇華陽徐公傳。元左副都御史魯泉唐公傳。沂按察使惠菴唐公傳。汝沈大將軍傳。有留守都司沈公傳。壽金文毅公傳。聲沈貞文先生傳。壽湯巖夫先生傳。燕俱可補正史志。先考二耕府君行狀。煥字云。歲丁酉。順治十前太史楊公昌祚。孝廉湯君纘禹。坐前吏部李公之春事被收。與陸心逸先生七十壽序所云。昔亥子之交。順治三波四涌。而搏而躍之餘波濺人。諸搢紳先生爲魚爲雉。不鋒鑿鑿沸乎。湯君謨先生之難。先生經紀其覆巢。軫卹其遺卵于沸鑊烈燼之中。而不虞池魚林之及。均足見當時危疑震撼之情。人皆不自意獲全。其不得免者。率不見紀載。偶或一見若此者。又無他書爲之互證。可慨也。生妣麻孺人行狀云。當是時法嚴甚。動註誤。坦夷滅。己亥。順治十海亂。邑人多附者。戒肅公等無一步涉郡城。已而附者罹大禍。或蜚語中肅公。卒不得聞。嘗勸肅公等潛身立德。宜學姑山先生。汝舅非爾等所當學。汝舅指麻三衡。起兵死事甚烈。黃宗羲爲之志墓。叔父季野先生墓志。桐字季野。號夢華子。著夢華遺集二卷及準言。云。嫉明史蕪陋。與肅公仿涑水氏輯編年

一書未成。以手錄數冊相授。屹屹三十年。幸幾于成。錄爲百有二卷。初名通志。更名通識。光緒中江標藏皇明通識百有二卷。卽炯與肅公所撰。其書當有可觀。江去今未遠。不知尙可蹤迹否。他文若正氣卷冊序。余生悲哉卷冊序。送姜伯子瘞父繼遷母親序。江文石先生集序。梅聖占兄七十序。書大司農鄭公焚餘草後。姑山草堂圖記。東渚草堂記。皆有關係。詩僅和陶二十五首。集中有詩集自序云。詩喜杜韓。自乙酉順治二年迄今五十年。有鐵函懸壺遷灘吳江諸集。合而名之曰街南詩集。唯壬辰順治十年至丙午康熙五年十五年之詩稿佚。然則非未編集。又嘗自舉其詩。白雲高枕共。黃獨荷鋤艱。腸枯肥自勝。泣盡笑成魔。非不苦吟。而不肯傳者。則于雪坪詩序言之。謂于詩不工。歲不下二三十首。然雅不欲以詩著。又漫遠時好。愁苦隋特之音。如啼猿寒鳥。付之荒濱衰草宜耳。蓋自貴其文。期必傳世。詩非其至者。固莫如善藏矣。明語林十二卷。闡義十二卷。俱有刻本。

感懷七首

袁安困積雪。仲蔚愛窮居。斯濫豈彼志。屢空常晏如。但餘平生物。歷覽千載書。謬得固窮節。人乖運見疎。

少無適俗韻。游好在六經。忽值山河改。遂與塵事冥。新葵鬱北牖。荒草沒前庭。自我抱茲獨。是非苟相形。

詩書敦夙好。欲視眼無光。余目昏素抱深可惜。代耕本非望。逍遙自閑止。寒餒常糟糠。人事固以拙。遙遙

春夜長。

瞻望邈難逮。聊爲農畝民。四時自成歲。六籍無一親。洙泗輟微響。市朝悽萬人。良才不隱世。空負頭上巾。

開荒南野際。得失不復知。起晚眠常早。蘭枯柳亦衰。既耕亦已種。言詠遂賦詩。弱子戲我側。情隨風代遺。

京華去我久。所樂非窮通。桑竹垂餘蔭。山河滿目中。數斟已復醉。賦詩頗能工。結廬在人境。何必升華嵩。

開歲倏五十。吾生夢幻間。重雲閉白日。斗酒散襟顏。一宅無遺宇。悠然見南山。此中有真意。千載事相關。陶律

方中通 陪集十一卷續陪四卷

方中通。字位白。號陪翁。桐城人。父以智。字密之。號能博綜。撰通雅五十二卷。物理小識十二卷。藥地炮莊九卷。三子分傳其學。長中德。字田北。撰古事比五十三卷。季中履。字素北。撰古今釋疑十八卷。中通其仲子也。嘗從西洋人穆尼閣布算。又問學于湯若望。熟讀利瑪竇之書。通曆算之學。與湯聖弘薛鳳祚游藝揭暄丘維屏梅文鼎爲友。撰數度衍二十四卷。附錄一卷。別刻陪集以載詩文。迄康熙二十九年

庚午。曰陪古三卷。陪詩七卷。陪詞一卷。後七年丁丑。又刻續陪四卷。則詩文不分。方氏一門。文采甚盛。孔炤有寰中堂詩文集。以智有浮山集。以智弟其義有時術堂集。故中通亦能文章。不重修飾。而才氣洋溢。聲情并茂。少歷患難。深自隱匿。多作達語。如信筆云。繩牀夢醒一窗明。三里村莊十里城。不是深山人在望。人間無迹世無名。然故國之思。時時流露。如贈高固齋云。幸有新亭當日淚。爲君留得到而今。南畝云。堪笑水流聲激切。朝朝向石訴衷情。贈劉鼇石云。休道世間難著足。中原今日總他鄉。激楚淒涼。同于變徵。何其悲也。以智晚年住持廬陵縣河南十里青原山。康熙十年辛亥。以事被累入粵。卒于道中。唯見黎士弘託素齋文集三。跋無可大師手卷。及仁恕堂筆記。今讀此集陪詩卷四爲惶恐集。紀其事甚詳。惶恐者以智卒于萬安舟中。卽文山集之惶恐灘也。中通亦在桐城就逮。事歷二年。經皖贛粵三省。賴周亮工營救得白。又以他事坐繫獲釋。究爲何事。一字未及。然不波及伯季。獨中通兩受其禍。當由別有牽連。未必僅以少曾披剝。待青原三載之故矣。

與西洋湯道未先生論曆法

案湯若望字道未

千年逢午會。百道盡文明。依邵子元會運世推算。正逢午會。萬法當明。漢法推平子。唐僧重一行。先生崇禎時。已入中國。所刊曆法。故名崇禎曆書。與家君交最善。家君亦精天學。出世後。絕口不談。

有書何異域。好學總同情。因感先生意。中懷日夕傾。予所得穆先生火星陪集法最捷。故相質論。詩二

題結粵難文至感泣書此

君不見。一門爭死稱孔氏。弟兄子母垂青史。又不見。西川豪傑附黨人。恥不與黨先自陳。彼爲友朋尙如

此。何況儼然爲人子。吉玃虞顛本同心。同此一片赤心耳。回憶難作捐我軀。不料此軀存斯須。兩年繫獄再繫閣。今日尙存豈非天地之恩乎。不畏死。血滿紙。痛哭陳情詳院司。代父直心直如矢。悲號呼蒼天。聞者俱生憐。憐我不肯脫羅網。委曲導我真纏綿。嗟哉吳道郭境原奇特。黃金百萬買不得。非是不遵宛轉之殷情。乃深痛吾老親之不測。鐵錘錚。寶刀鳴。同父死。同父生。不敢重身輕白髮。寧甘得罪粉吾骨。豈意使君感此言。竟將我詞直達粵。粵督疏上春風吹。賤子之名朝廷知。嗚乎痛哉粵難白。魂招不來哀孤兒。陪集詩四

木蘭女廟

晉木蘭本魏氏處子。代父從軍。歷年一紀。凱還。天子嘉其功。除尙書不受。懸券歸省。及家釋戎服。衣其舊裳。同行者駭之。以事聞。召復赴闕。欲納爵賞。迫之不從。遂自盡。追贈將軍。諡孝烈。廟存商丘棠鄉集。

沙場一望即沾巾。腸斷從戎逐塞塵。堪笑黃河無禁卒。遂令紅粉作邊臣。生前反盡男兒事。死後纔完女子身。豈是未央宮不貴。只愁嫁與薄情人。陪集詩五

論交篇贈修儼若

交道誠難論。何況在今日。變幻態無窮。險巇情不一。張耳陳餘少相知。安知凶終機在刎頸時。孫臏龐涓不同學。安得復有黥刑之慘。馬陵之悲。茫茫天地一開眼。古今人情若印板。愈厚愈薄愈密愈益疎。四海九州之人如同產。噫嘻膚上毛。欲割便揮刀。區區膠投漆。何得久堅牢。又如相依復相戀。幸舍代舍遷不倦。今朝武安坐上逢。昨夜魏其門下見。較輕量重只爭毫髮間。趨舍何必死生與貴賤。况復丹雞白犬盡要盟。戴笠乘車揖不成。嘗疑信陵車騎枉過徒史筆。當時似無朱亥無侯生。忽然一遇修公子。使我狂論

都非是。已曾讀盡人間未見書。更欲友盡天下知名士。吐詞出語神鬼驚。不蹈前人一字杼軸憑空行。此自絕世才人事。我姑不論論交情。憶昔患難傾門戶。不肖捐軀繫圍土。舉幡不知苦。思親淚如雨。近不得慰我堂上傷心之老母。遠不得代我世外奮身之老父。何幸公子尊人作臬司。感余熱血憐余癡。公子從旁更慇懃。初不知余面是誰。不必知余面。知余心。一片據我陳情詳撫軍。三省羽書急如箭。粵西題請請再三。江右釋父。江左釋男。可憐我父生前受名累。身後患難尤難堪。又賴修公詳上力。破巢瓦全餘喘息。以此朝朝暮暮將君憶。直至十有三年始相識。雖然未識君時早識君。識君肝腸雪和意氣雲。去年壽我白髮詩真切。今年招我青油書懇勸。自愧感君報君無寸分。爲寫一篇聊云云。何用金石交。何用金蘭簿。何用硯席同。何用柳池聚。握手下拜起歡言。不作友朋作弟舅。如此交情那可論。如此交情始可論。時集詩七

陳舜英 文閣詩選一卷

陳舜英。字玉佩。溧陽人。名夏第三女。適方中通。在順治八年。撰文閣詩選一卷。有中通姊方御序。清言娓娓。如敘家常。不作議論。才女也。舜英詩亦超脫。唯觸事興悲。蓋境遇使然。附其女如環如璧和章。婉約可誦。方氏閩門多富文采。方孟式妹維儀有清芬閣集七卷。方孔炤妻吳令儀有緘佩居遺稿一卷。最有名。

聞亂

烽火傳來急。風生滿目塵。何方爲樂土。此地慰慈親。患難尋常事。艱危疾病身。長安消息遠。愁殺未歸人。

文閣
詩選

粵難作夫子被羈

世外猶遭難。人間敢惜生。便捐男子血。成就老親名。君指天爲誓。余懷刃是盟。一家知莫保。不用哭啼

文閣
詩選

吳銘道 古雪山民詩後八卷

吳銘道。字復古。貴池人。祖應箕。復社有重名。嘗草留都防亂揭。以斥阮大鍼。南都破。起兵鄉里。以響應徽州金聲。事敗。遇難于石灰沖。死事甚烈。父孟堅。字子班。不務進取。以高逸終。銘道嘗手鐫墓碑以葬其祖。守先世遺誠。負經世之略。而終老布衣。撰古雪山民詩後八卷。爲康熙五十五年。至乾隆三年之詩。其年六十八矣。詩學韓愈盧仝。幽深險怪。不肯下一平易語。多紀事之作。激辭憤語。時時流露于字裏行間。絕句五首。作于庚子。康熙五十九年者。其二云。輓俗軍難繼。窮邊盡勸耕。祇愁諸使者。不是趙營平。其四云。海已無遺利。山疑有閉藏。堪師管子法。冠蓋道相望。已極刺譏。後一年。又有絕句九首。其一云。蜀大衡斤一石強。飛龍于野戰玄黃。連漕掣去青天上。不與官家費斗量。其七云。黃河一綫下崑崙。有力旋乾與乾坤。辛苦宜房漢武帝。虛沈璧馬榷淇園。語尤無忌。使有人告發。族矣。詩中自注。多關應箕之事。先公

遺跡八首。溝汀云。谷潭僧體中。及其二徒。諸將王維則劉公弼胡仲麟。義從李三胡三余兆力戰歿。吳參玄舒四則先後戰死山口云。去池州三十里。卽石灰冲。五義士冢。注云。大演抗張家埭姓名逸。記其一曰胡均甫。乙酉弘光元年之變序云。祁門許公子帥五。散家財。糾集義健。自爲一隊。奔涉大洪嶺。聞道効命池歛兩營之間。事既覆。慟忿以死。往余過其雙溪故里。思撫遺事。爲作小傳。而故老已盡。無所咨訪。茲登嶺上。追唱昔年。異軍蒼頭。經由赴難。幸其姓字尙存于正希先生與先公手書中。因賦詩紀之。其名雖逸。其人不忍沒也。溧陽感舊云。先生難後。百史先生保全甚至。心簡釋戎歸旗。余嘗相聚琉璃廠所居。其子雲和令扶櫬歸葬。案心簡爲陳名夏子掖臣。過相公墩先公嘗讀書處志感云。時呂黃書獄爰書內波及先祖集名。山賓族祖與焉。余以部檄赴郡對案結正。案此詩作于雍正元年。所謂呂黃書獄。不識何時何事。而樓山集幾及禁網。于此可證。其他謂方以智孫景遷。今易姓張。據桐舊集方正璆字序左。號五峯。陪翁之子。族難時。從外家改姓陳。所刊詩文集皆然。今逾三代矣。案家難卽以智被逮瘐死事。當時叛案。成年者皆斬。故更姓名以冀苟免。景蓮名正璆。中通之姪。中通五子。無名正璆者。或後來改名。銘道不識何故屢客嘉興。故與禾中人士至稔。酬唱獨多。其前集未見。

巢端明匏杯二首

巢名鳴盛。嘉興人。崇禎丙子孝廉。名注防亂公揭。國變後。種匏製杯杓。絕跡城市。蓋人與物兩高也。

一瓢今可資。五石知何補。持歸洗耳泉。悠然見巢父。

種處聖之清。製成人已古。孝廉非麴生。風味吾思睹。古雪山民詩後一

景德鎮

雨過天青翠欲流。不須大邑向人求。出新柴汝官哥後。玉色郎審仿定州。古雲山民
詩後二

集梁質人旅館己亥

徧十三陵與孝陵。麻糝深雪裂行旛。家無一飽枯魚計。人笑長年匹馬登。故迹黃雲橫紫塞。重來白髮對青燈。和歌我亦荆高侶。變盡形容似老僧。古雲山民
詩後二

月夜聞打蕨聲二首辛丑

凶歲罹陽九。不蒙天所赦。誅求徧草木。赭山作耕稼。踏地非首陽。監河粟難假。維蕨性甘寒。與葛爲匹亞。採斲束其根。肩頸頰若炙。饑腹不及朝。帶月搗深夜。久食令中虛。力弱愁奔跨。聊緩死須臾。二麥悠悠夏。得見牛尾焦。庶與繫脚謝。中宵聞此聲。不寐行邊舍。應知相杵人。淚迸數行下。慘甚秋夕礪。夢魂驚亦怕。何時值歲豐。黃金土同價。年年議平糶。常平迺虛話。堪此誓蒼羣。欲罷不能罷。

邨邨雷動礪臨水。夜夜青裙織手洗。弭饑託此以爲命。官遠何曾聞入耳。十年道殣三見之。剝屑山膚充耒耜。春風萌芽不敢生。勢將崩塌山乃止。曉與雞晨暮猿夕。氣雖未索神先死。誰猶摩腹修飽餐。驚嚇烏攫恣爪觜。且夕人幾萬鬼鄰。枯骨焉知吹有髓。腐心蝨蠹飲恨多。糠覈幾何不羣豕。我窮賦分茹藜藿。百草穰鹽齒甘美。桑楮孕雞鐻解龍。碎點青蒿烹枸杞。舊日兒拳戴土處。陳根蘆粉溪春裏。以茲剛腸饑不舒。輟筯何心更染指。安得炊沙盡成飯。徧令果然色皆起。却笑瓶中亦漸虛。空言奚解鼻之恥。舉家

食粥憶魯公。忍饑看書愁乞米。古雲山民 詩後三

金陵傷余鴻客二首實王

衰遲偷息倦遊身。嫚罵天真孰寫真。萬竹有鄰青未殺。蓋棺仍是露棺人。

香輦輕塵走白頭。諸公高會集詩流。燕山夜雪長椿寺。彈指星移二十秋。古雲山民 詩後四

吳越大旱用蘇子美韻卯

火龍騎日飛。流毒滿天赤。地上焦枯形。目蒿心更棘。豈惟田裂龜。勢恐人盡腊。連年遭旱虐。比戶無蓄積。所藉布與絲。抱買久罷織。東南財賦重。征斂困已劇。如病氣莫蘇。如奔喘難息。將使命索然。尙望寬餘力。奈何炎官威。酷奪白帝職。盡入洪爐熬。戢戢莫可識。焚澤原已空。探湯海亦窄。卽令有人民。何以資粒食。天耳不下通。高呼聽全逆。計難殺老賊。烈甚趙盾日。怨懟氣不舒。貫索囚霹靂。挽路斷舟航。祈壇疲社稷。吳越舊水鄉。秋瀾艱寸碧。一方今若此。萬里愁失色。誰無憂世心。而不抱慘戚。利少弘羊多。

私淚苦沾臚。古雲山民 詩後五

海盜甲辰

海墘民居繁。牀脚下穿溜。甌脫不留餘。斥鹵盡耕耨。安恬近百年。人烟愈輻輳。鹽賦叢奸私。擅花爭販買。力欲揚其塵。冀致陶朱富。木石曾幾何。孟浪學鳥味。方同燕處堂。亦比鹿在囿。一朝颺毋威。怒挾天吳吼。勢甚孫恩悍。倒山驅入寇。重使錢鏐生。萬弩不敢關。侵疆既已深。受禍抑何驟。赤子今其魚。神禹

不能救。舟山至狼五。橫流恣躡蹂。鹽烟全滅青。桑田頓非舊。估舶百尺帆。沒影逐雌鸞。金隄若金城。摧折等麻漚。喧騰搖郭郭。邑屋半顛仆。水仙戲人民。掣去無老幼。不知徐福洲。遺種幾何漏。黃耇聞之悲。此災生未覩。同在幅員中。昏霾獨無晝。東南海一隅。微命少全有。肇居本飄搖。積習久狎狃。豈知無根萍。元自陽侯傲。戢戢水中魂。齋冤赴川后。爬沙脫殘喘。絕望一塵受。水濱問流離。暴露如困獸。枯蒲濕東腰。狼籍骸枕首。滿眼魚鱉區。海若酷窮宙。土崩患莫掉。捧土但塞竇。洶洶無逃門。岌岌唯忍又。餘波積苦鹹。一飲三數嘔。清流變蓮勺。忍渴困搔垢。雖非木偶漂。已逐海夫臭。天乎幸生全。斯民實勞疚。陸地風波多。吾其長僂僂。古雪山民詩後六

私鹽

辰甲

斤量銖算一些些。餒婦饑嬰亦可嗟。等是官贖聚官水。道傍勒指作私蛙。古雪山民詩後六

祀田祖

稻稻楮焚榆麩香。豚蹄魚雉菽截肪。野田奔趨壺與篋。增增坎坎祈豐穰。拜祀土穀神主張。今年積雨屠我秧。願神送雨還龍王。佑我福我多稻梁。樂我婦子百物償。迎神送神聲低昂。鴉鶯鵲亂喧正忙。草妖木魅鬼伯猖。亦思僭竊叨脯漿。忽然震電奔雷破。月離畢矣雨帝狂。良禾高下連洲漲。羲和日馭影遁藏。歲奚爲乎祠東皇。生民樹藝尸諸汪。庶蠱肆虐紛災殃。食苗節蠶抽無芒。食苗葉或藟作囊。食苗心螟苗剝

腸。食苗根蠹凶莫禳。理難捲土昇炎揚。田功腐穢登無場。遺秉如實殺粟霜。蒿目流毒心憂傷。朝不能饘
況逋糧。翳桑餓孳道相望。天高何訴逃何方。古雪山民
詩後七

清詩紀事初編卷二

前編下

孫奇逢 夏峯先生集十六卷

孫奇逢。字啓泰。號鍾元。學者稱夏峯先生。容城人。萬曆二十八年舉人。少與鹿善繼同究性命之旨。兼宗新安陽明。負經世之略。與左光斗魏大中周順昌論交。楊漣亦在同聲之列。皆東林正人。值魏忠賢亂政。逮六君子下獄追賊。光斗大中順昌依倚奇逢與善繼之父正及張果中。欲賴之以自救。奇逢語光斗曰。主張須早定。蓋知忠賢必欲死之。密書致督師孫承宗清君側。承宗不能用。乃爲光斗諸人募金姑完贖以緩死。及死。復爲之歸葬。義聲著于遐邇。茅元儀爲賦范陽三烈士行。奇逢知大難將作。謀練鄉勇。以保鄉里。孫承宗范景文以其知兵。皆欲薦爲贊畫軍務。奇逢自以無其才無其志辭之。崇禎九年。滿洲兵入畿輔。所過無完城。獨奇逢堅守容城不下。後乃移家五公山雙峯。門人戚友從之者數百家。一以軍法部勒。干戈搶攘。不廢弦歌。其才實足應變。楊左之難。客氏弟光先。以挽救自任。光斗不欲。奇逢則曰聽之而已。李自成破北京。奇逢避迹新安水鄉。頗苦抄掠。忽發一檄。嚴禁把棍擄掠。列款多端。署名大順。衆遂以戢。事後始知奇逢命仲子奕雅所爲。知世事不足有爲。早謝公車。先後十辭朝命。自成召赴都

選官。亦婉辭不就。改革之際。名聞宇內。識與不識。皆曰徵君。順治六年。近畿圍地。其田在圍中。乃留長子立雅守冢。攜家渡河。止於蘇門百泉。姚樞許衡講學之地。得馬光裕贈田廬。率子弟躬耕。門人來者。亦授田使耕。以共有無。均勞逸。郡縣歲時以禮存問。率受粟反帛。從學者衆。戴明說湯斌耿介皆通籍後始來問業。海內學人。莫不嚮往。一時公卿大夫。慕其聲名。遙相引重。魏裔介以至箕子擬之。然甲申大難錄之獄。幾於不免。初奇逢撰是錄。刻於濟寧。康熙初元。方殿野史之禁。錄內有野史氏曰。爲人首告。八十老翁。赴都就質。賴高似斗之力。中途得免。語人曰。幸不罹於法網。實出望外。從此當閉戶休省。默之一字。原聖人微妙處。其默足以容。此是何等功力。何等境地。願與諸同人精思而實體之。又曰。吾始自分與楊左諸賢同命。及涉亂離。可以犯死者數矣。而終不恙。是以學貴知命而不惑也。以是知其有養。亦知其艱危。人望所推。安能免於疑忌。沒未半年。子韻雅因事論斬。雖不悉何事。而與叛案有連。蓋可必矣。奇逢卒於康熙十四年。年九十二。事具清史列傳儒林傳上。著理學宗傳二十四卷。四書近指二十卷。四禮酌一卷。答問文集□卷。書經近指□卷。取節錄六卷。孝友堂家乘八卷。別有聖賢大旨。聖學錄。兩大案錄。畿輔中州人物考。甲申大難錄。日譜。所撰詩文。六十以前。有歲寒集三十卷。六十以後。有歲寒堂續集若干卷。有文無詩。康熙三十八年。其孫涇取十之二三。刻爲夏峯先生集十四卷。道光中。錢儀吉重刻爲十六卷。移語錄于編首。別輯補遺二卷。而刪去文之涉于禁忌者。奇逢詩文。不事藻績。而胎息深厚。情意真摯。似南宋人所作。題餓夫墓詩文。至今讀之猶令人鼓舞。乙丙紀事。述周旋左

魏事甚悉。其高陽述聞。守容紀略。掃盥餘話。有關舊聞。俱未見。必爲儀吉所刪。可惜也。

哭鹿伯順

丙子之秋羽騎至。范陽城中風沙異。江干主人居城南。倉皇戚友爭招致。主人素透死生關。欣然出門攬鞭轡。議兵議食議城守。諸事犁然俱就次。無奈主者病日危。有丞貪昧且驕恣。城下羽騎如雲屯。城頭科索愈無忌。一丞失盡塚夫心。空灑江干一掬淚。笳鳴匝城白晝黑。城中男婦屍山積。君思盡節明倫堂。堂扇門閉愁雲出。城隅王氏一荒園。竟作安身立命地。須臾敵至索其衣。君求速死無回避。吁嗟君遂與城

殉。風日黯淡天欲墜。夙昔大義與純忠。慘慘遊魂無衣襪。夏峯先生集十三

九日同止生仁卿集美飲靜修墓下追和九飲歌

一飲君聽第一歌。蕭蕭煙壠轉清和。雙楊聳峙插天半。想見先生遺韻多。
二飲重慶第二歌。乾坤舒卷任婆娑。莫憐當日期功少。翻喜今朝展墓多。
三飲山人笑且歌。晉家處士較誰多。堯天萬古猶容許。滿眼荆榛奈我何。
四飲須歌第四歌。幽人未飲已顏酡。腹鱗唇甲方酣戰。尺水無風自起波。
五飲初喧四座歌。太行徒倚吐青螺。非憑酒力當風力。坐對先生分外和。
六飲相將醉景過。問心不語意如何。平生有志傷搖落。仍欲從頭細撫摩。
七飲人驚飲量多。牢騷忽爾起悲歌。腐儒不識真儒意。橫肆譏彈可奈何。邱瓊山謂渡江賦幸宋之亡

八飲人驚飲量過。百年天地竟如何。好留底本歸桑海。英略雄圖未足多。

九飲蒼崖藉翠裘。羲皇一枕樂如何。椒山曾爲憐同調。愧我樽前漫和歌。夏峰先生集十四

孫望雅得閒人集二卷

孫望雅。字七儼。號臞仙。奇逢第三子。入清棄諸生講學。撰得閒人集二卷。詩自崇禎八年。迄康熙三十一年。年七十五矣。詩不能工。稍傷坦率。然故國之思。隨時流露。貌若閒適。中實悽哽。初讀之或覺膚泛。一再諷誦。則潭潭有味。視流連光景。徒工語言者。頓有文質之判。

弔彭餓夫了凡名之燦 蘇吾人

尙有荒臺在。何言身未歸。骨埋巖石峭。魂逐野雲飛。意豈謀元亮。心寧託丁威。我來憑弔久。閨寂對斜暉。得閒人集下

聞柝聲

不是蜀中地。如何鼓吹懸。窮簷見髓骨。法署問神天。苔響驚庭畔。哀音到枕邊。聲聲更漏切。轉側未成仙。得閒人集下

張鏡心 雲隱堂集四十五卷

張鏡心。字晦臣。號湛虛。河南磁州人。天啓二年進士。官至兵部左侍郎。推薊遼總督。告終養歸。入清未仕。卒于順治十三年。年六十七。事具磁州志人物志。及其子榕端所撰湛虛公事實。撰易經增注四卷。雲隱堂集四十五卷。凡詩集十卷。文集三十五卷。詩專學杜。首有黃道周王鐸阮大鍼秦汧題語。皆盛譽之。甲申^{崇禎十七年}後所作。寄慨尤深。奏議書牘可以參稽時局。籌瓊崖澳門諸議。切實可行。其人實有邊才。足以任事。撫粵四年。頗有建樹。惜乎用之不終也。集刻于康熙六年。詩文有忌諱者。已有闕文。鏡心於北都破後。欲入海避之。至雲臺不能居。乃卜居蕪湖。弘光之立。不與其事。歲餘北歸。力辭謝陞之薦。甚惜羽毛。明史無傳。此集從無稱道及之者。近年其後人始輯其詩六卷刻之。似非全豹。蓋沈寘久矣。

臨江行乙

古沙老棘啼寒鷓。野風颯颯吹霜枝。臨江老人回白首。天涯悵望涕漣漣。去歲勾陳蝕太白。今年戎馬踐江涘。蕩泮戰雲霾日月。瀾漫木霧騰蛟螭。南來萬幕起沙陲。周家九鼎歛欹危。人事已難問。天心未可知。二祖遠過漢唐基。南渡不擬晉宋時。將軍借兵誅寇亂。肅慎之矢射潢池。世上君臣各有族。至微蜂蟻誰能移。可憐千古帝王城。熊羆虎豹相追隨。岸上莽烟燒義骨。行間血吻吞鮮脂。殺戮不遺孤與嫠。東南萬里浮僵屍。奔逐崖谷得不死。身手務割髮披鬚。嗚呼中原禍亂何時了。痛極誰懷陵廟悲。君不見。花

卿長安收官闕。回軍已拔鹵旌旗。

雲隱堂詩集三

七夕前洗車雨大至爲告哀詩

丑

十道軍芻秋並舉。農夫雪泣夜相語。誰憐織兮誰問耕。搔首陰晴盼禾黍。時近七夕號靈辰。焚香祈巧遍閨人。服箱敢望牽牛力。曝日還資造物仁。銀漢高高人共企。雙星熒熒隔秋湫。誰知重恨蹴驚濤。一夜迸裂天河水。天河直瀉下穹霄。天吳跳波屏翳驕。郊原過雨禾如洗。廬舍隨風東西飄。谷者爲陵岸者淤。黑帝肆威民其魚。提兒抱女立滓泥。鴻雁嗷嗷孰安居。四望乾坤黑如漆。經旬風雨悲蕭瑟。茫茫大壑無幽虬。岌岌高天囚白日。我向雙屋作楚音。女郎歡喜民呻吟。河乾寧假鵲橋渡。地陷其如大陸沉。嗟爾女牛奈若何。快心好事不須多。勸君回手挽銀河。星明月白風恬波。一年一渡常相過。人間士女盡歡歌。歲歲

爲君奏雲和。

雲隱堂詩集三

客淚

乙

烟塵不辨舊山河。萬里西風客淚多。天晚不留南雁去。江深時見一龍過。西陵夜灑空山雨。南極春添漲海波。浩蕩五湖何處棹。愁來霜雪滿漁蓑。

雲隱堂詩集六

申澗光 聰山詩選八卷文集三卷荆園小語一卷荆園進語一卷

申澗光。字虜盟。永年人。入清後決計棄諸生入山。格于母命而止。自後屢應試。然貢入太學。則不就。徵

山林隱逸復力辭之。其家誠示舍弟觀仲隨孫詩云。任棠避徵召。蓬居謝州府。太守式里門。薤水置屏戶。終已口不言。美名非所取。朱門曳長裾。譚讌雜纓組。馨折而周旋。無乃自勞苦。理亂非我責。苟得慚市賈。逍遙林木間。清風吹環堵。最足以見其所志。與殷岳張蓋齊名。稱三高。而蓋之詩曰。草澤賢豪盡上書。承光門外卽公車。我甘漁父因衰老。唯有涵光是隱居。轉以此推之。蓋涵光負盛名。王崇簡父子梁清標楊猶龍皆引以爲重。魏裔介賦五子詠。以涵光與魏象樞楊猶龍曹本榮郝浴並列。謂其性情與人遠矣。才學又足以濟之。卒于康熙十六年。年五十九。事具魏裔介撰申胤盟傳。及魏象樞所爲墓志銘。清史列傳儒林傳。所著聰山詩選八卷。文集三卷。荆園小語一卷。荆園進語一卷。論詩謂七子不免依附。鍾譚矯枉過正。近時人人雷同。詩必開元。文必史漢。遂成生吞活剝世界。有明諸大家。大約南人功純氣薄。北人樸簡。而以真山民蘇子瞻薩天錫自出手眼。尙有一段精光。可以知其宗旨所在。然涵光學杜。功力最深。一時作手。無能及之者。特渾厚不爲激楚之音。鄧漢威稱涵光笥中詩甚多。高邁絕倫類。不肯令世人見。此則涵光序張覆輿詩。所謂稍深之語。又難傳佈。然則非無深語。特不肯傳佈而已。文集自定于康熙十三年甲寅。其文深淳有法。自謂膽小才窄。不願寄人籬下。而又不能自闢徑路。與朱彝尊書。言身在草野。復亦無文可作。不能爲史。則無紀載之文。不能上書陳言。則無諫諍之文。杜門兀坐。不復浪游四方。則無山川古迹登眺游覽之文。論古則舊學半忘。不能憶古人姓氏。論今則于分非宜。且亦不知國計生民利弊安在。將爲傳誌之文。則爲人子孫者。多求顯爵以榮親。問及布衣者寡矣。蓋不肯率爾有作。幾同於

顧炎武。集中多傳志。亦有泛愛人之作。則迴旋之道。不可廢也。晚師事孫奇逢。不復措意文字。謂留心性命理學諸書。爲晚年寡過計。非爲講學。荆園小語以教子弟。皆閱歷有得之言。進語則辨及問學修養。語簡而該。不爭門戶。不立異同。是時爲理學者衆矣。而如涵光之樸實者蓋寡。

插稻謠

六月無雨。迎神擊鼓。插稻時。水如縷。高顛大驚。誰家者奴。下肥馬。坐溝塗。不聞流水潺潺聲。但聞鞭扑聲高呼。婦子狂走。伏身葦蒲。兄耶父耶。彼高顛者去耶。累歲年豐無餒。僮婢長大難以驅使。稻畦乾。稻苗死。貧人哭。富人喜。壘山詩 選二

操舟謠

朝乘舟。暮弄水。水鳥狎居人。拍拍飛不起。使君來。魚鳥懼。蓮葉礙行舟。刈蓮水有路。唧唧復唧唧。推挽百夫力。舟中簫鼓喧。行人遙歎息。水裏操舟。岸上走馬。居閉門。騎者下。秋漸深。使君喜。中秋汎月色。衆船連夜起。曲舟昨夜大焚屋。太行之西新鬼哭。何不投戈伏山谷。使君欲向船中宿。

壘山詩 選二

哀流民和魏都諫

流民自北來。相將向南去。問南去何處。言亦不知處。日暮荒祠。淚下如雨。饑食草根。草根春不生。單衣曝背。雨雪少晴。老穉尪羸。喘不及隊。壯男腹雖饑。尙堪負戴。早春糧。夕牧馬。嫗辛亥憐。許宿茅

簷下。主人自外至。長鞭驅走。東家誤留旗下人。殺戮流亡禍及鷄狗。日淒淒。風破肘。流民掩泣。主人搖手。瑯山詩選二

殷 岳 留耕堂詩集一卷

殷岳。字伯巖。一字宗山。雞澤人。崇禎三年舉人。順治初。調選得睢寧知縣。方赴官。申涵光移書讓之。遂辭官歸。隱居小砦。與涵光唱和相得。康熙六年南游。客死福州。年六十八。事具朱彝尊殷先生墓志銘。撰留耕堂詩集一卷。皆五古。不作魏晉以後語。

感懷

矯飾以求名。君子所不取。論世及今時。好名猶近古。賄行疾風草。名實壹商賈。閭里日憔悴。淫嚼吼餓虎。甌響鼻之恥。挹注各有主。扶杖歌北門。蕭然對環堵。留耕堂詩集

張 蓋 柿葉庵詩選一卷

張蓋。字命士。又字覆輿。號箬菴。永年人。明諸生。入清病狂。居土室中。歌哭無恆。歲時一出拜母。雖妻子不相見。唯申涵光殷岳至。則談諧甚洽。久之。狂益甚。遂卒。年六十。涵光輯其遺詩百餘篇。爲柿葉庵詩選一卷。悲愴感人。有極高古者。

江上

江上人家盡竹房。門臨江水見舟航。欲乘潮信遊滄海。吳楚烽煙正隕茫。
枯葉庵詩選

劉逢源 積書巖詩集一卷

劉逢源。字津遠。曲周人。貢生。入清未仕。少好讀書。通星數河洛之學。喜談兵擊劍。滄桑之際。播越江漢淮海之間。一時名士多從之游。未悉卒年。撰積書巖詩集一卷。其詩悲憤蒼涼。聲出金石。申涵光殷岳視爲長友。事具畿輔先哲傳高士傳。

壬辰紀事

驚濤拍岸蹴孤城。禾黍千家望盡傾。曲巷青苔餘鳥迹。通衢白浪接舟行。雲連遠樹埋山色。石激溪流戰水聲。村落蕭條煙火絕。何時負杖闕巖耕。
積書巖詩集

趙湛 玉暉堂詩集五卷

趙湛。字秋水。號石鷗。邯鄲人。諸生。喜游。所至交其詩人。與申涵光張蓋劉逢源殷岳路澤農同倡河朔詩派。魏裔介選其詩入溯洄集。稱爲蕭然沖適。不可攀躋。備極推許。不爲利濟而務宏獎。令人不解。未
知卒年。撰有玉暉堂詩集五卷。詩學少陵。時雜幽燕之氣。事具畿輔先哲傳高士傳。

避兵婦女入城聚泣風雨中甯侍御廣開閒舍安寓之

羽檄喧從大漠還。月氏萬隊度洛關。秋原牧馬空禾黍。夜帳鳴箏列海山。鴻鴈驚來風雨外。啼號聲在水雲間。憂天多史開旁舍。千葉青蓮濟大艱。玉暉堂詩集四

秦警

秦關又報起狼煙。曾敕帷臣撫未還。諸將一時多授命。親王三遣自臨邊。已傳豫楚經年戍。漸見徵求稅俸錢。幽薊古來根本地。軍中誰比亞夫賢。玉暉堂詩集四

次湯陰武穆祠口占

大義申千載。奇功困一時。衣冠尊異代。不敢謁公祠。玉暉堂詩集五

商邱道中感吟

雪苑詞人久寂寥。城邊商水不通潮。土人競說諸公子。鬪罷山雞吹玉簫。侯朝宗兄弟皆逝。其子孫日以鬪雞馳射爲樂。非復文獻家風矣。玉暉堂詩集五

胡 或 愧林吟稿二卷

胡或。字翁生。號愧林。容城人。諸生。入清不事進取。未詳所終。有愧林吟稿二卷。曰雲中草。順治二年越紫塞歷鄴陽之作。曰含青集。十一年客徐州所作。時或始五十。詩學杜陵。頗有工力。四先生咏曰余若水梁公狄沈蒼曠楊水如。亦足見其志尙。其孫范作跋。謂與鍾元孫徵君。爲吾鄉名教宗主。集中客朔州

懷孫啓泰徵君寄賦二首。有句云。比來可爲吟詩瘦。問罷青囊理釣綸。又云。不因寂寞憐君病。休怪風塵任我頑。上下堪悲魚鳥亂。乾坤未許牧樵閒。關心徵君名重。恐不能脫羈絆。婉而多諷。可謂能愛人以德者矣。范又稱或晚年學道。蓋亦從事講學。容再考之。

次張韓忠韻秋吟

一從烽火擾山居。又是浮生幾度餘。漫向匡門悲弱宋。忍來江上弔靈胥。欲廣平子南都賦。那望留侯黃石書。觸目傷時空涕淚。秋颺颯颯動秋歎。

山深日靜對沙鷗。世路茫茫何所求。幾度風塵無住著。多年湖海漫遨遊。首陽有骨仍歸子。新莽何心輒易劉。身外哀榮渾莫管。猶防烽火燧到林丘。槐林吟稿一

王 忻 芡菴集詩鈔六卷

王忻。字濟似。號曉巖。別號芡菴。雄縣人。父喬棟。官湖廣督糧參議。明史有傳。忻卜居六合西圩者四十年。躬耕以教子。康熙十年始還里。明年卒。年五十六。撰芡菴集詩鈔六卷。其詩格高調古。多河朔幽燕之氣。鬱勃之懷。興亡之感。時時流露于筆端。少與王熙共筆硯。及熙貴。拒不與通。唯共紀昉交往。亦處士也。教兩女分題賦詩。惜集中不舉其名字。與自矜一門風雅者。蓋有別矣。子企墻登第。刻畿輔名家詩。所以承忻之志也。

乙酉避亂渡錢塘感賦

悲風徧四野。萬物同淒咽。蕩析靡所止。憂亂心如結。兵火起倉卒。輕與几杖別。權臣執國柄。士氣先爲折。羣然樹羽翼。相濟爲容悅。所志惟金帛。名節良不屑。姻婭雖懸仕。周全情更切。殺讐亂國是。公道自此絕。爲患已剝膚。尙自捫其舌。一旦敵渡江。奔潰門不閉。載觀出亡者。往往行不缺。余本北方產。來吳力已竭。又相從而南。何適乃樂國。瑣尾流離子。處處人見藐。暫息越山下。安危未可測。出入依草木。山泉流甚冽。幽寂似可棲。恐遂成吾劣。寢食思猛步。弗願藏予拙。何事出師者。靡旗而亂轍。時事既如此。

究竟安忍說。英菴集詩鈔一

杜 越 紫峯集十四卷

杜越。字君異。號紫峯。定興人。明諸生。師事鹿善繼。以父執事孫奇逢。其子婚奇逢女孫。自謂五十年受知最深。少立名行。左魏之難。倡議贖金納贖。匿魏學伊朱祖文複壁中。不稍畏避。入清不事考校。布衣蔬食。授徒自給。爲學不立門戶。不標宗旨。亦不著書。唯篤于孝弟。分晰義利。進退以禮。嚴於取予。志行高潔。一鄉化之。康熙十八年。薦舉鴻博。年已篤老。迫促就道。終以疾未試。與傅山等七人。特賜內閣中書銜。放歸田里。二十一年卒。年八十七。事具清史列傳儒林傳上。撰紫峯集十四卷。詩文樸茂。頗善持論。蓋寢饋於夏峯者深矣。

故尙寶孫君魯念高陽公第五子刻有廿一君詠猥及不佞不佞實未抗顏卿大夫間也

事餘三十年感而追賦

相國兒郎國士叢。戴頭握璽氣何雄。翻疑當日龍門客。更有彌生刺未通。

紫峯集二

贈彭九如

蘇吾人。工畫。彭餓夫其季父。

南窗舐墨意如何。畫到西山翠欲波。莫問君家癡叔死。直疑薇色傍崖多。

紫峯集二

雨勢沉灶又如瓶粟何。門人管公式餽炒麵一罌。孫息輩掬食殊樂。

乞米誰將帖子攤。况兼簷溜激遙湍。悽涼却憶齊安道。何似清添苜蓿盤。

粗糲吾宗故有詩。更堪雨色困饑脾。浮來香豔出新碓。狼籍床頭拋畫眉。

紫峯集三

王餘佑 五公山人集十六卷

王餘佑。字申之。一字介祺。其先小興州人。本姓宓。養於保定新城王氏。遂為新城人。以王為氏。諸生。入清卜居易州五公山雙峯村。躬耕犖确。以養父母。暇則述作。不入城市者垂三十年。世稱五公山人。少師事鹿善繼孫奇逢杜越。其學以明體達用為宗。閑邪存誠為要。凡古今成敗治忽。事機得失。無不通曉。上自禮樂兵刑。下至耕桑藝植。醫藥卜筮。西洋語文。無不窮析端委。晚居獻縣。約卒于康熙二十三年。年七十。著居諸編。乾坤大略。諸葛陣圖。通鑑獨觀。最自信者茅簷款議。門人李興祖編其詩文為五公山

人集十六卷。詩似謝臯羽鄭所南。文模陳同甫。然辭旨隱約。不作陵厲指斥之語。志傳多有關係。吳處士小傳。紀吳鉏南北踪跡甚備。而不言其所圖。知餘佑必爲共事者。謂鉏著廿一史方輿考略。署他人姓字刻之。然則鉏固未嘗廢學也。鉏字稽田。嘉興人。吳昌時子。徐枋爲賦遠人之詩者也。

弔朱貞明

一生俠烈氣。熱血沸重泉。力屈空填海。魂歸欲叫天。淒風悲馬鬣。苦月冷漁船。蘆荻蕭蕭處。誰憑義士

阡。五公山人集二

送稽田旋南

襖被風塵影共依。無端別淚灑征衣。總然馬角長三尺。極目天涯何處歸。五公山人集五

閩領山衣屢典不售

無錢呼取典山衣。幾次相將未售歸。不是質家嫌百結。先生制度與時違。五公山人集五

閩山陳涉祠

樓閣重重凌紫烟。楚王至此尙明禪。可憐燕雀蓬蒿下。那曉鴻飛不紀年。五公山人集五

見故鄉流戶有感

產業凋殘客異鄉。一家老稚漫悽惶。於今故國爲滄海。雁落沙飛自主張。五公山人集五

姜 採 敬亭集十卷補遺一卷

姜採。字如農。萊陽人。崇禎四年進士。由儀徵知縣行取禮科給事中。以建言廷杖下獄。十七年二月。戍宣城衛。未至。北都破。遂家于吳。弘光時起原官。魯王監國以兵部右侍郎徵。皆不拜。卒於康熙十二年。年六十七。私諡貞毅先生。事具明史本傳。此集採嘗自刻甲申崇禎十七年至己亥順治十六年詩文。爲敬亭集。又刻庚子順治十七年至壬子順治十八年先後十三年詩文。爲歸託集。其子安節合二集爲一。詩文各五卷。又輯補遺一卷。總名之曰敬亭集。採自號敬亭山人。宣州老兵。臨終遺命葬宣州。以無故君赦令。示不敢歸。與弟垓卜居吳門。吳人稱爲二姜先生。沒爲築二姜先生祠于鶴澗。非僅重其詩文也。卽以詩文論。實有健筆。自謂甲申以後始學詩。有句云。學詩只學杜工部。謂垓操觚染翰勝己。垓未第時游江南。以才鳴。刻篋齋集。惜不傳。採爲文馳聘。能持議論。嘗于乙未順治十二年撰正氣集。以傳盡節諸臣。分四目。曰北都。曰南都。曰奉使。曰起義。唯成北都一種。安節取餘稿中張國維傳鼎銓張伯鯨左懋第沈迅凌嗣鄭爲虹劉允浩滿之章九傳。并諫草入集。而北都已成書者。竟與闕文別錄紀事摘謬并佚。考採事者。獨賴此集矣。崇禎中建言諸臣。採與熊開元得禍最烈。初欲以密旨斃之。事既章露。乃廷杖百。監以大璫。必欲其死。幸而不死。猶長繫不肯釋。目爲兩大惡。世以採疏何所見而云然。一語觸怒。而開元則帝怒其劾周延儒不肯盡言爲反復。採自謂錢天錫營密雲巡撫。行賄首輔周延儒。爲言官所劾。延儒懼欲脫己罪。乃具密揭委罪

言官。上信之。戒諭言官。代人規卸。爲人出託。塚因力爭涿州知州劉三聘薦馮銓事以撼延儒。致觸上怒。開元則謂塚遭延儒忌嫉尤深。兩人皆以爲得禍由延儒陷之。劉灼所紀略同。特謂二人墮廖國避術中。文秉烈皇小識。獨言戒諭言官爲破積習。非指天錫。塚探之未審。頗得當日實情。諫既不爲天錫而發。則延儒密揭同于子虛烏有。是時帝已疑延儒。豈肯代延儒殺人。既誅延儒而不釋二人。則二人得咎。非由延儒明甚。白胤昌容安齋酥談有言曰。天啓時。以吏部專擅。科道合力糾之。吏部不勝。而權在科道矣。崇禎時。又以科道專擅。內外厭之。科道消沮。而權在翰林矣。當時政局。數語已可盡之。是卽烈帝戒諭之所由來。塚言陳啓新。言齋醮。言陳新甲諸疏。不啻形帝之短。早觸其忌。特借二十四氣。及詰問語而重懲之。以爲此科道之擅權者。開元則適逢其會耳。烈帝聰察自任。不處操縱首揆爲通貨賄之廖國避楊枝起。而督過塚與開元。憤憤如此。安得不亡。諸紀塚事者。皆未及此。明史獨采文秉之言。可謂有識。然猶未顯。故爲疏通證明之。塚子安節實節。稱爲孝子。與塚子寓節。并有至行。爲士流所重。故能致應搗謙徐枋魏膺表章之文。寓節藏宣德脂粉奩。塚所遺也。一時名流。徵題殆遍。此集有玉羊詩序云。案頭有玉羊一具。前朝物也。昔弟塚得廟市。易簣之際。出以移贈。又有顏卓如買白定詩。知堅貞若二姜。亦不廢此事。特移情而已。何嘗玩物喪志哉。

慕邨用東坡遊孤山韻

鴛一葉。浮五湖。歸來蕭蕭四壁無。亂後荒田少人耕。狐狸鴉鷄夜叫呼。百口凋喪連童孥。卻悔盛年當歡

娛。風飄雨溼苦不辭。對此那免心憂紆。慟惟先人蓬蒿廬。雖有三姪皆藐孤。當門持戶亦無力。誰能操管書編蒲。妻子織屨身農夫。晨糝不足況于哺。官家輸糧賣黃犢。此事應入流民圖。十家九家無有餘。汗流臂頰慳者遽。不見東鄰作逃遁。滿眼哀鴻難繪摹。敬亭集二

徐振芳 徐大拙詩稿三卷

徐振芳。字大拙。山東樂安人。天啓七年副榜。崇禎九年補遺才。游京師。名動公卿。喜談兵。嘗客總兵丘磊劉澤清軍中。李自成破中州。叩關上書。不得達。及潼關破。說史可法疏請太子之留都開元帥府。可法不能用。以大臣薦官後軍都督府都事。權清江稅。北都之覆。起義旅淮上。丁耀亢逍遙游閱徐大拙雪鴻草有感云。黃河吹角日將曠。故壘蕭疎兩岸分。侯是淮陰仍胯下。士非東海愧從軍。夢中蟻幻全無味。雪裏鴻飛尚有文。草檄共推君第一。中原何事不先聞。即指起義時。耀亢亦與共事。振芳家素封。變亂後。徙家安東。古漣水也。曰吾不北返矣。沒即葬焉。年六十。見李煥章織齋文鈔三友傳。傳未言振芳卒于何年。唯稱先大夫舉進士。振芳年十三。煥章父中行。萬曆三十八年庚戌及第。然則振芳當卒于順治十四年丁酉矣。傳又稱振芳初師鍾灑。成喝月草。繼以十九首爲宗。下泊三唐。變化離合之。折衷李杜。自闢堂奧。成雪鴻草。來淮南詩益工。著三素草。後放舟大江。浮彭蠡。登黃鶴樓。游赤壁。又自汴洛西入關。著楚萍草。四庫著錄雪鴻三素楚萍三集。漁洋感舊集小傳云有雪鴻楚萍諸集。此本有澗溪而無雪鴻。度

其詩散佚者多。煥章所稱起義詩。申包胥在終復楚。魯仲連生不帝秦。黃州詩霸業三分爭赤壁。文人兩賦重黃州。雍正樂安縣志。載其送李二水監軍黔中云。到日春光應未闌。繁花如錦映材官。幾行征雁排雲度。萬里孤臣掩淚看。千騎弓刀當夜肅。雙龍風雨過江寒。不堪遙望三湘水。雪浪如山尺素難。皆不見此本。煥章老樹村文集。有徐大拙遺詩序。稱隋貞子言大拙詩與梅村詩合刻于南中。又言楚萍之詩。遠勝三素雪鴻諸稿。今從未聞有徐吳合刻。殆隋誑語。然則振芳詩始終未刻。宜其湮沒。志稱振芳豐頤美髯。工詩古文辭賦。尤精于詩。傳言其豪放卓犖。睥睨一切。非其意即王公貴人亦不顧。今讀此集。格律渾成。才情奔放。特多淒涼激楚之音。蓋滄桑之際。密有所圖。終于無成。而不肯枉屈。信乎豪傑之士也。提要乃以楚音短之。豈非瞽瞍。方文有同李非文登孤竹山因悼其友徐大拙詩云。青州有徐叟。風雅隱江淮。百首君能記。千秋名不埋。獨憐淹逆旅。誰與殯枯骸。今夜聞遺詠。因之一愴懷。此詩載北游草。作于康熙元年。孤竹山在永平。逆旅句與李煥章所記有異。

甲申五月閱清江浦義旅

射陽湖上繫銅鑣。海水羣飛岱影搖。柝亂荒雞鄉夢冷。弦驚旅雁客書遙。南來甲馬盤三輔。東轉江聲壯六朝。莫說黃河天塹在。將軍新拜霍嫖姚。三素草

安慶

左兵以清君側爲名。所過皆焚燬。獨皖產一阮。正君側之惡也。其焚燬也宜哉。

舒州舊是繁華地。瓦礫丘墟荆棘生。湖上平章能誤國。山頭廷尉敢屠城。當時天意高難問。終古江流恨

有聲。閒上龍眠峯頂望。蕭疎烟樹晚霞紅。楚萍草

黃鶴樓

黃鶴飛仙去渺茫。登臨四顧海風涼。江聲動地通夔府。烽火連天到夜郎。三戶悠悠亡國恨。九歌一一斷人腸。殘山剩水分今昔。野老閒愁對夕陽。楚萍草

李煥章 織齋文集八卷

李煥章。字象先。號織齋。樂安人。明亡。棄諸生。未知卒年。安致遠云。年七十餘終。此集中有署戊辰康熙二十七年者。已七十五矣。大約當卒于此一二年內。織齋文集凡八卷。得文九十一首。刻于光緒丁亥。裔孫振甲跋云。視藏厘什之二三。與王萃蓼村集李董集鈔序。所謂象先遺文二百四十七首者合。又云。吾家所藏視他姓又厘什之二三。與四庫存目織齋文鈔八卷云。所著有龍灣集。無學堂集。老樹村集。凡百餘萬言者合。煥章自謂有遜山堂文三百餘首。周亮工刻其文十餘卷。與侯朝宗王于一陳石莊號四家文。今皆未見。別有老樹村集二卷。爲文四十九首。與此集同者一二而已。然則未刻者甚多。未知變亂劫火之餘。今尚有存者否。萃謂其文書論多于各體。識解略類蘇氏。少時聞其文學河東。今集中乃無似子厚者。四庫稱爲跌宕排募。氣機頗壯。而汪洋縱放。未免一瀉無餘。自今觀之。家有藏書。多讀史。皆有論次。謂南唐如光武昭烈之于漢。不當稱南。頗有史識。爲文務馳騁不屑屑以紆迴洗伐爲工。視同時諸能

爲古文者。筆力過于李澄中。澄中又遠過安致遠張貞。則定論也。杜牧之文鈔序。謂少小時酷嗜其文。錯綜變化。離奇精工。庶幾昌黎柳州。而貞元大曆諸家。皆不能及。蓋隱然以之自喻。知其自負不薄。科道姓名錄序。譏明代科道之橫。李忠文公文集序。徐汝廉先生與錢大宗伯書書後。皆致慨于烈帝不肯遷都。以致亡國。汝廉于崇禎二年。卽倡此議。與邑侯邵公三書。謂于織溪關室。供五先生。于洪都取其逸。于富春取其高。于粟里取其真。于河渚王官谷取其曠達。又謂貧而易志。老而改節。煥章卽不肯不至此。品節甚峻。宜張爾岐有老而交一織齋。差不寂寞之誇語也。嘗作書與顧炎武辨正地理。炎武作譎觚十事駁之。摧枯拉朽。使無置喙餘地。此書似未存稿。近人或謂他人冒作。然語氣與集中他文相類。安致遠杞城文稿。有與李象先辨答顧寧人書。則當時實有此書。煥章之學。固遠不足以望炎武。然嘗與炎武同修山東通志。炎武書辭過峻。微嫌其礙矣。王萃謂新城著書纍纍。于象先只載其前生事。所謂前生事者。池北偶談談異。記邵士梅事云。河南張給事文光。能記三生事。李御史嵩陽。樂安李貢士煥章。皆能記前生事。安致遠玉礎集。雜志載煥章此事最詳最誕。然煥章與馬漢儀書云。某自宿命通來。不欲婚。不欲宦。得一大禪宗爲之導師。某性頗聰利。誦法華。著三寶文字。如劉緄之于定林寺。乃其素志。又云。吾性命友友龍陳君云。織齋再來人。不必以常律論。再與馬漢儀書云。某自喪亂來無家矣。不得已而放之山崖水次。僧寮道舍。亦以其村野閭巷罕可語之人。乏可語之事。遂薄游江南者二。之淮滌。渡江至秣陵。游中州汴宋亳宿間。游晉中。鄴郡。武安。涉潞黎。上黨。平陽。洪洞。趙城。游京師者八九。游岱岳者三。過

曲阜任城曹單者三。游不其登大小勞者二。更游瑯琊不數計。更憶京兆嵩雒汧渭涇之境。潤浦維揚之間。皆童少時從先大夫宦游。然則再生之事。煥章實自言之。故鼎革不入名場。妻亡不再娶。好游好讀佛書。棲僧舍。歸之宿命。或有託而言。欲以解嘲耳。王士禛論文不及煥章。曩亦疑之。及讀與陳孝廉友龍書。乃知士禛招之不往。遂致疏絕。謂與勢利人交爲危事。爲禍階。平生得一周亮工知己。不欲再交貴人。蓋鄙士禛鄉里後進也。煥章家世。見傅國雲黃集少溪李公墓表。少溪名尙思。生三子。中行中立中正。中正萬曆三十八年進士。由鎮江知府擢隴右僉事。貴州督學。晉本省參政。是爲煥章之父。煥章少嘗從國讀書雲黃山中。

郊居

不嫌荒僻甚。惟愛靜無譁。楊柳陰三畝。芙蓉帶萬家。晚雲橫峭壁。新雨靜平沙。正是高吟處。孤筇步月華。國朝山左詩續鈔一

徐夜徐東癡詩二卷

徐夜。字東癡。山東新城人。諸生。初名元善。入清後。慕嵇叔夜之爲人。更名夜。字嵇菴。隱居東臯鄭漢河上。掘門土室。絕迹城市。後嘗一入浙。過孤山。登釣臺。渡潯陽而歸。顧炎武不輕許可。親至山中訪之。炎武嘗有詩曰。今日大梁非故國。夷門愁殺老侯嬴。夜之詩曰。不堪頻北望。曾是舊神州。蓋皆有不

與同中國之慨。足證同心。所著書沒于水。詩稿又沒于九江。王士禛與爲中外兄弟。輯得百餘首。爲徐東癡詩二卷。與蕭亭詩選。足稱雙逸。夜詩學阮籍詠懷。士禛謂學陶韋。峻刻處似孟郊。非也。不得其年。初入士室時年二十九。至辭鴻博之薦。已六十二矣。

九日得顧寧人書約遊黃山

故國千年恨。他鄉九日心。山陵餘涕淚。風雨罷登臨。異縣傳書遠。經時怨別深。陶潛籬下意。誰復繼高

吟。徐東癡詩一

輓王岱雲

鬼車鬼馬促離筵。念往魂銷倍黯然。地下若逢張季子。謂文虎爲言心死已多年。徐東癡詩二

張實居蕭亭詩選六卷

張實居。字賓公。鄒平人。茹家國之痛。高隱不仕。其詩中懷鬱勃。而以明秀出之。王士禛其妹婿也。以與徐夜相擬。題曰二高士詩。洵可當之無愧。然夜特薄富貴不爲。而實居鴻飛冥冥。類不食人間烟火者。卷中多述懷感歎之作。絕少唱酬泛愛之篇。知其所託。別有高人一等者矣。清初山東詩教最盛。定當以實居爲第一。

開河歌

清詩紀事初編卷二 張實居

女圭功遠白圭死。應龍飛去不聽使。精衛猶能塞巨浸。何須天吳移海水。欲使海水化桑田。一封書上中丞喜。特請丁夫十萬人。橫穿河渠八百里。高垓如城海上連。紛紛盡似衛土螳。綠鬢嬌娘無氣力。纖手擎泥沒雙趾。短衣露頂荷鋤去。五十老儒何足耻。蕭亭詩選六

高璪不視草一卷

高璪。字四留。號霞山樵者。膠州人。撰不視草一卷。有詩云。先文忠歸櫬江東。棄浮淺土三十餘年。擬暨先大母合葬廬山。知是弘圖之孫。文忠之諡。唯見于此。盧見會國朝山左詩續鈔。誤以爲弘圖之子。唯選揚州梅花嶺間史閣部葬衣冠處一絕云。錦纜牙樞畫舫遲。冶遊人唱竹枝詞。年來草沒梅花嶺。閣部衣冠半未知。蓋譏王士禛諸人紅橋冶春而作。爲此集所無。知見曾未見不視草。集中有贈周西齋侍兒姍姍詩。姍姍卽著硯爐閣詩集者。又有哭周西齋姻家詩。作于庚申。康熙二十九年知姍姍果有其人。其詩自康熙十三年甲寅。至三十二年癸酉。末葉有癸巳。康熙五十二年詩四首。據丙寅。康熙十五年所作自墨水發。詠兒赴昌陽詩。有行年五十一句。下推至癸巳。其年已七十八矣。首有自序。署年乙丑。康熙十四年初名其集曰不視草。繼又欲改不視爲村留。蓋恐以不視觸忌諱。璪弘光時曾廕中書舍人。入清不仕。嘗以被誣籍沒其家。諸父有作中書知縣者。璪獨忍飢高蹈。顛連困苦之餘。懼罹于法。凡詩中稍涉不遜者。皆逕改之。唯極道窮窘。然皆清雋有骨。無宋人習氣。間與劉翼明唱和。亦窮老工詩。而詩不傳于世者。璪自謂姑刪錄近體絕句爲一

卷。然則當尙有他稿。必更有可觀也。

先文忠歸櫬江東。稟浮淺土三十餘年。茲擬暨先大母合葬。廬山貧不能如禮。泫然成詩

一章

痛哭先臣絕粒年。獨騎箕尾大江邊。一行旅櫬扶戈塞。萬死孤兒剩墓田。還向舊山封馬鬣。何當淺土格龍眠。傷心此日難如禮。不朽豐碑墮淚傳。不觀

留餘草堂字曰四留

概自莊嚴平泉。烟雲變幻。居維荒徑。鳥雀備來。豈敢廷尉之署門。稿比幽人之題屋。一丘一谷。杜元凱之碑。五存五亡。庚子山之賦。容有會意。聊當解嘲。

清淺蓬萊幾度虛。吾廬反覆亦何如。十年兩籍愁勾索。三徑重開賦卜居。零落烏衣還見燕。橫流滄海未爲魚。側身莫謂無天地。剩水留山是四餘。不觀

傳 山 霜紅龕集四十卷附錄三卷年譜一卷

傅山。字青主。號齋廬。又號真山。別署公之佗。陽曲人。少勵志行。崇禎九年。提學道袁繼咸。爲巡按御史張孫振誣劾被逮。孫振聞黨也。山集諸生三十餘人。伏闕爭之。得直。孫振以他事逮。于是義聲震一時。事具山自撰因人私記。明亡。居土塘村南土窰內。所謂土室者。順治十一年。因叛案宋謙供出傅青主出家作道人。身穿紅衣。號朱衣道人。逮訊實不知情得免。而父子兄弟皆茹嚴刑矣。世述此事者。自全祖望以次。多不得其詳。往適求得三法司原案。乃知主其事者。左都御史龔鼎孳。蓋有意寬之。自後山隱于

松莊。不與世事。然繫一方人望。顧炎武入晉依之。稱其蕭然物外。獨得天機。後乃入關依王弘撰也。康熙十八年。舉鴻博。山與杜越老病。敦迫就道。山臥板牀。子眉及兩孫肩之以行。越則幾于提解矣。入都。臥病阜城門外慈明寺。不與世人接。久之。得放歸。二十二年二月。眉卒。年五十七。山賦詩數十首以哀之。七月山亦卒。年七十八。事具全祖望陽曲傅先生紀略。及劉彙仙儒外紀。曩得山手書二十三僧紀略。署乙丑秋。然則卒年應在八十一以外矣。有霜紅龕集四十卷。山博學多通。著述甚衆。論文不喜歐曾。以爲是江南之文也。故自號西北老人。詩文外若真率。實則勁氣內斂。蘊蓄無窮。世人莫能測之。至于心傷故國。雖開懷笑語。而沉痛卽隱寓其中。讀之令人悽愴。晉人重其詩文。自戴廷杖張耀先兩刻後。屢有增輯。片語雙辭。無不蒐羅。述傅山事者。雜以神仙。不免近誕。然至今婦人孺子咸知姓名。皆謂文不如詩。詩不如字。字不如畫。畫不如醫。醫不如人。其爲人所慕如此。

病極待死

生既須篤摯。死亦要精神。性種帶至明。陰陽隨屈伸。誓以此願力。而不壞此身。世世生膝下。今生之二親。莫謂恩愛假。父母愛我真。佛謂恩難報。不必問諸人。霜紅龕集五

獄祠樹

獄中無樂意。烏雀難一來。卽此老椿樹。亦如生鐵材。高枝麗雲日。瘦幹能風霾。深夜鳴金石。堅貞似有

情。霜紅龕集七

金陵不懷古

甚是金陵古。詩人亂有懷。自安三駕老。誰暇六朝哀。曾道齊黃拙。終虧馬阮才。肉髀愁不鼓。儉父過秦

淮。霜紅齋集九

爲李天生作

燕笑流風穆。鶯花醉露盤。由來高格調。發自好心肝。是語敢深信。凡交怪竭歡。令人懷抱盡。重覺此時

難。余所見交於天生者。皆實望而已。而天生不難爲之原。蓋不厭不謂實士乃爾。

南山塞天地。不屑小峯巒。瀟薄冥蒼翠。神仙謝羽翰。心原滂浩綽。膽豈大江寒。何事亭林老。朝西擬築

壇。寧人向山云。今日文章之事。當推天生爲宗主。歷敘司此任者。至牧齋。牧齋死而江南無人勝此矣。

甲申守歲

三十八歲儘可死。棲棲不死復何言。徐生許下愁方寸。庾子江關黯一天。蒲坐小團消客夜。燭深寒淚下

殘編。怕聞誰與聞雞舞。戀著崇禎十五年。

掩淚山城看歲除。春正誰辨有王無。遠臣有曆談天度。處士無年紀帝圖。北塞那堪留景略。東遷豈必少

夷吾。朝元白獸尊當殿。夢入南天建業都。

甲午獄祠除夜同難諸子有詩覽之作此

薪膽看寒盡。篇章動歲餘。梅花南國遠。松漠北風殊。東漢今何夕。西洋歷正除。獸樽誰殿上。犴穴獨天

隅。棧閣柑仍到。屠酥酒漫醺。聯吟無楨榘。相示有瓊瑣。共逐騷人鹿。還招放士鶻。河中原斂鑣。雪窖不
遑篋。海上羝難牧。雲中雁絕殊。飯依知凱叔。薩埵得公于。上頓酣胡母。天臺欲遂初。筆鋒羞結倆。膏戟
老堪輿。屑屑瑠蟲癩。耽耽繡虎瞿。私推衛許氣。豈作圈生噓。口不傾三峽。胸能黨八廚。兄弟言既好。生
死復何如。冉冉悲將老。沾沾恨昨汪。溫嶠真孝子。徐庶竟名儒。玉米孤臣泣。金蘭異國喁。烏巾自小草。
曠繁亦連茹。未解風雲壯。誰能月露姝。篝燈聊共汝。爆竹不關渠。寫罷投華筆。吟餘附燧珠。坐談原沒
用。樓賦又何須。詩即傳於世。人當安所臚。中州金字貴。况不肯輕予。精紅齋
集十一

傅眉我詩集十一卷

傅眉。字壽髦。號糜道人。山子。山業醫賣藥市上。眉提藥囊日出入闔閭中。又嘗徒步鬻藥塞外。出雁門。
過雲中。歷野狐嶺。走灤陽榆關往樂浪經上谷以歸。復過豫適楚。流連江漢間。所至輒詢其風土人物。及
山川阪塞。堡障險礙。戰守陳迹。皆默識之。喜讀古兵書。從汾州僧續宗學騎射擊刺。一時武勇士皆出其
下。年五十。始讀內典。發願先爲王霸。然後成佛。蓋其心未嘗一日忘天下。皆山之教。不知山者。觀于眉
斯可矣。文事山所能者。皆能之。且極似之。卒于康熙二十二年。年五十七。有我詩集十一卷。我者言其
不同于人也。世傳山叛案得紀映鍾龔鼎孳而解。眉因作紫芝賦以獻鼎孳。此賦不載集中。然有與古度書
云。囚眉愚見。以爲懸邊老爺作一申文至都老爺處。將囚眉及叔暫保在外。古度不知何人。邊大綬方知

太原府。都老爺即指龔。然則果有其事矣。映鍾蓋爲之周旋者。

自江口寄壽元弟

一身窮苦借吾出。四壁饑寒累汝支。獨自老人容易悶。喜歡茶飯莫傷遲。閒賒碧酒邀貧客。旋買紅梨與小兒。二月紫荆香滿院。吾歸猶及盛開時。我詩集五

渡江後自石頭再寄壽元

文章儘有江山助。迂闊翻因兒女添。到膝短衣防冷脫。聾牙難字爲生拈。臨池莫節粗蒲紙。煖地須縫小布簾。江外除過三白酒。其餘只是十分甜。弟善琴能歌。我詩集五

李生光 西山閣筆一卷

李生光。字闡章。絳州人。崇禎十七年甲申年五十。棄諸生。自號汾曲逸民。名其所作詩曰西山閣筆。刻于康熙初元。雖文采不逮。亦梁不塵之流亞也。壽青主母詩。航海歌。均非苟作。其餘皆自勵貞固。觀劇云。堪羨梨園歌舞儔。衣冠楚楚舊風流。當時未遭文網。使在乾隆之世。族矣。

南畝耘

夫出南畝耘。婦在機之上。終歲苦勤劬。不修輸公藏。豈不思貸鄰。舊負猶未償。况復不逢年。展轉無所望。老幼死溝渠。生者愁相向。君王遠不聞。猶自益兵餉。追呼不可支。出門圖別往。安得憂國臣。繪此流

離狀。西山
關筆

避亂入垣曲山步友韻

地覆天翻日。遑遑無定居。山行聊採藥。不負數行書。西山
關筆

王弘撰 砥齋集十二卷西歸日札一卷待菴日札一卷

王弘撰。字山史。號待菴。華陰人。明亡。高隱不仕。與關中三李齊名。康熙戊午被徵鴻博。至都。以老病不預試放歸。未悉卒年。待菴日札有今年七十有八語。是己卯。康熙三十八年所作。砥齋集成于己酉。康熙八年有黃文煥南廷鉉所爲序。後隨時附益。至丙子。康熙三十五年止。西歸則南游後哀丙子以後詩文。刻于戊寅。康熙三十七年待菴又稍後焉。弘撰自序其文。謂以明理曉事。宜情貴達貴淡。故無事摹古。而平實可誦。汪琬乃稱其得史遷遺意。則爲過情之譽。集中大禮論。三案論。三朝要典論。甲申之變論。議論平允。俱于明史有關。夏孝子傳。孫督師傳。呈貢知縣夏君傳。孫夫人殉節碑。大司空二太南公誄。皆至有關係。不止于表徵闡幽而已。謁思陵祭告文。見其志節。延安屯田議。織紡議。見其經濟。野記紀湯斌潼關治績。贈序之外益以此作。復書問不絕。與斌交特厚也。日札中歸州知州龔彙正傳。徐正修傳。哭戴務旃記。書史相國字後。可謂不苟之作。詩非所長。唯見于此。集中多金石書畫題識。平生所嗜。不以爲玩物喪志也。爲學宗朱而不薄陸王。蓋重其事功。顧炎武至關中。實爲之主。炎武稱好學不倦。篤于友朋。吾不如王山史。湯斌題其

像曰。胸懷淵穆。立行介確。蓋具經綸天下之才。而退藏不見其崖略也。交推若此。弘撰他無表見。唯延安二議。坐言可以起行。延安秦漢上郡。弘撰常游其地。必非無故。意者顧炎武李因篤皆走邊塞。與老兵戍卒語。思以有爲。弘撰必預其事。而欲資延安以爲興王之始基乎。高士不必以文傳。而所傳者不止于文。則其文之可貴。又別有在矣。

寄碩揆上人

曾訪巖栖逸興乘。鶯花世界有傳燈。年來水旱君應卹。老去文章我自憎。寂寂閒房飛白鳥。深深野苑集青蠅。長風萬里江湖迴。一任逍遙欲化鵬。

碩揆儒者也。有託而隱於浮圖。久主靈隱。有關於當事者。留偈而去。詩故及之。

西歸
日札

孫枝蔚 慨堂前集九卷續集六卷文集五卷詩餘一卷

孫枝蔚。字豹人。三原人。明亡嘗起兵。後行鹽江都。屢致千金。旋棄去。折節讀書。遂以詩文知名于世。康熙十八年。舉博學鴻儒科。以年老賜內閣中書銜。名益重。家益貧。不免游食。卒于三十六年。年六十七。事具清史列傳文苑傳。撰慨堂前集九卷。續集六卷。文集五卷。詩餘一卷。其詩由蘇以學杜。奧折可喜。其辭氣近于粗率者。乃似杜荀鶴司空圖。知其生丁離亂。有同慨也。文不事摹擬。真氣流行。自成理路。境界甚高。極服錢謙益。述方文之言。謂其老年終日鈔錄蠅頭小字卷帙無數。又言近日錢虞山每勸學者通經。先漢而後唐宋。又言惜虞山氏逝矣。不及一見之。未嘗有平生之歡。而嚮往若此。

佃者歌

海晏中。兒燕歸自田間。述佃戶貧苦狀。余憫然代佃作歌。

插秧插秧。小麥登場。炎風何來。吹婦衣裳。婦但見稻苗。不見赤日光。吁嗟我糟糠。

債主來。何施施。病婦下床烹伏雌。長跪主前淚瀟瀟。斗斛唯命安敢辭。與其豐年轉苦饑。凶年活我君何

爲。漑堂前集一

哀繹夫

役夫亦有家。常與道路親。母老不得顧。驅之向淮濱。船中坐達官。打鼓過前津。酒肉飽其腹。焉知饑餓人。

牽船復牽馬。受管手中鞭。不如爲奴僕。猶得主人憐。雨中泥沒胫。河水浩無邊。力盡長苦饑。何處望炊

烟。漑堂前集二

秋胡行

有序。己亥九月。江上亂說定。聞廣江郡人有以姓名相同。被擄最烈者。與客感嘆竟日。偶讀及西京雜記所載秋胡事。因以秋胡名篇。

毛遂井中隕身。曾參市上殺人。無怪秋胡絕婚。馳象遠引廣陳。乃知名同實分。

爭死既非弟兄。形貌復殊長匡。禍福前定難詳。李樹忽代桃僵。草木尙堪嗟傷。

王郎文書縱橫。蕭王不省姓名。曰令反側自寧。而况真假未明。用法如斯堪驚。

漑堂前集二

難婦詞

不管高樓妾姓誰。牽來宛馬使人騎。相逢已是愁無那。更被前營主將知。

何關出塞始風流。生長江邊不解愁。自到前旗多姊妹。笑聲一半是揚州。

蘇堂前集八

蘇州雜興

四方巧手輸姑蘇。札札機聲亦太劬。不信隆冬有寒者。綈衣百結對妻孥。

蘇堂前集九

李 柏樹葉集五卷附南游草一卷

李柏。字雪木。郿縣人。與盤屋李頤。富平李因篤。號爲關中三李。柏甘寂莫。不務聲施。隱居太白山。忍飢樂道。非二子所及也。卒于康熙三十三年。年七十一。事具清史列傳儒林傳上。撰樹葉集五卷。附南游草一卷。詩文皆極險怪通峭。蓋心傷故國。歌哭行吟。通天入地。以寄其悲憤無窮之感。若加繩墨。則爲不知柏者也。南游草有云。嘉靖天啓以來。篤實君子在野。虛文小人滿朝廷。上欺其君。下虐其民。民不堪命。聚而爲『盜』。『盜』滿天下。由盜滿朝廷也。此顧炎武黃宗羲所不能道者。觀其浮瀟湘。弔屈賈。不啻以屈賈自居。清初遺逸多矣。如柏者實罕。

老人

道傍大哭人。老有八十歲。頭髮成白雪。面皮浮垢翳。衣裳甚藍縷。齒牙亦毀敝。相逢忽相驚。問其奚隕涕。自言有兩兒。大兒遠贅壻。小兒年四十。家貧無伉儷。老妻赴黃沙。子耕爲活計。近年爲欠租。囹圄久械繫。父子恩雖深。無力相救濟。昨聞無完膚。拚老欲代替。行來數十里。人傳杖下斃。輸納無所出。不敢

去收瘞。老牛思舐犢。返哺阿誰繼。此苦是何苦。吾亦願速逝。僂聽老人言。爲之數掩袂。眼餘千淚落。囊乏一錢惠。諺云嘗甕酒。唯將一滴贖。今日觀此老。可知天下勢。樹葉集四

遊世

一入深山抱月眠。華胥國裏夢年年。覺來白眼看浮世。楓化老人海變田。樹葉集四

崇禎儒將

高冠而大袖。揚眉而掀鬚。滿腹蘊韜略。者也與之乎。
白面朱衣郎。孫吳未入夢。奇謀遙尾之。敵曰免勞送。
朽木本樗材。而爲大廈棟。棟摧廈亦傾。徒使賈生慟。
說起前朝事。至今恨不平。大將稱走狗。膝行見書生。樹葉集五

賈開宗 遶園詩集一卷文集四卷

賈開宗。字靜子。商丘人。諸生。自負王佐才。南渡之初。舉室至淮上。欲倚劉澤清爲用。而無所就。是後猶數往來淮徐間。自謂壯歲嘗北歷燕齊。南適吳越。所結交天下磊落奇人。及砥行立名之士殆遍。或死或竄。或緇衣黃冠。變易姓名。不可勝數。與侯方域同學至相得。方域三移書讓之。責其好奇。所與同游有釋其首者。有服道士服者。有言倉公術者。有云馬矢之菜鐵之可爲水銀者。又有繪畫古孤虛圖者。盡

耗其資財。乃欲爲浮屠登壇講說。以奔走天下之人。而出其金帛。蓋開宗抑鬱無所發洩而後出此。非真病狂也。撰遼園詩集一卷。文集四卷。文不及方域。而詩或過之。有順治十八年自序。謂其詩僅存似杜者。其法孟郊張籍之調。則刊落久矣。文末策略二十篇。皆和平可施之政事。似亦較方域所舉爲長。開宗即卒于是年。年六十七。

饑歲穀賤行

古來貧國先貧民。竭來獨見貧天地。於今白金世漸無。上下欲爾皆交匱。商賈貿易悉鐵銅。公然作金用閭肆。詢之原非飾僞金。空乏無奈值今世。又值客夏霖雨滋。桑田漂沒水溶漚。今春雲漢照回天。旱魃千里空望歲。死者國量澤若蕉。生者逃竄面憔悴。農室往日留倉箱。輸稅全仗化居積。豈其輦市間無人。有米如山徒狼戾。昔傳饑歲米如珠。今者米多但爲累。斗米那得易百錢。愈賤猶云價翔貴。憔悴貧民僞金無。誰能相尙成市易。死填溝壑實甘心。食粟落落非吾事。農室催科苦盈門。逃竄無以輸兩稅。悲哉貧富俱嗷嗷。茫茫古今一大異。我聞明初征伐勤。司農晝夜勞心計。南北江河設鈔關。白金旣闕鈔爲濟。民不加賦上用饒。魚不脫淵持利器。安得排天叩九閭。窮變通久得永利。遼園詩集

田蘭芳 逸德軒全集十八卷

田蘭芳。字梁紫。號箕山。睢州人。諸生。究心理學。朱王并重。不事著述。躬行實踐而已。少與湯斌同學。

賦言求友四方。中心嚮往者。蘭芳而外無多人。陸隴其見其所撰呻吟語序。亦深服之。貧居數十年。間至
 饑粥不繼。而讀書自如。故人宋學既貴。未嘗自屈。遇知府縣者。以禮進退。不肯以高行自居。蓋視世間
 無絲毫障礙。心性和平。故無所合。亦無所忤。高隱而實未忘世。其詩閱自著文稿漫書云。偶翻元史漸王
 冕。欲傲周官致太平。心事如見。可謂隱不違親。貞不絕俗。卒于康熙四十年。年七十四。事具清史列傳
 儒林傳上。有逸德軒全集。曰逸德軒詩文集各三卷。詩自順治十三年至康熙二十六年。即刻于是年。曰
 逸德軒文稿四卷。閏一稿一卷。逸德軒詩一卷。為二十六年至三十年之詩。刻于三十一年。曰逸德軒遺
 稿文四卷。詩二卷。詩自三十一年至四十年。刻于四十二年。歸德一府。自侯方城買開宗徐作肅徐鄰唐
 劉榛。皆以古文著名。蘭芳最後始沒。自品其文曰雜。詩曰不合正變。實足當一真字。絕去町畦。自抒胸
 臆。使人玩味不盡。亦能手也。其集不易獲全。此所列者。或有出入。

藕絲糖

藕絲糖者。勝國時。周藩內家舊製也。經亂法絕。今夏傳有更造者。心欲一嘗。頃者曉齋肆宜各以一函見饋。色味視曠昔殊為不類。因念古制淪亡。世方譏其名以跌後進者何限。可勝太息。聊誌以詩。亦風哉風哉之意云爾。

每思往事感滄桑。法果今來訝更嘗。融口纔期還舊嗜。填膺頗怪改新粧。丰儀詎許桓南郡。形似聊存蔡
 議郎。古道年來消歇盡。漫從微物發悲涼。逸德軒遺詩上

讀史偶觸

燕山寶子號通儒。預卜狐裘限彼都。倘使太平真有兆。肯將墳柏謝楊盧。逸德軒遺詩上

讀放翁絕句有感

久憑一死臥松根。身後身前豈更論。心事癡兒渾未解。他時家祭告何言。逸德軒遺詩上

讀傅質儒金陵雜感和之

王氣金陵定有無。曾聞一校啓皇都。興亡過眼雲歸岫。漂泊因人燕引雛。月冷商船翻白紵。日暄龍種下青蕪。誌公堂裏消難盡。啼殺臺城舊宿烏。

江山無限恨悠悠。有客攜家入汴州。不分新恩添閱閱。難從往蹟覓風流。春池吹皺關卿事。鄉夢貪歡替旅愁。最是宮中排內宴。閤門呼上李千牛。

故宮隱隱辨紅牆。鳥避轅門殺氣張。咽巷高軒參制府。吞聲野老憶降王。鍾仙邈邈秋烟薄。淮浦淒淒晚稻香。熊鼎當年書空好。不留零粉載微茫。

嬉遊莫上雨花臺。極目長江劃地開。瓜步浪翻南壘壯。石城潮緩北船來。市門海買矜新販。宮井林風落舊槐。自審有情殊庾信。敢將詞賦寄深哀。逸德軒遺詩上

費密燕峯詩鈔一卷

費密。字此度。新繁人。究心兵農禮樂有用之學。身丁蜀亂。久乃奉其父經虞卜居泰州野田村。以教授爲生。與錢謙益以次諸名家論學論詩文。獨奉孫奇逢爲師。奇逢亦奇之。書吾道其南以贈。卒于康熙四十年。年七十七。所著書三十二種。百二十二卷。不傳。傳弘道書三卷。荒書一卷。燕峯詩鈔一卷。初密不以

宋儒直接孔孟爲然。作中道正紀百二十卷。以申七十子及漢唐諸儒之功。而括其要以爲弘道書。其紀蜀亂者曰荒書。最核實。謂清兵在川北。搜川人與婦女皆殺之。唯十歲以下者得留。爲未經人道。又謂雅布蘭者射中獻忠左乳遂仆下馬。在西充鳳皇山下多寶寺。紀李赤心李來亨事尤詳。謂西山十三家者。李赤心郝永忠袁宗第黃朝宣張先璧劉承胤王進才董英馬進忠馬士秀曹志建王允成盧鼎。弘光時封拜者。李赤心封臨國公。郝永忠益國公。劉體純皖國公。袁宗第靖國公。王光興荆國公。馬騰雲桐城侯。拓天寶宣都侯。黨守素興平侯。後俱入建始。結寨夔府西山中。赤心死。養子李來亨有其衆。袁宗第據大寧大昌。劉體純拓天寶據巫山及巴東。李來亨馬騰雲黨守素據竹山房縣歸州。王光興據建始施州衛。自耕自食。不與外事。孫可望遣使招之。拒不納。與戰互有進退。康熙元年正月。請以四川總督李國英率湖廣陝西河南四川四省兵。伐木除草以入夔府。進取大寧大昌。二月攻巫山下之。自後劉體純郝永忠合數萬衆與爭巫山不勝。劉體純自殺。郝永忠袁宗第被擒。唯李來亨居茆麓山寨。清兵四面圍之。康熙三年六月。來亨屢突圍不出。八月初五日。焚其妻子而自縊。茆寨破。餘衆數千人皆被殺。唯留婦女散給營伍。馬騰雲拓天寶王光興皆降。密不忍沒其事而詳紀之。是可貴矣。密詩有寄託。以大江流漢水。孤艇接殘春爲王士禛激賞。非其至也。惜其集散佚。僅存五十七首。幸北征詩經錢謙益稱爲必傳者尙存。崎嶇兵間。自順治四年至十五年。復間關數千里。事變紛乘。倉皇避匿之情。歷歷如繪。信是奇筆。

北征

邦國遇盜炭。歲已八九徂。展轉山澤間。困鬱意不舒。壬辰十一月。始發自成都。于時正凜烈。北風傷肌膚。老父方多病。乘牛取長途。官道長游兵。山徑暗崎嶇。所賴多戚屬。恩愛相將扶。敗絮惡且棄。天寒不可無。荒絕驛路亭。但尋人跡下。或復鬼神祠。或復殘廬舍。過水寒侵骨。登山泥沒膝。行行無所止。日暮粗得息。筋力已困疲。伐薪具炊食。野燒周四圍。慮爲猛獸得。腸胃如枯移。塵羹潤顏色。菲乾刺同刃。刈拔偃終夕。低頭就火視。流血浸肘腋。長松勢百尋。巨石橫一里。寒草藏開花。枯藤留結子。花開色何皎。子結味何旨。人力徒辛勞。天地物皆美。沿途苦荏苒。除夕至綿州。烽火正擾攘。秣馬隔江流。出檄示軍官。呼人爲濟桴。一鼓入城中。破屋何所求。士卒感苦辛。各出飯一盆。嗟嘆令強食。毋以飢煩冤。苦深精力消。皮肉皆血痕。親戚在聞州。可以救朝昏。作書一尺紙。爲報家人存。綿州城何大。中川之要津。舳艫接南楚。車馬通西秦。勢重控部落。赫奕鎮文臣。濟濟數萬家。一旦化荆榛。狼狐白日走。魍魅哭城闔。全蜀盡枯骨。陰晦聚災屯。害氣久不絕。耕鑿困遺民。親戚自遠道。來迎當春天。乞假各數騎。背瘡深可憐。大馬一無轡。小馬一無羈。雙臂牽藤蔓。聊束耨與氈。馬力亦何少。相易出長道。曠遠憂意外。馬飢嘗啣草。婦女艱難行。痛哭心慘哀。負物置宿莽。喘息還復來。藏身匿村樹。狙伺人歸道。畏恐驚舍去。侶伴不敢呼。日暮至一家。炊飯若珍珠。老人置上座。再拜謝荒蕪。我顏如僮僕。食我堂之隅。飢人歡一飽。寧問禮義屬。往往官長閒。亦復相餽餉。果月至聞山。毛髮盡焦枯。古時蜀道難。棧閣下方軌。葭萌諸郡縣。桑蠶遂生齒。後世割襄中。恐滋羣盜壘。利闢爲門戶。大軍嘗磨指。東川旣已沒。西川旋不守。捍關一夫當。

賊人如摧朽。始知遠畫策。不在險與否。因頓留十日。買舟意欲東。倉皇奉老親。出此豺虎中。江漢幾卅年。衰弱病成翁。颯然翻飛意。不復故豪雄。衆庶罹喪亂。我復爲勞人。一朝辭墳墓。相望若崑崙。卽此眼中路。皆可成海濱。淚落如黃河。舊事痛不已。寸心思無窮。隱忍未能舉。茫茫者天涯。微身曷所止。二三骨肉親。居處各異里。當此無家別。安能不傷毀。天地固無情。人生豈終否。棲遲田野間。白首佳山水。我自種梧桐。遣妻樹蘭芷。村釀亦已熟。歡笑偕稚子。俯仰既無憾。且夕肆樂只。歲晏弗屋寬。狂歌從此始。

燕峯
詩鈔

亂後入青原山

遠郭寒烟野霧昏。殘僧遙指舊軍屯。河山百戰埋金甲。烟月三年度玉門。兵氣累時猶未解。吾生已老更何論。不將淚灑黃師塔。拋滿蘆花當一樽。燕峯
詩鈔

王夫之 薑齋文集十卷補遺二卷經義二卷五十自定稿一卷六十自定稿一卷七十自定稿一卷薑齋詩分體稿四卷薑齋詩編年稿一卷薑齋詩贖稿一卷柳岸吟一卷落花詩一卷遣興詩一卷和梅花百韻詩一卷洞庭秋詩一卷雁字詩一卷做體詩一卷嶽餘集一卷憶得一卷船山鼓棹初集一卷二集一卷瀟湘怨一卷

王夫之。字而農。號薑齋。又號夕堂。或曰一瓢道人。雙髻外史。晚居石船山。自署船山病叟。學者稱船山

先生。衡陽人。崇禎十五年舉人。永曆建號。夫之嘗共管嗣裘起義兵于衡山潰敗。乃入粵。以瞿式耜薦爲行人司行人。時政局水火。連上三疏伸正論不納。庚寅順治七年移疾歸。後屢有招之者。筮得歸妹。作章靈賦以見志。遂不再起。四十年間。專意著述。卒于壬戌。康熙三十一年年七十四。事具清史列傳儒林傳上。撰船山遺書。康熙中刻者十餘種。四庫全書以其說經諸書入錄。道光中刻十八種百五十卷。同治中重刻爲五十九種三百二十二卷。近歲刻成者七十種。三百五十八卷。尙有知其名而未見。與不知其名而見者。時時增益。蓋夫之避地往來。或入深山。或居偃硯。筆札取給于門人故舊。所纂皆蠅頭細書。首尾不懈。書成。卽舉以贈之。鄉人皆知寶貴。故經數百年歷禁忌而其稿尙存。夫之爲學。宗張載。撰張子正蒙注九卷。復闡爲思問錄內外篇各一卷。主張以格物爲始教。而惡夫離物求覺者。大意謂人之所以爲人。不能離乎君民親友以爲道。則亦不能舍夫人觀物曲以盡道。其固然也。今使絕物而始靜焉。舍天下之惡而不取天下之善。墮其志。息其意。外其身。于是而洞洞焉晃晃焉若有一澄澈之境。置吾心而偷以安。又使解析萬物。求物之理而不可得。窮測意念。求吾心之所據而不可得。于是去其本有。疑其本無。則有如去重而輕。去拘而曠。將與無形之虛同體而可以自矜其大。斯二者乍若有所睹而可謂之覺。則莊周瞿曇氏之所謂知盡此矣。然而求之于身。身無當也。求之于天下。天下無當也。行焉而不得。處焉而不宜。則固然矣。于是曰吾將不行奚不得。不處奚不宜。乃勢不容己而抑必與物接。則又洗洋自恣。未有不蹶而狂者也。此言固爲陸王攀援佛老而發。實則痛夫高談理論。不切事勢。敗壞國家之事。至于不可收拾也。六經

皆有餘釋。多考訂草木魚蟲。山川器服。以及制度同異。字句參差。則又奉朱熹之教。一生要旨盡在黃書。痛心族類之不能自保。推原禍亂之始。戡定之略。書成于丙申。順治十三年猶冀故物可以光復。故自序云。爲漢大行。忠效捐也。悲慙窮愁。退論旃也。明明我后。迭播遷也。俟之方將。須永年也。黃書之所以傳也。意在斯乎。千百年後讀之。猶令人凜凜有生氣。繼之而作者。王戊康熙二十一年有噩夢以論治宗教本。謂吾老矣。惟此心在天壤間。誰爲授此者。故曰噩夢。蓋亦如久矣不復夢見周公。聊志其思窮望絕之悲。推之己已康熙二十八年而有識小錄。以紀朝章國故。謂盡垂死之孤心。外此則有搔首問。述一時人才。不能禦侮救亡。以致同歸于盡。夫之本有史才。所撰永曆實錄。雖間不免傳聞失實。而不誣不苟。有足多者。讀通鑑論宋論。讀史有識。或謂皆針對順康間時事則非。深山窮谷中。何從知有朝局乎。所撰詩文甚富。今能見者。薑齋文集十卷。補遺二卷。五十自定詩一卷。六十自定詩一卷。七十自定詩一卷。薑齋詩分體稿四卷。薑齋詩編年稿一卷。薑齋詩牒稿一卷。洞庭秋詩一卷。雁字詩一卷。傲體詩一卷。嶽餘詩一卷。憶得一卷。船山鼓棹初集一卷。二集一卷。瀟湘怨一卷。其文善能闡發名理。詩學六朝初唐。取徑甚高。而深情一往。往往令人悲涕。其論詩見于詩譚夕堂永日緒論者。謂子建曹植不如子桓。魏文帝元美王世貞不如元敬。王世貞是有真知灼見人語。不喜東坡以至淮海劍南。或以深惡虞山錢謙益之故。然頗持平。非難陽明。而不許呂留良以東坡擬陽明。亦不許世人以元美擬東坡。謂非其倫。七子鍾譚皆在非薄之列。亦不盡沒其善。嘗以文章之變化。莫妙于南華。詞賦之源。莫高于屈宋。因作莊子解莊子通楚辭通釋。知其爲文。汪

洋恣肆。蓋得力于此。鄧顯鶴論其遺書。謂其時海內碩儒。北有容城。西有整屋。東南則崑山餘姚。而亭林先生爲之魁。先生刻苦似二曲。貞晦過夏峯。多聞博學。志節皎然。不媿顧黃兩先生。顯鶴之言。可謂能知夫之者。然夫之獨完髮以終。有手書惜髮賦。清季猶存。又顧黃之所不如也。歐陽兆熊頗能屬文。兩刊船山遺書。皆與其事。述夫之晚歲完髮。伏居一小樓。不輕與人接。郡縣長吏。閱其艱貞。功令雖嚴。多所寬假。知府崔鳴鸞赴官。獨思掩執。率衆登樓。見夫之短衣科頭。拱手而立。其容粹然。不覺匍伏至前曰。爲存問來也。蓋衡邵間相傳如此矣。

讀指南集二首

絳節生須抱壁還。降牋誰捧尺封閑。滄波淮海東流水。風雨揚州北固山。鵝血春啼悲蜀鳥。雞鳴夜亂度秦關。瓊花堂上三生路。已滴燕臺頸血殷。

揚州不死空坑死。出使皋亭事未央。鳴鳩春催三月雨。丹楓秋忍一林霜。礪門鶴唳留朱序。文水魚書待武陽。滄海金椎終寂寞。汗青猶在淚衣裳。五十自定稿

廝蕨行

未乙

清晨上南坂。蕪草深沒腰。黃雲冒山起。雪花零亂飄。雪子穿機笑。雪花漫機衣。飄衣濕尙可。懸愁空篋歸。土皮滑白斷斷柄。短莖泥重淘寒井。黃茅蓋頭雪侵領。奮椎力盡剛過頸。絲絲咽咽聲可憐。阿兒涕墮牽絲餅。流泉渾渾濁如藍。朦朧猶見伶仃影。伶仃相扶過眼前。黃綿襖子雀兒氈。夢裏春光快活天。君不

見。馬槽□□東去。雪花灑血痕丹鮮。五十自定稿

石門有靖康勒字

歷茲已非今。俯仰互幽思。蒼鱗疊薜蘿。女暈翳陰翠。彷彿靖康初。蒙茸頽崖宇。南維壤猶平。東京道已墜。道墜情易傷。壤平地堪避。通軌達崇岡。嶽徑足遙通。我行遂窮年。山川長危惴。漚沈豈終古。板蕩猶不甯。惻矣曠古懷。傷哉孤遊闕。薑齋詩分虛稿一

後廡蕨行西辛

冬朔晴。粟價輕。下澣雨。高懸杵。湘岸不生梁與黍。去年禾穗羊尾長。黃雀高翔脫空倉。丹崖碧巖崩頽唐。千椎萬椎搗晨霜。餅未熟。糲子哭。里長如狼下白屋。油蓋倚門高坐笑。長虹吸川飢鷲叫。蒼天蒼天不相照。長星曳空徒陡峭。孤雛何當脫羣鷄。

廡蕨根。采蕨苗。蕨苗已長根粉消。電如彈丸雨如簇。荷鋤空望青山哭。大家倉庾皆封閉。懸望開倉如開

霽。輦金輸官援新例。紵絲錦袍春風麗。搖鞭笑指荒煙際。錯落何為被蒼翠。薑齋詩分虛稿二

不雨

百年勝野哭。三楚正蕭條。稍測兵戈意。無疑雨零驕。澄潭星影窄。輕吹晚陰消。涼夕終難適。蒼生一念

遙。薑齋詩分體稿三

後不雨

幸自忍長飢。蒼天不易知。飄風千嶂落。銀漢片雲疑。秋氣先中夜。暈霞驗異時。傷心長記得。步禱聖衷悲。癸未北畿旱。思朔步禱南郊大雨霽足。 體稿三

黃周星 九烟先生遺集六卷

黃周星。冒周氏。字景虞。號九烟。湘潭人。崇禎十三年進士。戶部主事。本出于黃。遂復黃氏。為上元人。明亡不仕。自稱黃人。字略似。號半非。別號圃菴。又曰汰沃主人。笑蒼道人。寄寓南潯馬家巷。詩文書畫篆刻。無不精妙。憤激尤甚。汪有典史外。誤稱其以庚申康熙十年十五日自沉于維揚。年七十。蓋沉于南潯。杜濬有絕命詩書後。明其非僞。謂可駕三閭。信然。有九烟先生遺集六卷。周星先有芻狗齋集。板毀。又有夢史。圃菴詩集。百家姓編。人天樂傳奇不傳。見范鐸潯溪紀事詩注。近人有藏鈔本前身集二卷。題黃九烟先生撰。後身樊舟楊凌霄搜錄。楊事迹無考。或在周本之前。昭代叢書有衡岳游記。廋詞。酒社芻言各一卷。此本既收將就園記。何以不備收之。呂留良東莊詩存。寄黃九烟詩云。聞道新修諧俗書。文章買賣價何如。自注。時在杭為坊人著稗官書。既曰諧俗。是章回說部也。惜不得其名。

和楚女詩十首

楚女初不知姓名。邑里。有燕客游於楚者。云甲午之夏。此女遭兵掠至漢江。赴水死。其屍逆流千里。越洞庭湖而南。為漁人所獲。玉貌如生。年可十四五。有素腕繫左臂甚固。發視得詩十首。人爭傳寫。遂達金陵。命得之於林子屬頤。讀其詩。咸意為湘江女子也。秋燈蕭颯。倚韻和之。頌賦諷歎。愧深於慚。

長夜綿綿未五更。荒天老地盡愁城。誰傳十首湘娥怨。一夕千秋萬感生。

嬌羞曾未識公姑。天枉空憐反哺烏。孝烈名香真不朽。須知生女勝淳于。
孤竹文山是弟兄。奸雄聞此定心驚。湘娥雖死何曾死。蝮志當年本不生。
誰人敢勸易羅衣。萬丈洪濤撒手歸。卻笑黑江何見晚。琵琶空自惜明妃。
字字分明正氣歌。光爭日月豈須多。春蘭秋菊哀終古。還勝投詩贈汨羅。
玉折蘭摧此一時。隨光正則是吾師。江潭漁父非漁父。帝遣神收絕命辭。
委蛻千秋卽異珍。貞魂豈復滯江濱。天龍八部齊驚拜。簡是文章節義身。
萬劫真容儼未笄。汗青重見女夷齊。鬼神但識西山事。此是西山又向西。
只宜讚歎不宜悲。如戟元非卓氏眉。千里逆流生氣壯。皇天后土可曾知。
幾多忠孝殉君親。造物於今頗不仁。眼見珠沉連玉碎。癡頑長樂是何人。

九烟先生
遺集四

杜濬 變雅堂文集五卷茶村詩三卷變雅堂詩鈔八卷變雅堂遺集二十卷

杜濬。本名紹先。字于皇。號茶村。黃岡人。崇禎十一年副貢生。僑寓江寧者四十年。卒于康熙二十六年。年七十七。事具清史列傳文苑傳。方苞杜茶邨先生墓碣。詩文及身刻者。詩有倦游草。三山游詩。聞喜詩。游攝山詩各一卷。文有變雅堂文集五卷。別有不分卷本。文多數篇。似是初刻。其詩未盡刻。而刻者復流行未廣。後來增輯者。汪觀有茶村詩三卷。刻于康熙五十二年。取已刻詩亂其次第。不錄序。稍有增

益。爲詩共二百餘首。獨無古體。卓爾堪遺民詩久已行世。所選濬詩一百五十餘首。多爲未刻稿。竟未之見何也。乾隆中彭湘懷陳師晉求得詩六百五十首。刻爲變雅堂詩鈔八卷。後來遞有增益。光緒中。始刻爲變雅堂遺集文八卷。詩十卷。附錄二卷。濬才氣奔放。不可一世。詩學太白。尤工五言。幾于蓋代。他體間有粗率類唐者。後人擇之未精。乃知不刻。具有微意。文學三蘇。純乎氣勝。志傳亦以議論行之。傳者九十八首。若再蒐輯。當可得二十餘篇。然足存者僅矣。濬老而益貧。貧而益狂。傳濬事者多異聞。謂錢謙益訪之。拒不與見。又謂謙益過貶公安竟陵。將爲楚人報仇者。濬兄弟皆受謙益之知。濬有投獻詩在集中。晚乃漸疎。吳偉業爲國子師。形迹亦不密。索性通脫。侈用不節。自言絕糧而未絕茶。茶與馬弔爲時深害。茶值十倍于糧。苟能絕茶。其糧無絕理。唯羹鼎孽可以振之。然贈之詩曰。漸喜白頭經世故。錯將青眼望他人。蓋譏之也。次則熊賜履。慰藉多而沾溉少。又有謂仇家取其稿焚之者。方苞言著述手定四十七冊。陳大章言未刻詩三千餘篇。雜文一帙在上元張氏。祕不示人。大章之子師晉。言全稿在金陵某氏。天門唐太史嘗親見之。則付之一炬。殆爲虛語矣。三十年前。嘗于書肆見鈔本茶村詩文二十餘冊。多出刻本之外。度其書尙在世間。好事者終有得之一日也。

燕磯感舊

歲在辛巳。余年三十有一。東遊鹿城。荷諸同人錢送于燕子磯者。爲四明薛千仞。時八十二。內江范仲開。秋浦劉伯宗吳次尾。莆田林茂之。桐城方直之。江寧顧與治。雲間張友鴻。貴竹楊愛生。方外則道開懶先。虹裙則

崔未驚字瀟如。狎客不記。今無一存者。知韻之次。編懷曠昔。再成一詩。亦可以知余之老而無賴矣。

坡陀山半結飛樓。壯歲曾叨餞遠遊。綵筆雕弓俱氣象。美人名士各風流。暮帆遙指青山峽。夕照斜通白

鷺洲。惆悵一時消歇盡。獨張老眼望難收。變雅堂遺集七

竹枝辭余客京師八十日。陳簡以前既忽忽無暇晷。榜後報罷。益用慨然。懷刺騎馬。殆非吾事。反鎖衙門。守環堵時多。惟一二知舊。顧者皆之。招者起之。時則一出就吾身之所至。目之所觸。戲成俚語如干。私用破涕為笑。舉一

漏百。吾知不免。大概不能言其所不知。又其大者。臣未敢言也。

死卻村郎就好婚。有緣嫁得四衙門。高燒銀蠟從君看。脂粉能遮假哭痕。

案四衙門者。明季科道稱兩衙門。以其雄峻也。合翰林院吏部。一清一要。則為四衙門。

去驢來馬日紛紛。畫罩飄飄看不分。莫怪女郎單著袴。男兒臉上占伊裙。

茅簷灰壁挂琵琶。皮袴高盤炕上擱。卻說客來休見怪。竟無新蒜點香茶。

紫花衣服著來多。打扮丫蠶付賣婆。急向街頭呼太太。快回鍋上烙波波。

老店馳名劉鶴家。三錢買得好烏紗。昨來誤怪稱呼別。乞丐相逢總喚爺。變雅堂遺集九

陶汝霖榮木堂集三十六卷

陶汝霖。字仲調。一字燮友。號密菴。湖南寧鄉人。崇禎中。以貢生廷試授知州。不就。弘光時。為何騰蛟監軍。永曆時授翰林院檢討。入清不仕。順治十年。罹叛案論死。陳名夏密屬洪承疇寬之。然猶羈繫年餘。至十二年始得脫然。晚遂祝髮滄山。號忍頭陀。卒于康熙二十二年。年八十二。初刻廣西涯樂府。曠古集。楊玉堂集。寄雲樓集。繼乃編為榮木堂全集。編詩止于康熙十八年。當即此時所刻。為文集十二

卷。詩集十卷。續集六卷。樂府三卷。憶京華曲一卷。若菴集杜一卷。律陶一卷。詩餘一卷。密翁聲律一卷。凡三十六卷。汝鼎早入復社有名。工詩與竟陵習。然不受其熏染。紆懷壯物。聲情並茂。患難以後諸作。激越淒楚。所謂皇天后土。可鑒野老之心。五岳九洲。共聽空山之哭者也。文善馳騁。楊文聰何騰蛟兩傳。最資考證。哀湖南賦。悽戾過于蘭成。足稱湘纍之遺。

郡城五日友人設蒲尊延眺矜子再生書此志歎

午甲

荒堞新生水。茅茨暫寄廬。如何過五日。尙得勝昨年。病羽開籠後。安心墮甑前。信然絲續命。往矣粽投淵。喧雜遼軍馬。孱殘士女船。時官軍圍獲北還豈能佳節序。未敢適餐眠。但望愁城暗。翻驚率野便。獨男應意暢。多客故情憐。松莛澆煩渴。蒲尊解鬱煎。且容閒繞樹。深感舊聞蟬。莫問山菴下。榴花然未然。榮木堂詩集四

白水六月五日

此地餘茅屋。相隣近釣磯。林香吹岸噴。竹粉颺披衣。野曠人烟貴。兵深物命微。得閒殊自詫。何敢憺忘歸。榮木堂詩集五

亂後曉出活溪

落日曠清野。飛星隱暗岑。村荒燐火密。水涸旱雲深。不測憂前路。無端創此心。溪邊何處寺。迢遞起鐘音。榮木堂詩集五

放還貽別諸同難者

填海移山事豈成。湘天不明人夜行。十年離亂各風雨。一劫修羅共死生。遼鶴乍來城郭變。枯魚縱去江潭平。歸歟莫負雄慈力。好着袈裟安釣耕。

收召離騷舊日魂。振衣誰遣出神門。餘生自恥矜微命。不殺何詞怨大元。鏡裏霜華寧苦節。藥叢忍草是中根。從今悟得真身在。難與君親浪報恩。榮木堂詩集七

陶之典 冠松巖詩稿八卷文稿六卷

陶之典。字五徽。號石谿。汝隸子。拔貢生。入清不事科舉。屢薦不起。與父同隱。康熙十八年。應安親王徵。從軍典文詞。逾二年。力辭歸。四十年。年已八十。乃錄其詩文十之四。爲冠松巖詩稿八卷。文稿四卷。雄傑稍遜其父。而較雅飭。詠史詩盈一卷。極有特識。述前代事多出以婉約。蓋學養深醇。不作亢厲之詞也。

簞洲麥秋行

江村麥秋連雲黃。與客散步簞洲場。老翁挈孫嫗引婦。荷穗載稭紛夕陽。車塵袞袞荻沙上。柳下聚息勞酒漿。幾輩顰顏最作苦。食罷經營到餘稌。驅牛曳石踐籽行。左紉右鞭貫三五。騰騰旋犢如旋駒。我欲畫圖贈農父。見慣田家樂事多。江湖觸目思轍阿。北鴻南燕各異向。長年占風情奈何。田父搖頭笑相謂。君

不見。楚人終歲勤婦子。饔飧輟盡逋催科。冠松巖詩稿四

量田行四十韻

今年冬日暄山谷。老翁未敢墮戶伏。勇隨丁壯走田間。越陌不須扶杖竹。初做繩弓妙卷舒。準之隸首十失六。明府權衡良法中。繩尺兼施憑按覆。量雲量水皆有依。山農石農罷愁顛。五日踏徧雙鳧莊。自此攀蘿入深麓。風前有毡不暇煖。朝履青霜暮削牘。循北穿雲折入西。所過高原夾溪澗。怒蛟每歲鼓洪波。鐵犀不得保沈陸。我有膏田在水濱。強半分與鷗鳧宿。已沼已谷當荷鑷。此後崩蹇弗忍卜。去年則壞軫此瘼。帶入水鄉百一錄。亡何田正手高低。無土橫加翻見蹙。羅織析渺輸寸心。皇穹皎日相昭暴。昨日有人州府來。傳說案成難改縮。腐儒束手思再三。惟有自誣合其目。版書一篋重吮毫。雪飛正奪簷下曝。深山田夫特踞侮。嗔我踰額詞不服。還將好語慰諸農。爾輩常租豈苛贖。于今在上皆仁人。此事終當蒙辨鞠。神君秉鏡清渭分。憲節褻帷一路福。藐茲陋邑誠叢爾。生產所殖惟一穀。百需仰給田疇登。糶賤從來鮮聚畜。征科密後戶籍虛。兵燹深時歲災復。舊家不競五十年。門閥大抵盡碌碌。自從邵陵耕者來。引類舊畚新比屋。幾年布滿西南鄉。荆榛復化爲穰陸。却與田主抗主賓。逋租瀆法非良族。一朝颺去棄如遺。連阡轉盼成荒幅。稷鋤無根稅有根。有識不言憂在腹。向非憲府真滌除。紛紛無藝難更僕。眼前陵谷且不常。往代桑麻安可復。慨披前明舊版章。賦目初終殊不副。當時神廟末年間。五斗遂已徵三斛。田額何如賦額多。請將兩額揆之熟。聖代愛民邁堯禹。四訖無垠切含育。倘茲徵鑿萬里明。恩膏浩沛非霰露。人情

爲田古記之。億萬斯年敦井牧。謠云丈後有豐穰。明年擬快幽風讀。老翁奔走行復歌。一雪更晴天賜燠。

冠松巖
詩稿四

人耕

亂後田家耕牛盡
絕。五人共曳一犁。

雨蔓荒疇草。人犁春晝陰。樹間殘餉薄。谿上伍耕深。竟日牽江力。全家祝歲心。寧知輸輓急。流馬正駸

駸。冠松巖
詩稿五

張仁熙 藕灣詩集十卷

張仁熙。字長人。廣濟人。諸生。喜讀史有識。頗知當世之務。爲文震孟所稱。入清避居藕灣。屬海宇久定。始無意世事。專寄情于詩文。而民生疾苦。猶言之不休。則天性然也。嘗預修湖廣通志。且一至京師。蓋爲謀食。有歸來詩云。歸來不覺鬢如絲。下馬愁看靖節詩。稼穡豈能酬國稅。兒孫粗解讀文辭。不得已之情如見。鴻博之薦則不赴。同里唯善顧景星。喜顧黃公奉召得放歸云。海外爭傳姓。人間懶閉關。猶聞開寶詔。肯放白衣還。開寶詔言取士不公。只著一懶字。而多此一出之意已顯然矣。卒于辛卯。康熙三十年八十四。專具清史列傳文苑傳。撰藕灣全集。爲詩初集十卷。作于明季。二集十卷。入清以後作。文集九卷。此其二集也。仁熙論文尊北地歷下。而不薄唐歸之文。鍾譚之詩。初作多近七子。中年以後。五言師靖節。七言有神似工部者。蓋不拘拘一體也。

役夫行

癸卯。西山之役。濟一歲
索夫三千一百七十焉。

二月征轍急。呼號震四鄰。田夫始輟耕。入市動經旬。驟聞府帖下。合邑點行頻。斯須羽檄至。直入無邊巡。堂上王命懸。堂下列校蹲。邑宰當門坐。里正當衢噴。軍令有生死。震撼若鬼神。結束在旦暮。無自魂
踈。朝廷嚴小醜。何得爲不仁。大旗耀郊原。機衣披厥身。祖社割片肉。剋日已車麟。依依楊柳途。切切
雨風晨。夜半啓私戶。低頭拜二親。此行恐不反。努力備水薪。號呼但一哭。無乃太苦辛。藕灣詩
集一

賤穀行

中原昔喪亂。原隰繁稗莠。人間好女兒。賣粟不盈斗。今茲云暫休。禾麥徧田藪。斗米三十錢。胡爲增惡
醜。賤穀應嚴徵。無以當擊掊。指苗作官糧。說稼充吏手。頗聞禾滿篝。依然星在甍。長吏肆虔劉。有足不
履畝。喜言民生輕。惡惜國本厚。皇天顛倒深。理數難遽剖。委軀塞薄田。碎骨酬大有。信知尊金錢。無爲
耒耜扭。藕灣詩
集一

十月雷雨歌

十月雲雷報雨天。夜半雨急雷闐闐。雷聲雨聲喧不歇。掣電相與爲周旋。是時比屋無燈火。家家膽破眠
復坐。一百五十日苦晴。茲雨茲雷何滂沱。俗儒讀書苦不通。十日五日問天公。九月不瑞冬寧好。低聲欲
死心忡忡。須臾五更雞鼓翼。雞鳴不畏雷雨亟。雞雖細小亦知時。人生何事長悲靈。君不見。居民望麥終
宵泣。十月不雨何嗟及。須臾天明雨不休。農夫喜雨雨中立。藕灣詩
集二

食粟行

朝臣不食朝中祿。山人應飽山中粟。山穀初熟半輸官。雀鼠依舊取官殘。我住山中飽橡栗。橡子苦澁非粟匹。大栗如泡小栗珠。青滿山巖黃滿岫。我欲往摘筋力軟。百錢可市六觔半。老來食粟無官租。朝朝蟠腹山之隅。噫吁嘻。朝臣有祿胡爲乎。藕灣詩集三

雨雪行

雨雪黨風劈面飛。行人踏雪牽短衣。上有啼鴉下有虎。縣胥執冰驅人怒。今年八月食無禾。此是上天遣蟲磨。南滇西蜀兵不解。有米無錢何處買。健兒插羽向大官。大官不敢說民殘。民爲國本何嗟及。且共妻兒忍饑泣。但願大官笞且鞭。莫遣荷枝立雪前。藕灣詩集三

皮人曲

年年六月田夫忙。田墜草土設戲場。田多場小大如掌。隔紙皮人來倚伴。蟲神有靈人莫惱。年年慣看皮人好。田夫蒼黃具黍雞。紙錢羅案香插泥。打鼓鳴鑼拜不已。願我蟲神生歡喜。神之去矣翔若雲。香煙作車紙作屨。蟲神嗜苗更嗜酒。田兒少習今白首。那得閒錢倩人歌。自作皮人所大有。藕灣詩集三

庚申六月二十六日雨

數載朝饑仇旱魃。暫時一雨卽波臣。直穿海氣迷牛馬。畏壓潮頭辨鬼神。急浪浮屍胡迫促。陰風頽郭太酸辛。分明野老聲聲哭。欲斂驚魂聽未真。

萬曆年間一老存。殷勤猶話昔煩冤。桑田舊壘多興革。白髮長河變子孫。魚腹佳人曾翡翠。斷虹明月幾黃昏。天啓癸亥。樊氏婦方曉粧。水至漂沒。崇禎戊辰。龍雨春風橋斷。民多鬪死。絳人我亦垂垂叟。鳩杖閒扶恨屢吞。

近聞京邑尚飄搖。何況山城舊次漈。莽岳亂垂垂瑤瑤滿。驚霆白捲雪山驕。蕭蕭民事勞鯨窟。黯黯天書託聖朝。此去東南咸澤國。倘能災祲一齊消。藕灣詩集六

顧景星白茅堂全集四十六卷

顧景星。字赤方。號黃公。蕪州人。貢生。弘光時考授推官。南都之覆。遜于澱湖。爲貝勒土賴所得。令以原官隨軍。南征浙閩。固請始得放歸。自後屢徵不出。己未舉鴻博。敦促至都。病未與試。卒于康熙二十六年。年六十七。事具清史列傳文苑傳。及其子丹所作行略。景星少有神童之譽。龔鼎孳識于總角時。目之曰江夏黃童。天下無雙。長更博覽。才氣縱橫。詩文雄贍。稍欠剪裁。與黃岡杜濬齊名。稱杜顧。又與唐濟張仁熙竟陵胡承諾吳驥稱江漢逸民。撰述至多。動盈百卷。今皆不傳。傳其白茅堂全集四十六卷。白茅取易无咎之義。然猶時有怨詈。詩學韓杜。文似子瞻。志傳之作。及詩中自注。多足與時事參稽。李新傳記李新死事。張獻忠爲詩大書驛壁弔之云。山前山後皆出松。地平平地柳成陰。桃李笑柳柳比松。千秋萬古還是松。關西張秉吾題弔李新。據此知獻忠字秉吾。爲他書所未及。景星與寶應陶激行跡不同。峻潔則一。故交情最篤。並世之人。少所許可。獨于龔鼎孳有過情之譽。則知己之感使然。

寡婦謠

荒區寡婦哭向天。餘生養豕為命田。一豕不食二豕死。里正坐需無酒錢。門前縣吏打門急。今歲剛征四之一。鬻身鬻子計莫施。懷中只有乳下兒。剛古華切。預征來歲曰剛征。有。白茅堂。糧無田曰荒區。命田亦方言。集四

吳易擒

不見降旗出。喧傳廣斬過。帳前縛已急。坐上客如何。野老看軍竈。幽人望薜蘿。渡河千騎入。四面起鑿歌。

斗大婁東印。兵聲滿太湖。量沙總兒戲。阻水是窮途。游卒初傳箭。樓船輒獻俘。道人金粟夢。穩在白

雲無。先玉山自號金粟道人。別業在。白茅堂。湖中。白雲海奉母齋居樓名也。集六

昌按詩話紀事。吳易。字日生。吳江進士。聚衆太湖。白布裹頭為號。皆七郡貧民。分巡嘉湖副使誘擒之。獲監國魯王敕九道。一曰敕諭都察院右僉都御史吳易。二曰敕諭都察院右副都御史吳先生。加兵部右侍郎。賜上方劍。三日特旨兵部尚書長興伯。四曰贈易父太學生吳邦緒。總督浙直太保兵部尚書長興伯。五日贈吳易母一品夫人。六曰晉封寶應伯。七日封吳易妻一品夫人。八曰晉封婁東伯。九曰武康伯。獲銀印五顆。長興伯印。清河伯印。寶應伯印。真東伯印。武康伯印。又將軍印九顆。奮揚將軍之印。平朔將軍之印。復宇將軍之印。度遠將軍之印。興原將軍之印。滅虜將軍之印。破虜將軍之印。關防六顆。長興藩標察額糧餉戶部關防。長興藩標理餉戶部關防。長興藩標贊募監紀關防。長興藩標協理監關防。長興藩標督領戶部關防。

揚州鈔關

相傳故相史公可法死難處。或云。投城南九龍岡水。墓在廣儲門外。

鞞鼓山陽下。人傳相國亡。傷心五馬渡。畢命九龍岡。兒女還絲竹。春秋孰酒漿。他年徵軼事。野史更

推詳。白茅堂集六

月夜望鄧尉山 一名萬峯

往事憐吳易。因之笑許都。聞之先君曰。許都曾新夢蘇州掌左司。安冕人判曰。授命永昌。因有異志。後改斬首懸錢塘永昌門其應也。庚申歲宜興將。投與昌談任事。昌言及之。曰。此吾兒時友。奈何竟不知其陷大賊。天

應造草昧。勢豈辨萑苻。漢鼎移羣盜。秦坑果豎儒。遂令烟水地。流血滿村隅。崇禎癸未義烏諸生許都作亂。白茅堂集六

訴水 諸郡大發征卒催科甚急

閉戶已三月。里正門外呼。荒田數十畝。轉運亦有夫。力完二稅畢。舊穀已空虛。牽牛昏正中。臥穰牛未枯。鄰里壯丁去。協作誰與俱。黃雀滿野田。盼鼠成羣趨。前丁既點行。後者仍疾驅。鰥者再無人。惟有死與逋。念此軍國事。賤子敢踟躕。減口給里正。慎勿勞吏胥。側聞官司懼。昨夜下兵符。將軍五萬卒。失利鄖陽嶠。鐵馬京師來。且暮辨所需。新槽及菽豆。不得緩斯須。首種春不入。稻穀生路隅。麥水忽汎濫。原野同江湖。菽棉秋之半。滄瀆隨沙淤。饘粥且不給。何以成衣襦。荆襄實上流。彭蠡斯下瀦。濱江數縣地。萬里先為魚。圩堤一夕破。老幼攀枋楡。鵝鴨啄人衣。曳挂惡木株。古塚無前和。新墳無故墟。他鄉且去去。不卜還來居。水本是陰氣。哀怨今何如。已輸今年賦。詔免何年租。神宗昔御統。水患亦可虞。萬曆三十六年四十年皆

一年皆大水當時承平久。中夏無兵車。細民豈憂國。所禍在切膚。安能訴上帝。火急誅天吳。白茅堂集十二

六合望黃靖國祠

土人云。祠在六合縣湖江。公名得功。字虎山。開原之遼海衛人。以功累官太子太保總兵官。蔭錦衣衛千戶。爵靖南伯。甲申定策江南。進封靖南侯。太師柱國。分藩滁和廬舒等處。明年。五敗叛兵于

蕪湖。進封靖國公。大清王師奄至。公中流矢。仰天自劉。五月二十八日未時也。據後軍都督宋紀墓誌。順治丁亥八月二十日。葬公固安之東原。配王氏劉氏。皆封夫人。合墓。公生于萬曆甲午十月二十二日。享年五十二。燕領豐髯。面色黑。人以鐵羅漢稱之。當弘光改元。公入賀。拜畢。趨上殿跪牽帝衣起。頓足哭曰。皇帝汝今好也。苦矣先帝。帝亦流涕。予重過金陵詩曾及之。

異代還祠廟。忠魂竟若何。過江無王氣。遶冢只頽波。落日鳴陽鳥。悲風望駱駝。糶糶登弔少。寂寞故山河。白茅堂集十三

聞杜于皇幾以文字得罪

杜濬久不見。嚶鳴空友聲。多言愁子貢。無語失嚴明。春白胸中貯。磨兜坐右銘。吹毛非大雅。曷遂野人情。白茅堂集十三

胡承諾青玉軒詩七卷菊佳軒詩十卷檄游草一卷頤志堂詩八卷

胡承諾。字君信。竟陵人。舉人。入清不仕。卒于康熙二十年。年七十五。生平為有用之學。著繹志十九卷。讀書說四卷。至清季始刊行。原刻青玉軒集七卷。為崇禎十六年癸未迄順治九年壬辰之詩。菊佳軒詩十卷。為康熙元年壬寅迄十二年癸丑之詩。檄游草一卷。則康熙五年丙午辭選官所作也。頤志堂詩八卷。為十三年甲寅至二十年辛酉之詩。于是三十九年之詩咸備。王士禛稱其博學工詩。尤長五言。承諾為學人。詩其餘事。即以詩論。所成就者。似尙在顧景星張仁熙之上。

飛芻行

前舟振柁後舟發。軍前輓草無時歇。所飼飛龍厩上乘。不爾拊秣乏軍興。一金須載十金詣。十斛纔抵一斛稅。原頭碧草露如珠。不似勞人淚易枯。君不見。時清戎馬少。寧食粟肉莫斲草。菊佳軒詩二

役者諷

昔有香山翁。曾賦杜陵叟。作詩字不多。諷誦時代久。昨秋旱如焚。野田絕稂莠。大吏行災傷。飛章聞旒。帝曰吾赤子。何辜罹此咎。放租十之三。中詔趣戶部。可憐哀痛書。不能無脛走。戶部下撫臣。撫臣下宰守。奏疏先來雁。愷澤後新柳。州縣長吏賢。操下如拉朽。迢遞歷冬春。徵斂踰十九。況逢主藏史。唇齒相比耦。奇贏既入官。誰敢詰其負。不知聖人恩。沾暨黔黎否。黔黎願聖人。歲歲書大有。

河海涇窮流。木石填大壑。不及補庫難。補庫無垠塢。補庫誰覆校。補庫誰脩作。用以悅所事。用以堅所託。用以拯覆敗。用以快擊搏。勢如山不傾。貲如泉不涸。笑他黃治術。朝種暮方穫。曷若一紙書。圍以朱丹郭。旋操五尺筆。繼張彌天繳。何求不可得。金錢集紛泊。何欲不可盈。鑿銑積陵嶂。吁嗟蚩蚩氓。怨歎雜飢颺。豈知人有生。固爲義命縛。令長宰一方。所受皇家爵。先疇有畎畝。非爾遂耕鑿。壟畔有桑麻。非爾遂織絡。室中有蓋藏。非爾遂筦鑰。二五有鷄豚。非爾遂烹臠。長育有男女。非爾遂締約。種種天之恩。物物令之囊。爾不勉供億。焉能翔寥廓。一國奉一人。爲歡詎不博。

道路所指隨。乃在裸惡子。非有喙三尺。靚貌中人爾。怪底管不痛。怪底辟不死。怪底驚不悸。怪底愧不泚。怪底錢不鏽。怪底符不蠶。怪底醜不藥。怪底銛不矢。十日椎一牛。五日剗一豕。重幣耐胥徒。□□□差使。喜怒變蒼黃。摺炙成瘡痕。俯仰三千年。無人曾取此。獨有洛陽令。姓名編邑里。奸發尋掩捕。管決詣馬市。令長謹官箴。監司持綱紀。普天無貪殘。此輩行已矣。令長營脂膏。監司風意指。貨賂既上流。法

度必下弛。惡子老尤工。惡子少方始。菊佳軒詩八

嚴首昇 瀨園詩文集

嚴首昇。華容人。明季諸生。入清後。僧服行遁。以遺老終。自謂古文則惟左史內外傳。非我所及耳。出入班馬。俯視唐宋。橫豎任意。斯言真夸父也。班馬豈易出入。唐宋亦難俯視。唯橫豎任意。似頗能之。然亦限于語錄論史。乃有此趣。

東陵收亡兄中子骸予同母十人亡其七中子男女六人亡其三

幾曾垂涕不云然。料得如弦在道邊。官具賊腸壯士死。弟收兄骨路人憐。十亡其七嗟同父。六僅存三況失天。不用吾言今倘悔。尙堪无咎到黃泉。瀨園詩集乙酉詩

偶成

憶昔大亂初。人命如流水。天地人殺機。一時發靡止。壯夫填溝壑。羸老無存理。細數親舊輩。上下五旬裏。家兄近七旬。俾我懼與喜。朋壽兩三人。井里咸詘指。頃乃十日內。同時歌蒿里。人生無定期。閻羅不序齒。却如百物生。日至皆熟矣。紛紛未熟時。花開復結子。瀨園詩集乙未詩

魏 禧 魏叔子文集二十二卷

魏禧。字凝叔。號叔子。一號勺庭。寧都人。明亡。棄諸生。與兄際瑞。弟禮。結廬金精翠微峯。與李騰蛟彭士望林時益丘維屏曾燦彭任結生死之交。號易堂九子。其初爲避兵。繼則謀恢復。奉時益爲主。禧則事無不總。視人合若天親。以至子孫不改。至于奉公。則父子兄弟夫婦間。咸有君臣之分。最重者存誠。于朱陸陽明不分門戶。以誠爲主。微異于謝文游宋之盛者在此。際瑞以揜過飾所長。高言欺人爲可恥。士望謂學者凡病皆可醫。唯僞不可醫。禧恃積誠處人骨肉間。無難進之言。不決之事。次則攻過。時益稍耽禪悅。禧語之曰。吾曩爲子死。今不死矣。維屏爲書責禧拒諫飾非。禧刊布其書以示改過。燦客游不免逐貨。禧嚴責之。燦奉事益虔。又次則力作。易堂諸人皆貧。不巧取人財。率自耕以食。或賣茶賣藥賣卜以食。李萱序時益詩。述其父騰蛟之言。謂時益初至寧都。身雜傭保。治火藥諸什器。有精悍之色。知凡事皆以力作爲第一義。而其要尤在于舍性命以爲之。士望謂世知禧辭鴻博能舍翰林。而不知其能舍性命。際瑞之死。子士傑從之。禧之死。妻謝從之。易堂之教。不以溫飽其身家。擢拾榮名。夸嚴世俗爲寵幸。從死者非爲孝烈立名。蓋欲以愧世之畏死不前者。故方以智謂易堂真氣。天下無兩。禧力持人才支持世界之說。乃出游江南北。遂入浙中。所至以文會友。由鄒祇謨遍交當世文人。以播其明道理識時務重廉恥長名義之說。而尤在結納其賢豪。備有事之用。若徐枋金俊明汪胤李天植顧祖禹惲日初楊瑀皆遺民不

忘當世事者。士望禮亦各出游。燦且卜居蘇州。于是粵中北田五子。閩中李世熊。皆與易堂通聲氣。禧自庚子順治十七年後數數往揚州。屢訪友山陽不遇。竟沒于儀真。蓋志在經營山左。山東縮馘南北。東達海。西通中原。南抵淮泗之間。天下有事。可以斷運道。爲形勢必爭之地。此意閩爾梅知之。故屢至登萊間有所期會。顧炎武北行之先。嘗數至山陽。皆密有所圖。圖恢復者。有望于山海。山者四明山寨。蕪黃四十八砦。下至交山。鄂西施鶴。山中能退守而不能進取。海則鄭成功張名振張煌言。出沒海上。深入長江。沿海島嶼之人。且漁且商。能善用之。立成勁旅。北田五子所經營者。在瓊崖。而徐孚遠受吳祖錫指。久居閩粵海濱。祖錫爲徐枋姊婿。能部署兗豫淮徐青登諸豪傑。奉周府鎮國將軍麗中據膠州大珠山。禧與枋相結。必預其事。丁巳康熙十六年三月。祖錫發憤病死。禧猶有揚州之行。時諸豪傑尙存。須有指揮。卒之志竭身殲。沒于庚申。康熙十九年五十七。事具清史列傳文苑傳。撰魏叔子文集二十二卷。禧學文于維屏。最後始爲詩。而成就獨大。蓋由天資高邁。而剛勁之氣可以辟易萬夫。爲文學三蘇。喜傳節義事。尤善持議論。多人所未發。世以並侯朝宗汪琬爲三家。不唯志節非禧之比。琬筆嫌弱。而朝宗略無渟洄。視禧堅卓不移。氣象萬千。不止上下牀之別。詩乃似杜。別撰左傳經世十卷。論治道與兵法。日錄三卷。就人情物理破析極于豪芒。禧無子。謂不憂嗣子之不立。而憂後起之無人。又謂吾有三男。左傳經世爲長男。日錄爲中男。文集爲三男。自貴其書。無一空言。復國族。致太平。皆在此云。

讀水滸

杯羹亡國。壺殮得士。無往不復。衆少如此。睚眦之故。是用殺身。胡以羸中。惘然莫懲。君不擇臣。相不下士。士不求友。乃在于此。寒曰衣爾。饑曰食爾。曰相爲生。曰相爲死。

爾富我覬。爾功我伎。一父之子。截爲二體。我貴爾較。我能爾矜。一人之身。不相爲親。亦曰詩書。亦曰道德。彼狗偷子。無驕吝色。魏叔子詩集一

案首章言世間估權者。能排擠人。次章言水滸諸人同饑寒。共生死。三章言水滸諸人勝于以詩書道德備捨其惡者。

出郭行

三行已亥作

郭門日蕭條。盜賊紛紛起。十家村務中。乃有五家是。大者肆屠殺。小者驅牛豕。縱火燒穀屋。繫人要貨賄。薄夜攜妻兒。往伏荒榛杞。侵晨望四山。乃復歸墟里。哭聲滿中野。不敢直言指。嗟汝盜賊心。何太滅天理。盜子聞斯言。歎歎復長跪。君心肯和平。爲君說終始。終年苦力作。不得養妻子。食缺衣不完。誰能饑寒死。地方日索錢。豪民恣驅使。大戶噉縉紳。小戶飽士子。一人身富貴。婚友爭搏噬。與皂仗官威。吸啜盡腦髓。一或逆人意。寅緣入狂狴。見官我所愁。見我官所喜。無錢死饑寒。有錢死繫累。要之均一死。不如作賊是。侵晨雞載鳴。鼓聲何田田。與皂喧公府。長官坐高廳。有客仗劍來。謂汝太不賢。四境大苦賊。賊亦可哀矜。汝號民父母。何以特無情。堂上雙撫手。大笑老書生。汝但曉賊意。獨不曉官情。初我得官時。早夜苦經營。胥吏前致詞。到任禮先行。恆愁令節至。輒復聞生辰。民奸財不易。敲扑何由停。無錢敗我官。子貨誰爲應。甚或喪性命。豈得愛他人。愚民敢作賊。勦殺有官兵。貪吏誠當爲。盜賊良可矜。兩

皆不得已。慎勿爲良民。魏叔子詩集三

入郭行

熇熇何熇熇。出郭復入郭。郭外走郭中。老幼相肩薄。衢塗交官衛。中唐復官閣。閣下羅酒戲。銀璫紛灼爍。揚揚數騎來。下馬儼嘉客。一再拜主君。環坐酬杯酌。簪花腰銀璫。冠被紅纓絡。前導雙鼓吹。細樂相間作。曲道逢老人。視予心錯愕。附耳向予言。主君施方略。此人性咆哮。吞噬比鯨鱷。前月擄東村。昨日燒西落。謂當來就降。乘時恣殺掠。黃金壽主君。兄弟爲盟約。向者曾招附。豈知仍肆虐。擇肉而食人。不必問嫌惡。縱能聞風逃。族戚不能脫。近有鄉曲人。頗聞饒囊囊。或言與賊通。黑夜吏相捉。聞者相歎息。自悲無早識。守法常得死。何不豫爲賊。哀我衰暮年。不知死何日。言者死通衢。君但藏胸臆。魏叔子詩集三

從征行

傳有山縣寇。竊發何縱橫。將軍下兵符。點兵聲向東。山賊聞兵來。竄走無遺蹤。百姓聞兵來。行住兩怔忡。擊鼓集里社。頭會課所供。後旄未出郊。前旗已先隨。騎士挾鏃矢。步卒橫長鏐。呵云此近賊。焉得不相通。遂使繫子女。搜牢何從容。斲木取犁鐵。囊米碎瓦甕。背負生彘肩。雞鴨鳴籠中。蕭蕭班馬聲。悠悠白旆風。魏叔子詩集三

賣薪行

三行俱辛丑作。

采薪南山隅。賣薪城東門。下有三歲兒。上有垂白親。釋兒泣啼餓。天明負薪行。持錢逢里正。縛我詣官

庭。跪白此鄉夫。身當送王兵。官府畏我走。驅我入獄門。同伴數百十。不逢一親隣。忍饑乞餘食。暫得延殘生。擇日下州府。隨伴及長征。前搖黃布旗。上書某鄉民。五十爲一隊。隊隊有總轄。我念家中母。欲逃不得脫。驅我入軍門。大旗耀雲日。乍見北邊馬。遂巡過其側。陸行荷重擔。水行牽大船。水深風不順。力盡船不前。解纜暫登舟。拔刀斫我肩。或遇浮沙潭。并命沒黃泉。更驅次班下。努力各爭先。舍舟度峻嶺。日酷如火煎。路逢喝死人。身僵口微嚙。竟作路傍鬼。仰臥當青天。安得知鄉里。一爲此人傳。魏叔子詩集四

孤女行

官街有孤女。獨向街中泣。髮短不及眉。身長纔二尺。雙手抱竹筐。顛仆還起立。借問此何爲。阿母不得食。前者阿父死。阿兄逃深谷。官吏大索逋。合并婦女錄。五木交十指。骨見不遺肉。孤女親操鉢。一日兩入獄。此是誰家女。東街有高屋。閨閣各崢嶸。夾巷相結束。龍蛇畫梁頭。雕刻及柱足。膏田一萬頃。文錢十千斛。倭墮盤翡翠。裙襦綴珠玉。財帛足驕奢。氣勢耀人目。傷哉真傳停。囹圄多貴族。魏叔子詩集四

孤兒

野鷄朝暮噪。集我田中飛。行行啄餘粟。田空鷄苦饑。孤兒承里正。獨夜歸山丘。鄰里相勞問。嗚咽不能辭。家無壯兄弟。賦役安所支。公稅數加派。私費十倍之。昨日符牒下。有官自北來。逋欠及錙銖。執縛詣京畿。更復急徵調。出師復入師。千里輸草束。萬夫候過騎。交衢鐵械鳴。皂衣東西馳。粥墓發先骨。何況子與妻。一身但得活。愁苦無終期。行欲死溝瀆。禍恐連親知。魏叔子詩集四

魏際瑞 魏伯子文集十卷

魏際瑞。原名祥。字善伯。號伯子。乙酉後。元弘光昆弟皆棄諸生。際瑞支持門戶。獨應試不改。家貧游食四

方。呂留良不欲人幕游。謂可以使人作僞。顧炎武亦頗非之。然其時士之有文行者多入幕。謂勝于仕異

姓。李天生行迹。即在幕與非幕間。炎武未嘗非之。則亦視其人而已。際瑞之游。恆在浙閩粵中。且恆游

軍中。擾攘之際。可以權宜救人。又冀緩急時。得爲己用。其事至險。然非際瑞所計也。初客范承謨所。不

與死耿精忠之難。終爲哲爾肯說降韓大任。遂見殺。際瑞爲人無宿諾。爲鄉里捍患。冒白刃不悔。一方倚

爲安危者三十年。沒于丁巳。康熙十六年八月。年五十八。禧爲撰志銘。有魏伯子文集十卷。不斤斤繩墨。喜讀

莊子坡集。爲文復不求似。能道人胸膈間事。或卽物窮理。爲修己治人之資。詩亦激越悲壯。

猛虎行

夜宿螺石舖。皂隸紛捉人。此鄉甲被虎。縣官大生嗔。四鄰不救護。縱虎而食人。四鄰叩頭答。小人身伴
存。虎害甚于甲。大兒死樵採。兄弟死田畝。半夜發蘆壁。牀內擢老母。小人學射之。天幸獲一虎。明日里
正來。官府使問汝。虎皮有幾張。虎肉幾多許。爪牙脛與骨。各依鈞稟取。自後爲正供。汝當充獵戶。設或
無此物。歲以白金贖。老妻鬻無多。幼子典不足。贖程未及半。此身已孤獨。相誓折弓矢。寧甘受虎毒。縣
官復大怒。汝在虎窩中。虎去汝還住。汝既不射虎。當是虎親故。前日虎跛下。雷擊田中夫。我罰彼鄉人。

一家千青蚨。又有寡母子。不肖被母管。子縊母難罰。鄰里已代之。得命寧惜財。汝何不三思。虎賁下地名。在昌西郊。

魏伯子文集七

將軍行

將軍來勦賊。鄉民到城市。壯丁標老嫗。日日行閉里。問汝此何人。丁云是吾母。今行欲賣之。三日無售主。咄汝大惡逆。敢賣生身親。君且勿急怒。我有下情陳。賊謂將軍曰。此間多頑民。某某合誅。某特贏金銀。某有美妻子。某與某媼親。將軍聞賊言。爾是好男子。假爾千守把。爾但作吾事。踝骨絞弓弦。倒懸勒拇指。一刀分所甘。求死不得死。左鄰賣妻子。右鄰掘墳地。甚或無親丁。權露甥與婿。可憐我孤窮。獨有此老母。老母哀吾兒。豈忍汝受苦。我雖七十歲。亦復能初補。朝莫執炊爨。兒童足抱哺。不如賣老身。

與汝脫刀斧。魏伯子文集七

恩官行

恩官聽告訴。我是南豐人。寧都作長年。僱值日一分。昨蒙捉俊秀。諭令納官銀。自是耕夫。寧敢充衣巾。汝雖南豐人。獨非官赤子。况復名俊秀。農已升爲士。區區只百金。乃敢不顧此。皂隸復恩官。奉命捉鄉賓。此人大狡猾。堅稱無金銀。官謂此鄉賓。汝當有隱惡。若不動刑罰。何以懲刁薄。旁人閒致辭。恩官汝大錯。前年舉善人。亦復行鞭扑。鄉飲國大賓。那見繫縲索。南豐人謂僱工爲長年。魏伯子文集七

西樓雨夜有贈張士英

南塘昔日經戎馬。平仲曾知石父賢。相距山川五百里。已忘名姓十三年。高樓細雨春燈夜。東角屏風小樹邊。不謂故人猶識我。翻令感媿欲凄然。

十數年前過南塘。遇亂兵警人。予偶讀之。久已忘矣。今年春入那。寓賈將軍西府別樓。客有同寓者。甚致感慰之語。因述往事。感其不忘。作詩贈之。士英名必達。

壬寅二月記。魏伯子文集八。

魏禮 魏季子文集十六卷

魏禮。字和公。號季子。以際瑞禱爲之兄。常出游。己亥順治十年始至吳中。意其探海上消息。再至粵。句留

獨久。與北田五子深相結納。有事于瓊崖。又北至燕。西入秦。通聲問于孫奇逢及關中二李。所不至者塞

上而已。林時益既沒。禱出游。禮年五十。始返金精。禱與彭士望先後沒。易堂僅禮一人。教易堂後人李

萱林東孫丘成鉢林勳彭仁方彭仁立彭厚魏世倣魏世儼魏士侃。承先啓後。仰禱之切惓勿墜。如是者十

七年。禱嘗稱其沈毅剛苦。勇于義概。雖水火白刃不易其一言。蹇蹇諤諤。尊親之前。無所回其是非。性

下。須張如鉤子。人觸其須則怒發不可忍。然揮金無吝色。儒而近俠。故禱沒禮能繼其事。卒于乙亥。

康熙三十四年年六十六。撰魏季子文集十六卷。禱爲之序。謂詩好漢魏。文好周秦諸子。及其成也。詩類韓退之。

文則近柳子厚。自今觀之。才氣奔放不如禱。而較謹飭有法。詩則頗近江西宗派。西行詩一百三首。一

氣貫注。實爲傑作。子世倣世儼。繼以古文著名。與從兄世傑稱小三魏。

修官路

傳聞下公令。正當六月天。農夫呼其曹。各就大道邊。清晨觸零露。日暮無餘閒。婦子走相饑。新穫委于田。亦有鮮兄弟。爨炊曾未然。疲病事程作。更乃索餐錢。路寬須七尺。毋使草石連。若或礙五百。當非笞蒲鞭。土頑力易乏。得蔭不息肩。我時在行路。宛囑如火煎。爲說汝勞苦。答云禮則然。魏季子文集二

平西道上

上路跳山鬼。人家勢迫迤。下路聞兵來。纒負踰荒澤。風雨暑無時。老稚走昏黑。長官尙撫循。韎韋耀都國。犯之者有罪。猛虎而傅翼。官兵志勸民。繫掠恣所獲。成我行路難。日昃不得食。秀嶺十餘里。盤轉絕人跡。山形若禿鬚。流潦鳴巖亥。天僻日幽怪。其氣生盜賊。方喜集一村。執戈當夜直。言有行寇至。近在肘腋。夜半呼我起。披露事行役。魏季子文集二

再到嶺南詩

已嘗辭嶺南。今復從人役。六月買舟行。七月到水驛。幃帷入官衙。甫坐未煖席。胥吏雙垂手。捧卷與喉積。華堂正葱籠。騶從紛辟易。梁棟錦綺張。室中輝煌色。瑠鑲施下陳。潤軒耀丹碧。予以奉上官。下民望恩澤。擊鼓何闐闐。臺皂分兩翼。巨鏡響郎營。桁楊累接迹。徒杖爲麟鸞。十宗九大辟。日日報瘼死。身死藏不貳。生者追索完。便可施殺礮。小者十數輩。大者數十百。日光慘慘然。又傳飛憲檄。曰汝事縱容。而止科盜賊。參僚方遞寔。一日四五食。繁聲促心耳。新奏迂琴瑟。媿女擊玉觴。俳優雜進劇。脫帽與容與。

縱橫隨酒力。乃驅鳩鵲民。任意爲蔽護。呵謂此奸徒。敢不承叛逆。賊叛均殊死。胡爲苦煎迫。彼尙有妻子。尙有姻與戚。律例有明條。是當合併籍。城中四犴狴。男女囚充塞。中有輕繫人。三載閉幽黑。其過久已昭。屢請不蒙釋。嗟汝下愚民。汝慎無悽惻。茲獨死一身。妻孥可清白。魏季子文集二

野燒

春山草欲青。野火爛天明。殺草以助穀。其事殊不平。爆聲震我耳。昏煙到我庭。大者日不落。小者動繁星。或如漢宰相。張炬列火城。爰及鳥獸蟲。倉卒失其生。又如誅盜賊。衛民必用兵。但惜蘭鳥喙。死與衆草并。

田肥禾本豐。農夫恃爲利。屢年得豐登。農夫賣田器。擔穀換舂鹽。一工七兩二。未暇計索逋。子貸如贈施。工賈藝不行。富者亦疲敝。桓宣大有年。始信真災異。魏季子文集二

魏士傑 魏昭士文集十卷

魏士傑。字昭士。號梓室。際瑞子。少能文。讀書有大略。叔父禧許其能任大事。丁巳康熙十年。際瑞爲韓大任所殺。士傑從季父禮夜走八十里往視之。憤甚。刺刃洞腹死。易堂輕生死之概。始于士傑見之。卒年三十。三。撰魏昭士文集十卷。文筆廉幹似禱。詩情乃甚懸渺。從弟士儼世侃皆能詩。未刻行。

感懷 五首 錄一

朝拂青銅鏡。照我領下須。我年正三十。有如秋草蕪。念我幼年時。意氣常有餘。結友在高樓。縱談忘朝晡。灼灼桃李花。結子當前除。感此雨露滋。草木良非愚。索居卷石上。讀書苦難識。已嫌章句儒。何由益神智。懷哉魏鄧公。慧者反嫵媚。韓休令人瘦。可以爲鑑礪。古人結一心。情深忘道義。女卽非西子。寧必自棄置。濯濯原上松。磊磊橋下石。白日照西偏。學射溪橋側。昔曾雙挽弓。填填鼓不息。擲身走怒馬。飛彈墮雙翼。却笑乃書生。持此何所適。長者爲我言。年少良可惜。魏昭士文集六

彭士望 恥躬堂文鈔十卷詩鈔十六卷

彭士望。字達生。號躬菴。又號晦農。南昌人。少立名節。崇禎十三年黃道周被逮。爲營解。送至淮上而別。弘光元年。史可法督師揚州。禮聘之。說以用高傑左良玉兵親君側之惡。可法不能用。遂引去。偕朱議霧更名林時益攜妻子依寧都魏禧。結廬翠微山。佃田躬耕以給食。旋赴楊廷麟督師贛州之招。爲監紀。事敗。自後講學易堂。與李騰蛟丘維屏魏際瑞魏禧魏禮兄弟彭任曾傳燦。號易堂九子。同時江西講學者。有程山謝文游。髻山宋之盛。諸人議論時有不合。士望調停其間。相得愈彰。爲學主陽明。而不廢程朱。力戒虛僞。謂天下五六十年來。患虛病極矣。文章經義。名譽氣節。皆虛病也。相延而至于理學之議論郭廓。經濟之影響雲霧。願爲世之龍肉醴泉。而不能爲世之布帛菽粟。于民生之酷烈飢寒。氣運之陷溺。至困弊而莫之救。而相隨以死。又謂僞最難除。易堂結生死之交。而有等紀。士望年與聲名在議霧禱上。

而施敬不改。四十年間時時出游。當世偉人豪傑。無不傾心結納。尤善李世熊。及粵中北田五子。其游也。特相地以覓食。亦借以觀山川形勢攻守之宜。其詩所謂六十過頭猶奔走。半爲衣食半交友。交友誠有之。衣食則爲託辭。蓋視天下未嘗不足爲。而金聲桓吳三桂輩。則非所措意。卒以窮死。時康熙二十二年。年七十四。有恥躬堂詩文集四十卷。久佚。道咸間裔孫玉雯始輯刻文鈔十卷。詩鈔十六卷。詩文不依榜門戶。勿假塗澤而意無不盡。自序其詩。謂卽年譜交譜游譜。故事無不具。幾于字字皆史。感舊詩一千七百餘言。述師友知戚二百餘人。終于牖下者三十七人。餘皆慘死。梁以樟稱爲甲乙以後第一篇詩史。蓋驚心動魄。自昔所無矣。冬心詩三十首。述喪亂之由。可以觀其識解。唯輕信傳聞。謂李自成破北都。得內帑千餘萬。則爲失之。

冬心詩三十首

六錄

人才天地心。長養萬物命。學術盡壞之。好惡失其正。舉世愛一同。幻出于蹊徑。標榜各是非。傾危互機筭。遂令天失權。假人發眞病。盜賊九廟墟。將相三木鑿。方隅九萬里。雞犬不能靜。到今無悔慚。眈眈勢彌盛。天亦且奈何。蓄怒不遑定。

吾少從黨人。大言誅楚相。武謂其忍奪情。虛功糜國餉。亂後逢闖徒。訪以當時狀。始悉武陵才。謀猷頗能壯。謂更一二載。賊軍盡摧喪。後復逢楚友。鄉評益公諒。謂獻挾往讎。取屍棄江漲。緋衣浮不沉。月餘還舊塋。自慚逐吠聲。發辭何漏宕。隆萬相江陵。國威甫遐暢。祇以峻挾故。萬口相排擯。吾黨三折肱。今

更以身謗。

吾聞大內鑑。編纂由奄宦。狡于仇士良。讀書即愚豢。吾聞山陵工。價值四百萬。奄寺主幹當。司空僅持算。竊聞田妃冠。美珠奄所販。直四十萬金。後始覺其謾。又聞癸未冬。兵餉不時散。所需僅千金。內帑無從辦。『賊』既入宮寢。發藏朱提燦。尙存千萬餘。飽『賊』猶蒙訕。奄黨代乾沒。蠶食官府憤。比『賊』而亡明。拱手成魚爛。

儒生不識時。誦讀不論世。如醫守成方。如匠執古制。世界一死局。豈復知活意。自古神聖人。體用稱咸備。其在賢豪間。于事則分治。持世體先立。救世用當致。用則無方所。不能避非刺。南宮進美女。呂望成放弑。少正鄭刑書。武鄉蜀謀議。靡奔康不與。伊遷甲隨禮。千秋隔膜心。誰復知原冀。史筆雜好惡。賢奸任所置。鬼自有春秋。專戮假名義。

學者治生念。到今詭許衡。安居盛平時。豈得知其情。元臣耶律傳。紀載尙分明。出土奴俘中。四千三百名。救死苟不贍。從善何由輕。古隱遜能肥。避地埋名聲。米桶盛妻子。傭保雜蚩氓。我曹襲人間。衆嗜搖其精。五窮在膏肓。百務勞其形。詎能免妄干。尾瑣全其生。瞻言八百里。一望盡愁城。

志士當亂危。吞藥難罕譬。進退非爲邪。大有未了事。或直擲龍鱗。飲食求其嗜。或竟造虎穴。班班共遊戲。隨時達怒心。優柔氣相制。入腹出門庭。大易有明示。孟勿毀明堂。孔嘗仕季氏。二畔召欲往。用我或希冀。律以後儒科。豈不重譏刺。古人真精神。乃在無文字。俊傑所讀書。貴于得大意。知此知田疇。不必

更督議。恥躬堂詩
鈔十一

朱議霽 朱中尉詩集五卷

朱議霽。字作霖。變姓名林時益。號確齋。南昌人。吉府宗室。性豪邁。敢爲大言。見天下將變。專意結客。四方豪傑士多從之游。師新建歐陽斌元。友南昌彭士望胡以寧樂平王綱福清林全春廣濟舒益。乙酉弘光元年左良玉兵東下。議霽謀用柯陳兵遏之。柯陳相傳爲陳友諒後人所居。峭壁廣哀。地跨二省。會明三百年兵征不服。稱爲悍旅。以當事議不合散去。九江破。金聲桓入南昌。士望遂奉議霽走寧都依魏禧。結廬金精之翠微峯。旋徙冠石種茶。長子楫通通家子弟任安世任瑞吳正名皆負擔親鉏畚。手爬糞土以事力作。夜則課之讀通鑑學詩。所製茶高妙。遠近名曰林芥。父子負之走一二百里自賣之。議霽實爲易堂宗主。故魏禧謂議霽來寧都時年二十有八。予與季禮方壯。并願爲之死。沒前語土望禧禮曰。吾衰病無所用于世。君輩好爲之。遂于戊午康熙十七年八月以嘔血死。年六十一。事具禧朱中尉傳。議霽死而易堂之業衰矣。撰有朱中尉詩集五卷。易堂諸人皆以文爲詩。獨議霽具標格。以詩論亦足傳也。

大水

大水沒高田。飢人立空庭。吳蜀萬里船。揚帆日夕征。歡怨自終古。未繇守吾貞。朱中尉詩集一

大水過梓陂圩感賦

長水入牀下。繫舟在門前。採苻當園蔬。網魚當朝餐。恤災幸已責。催牒日再傳。曾聞田變海。彌望風雲烟。食力少拘束。每每終天年。及此知荒唐。益令難稽天。朱中尉詩集一

癸卯三月送魏叔子之高郵壽黃山翁七十憶舊秋同下揚州叔子獨往淮上赴故人

約歸云故人他徙于高郵得交黃山翁予時恨不一見今還山又值茶時不得偕下鬱勃不覺成詩即書爲黃山翁壽且訂後期

廣陵城下獨登船。淮陰城下水連天。蛟龍魚蟲相跳躑。日月風雲茫昧然。篙師漁父皆失色。波濤如山一舟入。豈知故人去河南。還向高郵艤歸櫂。高郵城中有黃君。夜半雞鳴天不明。岸上蘆葦吹水濕。晨門一啓負擔行。黃君見我非常客。呼我登樓進飲食。熟視魏子果何人。開口忽然見肝膈。季方整衣出東軒。美如新稼初登田。人謂元方眞長者。先我來時歸里園。魏子進門月初黑。吹燈沽酒從頭說。不記客中別子難。頓使一身生羽翼。茶人最愛春山晴。二月三月雨淋鈴。竹輿布被巖下路。魏子忽來叩柴荆。買舟云下淮南道。爲壽七十黃山老。熙熙攘攘者何多。似此來往真是好。呼兒取酒爲子傾。不妨我醉子獨醒。長風萬里來拜手。黃河楚江秋水生。朱中尉詩集二

顧廚余嘗飲會庭開所。命顧廚治肴。主人語不休。顧曰當清脫耳。明年余再過庭開。顧廚已死數月矣。不覺賦此詩。

清脫常懷立語時。顧廚死後爨誰知。肥魚大肉盈盤是。獨進寬湯雪笋絲。

仙樂重開憶帝京。江南花落更傷情。敢悲紀叟黃泉裏。麥飯何人拜孝陵。朱中尉詩集五

李騰蛟 半廬文集三卷

李騰蛟。字力負。號咸齋。寧都人。入清棄諸生。易堂諸子中年最長。性嚴正。衆皆敬事之。晚居三巖峯。卒于康熙七年。年六十。撰周易賸言及半廬文集三卷。答臨川陳少游云。願藏鋒鏑而重持之。則人不得于筆墨間窺吾淺深矣。此于韜晦之外。更有一義。書魏裕齋詩後云。叔子以新詩一冊徧寄諸吾黨。吾黨皆驚。而評閱吾黨作不少寬假。吾黨又無不屈服。相值論詩文。彼此懽呼。有至雞鳴漏盡。驚動客寢猶未已者。鍾伯敬東蔡敬夫曰。存此嚴冷意。事事相與成。吾黨之于詩文已如此。以知易堂事事有約束。不獨論文論學而已。詩不多。不標榜家數。而有精悍之色。

從軍行

聖主重民命。下邑不徵兵。何爲狂馳子。釋鋤事戎行。攘臂呼徒旅。明抗父與兄。不思蹈刃苦。反說從軍榮。君王自神武。駕馭必豪英。今之將兵者。貴多不貴精。螭蜮鼠皮骨。閃爍鳩眼睛。鶉結爲重鎧。龍鍾亦壯丁。屠毒遍鄉邑。一敗卽土崩。頭顱懸竹竿。原野骨縱橫。飢烏啄腐肉。羣犬走獐獍。嗟爾亦人子。棄身如浮萍。死去良已矣。徒令蒙惡聲。牛廬詩稿三

惜春辭十五首

四錄

年年四海一家春。到處春風披拂人。一自烽傳遠左後。中原多有未招魂。

誰家都護守樓蘭。畫角鳴鳴春未聞。二十年前遼海上。此聲只合在邊關。

露下鞭牛雨下蓑。牧童日日唱田歌。近來變出新腔調。恰似巴人翻紇羅。

梨園子弟特欺瞞。不扮新官扮舊官。任汝啼來任汝笑。逢場莫作等閒看。

牛廬詩稿三

曾 燦 六松堂詩文集十四卷

曾燦。本名傳燦。字青藜。號止山。寧都人。侍郎應遴子。南都覆。唐王立于福州。改元隆武。以楊廷麟督師江西。汀贛間山峒有衆數萬人。分前後左右四大營。一營又分前後左右四小營。應遴請于朝。遣燦入峒盡招之。四大營皆聽命。蠶書褒獎。賜名龍武營。以其渠率李春等爲帥。屬于督師。與清軍戰屢敗。又自相攜貳。遂大潰。贛州破。廷麟死之。唐王死于汀州。應遴亦死。自是燦改僧服行游。後歸山中自耕以養祖母及母。與易堂諸子結性命之交。又久之。出游東南。樂蘇州光福玄墓之勝。卜築其間者二十餘年。以詩文與海內名流相馳騁。刻爲過日集二十一卷。初未嘗忘世。晚歲乃以筆舌糊口四方。數入粵清山產。爲寧都行鹽者居間。其子尙侃魏禧女夫也。不肖盡蕩其產。時易堂諸人死且盡。燦發憤。性益褊急。使酒罵坐。復北行。康熙二十八年卒于京師。年六十四。事具清史列傳文苑傳。及楊寶所撰曾青藜姜奉世合傳。有六松堂詩文集十四卷。其子尙倪所編。跋畧戊戌。蓋康熙五十七年。云尙有隲中草。游草。西庵草堂集。皆未見。今所能見者。曾青藜初集一卷。五七言分體。不知何時所刻。有禮序。又文集一卷。凡文十

四首。舊鈔本壬癸集一卷。甲子詩一卷。有丁卯康熙二十六年顧祖禹序。三度嶺南詩一卷。有戊辰康熙二十八年徐柯序。其詩文皆已錄入此集。燦嘗刻兄晚詩八卷。弟炤詩一卷。合己作六卷。爲金石堂集。附于過日集之末。自序謂晚詩最高。已與炤遜之遠甚。自述少好情豔之作。易代後。躬耕六松山莊。詩好清新。及出游吳越閩廣燕齊。則登臨者十三。酬贈者十七。欲求其工難矣。蓋不能發其精思也。錢謙益序其詩曰。青藜之詩。其思則黍離麥秀也。其志則天問卜居也。章贛之役。青藜年才二十。獨身撐柱潰軍。眇然一書生。如灌將軍之在梁楚間。旋觀其詩。求其精強剽悍之色。瞥然已失之矣。爲掩卷太息久之。此不獨論其詩。兼論其人其事。然燦晚歲頹唐。則并咏歎而無之矣。大約易堂諸人。文學造詣。首推禱。次則屬燦。燦習與中原人士游。言近于雅。而奇橫則遜禱。晚舉人。移家靈夏。欲于邊草塞霜間。有所樹立。後乃歌鐘冶服。恣情聲色。悔而入山學道。亦士之不得志于時者。炤年少。窮死徐州。

戰城南

戰城南。日暮悲風起。城上驚傳鑼牡開。黑雲陣鼓壓聲死。南兵出。北兵入。子弟三千人。猶向城南短兵接。十月霜風寒。白骨高於山。上有烏鳶啄人肉。下有黃犬食人骨。黃犬何猶猶。食盡死骨噬生人。死者不可惜。生者良可矜。彎弓挾矢城南轉。不射烏鳶射黃犬。六松堂詩集一

羊城歌

羊城樓上鼓聲急。羊城樓下兵馬入。西風刁斗徹夜驚。滿城兒女皆垂泣。一望煙塵晝不開。火光風勢如

崩雷。馬上折筭跨寶刀。一騎驅鹵百人來。白梧黑索滿阡陌。男在東頭女在北。但聞男兒號哭聲。不見婦人憔悴色。可憐妻子屬他人。更苦無錢贖一身。田園圈去作王莊。華屋一朝成灰塵。艱難留得餘生在。甌石已空賦不改。正供錢穀萬難輸。官吏私派百十倍。征符忽下王師徂。老幼壯丁爲役夫。鞭撻骨肉血滿野。樓缸高會吹笙竽。吁嗟羊城億萬戶。半銷鋒鏑半征賦。白日陰風天欲寒。蕭條閭巷無歸路。六松堂詩集三

癸亥元日

天地宮陰晦。難將物理推。六身看歲紀。三戶起人思。烟火千家動。風雲萬里吹。明年新甲子。可是上元期。六松堂詩集五

感亂

羣兇夜走湖東道。胡騎長驅梅水城。十里蕭然烟火絕。千山落盡暮雲橫。傷心社稷誰爲戰。束手乾坤未有生。引望瀾瀾腥四海。空餘血淚照青萍。六松堂詩集六

陳孝逸癡山集六卷

陳孝逸。原名士鳳。字少游。號癡山。臨川人。際泰叔子。撰癡山集六卷。卷末與彭躬菴書云。去歲海濤異常。龍宮甲馬。隱隱時鳴。所指順治十六年鄭成功入長江事。知此集之刻。即在後此一二年內。詩文務作奇語。治法考議。用兵考議。足餉考議。言之有物。知頗留心經世。述明季兵禍。謂兵能食人。官能熏人。

吾黨佳士。不爲所食者數輩。不爲所熏者亦數輩而已。追錄亡書記謂兵取屋中書。亂鋪廳事前。或燥馬蹄。或充廁籌。其傷時感事之作。較所南戟手而呪者。尤有甚焉。自視不薄。謂有丈夫之心。而爲兒女子所累。又謂悍氣滿膺。斧鉞今古。幸在僻區。否則誅矣。與傅占衡至相得。文不如占衡。而憤世過之。

力夫行

幕符下郡徵力夫。吏持府帖似追逋。十五銀鎗牽繫纍。一時驅向平南壘。甫度嶺門半轉溝。江右生人粵東鬼。斗牛之間殺氣馮。不死租稅死長征。買得一夫金一鎰。少婦吾子都索食。須教雞犬屋上行。平疇化作千里石。昔之仁聖有三皇。季代黔首匹牛羊。千家萬家隴頭哭。哭聲直上千扶桑。扶桑不炤周餘苦。忍使白骨堆遠土。嶽山集五

傅占衡湘帆堂集二十六卷

傅占衡。字平叔。臨川人。明亡。棄諸生。卒于順治十七年。年五十三。湘帆堂集二十六卷。占衡手訂。序四卷。書後一卷。碑墓誌銘傳一卷。祭文一卷。論說一卷。賦雜篇一卷。疏引戒贊一卷。書啓一卷。詩十二卷。詞一卷。劉玉瓚胡亦堂皆嘗選刻其文。康熙六十一年族孫士鳳始以活字印行全集。占衡師陳際泰。以奇辭澀體爲古。論辨尙稍平實。餘幾不能句讀。而世頗稱之。全祖望至謂其文過于王猷定魏禧。可謂妄語。平心論之。占衡頗知經術。負經世之略。以陳同父自命。故鈔陸宣公集。鈔宋人集。所著臨川記。國

策編年。戴翼經。鶴園筆略不傳。未知得失若何。其見于文者。議論堅卓可觀。不屑屑歐會矩矱。無抑揚挑逗之習。過于徐芳陳孝逸遠矣。猷定取徑不同。若魏禧何可及也。其詩自悔少作。從近體入門。淺俗入骨。因嗜長吉。而所宗則陶靖節王無功。古體格調渾成。近體時摹少陵。才氣足以包舉。時亦傷于奇崛。集中崇禎行。上梁行。七言律十六首。骨董篇。失蹄髮集。西馬行。塘兵行。海棠樹引。四松堂飲酒詩二十七首。石破天驚。可泣鬼神。其集乾隆時遭禁。當由于此。父樞官御史。以劾汪文言左光斗魏大中。名在逆案。占衡思爲湔洗。集中代父撰方伯吳公墓誌銘云。余性疏闊。在班行中直行胸臆。既爲中常所疾。亦不敢博會黨錮。人坐此污。與羅上枚書云。所諭家君云云。古誼不墜。然初無是事。天啓初。會議三案要典。以爲罪戾。大行登極。且有論具依俯孫淇澳者。又答惟易書云。先人一生心迹。半被浮雲。可見諒于二祖列宗。而不能見諒于依門傍戶。海內私書。朝端實錄。雖平反終在。而吠聲盈耳。弟之裹足三吳。堅謝名客。刺心隱痛。何日忘之。雅不欲以家狀干人。使其躊躇長縮。天傭已死。寧俟闡幽耶。全祖望謂樞不可雪。引黃宗羲阮傳並稱作證。以占衡爲愚。嘗謂逆案之定。出于黨局報復。雖大體公允。終不能謂爲毫無遺憾。若樞之事。處分實嫌過當。李清稱樞因糾忠賢。終璫世不出。則謂其贊導殺左亦過。清此言必有據依。占衡有戊子行乞啓。爲其父募葬資。又有爲奉常祀鄉賢謝陳雲怡督學啓。皆見此集。夫至于不克葬。足以見其清。沒而可祀。足以見鄉評。占衡稱其父爲太常。有朝端實錄。平反終在語。豈永曆時有卹贈耶。宗羲黨見素深。祖望生百年後。亦與之俱深。何也。至謂占衡遷怒東林。終身不交復社諸公。

殆不知際泰父子皆爲復社矣。占衡自謂少好遨遊。吹簫度曲。故撰簫洞虛小傳。謂臨川車袞字龍文。戴湖村人。幼涉學藝。凡近文史者皆工。尤善製簫。妙在選竹。世稱洞虛子。卽以洞虛稱其所製簫。又撰董糟丘雜劇。崇明寺塔曲。今皆不傳。

塘兵行

十里一舖舖有兵。官郵吏跣奔流星。民間犬吠睡雖熟。猶恨驛騷不得寧。道旁烟火今餘幾。崖氣屋精帶冤鬼。村中初聞塘兵名。那識塘兵頭與尾。漢家都護到安西。唐時萬里無鼓擊。烽火會照甘泉殿。平安望斷六宮啼。誰知吳味英雄棄。却似成阜四戰地。擺塘伏路是苗頭。須臾不走重兵至。虎狼漸狎亦漸親。少年化作塘中人。養馬盡拘逃戶米。烹雞只撤故家薪。土著翻成耳與目。信哉胡越爲里隣。往昔雄邊要害處。保塞生熟相依因。古來用間皆如此。大將終篇瞎孫子。湘帆堂集十七

靈壁行

廣陵女兒初過江。大淮南北鼓逢逢。長城心肝不可說。總持怯死蠻奴降。當時何苦入禁密。婦人出處豈自必。不在景陽宮井中。且雜胡粧過靈壁。靈壁雖流咽楚西。殘烟斷石哭虞兮。英雄不羞逝雕面。馬上碑中却對啼。啼血盡凝班管裏。昔日韓公今蔡氏。六朝文士脂粉多。輸與琵琶汗香泚。湘帆堂集二十二

王猷定 四照堂文集十二卷詩集四卷

王猷定。字于一。號軫石。江西南昌貢生。太僕卿止敬之子。明亡以遺老終于康熙壬寅。潛丘劄記有壬寅至邗上哭亡友王于一兼營歸櫬詩云。我友昨客死。杭人多哭聲。又陸莘行老父雲游始末。康熙元年壬寅春二月。父友王于益者。自閩至浙。寓昭慶寺。忽疾作。父亟爲調治。晝夜不息。王竟不起。父爲斂資棺斂。并出牀頭十金。令其僕扶柩歸里。是猷定以壬寅客死于杭。今世說所載亦同。溉堂前集哭王于一五言二律。列于辛丑。似誤。其集爲周亮工所刻者。文五卷。詩二卷。此爲其子漢卓所輯。凡文十二卷。詩四卷。明詩綜謂猷定以詩古文自負。對客斷斷講論。今觀其文學三蘇。微不及艾千子。過于陳氏父子遠矣。或謂錢謙益所不喜非也。猷定爲謙益門人。謙益與人書。謂其學四家文。往往有合者。勸刻其文。豈不喜而肯言此乎。王士禛譏其寒碧琴記。謂東坡未貶登州司戶參軍。失于不檢。凡有才氣。信筆爲文者。率犯此病。所以方姚爭言義法。其實特不讀書之過。觀其與顧炎武書。與爭文格。多見其不知量也。其集四庫未收亦未禁。

采蕨辭

東山有薇蕨。根芝潛后土。天清飽雲霞。天寒耐風雨。棄置大道旁。莫適誰爲主。我同二三子。間來時掇取。蚤莫烹食之。可以香肺腑。山鷹善攫人。往往厲其羽。此物非所欣。虛驚罷笑語。始知高蹈人。寂寞心

良苦。四照堂詩集一

陳允衡 愛琴館集二卷 勤補堂願學集一卷

陳允衡。字伯璣。南城人。少從遺老游。順治十一年甲午忽赴秋試。既而悔之。以母命爲解。因刻是歲詩。以愛琴爲名。言吾猶愛吾琴也。示不再出之意。未幾。卽選詩慰以表貞固之節。其詩鏤肝刻肺。能爲苦吟。王士禛乃賞其五言。謂非韋蘇州倪元鎮不能道。未爲真知也。愛琴館集二卷。傳世甚稀。感舊集小傳竟誤愛琴爲寶琴。允衡自謂癸巳^{順治十年}冬取生平所作數千篇悉焚棄。僅存什一者。恐卽指此。王舟瑤嘗刻豫章陳子勤補堂願學集一卷。爲文二十三首。遺民詩所稱願學堂文集。或卽因此集而訛。允衡卒于康熙十一年。享年則不詳。

至宜州題姑山草堂四首

同俞去文孫直公爲徐次履作

草堂何處是。野徑入看無。鷺影水田盡。雞聲村店孤。庭空圍老樹。閣迥瞰重湖。到後塵心絕。幽人在畫圖。

我欲尋丹壑。君今住白雲。藉苒爲屋穩。種紙覓郊殷。酒豈高僧禁。詩偏少婦聞。寂寥將老計。滄海任紛紛。

家散身如寄。名高累亦繁。相看惟疊嶂。能隱卽桃源。野史避人葺。遺詩爲友存。曾費磨鏡具。親酌治

城魂。

栖隱從茲決。浮生且得閑。行吟送落日。倚嘯動空山。小屋孤雲下。扁舟兩水間。漁樵自來往。蓬戶不須

關。愛琴館集

傅振鐸 築善堂文集十卷

傅振鐸。字木宣。號度山。金谿人。崇禎九年進士。官蒙城知縣。調永城。行取兵科給事中。北都不守。間道南歸。忌者中以從逆遠聞。賴史可法諸人力白其誣。獲免。家居十年。順治十一年。熊文舉孫承澤交章論薦。敦促就道。至都力陳衰病。竟得放歸。撰築善堂文集十卷。凡分二十二類。過于紛瑣。以助剩爲首。錄其制義。而筆吟則詩也。詩文皆不入格。唯時方喪亂。先後十餘年間。兵事連結。地方疲敝。及振鐸才足應變。皆可約略見之。陳弘緒黎元寬作序甚稱其人。立身當有本末。

英雄遇

靈石縣東十里有舊坊。題李藥師張虬髯英雄相遇處。因風雨不及低徊。直抵縣寬。又爲兵燹。作以自傷并懷古云。

英雄世有之。相遇疇若茲。壯哉張虬髯。偉矣李藥師。誰爲奇其逢。靈石作主翁。磊落多英處。宜招賢者蹤。我來千年逾。人愚石亦愚。所行驚躡躅。凭古自歎吁。築善堂文集九

黃宗羲 南雷文定前集十一卷後集四卷三集三卷四集四卷南雷詩曆五卷

黃宗羲。字太沖。學者稱梨洲先生。餘姚人。父尊素死奄難。崇禎改元定逆案。宗羲年十九。入都訟父冤。復請誅曹欽程李實皆得請。師事劉宗周。受戴山證人之傳。爲黨人眉目。崇禎十一年。與周鏞吳應箕百四十人。草南都防亂揭。力斥阮大鍼。杜其再起以翻逆案。南都破。從孫嘉績熊汝霖起兵江上。號世忠營。江上已潰。復結寨四明山。旋入海從魯王。屢拜左副都御史。副馮京第使日本乞師。不得要領。乃歸里省母。猶與京第通聲氣。招婺中鎮將。冀得一當。屢遭名捕。天幸不死。桂王既敗沒。知天下事無可爲。乃作明夷待訪錄以見志。本孟子民爲貴之義。欲改有明三百年不古不今之制。以救時弊。顧炎武貽書推之。謂唯建都金陵一事。不敢苟同。自是聚徒講學。專意著述。巍然爲東南文獻者三十年。明史之修。屢徵不起。以遺逸終。卒于康熙三十四年。年八十六。事具全祖望所爲梨洲先生神道碑。宗羲教人窮經以經世。而經世重在讀史。其所成就者。亦以史爲多。嘗撰明儒學案六十二卷。又撰宋元學案未成。賴全祖望續成之爲一百卷。撰明史案二百四十二卷。明文案二百十七卷。又擴之爲明文海四百八十二卷。皆所以庀史也。紀載之書。若隆武紀年。贛州失事記。紹武爭立記。魯紀年。舟山興廢。日本乞師記。四明山案記。永曆紀年。沙定洲定亂記。滇考。賜姓始末。鄭成功傳。張玄箸先生事略。或哀之爲行朝錄。又汰存錄。思舊錄。雖篇幅無多。而紀載翔實。尤工爲文。初師錢謙益。頗得其筆。撰南雷文案十卷。南雷文定前

集十一卷。後集四卷。三集三卷。四集四卷。五集三卷。復約之爲南雷文約四卷。南雷者唐謝無塵故居。距宗義所居竹橋數里。故以之名集。文多表章先烈。所謂其文則史。詩摹山谷。硬語盤空。而有情致。刻文案時汰其詩存十之二三。凡四百餘首。爲南雷詩曆。後全祖望增以晚年詩。釐爲五卷。僅三百餘首而已。弟子中得其傳者。首萬斯同。明史之成。與有力焉。全祖望師淑黃萬。喜述滄桑間事。號爲浙東史學。上紹呂祖謙王應麟胡三省之傳。下開嘉道以後之風氣。搜集明季野史。與錢王考補之學。蓋不同矣。宗義黨見太深。惡夏允彝幸存錄持平之論。謂爲不幸而存。作汰存錄以矯之。斯同奉其師說。詆訶楊嗣昌過甚。顧炎武潘耒皆不謂然。然莫能奪也。祖望生數十年後。猶斤斤于黨局是非。是何爲者乎。明儒學案說多偏激。呂留良因共張履祥表章朱子。以相對抗。留良之子葆中。謂兩家之釁。由高且中事而起。祖望則謂買淡生堂書。因致詬誶。實則講學爭名。留良能貧殖。吳之振又富于留良。皆不能無所求。亦相構之一端。世謂留良背師。留良未著弟子籍也。宗義晚年頗致人言。明夷待訪。本箕子堅貞以待後王。乃謂欲邀與朝顧盼。弘博籠燈。百家求仕。徒供笑訕。而皆不實。大抵盛名爲累。此炎武所以不肯同于宗義留良之講學歟。

三月十九日聞杜鵑

江村漠漠竹枝雨。杜鵑上下聲音苦。此鳥年年向寒食。何獨今聞摧肺腑。昔人云是古帝魂。再拜不敢忘舊主。前年三月十九日。山岳崩頽哀下土。雜花生樹鶯又飛。逆首猶然連蒿斧。燕山模糊吹蒿蕪。江表熙

怡臥鐘鼓。太王畜意及聖昌。奧窔通誠各追數。金馬封事石渠書。怨毒猶然在門戶。靜聽嗚咽若有謂。儒夫亦難安窶藪。何不疾呼自廟堂。徒令涕泣沾艸莽。南雷詩 曆一

感舊

桑間隱跡懷孫爽。藥籠偷生憶陸圻。浙西人物真難得。屈指猶云某在斯。史禍之後。麗京自貶三等。南雷詩 以此詩封還。請改月旦。 曆一

哭沈崑銅

傳死傳生經二載。果然烈火煉黃瑤。胸中畢竟難安帖。此世終於不可容。千里寒江負一紙。甲午崑銅有書招子。因循未赴。
百年隴上想孤松。其身首未 知得收否 舊時日月湖邊路。崑銅家有 閣在湖上 詩酒于焉不再逢。

高天厚地一蘧廬。君亦其間何所需。此日黨人宜正法。彼云華士又加誅。盛名自古為身累。大廈真思一木扶。月表有人留季漢。應知俗論不能糊。

君才自是如江海。上下吾曾與議論。紅葉湖頭流畫舫。春風白下叩名園。荆溪莫掩殘杯口。司馬難銷亡國魂。崑銅有造祭 阮大鍼文 此後是非誰管得。街談巷說任掀翻。崑銅與劉孝則論周荆溪。 至于攘臂。余解之方已。 南雷詩 曆一

案啓禎遺詩載沈士柱絕筆三首云。三百年恩總未酬。宸居何意臥羈囚。先皇製就琉璃瓦。還與孤臣作枕頭。落日昭陽牛作灰。寒鴉猶帶影飛來。上林無樹堪留宿。喚醒羈人夢一回。 武英舊殿月輪西。 袞袞朝臣待漏齊。 十八人今無別夢。 冬宵枝上鷓鴣啼。 據此知十八人同囚于故宮。不識何案。宗禎詩作于順治十六年。首句傳死傳生今二載。士柱被難當在十四年。遺民詩有湯燕生思悲翁十首。亦為士柱作。城烏集戍羈。有難不得顧。四面石尤風。突出了都護。此別無返期。白衣送道左。意氣如平時。一身被九

鏡。舍人能上辯。公庭開告密。竄名黨籍中。竟死不得出。手書出園土。字畫不可識。持讀向秋長。二儀爲薄蝕。明明賞索城。鼎鼎君子繫。大陵已積尸。天隴那得制。阿閼復阿閼。阿閼無巢食。風衰忘其德。人死殉其文。滿城新築殿。故宮頽垣峻。喬固此暴尸。內地同時震。昔來聽馬嘶。今來青繩吊。門外湖水綠。不被天回照。客行依右族。右族不自保。喬岳忽奔播。部裏復何道。從死不獨妻。請命亦有弟。白體見先人。披髮訴上帝。

八哀詩

四海宗盟五十年。心期末後與誰傳。憑欄引燭燒殘話。嚼筆完文抵債錢。問疾時事。宗伯臨歿以三文。潤筆抵喪葬之費。皆余代草。紅豆俄

飄迷月路。美人欲絕指箏絃。皆身後事。平生知己誰人是。能不爲公一泫然。錢宗伯牧齋

廿年苦節何人似。得此全歸亦稱情。廢寺醜錢收棄骨。老生秃筆記琴聲。遙空摩影狂相得。羣水穿礁浩

未平。兩世雪交私不得。只隨衆口一問評。張司馬南雷詩。蒼水屬二

萬斯同 石園文集八卷

萬斯同。字季野。號石園。鄞人。從黃宗羲游。年最少。得史學之傳。康熙十七年。詔舉博學鴻儒。有欲舉之者。力辭。明史之修。徐元文爲總裁。欲薦斯同以布衣參史局。不就。乃延主其家。以刊修委之。張玉書陳廷敬王鴻緒相繼爲總裁。皆延之。客居京師江南館者二十年。冀成一代之史。卒于康熙四十一年。年六十。明史之成。本于王鴻緒史稿。實出斯同之手。斯同晚而病目。與劉獻廷錢名世同棲止。每旦獻廷出

游。所聞有闕于史事者。暮歸質于斯同。然後由名世奮筆紀之。然則助斯同以有成者。名世也。斯同最有史識。博采舊聞。一以實錄爲準。唯囿于黨見。明季是非。或有未盡當者。然二百九十三年之事。君相之經營創建。與有司之所奉行。文人學士之風尚源流。終賴之以有考焉。其功誠不可沒。斯同少致力于詩古文辭。既乃學爲經國有用之學。研考古今制度。索其遺意。期于可行。蓋不得已而始致力於撰述。所著書有儒林宗派八卷。喪禮辨疑四卷。廟制折衷四卷。廟制圖考四卷。石經考四卷。讀禮通考九十卷。聲韻源流考一卷。周正彙考八卷。歷代史表六十卷。明史表十三卷。紀元彙考四卷。明歷朝宰輔彙考八卷。宋季忠義錄十六卷。南宋六陵遺事一卷。庚申君遺事一卷。崑崙河源考二卷。歷代河渠考十二卷。羣書辨疑十二卷。石鼓文考一卷。劉坊謂散失者尙有明通鑑若干卷。難難一卷。讀禮通考爲徐乾學借刊。明史列傳三百卷存史館。今讀其書。說經不免臆決。史表亦有疏漏。然其博不可及。故李鄴嗣歎爲學通古今無所不辨也。厥功尤偉。終在宏浙東史學之緒。其集曰石園詩文集八卷。未梓。傳本不一。近人始刻入四明叢書。不遵原稿。妄有增省。強分卷第。未合諸本折衷。深爲可惜。然遂得流行。亦一快事。

述舊

我昔九齡時。慈母中道棄。此時赤日頽。塵塵匝地沸。艱難營一殞。辛苦且逃避。晝行巖壑間。夜宿豺虎際。弱兒可憐人。性命託兄弟。穴居踰三年。脫粟管不繼。重返西皋居。遂作灌園計。田圃久成蕪。桑麻亦已廢。再葺耕耨基。復理桔槔器。時或從父兄。荷鋤畦邊鵝。漸成田舍兒。頗諳村居味。當謂謝俗氛。終事

田家利。不謂志難諧。復迫居城內。念茲釋耕耘。欲識詩書字。父意憐少兒。親爲解章句。晨夕寒松齋。呼兒捧篋筒。時或使應門。間亦執巾屨。窮愁寥泐中。父懷管欣慰。久待少譴責。亦自多歡睡。飢寒相逼迫。父往遊嶺外。日夕望還期。中秋果返轡。途次九江濱。奄忽一夕逝。寄信至家鄉。慟絕中腸碎。含斂兒不親。湯藥兒不侍。天長日月久。此恨終吾世。返松西江濱。結廬西山次。迄今已三年。魂魄猶飛墜。歎息我生涯。憂患何遭備。石園文集一

鄧西竹枝詞

湖田官稅倍民田。恨事流傳五百年。仕宦滿朝誰念此。叩關端賴布衣賢。自覺脰湖廢爲田。重賦累民。正德時。儒士楊允恭連章叩關。得稍減。至今有楊儒

期士

遺恨金牌召岳軍。致令南北遂平分。若非王氏傳家錄。誰識奸謀由此人。次翁本濟南人。從高宗南渡。遂家於鄆。官參知政事。爲秦檜心腹。撤三大帥兵。

召岳武穆。皆其謀也。詳見石園文王氏傳家錄。即次翁自撰。集二

宗 誼 愚囊彙稿三卷

宗誼。字正菴。鄆人。先世歙縣。賈于鄆。遂家焉。乙丙之際。浙東義師蠡起。錢肅樂迎魯王監國。誼罄家財十萬金供義饌。力辭版授。後復貨田宅以供取求。遂至赤貧。爲童子師。晚年所居僅破屋。常至絕粒。而耿介不改。生平率其力于詩。嘗共同里陸披雲宇煨薑曉山劍鏘葉天益謙陸雪樵稷定海范香谷兆芝蜀

人余生生香結詩社。號湖上七子。與喬最相得。後進則周斯盛。撰愚囊稿七卷。爲南軒草。南園草。湖上草。蘿巖草。薛蘿草。西村草。療飢草。斯盛選爲囊雲囊稿二卷。時康熙二十七年。龍年已七十矣。近人復輯補遺一卷。斯盛以郊島擬之。全祖望謂其詩如怪峯奇嵐。嵯峨淡沓。不自人間。實則辭若易曉。而曲折幽杳以達意。讀之覺冰蘗之操。逼人眉宇。是亦善于立誠者已。其事略見全祖望宗徵君墓幢銘。

祀園神

草木資春榮。秋菜香獨創。九月露滋深。扶蘇各盈量。小豸從何來。恣意作己餉。貪同蠶食桑。且夕軀逾壯。嗟哉蠶鹽家。奚堪此類妨。吾聞地有祇。裁時云保障。市豚稍掩豆。三爵清浮釀。告爾爲驅除。否者當致讓。余懷止在是。勿疑有奢望。愚囊集稿一

無紙

一紙需一錢。百錢買百紙。余家百錢謀。七口兩日喜。紙雖余急務。似非薪米比。逼迫長在斯。悵惘徒念彼。余貧迨廿年。垂老事益否。作詩欲何爲。詩來不可已。登記百自圖。殘編翻其裏。煤透弗良書。衰手復披靡。得意忽疾書。魯魚與亥豕。自讀猶支離。況以示諸子。束置度閣中。命兒握小匕。古人言殺青。於茲聊相擬。愚囊集稿一

漁父詞

十五習漁業。七十猶江中。歷年試風濤。危險無西東。魚多價嫌賤。魚少家益窮。昨日偶然醉。短歌倚孤

蓬。船去海門近。悵然感我胸。當年怒潮至。勢若移空同。百里撼富春。天地生英風。豈識廿年來。潮汐有替隆。余老不解此。行行問胥公。愚齋集稿一

湖上田家二首

孟夏郊野霽。湖水高侵田。農家貴力作。出門每祝天。乍炎日欲午。桑陰同息肩。鳥曠向歌吹。荷花逐遊船。以此一日費。須我力終年。心固不相羨。感歎還自憐。

方舟獨歸來。幡然見鄰叟。爲言湖中荷。今歲發殊後。所望代秋糧。未審相成否。繫舟復攜鋤。行行及隴畝。耘籽幾何時。芊芊稗與莠。細念力未深。無言草性醜。愚齋集稿一

蠶婦吟二首

養蠶本爲衣。一絲不到服。養蠶本織纈。一匹不得鬻。去年祝今年。今年眉更蹙。明年試勿爲。聽彼鉞與粥。

鵲報朝喜晴。桑林猶漬雨。蠶飢焉能待。拂拭懷諸姆。渠儂自有蠶。寧能代妾苦。葉多未易乾。嬌兒久啼乳。兒飢多啼聲。蠶飢少絲吐。愚齋集稿一

餓中得句未能自裁就正曉山三十韻

憶昔游湖干。唱和誠莫逆。我詩雖自矜。披閱愛君直。嘗怨不同堂。費此往來力。得許攜之歸。細視喜沾沾。且無論羹飧。對酒亦忘噉。有時君亦來。語笑夜怕壓。焉知有別離。江湖各行迹。我近至西湖。君遠踰

東粵。行止如相避。我出君復入。臨風一相思。向空徒悲咽。君從不其歸。稍獲晤朝夕。長飢療復難。鄉塾就謀食。似否通夢魂。何暇言促膝。今幸各家居。我茲已七十。仰供諸兒曹。三餐分兩日。飢胃如鳴雷。句從餓餘述。我固不善書。無錢筆愈劣。魯魚千百中。反疑出金石。舉襟頻拭眵。墨落互明滅。持此過君家。衣帶時誤結。行雖勿假筇。步亦幾同蹇。自笑欲何爲。僕僕衝雨濕。少年相譏嘲。此翁作狂疾。吁嗟狂非無。差勝習他譎。身前罹迍邐。身後或蒙潔。即使覆酒瓶。良亦近香列。愚囊案 稿一

打鴨歌

打鴨打鴨。烏鎗機發煙火作。轟然震耳鉛到湖。不著野鴨家鴨著。兩卒奪舟急取歸。猶嫌家鴨脂弗肥。旋轉舟中忽滅迹。荷鎗歌笑湖邊磯。啗鴨小童來諍語。還我家鴨我有主。卒言汝主奈我何。有鴨無鴨試驗取。索鴨不得小童嘸。力逐餘鴨鴨愈迷。童心怨極聲欲啞。翻令烏鎗爲我打。愚囊案 稿一

苦旱歌

入網魚涕泣。脫網魚躊躇。三日水不發。躊躇復何如。愚囊案 稿二

村社竹枝詞二首

辭神散火亂長街。有客遲迴心性乖。爭後爭先嗔復笑。去消冷肉水茅柴。

提燈社長喚鄰家。今夜須教算莫差。某項某錢該某補。絲毫準折到棉紗。愚囊案 稿二

李鄴嗣 臬堂詩鈔七卷 文鈔六卷 臬堂文續鈔五卷

李鄴嗣。本名文胤。字鄴嗣。以字行。號臬堂。鄞人。父柵崇禎九年進士。禮部儀制司主事。入清家居。爲謝三賓告密。死于獄。鄴嗣亦縛置定海馬厰中。七十日事始解。所遭至苦。而屢脫人于難。陰有部署。惜不得當。鬱鬱以沒。時康熙十九年。年五十九。事具黃宗羲所撰李臬堂先生墓誌銘。撰有臬堂詩鈔七卷。文鈔六卷。詩託之徐鳳垣所選。文託之黃宗羲。據鄴嗣康熙十四年自序。有文集二十卷。詩集十八卷。刻本當自其中錄出。全祖望乃以刻本爲外集。未刻者爲內集。謂必有殉之埋之之志。愆恩李氏後人刻之。爲撰臬堂詩文續鈔序。竟不果刻。近人得鄴嗣文一百一十一首。刻爲臬堂文續鈔。壽序幾盈一卷。題合肥先生詩集後。不免以語言泛愛人。未見有殉之埋之之作也。鄴嗣嘗問作古文法于宗羲。不肯執弟子禮。因宗羲尊錢謙益。遂亦不薄其爲人。文多紀滄桑間事。讀之令人思憤。頗賦才辨。筆亦明暢。不似其詩。真真獨造。然宗羲以爲數百年所無。則爲過譽。馬吊說。以詆馬士英馬吉翔。可謂牽強。杭世駿謂不當作是也。爲徐霜臯紀夢。亦太不經。皆非文學士所宜言。論詩與梁以樟相得。不薄七子鍾譚。專事摹古。古體大半皆樂府。失之生澀。然工力甚深。似在其文之上。

刈早禾詞二章

余適爲農夫。秉耒往東阡。豈不憂饑乏。薄土聊自佃。日暮相攜歸。巷中喜初煙。茅欄通夕景。半牀雜簡

編。慕古十餘載。奈何負昔賢。且夕高風生。四仄未暇便。常懷劬苦意。書此示東田。

東臯有廢土。三年始得昀。勤懇所不惜。恐爲田父嘖。雨澤幸無頗。同疇高下勻。刈禾黃漸了。遲苗潤如春。鄉間賀乍飽。餓夫色漸新。嘖嘖集羣雀。物情亦知欣。頻年厭兵氣。我里幸各存。子孫守其業。世爲古
蘆民。果堂詩
鈔三

田家詞

去年收禾不到場。今年打麥不上箱。誰家還得糶粃食。三時種作口未嘗。羊子亂啐牛父恂。雞飛拉颯狗上牆。村村盡被搜牢去。低籬窄舍無計藏。老翁捻喉氣難吐。亂離纔識田家苦。城中蕩子髮如錢。笑學鄉人打鄉語。果堂詩
鈔四

久客歸

客行二十年。記老不識少。改盡故鬚眉。昨夜邊場到。憶昔城東開萬戶。城口浮梁接江澗。出關收魚若收租。大船半泊新安估。廟前市馬金障泥。古渡桃花鬪眉騰。今來陵谷何易遷。夾路小坊盡草莽。獨行空巷白日疑。放恣西鄰一寡姥。黃門甲第當衢開。老兵橫臥自稱主。郭外古墳有我親。白楊樹倒供斤斧。久客無家還欲行。兒骨先愁不傍父。飄葉終身思本根。及到誰知益酸苦。幾時真得洗甲兵。盡使流人歸舊土。

果堂詩
鈔四

西陵絕句十四首

大錄

五寺鐘聲送夕曛。女冠猶著舊宮裙。葫蘆井畔傷心語。只許東洲遺老聞。
會稽行在隔江頭。不把杭州作帝州。故老莫論千載事。年來吳越幾春秋。
春雁仍飛竟不還。兩湖風物總潯潯。北來高士今誰在。可有人登望洛山。
三臺夕炤尙餘曛。相望于墳與岳墳。一自蒼公藏骨後。湖山如畫遂三分。
往事心驚淚血澌。靈車東渡瀾江時。男兒七尺真無用。莫唱人間獨漉詩。
司馬墳前客過頻。灰飛常見紙錢新。豈如哭祭文山客。只有西臺甲乙人。杲堂詩鈔七

李 暎 松梧閣詩集一卷二集一卷三集一卷四集一卷

李暎。字寅伯。號東門。鄞縣人。方鄴子。監生。負才氣。任俠好客。不務講學。亦不求仕進。游踪半在東南山水間。卒于雍正十二年。年七十五。事具全祖望續甬上耆舊詩集本傳。著松梧閣詩一卷。二集一卷。三集一卷。四集一卷。存康熙丙申康熙五十五年至雍正甲寅十二年十九年之詩少壯所作。黃宗羲目爲別開生面。及全祖望所錄七首。盡從刪薙。殆有避忌。祖望謂其詩佳處與蹇時相近。實則神似鄭梁。所師事也。

積雨嘆

天下何物不賴雨露養。惟雨綿綿。萬物莫長。今春四十有餘日。碧落從無一朝朗。去冬晚稻荒。菜麥播種廣。飢腸晨夕鳴。夏初麥飯一飽又難想。飽既不可得。生亦何所往。城中十室九室空。鄉間不可覩其象。

將來貧富同歸盡。歲豐亦與荒無兩。安得父子夫婦兄弟兒女歡樂聲。但聞悲號啼哭形狀無異魍與魎。李生浩嘆狂歌欲乞天公知。即刻高懸紅日晒土壤。春花可收。早禾可上。十雨五風依舊感戴天恩之浩蕩。

松栢閣四集

拜張大司馬墓

赫奕于墳與岳墳。誰將司馬足三分。遊人雜沓雷峯下。冷滿南屏一片雲。全祖望續甬上著 舊詩集百二十九

妙高退禪師前朝甲子孝廉先大父同年友也甲申之變投老于此肅拜塔下

兵氣滿地逼公來。咫尺家鄉竟不回。杖鉢久齊生死路。風塵不上妙高臺。西陵長抱胥潮恨。東漸原多燕廟才。吩咐勾芒無限意。冬青只許墓前開。全祖望續甬上著 舊詩集百二十九

甲申三月壽林殿颺先生九十

六十年前事若何。黍離舊恨已消磨。誰知尚有孤臣淚。流落鄞江百尺波。全祖望續甬上著 舊詩集百二十九

許令瑜容菴遺文鈔一卷存稿鈔一卷

許令瑜。字元忠。海寧人。崇禎十六年進士。官仙游知縣。有濟變才。薦擢吏科給事中。棄官歸隱翠薄山房。結五噫亭。寢臥食息其中。不與人世通聲問。自號容齋道人。又號靈泉遜翁。以順治七年發憤卒。年五十七。初刻有容菴存稿三卷。久佚。羊復禮得其文二十一首。詩四十一首刻之。文多作于閩中。詩皆亂

後之作。春與鶉啼。秋與猿吟。不足以喻其哀怨。子齋字大辛。能繼其志。爲張履祥所稱。

秋興六首

無端草木入清秋。萋綠蕩黃處處愁。多病百年誰奉枕。不眠終夜獨登樓。光芒劍氣風雲散。熠燿樓星霄漢浮。顛顛楚臣傷歲晚。天涯何處有滄洲。

投老間關涕欲揮。幾年皓首嘆無歸。蒼茫白日還今古。冷澹溪鷗自飽飢。往事看山惟中酒。故人戀我尚無衣。蕭然一徑烟蘿外。歷亂寒雲暝色微。

侍臣無復向東華。楓葉疎林落日斜。賴有黃花舒老眼。獨餘清月引淒笳。河山自古悲德祐。哭亂於今正永嘉。戎馬關山徒極目。虛將心事寄寒槎。

錢塘江水怒潮生。越嶺吳山氣不平。幾陣蘆花飛雪蕊。一天鴻鴈送秋聲。沉沉雉堞高低杳。獵獵蠡旗番漢兵。回首宋家陵下月。子規叫徹正三更。

明月猶能識漢宮。低徊夜影故朦朧。玉階虛冷游麋鹿。桂殿深陰臥鐵驄。天上銀河應已斷。人間關塞幾時通。年年涕淚隨秋落。不見思園雙眼中。

那堪物序催移候。沉復兵戈斷客魂。四海烽烟辭故國。百年霜露此中原。鵝鸞舊侶人俱盡。鹿豕殘年聲自吞。消息別來無一字。憑誰勸我且加飧。

容菴存稿鈔

陳確 乾初先生文鈔二卷遺詩一卷

陳確。本名道允。字非玄。號乾初。海昌人。與祝淵同事劉宗周。爲性命之學。稱高第弟子。尤深于禮。善屬文。工議論。詩有情韻。入清後棄諸生。讀書深山。是時士之死者先後相望。確獨曰非義之義。大人弗爲。人之賢不肖。生平具在。故孔子謂未知生。焉知死。今人動稱末後一著。遂使奸佞同登節義。濁亂無紀。死節一案真可痛也。蓋有激爲楊惟垣輩而言也。晚而病廢。不出門者十五年。卒于康熙十六年。年七十四。事具黃宗羲所撰陳乾初先生墓志銘。確有未刻詩文集三十卷。別集十九卷。光緒中尙存其家。羊復禮得其文鈔二卷。詩鈔一卷。刻入海昌備覽。

辛卯長至後一日集南湖寶綸閣

故人清興晚年同。又是霜湖漾曉空。雲岫梵音晴海外。鹽州官路靄烟中。閑閑雞犬皆仙種。落落交遊盡古風。何計覓君憑細語。千秋大業正無窮。

松陰漠漠覆祠堂。殉國孤臣骨尙香。吾道一時逢剝運。天心昨日見回陽。風湖蕩漾飄鷗侶。霜月高寒貼

雁行。藹藹五雲江水上。年來無處不羹牆。

吳菴齋先生曾停柩於此

乾初先生遺詩鈔

張履祥 楊園先生全集五十四卷

張履祥。字考夫。號念芝。桐溪人。世居縣之清風鄉鐘鎮楊園村。故學者稱楊園先生。少孤力學。與同里顏統錢寅海鹽吳蕃昌。以文行相砥礪。時社事方盛。張溥周鍾力能奔走一世。統與履祥相戒。不與社盟。崇禎十五年。嘗就黃道周問學。教以勿近名。履祥終身服膺不改。後二年。始及劉宗周之門。宗周之學。朱王並重。而履祥專意程朱與烏程凌克眞海鹽何汝霖歸安沈磊切劘講習。專意躬行。其學大要以仁爲本。以修己爲務。以中庸爲歸。窮理居敬。一宗考亭。知行並進。內外挾持。不尙辭辨。不務講學。不作腐語。親切平近。粹然儒者。嘗曰。許魯齋有言。學者以治生爲急。愚謂治生以稼穡爲先。既以學者自命。而孳孳以治生爲急。此又不受命而貨殖之至粗極陋者也。明季紳衿競以貨殖營利。履祥之言。蓋有爲而發。少有大志。以天下爲己任。入清。棄諸生。乃避世畏聲利若浼。以訓蒙自給。持舉業來質者。輒婉謝之。率家人耕田十餘畝。地數畝。種穫兩時。在館必歸。躬親督課。草屨箠笠。提筐佐饘。其修桑枝。則老農不逮也。種蔬蒔藥。畜雞鵝羊豕無不備。一生修己教人之要。在備忘錄一書。而治平之效。則在明農。其意以爲能稼穡。則可無求于人。知稼穡之艱難。則不妄求于人。而後廉恥立。禮讓興。人心正。世道隆。故粹其精力。發揮于農書。多農家傳言。親身體驗。至平至易。人人能行。首爲逐月事宜。以俗有農夫半年閒之諺。不欲其由閒而惰。由惰而荒。故爲之節度。明示其要。而耕織之餘。尙可資生。次爲耕種之宜。及土地

所宜。大要深耕易耨。田地全要墾深。春間倒二次。不必太細。只要稜層通曬。徹底翻身。種田不在過早。土薄早種。每患生蟲。播種行貴稀。七寸爲度。段貴密。容邊已足。種田總不出糞多力勤四字。而塾底尤爲緊要。人糞力旺。牛糞力長。羊壅宜地。豬壅宜田。灰忌壅地。爲其剝肥。灰宜壅田。取其鬆泛。白稻肥壅。不易調停。少壅不長。多壅損苗。所論極瑣而極精。謂佃戶終歲勤劬。祗寒暑雨。吾則安坐而收其半。賦役之外。豐年所餘。猶及三之二。不爲薄矣。而俗每存不足之意。任僕者額外誅求。脚米磨面之類。必欲取盈。此何理耶。或乃恃目前之豪橫。陵虐窮民。小者勒其酒食。大者逼其錢財。妻子。寔之獄訟。出爾反爾。可畏哉。仁人之言。令人猛省。與顧炎武私租每畝不得過八斗之說。可以并觀。皆救時弊之要論也。履祥性方正。崇禎時。服飾奇侈。巾車至數寸。袖廣覆地。或不及尺。履祥獨考深衣。袂尺有二寸。冠守舊製。諛者呼爲長方巾。不喜陽明之學。謂驕吝二字。足以概傳習錄。黃宗羲撰明儒學案。多奉王說。呂留良憤而與爭。因迎履祥至家。刊行朱子遺書語類。以抗宗羲。一時學者。頗右張呂。暨留良身後獲罪。不至波及履祥。猶有公論。卒于康熙十三年。年六十四。事具清史列傳儒林傳上。撰楊園先生全集五十四卷。凡騷詩一卷。文集二十二卷。補遺一卷。願學集三卷。讀易筆記一卷。讀史讀書記讀諸文集偶記讀許魯齋心法偶記讀厚語偶記一卷。言行見聞錄四卷。經正錄一卷。初學備忘二卷。備忘錄四卷。近古錄四卷。訓子語三卷。補農書二卷。喪葬雜錄一卷。訓門人語三卷。

赴壬午試抱關問稅作以諷之

席珍隆如□。待價傲連城。獨特皇仁大。津關無稅名。楊園先生全集一

和程巽隱先生惜日短詩

有序。玄風其散。萬樹驚霜。哀庚老之江頭。感楚臣之歸遠。文學六七。酌酒告子。乃引鶴而歌曰。鴻雁兮孤飛。鸞長雲兮重無輝。懷佳人兮迷望。憶往日兮芳菲。又爲之歌曰。和遂繁。嗟乎。精標雖謝。井邑未空。倘有後賢。先生其可作也。奚懼風流欲歇。寂寥三百年乎。車馬隨爾。編斯賦。考夫

張履祥序。

木葉改榮落。相將又一年。所業未殊昔。徒爲悲逝川。初謂不復爾。漸至乃依然。聞道果何日。詩書自簡編。春秋三十六。不久成華顛。攬衣起徘徊。明發期先鞭。

千古英雄血。無非泣盛年。狂瀾奔極海。百憂障東川。道遠馬無力。撫劍心惕然。往昔亦人爾。日星炳遺編。我獨何爲者。愁長欲素顛。夷吾事業微。猶思爲執鞭。

歲月向無邁。吾嘗亦少年。臨風隨茂樹。觀水立晴川。自罹憂患後。百情已冷然。閉門誰與俱。求友惟青編。其人皆不死。招我泰山顛。所期日未暮。不在黃金鞭。

天地自開闢。不知今幾年。人生暫一過。滔如汎百川。日夜去不息。古今且暮然。萬物歸何所。名跡遺陳編。前者骨未朽。後已白在顛。何心名利場。駕馬復揚鞭。楊園先生全集一

感遇 二首

自昔墾確田。力疲鮮所獲。今茲受草萊。朝暮不遑適。反復已四三。根盤匪易闕。筋骨豈嘗愛。鐵基未之惜。嘉種無新機。莠勢轉充斥。自分農家流。服勸乃長策。水旱會有時。螿賊數庸尼。惟願菑畲成。主伯蒙

其益。亦令繼自今。動免怨疆場。敢希樂郊人。歲取禾三百。楊園先生全集一

壬子仲秋許大辛過半邇候予不至留詩一章末有閔農之句述此以答之

閔農初望雨。插植苦不前。植之未成苗。飛蝗忽至焉。趨趨蛛既出。憂心殆已煎。八月霖雨作。溝渠成巨川。車戽兼晨夜。伊誰敢息肩。所冀雨滅蝗。庶幾小有年。重經水旱後。殘喘或得延。豈知禍尤篤。降此蟲萬千。集根苗遂稿。集幹穗失鮮。初猶十二三。漸乃靡一全。彌望皆朽折。西陌接東阡。蒼天誠何意。斯民日顛連。仁愛寧異古。必也民多愆。我友其敬矣。三復有皇篇。楊園先生全集一

題屠處士廣邨居

霍原六聘山。焦先三詔洞。漁子定迷津。只莫桃花種。靜志居詩話三十二

呂留良 晚村先生文集八卷續集一卷東莊詩存七卷

呂留良。字莊生。原名光翰。字用晦。號晚村。崇德人。順治十年始出就試。爲邑諸生。康熙五年不入試。以學法除名。與桐鄉張履祥發明濂洛之學。編輯朱子書。卒于康熙二十二年。年五十五。事具其子公忠所撰行略。初留良從黃宗羲游。後乃差池。堅謂友而非師。然宗羲先朝大臣。黨人之魁。長于留良幾二十歲。宜不可與之爲友。然李鄴嗣亦友而非師也。黃呂啓衅之由。謂由高且中墓志。見三魚堂日記宗羲謂且中之醫。善于望聞。留良疑爲譏己。力主高氏不以此石下窆。此爲決裂。而非衅由此啓。全祖望以爲起于爭買

淡生堂書。尤爲細微。蓋留良任俠好義。結連海上。陰有所圖。不能不倚宗義名位。以事招納。宗義亦恃之以爲及。留良有富名。家已中落。拮据不能應其求。康熙之初。永曆既亡。鄭成功沒于台灣。張煌言爲清所戮。留良實主煌言餉餼。及其死也。爲葬于南屏山下。時移事變。宗義與留良皆知事無可爲。欲藉著書講學。以寓其鬱勃不平之氣。留良自揣文章聲氣。已足獨樹一幟。于是詆象山陽明。詆明儒學案。詆宗義晚節。頓首復頓首。尻高肩歷肘一詩。幾于毒口。宗義以罵先賢一文報之曰。罵象山陽明者。以晦菴爲主。類豪奴之嫚賓客。獬犬之逐行人。雅道掃地。社盟之局。隙末凶終。類此者多。無如是之甚也。留良之求于吳之振。又有甚焉。資財衣物。飲饌器玩。無不取給。幸之振富人長事。不敢絕交。唯于葆中有微詞。葆中爲公忠改名。康熙四十五年以高第入翰林。殆忘其父尺布裹頭之訓矣。雍正中。有曾靜張熙之獄。謂讀天蓋樓選文。始知夷夏之防。因論留良葆中戮屍。毅中立斬。留良門人嚴鴻逵戮尸。鴻逵門人沈在寬立斬。子孫遭戍。婦女入官。他所牽連甚衆。留良身後得禍最酷。得名亦最盛。所撰有晚村先生文集八卷。續集一卷。首載康熙五十九年孫學顏序云。得江斂谷藏本刻之。有雍正三年留良曾孫爲景跋云。白門刊本僅十之二三。又其間敍次之舛錯。字句之謬訛。不可殫述。私心竊耿耿焉。懼先人之遺稿反因是貶損。非惟無以揚之。且抑之也。因取其祖葆中手輯本。釐爲八卷。文後多采孫江評語。續集則取宋詩鈔序。質亡集小序。并行略爲一卷。別本無孫序及評語。而剗改跋語白門刊本以下云。係桐城孫勳山所編。惜彼時未見全集。惟據傳本授梓。雖考訂精核。而挂漏尙多。懼夫世之學者。以爲先人之集祇如此。

不無遺憾。凡五十字。是孫氏詰難後所易。其續集別錄宋詩鈔小傳二卷。質亡錄小序一卷。保甲事宜一卷。并行略爲五卷。以是知呂刻實有二本。東莊詩存七卷。從無刻本。曰萬感集。恨恨集。夢覺集。眞臘凝寒集。零星集。東將集。欸氣集。是時競尙宋人集部。曹溶所得最多。宗義留良黃虞稷亦各相亞。故留良文似朱熹。翻瀾不休。善于說理。唯谿刻處。令人望而生畏。詩學楊萬里陳師道。深情苦語。能令人感愴。如曰甲申以後山河盡。留得江南幾句詩。曰十年游俠千金盡。九世仇讐一劍知。曰空城不返青衣主。大澤猶存雪窖臣。曰天上幾家忘主客。此身今日繫存亡。曰但存傭保髡鉗意。肯作人天鼓笛思。以詩文論。誠宗義勁敵。唯史學不如。

亂後過嘉興

茲地三年別。渾如未識時。路穿臺榭礎。井汲濁膿泥。生面頻驚看。鄉音易受欺。烽烟一悵望。灑淚獨題詩。

雪片降書下。嘉禾獨出師。儒生方略短。市子弄兵癡。炮裂輒摧屋。門爭路壓屍。緹城遺老入。此地死方宜。

城陷陷。徐震求先生獨縋城入。死之。

間有生還者。無從問故宮。殘魂明夜火。老淚溼西風。粉黛青苔裏。親朋白骨中。新來鄰里別。只說破城

功。東莊詩存萬感集

田家女

桔槔鳴遠林。啾嚶散平楚。田家惜人工。踏車用寡女。但愁苗葉乾。豈問荒機杼。天氣割骨寒。尙有皮肉阻。刀劍攢飢腸。智勇不堪煮。隣里重婚姻。遣媒相迎娶。寡女前致辭。此事諒不舉。生男馬前啼。生女馬上語。馬頭各東西。那得儂與汝。棄捐耳上環。寧復作男使。男死倚道旁。女死不知處。東莊詩存 萬感集

歲除雜詩

十首 錄二

雞彊知天曙。人偏記歲除。安能俱混沌。不復記盈虛。慘淡明州信。荒涼剡曲書。平時憂迫索。此際更何如。大冲晦木且中書來近狀益困

荒歲盜無粟。入都慶糴平。平還須價值。荒豈免科徵。貴賤知何益。凶豐望亦輕。黃金如可作。四海奉文

成。東莊詩存 俚俚集

耦耕詩

十首 錄一

誰教失脚下漁磯。心跡年年處處違。雅集圖中衣帽改。黨人碑裏姓名非。苟全始信談何易。餓死今知事最微。醒便行吟埋亦可。無慙尺布裹頭歸。東莊詩存 俚俚集

憎氓

秋氓生陰叢。嗜欲聞見少。得人喜且驚。傳呼不即敵。客倦欲小休。奈何終日炒。瘦頰忽自批。蒙頭被幅絞。我拚升斗血。恣汝萬腹飽。何用苦啣螻。惡聲不可了。種類既繁多。變化出奇巧。或同鳥口噴。或依木葉樛。一投聲氣中。凶性同天造。氓痒瘁饑苦。蓓蕾費爬爪。花氓嘴吻毒。文彩枉自姣。輕薄推水氓。霜筋

猶囉呢。最是草螟饑。劣肚逼乾蕪。更有蟲化生。傳授更黠狡。大都慕羶徒。卽拜螟妣考。本亦無殊能。但教長隊掉。秋涼隊益多。一月添一杪。添至八九月。叢鉸大如蠹。幸遲霜飄來。汝迹將盡掃。不然仲冬季。虜首將不保。螟云語太過。我來亦有道。早螟例入城。肉食腥汁膠。使君居清幽。我螟豈能擾。晚螟例食鄉。伏莽嚼枯槁。使君居高華。我螟敢搜討。螟種無處無。君自避欠早。得意爲歌吟。拂意相蒿惱。君詩庸詎殊。何獨螟不好。赤身謝秋螟。改轍待天曉。東莊詩存 夢覺集

張遂辰 張卿子四編八卷

張遂辰。字相期。號西農。錢塘人。諸生。明亡後。隱于醫。吳旭南山堂三訂詩。舊游雜憶云。卅載從游弟與兄。春初忽地叩柴荆。丁寧_後裏雙足。詎料終將懺語成。自注。張卿子戊申_{康熙九年}後不復至湖。揣詩意遂辰當卽卒于戊申。故曰成讖。與此集金張跋。沒二十年至戊申語合。度其年或過八十矣。此集四編。皆遂辰手訂。刻于康熙之初。湖上編起于萬曆末迄崇禎初元。白下年與相若。蓬宅隱于湖州。衰晚下至丙申丁酉_{順治十三年}以後。其詩清麗。早年由初唐以窺齊梁。曲終奏雅。麗而不淫。非西冷十子所能仰望。晚經喪亂。一唱三歎。如怨如慕。金張謂其每飯不忘陶杜。厲鶻東城雜記。稱爲澄澹孤峭。蓋指晚歲而言。遂辰輩行甚高。與聞子將齊名。陸柴後起之秀。未嘗不共唱酬。虞山裏東。不通聲氣。致成獨響。金張謂前困于學王李者之膚。後棄于學蘇楊者之刻。正如繁絃急奏能邀衆賞。而聲稀味淡者寡和矣。

屯房行

杜陵悲歌意何側。一屋破風遮不得。公然抱茅惡小兒。誰念諸侯老賓客。此生去住良偶然。何羨鄰家十萬錢。簞瓢隨身幸無恙。聊復人間寄一廛。不道亂離歷今日。何處村城有寧室。新皇開國真至仁。從此洗兵詔休息。盡感彌天聖網寬。前禽放失四野權。長纓大帽坐高馬。昨尙稱敵今除官。清河兩侯真父母。仁恤承風心獨苦。安插此輩安爾民。里與儻舍縣給纒。風雷雖行沛澤遠。氓愚無知或驚喘。但聞門前喧馬蹄。零亂琴書不及卷。嗟我蕭條家壁立。纔脫踞兵昏又集。奸胥里猾正整人。弱子門生計無出。昨聞皇皇天使者。圉人夜來爭驛舍。詔封顛倒冒雨行。漢臣貴且讓一馬。寶鍾玉使巨篇。漢臣雖云貴。一馬功無比。何況窮檐病秃翁。眼看十室還九空。那得廣庇思萬廈。出門一笑如飄風。裴晚篇二

魏耕雪翁詩集十七卷

魏耕。原名時珩。又名璧。字楚白。入清。更名耕。字野夫。號雪竇居士。或曰甦。慈谿人。幼隨父忠顯游學歸安。富人凌某義渠。秋室集作凌祥字從子也。以女妻之。遂占籍爲諸生。甲乙後。棄衣冠。浙東義師起。錢肅樂迎魯王監國。耕以義渠故。得與其事。嘗入海。與張煌言會。遂爲煌言東道主人。力說煌言與鄭成功。以舟中入長江。南京可唾手而得。于是有己亥。順治十六年江上之師。不幸而敗。耕方在煌言軍中。將自焦湖入英霍山寨。不果。乃問道出浙。自後數往來吳越間。同游者。錢纘曾朱士稚錢瞻百朱彝尊祁理孫班孫潘廷聰

陳三島朱近道。皆有才氣。能文章。上世多顯官。有餘資可以結客。諸人率水田衣。荷葉巾。或氈帽綴玉瓶若蜜結于旁。曳朱履。競以氣節相尚。無所顧忌。錢謙益與吳偉業書。謂耕及沈祖孝顧萬三子者。李翹曾鞏之亞。今世士流。罕有其嚆。而樸厚謹直。好義遠大。可以深言。其推重如此。時海上新敗。方別有所圖。蓋未嘗一日忘故國也。會孔和尚告密事起。江陰孔元章。字孟文。爲僧往來海上通消息。索金子纘曾不應。耕與纘曾且衆辱之。廷聰復以他事使不得居長興寺。元章恨甚。順治十八年夏。僞稱大帥自海上來。籍通海者姓名出入徑路。投京口都統劉之源。得入都陞見。授總兵虛銜。初出首意在重賄。故不言真姓名。及無所得。乃告浙中鎮守柯奎。一一吐實。具籍貫居址。諸人無不就逮。康熙元年。獄成。耕贖百纘會廷聰論斬。六月朔日。磔于會城觀巷口。耕妻凌同日自經死。仁和顧豹文。或曰孫治也。收葬西湖瑤瑤山後。以石表之曰。白衣山人夫妻之墓。封土爲牧馬所壞。錢塘項溶復改葬靈隱西五寺橋大桐塢。墓前有碑。碑陰鐫慈谿魏長白山人夫婦之墓。子嶠戍尙陽堡。後三十二年贖歸。不知所往。次子嶠自經死。同人若士稚先一年病死。班孫及李達。李楊遷。楊越或作春華皆戍寧古塔。後三年班孫達逃歸。班孫爲僧堯峯。號曰呪林。未幾死。遷竟死戍所。其子賓屢請始得返葬。并迎母歸。甲遷以纘曾欲託遺孤。故及于難。餘皆亡命。彝尊欲走寧波入海。事解乃已。乙巳丙午間。康熙四五年孔和尚亦以事舉室流寧古塔。爲人誦經以給食。至庚午。二十九年賓猶及見之。寧古塔流人。爲所搆陷者殆百餘人云。耕與贖伯共選今詩粹十五卷。刻于庚子。順治十七年耕所撰息賢堂集附之以行。比事敗。人競毀其書。故今不易得。近人得寫本雪翁詩集十四卷。

改爲十五卷。附錄二卷。寫本大約卽鈔自刻本。更名以避時忌。有耕丁酉順治十四年、自序。謂崇弘後所作。然

錄詩至庚子止。殆最後定本。朱彝尊稱耕詩早年學杜。後復學李。未見其止境。屈大均最服耕詩。大均頗

以太白自擬。今觀耕詩較大均爲自然。此境殊不易致。或才氣猶過之歟。紀耕事者有魏霞明處士雪竇先

生傳。朱彝尊貞毅先生墓表。楊賓魏雪竇傳。祁奕喜李兼汝合傳。全祖望雪竇山人墳版文。祁六公子墓

碣銘。全文最誤。今摭諸家文可信者爲此篇。

歲暮遠游與嶠嶠二稚子有序。吾東髮讀書。蒙朝廷恩澤。兼祖宗以遐世有顯人。爲清白吏。不願風跡塵庭。自

穉此困瘁。撫頂摩髮。言願涕零。語云覆巢之下豈有完卵。理所自然。夫何足怪。昔陶潛系出長沙。爲晉處士。恥事二姓。屢值凶歲。往往乞食。潛有五男。曾不以爲怨。爲汝等標格也。歲暮冰雪。吾將行矣。緊惟二兒勉焉。

遙聞廬嶽秀。欲臥香鑪頂。瀑布落九天。巖樹啼猿冷。逍遙叩東林。耽玄冀深省。將發蒲帆塘。僕夫駕已

整。出門復入門。行止戀俄頃。紅日銜海山。白雲生湖嶺。把袂佇西風。珠淚雙雙迸。雪翁詩集一

湖州行

君不見湖州直在太湖東。香楓成林橘青蔥。山川迢迢麗村渚。秋城澹澹遮蒼穹。亭臯百里少荒土。風俗

清樸勤桑農。充腸非獨多蓂蕢。宴客兼有錦鯉紅。白屋朱邸互原野。黔首擊壤歌年豐。今歲野夫四十一。

追憶往日真如夢。腐儒營斗粟。閭閻挽長弓。盜賊如麻亂捉人。流血誰辨西與東。又聞大戶貪官爵。賄賂

漸欲到三公。豪僕強奴塞路隅。獬豸豺狼日縱橫。皇天無眼見不及。細民愁困何時終。安得聖人調玉燭。

再似隆慶萬曆中。天下蚩蚩安衽席。萬國來朝大明宮。雪翁詩集四

醉時歌與朱廿二

神廟宰相朱金庭。有孫豁達逞豪英。黃金白鐵隨手盡。一身落魄東南城。可憐疏布纏粗骨。蕭瑟秋風不掩脛。憶昨破屋藏亡命。事敗何如燕荆卿。頸繫青絲脚拴木。同日義侶被束縛。爺娘捶胸不敢送。親戚攔街齊慟哭。先生毅然赴法曹。睢陽寸樹知無逃。衆囚相對破濁醪。掀髯長歎聲轉高。金雞此日瞳矚赦。隻身生渡錢塘潮。才雄萬夫遭人怒。名垂史冊有何補。年來吹簫過黃歇。乞食尋常徧環堵。與子同病更相憐。河上之歌聲最苦。烏程縣前酒如淮。囊中有錢傾百卮。脫帽慷慨搔白首。更闌銀燭盡三枝。勺鹵細盜阮宣帝。宋野狂徒挫仲尼。自古聖賢皆如此。轆轤蹭蹬復奚疑。不見青春庶草抽。倏忽西陸繁霜隨。人生有酒須當醉。豈必終日求人知。升沈聚散任小兒。我曹安用苦躊躇。魏耕詩 集四

欲謁虞山錢大宗伯途中書懷先寄東呈覽

四明狂客四十餘。擊劍拂衣意氣疏。汎海飄飄洪波詠。落魄淒淒下澤車。來往蒼南復蒼北。門前五柳垂金色。明月橋頭酒一壺。醉來高臥清溪石。前歲縱橫計不成。仰天大笑還振纓。授書恰思下邳去。采藥乃向玉山行。玉山彩翠搖蘿樹。仙人樓閣雲邊住。中有仙翁餐雲腴。印心曾把楞伽註。峯西白鶴破鴻濛。翩躚有客駕長風。雖然未進胡麻飯。曾識井上雙梧桐。魏耕詩 集五

柳麻子說書歌行

昨歲客游江都城。說書共推柳敬亭。抵掌談天縱侈辯。馳驟不必皆有經。出門人呼柳麻子。往往攔街不

得行。何家相國酩高讎。桃李青軒管引見。堂上遮留麒麟車。簾裏徘徊孔雀扇。風雨颯沓動鬼神。片言落地咸稱善。崇禎之際左將軍。意氣如山天下聞。開筵日召柳麻子。牙門羽騎羅紛紛。齊聽柳麻說漢祖。胸襟豁達龍顏君。貌出英雄天人際。烏雕叱咤非其羣。將軍大笑遺雙壁。還贈雕鞍龍八尺。居常喜著火浣布。醉後頻欵綠絲幘。全時湯鼎擅琵琶。寵愛豪華難與匹。詞源屈注天河傾。後來無人奪其席。十載飄飄旌旗紅。柳麻柳麻老成翁。有眼日睹尋常人。東西南北道路窮。唐時工部杜少陵。翰林供奉李太白。彩筆光芒干雲霄。人間萬古稱詩伯。落魄風塵逐馬蹄。腹中無飯常唧唧。雲翁詩集五

抽戈

十載烏號淚。至今曾不乾。青梧凋晚日。丹桂老秋天。妖氛何滾滾。鼙鼓正淵淵。麟閣誰人上。抽戈拓舊邊。雲翁詩集七

渴極

蒼梧巡狩絕。曆數久茫然。野老真難活。狂奴益可憐。烏蠻春色外。白帝淚痕邊。渴極思甘醴。囊無沽酒錢。雲翁詩集七

李天植 蜃園詩文全集十一卷

李天植。字因仲。乍浦人。崇禎六年舉人。明亡後。更名確。字潛初。易僧服。遜迹陳山。自號龍湫山人。訓

童子自給。其妻織棕履編竹筥佐之。如是者十年。困愈甚。以妻委壻家。自寄食于僧舍。戚友憐之。爲贖故居蜃園。俾夫婦共居。避不見人。好事者周以酒米。雖飢寒不輕受。寧都魏禱來訪。贈之五星曰。非盜泉也。五反而後受。禱謀與友輪月給白銀五星。米五斗。徐枋聞之曰。李先生不食他人食。君子愛人以德。不如聽其餓死可也。果不受月給。竟窮餓以死。時康熙十一年。年八十二。著書多散佚。今存者蜃園文集四卷。補遺一卷。蜃園詩前集後集續集雜集各一卷。梅花百詠。九山游草各一卷。天植詩多感愴。令人不忍卒讀。年年必賦三月十九日之詩。今不見集中。蓋佚者多矣。

禱旱篇

辛丑七月天地否。五旬不雨苗槁矣。達官步禱叩龍宮。願乞甘霖救田里。有客過我徐啓齒。君之杜門昔所矢。茲因禱雨一登山。散步怡情良可喜。我留客坐與客語。君知我者胡爾爾。行遠登高我不能。安得隨君杖與履。我聞袁公土室三十年。何必登山更臨水。又聞劉子環堵終其身。不問凶豐與亂理。我昔龍湫住十年。今歸臥病荒園裏。囊空甌破交親絕。斗室活埋良有以。前貽密公四石磴。贈米四斗荷知己。去年心痛今轉甚。君所目擊諒非詭。貧不依人餓有餘。老而善病死則已。自分微軀同露電。不待凶年飽糠粃。我今自笑無一能。清晨負痛還早起。焚香齋素日叩天。我亦自盡吾心耳。

蜃園詩
後集

哭忠烈皇帝

驚傳龍馭痛賓天。不是尋常退密年。唐運豈期逢百六。楚圍無計出三千。湘妃血盡啼斑竹。望帝魂歸泣

杜鵑。幾夜中庭看北斗。一回長歎一潸然。

城頭落日黃埃。玉碎昭陽更可哀。洒血尙留遺詔在。斷魂無復故宮來。三良自分甘殉死。九廟誰憐付

劫灰。我昔壯遊詢盛事。宵衣聞說坐平臺。蠶園詩後集

案思陵南都諡曰烈皇帝。廟號思宗。尋改毅宗。唐王後改威宗。清隆懷宗端皇帝。後改稱莊烈愍皇帝。先後五易稱。從來無忠烈之諡。傳聞有誤耳。

謝泰宗 天愚山人詩文集二十八卷

謝泰宗。字時望。定海人。崇禎十年進士。番禺知縣。入爲工部主事。再起南安推官。隆武時。擢兵科給事中。遂高隱。歷二十年。卒于康熙五年。年六十九。初泰宗自定其文六十卷。詩四十二卷。刻成毀于火。康熙五十五年。其孫敍欽重刻僅十四卷。光緒六年。八世孫駿德獲原稿。始選刻詩十二卷。文十六卷。卽此本是也。朱彝尊序其詩。謂不必其詞之工。而必傳于後世無疑。今觀其詩文不事摹擬。直紆胸臆。讀書多。筆力健。足以供其發揮。詩以花歸百首。菊醉吟百二十首爲最著。然他篇莫不自道身世。寄意遙深。屬詞淒苦。文則却聘文。徵五處士不至說。菊醉說。周鄧山傳。甲申京城死事合贊。餘生錄引。皆足見其所志。重修定海縣城記。謂派既定。卽大書當築者姓名于睥睨。各有勇士督之。夫其人未必勇也。而操切之狀近之矣。卽此數語。踟躇之情若繪寫。志不墜者所以必慕仕宦也。浙東山川之氣鬱深。報仇雪恥之心。

生成若性。宋明未造。斷脰絕頂者何限。其幸而未死者。亦不肯詭隨以求全。觀于泰宗之縱酒傷生。所謂等于沙場之痛者也。讀其書。令人有烈士之思。惜未窺其全。吳偉業爲撰墓志。列舉所著書目。花歸菊醉各二卷。又稱其詩四十二卷。殆復出也。

天婚謠

燕歌趙舞美如花。陋矣東南三村家。民家借此諧姻睦。不藉相攸通媒卜。多少貧兒寡男女。忽然車牽旅輶輻。

三實標梅詞已哀。猶須老奴玉鏡臺。忽聞昭陽掄天倪。不待俟著雁親奠。非偶卽因片言從。漫說女爲悅己容。天愚山人詩集二

驚聞張督部薦書

天清甯。風雲掃。未亡人。恨不早。東海濱。西山老。非避秦。桃花島。代食何。稼穡寶。鋤誅何。窗外草。忽遙集。下士造。康瓠才。周鼎保。稅傅革。表裏稿。千鈞弩。鼯鼠討。長者惠。乖素抱。天祐翁。君自道。謝壘山。投畀昊。天愚山人詩集三

來集之 倘湖近詩二卷

來集之。字元成。號椎道人。又號倘湖樵人。浙江蕭山人。崇禎十三年進士。官安慶推官。明亡以遺老終。

著有倚湖樵書。事詳毛奇齡所撰墓碑。據林時對荷鍾叢談。記集之於魯王時。以兵科給事中監兵長河。則毛碑之所未及者也。毛碑謂南都以兵科召晉太常少卿。不應加以驟擢。蓋魯王時。始加少卿。亦見荷鍾叢談。奇齡紀事。往往不加深考如此。此集皆七言絕句。曰月令詩一卷。詠月令。補月令。花月令。曰游仙詩一卷。則悼亡之作。自序云。世軸更換。偷活草間。石田茅屋。耕鋤自給。無用之人。只宜棄置林泉。若云高隱。則是自欺之人。無事生事。輒有題詠。不效詩史。感觸時事。不學詩魔。走入醋甕。短章細吟。聊用寄意耳。數語極悟適自得之趣。是真能高隱。亦真志節之士也。其子垣楫。皆於康熙時成進士。父隱子仕。清初人見解多如是。已仕者不事二姓。子孫則無與焉。

游仙詞

鐵騎猱獍迭往來。倉皇奔走定追陪。不因造次忘閨範。相敬如賓進茗杯。倚湖近詩卷二

胡介旅堂詩集一卷文集一卷

胡介。本名士登。字彥遠。號旅堂。錢塘人。入清棄諸生。隱於城西四十里河渚。江上兵起。乃徙居城中一畝田。即旅園。王永吉爲介受知師。時方與政。招之入都。爲謀致身之階。介若爲不喻也者。竟以白衣還。家貧游食。不能振其困乏。晚耽禪悅。與山曉哲結方外交。終以窮死。馮景見其所遺畫像。始而弄柔翰。近美人。一變而疆場戎馬。再變而老衲空山。是會即戎馬矣。即戎而又避江上之師何耶。然又訪萬壽祺

于淮上。非忘世者。觀介與魏子一論東事書。上王鐵山薊督書。與沈以冲論吳寧之變書。皆作于明末。頗解時事肯要。其告永吉以樸誠謹厚結主知。誠異于作大言。詡奇計者矣。至于時不我與。雖欲不忘世。豈可得耶。卒於康熙甲辰。三年四十九。事具陸嘉淑所爲傳。撰旅堂詩集一卷。文集一卷。介文不學王李。亦不摹八家。詩則纏綿蘊藉。意遠格高。西冷十子招之不往。淮上益多勝流。皆逢迎恐後。都中吳偉業龔鼎孳傾倒尤甚。出都日。作詩贈行者不可勝數。名人集中。幾皆有贈胡彥遠南歸詩。妻翁桓。字少君。能詩。後二年卒。其詩數首。附載集中。

贈別蔣誰庵

諱臣。桐城人。時逃權。與信宿福緣庵。書所作七歌爲別。

十年諫草惜經綸。此日相逢倍愴神。禪榻夢回餘舊恨。袈裟風過見前身。雲殘月起三生路。地老天荒一個臣。讀罷七歌憐杜甫。僧堂閒坐共沾巾。旅堂詩集一

贈李灌谿侍御

尚有先朝侍從臣。滄桑變後隱風塵。多冠諤諤留霜簡。鶴髮蕭蕭奉老親。彭澤琴尊堪寄傲。義熙詩句又憐春。誰知寂寞縉經者。猶是當年諫獵人。旅堂詩集一

偶聞越客言瀕海流亡之苦寄嚴顯亭

蕭條窮戶絕丁男。閩浙騷然漸不堪。我望憂時嚴給事。爲言民力盡東南。旅堂詩集一

陸 圻 威鳳堂文集

陸圻。字麗京。又字景宣。號講山。錢唐人。明貢生。少與弟增培齊名。人稱三陸。培成崇禎十三年庚辰進士。官行人。死乙酉。弘光元年之難。圻走海上。參義軍。不得當。歸隱于醫。黃宗羲威鳳堂詩云。桑間隱迹懷孫爽。藥籠偷生憶陸圻。浙西人物真難得。屈指猶云某在斯。莊史之獄。圻與查繼佐范驥列名參校。先已自首。後被名捕。繼佐嘗識吳六奇微時。六奇方官潮州總兵。喜與故明遺臣往還。以數萬金爲繼佐行賂。圻亦輸五千。關通要津。得免究。且依首告例。給賞莊朱半產。圻恥于苟全。推之與范查。還宗羲前詩。自貶三等。請改月旦。遂于康熙六年丁未棄家。披緇齊雲。年五十五矣。不知所終。子寅成進士。往來萬里。零丁尋父不得。歐血死。女莘行作老父雲游始末。以寄哀思。聞者傷之。圻少共陳子龍結登樓社。文行爲西泠十子之冠。撰威鳳堂文集。有劉魯檜序。作于康熙五年丙午。施閏章重建永豐陸侯祠堂記。作于丁未。陸侯謂圻父運昌也。集分論部。記部。儷語部。祭文部。詩部。詩唯擬古樂府。古樂府。五言古。五言律。未知得其全否。然千頃堂書目未見著錄。恐此冊已爲世間孤本矣。增有青鳳堂集。培有白鳳堂集。皆不傳。

釋後攜兒繁露晚發錢唐

作客新城道。登舟挈汝來。可憐懷橘孝。幸免覆巢災。人比園扉長。天從遠嶂開。莫愁江水落。明日送潮

回。威鳳堂文集五言律

陳廷會 瞻雲詩稿

陳廷會。字際叔。號鴟客。錢塘人。諸生。明亡後。高隱不出。卒於康熙十八年。年六十二。事具朱溶若陳先生廷會傳。毛際可西冷五君子傳。際可自稱兄事廷會。然稱廷會割股愈母疾。廷會七歲喪母。安能有此事。溶若敘事較詳。稱廷會生數月。聞兄讀左傳呂相絕秦而流涕。廷會詩中自言是三歲時事。皆不能無誤。以見紀事之難。西冷十子以文采相尙。唯丁澎吳百朋黃虞吳事進取。亦不得志。然高尙若陸圻。猶與當事往還。柴紹炳嘗走京師。而廷會能峻拒張縉彥稔宗孟。足與徐枋比美。際可以與汪灝相次。可謂能知廷會者矣。陸培死事。以遺孤繁弼託廷會。竟能教之成立。以文章顯名。尤爲世所稱。溶若稱廷會著有瞻雲集。似未刊行。此瞻雲詩稿門人翁懷帖所錄。凡詩二百二十六首。曰詩稿者。以別於文也。陸圻推廷會文典冊類相如。必有過人者。惜其不傳。予嘗讀陸圻威鳳堂集。丁澎扶荔堂集。沈謙東江集。規撫雲間。才情麗舉。聲調于七子爲近。獨廷會所作。格高韻古。讀之動心。朱彝尊沈德潛陳田皆未選廷會詩。蓋未見西冷十子詩選。更無論此集矣。

蕩蕩之水歌贈汪魏美

蕩蕩河名。汪所隱居處也。

蕩蕩之水溪流魚。水深獵獵飛春鋤。主人卜居正溪北。三晨晏起頭不梳。嵇康懶慢管寧達。世人那得生

毀譽。憶昔主人當青春。文章意氣如有神。蒼鸞自是靈丘產。習膝不媿真麒麟。立身頗欲事明主。乘時何必長隱淪。一朝風起市朝變。前日功名今不羨。芒屨聊依珠足佛。騎龍將向崑崙殿。離塵閉戶學無爲。丹經內典看俱徧。龐公豈是城府人。啓期長嘯忘貧賤。自覺一身真蕭爽。況復妻孥厭奇核。涼秋八月山雨楓。猿猴羣嘯當悲風。橋邊明月何人照。千古應傳河上翁。論堂詩稿

題南雷二將軍廟

蕭條落日照荒苔。祠廟還看南與雷。堦下杜鵑猶帶血。牆頭精衛欲銜梅。詞有古梅二株霜飛睢水孤城急。淚灑臨淮匹馬迴。莫道千秋憑弔少。祇今瞻望欲生哀。詩稿

沈謙東江集鈔九卷東江別集五卷

沈謙。字去矜。居傍臨平湖。水經注又名東江。因築東江草堂。自號東江子。仁和人。明諸生。隱於醫。華亭蔣平階稱其文行並高。刻勵向學。擇交取友。嶮然自異于流俗。守不字之貞者二十年。易稱乾之初九。確乎不可拔者。推許可謂備至。與毛稚黃光舒張祖望丹稱南樓三子。又與陸麗京圻柴虎臣紹吳錦雯朋陳際叔廷孫宇台治丁飛濤澎虞景銘黃稱西冷十子。卒于康熙九年庚戌。年五十一。事具應搗謙所撰傳。此集其子聖昭刻于丙辰。康熙十五年曰東江集鈔。凡詩五卷。文三卷。雜說一卷。別集五卷。則詞曲也。其全集詩二十一卷。文十卷。詞四十二卷。選刻者僅三之一。餘俱散佚。別撰傳奇六種。亦佚。本集有美唐風

傳奇自序。蓋其一也。詩初學溫李。陸圻授以陳子龍集。始效其體。故多樂府之篇。而以摹詩經者爲風雅體。名目可笑。十子皆工七律。謙亦最擅此體。唯局促鄉里。又絕口不談世務。故之登臨感慨之作。文無明季纖仄之習。而體格未遒。愁城記。答應搗謙書。戒勿賣卜。知是時文士皆窘生計。金靈兒傳。隱以寄慨。餘多無聊之作。儻體尤卑弱。詞曲喜作閩語。自謂願受冥報作泥犁中人。一時風氣如此。謙在十子中。頗富才名。與先舒同年生。而與紹炳百朋同歲卒。圻則其師也。皆恨讀書不多。非著作才。集半不傳。是集僅存。爲甚幸矣。

擬古詩

行行從軍歸。故廬猶復存。牆垣附女蘿。荆棘塞我門。鴟梟鳴中堂。猿猴追後園。棟戶不復依。東廚斷炊烟。所親死已久。魂魄知我還。一身脫戰場。猶幸肢體全。辟彼秋蓬飛。偶爾着本根。窮獨以終老。愴愴摧心肝。東江集
鈔二

陳祚明 稽留山人集二十一卷

陳祚明。字胤倩。仁和人。布衣敦高尙之節。家貧賣文以給食。順治十三年入都。以詩酒遨遊公卿間。龔鼎孳王崇簡皆甚禮重之。其詩取徑三唐。格律精整。前後十九首。熒惑不見歌。戲作焦仲卿詩補。才大如海。一時作者。無不斂手。卒以窮死。自輓三章。強作達語。亦可悲已。其沒在康熙十三年。年五十二。撰

稽留山人集二十一卷。詩起順治十二年。本名敵帚集。前于此者。有擬李長吉詩三卷。前集十卷。及牀頭集文二十卷。詩十卷。皆未刻。

皇姑行

隆準王孫數不億。時移姓改耕田食。楚王之後三戶身。東海爲漁使人識。將妻織屨夜黃昏。火鼓追呼吏到門。龍泉歎血委黃土。被驅玉貌生啼痕。雙頰慘桃花。雙眉羞柳葉。昔日郡王妃。今朝俘鹵妾。司農署裏日紛紛。沒入姬人千百羣。賜予功臣爲從婢。給將荒塞配邊軍。隱忍未隨孤劍盡。淒涼心折莫茹聞。長秋手持黃紙檄。才人詔選填宮掖。漢宮聞說愛南裝。館娃盡向南人索。螺子之黛供畫眉。燕支生紅粉作白。廣袖輕衫恰稱身。文錦吳羅尙衣借。請臨妝鏡更梳頭。蟬鬢低垂翠影浮。不勞編髮蟠倭墮。別有珠璫綴紫鏤。含愁獨掩秋風扇。殿前長跪見君王。未語酸辛淚百行。薄命已拚歌寡鵠。多情不忍繡鴛鴦。蒙頭更脫羅巾看。剪殘短髻秋雲亂。一心寂滅向空王。詔許清齋閱僊觀。城西山色萬峰深。皇姑菴子春山陰。紅泉洗鉢朝煙起。清磬焚香夕月沉。朝煙夕月年年似。洗盡鉛華弄雲水。當日深宮縱不言。細腰亦市君

王喜。稽留山人集二

北極祠二鬼歌

大明湖北北極祠。紅牆石磴高且危。松柏鬱鬱雲霧黑。下臨湖水清漣漪。祠中大帝冕旒肅。側立二鬼何權奇。筋骨怒張毛髮豎。臂如屈鐵蟠蛟螭。迴眸攬身腰欲轉。目光爛爛巖下電。足蹋怪物五指撐。力蹴崑

崙百骸戰。是何妙塑遠擅場。吳生畫手師初唐。五采剝落金碧盡。神氣飛動何洋洋。年移物改汝獨在。冥漠森然護真宰。燕雀不敢污肩背。蟲蟻何曾穿甲鏡。鬼乎鬼乎如有靈。天陰月黑風冷冷。香煙苾蒭男女拜。歌舞刑牲血肉腥。山河已易三四姓。人生那得一百齡。日出平湖杏杏白。雲起岱嶽濛濛青。安得無情學土木。壽命迫人如轉燭。君不見濟南城破白骨多。門外啾啾真鬼哭。稽留山人集二

老友陸子鼎自遼陽詣燕山見訪旅舍留飲感賦

六旬老叟華亭客。中原宿許文章伯。十年謫戍赴遼陽。形容枯槁鬚髯白。生平三婦豔如花。麻衣犯雪從風沙。長男萬里滇南去。父子飄零何處家。近育小男一雙玉。七歲扶牀書解讀。爭問茸城春若爲。朝朝偏指南雲哭。今年詔許齒編民。不屬將軍自在身。短衣匹馬關山道。纔到燕中見故人。我昔舉家迫奔竄。兵戈未起逢家難。辟疆園內一枝棲。飽食坐看花爛熳。釋紛解鬪情依依。沒齒銜恩誓不違。倉猝驚看殿譴及。慙無貨賂贖君歸。君來翻道遼東樂。生事蕭條惟賣藥。絕塞仍書戶籍名。北海之濱天漠漠。幼安昔日此巖耕。華表仙歸空月明。古今誰繫白日駐。富貴豈直浮雲輕。留君且沾燕市酒。酒酣起舞爲君壽。不論七古來來稀。小弟彊年已衰朽。朋交屈指異存亡。共是狂夫老更狂。容輝得見非當日。行樂何須在故鄉。風塵瀕洞無南北。初月不光庭樹黑。醉眠各自擁秋衾。旋別銷魂淚沾臆。稽留山人集十五

陸弘定 爰始樓詩刪一卷

陸弘定。字紫度。海寧人。與兄嘉淑字冰修。有二陸之稱。弘定才名尤著。初刻一草堂稿。爲乙丙丁順治二年陸弘定。字紫度。海寧人。與兄嘉淑字冰修。有二陸之稱。弘定才名尤著。初刻一草堂稿。爲乙丙丁順治二年至四三年之詩。後十年。復出其所作。挽朱一是陸圻刪定。爲爰始樓詩刪一卷。自序北地好爲側調。規模工部。畫影依形。瑯玕多才成元。唯濟南無體不工。自歎閨幃之什。尙有淫詞。贈答之篇。侈爲麗語。所論皆當。年始三十。信是驚才。故西冷十子交口稱之。詩格亦頗相近。詩中多作高尙語。陸圻爲之序曰。紫度少無宦情。嘗有棲逸之操。予作詩贈之曰。逢君兄弟擅歌回。小陸清河內史才。蓋未嘗不以經世期之。今讀其詩學膽而氣雄。興高而采烈。此豈山中之人。又豈堪以長吟而抱膝也。圻爲此言。非勉其進取。正恐才華太露。高尙不終耳。

壬辰春日漫興四首

錄一

海內兵戈十載餘。流離城郭半丘墟。獨租虛下西京詔。箕斂長懸平準書。故國王孫多乞養。天涯戶口未安居。五陵躍馬諸年少。馳驟春風織錦裾。爰始樓詩刪

野哭

十年長策恨塗窮。幾見秦庭血泪紅。萬里曉霜鳴塞雁。千門落日貫氛虹。山川玉篋留遺祀。苜蓿銅駝泣故宮。寧道五陵終王氣。可知河海尙朝東。爰始樓詩刪

丁酉初度 七首 錄二

兵燹春愈急。中原戰伐深。草玄亭尚在。誰識子雲心。

玩世心仍拙。謀生策未工。青春逢變亂。二十九年中。爰始樓 詩刪

古杭雜感 四首 錄二

萬里紅塵一望迷。蟠龍窄袖織金衣。夕陽江上飛雲錦。正是侯家放馬歸。

短衣銀箭佩來新。馬上投鞭笑暮春。程袖小環垂悅甲。從教註籍滿洲人。爰始樓 詩刪

吳景旭南山堂自訂詩八卷樂府一卷詞一卷續訂詩五卷三訂詩四卷

吳景旭。字又旦。一字且生。號仁山。歸安人。入清棄諸生。撰有南山堂自訂詩八卷。樂府一卷。詞一卷。

續訂詩五卷。三訂詩四卷。自序戊子順治五年遘患。并二十年吟卷失之。晚歲張卿子勸之哀錄。乃芟汰其半。

先後刻成諸集。始于康熙二十年壬戌。迄于三十四年乙亥。年已八十五矣。景旭與西陵諸子游而不效其體製。乃與樂天為近。早歲流離艱苦。晚年田園曠適。無曠殺之音。不樂之事。其子光以順治十八年辛丑

一甲第三人及第。早卒。亦無歎悼之作。年及耄耋。親見曾玄。蓋近乎有養者。南山堂在郡城蓮花莊。為

趙孟頫別業舊址。景旭亂後卜築于此。遂成東南勝地。一時名流屢集。頗有游讌之樂。因以名集。別有歷

代詩話八十卷行世。

簞泥行

一谿小雨直如髮。尖頭黧子長竿揭。憑將兩腕翕復張。形模蚡蛤相箝鑷。載歸取次壅桑間。平鋪滑汰音孩子跌。起自深谷登高岸。物理滄桑在咫尺。舍南力惰但熟眠。舍北地肥盡生葉。今年節候早宜蠶。置大

於甕絲沃雪。南山堂自訂詩一

繰絲車

繰絲車。聲伊啞。男手不停又。婦髮亂垂髻。沸湯自東家。換水又西涯。繰絲車。忘其倦。織成一匹絹。餘者好作線。嫁女會親串。遮羞何用扇。繰絲車。打筭在繰時。全家飽粥糜。賴此一絢絲。往賣可療飢。繰絲車。絲且貴。朝發噉。宜得利。繰絲車。何怪哉。正擬脫車頭。宦僕突前來。敲車取絲走。那管哭哀哀。南山堂自訂詩

八訂詩

傷哉行

疾倉夫也

傷哉小民何嗟咨。不苦官糧苦例規。絲此二字牢不破。坐使倉夫得有辭。納戶辦此米。顆粒皆汗泚。十斛三淋尖。故意相觸舐。雜派瑣屑難具陳。可憐磨石加三是舊體。小民歸去母妻愁。倉夫却喜羨餘留。君不見。倉前聚華屋。頓頓飽餐花豬肉。南山堂續訂詩三

董說 豐草菴全集四十一卷

董說。字若雨。號西菴。烏程人。明亡。棄諸生。改姓名曰林蹇。順治十三年丙申作焚研誓辭。削髮從靈巖繼起儲禪師游。法名南潛。字月函。康熙二十五年丙寅五月卒于吳之夕香菴。年六十七。事具范鐸南潯紀事詩引溫斐忱蓬窩雜稿董若雨先生傳。撰豐草菴全集曰豐草菴集。凡詩集十一編。爲人間可哀編。作于丙戌丁亥戊子。順治三十四年采杉編。落葉編。庚寅順治七年所作。西臺編。病孔雀編。作于辛壬。順治八年紅蕉編。作于癸巳。順治十年登峯編。作于甲午。順治十一年臨蘭亭維陽洞庭雨門韻牌四編。作于乙丙。順治十二年編各一卷。蓋祝髮前焚其所作詩文。而誤焚甲申乙酉。順治十二年詩歌一編。溫傳謂酉戌後始爲詩者誤也。凡文前集三編。乍醒編。作于庚辰辛巳。崇禎十三年七國編。作于壬午癸未。崇禎十五年若文編。作于癸未。崇禎十七年至乙酉。弘光元年凡文集三編。七耀編。作于丙戌至庚寅。順治三年樂府編。作于辛卯。順治八年文苑編。作于辛卯至丙申。順治十三年曰寶雲詩集。則爲僧後丁酉。順治十四年至乙丑。康熙十四年之詩。分畫石。西荒。洗藥池。積雨。夕香。挂瓢。拂煙七編。而附以禪樂府。臺山編。臺山者臺山婆子爲趙州和尚說臺山路。驀直去也。曰豐草菴別集六編。說嘗撰周禮緯。律呂發。易發。易運。運氣定論。運氣後語。古詩緯。六書發。洪範變。天官翼諸書。皆有圖釋。別撮其要。以成此集。雲漢編。以論周禮律呂爻象之文。作于丙戌丁亥。易隱編。以論易。作于丁亥戊子。地易編。以論古占式。作于庚寅。九宮編。以論奇壬運氣。作于庚寅辛卯。詩緯編。以論詩緯。六書洪範。作于壬辰。順治九年太初編。以論

星曆。作于癸巳。順治十年曰豐草菴雜著。凡昭陽夢史。非烟香法。柳谷編。河圖卦板。文字障。分野發。詩律表。漢饒歌發。樂緯。掃葉錄十種。種爲一卷。皆丙申以前所著。全集凡四十一卷。說有志經世。爲學務博覽深思。禮樂易象洪範六書。以至天文律曆壬遁。皆所究心。文極奇僻。雜以諸子佛理。辨駁恣肆。不受羈勒。詩不名一家。才思所至。窮極幽竊。以寫其空阮崖悔之思。朱彝尊以爲硬語澁體。似黃山谷饒德操非也。陳田謂其方外之詩。不廢綺語。而知傷心之至。有託而言。至于西游補說部。張皇幽渺。俊語雜出。則譏彈世風爲多。南溥董氏自嘉靖中董份官禮部尙書。仕宦科第不絕。巨室喬木。魚肉閭里。致激民變。崇禎之世。產落稍衰。文采獨盛。說父斯張。本名嗣璋。號遐周。又號借菴。份孫也。諸生。洽聞周見。著吳興藝文補。吳興備志。吹景集。靜獻軒存草。說子六人。樵牧未妨漁村皆遵戒棄舉業。爲滄海遺民。工于詩。若東學者宗之。爲南溥詩派。乾隆中董德輯刻先世斯張以次詩。爲董氏詩萃二十卷。

築石塘

築石塘。新軍來。築塘未畢府帖催。府帖下鄉吏打門。南村竈冷行西村。西村十家無一存。破屋無門僅梁柱。傳道新軍三日屯。吏索空村遇樵父。樵父言卿報府主。五月不打插秧鼓。眼中良田半荒土。築塘攝役添冤苦。君莫苦。君不見。塘岸油衣點簿書。朝朝狼籍黃梅雨。鹽草著詩集八

黃九煙居士重過寶雲

不朽文章感慨餘。未成吳越卜新居。北天簫鼓仙韶樂。夢國河山太史書。自昔將製北俱盧傳奇。又有夢史高一尺。嶽記清裁空左

馬。禹碑真訣授樵漁。並錄九何年去挈東籬叟。謂湘中陶仲調三笑重將旅抱舒。寶雲詩集二

入吳不及晤昭法

濛濛舊事破山雷。痛定重提轉自哀。澗上垂垂泥路滑。愁中番番竹輿來。同聞病榻聲三喚。忍棄前言土一堆。不道肝腸無分吐。吳船風雪又空迴。寶雲詩集三

馮景解春集文鈔十二卷補遺二卷詩鈔三卷

馮景。字山公。一字少渠。錢塘人。諸生。著解春集十四卷。幸草十二卷。樊中集十卷。卒于康熙五十四年。年六十四。事具楊寶所撰墓表。外孫盧文弨以諸集皆毀于火。欲重刻之。而憚于有觸忌諱。晚乃屬彭紹升選其尤有益于世教者。益以未刻稿為十二卷。孫志祖以為不足。乃重輯補遺二卷。景志在經世。既無所遇。遂欲整齊風俗。多為表章節義之文。流而為因果報應。至謂魏禧受其兄際瑞說。作宦寺論。欲取五十以上端正寡婦。給事官掖。以代宦者。必至使寡婦失節。際瑞死于兵。禧客死無子。皆立說不當之報。可謂迂謬。紹升識解低下。篤信二氏。故盡取之。稍涉時忌者。一字不登。大失景本來面目。十鑿僅存其一。文弨所稱畢節婦邵氏傳。亦從刪削。可惜也。景自負能文。唯賞魏禧善持議論。而失于考據。浙中三毛最有名。景年少頗以氣折之。朱彝尊號稱博洽。每於彝尊以所不知。深通經術。具有根柢。論喪服。考地理。辨古今音之異。皆有創解。不信偽古文。與閻若璩相得。集中淮南子洪保十一篇。多論尚書古文

疏證。有裨于若璩。然若璩駁詩序。斷斷與爭。謂太疑經則無經矣。不爲苟同。足當通人之目。大約景所致力者政事。觀其開河折田諸篇。原本經史。深識物情。皆立可見諸施行。墓表稱相國索公求見。遁歸十年者。蓋索額圖之客江且菴見惡于明珠。發遣瀋陽。顧安繼之。幾不免。楊寶望望然去之。景能遠禍全身。蓋亦有守。魏禮與篤交。臨沒誠之曰。何不尋君遂初賦。知人家國事耶。景猶謂伏處不忘百姓之病。亦儒者分內事。何其悲也。其文得力于莊子。妙緒無端。史論諸作。使人讀之氣王。詩亦雅健。無衰嫗之氣。自稱平生有十幸。而不幸者一。則窮也。意氣籠炤。不可一世。未嘗以窮達擾其心。故能保其嚴氣正性。讀其書想見其人。景爲應搗謙柴紹炳徐介三遺老作傳。知其寄意有在。類此者宜更有他文。

入冬無衣食人甚多愴然有作

閩左人多辟穀軀。柏羊難捋第三珠。

事詳幽夏錄

更憐葛屐西華冷。愁聽山頭叫雪姑。

解春集詩鈔三

李 標隴西詩萃

李標。字子建。號霞起。嘉善人。貢生。熟于戎機戰略軍律管陣諸書。精史學。尤熟悉遼金元事。爲人俠義。急友難。魏大中被逮。問道二百里至吳餽兼金。弘光元年應史可法揚州之聘。知事不可爲。以親老辭歸。可法衣冠葬梅花嶺。標渡江會葬。歸而透室皆種梅。賦詩三十章。人皆比之西臺慟哭。自此杜門不出。號東山逸民。其詩慷慨激烈。雄邁自喜。著有東山稿。今未見。

雜感

莫問無情夢夢天。披篋獨釣夕陽船。晚忘榮利誰云達。早識兵機亦偶然。白髮不問非我意。佯狂無語恐人嫌。絲絲楊柳含愁態。何異飄零幾少年。隴西詩萃

甲申軍前作次韻

刁斗風高靜不譁。征衫試著敢懷家。軍聲夜沸黃河水。扇影朝開白下花。長劍馬頭人未老。金章肘後願猶奢。燕姬歌罷窺霜月。故國繁華幾痛嗟。隴西詩萃

李 煒 隴西詩萃

李煒。字赤茂。號格齋。諸生。父標有高節。煒亦不事進取。著物外軒稿。圃趣偶存。今未見。煒嘗師事黃道周。與陸隴其爲友。頗事問學。築文隱樓。藏書萬卷。詩學太白。晚乃似蘇。

贈梅里周箕谷

畸人棲隱處。廬市亦清風。飲啄於孤鶴。逍遙笑二蟲。夷門公子過。詩史布衣雄。豈學呂高士。寒依米桶

中。姪武曾云。周子隱于米市。故以呂叢之相況。隴西詩萃

懷陸稼書

陸君庭對策。譽謬動公卿。歸掩草廬臥。家徒四壁清。不貪爲寶玉。絕學任干城。裘馬輕肥客。誰知百世

名。隴西
詩萃

李光堯隴西詩萃

李光堯。字集來。號寶菴。煒子。太學生。游食四方。客京師最久。嘗賦白杜鵑花詩有名。疑應皇太子教而作也。

寄贈如臯冒集民先生

金陵帝王都。名流常攬轡。沉復遶嘉運。拔茅思茹彙。吾祖爽朗姿。實抱濟時具。絕技傳支離。掉闔陰符祕。少壯誤儒冠。文場屢顛躓。觀光來陪京。弟視忠節嗣。臭味敢差池。肝膽託深契。是時丁未造。江湖洩靈氣。蘊釀三百年。怒茁挺英毅。煌煌張太倉。斯文起凋弊。雲間開騷壇。屈指多俊乂。樓山真卓犖。顧子名儒裔。陽羨鵝籠生。令子名父繼。魚仲北溟魚。龍侯龍文驥。餘子多瑋瑋。班荆訂交誼。時有冒公子。突兀自標置。方當棄繻年。早逐名賢隊。文章馬卿並。風貌王何視。步履樂營門。嬋娟初及髻。調笑酒壚傍。金盤鯉魚饋。一曲白附鳩。絲繩玉壺醉。行纏新月皎。賣眼橫波媚。兩槩催送來。雲和聲噦噦。聽馬王連錢。障泥文錦鞵。緩轡過長干。蹀躞雞鳴埭。三山若畫圖。鍾阜青于黛。采石怒濤飛。大江作襟帶。感慨顧金川。肅穆園陵拜。景物助吟思。錦囊佳句麗。擲地金石聲。落紙龍蛇字。具此不羈才。邁往空一世。那知深折節。虛己能下士。開館桃葉傍。張宴秦淮滋。開門迎上客。碣官頻擁轡。湖海稱元龍。五陵識釋季。賢

達欽其風。千里驅車幸。最好惟吳生。深交得李魏。朝夕頻過從。眈眈相砥礪。天津聞鶉啼。有識早長喙。孽兆徵黃羊。尾箕掃妖彗。蛾賊陷長安。花門留內地。陽九厄運逢。民生方鼎沸。維揚花月場。旁午走探騎。石城龍虎蟠。嚴烽響笳吹。西北望神州。幾灑新亭淚。五馬渡江來。化龍等兒戲。朝廷新氣象。觀瞻四方係。頻汗等牧羊。刮席類更始。迎鑿翼戴功。悉歸狐鼠輩。馬阮號元勳。作事多狂悖。平津閣不開。鴻都官榜賣。崔烈任司徒。曹嵩進太尉。諸鬼弄東昏。十客阿秦檜。邊書擲御牀。大獄與北寺。當年因切直。早觸佞夫忌。此日快睚眦。甘心肆屠割。北海天下稱。文致憑路粹。幸脫虎口危。豈曰非天意。砥柱有史公。蒼生安石賴。羣奸忌剛正。推轂居局外。公亦不辭艱。揚舡抵江介。紅旆碧油幢。宰相兼元帥。荆襄遙控御。四鎮聽節制。特起籌邊樓。翹材廣延致。吾祖志澄清。痛哭思馳義。三吳爭走集。獵獵捎雲幟。先子聯絡之。十萬組練銳。士行方主盟。聘檄已三至。時傳吾密契。已命後車載。常恐先著鞭。祖生不吾待。杖策來軍門。便定恢復計。小儒咸愕眙。知己深歎異。云與陸向中。安集兩河易。義旅壯干城。劇賊慣馳突。撫此善用之。尅期孟津會。傾側須英才。盤錯別利器。切勿憚艱難。吾自知勞勩。北道有主人。旗鼓臨幽薊。憑仗高皇靈。尊攘庶可冀。天心未厭亂。蠡賊撓大義。拂袖還歸來。國事俄糜潰。空抗戰士盡。忠魂不知處。設主荒亭隅。楚歌擊石祭。吾謀適不用。感遇恆歔歔。翻悔物色時。不逐雲卿避。好友實先幾。冥鴻寥廓逝。知交半國殤。吾留復誰爲。埋名二十年。實志空蟬蛻。吾父克承先。磊落祖相類。高風慕栗里。築居遠闌闌。五行一覽下。江左稱腹笥。詞源倒三峽。滾滾無留滯。阮籍詠懷多。文山正氣厲。哀歌時激揚。唾

壺幾同碎。甫及少陵年。玉棺天上墜。乳草余賤子。連枝實惟二。聊存負郭田。粗知菜根味。遺緒止讀書。傳家惟孝悌。經學探淵源。史傳通大義。菰蘆抱膝吟。日出柴門閉。雖慙康濟略。家聲不敢替。四十尙無聞。宣尼斯不畏。敢冀大父行。忘年相接誨。千里遠見存。古道猶不廢。問訊近起居。鬢鏤正強濟。鷹揚餘二齒。猶然鈞礪涓。熊影一應兆。尙父南郊配。況乃心正長。英風猶暨暨。微情託魚素。述舊長謠肆。何時策瘦驢。撰履高賢侍。隴西詩萃

李應機隴西詩萃

李應機。字環瀛。號密齋。別號晨霞道人。嘉善人。自以父祖高逸有志。繼之不事進取。師事陸隴其。著求志錄以紀近時逸士。又有松筠篇以志列女。哀其家上自高祖下至曾玄二十人之詩。爲隴西詩萃。錄已詩四百七十餘首。獨多。其集敦良草堂稿。圃隱詩存。雜著。今俱未見。唯見詩萃。是康熙四十七年戊子定稿。應機其年正六十。恐亦無刻本。

弔道安師

孤雲任東西。千峯信來往。晤師春日長。相對秋月朗。揮塵天雨花。吟詩發山響。忽談天寶事。激昂慨以慷。名字附清流。意氣互標榜。爾邑當塗公。指魏吉士子一先生數子共勵獎。期交歲寒交。勿言友道廣。柱石當支撐。餘子徒飢餓。經濟頗自詡。時平謂反掌。一旦神州沉。心驚捕鉤黨。死生各契闊。潛身避魍魎。欲歸已

無家。失意遂惘惘。棄擲儒衣冠。宗師愜玄賞。何意老明經。變現昆盧像。指畫資傳衣。呼喝藉藤杖。荏苒四十年。南北坐方丈。吁嗟宿昔心。原非謝塵鞅。我因挹師言。法座倍瞻仰。賢豪丁厄運。入山策差上。滄桑彈指間。何必更勞攘。相依傾玄辨。導我菩提長。醍醐灌頂門。明珠懸帝網。我本澹蕩人。時入涅槃想。正期方外交。高軒共軒爽。履跡判江雲。萍蹤逐芒砀。倏聞遷化信。淚墮神悵快。爲述平生言。心期庶無枉。隴西詩萃

警齋明季會同先大父應維揚史忠清公聘今已七十餘年矣以徵詩來過我里感而

賦此

乾坤值屯否。世運遘艱阻。間氣鍾英豪。乘時思一吐。得志魚猶龍。失意虎變鼠。烈皇鼎湖昇。九域回臆舉。江南小朝廷。偷安燕雀處。四鎮侈開藩。驕蹇難控制。都護來揚州。誓師氣始厲。以禮羅賢才。不次用人際。我祖抱經綸。端居好修嫺。德遠識雲卿。物色苦招致。一木不支傾。脫身守沮洳。拂衣慕謝龜。念母同徐庶。殷君方束髮。時亦從師至。贊畫參樞機。入幕寄心膂。天乎數不減。留都覆亡繼。師死國士知。逐跡從此始。飄零歷楚越。悲歌感秋雨。石鼎詫彌明。西臺哭臯羽。今年踰七十。徒步甘踽踽。歲暮過談詩。探源識根柢。示我無題篇。新樣翻機杼。豈惟饒風格。兼復通禪理。酒酣述往事。泣下露泥泥。昔作鷓鴣翔。今爲斥鷃翮。書騰鑽紙蠅。詰屈潛書蠹。老大餘風騷。自語粗識路。余開涕淚零。感慟當時侶。綿邈五十年。猶幸接席語。修門杳難呼。靈璫憑誰訴。茫茫如歷劫。惻愴不堪數。已矣勿復道。且進杯中醕。隴西詩萃

感事

救時本不爲身謀。道合休時即便休。老驥未忘千里志。杜鵑空負一生愁。專憑正士綱繆策。少緩窮民旦夕憂。料得天心應往復。雲開快靚廣寒秋。

隴西詩萃

李復夔隴西詩萃

李復夔。字友龍。嘉善人。諸生。

靈雨嘆

田夫農事紛紛紛。翹足仰看天上雲。森森雨足江頭出。牴牾婦子笑語殷。竭來日日陰雲黑。赤縣飄成煙靄國。烈風猛雨欺千門。愁陰慘澹黃昏色。新溝漲水曲如溪。舊圃承流沒故堤。樹頭芳盛偏無實。路上槎枒驚有蕘。茅茨麥爛蓋漸薄。夜夜愁霖當面落。檢點衣裳苦濕灰。窮棲蓬蘚如束縛。吁嗟陰盛勝于陽。農夫日夜重徬徨。扶攜共向東溟禱。杲杲庶幾播頌禱。誰知三吳臨溟瀆。海蜃水怪皆狠毒。千尋霧氣腥香溟。百尺暴雨坼崖谷。如瀉月窟注階庭。如傾天河撲沚汀。雷聲殷殷聞天上。風師雨伯行玲瓏。不使烏采照若木。不使蟾光鑑白屋。九旬廚竈無青煙。三月刀機增薜綠。農人惆悵立門閭。折骸易子換斗儲。相許不計兩相直。野田白骨封蟲蛆。漣漣哭泣皆蒙袂。叩天呼天終不惠。正是生者死不如。那堪簿領計井稅。

隴西詩萃

畫舫行

畫舫巍峩出澱湖。不點耕夫點驛夫。少壯蚤皆離故國。旄倪亦盡走經塗。歸來有一老農父。眼中看盡白額虎。纓憶畫船便淚流。低聲細訴途行苦。我本六鄉老頑愚。春耕秋穫足王租。蕭然無事簪前醉。耳酣擊節歌黃虞。官差絡繹來朝暮。云是府帖急公務。長官讀之心忡忡。下令忙把里民付。里民徘徊未與趨。鞭笞不令留須臾。露肘捉頭先後走。丁男十室九空虛。按籍當時名在末。未行先把姓名達。官差迫我快趨程。那管他鄉死與活。妻兒訣別出門闕。官司查點到兩衢。插旗編號馬頭宿。屈指日月堪嗟吁。突突黃帽擁樓櫓。鳴鈺打鼓鬧河澗。牛背農夫點行頻。我行掉頭列步伍。遙望船中握漢符。軟裘緩袖紅氍毹。拖金橫玉兩傍立。桐酒駝羹列百廚。別有秦箏織手撥。輕靴窄袖舞渾脫。如花豔色簇花叢。巧笑射棚手偏辣。官艙相對飲屠蘇。只話驛夫何鈍駑。衝尉赤棒當頭下。血裏衣衫不敢呼。行行只見尸橫路。拾骸少婦幾錯誤。欲言不言長自啼。伯勞聲代勞人訴。江南一官清且癯。艤舟岸上詢吾徒。行人話到傷心事。側身回去但歎歎。老農今日返邨塢。辛酸歷盡命如縷。團圓子弟話行程。却勝路骨籍無主。只是江南山水天下殊。年年歲歲足歡娛。安得閒我田中隱。綠蓑青笠老桑榆。隴西詩萃

周 質 采山堂詩八卷

周質。初名筠。字青士。別字質谷。嘉興人。入清後棄諸生。隱于米市。且買且讀。與同里王翊范路繆泳朱

彝尊朱一是相倡和。四方名士則獨重屈大均。集中答彭仲謀詩。評泊悉當。可以知其取友之義。後生計益窘。往來嘉善桐鄉間。嘗以詩法授人。晚至京師爲家塾童子師二年。不赴徐乾學之招。康熙二十六年南歸。卒于宿遷。年六十五。事具清史列傳文苑傳。張遠無悶堂集。有周青士詩序云。篋沒十餘年。詩稿數十卷。藏于家。謀于其友之素好者。鏤板以行之。謂篋詩不規模一家言。出入唐宋間。置之于宋遺民謝臯羽林景曦中。殊無多讓。然以衣食故。不能如臯羽景曦之介于石。爲可憫。王相得采山堂集八卷于梅會詩人集中。爲刊行之。篋詩格老成。實過朱彝尊。彝尊但華好耳。讀篋詩。字字沈著。淒人心脾。求之同時。異曲同工者。唯一吳嘉紀。足以匹敵之。梅會詩人集。雍正中李維鈞所刻。謂篋詩佚存尙千餘首。古體爲竹垞所定。今體則由張博山陸聚綏續閱。又合桐鄉汪氏視昔編所刻一卷。共次爲八卷。然則張遠所云板行者。殆無其事也。

寄彭仲謀兼柬令弟羨門

文人更相輕。此事古已然。況今衰薄日趨下。誰從屠釣推貞堅。鹽官獨有彭夫子。汲引幽遐世無比。郭泰人倫許劭評。坐合末俗敦懿軌。胡山天陽羨一書生。賣藥來棲海上城。新詩滿篋不堪煮。瘦妻病母愁空鑪。君能裹飯相尋數。不使顛連赴溝壑。屬和羊何世並稱。謝家羣從多名作。吾宗福柱白纔弱齡。亦有林生枚初發硯。昨者攜詩走門下。辱君獎借增光燦。歸來佳詠相傳示。賤子姓名蒙錄記。無鹽刻畫難作容。小巫神氣徒深愧。海內名高汪苑與王。士祿吳東業合肥興不可當。清真共抱王方伯。庭雄健皆推曹

侍郎。清吁嗟我黨多貧賤。朱李年符才華世方見。漸川隱者俞汝釋東關。通老成得自千鍾鍊。杜

陵增聲譽早著聞。番禺屈子尤不羣。陸嘉淑英李因願武及三魏。直上皆欲干青雲。自餘才俊分

超軼。推挽後先安可失。讀書曾不慕浮榮。僕與南村同矩律。令弟孫從知慧業深。許身直欲比南

金。辭官虞寄多幽興。卜宅陶潛有素心。清文秀句人爭誦。博取諸家能錯綜。連舍相呼應不遲。青青池草

西堂共。企望風流今幾春。何當攜手作情親。他時儻遂觀濤約。並挹瓊枝玉樹新。宋山堂

贈吳商志

丈夫身世何草草。風絮波萍任顛倒。知君遠作粵西遊。相逢忽在長安道。未論舊事心已傷。黯然那得開

懷抱。鴛鴦湖畔蔭華樓。衡鑑高懸盛文藻。李膺任昉兩龍門。侵晨鶴蓋成陰早。風塵溷洞人事移。兵戈滿

地家焉保。轉客真同管幼安。經營莫覓菟裘老。羨君至孝動鬼神。繼志心同秋日杲。縱教甯戚終飯牛。白

水何能歌浩浩。最憐故業盡荒蕪。賜書千卷浮雲掃。男兒弧矢亦自期。躡岱浮湘恣遐討。長沙憑弔楚三

闕。君受孝章心自擣。此道今人已寂寥。吾徒不分存枯槁。脂秣將行又惜離。斯行握手春風好。那及盧敖

汗漫遊。金芝擬拾蓬山島。宋山堂

有錢百餘方將糴米書買持陸敬輿集至傾囊售之傍午始得成炊慨然有作示叟兒誦

几淨展開卷。餅空晚作炊。得成兒子學。不礙老犬饑。揖讓殊臣僕。提攜藉友師。無嫌家世賤。叔度自牛

醫。宋山堂

詩五

感事

魍魅江南地。戈鋌薊北天。亡秦還逐鹿。徙蜀自啼鶻。曉日明軍騎。秋風滯客船。回看故陵樹。擁護尙蒼

然。采山堂詩六

輸粟

百萬控弦兒。京都大出師。川原搖組練。城郭繞旌旗。域外勞供億。行間候指麾。東南民力盡。何以任驅

馳。采山堂詩六

馮愷愈榕堂詩鈔一卷

馮愷愈。字道濟。慈谿人。元颯子。入清以高潔終。撰榕堂詩鈔一卷。有康熙五十五年王廷燦序。謂愷愈之沒。已四十年。廷燦父□□與之摯交。集其詩三十首。廷燦復搜得十八首。詞一首。謂童時讀其三友傳。汪文烈公祠堂記。頓挫嗚咽。皆散佚不傳。後來全祖望輯續甬上耆舊詩。于愷愈未著一字。僅得馮愷章字士潔者七律四首。并此集亦未之見。其難得可貴如斯。廷燦喜刻遺老之集。此外亦不數數見。知傳世非易。愷愈詩格調老蒼。頗及滄桑間事。得此一瓣。亦可知味耳。

榕堂漫識

紅牌祖訓甚分明。進講詞臣合講經。白日雷霆臣萬死。尙聞天語喚先生。黃公道周平臺召對事

片語誰傳人不死。一時萬口沸都城。嚴霜獄底黃膺事。捧血淋漓寫孝經。

先太保舉史公可法字公邦華以自代。竟不果用。蘇威指張縉彥也。

史李堂堂事後思。鈞樞一席亦難支。先皇若聽先臣薦。應少蘇威舞蹈時。

老友劉君端。當家正則也。

寧溪却守小灰溪。絕壁攀藤夜拔旗。負却黃冠多少恨。不知南八是男兒。

黃晦木自號鶴鳴。

長安母骨已成塵。忍問妻兒絕域身。老友登樓纔勸死。當時一諾葉夫人。

頤廣孫公歿于海外。葬蘆花洲上。先是丁丑春。公與計偕。夢身臥狀元坊下。及窆

下宮不復保遺嬰。身逐雙姬貫索行。鬼手纖毫曾奪命。西園留聽鷓鴣聲。

蘆花殘月併蕭蕭。曾囑金風玉體調。華表夢中先得路。歸魂只溯海門潮。

骨。乃國初張狀元墓道也。

晦生慷慨稱家兒。姚二書淫號白癡。廿五交情尤澹蕩。一時凋謝絕心期。

榕堂詩鈔

楊賓 賓晞髮堂詩集二卷文集四卷楊大瓢雜文殘稿一卷

楊賓。字可師。號耕夫。晚號大瓢山人。山陰人。父春華。明諸生。性任俠。喜招致賓客。能為人緩急。順治十八年。有魏耕錢允纘通海之獄。允纘屬少子于春華。為邏者所知。被嚴刑。不肯言春華所在。春華乃自投獄中。坐長流寧古塔。賓與弟寶方幼。依叔父以活。稍長。習為刑名錢穀之學。糊口于四方。任俠好客。一如其父。漸致聲名。請代父戍不許。乃與弟先後出塞省之。習其地理沿革山川道里風土人情。著柳邊紀略五卷。為世所稱。父沒。請歸骨不許。久之竟得破例。扶喪奉母以歸。卒于康熙五十九年。年七十一。

有啼髮堂詩集二卷。文集四卷。楊大瓢雜文殘稿一卷。自謂非詩人而好吟咏。初有詩三卷。唐甄費密序刻之。爲人所薄。而欲以文求勝。苦無多暇。乃專意作字。然其詩文不甚修飾。而善能敘述。亡友詩四十七首。人各一小序。頗有軼事。文多記滄桑間事。徐昭法吳稽田兩先生合傳。大錯和尚傳。魏雪竇傳。祁奕喜李兼汝合傳。曾青藜姜奉世合傳。皆有裨記載。惜其集未行。後來翁廣平楊鳳苞喜撫舊事。竟未及見之。楊霈始得其詩稿二十四冊。又失去前五冊。錄詩百餘首編爲二卷。文稿二冊凡文百餘篇。略次第之爲四卷。即此本。云欲附梓。亦未知果刻行否也。楊大瓢雜文殘稿一卷。道光末爲人所得。凡文三十八首。集中所無者十六首。汪異三傳。蔣度臣姚玉階合傳。唐鑄萬傳。戴南枝傳。劉繼莊傳。萬季野傳。似皆不欲示人。然與示人者合爲一編何也。蔣傳言蔣進姚士晉士在成刻頸交。居京師響鼓廟結客。爭爲任俠之事。劉傳言獻廷死。會葬者千人。每春秋祭。弟子必會而哭。有平生不相識。拜其墓爲弟子者。蓋皆密有所圖。而實與之深結。至于終無可爲。乃布衣以終老云。實別撰大瓢偶筆。鐵函齋書跋。并有刻本。

十八先生墓

十八先生者。永曆朝從官。吳貞毓。張鏞。周允吉。林鐘。徐極。蔣乾昌。李元開。李順。朱謙。鄭允元。趙廣禹。蔡賴。易士佳。胡士瑞。朱東日。任斗鏞。及內侍張福祿。全爲國等也。時孫可望敗。謀與李定國共圖之。謀洩皆遇害。葬黃州安順府之安龍所。

董曹李郭總難馴。漫說中興氣象新。十八先生同日死。更將密詔與何人。

啼髮堂詩集一

題陶秋水傳後

秋水名泓。湖廣巴陵諸生。永曆朝。入督師閣部何騰蛟幕。湘潭兵敗。督師被執死。泓至全州。隨

駕入滇黔。授兵部主事。參督王李定國軍。磨盤山敗後。避迹緬甸。未幾卒。其子竄扶柩葬江夏。出家傳相示。因題其後。

信國死柴市。宗社已不屋。晞髮無所歸。披髮行山谷。西臺有遺亭。白雲拱墓木。至今四百載。時聞舊鬼

哭。嗚呼陶夫子。遙遙能私淑。荆棘生銅駝。有宋同局縮。仗策就中湘。何督師磨盤山敗後江廣後。封爲中湘王。磨盾草尺牘。湘潭

兵不支。江廣徒恢復。麻鞋見至尊。夜行晝常伏。扈從入滇黔。莽操在胸腹。指孫可選遂監晉國軍。指李定國心與

力俱戮。一蹶磨盤山。□□仍反覆。螳臂車莫當。避地南牙鷺。南牙非吾土。猶是□□□。采薇終其身。不

失爲孤竹。平生慕臯羽。夫子今何處。寄語一心人。千秋共尸祝。時樂堂詩集一

林古度 林茂之詩選二卷

林古度。字茂之。號那子。福清人。流寓金陵。古度父子皆有奇節。父舉人章崇禎中上書言事下獄。有聲海內。古度會序刻鐵函心史。順治中又刻布洞庭女子詩十章。晚歲卜居金陵珍珠橋南陋巷中。貧甚。暑無蚊轉。冬夜臥敗絮中。猶以年輩爲東南名士魁頌。兒時一萬曆錢。佩之終身。吳嘉紀爲賦一錢行。康熙五年卒。年八十七。事見清史列傳文苑傳。古度少以搗鼓行受知屠隆。與曹學佺吳非熊唱和。後遇鍾惺譚元春。詩格一變。遺詩數千篇。王士禛盡去天啓甲子以後之作。謂刊落楚風。歸于正始。于是古度故君故國之思。憑弔興亡之作。胥不傳矣。士禛此選蓋懼以文字貽禍。託言標格。以欺當世之人耳。

觀大西洋自鳴鐘刻漏

物象自虛空。誰參造化功。傳來西國漏。鑄出首山銅。法地機常轉。規天巧不窮。組懸看繞獸。幹起訝旋蟲。時刻音聲變。華夷甲子同。神靈應莫測。人力幾能通。豈待霜初降。還知日始終。林茂之詩選下

李世熊寒支初集十卷二集六卷

李世熊。字元仲。號但月。號槐菴。福建寧化人。諸生。唐王時薦授中書不就。後入山祝髮。法名寒知。拒新朝及耿精忠之招。以遺老終。卒于康熙二十五年。年八十五。與人書自謂偷生。不能比于諸葛苟全。于海上之師。似未措意。故有擬與海上書。力數其爲患鄉里。又作張玄著傳。誤爲漳州諸生。張其姓。易名明振。號玄著。世熊熟于史事。下筆極精核。嘗著宋通鑑至哲宗紀。因亂失其稿。同時人物。更應稔知。乃不識張名振張煌言本末。安知非故爲迷瞶以愚清吏乎。與彭躬菴書云。賈彪爲天下解網。不憚西行。先生以一二人故。竟用獅子搏兔手。士望入閩訪世熊。在康熙元年。所謂解網不悉何指。又云。雖鼠伏蝟縮。必疑爲蛟變螭騰。彼此貳虞。便成矛盾。當爲弟措置安穩。數語足見清人防範之密。世熊關係之重。而其事之嚴切可知。又丙辰康熙十五年與某書云。廟算反是。意似據閩爲基。闢海爲戶。與昔人爭關中長安爲萬世基者。迹同而指異。此廟算二字。決非指清朝。況此數語之前。挖板兩行。必爲違礙語句。若丙辰爲丙戌之誤。則首段自汀鱗一開。傾福以絆漳。孤吳以紆敵。一子錯著。全局盡翻。又作何解。疑世熊與精金

諸人。實有所圖。故翁士望爲作生傳云。八十老翁。需此瞑目。未了之志。俟諸來生。其言沉痛。今生傳未果作。或作而不傳。致行事無稽。所能稽者。寒支歲紀。避忌之餘。寥寥數語。略具行藏而已。著有寒支集初集。康熙三十四年乙亥釋本嶠爲刻之。有彭士望序。後二十七年其子權。屬王之績增省之爲十卷。與二集六卷同刻。所謂檀河精舍本。已有缺字缺行。道光七年。陳塏以活字本印行初集。增文數篇。翌年續印二集。得一別本。亂其次第。編爲四卷。缺狗馬史記序。及歲紀。其他字句有干礙者。復刪去之。同治十一年刻本。初集覆檀河本。二集覆活字本。最爲惡劣。自謂爲文不拘八家。兼本諸子。今讀其文。奇崛憤抑。善于說理。其傳志之文。表章明季義士。雖不如黃宗羲。而軼事舊聞。多補史缺。詩以險拔自矜。不擇聲調。然言之深者。足以動人肺腑。正所謂欲哭不可。欲泣則近婦人。不哭泣而使人難堪者。別著狗馬史記。觀其序大要以人物雜糅。紀化紛錯。狗馬之國半天下。欲以十五國風。畫疆正界。此爭之未必勝者也。辭旨過激。似未成書。

避亂歸山賴惟中攬袂東山橋黯然揮手答詒二詩

河山獨不異。風水漸蕭寒。文墜長封筆。心雄老據鞍。神鱗離瀚海。王旅失飛翰。揮手看分涕。爲誰廢寢食。

遷播何年事。輾迴萬里橋。醉天宜易定。日市豈恆囂。長甌南無限。巖關力可翹。傷心三百載。國士太寥寥。

寥。寒支初集一

丙戌九月卽事

秋風械剪華鬢。故老吞聲盡罷餐。三百年來青麥壠。八千里外黑彈丸。旗翻樵月杉關暗。馬度鐔雲滄
峽寒。滿目鶴猿看墨墨。霜楓染淚遍流丹。寒支初集一

聞說馬上俘婦

人似明珠馬似龍。裹鞭遙指杏花中。市邊帘舞香迴酒。騎後胡催驟入風。颯罩半枝金杏粉。垂裾一派石
榴紅。漢家畫史今如在。再榻明妃控玉驄。寒支二集一

余思復中邨逸藁二卷

余思復。字不遠。號中邨老人。將樂人。本名有成。明亡。棄諸生。始更今名。寓復明之意。福都覆後伏匿
山谷二十四年。著山居集。始游吳歷十七年而歸。著吳游草。己巳康熙二十八年入黃山三年歸。卒于癸酉。康熙三十一年
年八十。事具蕭正模所撰中邨先生傳。撰中村逸稿二卷。正模所輯。為文四十五篇。稱其丁亥戊子順治四至五年
間。所為書牘檄文。多駭人觀聽不可留。此特以逸而存。故曰逸稿。然思復與李世熊書。自稱其文三百五
十篇。出游後所作又半之。非二十金不能刻。則散失云者。特避忌不肯示人。非真佚也。思復為文不襲八
家面目。而矩矱不失。頗合于古之作者。論詩謂吳下諸郎。字雕句琢。唯摹三唐。然百人同一人。百篇同
一篇。此集偶附其詩三首。皆言之有物。知其詩不立門戶。唯以合作為斷。蓋遜世避迹。不欲僅以詩文自

見。其文醇而肆。實遠過寒支。而聲名不若者。不事聲氣故也。爾植余君墓志銘。言當時之士。才不過中人。續息幸存。猶闕然胡服以俛仰于先師孔氏之庭。游池山記。舊名齊山。在池州。言故相國漳浦黃公數游此山樂之。易其名曰池。實獲我心。其辭若有深痛焉。示人者如此。閱之篋中者。憤激必數倍于此矣。劉母周孀人壽序。述劉孟常以無爲州案破家。清初江南十大案。無爲其一也。紀載無徵。賴此得其梗概。思復棄家出游。自謂嫉俗。蓋亦託辭。觀其結交李世熊錢秉鐙魏禧。是皆不忘故明。隱欲樹立者也。所謂丁戊書檄。必與海上有連。太倉通海。居之三年。必非無故。與王焯同祭魏禧文云。贈我肝膈。副以龍骨。再拜而授。永矢弗凋。其言所圖。卽此數語。可以盡知。王揆仕宦方隆。未必能知思復底蘊。而能禮重其人。爲刻吳游草。賚之還里。卽此集刻于婁東。亦揆之力。不遠客婁東。與南田同時。南田集中屢見不遠姓字。許九日秋水集。贈余不遠云。揮豪縱酒一時傾。牢落天涯多盛名。客路每憐烽火隔。文人偏爲亂離生。家山變後歸難定。羈旅兵間累喜輕。袖刺三年全漫滅。縱橫猶笑隴頭耕。寫盡不遠豪邁之氣。又余不遠惲正叔全集錢右文園池。分得成字。有句云。客擬還家對月看。自注。不遠將歸延平。正叔將返晉陵。蓋藻儒服滿補官。余惲始同去也。唐實君東江詩鈔贈將樂余不遠云。孤雲出岫意忘還。一老幡然忽扣關。千里重游仍敝褐。十年相見轉衰顏。蹒跚苦涉尤灣水。清瘦擬逢飯顛山。榕樹蕭森圍破屋。商量河迹問刀環。一筇孤寄梵林秋。應爲無家愛浪游。髻雪消磨存鐵研。手風搖顛失銀鉤。窮思妻子皆奇福。老借文章伴旅愁。早趁歸潮乘小艇。莫教土偶笑飄流。此詩當作于不遠再度出游之時。疑不

遠游崑山。爲應王不菴之招。不菴歛人名良。會同不遠句留婁東。亦擅詩文。屈大均翁山文外有復王不菴書。

送林天友別駕還里

平生多送別。此別乃潸然。汝去三千里。吾淹十二年。白髮客中盡。青山行處偏。故人如問我。寥落好爲傳。

官久初還里。悲歡趣自兼。且先營墓宅。不用計魚鹽。舊業空朱邸。

林宅是其外家。葉相國邸第。近爲園去。

情人有白鬢。佳兒防

失學。應念歲將淹。

中郵遠臺下

余賓碩石農詠物詩四卷金陵覽古詩

余賓碩。字鴻客。懷子。莆田人。撰石農詠物詩四卷。周亮工賴古堂集金陵覽古詩序。余子鴻客爲余友廣協先生之子。世其家學。讀書嗜古。閉戶城南之竹圃。作金陵覽古六十首。亮工卒于康熙十二年壬子。是賓碩在康熙初元。已知名矣。孔尙任湖海集已七。過余鴻客宅云。寂莫江干宅。尋秋下馬看。墨圖張粉壁。綠竹護紅闌。使客詩爲贊。遺民笠是冠。弦中流水意。兩語不須煩。李果詠歸亭詩鈔。題余鴻客金陵覽古詩一絕云。少日曾經戎馬間。外黃偶贊壯初還。春來花柳尋常見。愁絕江南庾子山。吳銘道金陵傷余鴻客詩。作于康熙六十一年壬寅。或卽卒于是年。其生平略可知者如此。

金陵

王氣銷沈烟水中。六朝人物草連空。杏花門巷千家雨。桃葉樓臺一笛風。龍虎勢盤山似洛。帝王宅定岳為嵩。孝陵弓劍留遺愛。肯為偏安感故宮。石農詠物詩一

劉坊天潮閣集十二卷

劉坊。字鼇石。上杭人。撰天潮閣集十二卷。自言祖備兵金齒。死王事。其父實為永曆從亡死節之臣。坊所交游。多當世所謂遺老。詩作于滇中者。足徵永明及吳三桂遺事。文則萬季野行狀。最有關繫。坊祖廷標。字霞起。號存玉。崇禎十三年以副貢廷試。官永嘉丞。薦升永昌通判。十七年署府事。丁亥順治四年九月

三日死難。卹贈長子之謙保山學正。轉趙州學正。升戶部主事。己亥順治十六年三月清師破雲南。執之謙索賂不得。復逼令薙髮。之謙曰。死即死耳。禿頭鬼可見吾父乎。遂遭炮烙死。父子死節詳李世熊寒支集八明

雲南永昌通判劉公墓表。世熊此文不言其名及籍貫。明人為文。往往如此。予參考他書始得之。寒支二集有贈劉季英詩云。天末幽忠四十年。劉君霞起別予應詔。在崇禎戊寅。今四十餘年。每傳遺跡輒潸然。霞起長君无咎。先後就義于滇。間闕入夢連三

揖。辛丑六月。予夢霞起過我。歎容可掬。向予連揖。都無一語。即次君无怠來寄墓誌之日也。淒切書銘累百言。萬里歸來驚少息。无咎在滇生季英最少。今歸上杭過予。立談傾倒盡珠璣。季英高談。每驚獨坐。世家風節雲霄迴。偃蹇西華何足憐。季英即坊也。

雲南曲

自己亥平西入滇以來。迄今癸丑一十五年矣。昆明三百里內。為芻牧之場。其外為奉養之區者。又三百餘所。其道路之所費。歲時收獵徵求。又不與焉。滿其墳墓。虛其室家。役其妻孥。薦紳士庶。及于農工商賈。惴惴焉唯旦夕之

不保。嗚呼。痛深矣。而鬼神茫昧。復愈其烈。此理事之不可知者。僕本恨人。何堪樂歎。若使事果有成。吾當取二十一史盡焚之。毋為發舜眉孔所買也。

雲南好草場。萬里連山岡。青草油油光。東也有草場。西也有草場。南也有草場。北也有草場。

雲南好畋獵。虎豹肥欲死。雉兔無蹤跡。兵圍民屋東。兵圍民屋西。兵圍民屋南。兵圍民屋北。吳三桂出獵。必先

令人擲獵場。務求三十里內。不盡山林。且有民居叢雜。天潮聞者。乃往獵。獵未竟。必移其兵圍民居。曰棄逸獸云。集二

哀龍江

戊戌冬。清師距瀋次河。謬道路者曰可望師至矣。我兵風聞皆愕而失色。或痛者曰。國主至矣。相率驚竄。先是

此也。明日。戰不利。連提兵避之。諸將校稍稍逸去。竟無敢言較敵者。清師遂長驅至永昌。定國殺三伏于磨盤山。此山高百里。修林蔽天。石磴纒絕。下界二江。殊險也。盧賁生者。定國中書。潛出迎敵。告其謀。然前軍先入者。已殲于初敵矣。清師大震。乃分兵翼山脅。跡李兵而戰。定國知謀洩。隱所部盡命。軍士莫不裂趾。呼聲振天地。戰至日午。天怒反風。烟埃蔽天。衆不自辨。遂大北。是戰也。李失五將軍。兵萬餘。清師偏裨無算。兵亦萬餘人。遂不復追李。回兵永昌。屠虜四旬。償其憤而已。此己亥正月事也。辛丑春。先掃人攜兒避亂騰陽。過此修繕脯酬。江邊泣曰。三百年盡此一戰。惜天。予時在乳糲。誰視無哭。則未知其悲之為何也。甲寅秋。予再遇此。距當時已十六年矣。山谷無光。草林憔悴。江流噴薄。暮猿嗚咽。開國之功臣。亡國之忠臣。不瞬息間。皆為蟻垤苔封。野火荒燐矣。而洲人父老。猶噴噴為予道故不已也。予悲夫邊陲。奪畜之鄉。今日是非已消鑄莫定矣。百千年後。復誰知諸公未信之志。未竟之功。而白之而哀之而弔之也哉。磨盤山。土名高梁。

危峯拔空三萬疊。洪波怒濤魚龍穴。古木蕭蕭日晝昏。白骨無聲天雨雪。憶昔玄黃未判時。天狗噉日蝕魅啼。九重倉皇反袂走。百官揖讓墜降旗。中原萬里無寸土。禮樂文章奉新主。可憐高皇百戰勞。書生談笑輕伊呂。將軍本自綠林客。尙有肝腸貫金石。大廈雖非一木支。揮戈直挽虞淵日。水漬由來不可迴。天人心事兩相猜。知李都尉皆迎款。入幕佳賓尙愛才。興亡萬古無全局。一敗誰云定天祿。登壇自是少淮陰。野戰何人追武穆。高梁突兀負江起。羅睺天牢差可擬。馬陵已定伏龐涓。司馬豈期生渭水。沈沈煙霧

鼓聲寒。血洗松林石骨斑。虎豹凋殘驥駃盡。長教狐兔泣空山。哀哉赤社竟枯朽。誰是功魁誰罪首。但將白刃謝生前。寧計丹青在身後。我來正值秋風高。秋霖淫溢奔洪濤。十六年間陵谷變。碧燐落盡長青蒿。平生極有癡情淚。不恨天公恨人事。詩成酌酒奠江神。他年莫誤南征記。天湖閣集三

鄭露 嶠雅二卷

鄭露。本名瑞露。字湛若。南海人。諸生。永曆時。以薦入翰林。清兵下廣州。抱所寶琴赴水死。撰嶠雅二卷。露好奇。嘗撰赤雅三卷託為雲驪娘事。以詭世俗。尤工詩。同時無能及之者。與阮大鍼稔。大鍼于詩話中。謂其諸律以曹劉鮑庾之才。降就沈宋之法。超百粵而孤出。陵三唐而特奏。王士禛以為粵東詩派。皆宗區大相。而開其先路者。鄭露也。論詩絕句云。九疑淚竹娥皇廟。字字離騷屈宋心。能道露心事。舉其人日登越王臺詩。別人詩。過賈太傅宅弔三閭大夫詩。固皆集中精撰。而所嗜者。亦律詩也。不知樂府古詩。多及時事。寄慨無窮。不朽者正在此耳。

留都贈梁非馨

逐客同征雁。翩翩出塞垣。誇胡曾斷臂。哭漢不歸魂。別久見如夢。相看無一言。龍精千尺雪。持照昔人

恩。非馨為袁督師重客。督師以孤忠見法。天下冤之。後十二年。予與非馨同朝。非馨在執政。余在史館。疏白其冤。復爵賜葬。非馨真信友矣。

嶠雅

案留都指羅慶言。永曆初袁崇煥復官賜葬。唯見于此。特後十二年一語。疑有誤。露其時入翰林。亦于此可證。前人未嘗引及何也。

屈大均 翁山詩外十八卷

屈大均。字華夫。原名紹隆。字介子。號翁山。番禺人。據所撰四松軒表云。永明王卽真。赴肇慶行在。上中興六大典書。以大學士王公化澄薦引。將得服官中祕。聞公寢疾過歸。然則大均實永曆遺臣也。後嘗東至會稽。與魏耕祁班孫同預通海之謀。又嘗與李天生同客代州。嘗有規畫。三藩事起。復左右其間。繼室黎氏行略云。甲寅^{康熙十年}春。予從軍于楚。又云予建義始安。爲某大將軍監督漢土官兵進取。已而楚中所遣六將軍之師西至端州。閩中所遣兩將軍之師東至惠陽。伯兄墓表云。予方以廣西按察司副使。監督安遠大將軍軍于桂林。丙辰^{康熙十五年}謝事歸。生平事迹。可得窺知者。僅此而已。生于崇禎三年庚午。沒于康熙三十五年丙子。年六十有七。所撰翁山易外。詩外。文外。翁山文鈔。詩略。廣東新語。廣東文選。四朝成仁錄。皆以乾隆嚴禁之故。流傳極稀。世傳其遭禁由雨花臺衣冠塚誌。其實他文有關蓬髮者。若藏髮冢銘。長髮乞人贊。禿頰。藏髮賦。皆爲當時所萬萬不容者。憤激指斥之語。幾于篇篇有之。未與身後之獄。已爲厚幸。據清代文字獄檔。翁山書遭禁始于雍正八年。所頒大義錄中張照供辭。涉及屈翁山集。其子惠來縣教諭屈明洪。自行投首。照出首減等。與子自隍宗昌遣戍福建。乾隆二年赦歸。翁山耐葬番禺思賢村父宜遇墓下。原擬剝屍梟示。得旨寬免。至乾隆三十九年。于屈昭泗家查出翁山文外。內有雨花臺衣冠冢銘。嚴查未獲。稔滇昭泗初擬斬決。得旨但毀其書。不必治罪。并免翁山剝屍。此其案大略

也。乾隆一朝禁書。以翁山爲最嚴。其惡護髮。殆有勝于誹謗矣。大均有著述之才。不止以詩文重。然詩文獨步一時。未有能及之者。

插茶歌

東官土風多插茶。松羅茶葉兼胡麻。細成香末入鑊煮。色如乳酥含井華。女兒二一月中兔。日持玉杵同蝦蟆。又如羅浮擣藥鳥。玎璫聲出三石窰。拂曙東鄰及西舍。纖手所作喧家家。以淘粳飯益膏滑。不用酒子羹魚蝦。味辛似雜賁隅桂。漿清絕勝朱厓柳。多飲往往愈腹疾。不妨生冷長浮瓜。我來莞中亦嗜此。啣菘欲廢春頭芽。故人餉我日三至。絲繩玉壺提童娃。爲君鑿飲當湮酪。方法歸教雙鬢丫。翁山詩外三

揚州感舊

往日蕪城困。君臣總不知。頻飛丞相疏。不遣靖南師。薊北天崩後。江南穴鬪時。血書三四紙。讀罷淚如絲。翁山詩外六

大都宮詞

楚舞復吳歎。風流作帝圖。阿房頻止鳳。大液復歌鳧。小妓玉條脫。中官金僕姑。不知高力士。猶憶上皇無。

煖閣開春宴。才人賜錦袍。舞低吳蚨蝶。歌倚鄭櫻桃。學士調花曲。闕氏按鳳槽。只愁金漏短。日出未央高。

具帶盤龍錦。垂髻墮馬粧。漢宮丹鳳女。胡地白羊王。夜醉葡萄酒。朝開蹋鞠場。邯鄲諸小婦。雜坐弄笙簧。

佳麗徵南國。中官錦字宣。紫宮雙鳳入。祕殿百花然。卓女方新寡。馮妃是小憐。更聞喬補闕。愁斷綠珠篇。

白馬飾金羈。琵琶再撥時。昔曾調玉樹。今復妬蛾眉。紈扇秋終棄。蘭臺晚易悲。何如若耶女。采葛作黃絲。

朝來逢百騎。蹀躞御河堤。小隊芙蓉簇。嬌歌楊柳齊。錦裝春服豔。貂壓翠鬢低。遊獵知何去。闕氏在苑西。翁山詩外七

哭顧亭林處士

鴈門相送後。秋色滿邊城。白日惟知暮。寒天詎肯明。纔分南北路。便有死生情。皓首悲難得。黃河忽已

清。甲子 翁山詩
外八 河清

舊京感懷

羽翼秋高未奮飛。移家偏向帝王畿。文章總爲先朝作。涕淚私從舊內揮。燕雀湖空芳草長。臙脂井滿落花肥。城邊亦有陰山在。怪得風沙暗翠微。陰山在江寧縣西南

內橋東去是長干。馬上春人擁薄寒。三月風光愁裏度。六朝花柳夢中看。江南哀後無詞賦。塞北歸來有

羽翰。形勢祇餘抔土在。鍾山何必更龍蟠。龜山詩外九

感事

茫茫一島是天留。父子經營作首丘。亮在自能存社稷。橫來那得更王侯。君臣不肯歸魚腹。舟楫從教到石頭。恨絕生降虛百戰。桓文事業委東流。

堂構徒勞四十春。虛無宮闕有金銀。乾坤不沒憑孤嶼。日月長存賴一人。事敗自應同正命。時危那得作遺臣。三千尙可收餘燼。力爲亡諸更破秦。

神華縹緲屢樓中。吐納風濤有漢宮。一代波臣持日月。十年海外盡英雄。書王虛擬春秋事。竊帝難成割據功。五百豈難無死士。將軍不欲令名終。

市井多年作隱淪。不須東海更逃秦。英雄自古元無主。華夏而今豈有人。憔悴空教漁父笑。佯狂合與酒徒新。滄浪清絕無纓濯。散髮風前重愴神。龜山詩外十

案此感于台灣鄭氏之亡也。

釋成鷲咸陟堂詩集十八卷文集二十五卷

釋成鷲。字迹刪。號東樵山人。番禺人。撰咸陟堂詩集十八卷。文集二十五卷。有康熙四十六年李來章序。稱其鶴幹霜髭。豪傑倜儻之流。主大通寺。在省會東十里。濱江幾與世隔。本名方顛愷。字麟趾。父前

明舉人。隱居教授。有學守堂。學者稱學守先生。集中自述丁亥年七十一。順治七年入學爲生員。其年永曆帝自廣州走南寧。四十一從本師石洞披荆。石洞卽來章所謂西來離幻禪師。授法于碩堂。歛山又碩堂之師。故稱爲師祖。集中有鸞劍詩云。嘗蓄古劍承景藏之十年。以待不平。今既平矣。無所用之。不類出世人語。與陶環何絳結生死之交。環字握山。絳字不借。致握山地下書。屢言握山失却出家機會。蓋以出家爲隱語。卽謀恢復再造。環絳皆熱于海上。奉永曆正朔者。故成鷺往澳門主普濟禪院。又嘗渡海至瓊州。蹤迹突兀。實有所圖。北田五子陳恭尹爲首。恭尹居西樵。成鷺自號東樵。若與之抗。恭尹之沒。成鷺爲文祭之。稱造物使之全節。以見先人于地下。若微示不滿者。與屈大均梁佩蘭皆有唱酬。獨無一字及大汕。或深鄙之。其文盡情發洩。不拘守八家準繩。頗有似莊子處。南華問答。極贊逍遙。竟以三教並稱。詩亦快吐胸臆。不作禪語。無雕琢摹仿之習。仍是經生面目。沈德潛譽爲詩僧第一。唯謂不知以何故爲僧。滄桑之際。粵中士人多從彼教游。所謂十家王謝九爲僧是也。惜無有彙而傳之者。

跳大王歌

蠻鄉歌舞自稱善。厥聲可聞不可見。四月五月跳大王。家家刻木作鬼面。千醜萬拙由心生。頭角鬚鬢盡奇變。削成兩耳貫雙環。黑白青紅隨繪綉。長纓分結頂門邊。俛仰周遮任方便。市來絳帛縫赭衣。承以素裳紉新練。長柄牙旗短柄笠。東官草帽岡州扇。麤繪細篋作遊龍。肖首肖尾中連串。事事具足人力齊。次第推牛集歡讌。大王端坐不飲酒。黃童白叟爭酬勸。酒闌酩酊齊唱歌。嘔啞嗚噴無分辨。昇神入城城市

空。大呼疾走看遊龍。馭龍小兒戴鬼面。一步一跌來匆匆。左顧右盼各招手。頭旋尾轉相追從。遊龍舞罷撫歌板。唱歌盡是頭白翁。青葵半掩老面目。隨聲答響羞雷同。須臾磨旗萬舞作。朱干玉戚紛與戎。或擊或刺馮而怒。或揖或讓足而恭。忽焉而起忽而止。一一皆與神心通。舞罷偃旗臥金鼓。借問大王何所取。傾筐擎出斗與升。鬼面成羣更歌舞。道旁觀者不忍見。靦顏汗背交相覩。吁嗟乎。天下盡兒戲。舉世同奔波。車轂交擊人肩摩。俄而禮樂俄干戈。五斗折腰不足道。傾筐積少看成多。大王乃是死諸葛。含羞忍恥如之何。咸陟堂詩集三

題賑荒圖爲馬臥仙賦

憶昔嶺南豐稔日。歲取十千開百室。田家擊鼓更吹豳。稻梁飽殺倉中物。比年水旱成荒蕪。潮田巨浸山田枯。南畝半收愁食力。西成未足填官租。歲之丁丑夏四月。米價高騰市春歇。當途仰屋心血乾。四野蕭條煙火絕。煙火絕兮白日黃。同時十郡咸開倉。流民就食無遠邇。一飽不敢嫌糟糠。香山在昔魚鹽地。回首滄桑見凋弊。海闊天高喚不聞。吞聲欲訴憑誰濟。賴有專城馬臥仙。生平愛義不愛錢。手拊黃河潤枯槁。澤被東南半壁天。眼前菜色不忍見。解衣推食行方便。百里歡聲動地來。十萬青錢一朝遍。白頭老翁黃口孫。孀妻弱子填公門。得錢易米作飢粥。一月頻來不厭煩。當時存活不悉數。公遜碩膚無所取。義聲感激有同官。雷浴雲興作霖雨。管中細柳縣中花。交陰垂蔭萬千家。青箬裹糧歸菑屋。綠荷包飯出官衙。巨室聞風爭效義。里正宿春晨滌器。逢人不敢喚嗟來。布席受餐俱有意。仁人之利溥矣哉。將軍整幟登春

臺。陽律一吹回凍谷。嘉禾駢實出南陔。山中野人成久別。錦江雙鯉來書札。札中寫作賑荒圖。口碑傳頌人中傑。褚公授我三尺麻。毛生躍出丹山霞。千里題詩寄鈴閣。東林逸興阻天涯。嗚呼安得天下盡如臥仙者。大法小廉不相假。鳳凰巢閣鳥棲枝。麒麟在藪牛畊野。野人飽食太平年。策杖重來問風雅。成步堂詩集四

仙城寒食歌四首二錄

亢龍賓天羣龍戰。潛龍躍出飛龍見。白衣蒼狗等浮雲。處處從龍作宮殿。東南半壁燕處堂。正統未亡垂一綫。百日朝廷沸似湯。十郡山河去如電。高帝子孫隆準公。身狗社稷無牽戀。粵秀峯頭望帝魂。直與煤山相後先。當時藁葬漢臺東。三尺荒陵枕郊甸。四墳角立不知名。云是諸王狗國彥。左瞻右顧塚纍纍。萬古一丘無貴賤。年年風雨暗清明。陌上行人淚如濺。尋思往事問重泉。笑折山花當九獻。悵望鐘山春草深。誰人更與除壇墀。邵武陵

案唐王聿錡改元邵武。

海珠海水流腥血。十萬生靈冤莫雪。杜康有力不借人。入室操戈憑麴蘖。郎君本是拔山雄。一飲千鍾雙耳熱。座上殺人如草菅。府中聚骨成丘垤。承恩賜射中金錢。至尊含笑稱俺達。歸來虎視故耽耽。神器妄窺狂力竭。黃帶長懸缺望心。赭衣遽與繁華別。爐銷火滅脊原空。白骨啣冤死同穴。孤墳快與梵宮鄰。疎鐘敲落城頭月。夜臺沈醉酒初醒。猛然悟得無生訣。起來若遇綿上人。從前汗馬休重說。成步堂詩集四

案此詩爲尙之孝作。

題東華姪詩文集

生子不願爲腐儒。尋行數墨成蠹魚。教子莫教治生產。求田問宅徒守株。君不見渥洼龍種千里足。高視闊步陵天衢。安能俛首隨款段。血汗伏櫪悲鹽車。憶我伯兄九谷子。先世分室城東居。一朝落地爲兄弟。先後雁行如貫珠。七歲同師授章句。八歲九歲能操觚。十歲爲文學聲律。弟兄唱和無時無。太庭廣衆弄柔翰。滿堂賓客爭稱譽。伯翁我翁莞爾笑。私心相慶陽謙虛。我年十三舉博士。自誇逸足能先驅。須臾陽九天改步。儒冠高挂歸田廬。伯兄十五始入學。一舉再舉登賢書。元年十九我十八。從此出處天淵殊。兄方及第兩出宰。廿年不關思歸與。我年四十入山去。終老不材如大樗。殊塗同轍各有以。蓋棺事定當何如。伯兄不死賴有子。快哉一馬生三駒。中間神駿不可測。少小相從東郡趨。有時繞膝聞詩禮。有時出郭隨蹇驢。有時承歡鄰子國。有時定省來姑蘇。孺子可教更可畏。制義帖括寧區區。吟詩直欲祖風雅。初盛爲主中晚奴。文章寢食飽秦漢。三唐兩宋皆皮膚。而翁所學有真訣。心傳口授無精麤。小子狂簡志高遠。良玉未及分瓊瑜。秋風颯颯樹不靜。廢書讀禮日月徂。太初堂上見手澤。白門城外聞啼烏。故園歸去問封樹。總角今來成丈夫。我時臥病一百日。朝來起坐須扶持。歸人解裝席未煖。聞我老病深嗟吁。自攜詩卷過橋去。行吟直到南山隅。吟聲未歇履聲近。病夫下榻開繩樞。入門再拜誰家子。諦視方知封與胡。去日垂垂髮夾凶。歸時鬢髮微有鬚。去日斑衣事兒戲。歸時博帶飄長裾。人生少壯會如此。使我日暮悲窮塗。問子來意胡爲乎。袖中有物能卷舒。琅玕出手光照席。索我落筆爲點污。我身既隱文何有。汝言

可采良不謬。開卷一唱復三嘆。掩卷大聲還疾呼。九谷子。九谷子。有子如此道不孤。有子如此道不孤。
成陸堂
詩集四

陳子升東洲草堂遺集二十六卷

陳子升。字喬生。南海人。子壯弟。隆武時以貢生薦授中書。永曆建元。擢吏科給事中。轉兵科右給事中。順治七年。粵東再陷。會以使事先出。未及西走。自後遂流轉山澤以老。卒年未詳。此集首載李模所撰六十壽序。子升長于梁佩蘭者十五歲。六十時正當康熙十二年。或不久即沒。以黃河激輓詩有廿年銜涕淚之句也。撰東洲草堂遺集二十六卷。子升于康熙元年刻其詩。錢謙益爲之序。遺集有梁佩蘭識語。或即佩蘭所訂。一至十八卷爲詩。次爲詞。爲嶺嶽。子升所作曲子也。爲琴操。爲棟著文。爲硯書。其疏草焚餘。四子義及易義。中洲說詩。皆未刻。子升與黎遂球莫逆。時亦似之。入清以後。折而入宋。然其氣力甚厚。不見規摹之迹。佩蘭謂粵詩得脫明代優孟漢唐之誚。功在羅季作鄭湛若陳中洲王說作諸人。其言允矣。

咏西洋顯微鏡

以僂視小物。皆成大形。蓋蠅眉目皮毛。靡不畢見。

大道祭中天。奇淫出窮海。茲鏡西洋來。微顯義兼在。雕棘具猴體。穿楊貫蝨胸。何如造茲鏡。微妙生其中。蚊睫焦螟巢。蝸角觸蠻戰。以茲當少怪。況乃多多見。芥子納須彌。毛間盈海水。微今顯鏡中。顯却在

微裏。我目有神鏡。我心超離裏。拂鏡歸玉匣。反觀將內求。東洲草堂遺集五

崇禎皇帝御琴歌

有序。道人風大均自山東回。言濟南李樂龍之後其家藏百琴。中一琴名翔鳳。乃烈皇帝所常彈者。甲申三月。七弦無故自斷。遂兆國變。中官私攜此琴。流運於此。又朱秀才彝尊曾言有楊正經者。善琴。烈皇帝召見。官以太常。賜以一琴。自國變後。結廬與琴偕隱。作西方風木二操。懷思先帝。其人今尚存云。壬寅中秋。二三同志集于西郊。聞道人之言。并述楊太常之事。成歌歌感慨。謂宜作歌以識之。臣陳子升含毫稱首長歌先成。

夏后嶧陽桐不貢。周王岐山久無鳳。鳳去桐枯未足愁。哀弦萬古堪悲慟。悲慟兮如何。先皇琴兮小臣歌。小臣生在南邊鄙。身比囊桐心不死。莫提長劍定三關。聊抱孤琴遊萬里。瞻孝陵兮聆高廟之景鐘。望煤山兮泣烈皇之遺弓。弔金戈於漠北。繡碧簡於山東。山東濟南李家名。家藏百琴傾百城。百琴一一囊且匣。出匣開囊一琴使人驚。鍾山玉暉九寡珥。古來稀有此光晶。腹中鑄文翔鳳名。龍脣鳳沼文相生。曾經烈皇親手撫。真龍手中翔鳳舞。甲申三月便殿中。七絃自斷琴心苦。八音遏密兆此時。四海傷心惜明主。嗚呼烈皇御極十七載。祖宗全盛金甌在。外圖政教務嚴明。內覽詩書備文采。上有君兮下無臣。宮弦張兮商弦改。聞有能琴楊太常。烈皇禮之如師襄。承恩別有一琴賜。得與翔鳳相迴翔。一自烈皇登遐去。太常抱琴山澤藏。終身感恩成樂章。恭貯賜琴居草堂。虞帝薰風寂蒲阪。皇英瑤瑟怨瀟湘。天下臣民如寡鵠。長卿莫奏鳳求凰。神京既不守。寶器將何依。絃歌鄒魯近。毋乃鳳皇飛。將軍披鐵鎧。文士拂金徽。共苦兵戈際。誰知律呂微。烈皇安兮琴肅肅。臣不及鈞天侍宴調絲竹。烈皇怒兮琴轟轟。臣願得揮雲撥霧揚天聲。但願見舞階格苗之千羽。不羨彼登樓下鳳之瑤笙。臣拜御琴長加額。歸告當年碎琴客。安得普天知此音。中和樂奏無兵革。東洲草堂遺集七

五羊門

辛卯改五羊門爲五
仙門感奮而賦

船維五羊驛。車發五羊門。曾建雙龍闕。何來萬馬屯。五羊原是仙來處。自從羊去仙亦去。仙人遨遊朝玉京。幾時重到五羊城。東洲草堂
遺集七

述哀

心摧嬾后石。淚盡蜀山鵲。自恨無容地。誰還共戴天。飛塵金齒路。沈日點蒼煙。願挽烏號射。樓槍會應弦。

黃竹歌殘雪。蒼梧泣斷雲。三羊曾克鬼。諸夏乃無君。逐日還何及。呼天竟不聞。定知圖錄祕。哀痛爲斯文。

列聖恆如在。孤臣尙苟生。生年從萬曆。往恨積崇禎。流落捐軀免。傳聞洗耳驚。將來紀年月。良史正含情。

雲沈六詔外。天遠七盤西。不義爲彭寵。休屠無日磔。難期大樹賞。空使具茨迷。他日還鐘虜。如何慰鼓

鞞。東洲草堂
遺集八

陳恭尹 獨漉堂詩集十五卷文集十五卷續編一卷

陳恭尹。字元孝。號獨漉。自稱羅浮布衣。順德人。父邦彥死節。恭尹襲錦衣指揮僉事。順治八年鄭成功

方起海上。思就之。入閩不達。自贛出九江。順流至蘇杭。復往返杭州寧國間。蓋密有結連。歷四年無成。始歸娶。又四年入海。收合餘衆。又無成。十六年將入滇從桂王。道阻。乃北走衡湘。渡彭蠡。下至池州。寓蕪湖。值成功大舉圍金陵。張煌言進取徽寧。恭尹與共策畫。旋成功敗走。煌言問道出海。恭尹遂北游汴梁。逾年歸。則桂王已入緬甸矣。然猶與梁榷陶窳何衡何絳深相結納。世稱北田五子。遙與寧都易堂九子。聲應氣求。康熙十七年以嫌疑下獄。明年事解。是後天下已定。乃與世徜徉。卒于三十九年。年七十一。清史列傳文苑有傳。恭尹嘗自刻獨漉堂稿六卷。載詩至康熙九年庚申。似卽其時所刻。分體字句與後來刻本小異。有應酬數詩。爲全集所無。其子贛刻全集于康熙五十六年丁酉。讀初游中集。增江前後集。如曰前惟晉鄙。後惟秦始。不信海西馳。久飲東京水。曰謗聲易弭怨難除。秦法雖嚴亦甚疎。夜半橋邊呼孺子。人間猶有未燒書。曰犬馬豈能忘舊主。夢魂猶恐負先臣。曰南國干戈征士淚。西風刀剪美人心。曰海水有門分上下。江山無界限華夷。曰生死白刃間。壯心未云已。曰欲寄悲歌向燕市。荆卿行後更無人。曰哀哉晚世士。不幸有其心。皆深心苦語。動人魂魄。江村集以後巽語求全而已。世頗疑其易操。唯朱彝尊以爲終當在逸民之列。蓋原其心也。嘗謂嶺南濱海之人。狎波濤。輕生死。嗜忠義若性命。其間未嘗無輒美趨利之徒。若恭尹與屈大均庶乎不磨者已。恭尹少大均一歲。後四年而亡。兩人幼同學。大均走浙東。走塞外。晚參孫延齡軍。行逕若與恭尹不相謀。而所志則一。恭尹詩所謂中間一杯酒。各有萬里行是也。恭尹自評其詩。謂與大均及梁佩蘭爲能發據性靈。自開面目。又謂大均江河之水。佩

蘭瀑布之水。已則幽澗之水。蓋寓其不肯平也。實則屈陳皆擅近體。屈以五言勝。陳工于七字。未易軒輊。梁則蒲伏明珠徐乾學之門。人品詩格。胥有間矣。其文長于論議。短于記敘。蓋未致力于史。不若大均之有四朝成仁錄。廣東新語也。文集第九卷奏疏啓牋原缺。謂毀于火。實懲于大均軍中草。爲大汕劫持。因畏禍不敢刻耳。

乞食翁

冥冥青楓林。戢戢歸飛翼。飛鳥亦有巢。老翁行乞食。問翁何方人。揮涕答不得。良久前自言。家在東山側。薄田五十畝。父子藝黍稷。宿昔天地平。眈勉努筋力。中婦提壺漿。小婦當機織。老妻低白頭。扶孫共匍匐。冬日農事歇。斗酒呼親識。雞豚稻粱飯。壯我衰顏色。寧知屬戎馬。秋毫無取索。一歲耕且鋤。不足供賦役。芸田倦未起。肢體被鞭策。貧家力已竭。公家求日益。有田以自養。反以速窮厄。欲賣與豪家。鄉鄰少人跡。當時富貴者。荒草生空宅。回頭語孫子。流離任所適。重恐官吏至。豈能受逼迫。黃泉亦相見。何必人間客。欲呼一飯別。盡無半升麥。出門各分手。痛哭辭阡陌。哀哉竟至今。兩不聞消息。老身一葛衣。朽爛委荆棘。餓死汚人鄉。不死長悽惻。新朝澤萬物。我獨羅斯極。下民日憔悴。上天安可測。獨遊堂詩集一

耕田歌

耕田樂。耕田苦。樂哉樂有年。苦哉不可言。春未至。先扶犁。霜華重。土氣肥。春已至。農事始。雞未鳴。耕者起。泥汨汨。水光光。二月稻芽。三月打秧。五月收花。六月垂垂黃。再熟之田始有望。三月打秧。六

月婦草。一熟之四。九月始得穫稻。近路畏馬。馬食猶寡。近水畏兵。兵刈何名。上官不問熟不熟。昨日取錢今取穀。西鄰典衣東賣犢。黃犢用力且勿苦。屠家明日懸爾股。

獨漉堂詩集二

所見

禁裏曾通籍。人前不下牀。未離阿保手。已綰大夫章。一飯中人產。千金匹馬裝。白頭蓬室者。只自愛糟糠。

繡袷紫頭巾。驍騰馬上身。臂鷹飛啄鳥。手彈遠迫人。共竊軍符夜。相邀野草春。不知營一醉。鄉曲幾家貧。

獨漉堂詩集三

清詩紀事初編卷三

甲編上

錢謙益 牧齋初學集一百十卷有學集五十卷牧齋有學集五十一卷投筆集一卷牧齋全集一百六十

三卷牧齋初學集箋注二十卷有學集箋注十四卷

錢謙益。字受之。號尚湖。又號牧齋。晚號蒙叟。又曰東澗遺老。常熟人。萬曆三十八年進士第三人及第。授編修。時葉向高當國。擬謙益第一。韓敬第三。敬密贖四萬金進奉內帑互易之。翌年言官發同考湯賓尹隔房搜敬落卷事。敬冠帶閒住。賓尹不謹罹褫典。是爲謙益與浙人構衅之始。以艱歸。鄉居十一年。始赴闕補官。天啓元年。典試浙江。歷左右春坊。顧其仁舉發浙闈舉人錢千秋試卷。用一朝平步上青天七字。分置七義之末爲關節。千秋論戍。謙益聽勘。或曰宰局敬所布也。遂移疾歸。尋起補詹事。忤魏奄削籍。崇禎改元。召爲禮部侍郎。預枚卜。周延儒論資俸當並推。以其通內。恐必得。擴之。延儒遂與溫體仁比。體仁傳沈一貫衣鉢。爲浙黨魁。廷發錢千秋前事。謙益實聽勘未結。倉卒不能置一辭。竟削籍歸。史稱其事曰閣訟。初謙益受葉向高孫承宗之知。早爲東林眉目。鄉居久。益讀書練習當代掌故。留心邊才。嘗論并世人物。謂馮銓尙有規模。蓋自負

不在江陵下。復以文學冠東南。物望漸歸。遂爲東林魁率。至是知入相無望。乃發憤欲修一代之史。其才力亦實足以任之。體仁忌之未已。七年。遂有張漢儒事。漢儒受體仁指。揭發謙益及瞿式耜居鄉不法事至四十款。嚴旨逮問。明季東南巨室。爲患鄉里。蕃奴婢千指。奪人田宅妻女。把持官府。干預考試辭訟。操縱府縣官如傀儡。更出洋與販得巨萬。爲起復之資。錢瞿不法雖不盡如所訐。而皆有迹。謙益使門人馮舒輦四萬金密致馮銓道地。由盧世權程先貞挽謝遷居間。馮謝爲達司禮監曹化淳。且示以謙益所爲王安墓誌。化淳安名下也。讀之感泣。逾年。謙益竟得直。漢儒等立枷死。體仁罷相。錢溫之仇十年矣。至是始結。事詳馮舒虞山妖亂志。誠哉其爲妖亂也。自是謙益愈放廢。納妓柳如是爲次妻。築絳雲樓居之。兼藏異書。樓旋毀于火。史稿燬焉。乃別撰列朝詩集以見志。南都立。起禮部尙書。頗親馬士英阮大鍼。阮舊交。馬則服其有才。有報國心長疏陳四事。爲阮及馮銓訟寃。志在調停。嘗論三案與人異趣。又力辨赧王無好酒及色事。皆違公論。順治二年。清兵南下。謙益竟視顏迎降。入都揚言爲先朝修史。三年正月。授祕書院學士兼禮部侍郎。明史副總裁。六月以疾歸。是時法令嚴。朝官無敢謁假者。謙益竟馳驛回籍。歸遂牽連淄川謝陞案。銀鐺北上。傳言行賄三十萬金得幸免。賄雖無徵。後來謙益與人書。屢言匱乏。貧富先後頓異。未爲無因矣。五年四月。復因黃毓祺之獄。逮繫江寧。總督馬國柱以謙益與毓祺素不相識定讞獲釋。全祖望謂毓祺事由謙益告密。恐失考。時桂王立于粵中。瞿式耜爲大學士。鄭成功張名振張煌言舟師縱橫海上。

謙益皆與之通。成功嘗執贄爲弟子。十八年。桂王不幸爲吳三桂所殺。成功亦沒于臺灣。謙益哀之。作後秋興詩一百八首。編爲投筆集。卒于康熙三年。年八十三。事具清史列傳。貳臣傳乙編。撰初學集一百卷。刻于崇禎末。有學集五十卷。康熙初刻于粵中。其無角黍辭一首。書汰如塔銘後二首。題覺浪和尚天界初錄一首。及題地輿歌有缺字者。後來改本也。收齋有學集定本五十一卷。蘇州坊估所刻。以增錄遺文一卷爲號召。實則任意刪節篇章。幾不成文。以省刻資。最爲誤人。唯增錄中李忠文公文水全集序。張子石七十壽序。君鴻七十壽序。錢母趙太孺人墓表。與方爾止書。爲柳敬亭募葬書。乾元道人祠屋疏。題織簾唱和冊。書柳敬亭冊子九首。爲近人補遺所未收。投筆集一卷。江西有刻本。錢曾收齋初學集箋注二十卷。有學集箋注十四卷。詩與本集。微有出入。曾爲謙益從孫。嘗從之受學。故于詩中典故。皆能得其出處。與叩槃捫燭者有異。相傳注中時事。爲謙益自注。不然局外人決難詳其委曲若此。倘錄之成帙。可作別史觀。曾注未盡刻。今尚有原稿流傳也。謙益詩早年局度精整。滄海之後。善能造哀。文閎肆奇恣。經史百家。旁及佛乘。悉供驅使。是以一時推爲文宗。然其人奔競熱中。反復無端。方苞詆之曰其穢在骨。不得謂苛。清高宗禁毀所著書。特立貳臣傳。令入乙編。示不得與洪承疇伍。然孫廷銓王崇簡姚文然諸人。皆迎降者。又不入貳臣傳。則體例之疏也。謙益生有異稟。老而幼學。著述不輟。太祖實錄辨證最精。入初學集。杜詩箋注。不免牽附。亦自成一說。開國羣雄事略。近始有刻本。皆屢禁不絕者。

一年

一年天子小朝廷。遺恨虛傳覆典刑。豈有庭花歌後閣。也無杯酒勸長星。吹唇沸地狐羣力。撻面呼風賊鬼靈。奸佞不隨京雒盡。尙流餘毒螫丹青。有學集八

案此詩爲弘光作。

蕉園

蕉園焚蕪總凋零。況復中州野史亭。溫室話言移漢樹。長編月朔改唐莢。謾聞人自譌三豕。曲筆天應下六丁。東觀西清何處所。不知汗簡爲誰青。有學集八

案此詩論其時野史也。

後秋興二

八月初二日
聞警而作

王師橫海陣如林。士馬奔馳甲仗森。戒備偶然疎壁下。偏師何意隕城陰。憑將按劍申軍令。更插鞞刀徹士心。野老更闌愁不寐。誤聽刁斗作秋砧。

羽檄橫飛建旆斜。便應一戰決戎華。戈船迅比追風騎。戎壘高於貫月槎。編戶爭傳歸漢籍。死聲早已入胡笳。江天夜報南沙火。簇簇銀燈滿盞花。

龍河漢職散沈暉。萬歲樓邊候火微。卷地樓船橫海去。射天鳴鏑夾江飛。揮戈不分旄頭在。反旆其如馬首違。嚙指奔逃看韎韐。重收魂魄飽甘肥。

由來國手算全棋。教子拋殘未足悲。小挫我當嚴傲候。驟驕彼是滅亡時。中心莫爲斜飛動。堅壁休論後起遲。換步移形須着眼。棋於誤後轉堪思。

兩戒關河萬里山。京江天塹屹中間。金陵要奠南朝鼎。鐵甕須爭北固關。應以縲丸臨峻坂。肯將傳舍抵辱顏。荷鋤父老雙含淚。愁見橫江虎旅班。

吳儂看鏡約梳頭。野老壺漿潔早收。小隊誰教投刃去。胡兵翻爲倒戈愁。營卒從諸酋長皆抽網巾。鉗未及倒戈而還。爭言殘羯同江鼠。萬曆末年。有北皇渡江。近皆從尾而北。忍見遺黎逐海鷗。京口偏師初破竹。蕩船木柁下蘇州。

十載傾心一旅功。御槍原廟夢魂中。南門舊存高皇帝手御鐵槍。每思撒豆添營壘。更欲吹毛布雨風。淮水氣連天漠白。鍾離雲捧帝車紅。南宮圖頌丹鉛在。辜負秋窗老禿翁。

艱難恢復勢逶迤。蟻穴何當潰澤陂。駝馬已臨迤北路。敵車猶護向南枝。雷驚犀象牙方長。雨送蛟龍宅屢移。最喜伏波能振旅。封侯印佩許雙垂。是役惟伏波殿後。全軍而反。集

案後秋興二爲己亥秋鄭成功攻金陵不克而作。成功嘗事謙益爲師。故曰十載傾心一旅功也。功敗垂成。不免深情之。

後秋興三八月初十日。小舟夜渡。惜別而作。
北斗垣牆闢赤暉。誰占朱鳥一星微。被除服珥裝羅漢。姚神武有先裝五百羅漢之議。內子靈囊以實之。始成一軍。滅損齋鹽餉次妃。娘子纒

旗營壘倒。張定西謂阮姑嫜。吾嘗派女抱刀侍柳夫人。阮喜而受命。舟山之役。中流矢而殞。惜哉。將軍鐵稻鼓音遠。乙未八月。神武血戰死崇明城下。鬚眉男子皆臣子。秦越何人視瘠肥。夷陵文相公。來書云云。集

案秋與三爲張名振作。世傳柳如是嘗入海幢師。據此詩則實有之。

錢陸燦 調運齋詩文隨刻

錢陸燦。字爾崧。號圓沙。常熟人。補無錫縣學生。後始復本姓錢。順治十一年。以前明貢生廷試得候缺。通判。十四年舉北闈第二人。以奏銷案褫革。卒于康熙三十七年戊寅四月六日。年八十七。此集隨時所刻。後始哀爲一編。首有自序。作于戊辰。康熙二十七年而有戊寅所作之文。蓋後有增益也。詩爲乙丑。康熙二十四年後數年所作七律八十一首。七古一首。門人倪師霍題其後曰。己酉。康熙八年以後有詩千餘篇未刻。然則明季至己酉之詩。宜數倍于此。不下數千首。可稱大家。惜皆失傳矣。又和陶詩一卷。則呂留良辛亥。康熙十年所刻者。文凡四十九首。陸燦自謂有文二百餘首。此特四之一而已。其詩富于才情。稍傷率易。文則力矯其時歐會之習。務爲高古。而不免于冗蔓。所師事者。文則顧大韶。詩則吳偉業。時文則馬世奇。佛則熊開元。于謙益爲族孫。而不仰其餘光。且譏依倚謙益者。以妖冶爲溫柔。堆砌爲敦厚。不知詩家有悟入一路。蓋不滿于馮氏兄弟。然吳父正錢錄出。立起而駁之。使無置喙餘地。力稱謙益之文。不名一家。不拘一體。學則地負海涵。文則班馬韓柳。不止爲謙益捍衛。亦隱以自負焉。客游揚州金陵幾三十年。儼然人師。晚歲多客武進。受其陶成者。若胡香吳陳煉唐惺葦董大倫惺鶴孫許璿耀莊楷令輿錢名世。皆以詩有名于時。鄉里後進。從之取科名聲譽者甚衆。自謙益長東南文壇數十年。陸燦以一窮老書生繼之。巍然領

袖一方。至良擇而虞山詩教始衰矣。陸燦嘗輯列朝詩集小傳別行。補苴是正。爲功不少。試以兩本對勘。即可辨之。又手批梅村詩集。程穆衡取其有關舊事者。入所撰梅村詩箋。所謂錢箋是也。予藏康熙中曹炎過錄本。于梅村詩鄙俚處。及用事失當者。剝彈不爲師諱。蓋直諒多聞人也。惜其詩文傳者僅此。爲輯詩八十餘首。文六首。尺牘八首。成補遺一卷。附此集之後。

重答孫蔗巷年兄芥閣

南朝有片秦淮水。歷歷興亡淚滴成。僕本恨人今雨迹。地非吾土故園情。橫波館築劉郎死。骨董箱空九一行。蚘怨蛩愁皆往事。開元白髮已重生。五句橫波一美人字也。許據名士劉芳愆期。劉竟以情死。余經紀其喪。辛巳年也。後橫波從貴官。稱某夫人。六句甲申年吳次尾同余會某尙書。坐定。止談古董。不及時事。次尾歸途謂余。吾與若未可以去乎。明日遂行。九一其小字也。明年九一戰死。調運齋集

歸允肅歸宮詹集四卷

歸允肅。字孝儀。號惺崖。常熟人。康熙十八年第一人及第。官至少詹事。卒于二十八年。年四十八。撰歸宮詹集四卷。其曾孫朝煦編刻于嘉慶中。以頌聖之作。目爲內制。可資笑嘲。又謂明清定制。以前科狀元典順天鄉試。自允肅後遂廢此制。不知康熙十一年壬子始用蔡啓傅。十四年乙卯韓菼。十六年丁巳彭定求。二十年辛酉允肅。後于三十八年己卯復用李蟠。非自允肅而廢也。鄉人話前朝掌故。似是而非。動成笑柄。往往類此。允肅詩文皆有法度。右文之世。不得擱用。盛年告歸。必有其故。或以才見嫉。惜不得而

詳矣。

蠶箔詞

二月桑條青。三月桑陰綠。風定日初長。吳蠶生簇簇。麥隴雉爭飛。樓頭蠶欲齊。辛勤護簾箔。早起摘芳菲。蠶眠時正暖。陌上行人緩。門巷寂無聲。日午炊煙散。桑柘已稀蠶作繭。寒暄更測陰晴轉。少婦持筐日苦飢。手中軋軋綠新絲。歸宮齋集三

嚴虞惇嚴太僕先生集十二卷

嚴虞惇。字寶成。常熟人。康熙三十六年。以一甲二名及第。授編修。官至太僕寺少卿。五十二年卒。年七十四。撰嚴太僕先生集十二卷。事具清史列傳。虞惇詩冲和大雅。敘才就範。爲文清勁。頗學歐曾。然不及所撰思菴閒筆爲有生氣。文章貴有真際。得失全判于此。後人乃欲以擬歸有光。失之不倫。吳振械養吉齋叢錄。載康熙己丑順天鄉試李蟠姜宸英爲正副主考。思菴爲之資緣納賄。子姪皆得中式。其子密年尙乳臭。爲怨家所訐。覆試乾清宮。得不究。卽此集祭姜宸英文。所謂執功執過。試于乾清。小子非然。天顏有矜是也。然是獄李遣戍。姜瘐死。不能謂僅失志者造謠。然則思菴殆非端士。予藏密所畫事事如意圖。印章作山中宰相四字。狂放不拘。尙沿明季山人之習。

雜感

眼看時事漫縱橫。檢點餘年剩此生。貧賤受恩深未報。艱難作客久無成。一囊飽去慚方朔。四壁歸來羨長卿。兀兀只憑天付與。何勞卜肆訪君平。

平生志業寄丘墳。誤我終當一炬焚。壯不如人今已老。身將終隱又焉文。長鑱麥隴犁春雨。短艇漁波釣夕曛。野老漸忘名與姓。休令人說故將軍。

鳶肩燕頤與時諧。得意光榮失意乖。落拓不容天豢養。伶俜寧受世擠排。揚雄寂寞元非白。方朔聲牙只類俳。眼底紛紛共誰語。唐衢阮籍是吾儕。

丘山大小等秋毫。鍾鼎山林任所遭。流水游龍看世態。清風明月屬吾曹。從來不信營三窟。莫道於今有二毛。偃鼠所須惟滿腹。一簞瓢更一綈袍。殿太僕先生集三

汪 繹 秋影樓詩集九卷

汪繹。字玉輪。號東山。常熟人。康熙三十六年進士。三十九年廷對第一。授修撰。後三年告歸。四十四年奉命校全唐詩。翌年卒。年三十六。撰秋影樓詩集九卷。分九集。集爲一卷。有查慎行序。謂癸未倖舉南宮。出公房薦。此足正全祖望初白查先生墓表。及清史列傳文苑傳。特賜進士之謚。慎行爲剽集報知己之感。而不論定其詩。繹爲鑄曾外孫。與高士邵陵交厚。酬唱最多。濡染有自。雖功力未深。而清約可誦。其告歸度必有擠之者。故韓奕以韜晦爲戒。翁文恭壬申日記云。漆工汪姓。東山六世孫。尙藏其種芋圖。

圖寓風木而作。東山自題有句云。莫泥衡山舊公案。十年宰相竟何爲。詩凡二絕。載此集中。

龔叔度三十初度

朱門歌舞好春時。自有新詩付雪兒。贏得綠珠江上女。滿頭花草唱君詞。

叔度住游粵西。所製竹枝詞。摹响婦女成歌之。

秋影樓詩集三

蔣 漣 使豫草一卷

蔣漣。字檀人。號省菴。又號錦峯。常熟人。康熙四十八年進士。入翰林。官至太僕寺卿。使豫草一卷。爲康熙五十八年。漣以中允奉命祭告中州之帝王陵寢紀程之作。未附所刻碑文五首。曰太昊伏羲氏陵。商高宗陵。漢光武帝陵。周世宗陵。宋太祖太宗真宗仁宗陵。稍足備參稽耳。

柳湖子由亭

半畝書堂曲水通。歸來定有鶴飛空。憑君更訪開元寺。不見山茶一樹紅。

使豫草

蔣廷錫 秋風集牡丹百詠江左十五子詩選

蔣廷錫。字揚孫。號南沙。又號西谷。常熟人。伊子。工寫生。參用西法。尤善畫牡丹。氣韻不如惲格。而綉麗過之。與何焯汪灝同值內廷。以舉人一體殿試同賞編修。康熙朝已官內閣學士。雍正初歷尙書。久縮戶部以入軍機。官文華殿大學士。恩寵無比。倚任之專。稍亞張廷玉。疑其受知先已入侍雍邸也。卒于雍

正十年。年六十四。諡文肅。撰青桐軒集。秋風集。片雲集。牡丹百詠。詩格不高。筆頗跳脫有致。然何焯甚輕之。江左十五子詩選。刻其早年詩一卷。康熙時內廷修書無廩給。以內監督之。輕褻極矣。黠者以諸郎爲奧援。愿者周旋于雕璫之後而已。諸人落拓不得志。陳夢雷錢名世鍛羽遭斥。又其甚者也。廷錫獨至大官。子溥繼武。疑別有逕竇也。

年幡

寒風料峭深沈院。酒入橫波春意倦。金刀聲裏送殘年。紅燭梢頭結小燕。欲將人面比花枝。却剪花枝遮半面。縱橫裁碎五色羅。分散裂開雙絲絹。不願縫作繫肘囊。不願縮作長命線。願爲方勝同心符。願比相思合歡扇。錦被香消困不禁。繡幃愁絕無人見。手中金縷剪宮花。眼底年光疾奔電。蝦蟆走落碧紗窗。銅鉦捧出通明殿。粧臺斜架柏子簪。鏡匣初開琥珀釧。眉入青螺兩道分。髻垂蟬翅全身見。綠絲高擁鳥雙棲。小鳳倒啣珠一串。巧將銀勝貼花冠。斜插春錢壓金鈿。風吹蛺蝶活欲飛。日映彩雲凝作片。明珠錯落頭上花。忽見一方紅錦纏。帶將端正問傍人。窺鏡還羞淡粧倩。可憐歲歲換花幡。暗卜流年心默轉。藤蕪山下本無情。長信宮中恩易變。安得年幡如指環。慙慙約指君相眷。更得年幡似綰臂。拳拳在手君相戀。廬江小婦織未遲。菡萏在床任舒卷。但令如願勝前年。無愁買得春光賤。

秋風集

王譽昌 含星集四卷

王譽昌。字露涓。常熟人。諸生。弱冠從錢陸燦學詩。後又從陳瑚授經世之學。撰含星集四卷（後增至十二卷）。刻于康熙二十一年。陸燦爲之序。謂虞山之詩。孫子長馮已蒼定遠後。賴有露涓與孝穆補之。賜谷玉友諸子能昌之。今二馮外。唯見此集耳。瑚稱其詩奇警清穩。自今觀之。格律蒼老。工力實深。雜感。病起言懷。春日漫興諸作。多激昂慷慨之音。知不忘用世。譽昌別撰崇禎官詞。得名甚盛。詞中自注。頗習朝局。是其留心所在。繪畫篆刻。不得志始爲之。晚遭縲絏。何焯昌言何渠不若江左十五子也。巡撫宋犖聞之。大慚。立解其獄。事當在康熙四十四年乙酉。已年逾七十矣。

雜感

年去年來緒萬端。一生心事半凋殘。豈能幽憾經時散。未必雙眉至死攢。運轉乾坤人草草。夢依山海路漫漫。忽驚雷雨中宵起。可得深淵學螭蟠。

七尺匡床一短檠。通宵魂夢不分明。似從紫陌塵中過。渾入黃茆瘴裏行。高樹引風傳漏點。敗簷飛雨捲潮聲。朝來檢得彈棋局。試看中心却未平。

雲自飛揚石自沉。不相關處却相侵。儼燒荆棘開平路。肯放風波起寸心。多事日翻耽病過。長年人覺積愁深。也知備歷艱辛後。一刻安閑抵萬金。

棄繯投筆豈無情。兩鬢微霜已暗生。鹿苑鶯花三月暮。漁灣風雨九秋驚。井閭擾攘蜂衙聚。山岳縱橫蟻垤成。豈是獨醒人較苦。不辭把酒向春晴。

上騰碧落下飛埃。勢絕雲泥亦可哀。願我語言忘忌諱。任他形迹起驚猜。詩酬劍客襟期壯。酒飲江樓眼界開。未必窮途偏積恨。春風日日轉蒿萊。含星集一

尤 侗 西堂全集餘集一百三十五卷鶴栖堂稿六卷

尤侗。字同人。一字展成。號西堂。一號良齋。長洲人。明季有聲社盟。入清。以貢生調選永平推官。坐擅打旗丁降調歸。康熙十八年舉博學鴻儒科。授檢討。閱三年乞假歸。倘伴林下者二十餘年。稱東南老宿。卒于四十三年。年八十七。事具清史列傳文苑傳。著西堂全集。爲雜俎一集八卷。二集八卷。三集八卷。剩稿二卷。秋夢錄一卷。小草一卷。論語詩一卷。右北平集一卷。看雲草堂集八卷。述祖詩一卷。于京集五卷。京弦集二卷。擬明史樂府一卷。外國竹枝詞一卷。百末詞六卷。鈞天樂二卷。讀離騷四折一卷。弔琵琶四折一卷。桃花源四折一卷。黑白衛四折一卷。清平調一折一卷。附湘中草六卷。餘集爲年譜圖詩一卷。小影圖贊一卷。年譜二卷。良齋倦稿詩十一卷。文十五卷。性理吟二卷。續論語詩一卷。雜說七卷。續說三卷。看鑑偶評五卷。明史擬傳五卷。明史外國志八卷。宮闈小名錄五卷。都三十五種。一百三十五卷。著書之多。同時毛奇齡外甚罕其匹。其雜俎乾隆時列爲禁書。故其集不入四庫書目。看雲草堂集。有

剗去者。殆避禁忌。似禁前所刪。侗詩文以才子自命。雖不足法。然亦當時一作手。鶴栖堂稿詩文各三卷。在合集之外。爲康熙三十八年至四十年所作。侗髦而志昏。紀事多誤。稿中尙有數事。足備軼聞。萱瑞堂記。爲曹寅作。寅母康熙四十八年六十九。御書萱瑞堂賜之。東海一老傳稱徐貫時柯卒于康熙三十九年二月七日。年七十有五。寄食丁婿家。無病而亡。至無以爲斂。柯又號三十六帝外臣。三千六百鈞臺。張烈婦傳稱順治二年五月破揚州。三日封刀。尸骸枕籍。十室而九。今傳揚州十日記。雖未必得實。亦有所本。讀崑山相公遺稿有感詩。自注。立齋遺稿前編已燬于火。後編未刻。康熙三十九年庚辰挽彭羨門。自注。同舉五十人。今已故三十矣。

漕船行

五日過一關。十日過一關。問君濡滯何爲爾。積水以待漕船還。漕船峩峩排空來。影搖白虹聲如雷。官船遂巡不敢進。各船急向兩崖開。昔年曾見漕船上。今年又遇漕船回。漕船回時猶目可。漕船上時繫殺我。會河水淺青草生。日燒三伏紅于火。閘門高閉溜潺湲。篙師繫纜垂頭坐。坐等漕船閘始開。舳艫亘塞中流柁。其船重大皆千鈞。淮鹽蘇酒皆包裹。睥睨權司不敢呵。鞭撻划工無處躲。使氣便說有漕規。一呼羣起無不爲。茶梁木筏隨汝取。米市魚牙受汝虧。衆船亦羨漕船樂。不惟醉飽且施威。默思朝廷養此物。轉餉本供軍國乏。今費一石致一斗。國用日虛民日竭。運舟如狐軍如虎。下倉講兌氣莽鹵。踢斛淋尖頤指間。立破中人千百戶。縣官難與伍長爭。欲爭反愁漕使怒。卽今吳中穀價賤。意欲折乾寧論估。敲朴糧長

仍賙補。嗚呼小民如此困催科。一歲租入有幾何。畊田輸賦豈敢少。奈供此曹魚肉多。君不見。武侯治蜀屯田乎。木牛流馬真良圖。看雲草堂集一

兵船

八旗方轉戍。萬國尙橫戈。穩帳攜家口。樓船下大河。孤兒披鐵甲。小婦點酥駝。此日從軍子。無愁出塞歌。

自是青樓女。相從鐵甲軍。新粧貂鼠帽。舊繡鳳凰裙。酪酒頻年醉。鐃歌徹夜聞。明朝故鄉路。愁絕渡江

雲。看雲草堂集一

又見

又見鱗鱗下。傳呼出大兵。八閩飛白羽。二廣是師名走紅纓。牛鹿編披甲。貔貅配壯丁。排空天馬陣。匝地水犀營。月黑雕旗動。霜清畫角鳴。先聲雖不戰。殺氣已無生。浪破魚龍動。村喧鵝鴨驚。滄州屯萬騎。赤縣閉孤城。父老移家去。官曹負弩迎。將軍操左鉞。客子避前旌。小艇無容處。看雲草堂集一除非陸地行。

咏史

天子瑤池奏玉笙。只教阿母喚雙成。閒來海上探仙籍。又問飛瓊小玉名。內官九品職新除。手詔鸞車選尙書。殿角三千盡蛾綠。不知若箇女相如。黃金不惜買良家。敕使先封繫臂紗。燕支豈是無顏色。爲愛蓮歌出若耶。

黃貂帽子白狐裘。瓔珞垂鬢結綵絨。聞說江南高一尺。六宮爭學牡丹頭。

進賢上賞奉溫綸。爭聘蛾眉奉至尊。應羨廣南作太守。部中偏有綠珠村。看雲草堂集二

案順治十二年。給事中李開生疏諫收買揚州女子。被嚴旨。力辨其誣。流開生于尙陽堡。事見實錄。後開生在戍所爲人毆死。疑

有指使也。此詩作于十六年。首章言指名索取女僮。次言女官。次言價買。次言北人效南人梳裹。末言進奉。蓋變本加厲。搜索逼

于東南矣。

歲暮口號

三年無奈兩頭荒。最苦吳田半水鄉。任是水多留不住。縣官白水要徵糧。

低田水草盡荒蕪。誰料高田穀亦無。一石還租五斗債。更留何物飽妻孥。看雲草堂集七

尤 珍 滄 涓 文 稿 六 卷 詩 鈔 六 卷

尤珍字謙庸。長洲人。侗子。康熙二十年進士。入翰林。遷贊善。以養親歸。卒于□□年。年七十五。著滄涓文稿六卷。詩鈔六卷。文稿列目有介峯劄記四卷。今缺。然文與目次第不符。未悉其故。或原刻詩文皆六卷。目爲虛擬。不獨通鑑講義明史后妃傳隱逸傳未刻。卽劄記亦有目無書。以目中所列劄記補遺各文。今皆在此本第六卷。可以知之。珍詩學宋。才不及父。而恬靜自得。頗有中和之音。

鑄鐵

鑄鐵真成一大錯。茫茫交集恨如何。蚤年不解躬耕好。壯歲空思祿食多。落拓生涯惟痛飲。蕭騷心事獨悲歌。饑來驅我終無路。典盡朝衣典釣箋。滄溟詩鈔五

詠古二首

漢祖曾知四皓名。未能拊致肯忘情。更疑迴護無多日。漫道當年羽翼成。

鴻鵠高飛脫網羅。楚歌楚舞奈情多。趙王儻託商山老。未審他年竟若何。滄溟詩鈔六

案此感廢太子事而作。

汪琬 鈍翁前後類稿六十二卷續稿五十六卷附箚菴遺稿姑蘇楊柳枝詞

汪琬。字茗文。號堯峯。長洲人。順治十二年進士。官戶部主事。遷員外郎。再遷刑部郎中。十八年。以奏銷去官。降補北城兵馬司指揮。遷戶部主事。康熙九年冬。隱洞庭之堯峯。十八年。舉鴻博。授編修。翌年冬告歸。卒于二十九年。年六十七。事具清史列傳文苑傳。類稿刻于康熙十五年丙辰。凡詩稿十二卷。文稿三十八卷。外稿十二卷。續稿刻于二十四年乙丑。凡詩稿八卷。文稿二十二卷。別稿二十六卷。琬初撰毓德堂。戊己。玉遮山人諸集。刪爲類稿二十四卷。後復增益續作。故曰前後類稿。合兩稿爲汪氏傳家集。四庫總目提要竟題曰鈍翁前後類稿一百十八卷。非也。外稿爲古今五服考異。以律爲主。非爲說經。東都事略跋。搜羅衆事。宜曰劄記。歸氏考異則與歸莊角口而作。外稿爲明史擬稿。以王象乾傳于滿洲

有大金金人之稱。足資參考。頗爲世人稱道。然六十日中成列傳一百七十五篇。何其神速。琬詩史館有感云。文字祇愁瞻舊牘。蓋琬敏于爲文。刻類稿時。自謂有文五六千篇。當非誇語。然諸傳于類傳之體。似未措意。安得爲良史乎。文稿中經解。似亦可別行。兩稿無序評。能矯時流之失。而不免凌雜重複。故晚年重訂詩文爲堯峯文鈔。文鈔行。兩稿遂不顯。今又貴兩稿矣。琬爲徐汧外甥。少受知賞。與宋實穎同預二株園文會。入復社後。實穎爲慎交魁碩。則琬已成進士。故輩行甚先。文名早著。與梁熙論類稿云。從廬陵入。非從廬陵出。其實專樞歸有光。較同時侯魏不如其恣肆。而雅潔過之。于人多所詆訶。跋王于一遺集。謂侯方域馬伶傳。王猷定湯琵琶傳。皆以小說爲古文。譏刺錢謙益不遺餘力。謂文章之道。爲所敗壞。固以揚己。亦爲錢門若歸莊諸人而發。讀初學集。指其以朱文公呂成公爲俗學。王季李何爲謬學。遂詆謙益所撰天臺泐法師靈異記。萬尊師。徐霞客諸傳。踳駁不經。曾郢書燕說之不若。然琬書張縉始末。謂朱慈英非皇四子。而不知宮中之位次。題摺九傳疑錄。謂東宮南竄。舉朝猶斥爲王之明。是輕信流俗之訛。書張獻忠敗兵始末。謂獻忠面長一尺六寸。世安得有此面長之人。琬嘗充戶部大通橋監督。因作大通橋分司題壁記。當代無戶部分司。何來此不古不今之稱。琬以善罵著名。與歸莊爭震川集校字。而有歸文辨誣錄。歸詩考異之作。爭而不勝。遂謂僕生稍晚。玄恭前朝所歷。誠不及知。隱抵其曾仕唐王也。危語中人。直欲置之死地。詆正錢錄不中要害。致吳爰類稿類死之嘲。與葉燮忿爭。燮作汪文摘謬以醜詆之。琬出史館。實受擠排。明史擬稿自序云。蹉跎一出。幾喪廉恥。決策詩云。悔趁虛名踐駭機。而不

悉誰實爲之。及讀跋王咸中簡。謂諸公追溯當年媿嫉之人。甚且唾而詬之。又謂向之排擠者。既已骨化形銷。始知所指葉方霽也。琬祭葉文敏公文云。先生知我。指摘膏肓。髮種種矣。敢絮短長。擬謝子墨。縮手山莊。琬于方諷姻戚而門人也。而五續小游仙云。山鬼才知一歲事。豈堪役使守神丹。罵其不堪任明史總裁。可謂毒口。琬亦自知其病。與錢郎中書。謂剛褊多忤。好辨多言。然琬實有吏才。所撰五服考異。兵餉一覽。皆切于用。而難進易退。蹈迹空山。人目爲默。因作釋默以自廣。則其人未嘗非君子也。其詩先摹初唐。折而入宋。讀宋人詩。亦是瓣香玉局。配以陸范。然輕率以出之。已開袁蔣趙張先河。所不同者。腹有詩書耳。原附寸碧堂集三卷。菁菴遺稿一卷。楊柳枝詞一卷。

述事

聞道銷圩策最良。區書圖正很如羊。堯山未是秦人洞。一寸桑麻也合量。

泱辰霖雨浸田廬。又報蝨螟訖未除。紀異若從尼父例。愁渠殺竹不勝書。鈍翁前後類稿八

史館有感

病眼摩挲久不明。暫拋史冊繞階行。癡蠅爭暖栖難穩。小柳含風臥未成。文字祇慙磨舊牘。功名久分付來生。此心已是蕭騷甚。更聽春禽巧弄聲。鈍翁續稿五

五續小游僊

紫殿頻催應制詩。侍書僊子擁瑤墀。擘窠巨筆從頭墀。但乞銀河作硯池。

天上材華又一新。幾多牛鬼與蛇神。修文老吏迂疏甚。不是瓊樓作記人。

藥鑪全按坎離安。每轉惟憂火候難。山鬼纔知一歲事。豈堪役使守神丹。鈍翁續稿五

許虬 萬山樓詩集二十四卷

許虬。榜姓顧。字竹隱。崑山籍。長洲人。順治十五年進士。官思州府推官。升思南府同知。調紹興府同知。終永州知府。撰萬山樓詩集二十四卷。虬詩學六代三唐。才情麗舉。惜少持擇。苦于不似。而四庫提要以爲太似。撫其晉古漢古之言。譏爲雙鉤古帖。清代論詩率貴宋。云有變化。若漢魏六朝。輒以摹擬輕之。譬如臨帖。不先求似。焉有變化乎。虬弟復字不遠。妹定需字碩園。子心宸字紫臣。猶子廷鏞字子遜。女心榛字山有。又字阿秦。心碧字阿蕙。心檀字阿蘇。心澧字阿芬。并工詩。一門聯吟。吳中此風。起于明季。盛于康熙。自後漸衰矣。

丙申仲春十有九日

昨歲藥韃事棘闌。今朝首藉伴松扉。不知春色因誰到。說向中原夢久稀。萬山樓詩集二十一

黔省貢院卽僞秦西府有紀

僞秦邸第起黔中。碧瓦朱闌複道通。四海只今歸一統。萬條銀燭藥珠宮。

鄴臺銅雀水東流。西府誰看花鳥秋。滿院高牆圍棘刺。選樓舊是洗妝樓。萬山樓詩集二十二

韓 菴 有懷堂詩彙六卷文彙二十二卷

韓菴。字元少。號慕廬。長洲人。康熙十二年進士第一人及第。官修撰。以工制藝。久值內廷。二十六年告歸。時徐乾學與明珠結黨相攻。菴素受知于乾學。事後不爲所累。然于徐氏之交。始終不改。頗爲人所稱。起官至禮部尙書。兼掌院學士。平定朔漠方略政治典訓一統志律例之修。皆命菴領之。四十二年。乞休不允。且責其日與庶吉士飲酒。教習不勤。蓋有進讒者。翌年再請不許。竟卒于官。年六十八。事具清史列傳大臣傳。撰有懷堂詩稿六卷。文稿二十二卷。文學歐會。甚有法度。序記之文或失之泛愛。紀事多足徵一時掌故。詩分躡躡歸愚病坊槩迷四集。亦頗溫厚有旨。四庫提要以爲詩非所長。翁方綱輩奉王士禛爲圭臬。感舊集未錄菴詩。遂不免輕下雌黃也。

上健菴師詩八章以旣明且哲以保其身爲韻

名世挺喬嶽。神靈蔚綸氣。中行吾道尊。人爵從之貴。喉舌贊化樞。釜鬻調至味。平生妙卷舒。理在未與旣。

誰昔牽絲日。置身上蓬瀛。槩鉛從計吏。筆札授長卿。講殿陳言切。承華領秩榮。臣心勞夙夜。葵藿在離明。

南牙政本地。北門佐陶冶。春卿攝尋真。澤履辨朝野。風清柏臺肅。非公誰可者。赤棒當道驅。辟易行行

且。

嘉師在祥刑。借公來司臬。夙秉青松心。寧點白玉潔。豈不念酬恩。去就義所決。聖明切爽拜。慰留知公哲。

青蒲久拜稽。溫室違尺咫。嫺嫺豈夢中。鈞天樂盈耳。淵鑑呈瑤編。明辨嘉良史。文章萬丈光。堯言良有以。

再疏苦辭歸。願以書局老。供帳別青門。籤軸紛在道。研席職方書。字畫端明藁。江湖散風神。筆削臨師保。

四海歸模楷。咸曰得我師。鍾閣頻辛苦。詞館徧嗷吹。太丘道何廣。鯉庭淑屢私。卽今五湖雪。敢問夜何其。

雲衣巧變化。萬端若埃塵。行藏真不忒。磨涅總完人。小子門牆末。恩私難具陳。但祝公無疆。千秋屬公身。有懷堂詩畫二

彭定求 南昫文稿十二卷南昫詩稿十卷

彭定求。字南止。長洲人。康熙二十五年一甲一名進士。授修撰。遷國子監司業。晉侍講。二十八年以外艱歸。遂不再起。後嘗受命就揚州書局校全唐詩。事竣逕歸。卒于五十八年。年七十五。事具清史列傳儒

林傳。父瓏字雲客。順治十六年進士。官廣東長寧知縣。傳無錫高顧之學。定求少受庭訓。師事湯斌。以陸王爲宗。嘗作高望吟七章以慕七賢。七賢者陳獻章王守仁鄒守益羅洪先顧憲成劉宗周黃道周也。不立門戶。提倡名節。于同時孫奇逢李顒。尊爲眞儒。唯陸隴其力闢陽明。乃申論伐毛洗髓非致良知不可。亦未嘗以峻語相加。著學易纂錄。儒門法語。密證錄。姚江釋毀錄等書。別有南昫文稿十二卷。南昫詩稿十卷。文多說理之作。雖乏勁健。而辭旨和厚。詩摹范陸。多與尤珍倡和。尙不及其警闕。

感事有作

誰飛誰伏判雌雄。眞宰鑪錘本至公。賜得銅山終一餓。擁來金谷霎時空。鴈知寒信重關外。蛩咽愁吟小砌中。物理乘除如轉轂。豈惟一夜聽悲風。南昫詩稿一

五人墓

偶泛蓬舸繞郭來。摩挲墓碣入徘徊。重看俎豆登鄉社。春秋祭典廢而重復尙想干旒捍黨魁。文文肅公擊。以提騎之擊得免於逮。故公表揚五人。白刃爭擣千載烈。青雲並附九京哀。蕭蕭松柏凌秋爽。灰劫銷沈安在哉。墓爲毛撫建。南昫詩魏逆生祠處。稿七

陸瞻洪屬玉堂詩草一卷

陸瞻洪。字羽白。長洲人。有屬玉堂詩草一卷。刻于康熙二十四年。詩亦清秀有致。蓋屢試不第。以文字游食四方者。

初夏卓子升進士招同呂半隱范伏庵張芳傳吳繡崖卓火傳諸先生園亭小集

南郭春歸後。東君興轉賒。紅餘猶映酒。綠滿試嘗茶。嫩竹流青粉。新泉走白沙。鶯聲經雨滑。燕舞受風斜。星聚揮清塵。林疎落晚霞。玉山頽未醒。金谷罰偏加。既醉情何限。忘言德自遐。屬玉堂詩草

汪士鋐輦下和鳴集

汪士鋐。字文升。長洲人。康熙三十六年一甲一名進士。授修撰。歷右中允。入直南書房。工詩古文辭。與兄份鈞弟倭齊名。稱吳中四汪。工書與姜宸英齊名。稱姜汪。著述多考證金石古迹制度之作。有秋泉居士集未見。

廢宅

伎樓賓館半銷亡。虛掩朱門迳已荒。草合空階迷等級。書留殘壁失偏旁。頻來每惜青春好。久坐翻嫌白日長。最是斜風無賴甚。等閒吹送野花香。輦下和鳴集

吳廷楨江左十五子詩選

吳廷楨。字山掄。長洲人。康熙三十五年北闈舉人。以冒籍黜。召試復名。入直武英殿修書。四十二年成進士。改庶吉士。授編修。升諭德。卒。有南村詩集。古劍書屋文鈔。康熙中三館修書甚盛。與修者歲時有

宣賜。間有官房。優者偶得賜舉人進士。人以爲榮。而卯入亥出不休。月給至薄。館中咸寄耳目于宦豎。稍拂其意。必巧中以譏。立遭斥逐。其能終始無過失者。必恭謹逾恆者也。然亦未嘗得優遇。何焯欲求貂冠。直僅三金。至遍募人出資不可得。其窮可知。若廷楨所遇。亦固其所。乃尙有人稱其時崇文重儒。殆不然矣。

有感

當饜優歌歎烏烏。一枝棲集苑還枯。楚弓亡去誰懸壁。和璞懷歸只向隅。餉盡正愁蠶欲嫁。翳媒浪信雉相呼。史遷感憤裁書日。貨賂交游仗得無。

弈碁世事太悠悠。覆罷殘圖玉局收。急詔未除逐客令。高貲自畧富民侯。金鞍照路羞縫掖。珠履迎門笑蒯綬。少孺詆媒方朔謔。空將詞賦託俳優。江左十五子詩選二

顧嗣協 依園詩集四卷

顧嗣協。字迂客。號依園。長洲人。風雅好事。年方弱冠。卽舉詩社。有依園七子之刻。七子者。金侃潘鏗黃份金資蔡元翼曹基及嗣協也。後與弟嗣立。數爲文酒之會。與酬唱最密者。錢澄之曾燦杜濬費密吳綺周斯盛朱載震韓洽楊炤金侃潘鏗惠周惕徐昂發張大受。每張燈高宴。歌舞徹霄。因以蕩其家資。乃歷幽燕。入函谷。泛海浮江。下瀧入瀨。凡歷七年。涉五萬里。復致數萬金。隨手而盡。就選京衛武學教授。出

爲新會知縣。康熙五十年卒于官。年四十九。撰依園詩集四卷。刻于庚辰。康熙三十九年詩才遜于嗣立。而伉爽有性情。後遂無詩。所謂一行作吏。此事便廢也。

潼關有感

百二雄關入望遙。流亡滿目歎蕭條。五年赤地難逢雨。近日罷民無可招。時正有招民之令雲擁秦山常變巖。風迴河岸自飄飄。從今祀典崇西岳。籌策無煩問採樵。依園詩集四

顧嗣立閭丘詩集鈔十卷秀野草堂集六十八卷

顧嗣立。字俠君。長洲人。康熙四十四年。以舉人薦入三館修書。五十一年特賜進士。選庶吉士。後三年。以不習清書。改歸班知縣。卒于六十一年。年五十八。事自撰閭丘年譜。及楊繩武所撰外舅顧秀野先生墓志銘。撰秀野草堂集六十八卷。至道光時始盡刻之。先是其曾孫孫達尊嘗合已刻未刻稿。選古今詩八百六十八首。編爲閭丘詩集鈔十卷。未刻。嗣立詩才膽敏。頗擬韓蘇。詩集之富。甚罕其匹。惜乏諷諫。兼少頓挫之致。所著有昌黎飛卿詩注。元詩選四集。采過千家。多見本集。頗足爲讀元史之助。

題白衣先生吳浩然逸事

心史徒將記筆端。此身常著白衣冠。西山薇老腸堪飽。東海波平淚未乾。浩氣直教疫鬼辟。真儒未博婦人歡。崇禎末。嘗欲以真儒召用。爲田妃所沮。遂不果。沙邨徐孺名相埒。清節吳中二老難。書館聞吟一

何焯義門先生集十二卷

何焯。字貺瞻。號茶仙。長洲人。康熙四十一年。李光地薦以太學生直南書房。賜舉人。不第。復賜進士。一體殿試。改庶吉士。仍直南書房。侍讀皇八子胤禩。兼武英殿纂修。丁艱歸。五十三年。再以光地薦直武英殿。授編修。構蜚語與僕同械繫海沅清梵寺。尋事白得釋。以白身入直。六十一年卒。年六十二。復官。特贈侍讀學士。事詳沈彤所撰行狀。撰義門先生集十二卷。義門讀書記五十八卷。焯校勘之學。實爲精絕。非後來對本宜科者所能夢見。性多陵忽。平生唯服膺錢謙益。于汪琬朱彝尊皆致訾議。謂之耳學。同時諸人。更不在其心目中。焯實有著述之才。惜無成就。唯以選入股文爲終生事業。初師韓荃。後師李光地。與李投合。不獨因其與徐乾學反目。亦由時文有同好故也。呂無黨襲父天蓋之名。奔走一世。焯與爭。互騰譏詆。何其見小。觀此集楊易亨制藝序。乃謂先代典章。損益幾盡。經義猶爲未變之制。使有人挾持此語。不將以謗訕蒙咎乎。乃悟康熙之初禁纏脚。廢入股。皆不能行。蓋人皆以爲此未變之制也。此集函札外。多無可觀。固緣乙未^{五十四}被收。所著付諸一炬。當雍正初盛戮文士。若陳夢雷尙長流塞外以死。況焯曾值南書房。頗攬權勢。又爲阿其那心腹。綽號袖珍曹操。天幸早半年卒。不然。決不能保其首領矣。身後惴惴。慮有株連。不唯不能刻集。并存稿亦有畏忌。家書得以流傳。則由其素有書名。世所寶愛。展轉骨董家之手。得不散失。宣統初吳蔭培以其集尤難得。爲覆剝于粵中。增家書四卷。中多軼聞。

屢有貧窘。似白衣修書。數年間絕無祿賜。孰謂當時厚于文人耶。

壬午二月朔日乙夜紀所見

歷數今時廢保障。楚氣誰志□妖祥。從來後服仍先叛。莫笑蚩尤出壽良。知星者云自義門先生奎裏指翼軫集十二

陸 淹 青細堂詩六卷

陸淹。字菁三。長洲人。康熙四十四年。南巡召試。以諸生入值三館修書。四十八年南歸。卒于良鄉。年僅五十餘。妻張能詩。為搜遺稿刻為青細堂詩六卷。卷一應制之作。六為詞十五首。文八首。惜編纂失次。精粗并陳。其詩頗有才華。唯詞多怨抑。有時故作豪語。終不能掩其哀情。

歲交雜詩

白眼徐翻閱世情。閑鷗招得紀同盟。慙非彭澤陶元亮。可似漁陽禰正平。小研雲藍償夙諾。怯攜霜鏡試新纓。迴腸無限難消事。忍聽蕉窗夜雨聲。青細堂詩四

陳學洙 西田詩集十卷

陳學洙。字左原。長洲人。康熙二十三年舉人。卒于五十八年。年八十二。著西田詩集十卷。朱彝尊稱其古詩古樸深秀。近體意致澹蕩。學洙性情篤厚。不為詭遇。蘇州府志稱戊辰康熙十七年會試。主司徐乾學先期

羅致諸名士。有友約學洙往會。行至中途。忽自念曰。吾生平未嘗有私請。中不中命也。半世守節。老而失身可乎。竟不往。是則傳聞之誤。此集有奉輓健菴徐太夫子詩。自注戊辰之役。公爲總裁。余卷已在取數中。會有力爭之者。不得已乃易去余卷。公扼腕數四。余雖不第。而知己之感未嘗一日去諸懷也。使學洙果由乾學所擢。何至感激于身後耶。

役夫歎

淮陰城北清江浦。沙棠之舟轟樓櫓。帆檣合水搖龍旗。日夜喧闐伐鼙鼓。西入黃河指薊門。挾彈張弓紛似雨。驛吏傳呼募役夫。壯者爭赴弱者俱。青蚨二貫曾不足。水深河大甘驅馳。腰環百丈挽無力。逆流難上徒嗟吁。蹶行跣足踏波浪。夜宿裸體披榛蕪。七月甲辰日將旰。長空倏忽蛟龍戰。黑雲擁樹雨翻盆。四顧茫茫天不見。榜人驚集奔且號。繫纜收蓬泊沙岸。哀哉役夫遭其殃。不行不臥皆徬徨。肩背相摩股相擊。寒生肌粟骨亦僵。俛首吞聲不敢怨。但願神力迴商羊。稍看雲斂斜暉出。仍復牽舟向前急。辛苦寧辭泥潦塗。飢寒終作溝渠瘠。我悲役夫命如此。江湖行役無時已。安得天河之水爲酒漿。役夫不患飢無糧。又安得河漢之水成報章。役夫不患寒無裳。

西田詩
集一

吾鄉

秋風颯颯吹衣裳。秋雨灑面生微涼。啓戶忽逢遠歸客。偶經此地談吾鄉。吾鄉此時米一斛。青蚨一貫猶不足。富家閉糴倉廩盈。貧者釜中無脫粟。荆襄盜起阻萬艘。吳民嗷嗷仰天哭。從來謀夕不及晨。那有餘

貯防絕續。吾聞客語歎復悲。艱難十口命如絲。此身縱歸亦無策。況乃汎梗天之涯。山東今歲大豐稔。穀似泥賤良苗滋。同爲赤子苦無食。天心毋乃獨愍遺。朝廷捐租昨下詔。江南七州老稚嘻。嗟哉我民何薄祐。輸將雖減終啼飢。卽今綿綿雨不歇。吳中旱澇無由知。願以滴雨化斗米。救此百萬填溝渠。湖北黃巾一時息。王師早旋定家室。普天無戰擊壤同。五風十雨年年豐。西田詩集五

書異

戊戌六月之七日。天地昏黑陽烏藏。平涼鞏昌兩邊郡。同時坼裂成混茫。東頽西塌城郭陷。颺飛雲捲塵沙揚。六縣生靈不知數。忽與雞犬俱銷亡。千里蕭條絕煙火。但聞鬼哭無屍僵。高山嵯峨倏不見。疑是顛覆波中央。皇天示警意有在。孰曰細故非災殃。況乃京師苦久雨。連綿晝夜聲淋浪。翻盆倒峽勢傾洞。平地幾作魚龍鄉。雖與兩郡不相類。縹緲先事宜周防。吾願聖明亟修省。施仁布義回穹蒼。天人相應若桴鼓。各徵庶轉爲休祥。景星慶雲獻頌瑞。耕夫饁婦歌豐穰。氛祲掃除禍患弭。永固社稷於苞桑。西田詩集十

陳學泗 梅莊詩集四卷

陳學泗。字右原。與兄學洙學生。容貌聲音。狀貌性情。委稟學問。無不相同。以工詩齊名。學洙工力較深。學泗獨有寄託。以諸生久不第。奔走四方。鬱勃之氣。時露于字裏行間。尤工曲子。嘗于病榻撰女當壇樂府。頽落紙滿。甫兩日而成。詩多散佚。梅莊詩集四卷。僅二百餘首而已。

觀打稻

一冬無寸雨。邨邨霽晴色。潭清鳧鴨亂。歲稔禾黍實。田家治場圃。及時言刈穫。老農負稻歸。稚子競拊拾。晨興霜被襦。夜作月照壁。拍拍打稻聲。四鄰不遑息。碾成廩中粟。滿屋散珠粒。束薪過荊檐。高竝野樹直。公私次第償。存者僅僮石。三時苦胼胝。歲取什無一。有秋尚如此。況乃乾與溢。不聞執袴兒。負郭連阡陌。太倉積紅腐。泥沙恣揮斥。征租甚於官。僮僕虎附翼。弗習隴畝勞。艱難奚所惜。豈知田舍子。沾塗朝至戾。造物同一仁。胡爲異肥瘠。農實八政先。敦本務勸穡。民游曠厥土。婦懶廢乃織。不有四體勤。萬姓曷以食。吾儕衣儒服。漫云飽經術。八口資農民。估畢竟何益。俛仰宇宙間。素餐愧食力。請觀伐檀詩。庶幾警荒佚。

梅莊詩集一

災農歎

旱魃來。焚我田。使我家老釋手足胝且胼。桔槔聲中血淚漣漣。朝救南陌。暮救東阡。尺水用盡十夫力。泥焦土赤不見蓄水涓滴。青苗槁矣將奈何。田峻鳩工。擊鼓鳴鉦。大家辱水莫蹉跎。蹉跎寸晷我田不得禾。自夏徂秋。酒漿已竭筋力枯。幸哉槁者蘇。仆者植。秀者苞。穎者栗。妻孥歡喜雜遝。羅拜天地。望望有年。滿溝滿車。實我倉庾。吁嗟乎。旱魃未已。又罹蝥賊。百蟲紛紛。以美稼爲窟宅。飽食而肥。與苗一色。皇天皇天。降祲凶蟲享膏液。斲者予農爾曹果腹饜欲胡以活我躬。猶有他畝晚成熟。歛忽天傾地岌來狂風。狂風不息。河水倒立。三日三夜吹禾根。短穗空垂色如墨。夫對妻泣。父持子啼。各攜病禾奔

走南北東西。告災踏朱門。朱門十叩九不聞。何況遙遙萬里君王關。歸來含悲率妻子。刈割霍霍霜鐘鳴。日未哺。穡事輟。去年擔禾。十步九不得前。今年擔禾。千束一肩。去年收穀二鍾。今年收穀五斗。才辦一春。老農被災心獨苦。心獨苦。禾未登場。官私督我。債主如豺。催胥怒如虎。入草搜雞豚。入門索錢與布。詎知我餒無粟。凍無袴。剝肉且醫眼下瘡。殘禾拮拾輸官倉。微命須臾不自保。何暇憂及春田荒。嗚乎人生勿爲農。爲農賤於草。請看墮畔耨鋤人。半是明年路傍殍。梅莊詩集一

金人瑞 沈吟樓詩選一卷

金人瑞。字聖歎。本名采。字若采。吳縣人。諸生。順治十八年哭廟之獄。死者十八人。人瑞與焉。裕永仁葭秋堂詩集。附人瑞手札。作于己亥。順治十六年自言年五十三。被禍時當爲五十五歲。所撰沈吟樓詩選一卷。凡分體詩三百八十四首。有注明逸詩者。如獄中作茉莉詩。及臨命三章。然亦有少作。疑先有選集。身後采輯增益者。皆以逸名之。弁首雍正五年李重華序云。得之人瑞婿沈六書。六書屬劉獻廷選爲此集。重華與六書子元一元且酬倡。故爲之序。然秩序顛倒。使出獻廷手。當不至是。重華字實君。號玉洲。吳江人。雍正二年進士。官編修。有玉洲詩集。六書名重熙。字明華。吳江人。有珠樹堂稿。其妻金法筵。人瑞季女。七歲能詩。人瑞爲賦左家嬌女惜餘春句。適沈後遂以名軒。有惜春軒稿。人瑞手札謂深入金壑太湖之濱三小女草屋中。理唐人七律六百餘章。付諸剗削。似卽法筵之家。法筵夫婦詩。今唯見沈祖

禹吳江沈氏家集中。人瑞之詩學杜。最見工力。樂府諸篇。皆有實際。不同七子繁響。惜體境未純。時雜禪語俚語。時方重元白陸范之集。人瑞疾之。欲以盛唐教人。未嘗自居于作者。然其合作。雖當時名家未必能及之。凡涉禁忌者。似已刪去。唯塞北一首。爲江陰城守而作。然亦指江南士女不識亡國恨耳。秋感八首詩序。謂庚子正月。邵子蘭雪從都門歸日。述皇上見某批才子書。諭詞臣此是古文高手。莫以時文眼看他等語。家兄長文爲某道。某感而淚下。因北向叩首敬賦。以工于抨擊略無忌憚之人。忽又感激皇仁。令人發笑。辛丑順治十八年新歲詩。忽有餘生無幾之感。是時禍尙未作。豈有先幾耶。沈德潛別裁集六。有人瑞愁詩云。江水流春不當春。江花江草故愁人。開頭振舵汝何往。擊鼓鳴榔皆不倫。巫峽猿啼皆迸血。楚天潮雨最通神。老夫欲寄精誠去。憑仗高風達紫宸。不載此集。知散佚甚多。世之言人瑞事者。多不得其實。錢謙益初學集四十三。有天台泐法師靈異記。謂泐法師者。慈月宮陳夫人也。吳門飲馬里陳氏女。年十七。泰昌改元庚申之臘病卒。以天啓丁卯五月降于金氏之卜。今九年矣。卜所憑者金生采。相與信受奉行者戴生魏生顧生。皆于臺有夙因者也。案丁卯爲天啓七年。是時人瑞年僅二十一。不識由憤世疾俗遁而語怪耶。抑姑以釣名耶。二者或兼有之。不然謙益望重。未必能得其文也。廖燕二十七松堂集十四。金聖歎先生傳。推服備至。言或問聖歎二字何義。先生曰。論語有兩喟然歎曰。在顏淵爲歎聖。在與點則爲聖歎。予其爲點之流亞歎。所評離騷南華史記杜詩西廂水滸。以次序定爲六才子書。行世者唯西廂水滸唐詩制義唱經堂雜評諸刻本。其解杜詩時。自云有人從夢中語云諸詩皆可說。唯不可說古詩十

九首。先生以爲戒。後以醉談青荷畔草一章。未幾。遂罹慘禍。案燕管至吳門。訪人瑞故居。莫知其處。蓋去人瑞之沒已久。不能詳其事。故誤謂人瑞于所居貫華堂設高座。召徒講經。不知貫華乃韓氏堂名。法筵悼二姪女云。貫華堂畔長青苔。寂守孀閨久不開。爲人瑞孫女之適韓者。人瑞自有唱經堂也。劉獻廷廣陽雜記。稱唱經堂挪展法。稱從金釋弓問莊子定本。釋弓卽人瑞子雍。絕命詩稱爲書種者。獻廷自京師還吳。在康熙二十九年。遇雍當在此時。或言雍自寧古塔釋回者非也。沈氏家集有沈永令送金釋弓還遼詩。知賂主者得暫還。而非釋回。所戍者遼東。而非寧古塔。獻廷所稱病中無端忽思成都詩。在此集中云。餘生得到成都去。肯爲妻兒一洒衣。獻廷一生作客。所嚮往者。或在不爲妻兒洒淚耶。獻廷及燕皆不及見人瑞。人瑞在當時實有盛名。尤侗艮齋雜記譏其啗狗肉。登高座說法。又說律詩分兩截如腰斬。是身首異處之兆。又笑其憑卜。實則雜記連篇累牘皆卜語也。知伺之詆諆爲爭才子之名。廖燕言人瑞之功。開拓萬世。李慈銘讀燕瓣香所在。自居何等。獻廷久居吳江。與諸沈習。又嘗與金雍過從。故能深知人瑞。其字繼莊。莊者莊子也。人瑞解莊。必有令獻廷心折者。全祖望表章獻廷爲之作傳。乃謂不解何故。推尊人瑞。是皆以考據面目施之人瑞者也。周暉金陵瑣事記李贄常云。宇宙內有五大部文章。史記。杜子美集。蘇子瞻集。水滸傳。李獻吉集。六才子書卽由此脫化而來。奇更過之。人瑞見解未知視贄何若。而西廂水滸至今流行。深入人心。似過于贄矣。人瑞絕命詩云。且喜唐詩略分解。莊騷馬杜待何如。今有杜詩解四卷。實補苴于從兄昌字長文者之手。詩集後附已成未成書目。爲考人瑞著述者得一確證。

塞北

塞北今朝下教場。孤兒百萬出長揚。三通金鼓搖城角。一色鐵衣沈日光。壯士并心同日死。名王捲席一時藏。江南士女却無賴。正對落花春晝長。沈吟樓詩選

吳 綃 嘯雪菴詩集一卷新集二卷二集一卷

吳綃。字冰仙。長洲人。適常熟許瑤。瑤字文玉。順治九年進士。官至闕內參議道。爲東林眉目。國子監祭酒士柔之子。綃工詩善畫。撰嘯雪菴詩集一卷。新集二卷。有順治十七年庚子錢謙益序。頗稱異之。自序云。余自穉歲。癖于吟事。學蔡女之琴書。借甄家之筆研。細素經心。丹黃在手。二十餘年。靡虞愁病。無不于此發之。竊以韓英之才。不如左嬪。徐淑之句。亞于班姬。假使菲薄生于上葉。傳禮經。續漢史。則余病未能。一吟一咏。亦庶幾于昔人也。自負甚高。二集爲康熙初年之詩。嚴熊白雲詩集辛亥馮定遠先生輓辭云。記曲旗亭更讓誰。金闈往往誦新詩。試吟明月空枝句。半是天才半是師。自注吳夫人冰仙學詩于定翁。曾賦梨花詩云。露下有光翻見影。月明無色但空枝。真名句也。又云。宋玉微詞得噬臍。詩窮老去托金閨。董唐遠嫁冰仙死。懷抱今年倍慘悽。自注定翁晚年。吳夫人待之獨厚。董唐夫人二侍姬也。據此知冰仙詩得定遠之傳。與定遠同沒于康熙十年。鈍吟餘集有輓高陽夫人詩。故云今年倍慘悽也。玩詩意。董雙成唐靈華當亦能詩。與冰仙同受定遠指證者。研堂見聞雜記。謂綃有放蕩之行。牆茨之言。所不

必道。而把持官府。則實有之。二集中多投贈當道之作。有贈漱岩李邑侯詩云。憶昔巖壑蒙覆盆。霜飛九夏控無門。蓋于康熙六七年以訟事客金陵時所作。戴兆祚于公德政錄云。一貴媛工詩畫。善資緣。月露風雲。巧入黃堂之幕。侯鯖郇饌。偏邀紫綬之歡。蘭札絮咏。唱酬贈答。靡所不至。擬公少年尤易動也。臨便面絕佳。情腹致之。公碎而叱之曰。吾做縣令。何敢與婦人往還。腹慚悚而退。于宗堯於康熙七年。以故廣西總督于時躍之子官常熟知縣。年方十九。其時綰尙未沒。故知貴媛蓋謂綰也。鄉紳倚官爲利。不圖才媛亦復爲之。風俗敗壞。于斯可見。綰二子世忠字貞服。世孝字彥服。皆諸生。世孝有偶一集六卷。

邯鄲竹枝詞

東郊氣色曉來新。車馬紛紜陌上塵。盡喚曲中歌舞妓。羅巾小繖去迎春。

風動簾波雪壓塵。重裘二月未知春。小娃學着羊皮襪。笑出燈前踏舞茵。

小瓶刁酒徹杯清。帶露葡萄似水精。玉格銀盤宜醉客。吳人無事愛吳羹。嘯雪庵新集

釋曉青高雲堂詩集十六卷文集十四卷

釋曉青。字鑿青。號確菴。洪儲傳法弟子。繼主中峯。爲彼教所宗。洪儲不忘先朝。每年三月十九日。必青袍上香。顏色慘沮。二十年如一日。又嘗以通海逮繫。海內舊人遺老。多與之游。故曉青亦得識名流。遂以文學顯名。晚居華山。聖祖過寺題詩。禮遇甚異。沒于康熙二十九年。年六十二。有高雲堂詩集十六

卷。文集十四卷。詩格韻俱工。唯不特無蔬笋氣。轉嫌文人結習過重。文多爲教乘作。簡札遂至八卷。所與往還者。達官貴人文士游客之出衆者。幾盡識之。此與卷首刻和御製詩百首。應制詩十二首。上表稱臣僧者。倘所謂世法歟。然書記翩翩。辭約意雅。一時高手皆遜之。亦甚難能矣。

山舫吟

世路不可行。窮山不可住。行路多嶮巇。住山足饑餓。雖有一頃田。磽确無人顧。終歲肆力耕。所獲良有數。白稻盈廩載。赤穀旋春簸。好米輸官倉。餘粒償私負。十僅餘二三。糠粃相插和。聊用續晨昏。蓋鹽守常度。一身苦支撐。幸免求人誤。那堪麥未青。甲乙重編戶。立限開新徵。地丁勤勤措。不然鞭朴隨。將致傾家禍。短鑊與長鑊。都非養生具。薇蕨滿首陽。恐爲強者據。翻思古夷齊。枉自存初步。食粟亦何尤。忍死空腸肚。高雲堂詩集二

歲荒

獨立固無偶。空山長忍饑。如何官祿米。只用飽侏儒。噉雪寒添韻。燃松煖益脂。無聊重撥悶。徒倚復題詩。

道在稗穉重。年荒禮樂崩。嗟來如可拒。老至亦何憑。典庫書難質。官廚飯易蒸。饑寒相踐踏。日夕見屍橫。高雲堂詩集六

壬戌除夕

幸未填溝壑。猶憐絕後蘇。漫云欺不得。奈此歲將徂。檢囊無私蓄。敲門有宿逋。明朝事休問。今夕且支吾。高雪堂詩集六

釋大汕 離六堂集十二卷 離六堂近稿一卷

釋大汕。字石濂。吳人。曾燦以爲九江。沈德潛以爲嘉興皆非。本姓徐。或金或龔。則託言也。康熙初。主廣州長壽菴。奮飛來寺爲下院。歲收租七千餘石。下海與販。益稱富厚。工詩及畫。有巧思。製器精美。喜結納名士。嘗爲吳綺身後刻集。與屈大均齟齬。大均作花怪說詆之。事在康熙三十年辛未。後與潘耒交。耒再作書責其妄。并致書粵中當事。及梁佩蘭。毒罵大汕甚厲。刻爲救狂砭語。大汕以爲訛詐。亦刊布惜蠅草以相抵攔。事在己卯庚辰間。後大汕爲按察使許嗣興禽治。押發出境。至贛州。止于山寺。皈依者衆。爲巡撫李基和逮解回籍。死于常山途次。則甲申乙酉間事。據此集樓居漫興詩。有七十披緇老語。沒年當七十以上矣。所著離六堂集十二卷刻于辛未。削大均所作序。凡與大均投贈之作。亦去其目。絕交後所爲也。首附行脚。遺魔。放魔。供母。默契。遇異。演洛。觀象。說法。吟哦。遨遊。訪道。作畫。吹簫。推卜。釣魚。夢游。雅集。看雲。秣馬。賣雨。浣花。法起。臥病。出嶺。論道。傾衆。酌古。註書。樂琴。製器。北行。長嘯。凡三十三圖。一生行迹略備。皆出大汕手筆。槩刻精細。其詩清麗。大均以爲剽竊。借詩乞句。自昔有之。眼前景物。遣辭命意。暗與古合者。亦常有之。大汕固亦列舉大均詩之同于太白者矣。如以偷

論。則自非阿羅漢。誰能免于偷乎。唯集中河決行。地震行。勦『賊』行諸篇。悲憤乃同于儒生何也。雖六堂近稿一卷刻于壬午。老髦及之。不事別擇。精粗并陳。未免自累其書。未之起衅。或云致餽不豐。兩書二萬餘言。竟不憚煩。涉及彼教傳法之爭。可謂多事。皆刻入遂初堂集。後乃刪之。大凡紅襦蓄髮。竟體蕪澤。買優伶。作祕戲圖。祈雨止雨。出招帖曰。石頭陀有些風雨出賣。役鬼召魂。醫卜星相。甚至依附勢要。以財貨奔走人。交通海國。諸軼軌之事。務在驚世動衆。皆由才情奔放使然。而其敗也。則一財字害之。故方貞觀過長壽菴詩云。野性自應招物議。諸奴未免利吾財。可謂實錄。又云。唯餘詩卷長留在。還爾西來不壞身。亦惜其能詩也。大汕尙有語錄海外紀事證僞略錄不敢不言源流就正諸書。今皆未見。

勦『賊』行

鄉民攜老嫗。插標行市里。爲問此何人。答言是吾母。今我欲賣之。行徧無售主。咄哉大惡人。敢賣生身親。告君且息怒。我有下情陳。官兵來勦『賊』。民逃『賊』挺身。『賊』向官兵言。此間多頑民。某某須當誅。某某多金銀。某某好妻女。某與某爲親。欲索某之物。但着某之鄰。官兵聞『賊』言。此真奇男子。假以千把總。汝但作我事。髀骨肆鞭撲。弓弦勒拇指。一刀死亦休。欲死不能死。東家賣墳屋。西家賣妻子。獨我孤又貧。只有此老母。母因痛惜我。不忍我受苦。自言七十歲。還能裁與補。晨昏可炊爨。嬰兒得抱撫。不如賣老身。救汝脫刀斧。

離六堂集二

河決行

黃河水。勢無底。天爲頭。海爲尾。橫穿九塞透三關。須臾充徧乾坤裏。奔流不及去復還。翻空捲地直衝山。不知造化是何意。鴻濛開闢壬癸間。洪流淋漓之無比。偏與滄溟爭戊己。燭龍亂閃晴雨來。濁霧殷雷激岸起。起伏瀾淪風夾攻。幻化神奇克配功。星宿淵源分四瀆。包羅混沌出其中。循環逆順盤今古。崩雲裂日蒼虬舞。一望滌洄廣且長。淺深滾滾洗黃土。南都決滂擴江淮。北闕關山接齊魯。禹王則壩設徐州。戰國英雄割荆楚。立界分疆多少人。盡作秋風草上塵。相傳九曲通渠脈。消長遷流失舊津。舊津斜出滄州下。洋洋引入淮揚瀉。水貢諸番珍寶幢。陸行兩岸桃花馬。估客紛紛向薊門。征途曾未禁黃昏。隊隊車輪依樹轉。三里五里有一村。驛亭斥堠森嚴布。揚帆森森排雲霧。曉月遙聞蕭寺鐘。夕陽斜照王孫路。少婦琵琶挾上舟。旂飄八卦亂虹浮。乘涼仙吏白羽扇。守凍將軍黑兔裘。如此繁華數不了。往來光景諸般好。高吟才子席氍毹。壯士身輕試腰裏。鸞築蘆笳吹朔天。狼牙犀甲立塘邊。畫舫調箏向東粵。樓船擊鼓下西川。憶昔我從燕趙走。鶯聲啼徹春三九。陌頭寒雨濕棠梨。草際輕煙籠臥柳。正逢冰解響潺潺。金隄忽決幾處口。蜿蜒疾驟失高低。三十六湖涵霄斗。蹙社支祁更抑揚。七郡驚波愈發狂。督河尙書亟上疏。躊躇無策心皇皇。提取丁夫惟捲埽。短衫席帽埽師到。不訊河決從何乾。但戮牛羊爲犒勞。里長狂呼擾村廬。誰分貧富與鰥孤。富者免差仗阿堵。貧者難免捉當夫。破衣露肘還搜索。無錢使用夜長縛。縛纏手足似屠猪。忍凍吞饑怨命薄。奉公官長亦愛民。不信民間如此貧。朝廷公務不能免。小民冤苦向誰伸。勞

生長死欲逃息。公差捕夫如捕賊。及至捕來已半死。帶活連泥疊岸側。淒淒野哭度陰風。恐怕民夫不盡工。乃指高阜荒狐穴。言是何年古帝宮。又道左邊丞相府。吩咐丁夫猛挑土。此土挑去四五尺。以下盡是藏金所。一日挑得土一尺。乾糧食盡無氣力。暫倚鋤定喘吁。左右鞭撲如電擊。百計千方縛土牛。西風一浪走如瀾。道傍老人仰天歎。徒費民膏空點頭。白髮蕭蕭將八十。骨肉零丁依樹立。兩眉鑿鎖撥不開。見成南來向我揖。因言居此三百年。屋前屋後皆良田。耕鋤惟有田家樂。戶外不聞追呼喧。邇來門上頻追呼。生兒週歲要了租。舊丁比完新丁比。催柳飛綿又下蕪。從艱歷苦駕船難。怒濤出沒沈沙灘。急暫傾湫抵天末。成風巨舶觸飛瀾。催幫漕運連星疾。緊急軍需係非小。鼉鼉黑颶忽衝來。鬪纜拔錨檣欲倒。大王無端要紙錢。捏鬼端公跳過船。鍊火鳴鑼燒夾馬。目駭心驚風轉顛。大船千尺如覆屋。小船十丈亂相逐。赤浪滔天不見人。大船小船浪底宿。漁船蕩槳似鷗輕。慣駕漁郎速且平。往來水上拾遺木。小船重載不得行。汀洲幾處亂荆棘。中有廢屋碎瓦礫。大箇半爛鐵門圈。多是前人舊血跡。不見忠良朱大夫。盡心督理寸功無。哀告蒼天應念我。捐身跳入補皇圖。頃刻洪濤竟平治。可憐衙役苦無事。嫁女婚男望岸圉。生意年來何底止。終朝等不見河傾。衆口謦謦怨苦生。坐守莫如尋活計。急溜隄邊橫掘坑。波光蕩滌荻蘆老。旋風吹捲麥枯草。更向堅沙下鐵錐。只說河頭打水鳥。世事由來怕暗侵。鬼神莫測用斯心。纔說某處洪水漲。報到衝開幾丈深。成功固難廢容易。久之相續爲弊利。肆行科派何足言。國庫錢糧作兒戲。當事何由不念之。大禹治水今其時。今人若用前人法。因時制宜若無爲。永叔論說君不見。金陵捲埽工浩

瀚。但塞高湖引水還。強于歲歲修崩岸。物有本末事有由。用未諦當窮未週。人爲不平發之語。水若平時自不流。注之則非一式。觀其源。察其極。風秤分兩空按方。潮量尺寸月刻蝕。古今有數東場西長理入微。湖海無窮天搖地動機堪測。或從海嘯潮湧來。其勢洶湧不可塞。若填塞。勢反逼。無端水向平空立。到處飛騰張羽翼。隨流任性氣漸衰。中流布置分其力。或積淤泥豁漲穿。外河汎濫裏河傳。鐵石投溺失其重。水長泥短如何填。或因故道不通便。烽火桑田誰可辨。欲濬源流復舊河。河功未見害先見。要知決口大難收。土木無根水不留。浮沙急溜須生脚。狂瀾截斷永無憂。豈無憂。更可喜。不獨黃金用不多。省人氣力得所以。傾心吐膽報君知。一年工保五月起。一月工保十日起。離六堂集十一

地震行

噫吁嘻嗟乎。戊申六月二十六。江南海立山奔曾經有。己未八月二十八。塞北天搖地震從來無。據聞燕客說。眼見井泉枯。平空崩倒玉瓊朱璧之銀安殿。幾處傾翻琉璃瓊瓌之金浮圖。纔說通州忽然陷。又說漏乾九曲運糧河。起止不定水與陸。經過何處不啼哭。最是宛平縣慘傷。皇天后土竟翻覆。一響摧塌五城門。城中裂碎萬間屋。前街後巷斷炊煙。帝子官民露地宿。露地宿。不足齒。萬七千人屋下死。骨肉泥糊知是誰。收葬不盡暴無已。親不顧。友不留。晨夕啾啾冤鬼愁。西門向北有劈面酸風亂滾之黃沙。東門至南有撲鼻羶水泛濫之黑溝。從彼溝上來。耳邊如輾走殷雷。道旁無端裂大罅。白毛幾尺飛白灰。又有幾人平地立陷如泥井。張口有聲看無影。十里五里飢鳥相爭啄。認得一尸缺足及折脛。又有臭氣聚土射

人毒。頃刻土積成山化成瀆。山下現出火燒不著枯木柴。瀆中浮起鵝胗羊肚大肘肉。噫吁嘻。何太奇。天地之變尙不能保。世人孜孜名利夫何爲。說與海鄉人不信。十三年來兩地震。見聞坐臥神魂飛。六虛鼓點陰兵陣。幾夜昏黃斗柄迷。幾日高松看漸低。剩宅記得房門向。方隅不覺移東西。如此天不成天地不成地。世界翻覆等兒戲。不若搥碎補天石。踢翻星日月爲魅。爲人無黑無白。此生但願不見蒼生之苦厄。

離六堂
集十一

翁 澗 胥 母 山 人 詩 集 十 卷

翁澗。字季霖。吳縣人。世居洞庭東山。不謀仕宦。放情詩酒。自謂非仕非農。又自比諸葛。蓋有才不遇。狂言驚座。余懷遽目爲超然物外。以梅子真謝慶緒擬之。未得其實。然較脅熱奔走者。爲有間矣。撰胥母山人詩集十卷。載詩止于康熙三十七年。或卽沒于是年。集中有己未康熙十八年孟陬四十生日詩。至是年五十九。每卷之首。書名下署歸莊選。汪琬校。黃虞稷參閱。男格編次。洞庭翁氏累世貨殖。隆萬之世。以布及棉氈行銷宇內。致富百萬。翁氏旣衰。席氏始繼起。然澗猶好事結客。所居青草亭。最宜游矚。與當代名士若黃周星屈大均之流。多所往還。里中尤善金侃。侃爲歸莊女夫。因侃識莊。介于錢謙益。爲序其集。然莊沒于康熙十年。以後之詩。未及入目。何由選定。澗及二子格棻。皆以能詩喜藏書有名。唯少子學賈卽格也。竟能爲之刻集。惜編次無法。先後錯雜。使出諸格棻。當不至是。其詩初學晚唐。富有才藻。

中年貧落。盡鬻其產。豪情頓減。始醉心陸范。詩筆類唐。遂傷率易。兼不甚讀書。以貞觀之觀。作平聲。誤謂陸璣疏為德明所作。動貽訾笑。然嘯詠山川。留連光景。使讀其詩者。覺七十二峯之勝。如在目前。自亦足多。別撰有具區志十六卷。

山窗雜興 十首 錄一

看蠶時節鼓鼙聲。社酒盈盈粥面濃。但得時清官吏好。子孫世世願為農。胥母山人詩集三

今樂府七章 錄五 在見吳江潘吳二子。作今樂府百章。志有明三百年間故事。深得史家紀述之體。今其書已付祖龍。不復存矣。聞暇追做其一。聊紀妖祥。警諸樵歌牧唱。亦足備史氏雜俎云爾。

中丞持節守西粵。致君肝膽一片鐵。首項可斷舌不滅。丈夫為國靖妖孽。時不可為計已決。一死原為萬古設。君不見。瞿忠節。瞿中丞

合浦明珠採不絕。崑岡白璧採未竭。更有文章號淵藪。江吳人物推雄傑。文章貴顯身。士類期陶甄。主司何事殊聲價。題意先分富與貧。富盡發身貧下第。萬人失望風雲際。天子親開試士場。一掃從前制科

弊。科場 獄

窮措大。素放誕。注裨史。狎詞翰。縣令不可犯。犯上疑作亂。況當國殤時。撫軍疏背叛。十八儒生命似雞。罪及妻孥盡流竄。貴者免。富者泮。獨有宮牆坐塗炭。縣令旋遭天命誅。撫軍首被吳藩斷。秀才冤。眼前判。秀才 冤

颶風八月東南生。海艘飛集鐵甕城。一江阻絕。八郡震驚。羽書頻。將士盟。天子率師將南征。議者迂緩

虞無成。豈賊氣滿志易盈。歡呼縱飲樂事併。虎臣勇悍梁總兵。搗賊軍營。獨建勳名。鐵瀾

三藩存。天下兵。三藩撤。天下平。禍深只在滇與粵。晉安之機從此萌。西平侯。大周賊。斬宗祧。覆社稷。

威武羊城俱卵翼。腐肉如山犬羊食。三藩之罪三桂極。撤三晉母山人
詩集六

惠周惕研谿先生全集十一卷

惠周惕。字元龍。號研谿。吳縣人。康熙三十年進士。選庶吉士。散館以不習清書。改外補密雲知縣。卒于官。事具清史列傳儒林傳。無他傳志可以概其生平。故行事事卒皆不能備。撰研谿先生全集。其詩曰北征集。崢嶸集上下。東中集。紅豆集。鑿語集。謫居集。凡七卷。文二十六篇爲一卷。詩說三卷。詩文無序目。唯詩說有田雯汪琬序。每卷後有小門生王薛岐謹錄。字畫端楷。槩刻精工。惜傳世極稀。未易得其全本。周惕爲學師汪琬。別有易傳二卷。禮問六卷。春秋問五卷。經學名家而兼擅文采。詩奉王士禛之教。清詞麗句。出于學人。彌覺雋永。文亦雅潔。杜立德墓志。頗具史法。子士奇。孫棟。能傳其學。世稱吳門三惠。亦曰蘇州學派。

卽事四首

薦跪初嘗麥。三吳報有年。分明看奏草。敢信是虛傳。朱轍無憂歲。蒼生欲問天。如何千里外。赤地到江邊。

南國連年旱。今年旱可憂。望雲初自夏。不雨又經秋。糠覈三升食。苻嘗一歲收。紛然指官穀。好費廟堂謀。

經緯思吳越。從來困踐更。無家幾蹈海。有地尙偷生。根本朝廷慮。艱難父老情。暴巫真下策。萬一是寬征。

觸事忘身賤。多言任口窮。歲荒愁客路。民病念江東。短策何時上。高天詎易通。淒然憂國淚。只洒布衣

中。研谿先生詩
集北征集

春日有感四首
錄三

漫誕風光最可悲。旅人留滯竟何爲。晴雲細柳潛行地。羌笛關門倚笑時。鞦韆放金毛圍口獵。埽調銀面紫髯騎。升平年少嬉春好。寂寂孤懷有所思。

聞說樞星直地維。火延白鶴更非宜。少君五際書曾驗。子夏三陰論勿疑。今日春農猶望歲。可憐旱母又須時。野人忠愛常多慮。無事憂天實在斯。

須女熊熊影動搖。三吳災祲未全銷。偷生只合思平歲。忍死惟知待聖朝。賸有麥奴來雀鼠。無多桑柘遇鴟鴞。何時一札從天下。特爲流庸著六條。研谿先生詩
集北征集

贈吳縣王明府四首
錄二

錢糧公私命。胥吏營爲窟。於此長子孫。紛紛誰能詰。民逋任意增。租籍隨手剝。私求巧爲文。乘間乞筆

札。有時聽其請。百道出剽奪。窮搜盡雞犬。乃用一囊括。斂怨與上官。安心得乾沒。迄乎官員殿。歎息徒內熱。絕此固不能。掾之豈無術。昔人有明訓。省事勵精率。十人羣樹楊。不敵一人拔。君應誌我言。隨事施明察。

吾鄉無逋吏。征稅勿太亟。官私仰田收。外此何蓄積。入春麥未昌。到夏苗未實。非時下催符。筋力豈能及。更值連年荒。田無一錢直。持男換升斗。忍死不敢喫。揮涕送官倉。低頭受笞責。考成固堪憂。性命亦可惜。何如先與期。寬然使爲力。不見內史民。負擔輸租入。研黠先生詩
集北征集

李 果 在亭叢稿十二卷詠歸亭詩鈔八卷

李果。字碩夫。號客山。又曰在亭。晚更號悔廬。長洲人。家貧。年十四棄童子試。入官舍傭書養其大母。及長以文譽應督撫之聘。爲掌奏記。爲人特立獨行。有古烈士風。陳鵬年官西安知縣賞其詩。求之未得。迨先後除江寧蘇州知府。皆以事劾繁。果乃走數百里詣之。事解始歸。鵬年總督漕運。通問而已。沒後作陳恪勤公傳。彙序其全集。最後客揚州巡鹽李煦。述懷詩所謂言歸復北渡。飄然去揚州。繁花詠鈴閣。春風馳紫駟。八載不覺久。佳境常淹留是也。煦遇之厚。然館脩外。不妄取。煦敗籍沒。追欠帑。多所牽連。果獨獲免。然自是遂杜門不復應聘。以賣文爲活。甕澆屢竭。晏如也。世頗疑鵬年名臣。宜有以報之。若煦與曹寅父子。足當古之佞倖。其敗也以黨于廢太子。特借逋賦爲題。禍且不測。奈何與之比。集

中生別二首云。回溯三載別。春風盈園扉。又云毋爲空傍徨。出處期努力。疑煦事解後與果重晤時贈別之辭。果意在國士待我。國士報之。蓋抑塞不平之氣。激而出此。未必中道。然非假以立名則審矣。卒于乾隆十五年。年七十三。事具蔣恭棐所爲傳。清史列傳文苑傳李果傳外誤不足信著在亭叢稿十二卷。詠歸亭詩鈔八卷。果屬文雅飭。生雖較晚。喜與遺老游。熟知舊事。傳記之作。多足備參稽。沈玉文傳。楊忠文先生血衣記。天地間有數文字也。呂道人桴菴傳。謂道人名崧。字貞九。號桴菴。婁縣附學生。甲申之變。悲號不食。棄妻子入道。自號赤隱子。康熙三年卒。年五十四。世頗傳其仙去。是卽錄劉若愚酌中志以爲官吏者。世不悉其人。得此可以稍知始末。叢稿出果自定。詩自芟其十之五。存七集。曰石閭者。早歲居石里所爲詩也。曰竹亭者。客揚州作也。曰溪堂者。買屋葑溪紅橋。奉老母以居。雖往來江都。亦以溪堂名也。曰萊圃者。既賦悼亡。重歸石里。割李氏之園。灌畦養母。取萊子之意也。曰蒿廬者。從萊圃移家于此。偶有作也。曰東樓。曰舫齋者。橫經城西之地也。身後。沈德潛爲刪存四百一十五首。果與德潛同出橫山葉燮之門。齊名稱沈李。然德潛制行不足以望果。詩文疏陋亦相去遠甚。集中不朽之作。必有因忌諱而刪者。感舊詩十三首自注甚詳。王尙書昊廬云。甲寅乙卯。三逆叛。諸將有略婦行聞而載以去者。公捐金贖回數百口。馮仲子服之云。名行貞。常熟人。父班。兄行賢。皆以詩文著名。君長于弓馬。詩畫其餘事也。當滇逆叛時。曾佐某將軍幕府。出師有功去之。又爲客報讐。槍法爲海內第一。呂處士逸田云。名熊。崑山人。與吳喬修齡友善。頗悉明末事。于忠襄公嘗稱其經濟才。久客督撫大吏幕。于吳門梅隱菴購得一椽以居。子孫

皆物故。君年八十二卒。卽葬于菴旁。著有詩文稿。及女仙外史。是皆與果聲氣相求。亦足以知果矣。果詩筆行事及喜言明季事。略同屈復。宜可并論。而兩人不相識。

舊邊八首

有序。庚寅秋。偶與同學諸子。論唐人征戍詩。因假有明各邊爲詩八章。我國家定鼎以來。萬方寧謐。不復見征戍之苦。考八邊事實。知今日太平景象。遠邁千古矣。

薊州

永樂中徙封寧王於江右。分其地爲三衛。以處兀良哈。後三衛盡失。退城獨石。○三衛朵顏。泰寧。福餘也。

鎖鑰幽燕壯九重。薊州形勝枕居庸。空勞獨石爲屏翰。誰識寧封屬要衝。路扼龍岡聞夜角。山通虎谷入邊烽。何人尙話宣皇日。萬騎雲屯出喜峯。

宣府

葉輿和大寧。則開平不能獨守。

山陵近接拂雲堆。天際偏驚響策哀。一片旌旗屯上谷。三秋鷹隼下高臺。芻糧繼運經時竭。士馬空懸幾日回。不信開平難獨守。竟無人有靖邊才。

大同

正統後。東勝鹽州不守。

雁門自古雲中地。渺渺川原列戍營。割險每憐東勝失。沿邊空倚麥河橫。春風草綠明妃塚。夜雪烽高馬邑城。深喜將軍能備敵。周復塞垣堅築鎮威平。

山西

偏頭寧武雁門爲外三關。明初設大將於偏頭。嘉靖中。撫臣請移於寧武。○山西撫臣春夏居腹裏。秋冬居邊。視他鎮爲勞。

三關高峙作金湯。西盡黃河東太行。老馬飲泉知內地。征人橫笛怨嚴霜。兵從胡峪穿垣出。水注龍池繞塞長。見說偏頭當要害。莫因腹裏廢隄防。

榆林 舊治綏德。成化間徙鎮榆林。築邊牆。連墩臺。橫截套口曰夾道。○榆林不毛之地。耕牧樵采。皆資於河套。吉囊深入。河套遂失。

千里墩臺朔漠連。黃河三面抱銀川。春回沃野堪栽粟。月上紅城每控弦。鎮徙朔方開夾道。堡橫套口截窮邊。吉囊何事偏深入。到處哀鴻劇可憐。

寧夏 有漢唐二渠。○西北抵賀蘭山。山後羽騎出沒。宜於花馬池建堡。

漠漠風沙拓跋居。夏州遺址近何如。紅鹽名地互市通諸口。春隴屯耕匝二渠。將士彎弓秋射獵。營門飛羽夜傳書。但城花馬池邊堡。山後誰窺實與虛。

固原 靖鹵一帶。每歲黃河冰合。千里皆如平地。

積石雄軍列幾層。諸羌門戶恣憑陵。東連寧夏為唇齒。西倚蘭州作股肱。餉之總因鹽政弛。民罷空議戍樓增。年年徵調將何補。況有黃河易合冰。兵餉取給於鹽課。自鹽池徙而餉益匱。固原每歲調西鳳臨鞏兵防守。凡四閱月。芻糧在本兵額內支給。

甘肅

牛羊四驛草蕭蕭。宛馬嘶風慘不驕。哈密入藩嘉峪重。燉煌屏棄黑泉遙。黃榆古戍愁征雁。大雪山空山想射雕。險絕西羌中路斷。將軍誰是霍嫫姚。明初以哈密為甘肅藩衛。洪武中。宋國公下河西。以嘉峪關為限。遂棄燉煌。詩鈔二

憂旱

仲夏擬年豐。孟秋遭旱苦。相去兩月間。災異真罕覩。去冬天不冷。入春寒莫禦。上帝明垂戒。人事多違迕。先兆非不知。預待計輒阻。炎熇方鬱行。田廩變焦土。禾頭裹青蟲。六旬竟不雨。月閏今已盡。詰朝即

處暑。使君負經濟。憂國心自許。暴巫則奚若。鞭龍亦可補。胼胝歎老農。枯槁勞兒女。草木半黃落。瓜蔬亦饑餒。閉籬穀已貴。流氓滿吳楚。山東河南被災者常恐探丸徒。屯聚在伏莽。鄙夫困蓬蒿。觸境俱齟齬。長歌雲漢詩。如焚切肺腑。願言賢有司。繪圖告當宁。詠歸亭詩鈔四

吳士玉江左十五子詩選

吳士玉。字荆山。吳縣人。康熙四十五年進士。改庶吉士。授編修。官至禮部尚書。雍正某年卒。年六十九。著有蘭藻堂集。

延熹華嶽廟碑歌

華碑漢隸推第一。芒奪少吳金天晶。東追嶧碑南灼燼。光價鼎立齊崢嶸。商丘先生雅好古。得此善本識鑿精。紙新字完少缺畫。僅缺十嗟余一見心魂驚。此碑刻自弘農守。袁遂孫接迹勞經營。延熹八年斗建巳。月廿九日告厥成。郭香察書紛聚訟。古碑謂不署姓名。或云中郎亦罕據。筆蹤驚絕要莫京。虎螭攫擎鳳飄舉。長翎修鬣摩鵬鯨。規連珠樹矩洩玉。方流圓折隨縱橫。按以隸法彙衆妙。欲名一體誠難評。祖廟上遡籀斯派。苗裔下傳潮陽冰。熹平石經尙晚出。堪與追逐稱弟兄。桓靈敗德不足數。摩挲墨妙聊娛情。吾聞太華削成五千仞。河神手劈垠崖崩。雲泉天磴闕金液。乘龍戲博多仙靈。此碑歷千五百載。呵護應煩敕六丁。有明嘉靖遭培棄。可惜神物歸杳冥。成毀相因固其理。世事反覆誰能憑。不見嶧山之碑焚野

火。胸臆迹祕涕泗零。公得此本真希有。一字便足輕連城。江左十五子詩選八

石龐 天外談初集四卷 晦村初集四卷

石龐。字天外。號晦村。太湖人。早慧。九歲能詩。弱冠成天外談初集文二卷。詩詞各一卷。有康熙二十六年姚文燮序。亟稱其才俊。晦村初集刻于三十五年。則二十七歲以前所作詩文。胡任輿序謂其文絕似聖歎。詩似文長。充其量不過爲司馬揚雄。至漸進于道。而以班馬之才。韓蘇之氣。發程朱之理爲善變。虛辭相擬。無異瘰語。蓋龐質美未學。以才子自命。力摹尤侗西堂雜俎。爲其支流。初談佛乘。繼又折入理學。總爲乞食計。詩文尙未入格。賣衣一絕云。昨日無錢已賣被。今日無錢又賣衣。而今只有此身在。筋骨不知賣與誰。一寒至此。而刻書有資。疑其言不誠也。

秋還

禾黍秋還已滿場。一家男女笑相商。馬牙糯熟酒新綠。魚子飯香粟正黃。笠作蒲團隣拜社。松炊烟火婦熬糖。牆東坐看閒牛睡。幾處農歌鬧夕陽。天外談初集四

八月潮作海民盡損予同朱肩吾往觀遂和其韻

殘窳荒墟不忍過。汪洋白浪欲如何。迎潮矮獺啣新鬼。失路歸魂問碧波。萬里天青風冷日。一家夢合水如羅。生靈盡化冤禽去。啼上三山血淚多。天外談初集四

葉方藹 葉文敏公集十二卷

葉方藹。字子吉。號初菴。崑山人。順治十六年進士一甲三名。授編修。官至尙書銜刑部右侍郎。康熙二十一年卒。年五十四。諡文敏。撰葉文敏公集十二卷。爲文七卷。詩五卷。四庫總目有方藹讀書齋偶存稿四卷。有詩無文。稱其未遇時有觚齋集。登第後棄之不錄。此集或後人所編。與詩並存。方藹詩文皆有法度。視同時張英陳廷敬。似尙過之。位與年不及耳。提要引王原祁序。稱方藹詩宗蘇陸。文宗眉山。感舊集小傳引此以爲王原哀三公詠之語。此本無此序。王原爲方藹汲引。見徐乾學王令詒制義序。檢學菴類稿哀三公詠作詩法傳夔州。蘇陸屬其植。提要及感舊集。皆誤。李光地榕村語錄續錄。謂方藹與徐乾學至親而不相能。聖祖問湯斌徐乾學優劣。方藹右湯。乾學聞之大憾。百計營構。方藹將自掌院大拜。忽出爲刑侍。憤恚以卒。按乾學之子樹穀。娶葉方至女。見乾學所撰先府君行述。故云至親。今此集有樹穀字說。及乾學父行狀。母志銘。憺園集文字無及方藹者。光地之言或當有據。葉方恆與顧炎武爲仇。而方藹加敬焉。其兄弟之不相同也若此。

咄咄行

咄咄復咄咄。空城白晝生荆棘。前有猛虎。後有長蛇。磨牙鼓吻爭人食。我欲射虎還斷蛇。手無利器空顏澁。歸來故里不見春。但聞天陰鬼哭聲啾啾。吁嗟乎。三吳百萬戶。東南自古稱雄國。縱橫白骨高于山。

民命本輕奚足恤。只愁公家重財賦。縣官租稅那收給。君不見。大星芒鬣光盈尺。海底九鳥朝並出。魚鼈曝死蛟龍泣。天明日夜飛霹靂。俯瞰下土血殷赤。真宰之怒猶不息。葉文敏公集

石城謠

石頭城下清霜路。黃蒿如林漲烟霧。此地行人來往稀。寒鴉晝嘯枯桑樹。鬼炬千羣大似輪。金銀宮闕化爲塵。冤魂夜半相逢哭。聽得聲聲怨皖人。葉文敏公集

盛符升 誠齋詩集八卷文集一卷

盛符升。字珍示。號誠齋。崑山人。少工舉子業。師事張溥夏允彝。允彝死事。符升爲之營葬。以此著稱于時。康熙三年成進士。官內閣中書。以練習當代掌故。荐修大清會典。擢禮部主事。考授廣西司御史。未一年。放歸。王士禛爲作詩序。稱其一蹶不振。浩然歸臥乎笠澤之濱。其自爲詩。則曰誰將短札告臣忠。引却平交入叢中。天外逸鴻悲雉兔。廷前劾鼠畏條籠。不識所指何事。符升與徐乾學同年鄉舉。三徐往來踪迹素密。乾學元文兄弟。與明珠余國柱角黨相爭。接踵引退。符升或受其牽連。未可知也。生日漫成云。幾番南北三千里。一去春秋六十年。又云。杞人妄欲謀陰雨。重向承平憶後先。自注。時方聞滇警。知是康熙十三年所作。庚午除夕云。憶列諸生庚午秋。重逢庚午始歸休。前一庚午爲崇禎三年。下推至康熙二十九年。已年七十有六矣。撰誠齋詩集八卷。分慎墨堂選集。國雅選集。南芝堂雜詩。河汾集。容臺

集。贛石集。遂初集。山居集選。文爲僅存集一卷。賦三首。奏疏二首。詩止于康熙三十一年壬申。或卽刻于此時。徐乾學稱其松塘行。吳趨行。江心寺。頌忠烈也。闕山曲。行路難。感時事也。崔鎮歸仁河上諸篇。歎民力也。其他送遠贈別之作。並指事述情。文不虛設。今諸篇大抵皆存此集。王士禛精華錄託名符升及曹禾撰集。世多不識符升本末。蓋由未睹其集耳。

河上雜言八首

久矣悲鴻雁。誰堪問麥秋。飄零隨遠道。涕淚入孤舟。壁馬年年事。河淮處處憂。却憐長算少。民命倚陽侯。

淮河重湖接。南行勢欲孤。射陽分壁社。芒稻引荼莢。疏鑿何年改。滄桑自此殊。荒烟迷大壑。無復舊江都。

再見重隄潰。荒原捲怒濤。補苴由吏拙。荷鍤總民勞。七載常憂歲。三春每病漕。茫然徒悵望。決塞計誰高。

父老思吳守。隄成萬曆初。兩河分蓄洩。一徑引舟車。版築從人異。金錢逐浪虛。白公如可作。巨浸亦通渠。

清江爭一線。去路半泥沙。委失源誰瀉。支分徑轉斜。雲梯難赴壑。星海莫乘槎。但說隄防事。宣房起漢家。

憶昔登臨日。初看春錨成。寧緣河伯怒。坐使大堤傾。捲埽憑枯柳。團沙作化城。經營須巨眼。千里問縱橫。

善徒仍河性。由來慎五防。掃灣初弗鬱。伏溜更禁當。風雨謀常切。春秋勢莫張。畫脂兼聚米。救敵總周章。

淮口河從會。何堪各問津。沼吳還潰楚。南汛且東淪。千里愁懸未。羣工媿負薪。朝宗思故道。留以慰楓

宸。誠齋詩集
墨堂選本

南征二首

丹檄俄傳赤羽飛。邊聲乙夜警垂衣。但知歸馬謀應切。誰料亡猿事已違。杯酒從容良不易。淄青倔強竟安歸。試思几杖恩深處。頭白何堪發禍機。

太白秋明井鬼旁。兵占早已在炎荒。養成歲月營三窟。峴負西南擅一方。莫遣金沙連蜀漢。豈容清浪接湖湘。由來制勝資全策。銅柱依然□□陽。誠齋詩集
墨堂選本

關山曲

關山渺何處。二酉控潭陽。清浪襟喉重。沅江引帶長。複嶺重岡誰自棄。橫流一潰悲湖湘。君不見。五溪學士留銘地。至今溪水猶煌煌。

關山渺何處。南服限金沙。瀘川渡洱海。五道屬三巴。在昔取滇多以蜀。於今蠻觸自爲家。君不見。漢相

平南斷九嶺。豐碑遺廟透天涯。

關山渺何處。劍閣倚雲開。棧穿牛峽去。江趨魚復來。陽平北引褒斜道。赤甲西連灩澦堆。君不見。八戰八克有司馬。建武入蜀何奇哉。誠齋詩集 墨堂選本

松塘行

甲寅春。與雲間董子令士解后燕臺。出畫卷命題。乃我師考功夏先生遺照。懷然掩泣。感而賦之。松塘者。乙酉秋先生自沈處也。

松塘之水高於天。浩氣凌虛徹九泉。松塘之水烈於日。靈光耿耿孤忠出。嗟哉四海方橫流。江湖騰沸悲神州。門牆國士灑碧血。謂聖階支撐一木難再謀。遺臣南拜趨大壑。詞成絕命還優悠。至今清光照江水。瑩

然大節垂千秋。媿我當年曾問字。倉皇峯泖時趨侍。痛哭祇為弱子哀。何堪一旦皆塗地。存古以吳帥亂亦死哀此孤雛良自苦。巢傾誰復持門戶。故居莫返魂莫招。凄然飲淚封坏土。辛亥春。余與元仗葬其諸喪。忽從董生拜遺像。冠裳彷彿依函丈。攜取丹青照燕市。懷忠祠畔同瞻仰。瓣香還自憶松塘。天上精神日月光。終古江流悲且咽。湘

蘭沅芷長芬芳。誠齋詩集 墨堂選本

吳趨行

送徐勿齋先生葬

吳趨憶誰家。家在燕山麓。忠魂萬古存。聲響留林木。吳趨憶誰家。家在胥江濱。靈威挾巨濤。大海有歸神。今古遠相望。烈士慨以抗。北面稱遺臣。自投虎溪上。溪上月常明。皎皎見平生。不照道旁土。獨照溪水清。吁嗟乎。松塘之水方冽冽。夏考功先生練川之水碧於血。侯黃兩先生當年生死皆良朋。千秋大義無明滅。

誠齋詩集 墨堂選本

行經歸仁堤

鍾吾南去路。龍臥長隄裏。誰貽淮泗安。障河使東指。我從白洋來。珠山窮其趾。始信建堤人。拱衛良有以。茫茫歲月深。中道日以圯。行人立渡頭。旁皇不能已。欲渡愁風波。堤前淚如水。誠齋詩集 慎墨堂選本

田家即事

河淮間農作器用。迥異江南。故紀之。

江南川陸盡。平野相城西。隴上時逢鹿。蒼頭每蓄雞。有期方入市。無月不扶犁。土鏗隨人住。征車且暫棲。

築場皆五月。有麥卽三秋。捷向枝頭取。輕將網子收。新炊方列肆。晚種復登疇。宜黍還宜菽。西成可再謀。

大抵茅爲屋。多將土作床。家常供秬黍。生計問牛羊。截柘墘農器。編荆當女筐。村村高建堡。眺望重隄防。

聞說逢除夕。家家嫁娶忙。元宵打虎謎。十月賽牛王。麪繭祈蠶早。針符禁蠛藏。佳辰當上巳。人戴菜花香。誠齋詩集 慎墨堂選本

山蠶行

吳人愛蠶如好女。煖房拜簇防蠅鼠。三眠四眠不得閒。何似山蠶生野墅。蛾大如蝶生五色。林間放子子繁殖。春樹青青秋樹蒼。椒椿柞葉皆堪食。柞葉繭。大如丸。椿繭小。椒更難。別有小繭生林麓。樵夫採得

從深鬱。大繭不如小繭好。春繭不如秋繭老。一年兩度入家機。不用奩藏并車線。蛾生繭破乃成絲。疊將四五無參差。削木爲竿不盈尺。冒繭撚來絲自垂。絲成織就堅且樸。一椒二椿三爲榭。蒼然深厚耐風霜。寧數江南綺與縠。誠齋詩集續墨堂選本

甘泉道中喜雨

三吳滌滌連三伏。桔槔宛轉焦難沃。邗江西去出平山。地赤草黃民更酷。北風生涼秋雨來。停車適在甘泉麓。願掬此泉散九天。灑作江干玉與縠。昭蘇且暮總天心。依依南望看雲族。誠齋詩集河汾集

行路難

悲降人也

行路難。何漫漫。前有虎豹之深谷。後有蛟龍之危灘。此足一失不再購。誰堪首鼠持兩端。君不見。漢家七國皆顛躓。相從白頭曾舉事。卓然自守唯衡山。孤貞特賞何其智。君不見。淮西軍聲震鵝鷺。恆鄆連棧空反覆。紛紛叛服竟安歸。矯矯常侍登公族。吁嗟乎。長平故壘多白骨。蟲沙盡是新降卒。心死身生亦死。況復危機動飄忽。可憐虎俚爲虎驅。驚魂懾息鬼亦愚。鷹眼依然飽且去。亡猿連臂呼其徒。行路難。嘆岐路。此生得失俄頃間。一跌莫挽將誰誤。誠齋詩集容臺集

徐乾學儋園文集三十六卷

徐乾學。字原一。號健菴。崑山人。康熙九年進士及第。授編修。官至刑部尙書。卒于三十三年。年六十

四。事具清史列傳大臣傳。有憺園集三十六卷。凡賦一卷。詩八卷。文二十七卷。乾學文辭淵雅。學有本原。其才不下潘耒。使不爲達宦。或更足取重于人。光緒中。崑山知縣金吳瀾喜刻書。得改本憺園集爲之重刻。云集初刻成。乾學即沒。喪中以數十部贈人。或有言其非者。祕不肯出。故流傳不廣。觀改本皆措辭不得體。或用事有誤。他無忌諱。然即此足知當日徐氏危疑之狀矣。乾學兄弟皆綴巍科。寢寢嚮用。舅氏顧炎武學行爲海內所推。乾學爲之徵書。緩黃縣之獄。辭鴻博之荐。籌南歸之計。雖由母命。亦實藉其餘光以收士類。自順治中禁社盟。士流遂無敢言文社者。然士流必有所主。而弘獎風流者尙焉。乾學尤能交通聲氣。士趨之如水之赴壑。同時宋德宜葉方藹不能及也。余國柱獨與之爭。遂成怨府。李光地但欲抑之使不得速化而已。本附明珠高士奇以進。二十四年。召試翰詹。乾學首列。入直南書房。翌年由內閣學士擢禮部侍郎。以至左都御史。力倡風聞言事。蓋聖祖知其得士。欲倚之爲搏擊之用。清初政歸八旗巨室。順治一朝。政情杌杌。所由來也。康熙初元。四輔臣專政。賴索額圖以覆之。索額圖專橫。乃以明珠分其權。明珠富可敵國。與余國柱表裏爲奸。故授意乾學士奇。嗾郭琇劾罷之。二十七年。乾學主會試。晉刑部尙書。復令琇劾士奇及王鴻緒。未幾乾學亦牽涉張濟案解任。留京修書。旋遭許三禮嚴劾。乃聽回籍。猶賜光芒萬丈扇以寵其行。明珠既斥。天子始得盡攬八旗兵權。惡乾學反覆。必欲痛抑之。先已令傅拉塔總督兩江爲督過地。傅拉塔遂劾乾學及其弟大學士元文諸不法事。元文解任。乾學奪職。自後數年間。日有告訐徐氏者。明珠則已復職矣。三十三年。元文已前卒。有詔取乾學鴻緒士奇回京修書。乾

學知有使者來。而不測禍福。遂卒。蓋忤死也。文士多作詩哀思之。鮮有刺譏者。不知其何以得此。倘所謂飢者易爲食。寒者易爲衣歟。

懷友人遠戍

詔許寬恩徙朔方。那堪國士鎖銀鐙。虎鬚校尉鞭車側。繡帽將軍踞道旁。馬向千山關月白。雁飛萬里塞雲黃。龍興事業伴豐沛。弔古應悲舊戰場。

邊城日日聽鳴笳。極目□□道路賒。三變貉裘猶未煖。一生雪窖便爲家。晨看軍府飛金鎗。暮向溪山引犢車。千載管寧傳卓帽。難從遼海問生涯。

已甘罪譴戍荒谿。又發家人習鼓鼙。孟博暫能隨老母。子卿猶得見生妻。鶴鴿原上聞猿嘯。雞鹿山前聽馬嘶。夢裏依稀歸故國。千重關隘眼終迷。

十載西園載筆從。于今慘戚苦無惊。遂令文士虛江左。忍見諸公徒上庸。患難誰能存李燮。交遊無計比何顛。可憐逐客無消息。盼絕金雞下九重。儋園文集二

徐駿右帆軒詩集十一卷續集二卷

徐駿。字觀卿。號堅蕉。康熙五十二年進士。選庶吉士。唐孫華東江集有贈徐觀卿太史詩。謂駿爲乾學少子。壯年登第。二句而歸。頗事撰述。崑新合志云。徐乾學五子。樹穀炯樹敏樹屏駿。駿天才雋逸。坐法

死。駿妻顧嗣立兄之子。嗣立自撰年譜鈔本。駿名字凡兩見。一作徐吉士觀卿駿。一作徐堅蕉駿。刻本改作徐吉士觀卿。余堅蕉駿。知有所諱。則坐法必有其事。或在雍正初年。所撰石帆軒初集十一卷。有庚寅康熙四十九年徐秉義序。稱其詩頓挫瀏亮。古體尤適邁。詩至壬辰康熙五十年止。當刻于此時。續集二卷。皆乙未丙申康熙五十四五年所作。似爲未刻殘稿。集中詠史云。伊霍羣推社稷臣。金滕何術信秋旻。一醉若還移此座。宣麻定策是何人。白頭憑檻哭哀哀。草澤驚魂招不來。燕子雙飛環翠輦。哺兒只在望思臺。讀霍光傳云。戈鉞雪色守侯門。按劍擎天賺後昆。誰料當年王莽意。還疑孺子作曾孫。辭意甚晦。疑爲廢太子作也。續集詠蛛網云。人間除却靈蠶種。才說經綸是網羅。題汪中允香山圖云。憑君躑躅伊川上。還有中原讎賞無。上巳日率爾成篇云。一自北平開帝座。沙寒水淺集鷗鳧。語語刺讖。欲求幸免難矣。錢泳謂駿以明月有情還顧我。清風無意不留人句。爲怨家所告。誅死。其詩劣甚。必非駿作。蓋傳聞之誤。

避吏行

出門避吏去。中夜辭爺娘。回頭別寡妻。無良累糟糠。老親牙齒落。弱子才扶牀。千言訴不盡。兩淚流縱橫。愁逼山雞曉。零露行倉皇。珍重倚門別。寡鵲守空房。竹筥羞復啓。膏沐爲誰救。愁傷白髮意。歡顏慰高堂。力能舉石臼。無米心徬徨。豪吏持府帖。丁稅急火湯。里正聲嚶諄。欲避徒惶惶。孝婦跪致詞。翁姑心膽裂。老病成膏肓。天涯有孤客。飢羸終仆僵。煩君謝長令。愷悌格蒼穹。掉臂吏轉怒。形勢猛虎狼。牽妻執狂狴。賣子未足償。文里女貞木。崔嵬望夫岡。匪席不可卷。蘭萎有餘芳。黃金買田宅。翻爲子孫殃。

凋世重軍賦。貴冑罹桁楊。整髻拜舅姑。銜恨同北邙。夫子辛努力。仗劍行康莊。休遇里閭客。音書裂中腸。風塵難識面。有子愁披猖。呼天自絕吭。繡帶結桐棺。官吏富藏龜。陰禍不可禳。東海致旱涸。流毒在

一方。石帆軒
詩集二

愁坐吟

愁坐復愁坐。飄風蕩秋柳。場圃積流潦。秉穗披隴畝。四野雲霾合。弗屋徒搔首。機聲雜簷溜。村落無春白。新穀半輸官。一飽詎能久。誰云天聽卑。嗷嗷望升斗。石帆軒
詩集三

土城

栗烈暮坂霧。傾圯土城垣。駐轡待我僕。口噤涕洟瀾。濼溝冰耀色。棘林日餘昏。孑孑負糧子。劣衛鞭不前。牆頭老兵立。未暮先上關。城中三百戶。茅屋無炊然。西巖蔽陽曦。朔雪摧心肝。當此凋嚴節。顧我屯悴人。惘惘仗一劍。蹙蹙過空邨。結髮遊齊魯。挾策來燕雲。曉月馬上飛。清霜樹下繁。沙礫變冠玉。關河輕席珍。但苦別離遠。未識感遇恩。土城鏡古跡。半沒寒蓬煙。磨崖守山靜。鴻鴈悲路難。欽翼思冬藏。伏草羨泥蟠。石帆軒
詩集三

權歌行

秋陽杲杲晒魚網。豁達長風來莽蒼。妻採菱芡歸。小兒戲木壤。無事盡頭睡。四面枯棹響。南浦捕魚昨夜多。爺孃進酒聽權歌。去年大水田無禾。雨笠煙蓑遍五湖。老小相看顏色醜。辛苦田家奈若何。石帆軒
詩集四

逃荒行

攜釜鑿。出空城。嗷嗷百口。飢不成聲。茫茫風塵欲何之。舊聞江南膏土宜畬。白雲森森山路長。樹衣草實爲行糧。忽見南人淚如霰。纍纍北渡黃河岸。逃荒行。千里羈魂今合并。吳音齊語兩不諧。鵠面鳩形略相似。可憐街吏橫來驅。不如宛轉鄉井死。石帆軒詩集四

官伐木

官伐木。榆錢稗子煮官粥。忍飢無力遭官扑。妻兒揮汗各努力。斧斨丁丁樹血漉。官伐木。涼風不來日正酷。道上行人怨三伏。叉手立馬前。爲君道去年。長林豐草鳴螿蟬。解襟息騎心悠然。自從餓虎踞山阿。青衫席帽稀來過。此去近城隅。休傳伐木歌。府君篋輿滿階下。喃喃諄語問吏訶。石帆軒詩集五

徐元文 含經堂集三十卷別集二卷附錄二卷

徐元文。字公肅。號立齋。榜姓陸。順治十六年一甲一人登第。授修撰。官至文華殿大學士戶部尙書兼管翰林院事。卒于康熙三十年。年五十八。事具清史列傳大臣傳。及韓爌所撰行狀。熊賜履撰墓志銘。元文及兄乾學秉義先後以文采掇巍科。嚮用于時。世稱三徐。乾學傾心以延後進。東南文學之士。思自見者莫不依倚之以取功名。爲衆所奉。號爲黨魁。元文久主史局。亦留心人才。嘗薦先朝遺逸給事中李清主事黃宗羲。又鴻博未與試者。曹溶汪懋麟黃虞稷姜宸英修史。皆善能窺伺人主之意。以議論取重。因得

操縱時局。獨秉義謹長無所營。康熙二十七年。乾學被密旨。嫉御史郭琇劾罷大學士明珠余國柱去位。旋乾學以他事解刑部尚書任。元文得正授席。于是副都御史許三禮以理學自居。遂劾乾學解任不歸。共元文納賄。而舉秉義持正可召用。乾學放歸。二十九年。明珠外甥兩江總督傅拉塔列款糾乾學元文兄弟子姪豪橫鄉里。事皆有據。元文原品休致。舟至臨清。權關者發視箱篋瓶罍無遺。冀驗其貨賄。竟無所得。乾學非能清白自矢者。特狼籍不如人言之甚。身後藏書斥賣殆盡。諸子困窮。非虛飾也。報復者修怨未已。元文乾學先後以憂死。黨局始稍結。元文撰含經堂集三十卷。別集二卷。附錄二卷。與乾學懽園集俱無人爲之作序。蓋憂危中慮爲人執持。刻成不敢公然行世。秉義培林堂集。始終未刻。僅流傳寫本。亦有所誠。尤侗謂元文前集被焚。後集未刻。或徐氏後人託辭謝客。或所焚者即未刻之第十六卷賦也。詩文不如兩兄博瞻。詩十五卷。起登第。迄罷官。奏議六卷。察除叛藩虐政疏。推廣皇仁疏。俱可考見當時政情。敬陳粵中閩中滇南民困三疏。謂粵市舶稅額二萬。海禁後。外舶至澳門。藩下及粵民常往貿易。又謂平西曾圍雲潑二府及附近衛所地。皆可補舊聞。餘文以李映碧先生墓志銘爲有關係。

送伯兄子假還里二首

春日既過半。餘寒凜未已。綺樹無抽條。鳴禽鮮悅耳。況當鴈羽分。淒然別緒起。吾兄奮高節。隱焉念鄉里。不勝憂國情。辭闕豈徒爾。文苞淵海深。行砥璠瑯美。耽耽或見嫉。皎皎易蒙毀。主上諒愚忠。鯤鳳還見比。上手書宋玉對楚王問以示意 聖知得賢明。取之蓋有以。惟余本薄劣。願嘗被疢瘳。平生方寸心。與兄共戚喜。十年

同京華。形影正相似。一朝判衣袂。睽析從茲始。離絃不可聞。別酒弗知旨。流涕紛交頤。安能望車軌。車行去不息。還抵崑山陽。天章照廬舍。奕奕有龍光。恩命挈書局。盈棟紛縹緗。良史貫墳索。肇城紀職方。著作豈云易。所幸暇日長。幽思託深巖。結契還徜徉。林屋何窅窅。笠澤何洋洋。靈區與俗遠。足成典籍場。仲氏棄薄宦。十載歸故鄉。聞道日有得。被服追虞唐。素志愜共隱。杖屐時相將。填吹有饒和。此樂不可量。獨余滯畿輦。離羣心內傷。君恩何以報。歸思徒蒼茫。願各勉餐飯。聊用寬愁腸。含經堂集十五

被論罷官南歸三首

短狐期必射。猥獮期必噬。身與權貴忤。安得不因敝。醜正繁有徒。膠漆厚相締。衆嘯山欲漂。徒掌□□。蔽。夷跖任所指。蒼素適相戾。長吟貝錦篇。清晝忽陰翳。

案所缺應是日爲二字。集中屢有缺字。足見危疑。

宜聖疑撥塵。慈母惑纒至。謗積且銷骨。斥譴焉足避。哲后惟明明。非曰輕棄置。庶復全始終。用解質首忌。蓄計毀室巢。張威事鍛織。苟非吾君仁。一門安所庇。顧此感至恩。寧勝去國淚。

京華十餘載。懷鄉日悠悠。一朝解組去。潞水浮扁舟。白露且晨降。大火方夕流。煙波正瀾渺。桂櫂堪夷猶。對景暫爲適。安知身所謀。終已事六籍。此外非吾求。含經堂集十五

徐昂發乙未亭詩集六卷畏壘山人詩集四卷

徐昂發。榜姓管。字大臨。號桐菴。崑山人。康熙三十九年進士。官編修。雍正初。以事遣戍新疆。未詳所終。事具清史列傳文苑傳。撰乙未亭詩集六卷。畏壘山人詩集四卷。前集少作。後則官翰林使于四方之詩。昂發少有異才。能讀書。有畏壘山人筆記四卷。考證頗有心得。詩學晚唐。康熙三十三年。始刻宮詞百首。爲世所稱。今在前集中。晚年詩格漸老蒼。似在同時顧嗣立張大受之上。好賓客。以文酒自豪。然不免牢騷。詠京師二木。謂槐葉與蟲俱生。食盡生晚葉。乃成陰。臭椿端直修正。以花葉臭見棄于人。隱以自寓。及見諸老輩。得其獎許。集中司寇公相國公卽徐乾學元文兄弟。蓋其族屬尊行。恩怨未盡。昂發宦不進。晚歲遠謫。不免牽連爲累耳。

租牛行

今年旱何甚。赤地艱插時。西隣舊豪家。牛園新修治。小姑脫銀櫛。大婦典羅襦。平旦驅牛歸。濕濕犂與犂。東鄰活計少。麥種無留遺。老妻共力作。骨出如枯龜。子本勉稱貸。租牛鑿牛池。牛肥四蹄健。牛瘦兩角觶。隨牛上車盤。車壞牛行遲。揮鞭向日暮。人牛同時饑。歸來困倦極。解衣看牛飢。半夜還屛水。哀歌摧心脾。亦有無牛家。中田生曠蕪。淚滴深眶眸。虜灼攢癢臍。踏車鼓聲歇。呼兒咒蛇醫。乙未亭詩集二

淫雨

三首
錄二

淫雨乘農急。連宵不肯休。萬家垂欲飽。二麥忽無秋。霧慘蛟龍喜。蛙沉蛤蜊稠。傷心瘵與寡。雨絕淚長流。

凶荒仍歲降。厲疫隔年侵。豈意愁霖積。重悲麥野沈。孤惻連巷哭。仁愛渺天心。倍益征求急。冤聲入暝

陰。

長壘山人
詩集一

下田雨歎

曜靈失其職。淫潦不可止。高田競插蒔。低田在水底。殘麥縱橫漂。人哭蛙黽喜。四年災沴接。路殫多於螳。田廣耕者稀。膏壤誰人理。春夏困催科。洪濤復此起。眼見禾麥空。性命安所倚。死水與死刑。等死寧死水。暫得肌骨完。束縛棄沙汜。

古者制田畝。其要維溝防。崇方與廣綱。秩秩懸憲章。厥田雖沮洳。堤岸峻且強。水淫不能災。歉歲成豐穰。漢時賢守令。此義尙肅將。奈何千載下。股剝爲循良。養人乃食人。田事豈所詳。遂使三尺雨。下隰波滄浪。嗚呼匠人職。古法未渺茫。溝防廢不修。萬姓罹凶荒。一言俟采風。吏責非天殃。

長壘山人
詩集一

得樹園古樟歎

我聞古之豫章表郡邑。此樹崢兀凜欲抗。黛葉朝連震澤雲。雄風夜卷南溟浪。岌然體勢崖石尊。碾礪交錯盤長根。巨榦高寒夾日月。文章煥燿驚乾坤。鱗而瘞裂蒼皮古。熊虎攫網膠枝武。恍惚精靈若有憑。只

尺時空走雷雨。蕭蕭白晝朔氣凝。五月六月消炎蒸。月明彌覺重陰厚。籟響渾疑萬谷響。柱史老樹丞相柏。星榆月桂同終極。遺此森梢百丈材。造物固應憐正直。豈知根蟻久蝨傷。槎牙傑骨空開張。冰霜外摧奪勁節。霹靂中斷漂餘香。緬昔柯條初未病。挺特常爲鬼神敬。空山枯死明堂委。魍魎睢盱荆棘競。

畏嶽山人
詩集四

後古樟歎

有序 相國公山園。有古樟樹一株。其生不知幾何年矣。大約綿歷宋元。再更人代。千尋直上。巨榦連圍。駭薄煙雲。攬挈風雨。輪困碾礪之狀。至爲奇鬱。故命其園曰得樹書屋。曰古樟。忽一歲雙枝突生其根。而古樟枯死。無何。相國薨逝。蓋木妖也。又二十餘年。雙枝日長。清榮峻茂。遊目增佳。至康熙庚寅五月。相國仲子忍齋編修病卒無嗣。而雙枝亦萎。於是古樟盡矣。嗚呼。大樹飄零。根株卒斬。樹猶如此。能勿酸懷。予既與忍齋厚。而痛其淪喪。故重作後古樟歎。以志哀悼云。

古樟已摧勢峯劣。崩雲直下三百尺。尙餘傑榦撼風雷。不朽此心猶鐵石。崇崖邃壑冰雪滿。秋隕晝寒晏景迫。多愁遷客乍迴車。灑淚攀條感疇昔。舟楫未爲人世用。棟梁已見空山圻。老樹鬱蟠氣漸申。雙幹突起光璘珣。春轉泉源豈無意。筋生霹靂疑有神。童童二十年來久。積翠層陰蔽林藪。古香酷烈辟羣邪。密理漏爛敵左紐。歲月更踐詎幾時。生意蕭颯存枯枝。陳根卒斬新葉萎。造物變化誰能知。物久年深萃精爽。滄桑幾度成俯仰。萬里浮槎自往來。斗牛猶得乘潮上。良才一去空巖阿。天地逼窄交網羅。鸞皇悲鳴天鳥呼。吁嗟古樟古樟奈爾何。畏嶽山人
詩集四

金奇玉 龍溪紀年詩集八卷

金奇玉。字琢菴。崑山人。自言本姓張。其祖以家難改。又言其父順治初爲長洲知縣。據啓禎紀聞錄云。崑山庠生朱應錕。獻本縣冊。遂令爲長洲縣令。然則奇玉避仇往諸城。乃改朱爲金也。先識李澄中。因澄中以識劉翼明。皆好奇。奇其詩。留居西村。始有聲名。遂以諸城籍應試。得鄉舉。屢試不第。晚始謁選爲澠池知縣。撰龍溪紀年詩集八卷。刻于康熙五十年。年六十六矣。詩有奇逸之趣。能畫。自謂得高士宋閱叔歸玄恭之傳。與衙官爲不稱。王士禛分甘餘話。四記諸城九仙山有僧金姓。以勢橫里中三十年。金舉人自吳中來。父事之。能文之士。而甘爲妖髡假子。僧死爲服斬衰稽顙。得其半產。此所謂舉人。卽指奇玉。聊齋志異金和尚。亦及其事。必非虛構。此集有追賦龍大師十章。龍能詩。逝于康熙二十七年。恐非金和尚。集中又有舉家食粗糲詩。不似得厚產者。或傳言之過歟。

捕蝗嘆

蝗螟不入境。乃在漢循良。吏道失明恕。民生逼凶荒。是歲三伏月。敵炎霽林岡。轟飛蔽日黑。蘊起連氛黃。須臾合四野。降毒來此方。尙然殘草葉。豈特空禾糧。赤眉與青犢。儼如佈陣場。殘殺恣無限。飛突禁莫當。又如河鼓昏。機槍下貪狼。甜談化異狀。千萬奔妖芒。尉長奉縣符。驅捕何張皇。村戶從里社。市廛督城坊。鳴金充點隊。舉幟抗成行。下鄉索酒食。撲擊我力長。匝畝未及遍。散歸各徜徉。嚙食方駭矚。遠

去忽飛揚。遺種肆殃毒。蠕伏轉跳踰。十日已出地。緣戶更連牆。向者所食餘。掃蕩爲慘傷。縣符又催捕。溝塹築近傍。距城十里外。恣食空村莊。又有豪居人。笑恃身手強。披禾踐隣陌。掘土封己疆。吁嗟胡不仁。援濟昧紀綱。出門皆枕席。比里彌梓桑。先時迓天豫。轉厄溥時康。魯恭豈無術。姚崇未易量。在野困心力。伏首甘秕糠。迴幹有至理。何時答吳蒼。

龍溪紀年集四

黃中堅 蓄齋集十六卷二集十卷

黃中堅。字授孫。號蓄齋。崑山人。貢生。不務仕進。作騷道人傳以見生平。願作小小利益事于鄉黨間。沒稱文士。撰蓄齋集十六卷。二集十卷。少善屬文。與寧都魏禧游。晚善冷士峭。楊寬頗稱中堅得力于歐蘇。今觀其文。喜馳議論。務爲翻案。辭雖俊快。而辭與折之氣。碑傳之作甚少。唯頗留心當時利病。發爲條議。皆可施行。知有經世之略。得于易堂者深也。沈德潛謂中堅詩特餘事。實則其詩蘊藉有致。唯不欲以之自見耳。中堅與徐氏構難破家。事見清史徐元文傳。兩江總督傅拉塔參款。一徐樹屏庇護光棍徐長民。將徐長民仇家生員黃中堅。聲言必受其害。嚇詐黃中堅四千兩。田抵六百兩。又將黃中堅交與光棍徐長民被毆折指。又錢泳履園叢話。言徐掌明與崑山之徐聯譜。勢可炙人。諺云長吳兩縣印。不及掌明一封信。嘗與至戚黃振生有隙。令人毆死。村農擡尸至黃門許訟十三年。至康熙二十二年制臺王公新命斷結。辦徐掌明發遣。尋以逃歸論死。據此知徐乾學兄弟倚無賴以肆侵陵。中堅諸生。長明實爲尊行。

尙不免于魚肉與訟八年。幸長明以他事敗。禍難始息。則良懦者可知。巨室爲患鄉里。蓋有記載所不及者矣。

賣柴行

窮居山僻少活計。夫婦相隨斫柴去。斫柴易米患不敷。雜煮草根得一飫。今年天雨難斫柴。幸有餘柴堪逐利。雇船裝載入城來。正值柴荒價三倍。縱然倍利亦幾何。忽遭強暴攫之既。微軀空匏老拳鋒。扁舟剩得亡羊淚。含悲往訴縣尹知。却逢縣尹怒且恚。除將失物不追求。更予大杖還枷示。歸來嬪子問其由。爲道官嗔柴價貴。婦聞夫語泣然悲。兒飢待汝今何冀。柴賤苦飢柴貴管。從今慎勿將柴市。攘奪由來官不禁。努力明朝攫食始。蓄齋集 十五

王蒼壁 生水集一卷續集一卷

王蒼壁。字躬玉。崑山人。撰生水集一卷。其詩高逸沖淡。時多故國之思。有句云。誰能堪此情難免。焉用文之隱亦高。詠史詩九首。識解甚超。閱歷有得之言。以不墮世網爲貴。集中有康熙六十年辛丑詩。度其年已耄耋矣。生水續集其子之醇撰。之醇字鶴書。亦不營進取。詩格類其父。有贈隱君子詩。知其所慕在此也。沈德潛與之醇友善。錄蒼壁詩而不及之醇。尙有持擇。

照田蠶詞

明年田蠶今年卜。家家除夕祈新福。高燒火把照野田。老翁齊拜小兒祝。小兒祝罷仰看天。紅光燄燄空
中然。火頭今夜高三尺。田收三石蠶三眠。歸來闔扉多笑語。明年年豐天已許。生水集

雜謠

水漫漫。田沒岸。田中鯉魚長尺半。大魚長尺半。小魚五寸強。但願今年發恩詔。鯉魚亦得充官糧。
賑飢民。吏胥飽。飢民泣。吏胥惱。吏胥勿惱爾當喜。官府明朝糴官米。生水集

金之俊 金文通公集二十卷

金之俊。字豈凡。號息齋。吳江人。萬曆四十七年進士。官至兵部右侍郎。入清原官起用。官至大學士。康熙元年告歸。九年卒。年七十八。事具貳臣傳。之俊立身立朝。無可稱舉。附和陳名夏而不被株連。必軟美取容者。蘇滷惕齋見聞錄稱之俊歸吳營太傅第。後街曰後樂。前巷曰承恩。吳人夜榜其門曰。後樂街前長樂老。承恩坊裏負恩人。又曰。仕明仕闖仕清。三朝之俊傑。縱子縱孫縱僕。一代豈凡人。又曰。一三三四五六七八。孝弟忠信禮義廉無恥。妻頗賢。別居不受新語。曰我自有誥封。姪某嘗責之俊監斬二王。本傳稱之俊卒前一年。以送究匿名帖事削太傅銜。是鄉評物論。皆不與之。撰金文通公集二十卷。奏疏六卷。詩集六卷。外集八卷。之俊順治中先刻外集。續刻息齋集。身後哀爲此集。而盡削前明所作。本不能文而自命歐曾。遂與陳名夏陳之遴同爲順治朝文學顧問之臣。以奉命撰孝獻皇后傳。及明思宗碑。

爲世所稱。奏疏多見順治中事。元二之際。京通京津間。因兵事道梗。不能通行。文述山東奏銷事。知不限江南一省。其他間可稽考時政。詩則僅具腔拍而已。

送張聲子南還

羨君天下士。溷跡來燕遊。意氣雲霄迴。才名謝陸儔。詩書敦古道。笑語破新愁。別緒縈樽酒。春深正虎

丘。金文通公詩集二

計東改亭詩集六卷文集十六卷

計東。字甫草。吳江人。順治十四年舉人。以奏銷案除名。嘗從汪琬問古文法。故以文鳴。所刻集曰甫里。曰汝穎。曰竹林。曰中州。宋犖撫吳。爲刪存其文。刻改亭集詩。初名狂山吟。至康熙四十七年王廷揚始爲刻之。後五十年乾隆戊辰從孫瓊重爲校刻改亭詩集六卷文集十六卷。其文凌厲直前。略近眉山。與琬文頗不類。顧于錢謙益盛所推許。集中與人書。詆正錢錄之非。辨朱鶴齡杜詩注與錢箋不相違背。皆有關係。竟客游不遇以死。年五十二。尤侗爲之作傳云。卒後三載。天子開博學鴻儒之科。而宋犖所爲序。則云不幸先一年沒矣。犖荒髫紀事多誤。東之卒在康熙十四年乙卯。弟子中徐軌劉凡。皆有文采能自樹立。

高陽縣過故相國孫公宅十六韻

高陽名相地。樞輔昔巡邊。幕府搜朝傑。軍咨得逸賢。伯順 鍾元 鹿太常 孫徵君風義峻。茅止生 宋 閣卿文武全。馳檄

騎兵泣。登陴信誓傳。五城唾手復。九塞抱頭旋。震主勳名重。匡時荐刻先。陰疑晉陽甲。顯類令公權。戰

氣空蕭索。歸懷寄偃佺。青蠅殿上集。碧血土中鮮。湛族悲□□。梯榮賤褚淵。門生多曲筆。行狀已喧闐。

陳壽書求賂。丁儀事失編。虞山雖竦峙。瀨水亦迴沿。今日車過此。能無意惘然。孫督師門下四傑。白鹿孫宋茅。錢牧老作督師行狀。以有夙憾。

於宋。盡削去宋事。人皆爲不平。故有陳壽丁儀之句。改亭集四

過昌平州望天壽山

下馬樞衣過此間。酸風無地匿慚顏。尙存日影諸陵樹。不散雲陰天壽山。馬鬣仍搖朱汗濕。魚燈欲滅紫

燐斑。泥塗賤士空回首。悵望龍髯不可攀。改亭集五

葉燮已畦詩集十卷殘餘一卷文集二十二卷原詩四卷汪文摘謬一卷已畦文集十四卷

葉燮。字星期。號已畦。嘉興籍吳江人。詔袁少子。康熙九年進士。十四年選寶應知縣。未二年鐫職歸。遂縱游海內名山幾遍。隱于橫山。教授生徒。與汪琬論文不合。著汪文摘謬一卷。批卻導窳。深中其失。然以之律燮所作。其失愈甚。蓋所論者文法。文安有定法耶。琬居堯峯。生徒亦數百人。兩家門人。因相爭至數十年不已。燮嘗致書吳兆騫。述己罷官。由李振裕之讒。兆騫方爲大學士明珠子揆敍授讀。蓋欲使主人翁知之耳。何其不達。卒于四十一年。年七十六。事具清史列傳文苑傳。撰已畦詩集十卷。迄于己

卯。三十八年附殘餘集一卷。文初刻本十四卷。至庚申止。十九年當爲變所自定。乾隆中。沈德潛覆刻全集。增文爲二十二卷。似不若初刻精審。變詩文宗韓杜。刻覈有法。與曹溶酬唱甚多。兩人皆尊杜者。吳之振純乎宋派。亦共吟壇。則不解所由矣。原詩四卷。專爲尊唐。方關時人徒襲范陸皮毛之非。謂詩當以生新深爲主。于舉世尊宋之時。獨持己見。發聾振聵。信豪傑之士。

紀事雜詩

皆寶邑實事

一馬衝風來。插羽驚沙鳴。手持大府帖。御馬到頭行。皇威申九伐。南陲討不庭。長戟利席捲。凡馬虞鈴蹶。天閑十二廐。宵啓赴行營。過府歷州縣。刻日限嚴程。毛片青黃紫。駢白悉別名。上駟二千餘。隨行數更羸。峻督孔道吏。芻粟須立應。聯槽刀劊具。煮鍋薪油鑿。豈徒馬事急。要供護馬兵。喜怒在斯須。毋輕身與名。軍書請自視。視畢目徒瞠。急召縣中吏。里正逮踐更。如檄速儲胥。埽除廐舍清。里正前致辭。縣小饑饉仍。三空菽不飽。皮骨安能撐。況茲天旣種。宿飽嘶驕騰。此行蒙霜露。水土宜未勝。蹄鬣悉天鑿。野民調難任。次第喚牧人。牧人竄如鷗。再敕掌牧吏。舍空無折鎗。寧死委溝瀆。詎敢行間擲。人死身已矣。馬誤全家傾。咄哉黔閩逆。毒徧中原嬰。桓桓師武力。計日規澄清。疲氓難旦暮。痼瘵切私情。終宵馬嘶震。炊絕無人聲。御馬來

電影閃匹騎。四蹄風雲升。借問此何爲。軍書奏邊城。邊城保何許。閩海逆未平。晝夜十二時。千二百里程。啓鑰達明光。片紙萬里情。差池誤刻晷。從事以軍興。縣官聞馬來。酒漿筐篚迎。吏役聞馬來。面色蒼

黃青。百姓聞馬來。負擔望塵停。但求無事寧。安惜弁與纓。換馬百爾慎。一蹶禍立嬰。覩茲康莊衢。凜凜赴絕徑。昨聞仙霞關。逆黨自覆傾。我軍搗其巢。俘馘獻華清。行無犬吠驚。旋聽和鸞鳴。廷馘王路蕩。鼓腹早遂生。軍郵速

荷鍤白髮翁。持畚黃口乳。懸鶉露兩脣。啾啾相告語。十步九踟蹰。接踵鬻隄土。門孰使之來。里正簽派伍。豈無壯丁男。距躍力如虎。豪門誰敢撓。公然脫籍簿。稽昔河夫則。依畝科人數。自頃浸稽天。田百荒九五。餘五畝一鐘。占籍酣歌舞。我儕湖傍民。漂徙無窟所。保長任恣睢。皮骨拋酸楚。骨楚猶可言。腸饑轉鳴鼓。聞言心忤忤。爲民母也父。何當叫天門。勿懼試蕭斧。荷鍤已哇詩集殘餘

鈕 琇 臨野堂集三十三卷

鈕琇。字玉樵。吳江人。康熙十一年拔貢生。由教習考授知縣。先後官河南項城。陝西白水。廣東高明。事具清史列傳文苑傳。撰臨野堂集。文十卷。詩十三卷。詞二卷。尺牘四卷。琇師事吳南村宗愧菴。炎詞翰斐然。文情軒舉。顧不自矜惜。勉于循人。多無聊酬應之作。然讀爲吳師母求米布啓。黃圭菴詩文集序。淒涼苦語。拳拳師門。風義之篤。可敦末俗。詩多紀事之作。感事及弼教坊詠莊史之獄。至云只應日夜錢塘水。怒作寒濤千載聲。怨而怒矣。農言。修塘謠。傷稅斂之煩。秋雨歎。泣柳詞。爲民請命。其他詠物寫懷。皆有寄託。觚騰晚歲官高明時所作。遺聞軼事。往往而在。至于人物俊偉。筆墨修潔。同時撰述。殆難

比數。琇少共潘耒同學研。以奇慧著。乃浮沈一官。微祿遠戀。然臨野與遂初。至今甚難軒輊也。有才子曰昭早卒。孫學乾撰蕪村筆譚。

感事

縉服南冠兩髻華。却攜妻子繫天涯。春風客淚河橋柳。夜月鄉心驛路笳。慟哭范滂猶有母。飄零張儉已無家。只今知己多豪俠。空憶當時廣柳車。臨野堂集一

彌教坊

絕命悲辭獄裏成。啣鬚赴市氣崢嶸。曾無富貴娛楊惲。偏有文章殺禰衡。白骨幾人收遠瘞。青編何日署空名。只應日夜錢塘水。怒作寒濤千載聲。臨野堂集一

潘 耒 遂初堂集詩十二卷文十五卷遂初堂詩集十六卷文集二十卷別集四卷

潘耒。原名棟吳。字次耕。號稼堂。晚號止止居士。吳江人。兄樾章罹莊史之禍。家累戍邊。嫂沈任身就道。末年十七。徒步送之。至燕山。遺孤不育。沈引藥自決。耒讀書二十餘年而未應試。初師戴笠。繼則徐枋。最後始從顧炎武游。因識徐乾學兄弟。為所牽引。舉康熙十八年鴻博。授職檢討。非炎武所願也。與修明史。建議搜采欲博。考證欲精。職任欲分。義例欲一。秉筆欲直。持論欲平。歲月欲寬。卷帙欲簡。識者以為知言。二十三年。以浮躁降調歸。鴻博之試。諸生布衣入選者。未幾皆降黜。或假歸。始則招之唯

恐不來。繼則揮之唯恐不去矣。未專精經史詞章外。曆算音韻梵夾之書。多所通曉。著類音八卷。足與炎武音學五書相輔而行。卒于康熙四十七年。年六十三。事具清史列傳文苑傳。及沈彤所撰行狀。有遂初堂集。及身刻者。詩十二卷。文十五卷。中有兩與長壽寺僧石濂書。二萬餘言。後刻本詩十六卷。文二十卷。別集四卷。始削去之。石濂固妖妄。然未強與彼教事。至刻救狂砭語。大聲急呼以攻之。石濂亦刻惜蛾草相抵攔。投鼠而不忘器。未免自視過輕。李光地榕村語錄續錄。詆其輕率。性急喜罵人。然天性肫摯。其兄兩孤兒在塞外。用捐贖例納資往贖。察覆至八九。經四部兩撫兩將軍。十年之久。竟得釋歸。爲其兄刻國史考異。松陵文獻。爲炎武刻亭林遺書及日知錄。爲枋刻居易堂集。兩人之沒。爲表幽之文。不敢入集。唯集中各報以壽序及長律而已。康熙十一年。炎武年六十。未爲之序曰。天心可見而不可測。莘野之耕。渭濱之釣。此天之不可必者也。著書立言。教育英才。此天之可必者也。先生亦操其可必者待之而已。吾儕又何疑焉。是不甘貧賤之守。已漸露其端。卽無乾學。亦將脫穎而出。後與乾學之好不終。則炎武不及見矣。詩文不事摹擬。根柢深厚。有樸茂之美。請廣祕府書籍以光文治等數疏。代徐元文作。不可不存稿。別集皆關佛乘。雖削去與石濂角口之作。而天王碑考。致粵東當事書。與梁藥亭庶常書。刺刺不休。頗失儒者氣相。書汪水雲集後。書杜詩錢箋後。于錢謙益深致不滿。而謂其雖大節有虧。然學問之宏博。考據之精詳。亦豈易及。詩多紀游之作。詩文皆不輕作。未嘗以語言泛愛人。可謂奉行師教唯謹者矣。炎武之學。終賴未以傳。獎與爲不虛焉。

慟哭七十韻

慟哭荒山頭。寒風慘淅瀝。明發將北還。拜泣辭墓側。傷心原草枯。灑淚墳土碧。追維三年事。惻愴不堪憶。雪涕陳梗概。幽明諒不隔。嗚呼單闕春。吾兄初遽厄。颶風揚洪濤。清晝飛霹靂。哀哀破巢下。萬事難可測。祖先有遺眷。到今偷視息。不死責逾艱。苟活罪何塞。蝨蝨負泰華。中夜常怵惕。維時北風寒。千里凍地坼。寡嫂將兩雛。崎嶇赴塞北。逝將徒步送。不能憚遠役。迴看越州南。森森見矛戟。西陵咫尺路。遺骨收不得。黃蒿沒故廬。遺書復狼藉。顧維兄平生。著述窮日力。精思託篇翰。雅志寄圖籍。一朝恐淪落。千秋絕遺蹟。亮無移山力。揮淚且北適。薊門煙塵黃。塞外草根白。零丁四千里。寒影深夜雙。廣寧城迢遙。淒風苦白日。哀哉吾貞嫂。畢命於荒驛。殊俗激清風。邊人悚英魄。空餘兩孤兒。零落竄海嶺。死者長已矣。生者兩惻惻。歸來到鄉土。長號對親戚。吞聲向老母。五內痛彌劇。便欲扶旅櫬。還歸故阡陌。煙塵正縱橫。寸步礙荆棘。夙昔慕遠游。未覺天宇窄。五岳思振衣。三山期挂席。擔荷殊艱難。側身且踟躕。秦坑酷詩書。漢銅嚴簡冊。中郎等身書。什百留萬億。火焰未銷毀。神鬼護蠹蝕。時時得航頭。往往出壞壁。哀集成一囊。依然見手澤。一讀心神舒。再讀涕泗積。爾骸委路傍。爾文好何益。俗士悲首丘。壯夫思裹革。吾兄江海人。寧爲一丘畫。延陵葬嬴博。伯鸞瘞吳國。魂氣之往來。何常滯體魄。客殯古有然。渴葬禮自昔。未能便歸骸。曷且就窀穸。西冷望吳淞。相去況匪逖。於焉卜崇岡。爰以啓幽宅。高原名葛仙。吉阜惟寶石。六橋前縈迴。孤山對岑峩。岳侯與林公。引領得良覲。玄堂旣潛開。陰溝亦雙闕。雖無萬家營。足

以樹碑刻。雖無千騎送。亦有素車客。負土得侯芭。拊棺惟范式。徐君奠生芻。向子愴鄰笛。返骨俟他年。掩土自茲夕。悠悠重泉下。杳杳長夜卽。百年歸一朝。萬事盡三尺。魂來不須招。魂去不可識。有知竟何如。無知永寂寂。遺孤不臨窆。嫂氏不同域。天高誰能呼。淚盡何處滴。濁酒澆一卮。麥飯奠一盞。手封一坏土。手種一株柏。從茲汗漫游。飄然理輕策。高攀天門梯。遠躡羅浮屐。何處望孤峯。萬里愁雲色。

遂初堂詩
集十六

隔谷歌

隔谷隔谷。一車兩軸。兄居重圍。弟正蹴鞠。隔谷隔谷。一車兩軸。兄殺騎馬。弟槌肥牛。日落天風。鼓聲四匝。身在谷中。何山可脫。我欲拔劍。劍缺摧鋒。我欲彎弓。弦絕矢窮。命居刃端。譬如石火。隔谷不來。孰爲救我。朋仇一言。奮身相捐。孰是同氣。而不我憐。一猿中箭。羣猿啾啾。嗟爾匪人。不我同仇。

遂初堂詩
集十六

度關曲

齊謳且莫唱。越調且莫喧。四坐且寂聽。聽我歌度關。關門峩峩半天起。左扼狼山右遼水。西連秦王所築之長城。崩亭破障一萬里。春風自古吹不到。天荒地老白日死。江南遷客辭燕京。客心夜夜邊風驚。一時徒侶皆涕零。本家江左衣冠族。金鞍寶馬人如玉。朝遊北里暮南鄰。何當遠戍遼河曲。遼陽三十六屯衛。處處天清聞鬼哭。烏飛一去無還期。況乃身無羽翼見拘束。只今猶是中土人。明宵知復何處宿。雞鳴笳

鼓喧。吏人催度關。度關猶自可。却望愁殺我。故鄉何遙遙。萬里凝愁雲。揮手謝送者。相看淚盈巾。猶聞附書歸。各自貽六親。那知親戚復蕩盡。可憐寄書與何人。邊人向夕吹哀笳。哀笳三聲雪作花。雪花莫沒關前路。夢魂從此時還家。遂初堂詩集十六

案三詩皆述其兄禮章。康熙初牽運莊史之獄。被難而作。

徐 鈞 南州草堂集三十卷

徐鈞。字電發。吳江人。監生。康熙十八年召試博學鴻儒。授檢討。會當外轉。遽乞歸。後以原官起用不就。撰南州草堂集三十卷。卒于四十七年。年七十三。專具清史列傳文苑傳。鈞博學多能。其文敘述有法。詩尤華秀。擬唐人士皇西巡歌。涼州詞。長門怨諸詩。疑皆爲世祖作。與吳偉業讀史清涼山讚佛詩。可以共參。卽落花篇。題道旁梅二詩。亦詠宮人之遺嫁者。順康之際。詩人喜作宮詞。皆有所指。非漫然擬古。洪昇長生殿爲董鄂而作。更不待煩言而解矣。鈞罷官在康熙二十五年。時徐乾學方官禮部侍郎。集中所謂宗伯叔是也。竟不能庇之。觀讀史有感。熟讀周南太史記。只疑封禪勝河渠。似由與同官爭史稿修改。以致被放。而起釁則由小游仙詩。莫羨吹簫王子晉。夜深花底自彈箏。未悉所指。知是時黨爭之烈也。詩止于康熙三十四年。下至四十七年。十三年中。別有續集四卷。王廷燦似齋詩存。祝虹亭先生七十詩自注。乙亥至乙酉。康熙十四年之作。名松風餘藁。卽續集原名。

宮怨

碧綃如霧晚生涼。鳳腦微熏坐玉牀。一葉梧桐金井墜。鴛鴦瓦上月如霜。歌舞飄零粉黛銷。蓬萊深鎖翠華遙。夢中記得霓裳曲。明月何人教紫簫。

花飛顚頰損紅顏。夜半徒勞守玉環。腸斷西宮頭白盡。何如青冢在陰山。

玉輦頻移下九霄。君王新幸董妖嬈。東風自閉葳蕤鎖。不用黃金貯阿嬌。南州草堂集一

贈濟寧鄭確菴孝廉

靈光魯殿推耆舊。異代修名委逝川。賦就西京增涕淚。夢來南國憶風塵。乙酉確菴避亂江左。入史相國幕。肯容華髮羞潘岳。

賸有狂名老鄭虔。話盡風波三十載。回看滄海幾成田。南州草堂集三

案鄭與儒字惠人。著有客途紀異。紀清初事頗實。駭聞。

吳兆騫 秋笈集八卷

吳兆騫。字漢槎。吳江人。少有雋才。童時作膽賦五千言。吳偉業以與華亭彭師度宜興陳維崧共目為江左三鳳凰。稍長為慎交社眉目。與同聲社章在茲王發爭操選政有隙。順治十四年。罹科場之獄。遣戍寧古塔。章王所告發也。居塞上二十三年。摯交顧貞觀填詞寄之云。季子平安否。便歸來平生萬事那堪回首。傳誦一時。貞觀為納蘭性德客。屈膝求性德道地。昔日社盟宋德宜徐乾學乃醮金納贖。得放歸。為明

珠子揆敍授讀。旋南歸省母。未半年北行。以腹疾卒于康熙二十三年。年五十四。事具清史列傳文苑傳。及徐鈞孝廉漢槎吳君墓志銘。兆憲高才遠徙。偉業首賦悲歌贈吳季子以傷之。比其生還。乾學有喜吳漢槎入關之作。同時和者甚衆。及卒。竟少哀挽之什。乾學所作。亦未入集。蓋吳徐之交不終矣。所撰秋筮集。乾學所刻者。爲賦詩西曹雜詩不分卷。首載兆憲與乾學書。有遭難十八年語。當刻于丙辰。康熙十後五年其子板臣于雍正四年丙午。重刻爲八卷。析徐刻爲四卷。增秋筮前集。雜體詩。秋筮後集。雜著各一卷。稱其稿半失于老羌之警。南歸舟覆沈溺者又過半。所增皆搜自故舊。又稱駢文舊與陳維崧齊名。稿在徐氏不能得。然則幸而得傳者亦僅矣。詩文摹六朝初唐。驚才絕艷。同時輩流。罕及之者。惜學業無成。格律亦未更進。固一時之秀。而非蓋代所宗。嘉慶中。張廷濟嘗就順康人集。輯秋筮餘韻二卷。上卷寄漢槎詩。下卷喜漢槎入關之作。今不傳。

榆關老翁行

榆關酒樓臨大衢。征人日暮行駐車。鹿裘老翁鬢成雪。夾轂相逢問里閭。乍聞吳語三太息。坐我樓頭話疇昔。自云家世本吳中。住近張王舊宮側。少年追逐冶遊場。破產徵歌意無惜。沙家槍稍冠江南。學得梨花推第一。技成好作關河遊。販繒幾度來邊州。燕姬十五芙蓉色。彈箏夜夜酣高樓。一曲紅綃醉中擲。囊空典却千金裘。三載邊庭履霜露。飄搖短褐誰相顧。途窮不忍到鄉關。却向軍中應征募。金羈翠毛繡蝥弧。名隸渡遼第三部。關前上將霍將軍。遣向松山守烽住。孤城接鬪無時休。鐵甲中宵帶冰臥。老邊牆直

長城隈。梯衝百道如山來。寧前列屯晝城閉。旌旗黯慘紛黃埃。雄邊健兒十三萬。鼓聲欲死弓難開。積石降丁最剋健。日暮分營夜催戰。吁嗟萬騎無人回。射盡平州鐵絲箭。曙光腫腫海生綠。戰血無聲注空谷。嚴霜如刀箭如蝟。欲上戎鞍淚交積。堅城既墮將軍降。幾部殘兵向南哭。相隨散卒臨渝城。橫刀更隸龍驤營。倏忽長安易朝市。關門不用防秋兵。從此飄零脫軍伍。種豆鋤葵學農圃。且將衰齒托雞豚。幸免微軀飼豺虎。昨年有客來燕京。傳道江南亦被兵。故國他鄉盡荆棘。窮黎何處還聊生。伊昔姑蘇城畔住。門前小店臨江樹。半生羈戍塞垣秋。夢斷吳關舊行處。今日逢君遠水北。被褐驅車欲安適。白頭邊語久侏儻。重聽鄉音涕橫臆。悽惶嶺外北風哀。莽莽邊沙路何極。沽酒邀君君莫辭。天涯相見且相悲。莫嫌憔悴窮邊叟。猶是吳趨市上兒。秋筵集二

吳樹臣 涉江草四卷

吳樹臣。字鶴亭。兆寬子。貢生。選四會知縣。遷漢州知州。擢潼川直隸州知州。請復劍閣故道。爲人所稱。撰涉江草四卷。刻于康熙三十四年。詩法婁東一派。善于體物。辭意俱工。多題咏山川流連風景之作。蜀中古迹。所述尤詳備。可作游記讀。首載呂潛序。謂昔年來往松陵。多從延陵氏之賢哲游。庭三坦腹吾門。雖編氓也。實稱世好。潛遂寧人。崇禎十六年進士。高不仕之節。流離東南。清初詩人多有送呂半隱還蜀詩。卽潛也。有集不傳。故爲著之。

喜晴

久雨困泥沙。衣袂亦霑濕。蛇煩爭鬱屈。蟻喜恆戴粒。陰霾積不散。嵐氣松窗入。水增數丈高。江漲波濤急。麥畦盡漂泊。官租安所給。哀哉此農夫。何時撥雲日。雨師忽返旆。箕舌不載翁。洗出山容翠。層巒紫霞集。林端豁錦繡。太皞薄原隰。清風侵白紵。蘭芬香自裛。卷簾鳴素琴。熱鑪理散帙。杖策曠野望。詩禾兼種秫。照照枕流眠。皞皞抱甕汲。皇天無私照。萬物荷嘘吸。樂此義和馭。酒漿宜快挹。涉江草一

周之方 希經齋集六卷

周之方。字在卿。吳江人。讀書不爲制舉業。工詩古文辭。有希經齋集。詩文各三卷。刻于雍正二年。年六十八矣。詩多五言古。說者以爲似選體。實學杜韓。未便臻其堂奧。而勁健可喜。與作卮詞者迥別。文樸茂有法。必以爲出于程朱理學。以求強合于載道之說。則拘墟之見也。

紀旱

康熙歲丁亥。建月當未午。赫羲失其度。膏澤愆繩矩。季春蒺藜生。山氣便少吐。入夏轉曠乾。驕陽勢益普。豐隆務簡嘿。屏翳竟寧處。東吳幾州郡。大半成焦土。高壤早懸耜。拱手靜田鼓。我鄉素低窪。插蒔十不五。屨水晝不足。勞瘁夜以補。但願禾苗甦。豈惜筋力努。力努在一時。禾死終歲苦。蓬首復垢面。相率拋雙股。瞻月罔離畢。那望霖雨溥。力盡苗仍枯。含悲意始阻。會見米如珠。此離滿村塢。嗟哉彼蒼蒼。育

物稱民父。魃鬼何足誅。氣化固有主。廣川想前賢。桑林憶往古。敢告長民者。毋徒事零舞。希經齋集二

蠶

嗚嗚箔中蠶。下上惟桑食。飽腹樂起眠。秩秩咸自得。近來愆雨暘。昊天作苛虐。遠揚樹牆下。苦無沃若色。葉少蠶衆多。嗷嗷日欲長。負餒各尋求。紛紜走筐側。諒此豈得已。旁觀心惻惻。時和物自阜。變理伊誰職。古人任我饑。斯語終當則。希經齋集二

霖雨卽事

諸陰未肯閉。霖雨連朝夕。洪潦日滂至。田野失阡陌。眼看歲欲凶。人情正憂迫。有或笑且言。向天手雙戟。我獨願昊蒼。水來更數尺。爲問爾非狂。此言何太逆。答云君勿疑。爲君吐肝膈。我生命不辰。連歲遭艱厄。旱澇遞相仍。從來無擔石。蔽體少完衣。棲身有破宅。欲救眼前瘡。那免多逋責。時至無抵償。忍氣受呵斥。目下米騰貴。求之如拱璧。今此雨不休。寧望秋成穫。困篋久空虛。生計何從適。與其受百磨。孰若胥沈沒。僕本情緒惡。聞之涕欲雪。蒼蒼斯蒸民。有身誰不惜。彼咎各有歸。疇使伊蹙額。古人亦有言。爲治至纖悉。釀災與恤患。一一布方策。惟在司民命。實心爲區畫。焉得有幸老。致被堯舜澤。遠近多流亡。左右無補闕。愁來不能寐。臥聽簷聲滴。希經齋集二

里巫行

里巫業巫自年少。每向人誇梗陽妙。鄰家有病爭迎來。入門周覽作微笑。須臾雞豚一一陳。致辭恍惚臨

天神。被除轉向主人語。君家厲鬼悉屏去。君能終不事苦水。盤肴雖薄神亦恕。醉謝主人巫出門。剪紙升屋旋招魂。猶恨迎巫昔不早。里巫仍過東家禱。希經齋集二

吳偉業 梅村先生詩集十卷 梅村集四十卷 吳梅村家藏稿五十八卷 靳榮藩吳詩集覽二十卷 吳翌鳳

梅村詩集箋注二十卷 程穆衡梅村詩箋十二卷 詞一卷 詩話一卷 補一卷 印光奇吳詩校正二

十卷

吳偉業。字駿公。號梅村。太倉州人。崇禎四年進士高第第二人及第。授編修。少受學于張溥。溥爲復社黨魁。操縱朝局。偉業初登第。溥令上疏劾溫體仁。偉業謝不敢。而別劾體仁之黨蔡奕琛。忌者側目。遂所假歸。八年始入都補官。溥益與體仁構衅。而有陸文聲訐告復社結黨亂政之事。擾攘數年。至體仁罷政。其事始稍已。十年偉業復嚴劾輔臣張至發。翌年與楊士聰共劾吏部尙書田惟嘉太僕寺卿史董。至發傳體仁衣鉢。而出史爲至發鷹犬。十二年出爲南京國子監司業。翌年陸中允轉諭德。以請養不赴。南都立。起補少詹事。時馬阮當權。赴官二月復辭歸。入清杜門不出。然猶主持文社。數爲十郡大會。會于虎丘。聲名益重。順治十年。陳名夏陳之遴同爲大學士柄政。與馮銓劉正宗爭權。名夏社盟舊人。而之遴與偉業兒女姻親。思借偉業文采以結主知。因屬江南總督馬國柱具疏力荐偉業。敦促就道。阻其行者甚衆。經年不能決。終于就道。比入都補官弘文院侍講。轉國子監祭酒。僅委以修書。所謂虛相位以待者。竟無

其事。未幾。名夏誅死。之避發盛京居住。禁社盟。興科場之獄。皆黨爭報復。十四年。偉業以奔繼母喪得南歸。自後家居者十四年。與子曠疏云。每東南有一獄。長慮收者在門。及詩禍史禍。惴惴莫保。奏銷以在籍部提。牽累幾至破家。既免。而又有海寧之獄。無何。陸鸞告訐反坐。吾祖宗之大幸。亦東南之大幸也。所謂詩禍。當指啓禎詩選。史禍如是莊史。不應列在閉戶十年之時。奏銷事嘗見偉業與所親書。怖畏幾死。賴門人盧紘爲糧道而免。海寧之獄。疑之避抄沒。追究寄頓。陸鸞事見杜登春社事始末云。陸鸞枿人。借江上順治十六年鄭成功率師陷鎮江攻南京以傾梅村而擊兩社。懷交社復聲社上書告密。首及梅村。云係復社餘黨。與舉社事。大會虎丘。將爲社稷憂。發外查審。當事力雪之。置陸鸞于法。士心始安。因自謂一生遭際。萬事憂危。然猶以其間成春秋地理志。春秋氏族志。復社紀聞。綏寇紀略。紀略蒼萃衆事。較戴笠彭孫詒之書爲備。乃身後幾以之破家。又偉業之所未料者也。卒于康熙十年。年六十三。事具貳臣傳乙編。及顧湄吳梅村先生行狀。遺命以僧服斂。題詩人吳梅村之墓。蓋悔之也。其詩竟風行一代。初婁東與雲間分派。皆取徑唐賢。偉業謂陳子龍始崇右丞。後擬太白。子龍謂偉業詩似李頎。所不同者。偉業漸涉宋人藩籬而已。其詩以七言歌行自成一體。事固足傳。而吐辭哀艷。善于開闔。讀之使人心醉。然以擬元白。則不免質薄而味醜。喜用口語。亦是一蔽。錢陸燦指蕭史青門曲自家兄妹話酸辛句云。可付盲女彈詞也。七絕頗有佳篇。五古學杜有率爾者。七律只謀佳句。五律則陸燦所謂直布袋。清涼山讚佛詩。世祖出家。事本存疑。乃去天萬里。遽作勘定語。爲世口實。致淺薄者。拮據及于董宛。殊可閔笑。絕句所詠時事。或見小報。或歸客

所述。以讒語括之。熟悉清初事者。一見卽知。其不能知者。雖揣測無益也。讀史偶述三十二首。其三翻譯經書。四詠世祖讀書室曰孚齋。徐元文爲作說者。五賜翰林官裘及官服。十一范文程荐其增生員盧景入直翰林。十二詠攝政王多爾袞。十三世祖常幸天主堂。十五致歎其時禁用萬曆年號。十七禮烈親王。十九洪承疇金魚池賜園。二十二世祖幸查園。二十五世祖工繪事。二十六攝政王病時。衛輝進竹瀝。爲一方之累。二十七禮部徵高僧十九人。焚修西苑蕉園。讀史有感八首。一二言世祖之崩。三言后。四言以後無奪人妻者矣。六董鄂傷子而死。七八疑帝非眞死。偶得三首。一旗幟。二黃臚李五。三帝姊下嫁蒙古王。古意六首。一廢后。二三四五宮人失寵者。六季開生諫買揚州女子。其文于歸唐王李外。別成一體。雄厚遜于錢謙益。而委曲條鬯。亦有可取。世乃譏其不駢不散。此讀茅鹿門書而未通者之言也。紀事之文。心存畏忌。不敢表章滄桑間事。然所述者。皆身經目擊。較傳聞失實者固有間矣。梅村先生詩集。刻于順治十七年。託之門人所編。首載謙益序及書。偉業聲望輩行在謙益後。故倚之爲重。而謙益以偉業復社黨魁。亦頗推之。及謙益既沒。宋徵璧乃述偉業之言。以謙益所修史及列朝詩集。盡出程嘉燧手。朱長孺作書詰之。偉業不答。是果有其語矣。競名或心有不滿。二者必居一于此。然其言甚誣。未足取信于人也。梅村集四十卷。當是晚年自定。盧絃爲之刻于康熙九年。猶及觀成。別有梅村家藏稿五十八卷。近人以其詩文多溢出本集而刻之。不知十卷本尙有六十餘首。爲藏稿所無。江左三家詩中亦有絕無僅有者。靳榮藩始爲之作注。吳詩集覽二十卷。刻于乾隆四十年。稱爲詳贍。頗徵舊聞。唯滄桑間事。諱莫如

深。吳翌鳳繼之有梅村詩集箋注二十卷。刻于嘉慶十九年。益徵用典所出。翌鳳搜求清初往事甚力。不應此獨闕如。或有所避。臨時抽出耶。程穆衡梅村詩箋十二卷。詞一卷。補一卷。成書于嘉慶三年。自序唯貴覈今。無煩徵古。穆衡素以博洽聞。留心鄉邦文獻。著其東者舊傳。寫吟。他所撰著甚衆。此箋注事。十已得其五六。可謂難能。改分體爲編年。雖未能豪釐不失。而大體無誤。唯據錢陸燾批本。題曰錢湘錢批不傳。世遂以貴錢者貴程。昔年予求得曹炎過錄本。有炎手題一行云。康熙甲午_{二十}夏_十日。得錢湘靈先生閱本。殊有開益。故臨是本。炎字彬侯。號鶴溪主人。常熟人。客洞庭席氏。嗜手鈔書。有鄉先輩陸敕先馮定遠之風。孫洪市肆藏書歌。一廚連屋當屏風。一匱遮門充閣度。卽爲炎作。詳見葉昌熾藏書紀事詩。批語有朱筆。當出陸燾。藍筆不知何人。自謂丁酉_{順治十}北闈副榜。于陸燾所舉潦倒二字。出于晉書。頗有是正。穆衡所引有出于藍筆者。混然無別。疑所見亦過錄本。蘆洲行引錢批云。詩多文移案牘語。蓋自爲一體。此本無此二語。但云幾于張靜軒矣。或過錄有未盡耶。錢批多糾彈詩之累句。能證舊事者甚罕。且不免微誤。穆衡無所別白非是。詩箋未刻。只流傳鈔本。稱吳翊爲偉業曾孫。翊字振西。繼善孫。嘗與修一統志。康熙五十一年進士。候補內閣中書。卒年六十。見州志。穆衡與翊交好。不應有誤。必傳鈔者誤以草書姪字爲曾字。校者未審。遂至貽誤。又楊學沆以所作注。名爲詩箋補注。與穆衡作注之旨。大相刺謬。傳鈔者不察。竟以與詩箋合併。亟宜裁正。印光奇吳詩校正二十卷。似注非注。云擇詩二十首。附以辨正。多駁斬注。亦有見地。頗詆顧師軾年譜之誤。學官刻書。疑與年譜爭閑氣耳。

臨頓兒

臨頓誰家兒。生小矜白皙。阿爺負官錢。棄置何倉卒。給我過誰家。朱門臨廣陌。囑儂且好住。跳弄無知識。獨怪臨去時。摩首如憐惜。三年教歌舞。萬里離親戚。絕伎逢侯王。寵異施恩澤。高堂紅氍毹。華燈布瑤席。授以紫檀槽。吹以白玉笛。文錦縫我衣。珍珠裝我額。瑟瑟珊瑚枝。曲罷恣狼藉。我本貧家子。邂逅遭拋擲。一身被驅使。兩口無消息。縱賞千黃金。莫救餓死骨。歡樂居它鄉。骨肉誠何益。梅村集一

蘆洲行

江岸蘆洲不知里。積浪吹沙長灘起。云是徐常舊賜莊。百戰勳名照江水。祿給朝家禮數優。子孫萬石未云酬。西山詔許開煤冶。南國恩從賜荻洲。江水東流自朝暮。蘆花瑟瑟西風渡。金戈鐵馬過江來。朱門大第誰能顧。惜薪司按先朝冊。勳產蘆洲追籽粒。已共田園沒縣官。仍收子弟徵租入。我家海畔老田荒。亦長蘆根豈賜莊。州縣逢迎多妄報。排年賠累是重糧。丈量親下稱蘆政。鞭笞需索輕人命。胥吏交關橫派征。差官恐喝難供應。江南尺土有人耕。踏勘終無豪占情。徒起再科民力盡。卻虧全課國租輕。積年升科。老田本漕白重課。指爲無糧侵占。故有重糧再科後。重糧去而定爲蘆課。視原額反少減矣。甚言害民而又損國。其無益如此。詔書昨下知民病。解頭使用今朝定。早破城中數百家。蘆田白售無人問。休嗟百姓困誅求。憔悴今看舊五侯。只好負薪煨馬矢。敢誰伐荻上漁舟。君不見。舊洲已沒新洲出。黃蘆收盡江潮白。萬束千車運入城。草場馬厰如山積。樵蘇猶向鍾山去。軍中日日燒陵樹。梅村集五

捉船行

官差捉船爲載兵。大船買脫中船行。中船蘆港且潛避。小船無知唱歌去。郡符昨下吏如虎。快槳追風搖急櫓。村人露肘捉頭來。背似土牛耐鞭苦。苦辭船小要何用。爭執洶洶路人擁。前頭船見不敢行。曉事篙師斂錢送。船戶家家壞十千。官司查點候如年。發回仍索常行費。另派門攤云雇船。君不見。官舫鬼峩無用處。打鼓插旗馬頭住。梅村集五

馬草行

秣陵鐵騎秋風早。旣將圍人索芻藁。當時磧北起蒲梢。今日江南輸馬草。府帖傳呼點行速。買草先差人打束。香芻堪秣飽驕驕。不數西涼誇首藉。京營將士導行錢。解戶公攤數十千。長官除頭吏乾沒。自將私價僦車船。苦差常例須應免。需索停留終不遣。百里曾行幾日程。十家早破中人產。半路移文稱不用。歸來符取重裝送。推車挽上秦淮橋。道遇將軍紫駟鞍。轅門芻豆高如山。長衫沒髀看奚官。黃金絡頸馬肥死。忍令百姓愁饑寒。回首當年開僕監。龍媒烙字麒麟院。天閑轡逸起黃沙。游化三千滿行殿。蔣山南望獵痕燒。放牧秋原好射雕。寧卒雕胡供伏櫪。不堪極目草蕭蕭。梅村集五

打冰詞

北河風高水生骨。玉壘銀橋堆幾尺。新戍雲中千騎馬。橫津直渡無行迹。下流湍悍川途開。吹笳官舫從南來。帆檣山齊排浪進。牽船百丈聲如雷。雪深沒髀衣露肘。背挽頭低風塞口。相逢羨殺順流船。急問來時河凍否。溜過湖寬放插平。長年穩望一帆輕。夜深側聽流澌響。瑣碎玲瓏漸結成。篙滑難施櫓枝折。舟

人霜滿鬢鬚白。發鼓催船喚打冰。衝寒十指西風裂。吁嗟河伯何徑徑。白楮如雨終無聲。魚龍潛逃科斗匿。殊耐鞭杖非窮民。官艫裘酒自高臥。只話篙師叉手坐。早辦人夫候治裝。明日推車冰上過。梅村集六

吳 曠 西齋集十四卷刪稿二卷

吳曠。字元朗。偉業子。康熙十四年乙卯與何焯劉大山王雲衢同舉拔貢。二十六年丁卯舉京兆。翌年成進士。由戶部員外郎。授吏科給事中。轉兵科掌印。以事罷。入直武英殿修書。丁內艱歸。以哀毀卒。年四十六。撰西齋集十卷。有陳廷敬序。謂有弟少融輯其遺詩。後六十餘年。至乾隆三十六年。少子霽始付之梓。今乾隆原刻不易得。此刻乃近人得家藏稿而傳之。其集爲詩七百七十八首。釐爲十四卷。又以稿中注刪者。編刪稿二卷。凡詩三百十八首。較舊刻幾倍之。今人但知求備。往往錄人棄餘。若此刻及梅村家藏稿之刊。雖曰好事。然失前人去取之意矣。

水匱歌

世傳西洋水匱。爲救火之具。其製以木爲匱。銅爲筒。中可貯水數斛。筒之下機軸連環。用人力擠之。水便上射。東西高下。隨手所向。遠至數十步外。邇來閩人亦能爲之。余因作歌以紀其異。

歷山山下千年銅。化作人間百丈之神龍。口噴白雨如撒菽。天瓢倒勺蛟人宮。我求于龍置火所。水妃騎龍入融風。大龍小龍各來鬪。羣雌不敢當其雄。東門舊客歎神力。仰視屋瓦飛相從。祝融告休玄冥笑。壁山翻海龍之功。我從父老問其製。海客虬鬚傳近世。八閩國工竊天巧。轉機削軸若符契。十夫之力遠可將。貯泉百斛憑水遞。長疑上帝賜九河。天跳地踔不爲厲。君不見。天漢西頭火氣昏。鄭災不用裨竈言。

瓊筓玉瓊釵無用。恨不移置司宮門。又不見。成都市上酒如注。嚙來餘臭爨巴雨。神仙之術亦偶爾。水龍
今在復何懼。爲語西京劉子駿。龍乎龍乎亦雨具。西齋集
十二

王 揆 太倉十子詩選芝廬集

王揆。字端士。時敏次子。順治十二年進士。以推官用不出。康熙十七年。詔舉博學鴻儒。巡撫慕天顏疏
薦力辭。卒年七十一。有芝廬集。

偶見

窄袖輕靴列兩行。玉河春暖鬪新妝。畫圖轉憶關氏面。笳拍誰迴蔡女腸。翠鬢半拖嫺跨馬。膩衣初浣學
熏香。衆中却步含羞去。夫婿江頭別幾霜。太倉十子詩
選芝廬集

臨清阻泊

河渠啓閉問官程。牖吏威尊阻客行。曉塔晴開篷外影。夜濤寒上枕邊聲。沙昏魚菜喧新市。日暗牛羊下
舊城。瓦礫不堪尋故迹。愁聽父老話承平。太倉十子詩
選芝廬集

王 撰 太倉十子詩選三餘集

王撰。字異公。號隨菴。時敏第三子。歿年八十有七。先刊三餘集。見婁東十子詩中。後又刊揖山集十卷。

聞鴈有感

數聲哀怨半天聞。無限離愁寄白雲。繪繳每從文字起。書空咄咄却憂君。太倉十子詩選三餘集

王 摠 蘆中集十卷

王摠。字虹友。號汲園。時敏九子。挺字周臣。號滅菴。有不自集。離憂集。揆字端士。號芝廬。有芝廬集。撰字異公。號隨菴。有三餘集。揖山集。抃字懌民。號鶴尹。有巢松集。扶字匡令。號砥菴。揆字藻儒。號顛菴。有西田集。抑字誦侯。號南湖。數次四。早卒。摠次七。最有聲。撰蘆中集十卷。吳偉業選揆撰抃摠之詩入太倉十子詩選。田雯太倉王氏詩總序。以芝廬如天女散花。幽香萬片。揖山如天風海濤。魚龍出沒。巢松奇思硬語。殿馭才華。蘆中精于持論。研尋物理。西田逸興新晴。霏霏袞袞。其言未必盡當。抃摠最窮。其辭易工。不宜與居臺閣者并論也。此集起順治十三年丙申。迄康熙三十六年丁丑。卒于三十八年。年六十四。詩有才筆。師事錢吳。七言歌行。一唱三歎。有極似梅村者。惜以游食貧窶。損其壯心。多傷鬱伊。未能奇兀。然刻畫山川。每有佳詠。亦足以傳矣。王士禛序盛稱其幽奇悲壯。感舊一集。獨無名字。以此見今傳感舊集。必非真本。

教坊老叟行

教坊烟草萋萋碧。窮巷無人席門窄。憔悴堪憐白髮翁。飄零却遇青衫客。自言先世本含香。出入金門侍

漢皇。慎簡循良二千石。恩綸趣令赴巖疆。一麾出守新安郡。五袴歌謠聞遠近。靖難兵來勢震驚。須臾忽得金川信。到處關山急羽書。嬰城死守待何如。孤軍力盡重圍裏。不食睢陽一月餘。蟻子蚍蜉援俱絕。城亡化作萋弘血。妻子哀哀入教坊。湘江竹泪痕難滅。狼籍胭脂付北風。鐵家二女怨應同。已甘身死覆巢下。只恨名編樂籍中。樂籍編來三百載。門前車馬紛成隊。對客歌傳屈柘詞。當筵舞學驚鴻態。我有二女顏色殊。芙蓉爲面玉爲膚。善和端端不足數。一時冶麗傾南都。蒼黃京闕風塵起。鑾輿來自銅駝里。此時將相戲樽薄。此日君王醉羅綺。歡樂君臣未一年。驚看四海遍烽煙。朝廷但議防蘇峻。將帥何人似謝玄。蕭蕭北伐旌旗仆。南國衣冠總非故。可憐晉祚盡昌明。千載傷心五馬渡。回首長干歎落花。青樓無復舊繁華。寧爲漂泊琵琶婦。不向穹廬聽暮笳。扁舟來到金閨住。碧窗十二櫻桃樹。一女東方遇使君。許將油壁迎歸去。去向朱門不可留。枝頭連理忽驚秋。那知纔逐吹簫侶。又早題詩燕子樓。北邙松柏招魂哭。自此焚修奉西竺。禪榻長繙貝葉經。歌臺罷理楊花曲。一女蘭橈飲碧潭。座中公子最知音。豪華自是平津舊。不惜纏頭費萬金。白楊瞬息悲風動。落紅無主埋殘壠。寂寂空傷行客心。哀詞題遍眞娘塚。細數從頭淚滿衣。誰能聽此不歎秋。乾坤板蕩家何在。骨肉存亡世已非。我聞翁言長太息。我有哀情更悽惻。翁且吞聲泣路隅。珠襦玉匣悲何極。漢武銅盤事已遙。驪山湯殿久蕭條。當時曾說冬青恨。亦有愁魂與共銷。

歲中
集一

王 抃 巢松集六卷

王抃。字懌民。又字鶴尹。時敏九子。抃與攄最才而最窮。抃之于攄。才氣或稍遜。深穩則過之。吳偉業評其詩。謂五言多平實之調。七言少盤蹙之奇。足稱知言。朱彝尊乃謂境生象外。意在言表。與田雯所謂奇思硬語。殿御才華。同爲膚語。以此判吳朱優劣。知世間少直諒之人也。今傳世西廬家書。卽抃康熙五年北游時與之者。黃與堅序其樂府。謂有舜華莊諸種曲。惜今不傳。知其所致力者。尤在曲子也。刻此集時。年已七十一。未知卒于何年。

贈孝子黃端木

漢有王原稱孝子。萬里尋親載青史。誰知後此二千年。端木黃君亦如此。聞說滇南最極邊。山箐峽峒無人煙。承平且自艱行役。況復時當離亂年。問君有親在何處。窮戀微官極南去。一朝鼙鼓遍中原。浮生進退應無據。此際思親絕可哀。板輿何日故園來。音書路隔愁難到。烽火雲連慘不開。因辭妻子出吳閩。遙望庭闈天一方。負米兵間餘敝屣。吹簫市上空囊。南來城郭皆兵燹。楚江落木風波險。歷盡千津與萬山。碧雞關路征塵滿。只道衰親無見日。豈知此地終相值。對面翻疑是夢中。燈前盡覺形容失。蕭然襆被共還鄉。蓬髮新添幾許霜。回首昆明風瘴裏。兩行清淚更沾裳。高堂無恙河山改。荏苒流光將數載。梅福辭官隱市門。管寧避世居遼海。江上春風始識荆。識荆真足慰平生。年方五十頭俱白。知爲尋親萬里行。

奇行如君古所難。只今俱作等閒看。可憐姓氏無人問。菽水淒涼布被寒。

集一

王 揆 西田詩一卷

王揆。字藻儒。號顛菴。時敏子。康熙九年進士。由編修官至文淵閣大學士。相業無聞。唯五十六年言立儲。御史八人同以爲請。揆幾得重罪。後四年。又同御史柴謙等十三人力請之。逢帝怒。責其沽名樹黨。且追溯錫爵孫受叛黨總兵劊付事以責揆。禍幾不測。卒以年老免罪。命其子詹事奕清及柴謙等十三御史。同赴西陲軍臺效力。錫爵孫不知何人。近人撰外家紀聞。謂王昭駿與太倉報本寺僧一念和尚爲逆。事敗。昭駿父子被誅。一念遁去。然據時敏自述長兄鳴虞十七歲夭。以其子撰嗣之。次兄廣虞痘殤。無昭駿之名。且上諭言受叛黨劊付。而紀聞言一念欲奉昭駿爲主。疑傳聞之誤。唯叛案必有其人。今不可知矣。揆于雍正初避位得請。唯不許回籍。六年卒。年八十四。撰西田詩一卷。迄壬申爲止。詩非所長。然眷懷故舊。情勝于文。有贈余思復惲格詩。揆居憂時。以二人爲客。嘗脫格于縲紲。又爲思復刻集。二人皆不輕爲人屈者也。其能繫一時人望。或由愛惜士類使然。

閱萬曆泰昌天啓實錄偶成

神皇初政適中興。柄國羣推元老能。百度修明諸弊革。累朝相業數江陵。
長幼宸衷自不移。每緣庭論轉遷期。苦心非是先文肅。出閣當年未可知。

紅丸應是誤庸醫。挺擊風癩事可疑。獨有移宮宜早決。楊漣當日繫安危。西田詩集

周肇 東岡文稿一卷 東岡集一卷

周肇。字子傲。太倉州人。總角入復社。順治十四年順天舉人。晚乃得青浦教諭。舉卓異。陞新淦知縣。未幾卒。年六十九。當卒于康熙二十二年癸亥。肇長王吳十二歲。吳卒于康熙十八年己未。年五十三。以是推知之。肇工詩文。吳偉業選其詩爲太倉十子之首。此東岡文稿。世無傳本。多代人之作。蓋囊筆幕游時。信筆爲文。非其至也。梅邨集有東岡稿序。謂子傲刻其詩文以問世。然則當時有刻本矣。惜其詩稿不傳。此冊有侯研德序。言失其前稿。觀其爲文若流泉。下筆不能自休。平生爲文。當數倍于此。而皆不傳。幸而留于天壤間者尙餘此數十篇也。十子詩選中肇詩一卷。又見于國門集者五古三首。五律十二首。七言律絕各三首。信是才人。若輯諸選本。當更有若干篇。燕臺文選有呂石香傳。祭侯伯子文二首。此集失載。

雜感

瀟瀟東流水。穠穠桃李枝。菁華難永保。坐看秋風吹。瓊侯將搖落。桃李不自知。高門冠蓋日。東閣賓朋時。一朝恩寵去。梁燕從此辭。去年莊青翟。今年劉屈氂。覆轍相尋續。累卵高必危。牽犬望里門。鶴唳空遙思。英君秉乾柄。帷蓋恩難施。胡不早辟穀。白雲相與期。

北陸捐媀孀。陰風吹茫茫。云是收楊惲。幽憤吐辭章。丹書亡左驗。赫怒何能當。所恨妻莫訣。衰親隔參商。婢僕沒都官。田園誰覆藏。含血立斯須。執持寄高堂。人生會有死。死不以其方。行路盡掩鼻。能勿摧肝腸。東岡集

沈受弘 白澗集四卷 白澗文集四卷

沈受弘。字台臣。太倉州人。少從陸世儀受經世之學。善持議論。能爲八家之文。弱冠以詩受知于吳偉業。比偉業沒。乃于柩前執贄稱弟子。家貧不事進取。囊筆走四方。特甦脯爲俯仰之資。嘗再至京師。北自齊魯。南及閩粵。才華旣富。登臨游覽。足以發其藻思。多感慨詠歎之什。晚歲以齒德尊于鄉。康熙五十二年。與王吉武皆七十。唐孫華張□□又長十歲。孫華爲賦四個老人三百歲之詩。卒于□□年。年七十□。世居沈白澗。故以名集。詩爲自定。文則其子起元乾隆中官河南按察使時所刻。削去紀事表幽之作。而以牽率酬應者充塞篇幅。爲可惜也。

贈毘陵惲正叔一百韻

毘陵惲正叔。書畫今所無。書工羲獻法。唐宋兼臨摹。畫精熙筌理。花鳥多新圖。絕藝高聲價。姓名走東吳。人懷尺幅去。寶貴同璠璣。家貧賴筆研。得錢供朝餽。遊歷公卿門。一囊隨奚奴。今夏獨炎暑。扁舟下姑蘇。云訪西廬老。謂王太常煙客先生靈光遽凋殂。以之不得意。慟哭投生芻。索居婁江畔。秋老歲將殂。昨從徐郎

座。與我識面初。丰神見秀濟。白晢微有鬚。賦詩獨敏捷。揮灑華藻敷。君本古賢人。豈惟弄翰觚。向聞生平跡。奇偉傳江湖。從君叩其略。欲語還踟蹰。憶年在申酉。變亂生兩都。吾父一縫掖。忠憤鬱不舒。跳身浙東走。台頂茅可誅。維時我八齡。實與仲兄俱。錢塘潮水竭。北馬紛騰趨。倉皇復南竄。嶺嶠經崎嶇。轉入甌閩國。偏安猶一隅。吾父迫際會。從王曾執父。皇天必翦滅。事敗只須臾。由茲托方外。巖谷長迷逋。州縣義兵起。歆盟遍村墟。主將辱推戴。揭干厲稷鉏。建寧王閣部。旗幟明火荼。遠迎帝室胃。草草稱乘輿。貽書話同鄉。要父同謀謨。小子奉嚴命。偵察前趨趨。此地尙全盛。兵強富儲胥。竊觀王公爲。魁傑實丈夫。一見厚款遇。開顏傾玉壺。幕府幸無事。日維飲醍醐。高會賓朋列。歌舞紅氍毹。中表逢龔生。相留但歡娛。豈知仙霞破。突騎忽長驅。身居圍城裏。矢石交體膚。殺聲動天地。拒守百日餘。士卒多勇敢。大將親援枹。吾父外請救。羽毛急軍符。一朝黃霧塞。對面迷雙曠。敵人遂登陴。誰復能枝梧。短刀夾長戟。格鬪血流渠。烈火復四起。煙焰連街衢。滿城百萬戶。無一存妻孥。我年纔十五。被執爲囚俘。羶酪不能咽。飢腸日空虛。彳亍行伍間。乃見侯門姝。青樓舊相識。憐我千金軀。引入將軍帳。餘餐賜盤盂。後歸陳制府。收拔稱掌珠。裝我紫貂冠。飾我繡羅襦。出入照路光。蹀躞乘龍駒。自古有養子。亂離迹難拘。所痛我兩兄。荆榛沒枯顛。自與吾父別。信音各闊疎。一紙偶得書。存亡問何如。他日儻相見。會須還故吾。開緘却遠望。不識父焉居。制府旋遇難。萬里回喪車。我從阿母行。道出靈山區。山寺聞神僧。幡幢開給孤。母施布地金。雲堂設伊蒲。衆中得吾父。變服已浮屠。欲認不敢前。形勢反多虞。業爲制府郎。母威劇於

菟。家將繞四旁。臂弓腰鹿盧。密約得私見。哭罷交持扶。神僧爲設法。乞母鳳凰雛。此子年命短。宜作釋迦徒。阿母戀不捨。雞鳴戒前途。提攜便北去。京國高門閭。謂當襲遺蔭。橫玉紆青朱。長跪向母告。富貴非吾須。願終雲水遊。佛祖言不誣。宗祏自有主。其立親賢且。母意竟感悟。與辭拜增除。飄然一身歸。奉父尋故廬。曾傳訓誠切。幸未蒙簪裙。旨甘且盡養。手自親中廚。承歡二十年。奄忽終桑榆。回頭念往事。魂夢慘模糊。余坐聽君語。良久爲嗟吁。伊昔革命日。綱常委泥塗。頑民及義士。草澤竊奮呼。忘身棄妻子。舉動或近迂。其心亦艱苦。固與鄙俗殊。君能成父志。涅槃而不污。終焉得聚合。身作返哺鳥。建寧小朝廷。效死一城孤。睢陽與平原。大節無以逾。悠悠千載後。青史恐荒蕪。君也老布衣。高臥今菰蘆。世人愛風流。一技徒稱譽。如君父子事。遺軼皆堪書。我爲作此詩。庶表忠孝模。白蓮集三

案世逆憚格幼年爲陳錦養子及爲僧事。多誤。此則出于格自言。不獨詳格生平。且有關隆武時事。爲最有關係之作。

悲吉州

客過吉州道。風雨舟不行。吉州離亂後。景象觸目驚。當時十萬戶。處處蓬蒿生。借問殘破者。爲『賊』爲官兵。父老言『賊』來。三年居此城。官兵外攻圍。閭井皆連營。深山亦搜括。百里無人聲。可憐辱婦女。可痛掘墳塋。雖奏克復功。所餘僅疲氓。我聞父老言。涕淚爲縱橫。人生何不幸。遭遇時戰爭。死者既已矣。存者家室傾。今當太平日。長吏廉且清。嗚呼謝父老。努力事春耕。白蓮集五

崔華餘不軒詩集一卷

崔華。字不凋。太倉州人。順治十七年庚子舉人。爲王士禛南園分房所得士。稱其工詩畫。佳句有丹楓江冷人初去。黃葉聲多酒不辭。因目爲崔黃葉。又有春水碧于前度日。桃花紅似去年時句。因足爲論詩絕句曰。江南腸斷何人會。只有崔郎七字詩。獎許備至。居易錄稱其以不得志卒。程穆衡謂爲墮水死。年則不可考。所撰餘不軒詩集一卷。分體詩一百六十六首。有華旋元序云。自總角至今。積二十餘年。雅不欲以詩見知于世。與之交五年。始得破碎錄等詩讀之。序似作于康熙十年左右。詩之畧年者有己酉爲康熙八年。至戊辰則二十七年矣。感舊集所錄諸篇皆無之。華詩出筆卽秀。至老不衰。惜多牽強應酬之作。不足以見性靈。古體殊有筆仗。似勝律絕。世傳有櫻桃軒集。求之累年未得。藏家亦無著錄者。

疾首吟

官長坐斯須。聽臣歌疾首。赤日烈火燒。抱甕灌田畝。禾如絲髮命。不得久。手足焦枯辦官糧。官糧不足帶枷杻。去年枷杻猶自可。今年枷杻立殺我。父在南死。子賣北走。女爲人婢。妻爲人婦。頃刻華堂斧作薪。暫充簿吏一尊酒。片言觸怒。去土三尺厚。臣今未死。受諸躡蹀。願君持書告君父。勿忘億兆生民苦。

餘不軒詩集

長干行

長干商人麗顏色。朝買粲梁夜工織。織成麻縷葛紵絲。霜清月白負戴時。粲梁在篝滿墟里。腹中果然不入市。今年商人殫筋力。揚帆南粵轉西域。明珠黃金白玉盤。火齊琅玕間木難。借問此物何爲爾。答言丞相府中喜。政事堂前接車幔。堂懸權衡手持筭。大賈明珠便開府。白玉作宰黃金簿。崎嶇江南暫時春。可教奔走無數人。餘不軒詩集

早發蒙陰

驅車逐鳴雞。邨烟曙光接。鬱紆出巷嶺。縈迴度林葉。居人言昔年。川原如雉堞。烟火聚萬里。通夕走蹀躞。一自連干戈。饑饉歲稠疊。南經司吾城。北暨聊與攝。弄兵者相望。挺險熾行劫。構榼灰燼中。宮庭表遊獵。迎敵者囁嚅。矢鏃洞胷脇。荒荒絕賓旅。磨語鬪趨捷。白楊早飄零。鬼嘯陰雨聾。方今鷄鳴初。客子換跋涉。餘不軒詩集

黃與堅 願學齋集四十卷

黃與堅。字庭表。順治十六年成進士。授推官。旋以奏銷罣誤。康熙十七年應博學鴻詞徵試。授翰林院編修。擢贊善。典貴州鄉試。原銜充講官。以葬親乞歸。與堅工詩。以性情勝。年八十二卒。有願學齋集四十卷。

擬古

有道先謹微。哲人尙早識。干戈起毫芒。江河始涓滴。爰悼忠孝家。貪饒誤驅迫。濡忍不須臾。橫語被誣讎。反接出廣衢。駢首受誅極。呼搶天地驚。寧同夏侯色。巖岩闔閭高。瞻望各垂泣。

孤孀入官家。才首衣素練。有子革裹尸。奴婢沒郡縣。詔出薊城門。上馬心怖顛。不敢問還鄉。悽然泣覆面。絲鬢寒颼颼。道路弗忍盼。下馬非舊廬。饘粥數梗斷。有客前致詞。訶遣不得便。孀母自出堂。衷腸似攢箭。手持雙板扉。相望不相見。搖手向故人。兩淚落如霰。

夕陽被西嶺。浮雲恣翱翔。矯矯雙飛翼。歸鴻一何忙。言念親與故。銜憂入團牆。泥首伏斧鑕。蹀跣負刑傷。明月不我照。冷壁淒燈光。相對皆異族。塊然裂肝腸。顧此不能寐。中宵起徬徨。

少婦年十七。未曾識路隅。常服被紉素。簪珥隨所須。忽覩別離苦。薄命兼馳驅。雙手攜乳革。流涕沾羅襦。夫婿不復見。卽與飢寒俱。饑寒所不辭。但願全孤兒。太倉十子詩選忍菴集

王 吳 頤園詩彙三十五卷太倉十子詩選忍菴集

王 吳。字惟夏。世懋之孫。舉鴻博不第。賜內閣中書銜。吳已先卒。年五十三。清史列傳文苑有傳。撰頤園詩稿三十五卷。自崇禎十六年癸未迄康熙十七年戊午。缺丙辰丁巳康熙十五年兩年。二十三卷上以前爲吳自編。餘爲其子釋高續編。其孫良穀手錄。未有良穀乾隆乙丑識語。謂當先刻詩稿。聞太倉圖書館藏有

碩園詩藁三十卷。寶香閣刊本。未知卽良穀所刻否。吳詩才氣無雙。筆力橫逸。足爲太倉十子眉目。十子中獨許旭高尙其事。讀其詩令人感慨。若吳惟窮愁足賞耳。

大雨行

君不見。去年苦旱無菽麥。土膏寸枯千里赤。日盡長空雲片乾。老稚相攜望秋陌。又不見。今年大雨卒未休。天潢倒注滄海流。黑蜺嘯風太陽匿。兼旬矇昧忘春秋。此時鄉國烽烟起。鐵馬長驅飲江水。幾多逃死避兵人。可憐半委泥塗裏。泥塗宛轉誠堪悲。行人無數泣路岐。其間還有最悲事。白髮老翁攜幼兒。初傳兵戈在中路。兒飢索食老翁怒。相視無非骨肉情。伴棄道傍渾不顧。須臾持抱却同行。前阻大澤波迴縈。翁時褰衣左右顧。牽兒欲涉神還驚。予也觀之心悽楚。艤舟往渡無疑阻。相憐同是窮途人。無聊且與老翁語。翁言舍北兩三家。孤兒背面啼阿爺。更有東隣十五女。被驅馬上弄琵琶。猶記先皇世全盛。野農無事耕作競。今朝荒主輕山河。却將溝壑填民命。坐使流移滿道途。鋒鏑所及皆無辜。我今生死亦未曉。所知今歲田園蕪。予聞此語轉嗚咽。翁自吞聲前路別。船行風浪夜冥冥。兩岸青燐盡鬼血。

碩園詩藁三

王緝修 芸架詩稿二十二卷

王緝修。字嵩少。號方艸。吳子。康熙二十三年副貢生。入國學考授知縣。四十一年選府谷知縣。閱十年卒。撰芸架詩稿二十二卷。自辛酉至辛巳。

康熙二十年
至四十年

二十一年之詩。而以幼作一卷附焉。歲爲一卷。一依

碩園詩稿之例。詩格極似其父。才或不逮。較同時力求新警而失之漓者。猶爲得之。

打麥歌

五月麥稍黃。家家築廣場。麥風吹妾面。好著舊衣裳。
郎刈麥根齊。妾打麥子墜。十斛但多收。知儂心力瘁。
麥子外皮黃。中心頗潔白。妾願芒刺除。豈敢苦煎迫。

古語及時好。麥秋幸已盈。黃梅明日到。難與料陰晴。芸架詩稿六

武城

河上蕭條邑。相傳舊武城。高人無徑托。文吏有梨鳴。俯仰風斯古。徘徊感易生。近今賢令尹。難免督郵迎。芸架詩稿六

王曜升 太倉十子詩選東臯集

王曜升。字次谷。與兄昊齊名。有東臯集。

過嚶城故宅

戍樓當日海雲昏。萬竈貔貅向此屯。豈信彈丸留戰壘。却羞片紙出降旛。城亡尚有衣冠氣。宅廢空餘草木痕。一部笳聲秋牧馬。可堪寒雨泣忠魂。太倉十子詩選東臯集

唐孫華 東江詩鈔十二卷

唐孫華。字實君。太倉州人。康熙二十七年進士。當選朝邑知縣。以荐試改禮部主事。調吏部。三十五年。典浙江鄉試。年六十三。遂引年告歸。嘗授授敍讀。授敍方貴幸用事。屢勸之起。不應。優游林下幾三十年。卒于雍正初元。年九十。事具清史列傳文苑傳。撰東江詩鈔十二卷。孫華少工爲文。通籍後。始肆力于詩。天才膽敏。善于隸事。筆仗頗近東坡。朝局民隱。發洩無餘。同時詩流鮮有直言如此者。

斲養兒

南人養兒鬻旂下。朝刈薪芻夜餵馬。羝羊可乳烏可白。此生已分歸不得。日月西出河倒流。此生辛苦無時休。一斗黃梁不濟飢。失意動復遭鞭笞。敗簣裹尸棄坑谷。耶孃在南知不知。君家有犬得人憐。朝朝食肉常安眠。爲畜翻貴爲人賤。物情顛倒容誰辨。自悲生死草菅輕。不如作君堂下犬。東江詩鈔三

記里中事

膠庠洶洶日揚波。歎息無端觸網羅。但爲人窮輕性命。豈知吏法重催科。書生羣聚遊談出。世上危機筆舌多。側足焦原輕試驗。千尋無綆待如何。

時事何容口舌爭。畏途休作不平鳴。藏身複壁疑無地。密語登樓怕有聲。書牘人方尊獄吏。溺冠世久厭儒生。閉門塞竇眞良計。燕處超然萬慮輕。東江詩鈔九

水車行

一月不雨蒸炎熇。上田下田禾欲焦。東方未明盡室出。婦子相呼牽桔槔。蓬頭露體鬪輕健。三尺青布裁圍腰。終朝軋軋直至暮。首如鶴啄尻益高。麥飯一盂取充腹。唇乾不得沾村醪。踏車晝夜空辛苦。坂田墮處猶乾土。樹頭隱隱聞雷鳴。車上農夫喜欲舞。遙指陰雷西北來。今夕高眠聽澍雨。東江詩 鈔九

鋤田行

瀕海高田半鹵鴻。木棉初長不滿尺。非種相侵易蔓延。手把鋤頭那許釋。久晴無雨土益乾。鋤頭下處如擊石。偏到炎天戶戶忙。日午當空火繖赤。可憐一笠不遮身。僕背長供紅日炙。鋤頭側入不容差。誤鋤惟恐傷根芽。草盡更祈微雨潤。眼穿幾日開黃花。海風但願無漂蕩。秋到家家動紡車。東江詩 鈔九

哀羣盜

時南浙有大獄。捕二首。索妖僧一念甚急。錄一。

共道孤城漸合圍。村坊白日駭旌旄。但誇身手時無敵。誰料頭顱夜欲飛。卉服泉袍裝鎧甲。神鉦社鼓作軍威。紛紛結聚皆兒戲。似戲何當觸禍機。東江詩 鈔十

徙邊婦

有序。里中狂賊三十餘人。以罪見法。妻子皆徙極邊。株送之日。婦孺相攜慟哭過市。路人皆哀之。予爲作詩。

蕭何制法律。婦女無嚴條。獨有從夫刑。死生無所逃。哀此裙襦輩。孽尤非已招。失身落狂且。飲博恣遊放。酒食偶見誘。兒戲張旂旛。豈知櫻重繆。不保領與腰。身既死都市。家當徙并遼。幸免門屋誅。寬恩荷聖朝。生小不出門。何由識邊徼。一朝見收捕。魄喪精魂消。爺孃走相送。牽袂羣號咷。尙有懷中兒。哺乳

不忍拋。亦有韶年婦。纖步頗嬌嬈。背人揜面啼。飛蓬首不膏。仰呼蒼蒼天。慟哭秋雲高。縱使烏頭白。無由返江臯。律非陰訟輕。罪異春稟勞。遼水杳茫茫。萬里程途遙。雪花大如掌。寒風利於刀。骨向窮沙埋。齒爲野火燒。婦人豈預謀。薄命隨所遭。寧嫁窶人子。食糠且餽糟。禽鳥各有匹。養雛得安巢。雙飛慎求偶。勿逐獍與梟。東江詩 鈔十

開河行

朝開河。暮開河。要令斥鹵回盤渦。朝點夫。暮點夫。里胥追捕如亡逋。當今聖主仁如天。濬河本爲利農田。興作兼存救荒計。鳩工盡發水衡錢。嗟此河夫多菜色。晨餒何能待日昃。五月官錢半未頒。爾有肉糜從爾食。千畝萬鍾聽鼙鼓。三丈河身八尺土。不辭霑體遍塗泥。可奈淋頭逢凍雨。樹上愁看逐婦鳩。桑間已有催耕扈。歷久河工未告成。農事匆忙漸旁午。縱得青錢給一餐。待餽不救妻拏苦。更遭官長日巡功。筆撻波民恣訶怒。非關民力怠工程。自爲皇天不肯晴。未看翠毯盈疇闊。早見紅榴照眼明。尙作官身繫河上。何時壠畔得歸耕。昔聞周夏兩名臣。周文襄公忱 夏忠靖公原吉疏濬川渠決滯壩。遍從水道訪曲折。輕舟屏從泊河濱。時入茅檐諮利病。村農共許話艱辛。澤被東南三百載。到今功德未全湮。嗚呼大賢久不作。爾曹誰復知經綸。今日河夫盡犛獨。背似土牛耐鞭扑。幾回持囊請官糧。官糧早飽官胥腹。重膂方憂疫癘生。獨漉水深泥又濁。自是農夫性命輕。誰能久候官倉粟。但願功成早放歸。急向田間叱黃犢。東江詩 鈔十

官倉

今年窪土半汙萊。惟有高原存秬稌。井賦常憂不足供。敢望私家餘二鬴。俄傳府帖下徵糧。稅長閭氓走旁午。月令會聞較斗甬。周官嘉量銘辭古。民間出入尙須平。何況徵收自官府。斛式製自崔中丞。頒行實由元世祖。至元間。中丞崔瑛。始製斛式。口狹底廣。至今用之不改。底寬口窄有成規。早禁淋尖戒多取。倉場斛多浮滿。俗謂之淋尖。此式遵行四百年。一旦奸胥敢變侮。爭詫今年斛製新。上下均平如甌甑。斛面高堆輒數升。悉委倉夫操量鼓。胥使倉夫如使奴。指麾總奉胥爲主。民間粒米重於珠。載向官倉賤如土。早時賤價胥折乾。盡剝窮民臂血補。胥富全看金穀輕。民窮甘受鞭笞苦。狼籍倉場填淤泥。穀飛眼見都成蠹。可憐小戶闕晨炊。破竈無煙轆空釜。

東江詩
鈔十一

王時憲性影集八卷

王時憲。字若千。太倉州人。康熙己丑^{四十八年}成進士。選庶吉士。授檢討。是集分水邊林下稿。桐溪稿。無隱林稿。靜寄軒稿。莊澗稿。荆溪稿。楚游稿。粵游稿。各一卷。凡古今體詩七百三十三首。有毛奇齡序。作于壬辰。^{五十年}已九十矣。言詩有情文。非無文無學者所能覬覦。力斥王士禛喜南宋輕率。謂詩只有情之謬。蓋時憲喜摹魏晉唐宋。不名一家。與奇齡標格出于雲間。專驚三唐者有合。故借性影二字。發揮其說。性影者情也。實則時憲擬體。徒存腔拍。非真知六朝者。篇幅雖多。無紀事之作。詠物游覽。亦未得真詣。

雙絕行

有序 吳中張老樺昭之曲。陸耶韶九之蕭。先後著聲。皆絕技也。余過給諫寓齋納涼。遇兩人。因屬各盡所長。偷歌相和。聆者無不腸斷。爲賦雙絕行。以貽之云。

綠藤架下涼風吹。火龍炎炎午失威。張老陸郎鬪絕技。竹肉雜奏無參差。秦女樓中鳳皇叫。山禽學之不
得肖。一串真珠透畫梁。彙彙不絕偏同調。煙絲細引幽窗中。曼聲宛轉將毋同。鴛鴦雙飛聲嗷嗷。聞者難
辨雌與雄。幽咽知非隴頭水。座客皆爲斷腸死。曲聲簫聲迺至此。性影 集一

讀邸報書事

民財日已竭。民風日以奢。萬國動蠶桑。匹婦祀菑宓。初夏鄉村行。南北響綠車。繭絲白于雪。織作不停
梭。巧能敵天孫。機杼增紛華。別有貂輕襖。狐白毛氈筆。往往一裘成。中產破十家。纂組無所禁。惟眎家
資多。下賤至僕隸。其體厭綺羅。優伶衣錦繡。爭翦天邊霞。貧士畜于財。短褐軒莫遮。彼不稱其服。難別
龍與蛇。欲令此風息。力難挽頽波。縑袍固不耻。未免獨咨嗟。天子敕儀部。禁令非煩苛。服飾別貴賤。本
分不可過。宵小強就聞。逸出其如何。僭上羞不及。一決如長河。天物太暴殄。或有雷師撻。我則學野人。

製衣擷芰荷。性影 集三

廣州竹枝

二十四 首錄五

海南也尙拜新年。爆竹聲高撼九天。白餅煎堆爭啖罷。更攜栢酒出堂前。
攔街十丈陸龍船。打鼓揚旗百隊前。對舞寶燈看不厭。錦衣倭帽擁珠簾。
東邨西邨同居。出門相見還相於。新年鬪力角拳棒。打仔遺風猶未除。

珠江南口出南洋。洋裏常多白底艚。遠在澳門裝貨到。最繁華是十三行。

太平門裏大新街。百貨成堆似土灰。怪底獨裝蒲葉扇。中人產破十家采。性影集八

王時翔小山詩初稿二卷續稿四卷後稿二卷詞四卷

王時翔。字抱翼。太倉人。少與同縣顧陳埏齊名。雍正初。始以太學生論薦官福建晉江政和甌寧知縣。陞漳州府同知。起補山西蒲州府同知。擢四川成都府知府。乾隆九年卒于官。年七十。陳埏抱桐軒集有成都太守王公行狀。著其事甚詳。所撰小山詩初稿二卷。續稿四卷。後稿二卷。詞四卷。大約始于康熙丙戌丁亥。四十五年迄乾隆甲子。九年棄其少作千五百首。其詩陶鎔杜韓。遠過其兄時憲所作。卽同時輩流。陳埏才力限之。許廷鏢所患才多。皆不如時翔。故王士禛朱彝尊亟稱之。唯篇章中多鬱勃語。蓋功名之士。以經世爲務。急欲自效。非岩穴幽棲者比。然語及山林。亦知嚮慕。尤敬楊无咎戴笠爲人。无咎其師也。集中有讀大義覺迷錄詩已刻去。雍正初。曾靜之獄。誅戮多人。特有靜死。頌大義覺迷錄于學宮。令士子習之。乾隆初元。立誅靜。禁止大義覺迷錄流行。此本印于禁書後。故刪此詩。忘去其目。遂留爲禁書一段談資耳。

田家行 分擬張王樂府

木生枝。草生花。生兒慎勿爲田家。去年畜疫牛盡死。今年旱缺秧田水。麥荒不得供朝餉。忍飢屏水氣力

無。驚聞隔邨寡婦哭。知有健吏來催租。默下水車繩繫項。且去城中喫官棒。小山詩
初稿一

秋霖歎

皇穹何淫溢。秋霖苦淒淒。陰晴雜晝夜。一月氣昏慘。烟烟日初出。翳翳雲復黯。森如銀竹立。細似輕塵糝。秔稻已久熟。欲穫仍未敢。恐遂致腐壞。豈止薄收斂。潭潭所晴鼓。社鬼田夫詔。水旱出天意。雲師肯誅貶。此邦號佳麗。奢侈恆相染。金盤餽縷縷。美醞杯灑灑。狼籍酒肉氣。積穢能上感。降罰良由茲。願人莫生憾。但恐及窮黎。無辜誠足惜。箋天空有心。忍見白日掩。小山詩
初稿二

颶風

集古香
堂賦

歲在丁亥夏大旱。萬象燿爍成凋枯。平疇龜拆稻苗死。空使紅日燒荒蕪。不知災祲坐誰致。郡縣祈禳師鞭巫。龍王上訴帝赫怒。下敕颶母驚羣愚。江豚吹浪黑霧重。雲帆千片東西趨。扶開風穴撼地軸。倒捲海水漂田廬。蓬蓬并挾濁浪勢。瑟瑟更與涼颶殊。莽莽百物動交觸。啾啾衆鳥哀相呼。巨石摧落顛虎態。老樹拔起垂龍鬚。蜚廉作虐順天意。雖干執法天不誅。瓦溝浙瀝微雨雜。嘉禾難救童稂蘇。翻愁大吏歌喜雨。政府不見陳災書。嗚呼民生竟何罪。天豈以此爲戲乎。陰陽變理望直北。颶風之篇嗟腐儒。小山詩
初稿二

養蠶謠

蒿葉青。桑葉綠。吳蠶蠕蠕動荏薄。小婦攜筐機雀飛。鶉鳩亂啼紫楫熟。溫風密雨遮深房。地爐熾炭融冷光。三眠常忌醉人見。邨巷家家斷酒漿。櫻桃紅過杏子黃。茶旗盡展麥垂芒。眼前百事俱屏却。但望雪色

新絲長。簇山高。高似屋。捉蠶上山去。花貓捕鼠慎勿觸。老媪拂布裳。拜向馬頭娘。暗祝今年多做繭。要抵舊債充官糧。綠車絡絡籽札札。織成綾錦空羨殺。君不見。採桑貧女凍欲死。富女裁衣疊箱裏。小山詩續稿一

斥水謠

五月無雨雲尙作。六月無雨惟吹風。畫懸紅輪夜皎魄。遙天一碧磨青銅。田中坼裂苗盡死。日日農夫猶斥水。海枯潮信不通河。車聲但碾飛塵起。明知斥水是空勤。農夫切莫辭辛苦。官家待覲東南粟。要飽萬

里西征人。小山詩續稿三

郁汝樟 南麓偶存一卷

郁汝樟。字尹衡。太倉州人。諸生。官學教習。有南麓偶存一卷。刻于康熙三十九年。汝樟爲周肇之壻。師事黃與堅。承其東詩派。喜作詠物詩。童戲六首。移六直卽六子棋。跳百索卽今跳索。又甲子康熙二十三年正月五日過西苑至地安門觀劇紀事。蓋三藩臺灣次第不定。新正演劇通衢。以示同樂。有句云。官戲皆良馬。軍裝盡戰裙。豈所演者戰陣實事耶。其詩亦有新意。惜少熔鑄渾成之功。太倉前後十子之外。復有品題。汝樟皆不能與。足見其時婁東詩事之盛。

海溢歌

皇帝三十有五年。萬國昇平樂清晏。寧知忽懼颶風災。海若沸騰波上岸。豪華有酒且停杯。聽我哀歌潮

水漫。百年生聚盡爲魚。億室漂沉同一旦。去歲奇荒已足驚。眼前慘事尤堪惋。五月黃梅插蒔忙。江南瀕海偏憂旱。木棉欲槁稻畦枯。老農仰屋方嗟歎。陡然天末起濃雲。共擬來朝向田畔。相期早作莫教遲。燕雀處堂過日吁。時維夏季朔之昏。招搖指未夜將半。洶湧風潮帶雨來。排山倒峽誰能捍。百萬軍聲捲怒濤。天吳咆哮無忌憚。雨師風伯助狂威。鯨鯢鼓浪恣潑悍。居民睡夢卒驚惶。倒屋翻床水沒胛。尋男覓女欲逃生。破壁穿籬爭擾亂。出門湖海勢滔天。抱柱循牆上屋竄。蛟龍踴躍鼉鼉歡。滄桑只在須臾換。淪沒田廬幾萬千。人畜生靈難數算。何分良賤與妍媸。赤體隨波鳥獸散。浮尸入港積蘆洲。不飽魚蝦亦糜爛。死兒抱母乳猶含。數口腰纏連一貫。日炙脂膏水面流。白骨堆沙燐火燦。未晚荒村鬼亂號。遊魂望救還哀喚。傳聞誰不動悲辛。見者能無腸寸斷。雖存未死幾災黎。生蛙沉灶無烟爨。露處宵啼更不堪。飢寒反恨餘生絆。慘目傷心海上民。萬井咸遭百六難。愧無鄭俠繪爲圖。上達九重應扼腕。當事須長撫字心。莫急催科再塗炭。掩骸設賑卽神君。定許陰功等霄漢。倘教膜視不相關。清夜捫心顏有汗。聊陳下里海潮歌。請與民之父母看。南麓偶存

顧陳埈 洗桐軒文集九卷抱桐軒文集三卷自撰賓陽子年譜二卷

顧陳埈。字玉停。鎮洋人。康熙乙酉舉人。通知天文律曆占算聲韻之學。尤精于醫。以大學士王掇薦入內府。湛凝齋。纂修律數淵源。中和樂府諸書。誠親王胤祉總裁其事。頗被禮遇。敍行人司行人。未幾告歸。

雍正之初。諸邸賓客多獲重譴。獨陳疇蕭然物外。不與黨禍。李衛亦故人也。禮爲上賓。見其治獄株連。去之若浼。蓋知其時君相無能用之者。甘心匿影。遠禍全身。所謂神龍見首不見尾者歟。卒于雍正十二年。年七十。事具清史列傳儒林傳。著洗桐軒文集九卷。抱桐軒文集三卷。自撰賓陽子年譜二卷。方苞評其文未盡脫明季纖仄之習。然及見鄉先輩忍菴西齋東江冰菴。流風餘韻。濡染獨深。詩格超有寄託。記事之文。多可參採。惜稍率易。自撰年譜。敘述生平。兼及友好。軼聞逸事。往往而在。康雍之際。諸王角立。記載多闕。譜中所具。雖詞旨隱約。而大端已見。世傳無益之言一卷。卽自譜中摘出別行者。

渡黃河

崑崙之海何年枯。忍使枉席成泥塗。托根天上來既遠。分脉地中趨走殊。駭勢驅風動地軸。洪濤浸月稽天樞。陷濕蹄涔馬塵少。巢高茆屋人烟孤。黃河橫決豈有意。赤子待援將誰呼。禹德逮茲久茫昧。我行濟此增嗟吁。澤國奚煩汝作雨。深宮時軫民其魚。空輦金錢赴巨浪。翻縱鼉鼉遊康衢。砥柱於今力何有。濁流自昔名非誣。九疇奚倫自炳炳。三犀經濟徒區區。噫嘻乎元氣常凋凋瘵無。慎勿懸爵稱嘉謨。洗桐軒文集二

趙俞紺寒亭詩八卷文三卷

趙俞。字文饒。號蒙泉。江蘇嘉定人。康熙二十七年進士。官山東定陶知縣。詩格蒼老。無填砌之習。文雖稍遜。亦頗能自抒胸臆。與姜宸英交密。詩文體格亦與之相近。自謂被禍僅免。就詩中觀之。蓋徐乾學罷

官歸。魚肉鄉里。爲人控告革職。被急徵。行至淮浦放還。未久即卒。俞被牽連下獄。挽韓荃詩。所謂以師門事牽連對簿。慷慨赴義。亦卽宸英序此集所謂需次家居。赴師友之難。牽染幾殆者是也。後逃之京師。歷五年事始白。以捐納復官。得選定陶。聖祖齟齬乾學。可謂備至。俞與乾學共患難。集中詠史感遇諸篇。皆慷慨言此事。乾學沒。撰東海詩以挽之。首曰。吾師東海公。元氣所包絡。不以生死易交。亦爲人所難。荃于俞爲房考。稱先生而不稱師者。是時風氣如是。撰紺寒亭詩八卷。文三卷。他本有作文四卷者。

出塞入塞歌

爲北平吳鏡著
母汪夫人作

汪夫人。侯門婦。戚畹孫。俊如翻風鶴。譬如騰木猿。弓弦霹靂箭入雲。能騎生馬將一軍。良人官誥有功勳。一朝坐事謫沙海。吏卒操兵夜到門。主人束縛如蟠蛇。婦孺踉蹌脚不襪。哭聲撼天天爲昏。夫人從容擲機杼。部署家事食頃許。纖悉不遺一銖黍。白飯青芻已夙戒。黎明登車驟風雨。長跪告夫君。慎勿憂遽屯。行且生入塞。慰此離別魂。上帝九關虎豹尊。伏闕上書詞酸辛。臣妾某氏臣某妻。臣妾萬死昧死聞。願傾家財充營繕。贖某兄弟骸骨歸中原。天子哀之制曰可。便指鞭稍向遠左。黃塵百丈覆車裹。馬首駝賊知是那。僵臥車茵最後來。皮作栗皴骨枯柴。悲嘶腸已斷。歡笑俄轟雷。置酒張筵衆樂作。銀燭金鼻射錦幕。座中哀絲白雪飛。燈前衰淚紅冰落。今夕何夕。是耶非耶。離合悲歡豈夢驅。人生最苦是生離。不是生離無此樂。家破會無僭石儲。臺天危樓成須臾。堽篋既式好。琴瑟終調娛。白首團圓二十年。自古佳話有此無。君不見。馬遷蠶室竟誰贖。孝女浮江亦枉死。汪夫人。奇男子。世上鬚眉兒女耳。紺寒亭詩集一

紡車曲

阿囂日一筐。小姑日五兩。手腕欲脫胠生掌。六月七月風水薄。木棉枝梢棲螺蚌。明年欲種苦無種。入市換米價涌。紡成不比木棉重。君不見。豪客容光耀明月。翠鈿珠駃玉條脫。眼中紡車是何物。生女莫作田家婦。終日蓬鬆亂髻髮。又不見。昔年江鄉兵火發。城中婦女脚不襪。竄身荆棘皮綻裂。不如田家婦。局縮紡車且就活。紺寒亭詩集五

張大受 匠門書屋文集三十卷

張大受。字日容。嘉定人。居蘇州干將門。亦曰匠門。因以爲號。乙酉康熙四十四年以舉人入三館修四朝詩。己丑四十八年成進士。改庶吉士官檢討。久值內廷。性通易。嘉獎後進。時老成凋喪。而大受頗讀書。能文章。漸爲士類所歸。李黻未達時爲之延譽。後竟負之。人皆右張而薄李也。卒于壬寅。六十年六十五。撰匠門書屋文集。凡詩十卷。詞一卷。文十九卷。詩文雅飭。然辭不勝意。諛多于諷。是時文風。真氣日醜。虛僞以長。力求藻飾。戒觸忌諱。求其紀事之作。可以信今而傳後者。無有也。大要特標榜爲家數。以摭摭示淵博。即可坐邀虛譽。平步公卿。若大受與湯右曾。尙其出類者耳。

養蠶詞

東家種桑樹。西家飼紅蠶。春風三月中。綠葉滿江南。小姑不惜蠶食飽。但憂東家桑葉少。昨日私祭馬頭

娘。二眠蠶成急採桑。鄰媪不怕蠶餓死。桑葉價高趁蠶市。小姑那暇理梳妝。大婦猶能典釵珥。養蠶食桑桑葉稀。葉稀繭成纒作絲。夜夜纒絲織錦機。小姑嫁時珠翠圍。長行勤儉天所福。冬來鄰媪衣不足。

匠門書屋
文集一

清明日遊西湖偶書

冠蓋雍容笳鼓闌。太平人樂艷陽天。紅纓甲士爭搖櫓。紫蓋將軍自放鳶。
處處人燒天竺香。紅旗結隊拜橫塘。花香山店誰家酒。白髮青裙蕭九孃。
匠門書屋
文集一

020-448

清詩紀事初編卷四

甲編中

龔 策 晉之詩鈔三卷

龔策。字晉之。武進人。通知中朝故事。究心國史之學。作三朝史議三篇。言建文帝未遁時。史臣紀事不當內靖難而外遜國。爲文尤長于詩賦。典瞻整麗。與時俗好尚迥異。當明之亡。作金陵燕臺懷古絕句詩各百首。其文約。其義隱。繁音促節。如庾信之哀。如唐衢之哭。如羈人思婦之牢愁。如露蟬寒蟻之淒咽。往復上下。三致意焉。屢試于鄉不獲收。順治中所厚故人在內閣。強之使游國學。例當得一官。除鄧州同知。欲棄其符不果。之任未數月卒。年六十八。見汪琬鈍翁續稿天岳山人墓表。謂山人既官本朝同知。然猶以山人自號。故不復斥言其官。所以成其志。又謂或擬山人既不忘故國矣。奈之何受官。予曰非也。漢之亡也。梅福爲吳門市卒。宋之亡也。諸名儒者逸或不足于養。輒食書院山長之祿以自給。後之尙論者。莫能優劣也。歸潔其身。于山人何疑焉。其言不無假借。所厚故人在內閣者。成克鞏也。撰晉之詩鈔三卷。

抵西安從小東門入云此卽邵平種瓜之青門也或又云秦都咸陽青門在四十里外爲

青門詩

煙鎖秦宮燕羽忙。吞聲故老伴斜陽。只今原上寒流影。猶照青門淚幾行。晉之詩 鈔一

山僧談述山間事

老僧漫自說休糧。領受諸天洗鉢方。忽地數聲飛野角。禪心亦是亂滄桑。晉之詩 鈔二

甲申除夕簡舊曆志慟

舊號明朝遂已除。鼎湖何在嘆邱墟。一燈明滅千秋話。中夜拋殘數葉書。青塚有靈依故國。野烟無路問行車。懸知隔歲將除日。萬戶鐘聲待漏餘。晉之詩 鈔三

龔士薦復園詩鈔六卷

龔士薦。字彥吉。號復園。策子。家貧。游食四方。以教授生徒自給。能古文辭。詩初學晚唐。後乃學宋。尤篤好東坡。當世名流。無不納交。晚以病目廢。困愈甚。幾不能具蔬糲。卒于康熙甲午。年七十一。後三年門人趙侗敷。搜其稿。爲復園詩鈔八卷。并策所撰晉之詩鈔三卷合刻之。六逸詩鈔凡例。謂汪琬稱龔士薦才高。近只見其七言近體。不及其父。是未見此集可知。李兆洛武進陽湖合志。竟無晉之父子名字。蓋湮沒久矣。士薦第三女適蔣。爲洪亮吉外祖母。見亮吉所撰外家紀聞。

秋興

昭陽明月漢時秋。傳道新承並輩留。不分洞房宮仗冷。尙聞宸幄寢園留。珠襦玉碗無消息。石馬山龍有暮愁。誰謂哀蟬方詔誅。橋山回首盡東流。復園詩 鈔三

宋哀蟬謂董鄂妃。五大有微意如世傳爲信事。

春日過閩古古松間寓齋留飲卽示座中李王徐三子

岸幘精藍地。重來滿兔葵。百年遺逸盡。此日老人期。上客揮金椀。清談果白眉。橫門分手處。歸路恨流

漸。復園詩 鈔四

董以寧 董文友全集

董以寧。號宛齋。少與陳維崧鄒祇謨黃永。有昆陵四才子之目。三人皆取科第。以寧獨以諸生終。後棄詞章專研律曆兵農經世之學。聚徒授經。終無成書。傳世者文選百餘篇。詩集二十卷。蓉渡詞三卷。編爲董文友全集。以寧才大如海。著意爲文。甚有筆舌。譽者以爲可與侯方域並步。則非公論。樂府諸篇。皆有爲而作。其他投贈。大都有事足徵。以寧早卒。據本集寄惠州沈推官詩。歲在戊子。順治五年秋。時余方弱冠。則以寧當生于崇禎二年。據陳其年覃懷雜詩。作于康熙庚戌云。董旣喪家寶。鄒亦殞國珍。自注。時新聞程邨訃。則以寧當卒于康熙九年。證以其子大倫卒于康熙四十年辛巳。年三十六。云生四歲而孤。亦復

相合。然則以寧卒年僅四十二。本集有宋舉所爲序。乃謂方城年三十七卒于順治甲午。年十一後十年而以寧亡。年四十。實甚差誤。以寧長子大儒撰楸坪集。次子大倫撰梅坪詩鈔。皆早卒。蓉渡詞語過狎。倚聲集附刻蓉渡詞話。自謂好作空中語。所刻琴言六卷。意欲焚之。今琴言不傳。

輓惲中書香山先生

香山。予大父行也。而與予爲忘年交。乙未春。爲鄒九探索畫于翁。翁并圖數幅贈予曰。行年七十矣。索爾長歌爲壽以報我。予時許諾。會各游山東歸。聞翁已亡。不勝山陽聞笛之悲。竊比延

陵掛劍之意。慨然有作示
蕭歎鹿。歎鹿其錫也。

昔在神宗全盛日。承平猶重文章伯。鞏下貴游聯綺紵。諸王邸第張琴瑟。翁也年少跨江南。揮麈高談露玉屑。興到斜書白練裙。有時醉掃丹青筆。車騎雍容出里門。五侯七貴爭虛席。黃金上壽笑不辭。一揮便買邯鄲妾。落拓浮名四十年。數奇不得生羽翼。可憐老大逢百變。親見銅駝臥荆棘。相國洪公鎮石頭。翁也從軍作記室。曳裙重比阮元瑜。馬上飛書馳羽檄。一朝奪爾鳳凰池。棄官自號香山客。感慨曾登念北樓。予亦扁舟過采石。是時冠蓋停江濱。結駟連鑣殊絡繹。衆中顧謂董生賢。忘年末契稱膠漆。把酒論詩我更狂。謂翁玄暉我太白。十年踪跡各風塵。竭來往往無消息。今歲春正贈我畫。白首重重更非昔。自言七十無所求。但願董生歌一什。誰知蓬海賦歸來。欲聽琴聲難再得。遺文空有茂陵書。中涓不到相如宅。丈夫葬不得玉魚。死向邛山無氣色。何人蒿思解憐才。道傍惟有羊曇泣。董文友詩
集七古二

董大倫梅坪詩鈔三卷

董大倫。字敷五。一字疇岐。號叔魚。武進人。以寧子。諸生。卒于康熙四十年。年三十六。事具孫時宜所撰董叔魚小傳。有梅坪詩鈔三卷。詩學宋人。在毘陵六逸中。年最少。才最高。辭句不免衰頹。則境遇爲之。

賣蔗童子歌

天啓間。姑蘇顧佩章等擊殺護尉。其日江陰李侍御應昇亦就逮。常郡西察院開讀時。士民聚觀者數萬。有髮垂肩男子十輩。各挾短棍入院。大呼殺魏忠賢校尉。士民從之。應擊震天。諸尉跟踉越牆走匿。一賣蔗童子姓名逸不傳。距今七十有五年。人無有能道之者。城西羊老翁。居院左。目擊其說。與碧血所載合。爲作是詩。康熙庚辰二月。

天啓丙寅歲三月。魏聞毒熾熾江南。姑蘇緹騎奮擊斃。五人膽勇誰駭。是日江陰李侍御。逮常宜讀將開函。黃頭紅棘瞋目立。萬人疾視徒眈眈。誰何少年約十輩。魁眉髻髮垂鬢鬢。夥移大衆共撲之。排闥洶洶騰飛。旬天衝突屋瓦震。再見楚漢慶章邯。最後一童舞蔗出。嚼齧大叫聲訂單。降肛肥尉戴頭竄。霍若鷹爪搏雀鷁。蔗刀一櫛甜狗口。狗如噬矢猶婪酣。十步之內血濺地。官吏驚仆成僵蠶。滿城士民齊拍手。咄咄此子誠奇男。惜哉尉不格一死。其事滅沒隨烟嵐。顏佩章等真伯仲。並舉姓氏無人諳。我生同鄉志汲古。摩挲銅狄心胡堪。試拈生紙當碑碣。更借硬筆爲刀鑿。哦成庶幾得啞略。傳與好事談詩論。

梅坪詩鈔二

邵長衡 青門簞稿十六卷 旅稿六卷 騰稿八卷

邵長衡。一名衡。字子湘。號青門山人。武進人。諸生。入太學試得州同不就。卒于康熙四十三年。年六

十八。所撰曰青門簾稿。詩六卷。文十卷。爲康熙十七年以前所作。曰旅稿詩二卷。文四卷。十八年迄三十年之作。曰騰稿詩三卷。文五卷。則三十一年以後之作。長蘅才華瞻敏。得名公卿間甚盛。詩不專一家。文樞荆川震川。詠明季樂府。頗有事實。其他亦不苟作。文紀滄桑間事。足資參攷。譽者謂爲荊州以後一人。又與侯方域魏禧並擬。皆不免過情。其時常州爲八家文者輩出。若長蘅者。庶亦足以自樹一幟者矣。

守城行紀時事也事在己亥六月

明星爛爛高十丈。城樓雉堞屹相向。吏持府帖呼點丁。十家九家驅上城。黃昏麗譙鼓角鳴。城頭燈火爭繁星。紫髯太守雄且豪。厨鞞絳纓跨兩刀。馬蹄踏踏何其勞。貫三鞭七聲嗷嘈。昨日傳聞羽書至。長江六月無行估。戰艦還防揚子渡。遊兵已破太平府。縱令消息未必真。杞人憂天獨苦辛。卽防此輩易激變。盜賊往往皆良民。星沈雞唱太守至。慎莫偶語行棄市。青門簾稿三

閱丙辰五月邸鈔書事

帝京六鷁退蜚勞。都門近有風異狼角依然紫極高。肅慎幾時供楛矢。離宮何處種葡萄。時詔百官出弓矢戰馬孤兒躍馬驕珠勒。相國行邊賜錦袍。自古秦關誇百二。驚心烽火過臨洮。

環海軍儲異昔年。見開西邸正紛然。崔公臨拜原名士。卜式輸家豈佐邊。宛洛北來驚赤羽。岷峨西上更青天。帶甲輓輸終坐困。王師蚤晚望收川。

豐隆列缺晝昏昏。三伏深愁坤軸翻。是處龍蠶遊圻岸。可憐羸蚌沒空村。陌錢問架聞新令。封豕長蛇正薦吞。三載干戈兼水旱。更無人肯繪監門。齊門廬稿五

地震詩戲倣昌黎體

歲在己未斗指申。月之廿八朝日暈。京師地震駭厥聞。初如地底雷砢礧。又如轆轤萬車輪。自西北來東南奔。頃刻簸蕩搖乾坤。雷滾菴攪屋瓦翻。市聲呀咻揚囂塵。叫號觸突踏以顛。車仆馬蹶欲輻輳。拉攞大廈摧高垣。礫塊揚箕天晝昏。樁植宋棟楹椽朽。顛倒填塞衢巷堙。百雉頓塌崩門關。九廟鴟吻墮蟠蜿。餅脅折脰髀骨鱗。死者纍纍三千人。通州三河嗟可憐。十斃八九離連連。腐屍敗齒腥闐闐。半籍以藁孰樁棺。地坼水湧黑且渾。翁嫗失足埋尻臀。一月不止餘威殫。都人怖駭遺臥眠。白板露宿帷幕藩。訛火亟與憂燎爇。反灰伏煉晨不餐。我時幸免溝壑填。我僕碎首面血殷。徐令巫咸返驚魂。一夜數徙拊膺歎。康回憑怒古所傳。不周山頽淫水瀉。女媧奠之斷鼈跟。承以八柱維陬安。三千六百軸鈎連。四遊上下無崩蹇。胡爾顛隳生禍患。恐是柱折羣軸掀。地祇失職愁煩冤。乘雲上謁欲有言。闢者拒關電目噴。搏人虎豹露齟齬。趁起瑟縮還伏駿。嗟爾地祇徒汎瀾。我詩踳駁頗不倫。怪語自嬉聊復吞。齊門廬稿一

豫民謠

大車何碌碌。小車何逐逐。牛蹶剝剝石确确。運米連連入函谷。只言秦民饑。不顧豫民哭。百金僦夫致一車。富家賣田貧賣犢。米入函谷關。倉困高如山。不救秦民饑。只飽秦倉鼠。秦倉肥鼠大於狸。秦民羸作

溝中土。晉門嚴
稿一

楊文言 南蘭紀事詩五卷楚江詞一卷

楊文言。字道聲。號南蘭。武進人。瑀子。少與兄昌言同負文譽。長益爲經世有用之學。兵農河渠曆算律呂。無不深曉。康熙癸丑。十二年二十三。受耿精忠聘爲上客。適三藩構衅。知其無成。不受委任。因與陳夢雷交好。閩事既平。問道得歸。夢雷與李光地爭蠟丸事。皆引文言爲證。遂于庚申。十九偕夢雷北行。是秋夢雷下獄。壬戌。二十一年出關。文言南歸。自是以奇才取重于公卿間。徐乾學李光地余國柱爭延禮之。然行李往來。猶變姓名。類于逃亡張儉。是時夢雷刊行與光地絕交書。且以之進呈。書中稱不孝引楊道聲與年兄抵足一夕。年兄既深服其才。且見其勝國衣冠之遺。猶有不屑與賊共事之意。始信前言。不孝于是定計。不孝身在虎穴。當結楊道聲以潰其腹心。離耿繼美以隳其羽翼。陰合死士以待不時之應。年兄遁迹深山。問道通信。是文言姓名。久已彰著。而不被株連。必有力者爲之陳訴。故得不問。然未開豁。不得不變姓名以避徵者。後客于誠邸。上書猶云昔日同遭羈囚。詎意借脫網羅。謂與夢雷也。蓋又十餘年。始得無事云。文言家貧。游食四方。乾學之于國柱。夢雷之于光地。皆深仇也。游于其間。脫然無累。則夢雷所謂天外冥鴻。雲中白鶴。固應超然無迹。夢雷嘗勸其求仕。豈得爲知己。然竟致之誠邸。以爲己助。蓋窺其貧也。其事在乙酉。四十年幸早沒。不然。黑龍江之謫。殆不免矣。卒于辛卯。五十年年六十。文言人

奇遇奇。顧其行事淹沒不傳。傳者多失實。其事唯見夢雷所撰松鶴山房詩文集中。又不易見。故知其所終者甚少也。撰有南蘭紀事詩五卷。楚江詞一卷。妻曹萼真所編。爲之序云。南蘭不好詩。以紀事而有詩。紀事也者。紀時也。束髮受書則有春雨樓草。弱冠有容膝軒草。四方憂患則有無諸草。甌江草。倦飛正續草。與三山太史陳夢雷聯鑣唱和有北征草。金臺草。著書傳是樓有玉山草。聚徒授經有高松東閣草。赴隴西學士之招有東華幻游草。主于崑山司寇徐乾學有碧山草。移居而後有南樓草。赴壽昌相國余國柱之招有秦淮草。江行草。惜其心力。稍擇通俗。言無忌諱者。謀以次梓而存之。惜竟未梓。近始有刻本。又遺其詞。詩律不如昌言之細。而天才卓越。氣象萬千。則非昌言所能及。壬申康熙三十一年以後二十年間。不應無詩。殆與其他稿草同時俱佚矣。其著述今猶可見者。爲圖書集成中曆象圖說。及代光地所撰曆象本要。夢雷祭文有云。勝國遺編。蘭臺筆削。然則嘗私修明史矣。圖書集成所載明代之史。未署撰者。不知卽其手筆否。

謝當事某公

生質本孱劣。誦讀晞晨光。髮燥授經書。搦管試討量。十三學詩賦。嘔心古錦囊。十五棄雕蟲。六藝恣翱翔。天官本聖典。悠繆排禳祥。指掌披輿圖。所志在匡襄。農工執握算。經畫具九章。最後問禮樂。探幽析豪芒。同心二三子。攬轡馳康莊。筋骨愧未周。巖稜願深藏。倏忽四三年。困阨殊可傷。母死不得葬。飢驅走他鄉。是時重藩鎮。井底皆子陽。縣寓方清寔。石田幸未荒。一介使者來。招我驅車行。南郭濫吹竽。操

觚勉趨躄。寄食三千里。羈身浪浪浪。忽驚烽燹傳。吳越紛譁張。三載絕羽翰。家在天一方。親老子幼穉。甘旨不可將。中夜再三起。泣下沾衣裳。南征奮六師。戈戟耀秋霜。桓桓諸將士。赫赫奉名王。八月開重關。九月下窮荒。生還如可期。悲喜欲斷腸。夜終不成寐。晨起束行裝。栖栖來時路。歷歷古戰場。行行五十日。悵悵家在望。老親髮如絲。少婦織流黃。麥飯無一盂。總帷宛飄颻。相持辭痛哭。激楚感道旁。爲言故里中。私幸無災傷。長林喜托蔭。嘉賜詎能忘。永懷不敢前。秉禮自悚惶。流澤被窮巖。南國日阜康。聊廣擊壤謠。介壽躋公堂。致辭扁舟發。言短意未央。嗟彼轅下駒。一顧脫車箱。南蘭紀事詩一

與明州萬子話舊感述

人生不得意。徒爲衣食謀。戚戚走四方。老大懷百憂。百年幾聚散。霜雪忽滿頭。先生天下士。意氣凌王侯。賤子爨下材。顛顛孰見收。今日復相見。頗憶昔年否。我有骨肉交。異姓膠漆投。遭逢成市虎。梁獄收枚鄒。彷徨策駑馬。栖栖京洛郊。乞食鄙東郭。下榻稱南州。其時識先生。高臥百尺樓。聊以托晨夕。曷異鸞與鷺。幼安既早帽。季子亦敝裘。燕鴻南北翔。溝水東西流。送我出郭門。勗我念前修。殷勤團扇辭。勿復事遨遊。敬奉韋弦意。傭書老一丘。白髮安賤貧。菽水那可求。穉子不解意。索食聲啾啾。母喪十七年。無地栽松楸。中夜攬衣起。繆繆但牢愁。相索要路津。故人據上游。諒我折腰賴。知我持面羞。遺我雙鯉魚。尺素何綢繆。將軍容揖客。仲宣或依劉。惘惘別妻子。惘惘遵道周。春光二三月。才影遠夷猶。相期訴契闊。豈意跡沉浮。蕭蕭訝行李。僕夫戒驂騮。遽成參與商。君去獨我留。臨歧握手別。夢寐驚心眸。丁寧

互鄭重。淚下心如抽。莫作百鍊剛。且爲繞指柔。車塵馬足旁。落魄呼馬牛。眼底多營營。出入前鳴騶。蒼頭曳紈綺。少婦彈箜篌。王門愛竿響。挾瑟敢逗遛。健翮媿蒼鶻。性拙甘如鳩。轉蓬孤自振。飄泊風颺颺。葉落辭本根。去住豈自由。先生一見過。惠然懷久要。屈指聚復散。感此歲月遒。我聞履端月。已逾五十籌。知命忘物我。學易寡悔尤。陳邊夙投轄。當時爲置郵。所以角巾老。望之同仙舟。先生十年長。好醜分薰蕕。慙媿仍無聞。白首窮探搜。憶昔違憫凶。間關滯遐陬。劍拂越嶺霜。笳鼓起東甌。落月影徘徊。鄉夢空衾裯。先生家四明。咫尺限中洲。晨梳愴斑鬢。壯歲覺蚤凋。沉復十餘載。行役未遽休。辛苦更老瘦。車輪腸幾周。秋風矧多厲。病臥青燈幽。荒館蟲唧唧。邈焉傷寡儔。逝向南山南。一笠荷鋤耰。秋原足射獵。春雨耕西疇。老親看盃餉。種豈起清謳。妻子樂相樂。百歲亦蜉蝣。何爲久行邁。局蹐類楚囚。嘗恨武陵人。雞黍坐相酬。桃源不肯住。千載空悠悠。何當同車往。蹇蹇狎海鷗。宋芝以終老。浩然天地秋。南蘭紀事詩一

屋漏苦

屋漏苦。屋漏苦。細君奔告蹇跬步。風威掀瓦壁脆脆。泔泔滂沱注狂雨。可憐夏葛之服冬褐裘。挈領漉漉如長流。牀頭淋漓又益急。驚呼匍匐藏衾裯。持瓶抱甕張屋漏。瓶翻甕破不可收。泥濘水滑雨不止。舉足顛仆增殷憂。從容語細君。語君且毋懼。猶有容膝軒。窗竇頗嚴固。而徒居其間。聊可避霖澍。無何風雷忽大作。千人辟易復如注。圖書奔放且陸沈。牆傾物毀不遑顧。細君仰屋長太息。乾坤此日胡逼仄。我聞此言笑應之。吁嗟昊天眞罔極。昔聞旱魃陰爲災。今看沾足利稼穡。驕陽無食將奈何。暑雨無居猶有食。

繇來天怒無終朝。莫怨咨兮徒啣啣。君不見。歌樓舞榭相轉連。一朝餓死無人憐。又不見。東家二子原與顏。吟歌坐忘均樂天。層簷廣廈豈不願。風雨瀟瀟亦安然。須臾風斂雨亦止。漠漠浮雲淡於紙。晴蟬噪晚新草綠。曬書且向殘陽裏。南蘭紀事詩二

開河行

臘月北風何辟易。鴟鴞夜叫旄頭白。河夫臃腫未安枕。催督上岸泥如石。可憐大雪一日夜。河冰堅凍深數尺。河夫開河先打冰。千杵萬杵山岳崩。打冰不開吏呵叱。揮拳踢足聲沸騰。併力鑿之膚凍裂。縱橫舂舌力弗勝。隣家有錢早歸去。歸家向火醉且飲。苦飢獨留何日歸。冰凌沒胛衣敗絮。忽聞官府嚴河工。今日夜作須達曙。須臾日落不少遲。慘澹無色風淒其。野鴟啄雪林影沒。悲聲動地寒侵肌。岸高潭惡滑不止。搬泥倒塌肩離披。君不見。前日東河西河齊厚水。水車鱗鱗十餘里。丁夫萬千蜂蟻屯。至今河水仍瀾瀾。河水未竭催開河。河水作冰凍人死。嗚呼開河河凍可奈何。又聞河上既畢還撈河。南蘭紀事詩二

曹萼真 絡緯吟一卷

曹萼真。字綠華。江陰人。少嫺吟咏。適武進楊文言。唱酬相得。撰絡緯吟一卷。皆文言出亡時酸苦之音。謂不嫌與范集同名。蓋嗤其非自作也。集中有題南蘭杜詩鈔一首。其小引云。余操作貧苦。未暇事翰墨。屬南蘭問關憂患。途梗數千里。郵筒都絕者三年。形影相弔。無以自託。小兒女啾啾膝前。日課數字。用

虞伯生注杜子美七言近體詩。簡而易曉。抑以子美遭世亂。飄零楚蜀。其辭多幽思愁苦之聲。孤幃寒夜。篝燈讀之。感人尤深焉。私以意略去取。別錄一帙。南蘭歸。殊訝其不謬。乃復南走閩甌。北之燕趙。十餘年來。曾無寧晷。以爲攜之行篋甚便。而余方借爲寒閨之伴。弗肯與。因請而手鈔。許之。頃歸自玉山。宛然成帙。又別選五言詩足之。余深喜其業之勤。而欲其長無忘此。亦庶幾有成也。爲書其後。筆致楚楚可念。詩有氣骨。固是明智婦人。而遇則蹇矣。

飢寒

無衣獨夜守嚴寒。繞膝啼飢歲復殘。寄盡愁心渾不憶。悔教書札報平安。

感懷

歸期盼斷已三年。紡績寒宵爨不烟。肯受人憐甘笑罵。蘇家不用洛陽田。

中秋寄遠

人間天上奈如何。玉宇無塵伴素娥。屈指良宵能有幾。那堪五度客中過。絡緯吟

董文驥 徵泉閣文集十四卷詩集十四卷

董文驥。字玉虬。號雲和。又號易農。武進人。順治六年進士。官行人。十七年六月。考授御史。十二月疏劾浙江提學道谷應泰。私修明史紀事本末。謂本朝仗義討『賊』。轉戰千里。雪前代之恥。應泰猥云。『賊

臣何騰蛟禽之羅公山下。而我師不與焉。遂使我皇上為明季君臣討賊之大義。不自于天下後世。得召見南苑。被溫諭。夜分遣騎士送歸。世皆以為應泰著書被指摘。至割去書中史字。由于莊史牽連。而不知彈章出于文驥。康熙七年。外轉隴右道。不赴告休。卒于二十五年。年六十三。撰徵泉閣文集十四卷。詩集十四卷。

平涼平 三首 錄二

空同麥熟喜還師。五月 凱旋假息游魂乞命時。西築臥龍城失險。南通躍馬路多岐。謀遠 蜀寇番休禁旅鋒堪用。耐戰

秦兵力已疲。么膺膽寒驚數子。盧傳當道臥王羅。

將將還宜善廟謀。秦風思婦詠梁輈。冠軍籌策晨傳首。督師 被殺益德冤魂夜竊頭。元帥 被刺因獸覆車猶掉尾。饑鷹

側翅且垂鞵。從來豢養池中物。莫使金臺化玉蚪。徵泉閣詩 集十一

宮詞 八首 錄六

魚服英雄試問津。北關西子近東鄰。屏虛孔雀真龍出。奇策何勞費美人。

夜歸羽獵自昌平。魚鑰猶聞啓二更。獻賦甘泉多侍從。上東門守不知名。

十五吳姬自道儂。君王隱語笑芙蓉。無私雨露生蓮子。昨夜宮中獨夢龍。

黃老閒繙半卷餘。親來御案檢文書。韓彭壯士如歸命。三省還應托後車。

內道場中不學仙。芙蓉城外更生天。高僧膜拜珊瑚至。注櫬行人獨百錢。

才於帳殿進彈文。旋召詞臣論夜分。一自宮車無復駕。踰鷹臺畔鎖愁雲。庚子十二月廿二夜。宣臣至海子行在。進所糾谷應泰私史。召尚書王某示之。越四
日上入。辛丑正月八日晏駕。 徵泉閣詩 集十三

陳玉璫 學文堂文集十六卷詩五卷詩餘三卷

陳玉璫。字廣明。號椒峯。武進人。康熙六年進士。官內閣中書。嘗刻當世人所爲古文曰文統。又以己作與鄒祇謨董以寧龔百藥之文合刻爲毘陵四子文。撰學文堂文集十六卷。詩五卷。詩餘三卷。刻于康熙十二年。四庫著錄兩本。一四十三卷本。爲雜文三十一卷。詩八卷。詞四卷。一五十六卷本。凡文四十三卷。詩十卷。詞三卷。文之徒存其目者九卷。蓋皆隨作隨刊。故無定本可言。然詩詞卷數。無甚出入。而文則所增倍蓰。知其專致力者文也。是時競尚古文。玉璫所作。雖不足與魏汪韻頡。而屬辭爾雅。無詭激偏頗之習。惜以聲華馳騁。議論多而紀事少。詩非當行。然乙巳康熙四年雜興五十首。梁溪踏燈詞。惠山燒香曲。均有事可據。

賣解歌 賣解者長安小兒。走馬角技以相樂也。往來衝突如神龍天馬。真可名狀。余類而奇之。因爲歌。

長安小兒氣如虎。走馬街頭渾脫舞。一騎奔突東復西。追風逐電何足數。須臾復有一騎出。青絲絡頭態嶙嶙。腕促蹶高汗血流。似與小兒心膽一。忽然兩馬並轡馳。前後進退俱相率。小兒頂上置翠盤。齒嚙曲箸敲成節。紅繡刺胸錦纏頭。疾于雲鳥雙飛翼。復有一騎坐兩人。兩人位置各有神。有時背作袒臂舞。有

時對歌燕市行。最後小兒拍手笑。大呼此技豈云妙。拈鞦一躍五花驄。兩足向天身手倒。左手執羯鼓。右手披色組。翻身落馬持馬足。馬足騰空身置腹。觀者如雲都叫號。諸兒罕敵汝尤高。爲語小兒慎愛惜。從來駿足原難得。君不見。黃金臺。昔日昭王安在哉。又不見。冀北野只足。誰是空羣者。小兒小兒須努力。下馬與汝傾一石。學文堂詩集一

雜興

詔書昨下採遺編。加意崇禎天啓年。豈謂乾坤滋論議。欲令君相慎流傳。野人或有褒譏當。國法能容忌諱捐。筆削信知垂不朽。主恩真擬慰重泉。

羽客繙流媚世工。粵臣佳疏慰宸衷。驅除異教迴瀾倒。斟酌興屯佐帑空。經著玄言徒誕妄。表因佛骨見孤忠。縱觀史冊英賢主。信在崇儒下士中。粵督疏中欲僧道選俗開墾荒田。學文堂詩集四

唐惲宸 芭野詩鈔四卷

唐惲宸。原名杜。字靖元。號芭野。武進人。諸生。卒年五十五。事具莊令輿唐芭野小傳。有芭野詩鈔四卷。惲宸從錢陸燦學詩。力摹高古。有詠懷夢魘大招記夢諸作。但賦士不遇耳。阮籍詠懷。寄慨一代興亡。推之百代。非爲一人一己作也。嘗撰季漢史傳未行。恐亦徒工議論。

催租行

蠶事未了官租催。文書公喝騎驢來。急官輸租事可喜。贈汝青蚨買醉耳。門前盤石大如拳。午陰借坐閒要錢。輸贏杖頭可一醉。爾我莫教多折費。芭野詩 鈔四

陳 鍊 西林詩鈔五卷

陳鍊。字道柔。號西林。武進人。諸生。屢試不第。教授生徒。徐永宣楊椿皆其弟子。有聲。卒于康熙五十四年。年七十一。事具徐永宣西林陳先生紀略。撰西林詩鈔五卷。鍊從錢陸燦學詩。頗撫晚唐。工夫細密。五古雄傑。永宣謂其學杜學韓。當即指此。然韓杜本從漢魏來。不知其意。徒工語言。未爲善學也。

黃雀行

道傍有黃雀。鑿羽方垂頭。雪虐風又饑。向人鳴啾啾。鬱鬱槐花林。可爲稻粱謀。勾引入黃花。棲食得自由。花枝忽搖動。花蕊傷毘劉。誰謂雀與角。使我懷沈憂。西林詩 鈔一

莊天錦 痛言堂詩五卷

莊天錦。字雲湘。武進人。行實不具。竹垞稱爲鶻冠鹿門之流。嘗赴秋試。蓋絕意仕宦。非義不事新朝也。其詩善于述情。清冷中饒俊逸之致。集中所謂家難。不詳其事。暇當考之。

甲寅除夕

春風吹遠天。一歲復推遷。南楚多金鼓。東吳少稻田。是秋淫雨彌月。田禾盡朽。有愁消去日。無褐度新年。慚愧兒童

輩。紛爭壓歲錢。寤言堂詩一

錢二白 半溪詩草十二卷

錢二白。字天逸。號東臯。武進人。康熙十八年進士。官青田福安知縣。憂歸。補伊陽。以事罷。築半溪草堂。吟嘯其中。年七十四卒。工書。詩學晚唐。狀物寫情。不爲泛語。並世詩流。唯贈邵衡有詩。撰半溪詩草十二卷。縣志稱有東臯文稿。漢詩釋行世。今未見。集後附刻錢大經捉秋集。錢大猷曉風詞。錢大鏞長吟集。各一卷。皆其宗人也。

貧士行

昔日牀頭下。蕭蕭斗米儲。今日撫牀頭。斗米半已虛。出門擬楚遊。行歌逢接輿。問君何處來。輕棄家中書。讀書無所成。不若種麻苴。麻苴熟有時。讀書食無魚。高秋八九月。家家涼服除。猶著舊時衫。寒風入輕裙。兒女惟悲號。對我相躊躇。我言今偶無。他日應有餘。好言慰兒女。撫劍行丘墟。接輿長聽罷。搔首多歎歎。人言我徹貧。我貧君亦如。行歌長揖去。寂寞就田廬。半溪詩草二

徐永宣 茶坪詩鈔十卷

徐永宣。字學人。號辛齋。武進人。康熙二十九年進士。雍正之初尙存。未詳卒年。永宣早年詩刻入江左十五子詩選。又與莊令輿同選毘陵六逸詩鈔。以是知名。親見王士禛陳廷敬。尤與查慎行雅故。其詩猶存中正清和之音。自登進士。即伏居里門。廷敬及張玉書綠宋塾進呈十五子詩選。復疏薦之。事在康熙四十四年乙酉。命來京補官。終未赴召。可謂不樂仕進者矣。李兆洛武進陽湖合志以爲熊賜履所薦。殊爲未核。茶坪詩鈔十卷。起康熙三十五年甲戌迄五十六年丁酉。爲永宣自定。此後不應無詩。殆未續刻。有藏其雲溪草堂詩三卷者。未知何時所作。

纈絲行

柳花村巷晴窗南。蠶神祀罷祈春蠶。一箔三眠日卓午。食葉聲中作風雨。婦姑飼蠶不得閒。雙眉嬾畫螺青山。戴勝飛鳴繭成早。纈車索索絲皓皓。賣絲抵稅輸縣官。入冬子婦仍號寒。茶坪詩鈔一

江陰黃烈婦姓周氏介子先生毓祺之婦仔薪丈晞之繼室以庚寅十一月十二日殉節
死死時年二十八詳載仔薪自爲事述及青門邵丈所爲傳中曩予過仔薪屬記烈婦
死事首尾在苒二十餘年愧負宿諾甲午春半客江上雨牕獨坐追憶前語遂成七言
四十韻以招烈婦之貞魂於地下而塞仔薪夜臺之悲且以諗其邦人焉

昔遭陽厄閉六宇。地維仄裂傾天柱。黃家父子忠孝門。家難國憂煎肺腑。姦人修怨開禍樞。趁黑鴟鵂叫
林樹。江東司臬者誰子。張爪磨牙儼饕餮。可憐介子詠遺民。蹈海不死死獄瘼。仔薪鼠竄避急徵。叢棘徹
纏紛旁午。前溪夜舟邏得之。俯俯尾敵譙譙羽。破巢從此卵不完。烈婦捐軀臂絲縷。初時縊第婢救甦。皆
赤頸紫巾月瘡。無兒苟活異偷生。夫子獄費肩楮挂。臆充腹誑口穢。皺眉不爲愁終窶。炎宵却帳飽蚊
蠓。遙共銀鐺所天苦。仔薪事解再就械。烈婦潛身瀾池澗。屍浮水面鼻入家。迂久嘔水方噢咻。忽聞服金
能殺人。捩擋衣襦質庫取。得金頃刻屑下喉。有似刀鉞割腸肚。府吏大索夫友驚。遺屑金環速腸腐。何圖
腫毒事無濟。陰挾利刃蓋襜褕。太守僉解呼不應。引刃刺喉血莫斛。傳聞是日日食既。風號晝晦屋可數。
正如霜飛六月旱三年。天憫孤貞警官府。釀金治木謀發喪。耆老齋咨挈童豎。夜半櫓側稍轉聲。創深二
寸痕難愈。暫寬拘繫臥女菴。落日蒼茫證懸鼓。太守以狀上司臬。司臬得狀益大怒。求賄不遂心久銜。直
督太守過莽鹵。更催追逮走荒村。飛檄封馳激強弩。深文恣縛窮里鄰。法吏公差猛於虎。烈婦輿歸告吏
人。我不汝累汝毋憚。手檢單衫救老奴。轉交獄卒授其主。正命無虞暴骨骸。自挂空梁墜闔戶。青門佳傳
核仔薪。熏徹班香與爲伍。吁嗟乎。沈淵伏劍及雉經。成仁取義撐前古。丈夫致命各一途。胡爲女子瀕死
罹四五。天公摧折志愈厲。慘烈彤編罕曾睹。年年冷節紙灰墳。神護青松烏銜土。巾幗同時殉節多。誰家
稗野詳醜縷。亦思蒐討繫短險。詩史終然怯工部。砂籠烟樓霧苦中。殷凝冤血寒芒吐。幽魂憤恨知語誰。

湘瑟冥冥一江雨。茶坪詩
鈔九

吳中田婦歎次東坡韻

吳田望雨兩故遲。旱母煽虐過三時。踏車日炙不敢歇。雇工代典冬寒衣。田多水少難盡救。黍稌強半萎乾泥。村旁人家種花豆。槁臏小把荒柴歸。水鄉穫稻勝高岸。米貴豈賤餘糠粃。天公雨暘自不忒。我民命合逢寒飢。還愁催租縣吏到。賣屋更賣乳下兒。人生不均樂與苦。請看閨閣凝妝婦。茶坪詩 鈔十

錢名世 江左十五子詩選

錢名世。字亮功。號絢菴。武進人。康熙四十二年進士高第。官編修。雍正四年。以贈年羹堯詩。逐回原籍。賜榜書名教罪人四字。命懸之中堂。並命朝官賦詩贈行。哀刻成集。即命名曰名教罪人。未悉卒年。嘗學詩于錢陸燦。辭頗清麗。撰古香亭詩集。恐未敢刻行。今存者。只十五子詩選中一卷而已。雍正中。嘗頌大義覺迷錄于學宮。頒揀魔辨異錄于寺廟。皆欲以理取勝。又刻名教罪人。則諱今已虐。不測意旨安在。今三書皆不易見。名世甚有才。共萬斯同客王鴻緒家。修明史。多斯同口授。名世屬辭。斯同沒。有三王紀傳稿。爲名世所竊。其人實非端士。

贈宋射陵

冬青蕭索遺民少。海濱寬閒存一老。啖啖晨星氣象高。華峯削翠金天杳。百年以來人事變。射陵先生眼所見。銅駝荆棘蒼鴉飛。露掌仙人辭漢殿。南都斫盡靈和柳。二月不知春甸線。後庭花唱商女口。霧帳筆

築成高宴。臺城應教秋衾客。掃跡荒村守迤賤。叢殘蠹帙過五車。石田茅屋蒼苔居。長編一卷必在手。百家諸子時敗漁。野蔬新翦濁醪熟。簷花墜雨寒牕虛。兩京舊事飽其腹。閑談湧出泉百斛。蘭臺掌故多放失。江天少微有實錄。薦書急奏楊鐵雅。白衣宣至參史局。見聞觀繆談靡靡。八表十志成必速。不然土室作詩史。空想蕉園在鹽漬。君不見。永寧寺側藏書樓。寶光夜夜騰斗牛。鹿門偕隱夫何求。長君健筆思廉儔。蕤椽官館來日事。那羨區區史通子。江左十五子詩選五

楊士凝 芙航詩櫛十二卷

楊士凝。字笠乘。武進人。大鯤孫。康熙五十六年舉人。官知縣。未知卒于何年。武進楊氏自廷鑑後。盛有文采。楊椿著孟鄰堂文集。最有名。與修明史綱目三編。椿子述曾。修通鑑輯覽。皆始終其事。士凝濡染家風。亦喜文事。撰芙航詩櫛十二卷。爲康熙四十三年至六十一年之詩。時年祇三十二。詩未成家。頗學溫李。時尙晚唐。白陸之風又變。論詩絕句于錢謙益云。大夫亡國千行淚。只欠西山一首歌。可謂蘊藉。朱王旣沒。查慎行遂爲海內一尊。士凝輩猶藉其一言爲重焉。此集有二十九卷本。蓋益以雍正至乾隆七
年之詩。

吳中曲

賣荒吏

萬木號呼北風刮。草根葉脫秋霜殺。天公積歲旱江南。十月登場稀蕪稊。三時雇工食弗支。典盡冬衣鬻兒
姪。撲窮民力希淺收。家破田荒雙缺齧。雨暘失正災疹生。逾夏入秋多天札。遂令村落成廢墟。杵不聞舂機
不軋。裝棉田婦百無一。絕粒農夫什之八。拋離骨肉各出門。索飯官街乞僧利。可憐老弱強負擔。桀樹皮餐
山土振。四鄉里甲急報荒。區核高低定增額。衙門下上遞誅求。私賄多於祭魚獮。封章入告詔緩征。仍令
分災縣官察。田多蠲少荒不均。竟賣荒符莫鈐轄。官租一兩價過半。束手窮甍中乙乙。假饒無稅又無荒。詎
免公差猛如獍。城中巨室甘買荒。頭上金釵等閒拔。深仁大澤荷一人。實惠單酬吏胥猾。我家瘠產本不多。
卅口寄命西山圯。買荒乏力可奈何。積蠹公然較癡黠。俗指不買荒者爲癡作詩敢告諸有司。滿眼瘡痍胡忍恕。

捉伶人

周詩鄉衛開淫竈。雅歌漸廢盈箏筍。梨園法曲并湮沒。俗尙扮演增繁華。登場衣冠活傀儡。課督黃口嚴
鞭撻。妙選人才辦裝束。黃金千盡奚堪誇。綺筵雜奏洽賓從。五更燭影圍紅紗。三春各部賽邨社。翁媪什
伍喧桑麻。農家衣食大不易。拚擋日給盤殺嘉。睚眦生釁起攘臂。輒俾親串爭官衙。技工譽盛勸高價。主
人貨券無容賒。饑鷹餉飽竟颺去。野性未必馴麀麇。江南營造轄百戲。搜春摘豔供天家。賄通捷徑冀寵
利。自媒勾致姑蘇差。採香中使暫停轂。不勞官府親擒挈。背恩都作脫籠雀。報德絕少銜珠虵。楊枝駱馬
去弗顧。眼看別路彈琵琶。力謀智索兩無益。一庭風散空中花。童時濡染惑心志。今乃歷歷興悲嗟。銷磨
歲月更有事。耽此自耗寧非奢。清歌儘可侑一盞。侍兒吹竹敲紅牙。勸君節性遠此輩。免教羅綺委泥沙。

君不見。殺人優施橫白晝。大僚側目刑難加。輕肥雜沓長安道。酒肆倡樓恣狹斜。笑航詩
權十一

案此二詩作于康熙六十一年。

沈鍾 霞光集四卷

沈鍾。字鹿坪。武進人。康熙末。以舉人調選福建屏南知縣。調閩清罷歸。故其詩曰。一官牢落誤平生。又曰。三年客破黃梁夢。有霞光集四卷。詩筆清麗。唯多狹邪之作。此風扇于明季。疑雲疑雨。實生厲階。倚聲一集。風懷百韻。以爲才人不遇。藉以寫憂。而不知世風由之昇降也。輓桑夫人靜菴兼慰德其二律。有云。輦下新詩傳詠絮。閨中細楷羨簪花。牙籤空祕圖書府。自注。曾有詩冊進呈。絳帳長懸仕女家。又云。雲樹鄉關夢裏游。病餘猶自說揚州。是又一黃皆令王玉映矣。知其人江都人。工詩善書。在都中以授女徒爲生。而絕不見于紀載何也。所謂詩冊進呈。據李元鼎石園全集。有其子振裕進呈箋云。陳元龍捧到毓慶宮手諭。大司農李振裕囊會進其父梅公詩集。昨皇父深贊其詩。品爲當代第一流。因命閱看。甚爲快心。又諭。其母亦工詩。有婦解吟詩子讀書之句。急欲得其專集一讀。可卽向司農覓寄塞外。倘以閨詩不便相示。卽以此意諭及無妨也。臣李振裕謹遵諭旨。將石園詩集。裝潢具摺授元龍轉進。以此例之靜菴詩進呈。當由廢太子所索。故用圖書府事。可謂典切。

吳門踏燈詞十首
之一

徹夜轟轟盡鼓搗。吳兒好事絕堪誇。巷南巷北爭奇勝。唱罷秧歌唱采茶。豐光集二

田家詞

却怪田家節序催。年年春社鼓如雷。採桑過後綠絲出。約略黃梅雨又來。

陂塘水滿盡栽秧。處處蟬聲噪夕陽。閒坐豆棚看婦績。繞村聞得稻花香。

穰稔新收載滿車。先春一石釀梅花。雞豚着意酬田祖。醉倒村南日已斜。

圍爐兒女話團圓。塞向編茅準備寒。輸却官租無一事。任他風雪壓瑯玕。豐光集二

桔槔

一月斷雨澤。舉國盡勞攘。溝渠半焦枯。掬水不盈盎。峨峨高岸旁。軋軋桔槔響。健婦罷紡績。掉臂田間

往。坐板穩如榻。覆棚大於掌。裸體抹胸前。赤足踏車上。齊聲轉轆轤。白浪過兩丈。嫁作農家婦。焉能事

安享。豈如南塘女。朝朝挾雙槳。唯解采蓮來。相懸隔天壤。豐光集三

杭權

杭州關吏猛於虎。下盡錙銖累商賈。縱橫行李蒲河干。倒籠傾箱細搜估。寸絲尺縷安足道。雙履須教半

沾土。可憐書生無長物。敵篋掀開盡殘腐。惟饒錦繡在腹笥。恨不當時剖肺腑。猙獰猶自索酒錢。再四羈

留日停午。我知苛求盡額外。尙說明文奉官府。脂膏剝削飽吏胥。征解曾無十之五。何時權使頤廉平。不

見關津往來苦。豐光集三

莊 歆 休 休 吟 五 卷

莊歆。字肇升。號爽軒。朝生孫。本武進人。遷居長洲。後又遷秀水。康熙四十一年副貢生。入太學。選河南密縣知縣。雍正四年丙午忤田文鏡罷官。卒于乾隆二十年乙亥。年七十二。休休吟五卷。自雍正五年。迄十一年。皆歸田後所作。時方貴宋詩。獨學白傅。沖淡閒適。有蕭然自得之趣。武進莊氏冠冕甚盛。集中司業叔者楷也。編修兄者令輿也。皆有文采。歆工畫今無知之者。集中長物十詠。詠白石云。宋阮靈璧。寬四尺。高二尺。峯巒秀發。瑩潔如玉。沈石田白石山房所供。知靈璧石有白者。可資博識。

題春到園先生詩集

先生姓何氏。名天爵。字從之。南城高士也。不求仕進。工吟詠。愛弄笛。年將七十矣。自號春到園先生。有近集寄慕堂。因題一律。

饒他詩客立如林。綆短何曾汲古深。脈望縱教能食字。鞞通未許便知音。杜陵老去惟耽句。平子愁來只解吟。想見當年湯餅試。丰姿白晳到于今。集中有此日三全貧病老。有何丰采稱諸生之句。故云。

認取東椽十六枝。截將短笛口邊吹。睡醒磯畔舟橫夜。入倚樓頭月上時。腸斷江城梅落句。魂銷灞岸柳條詞。桓伊遠隔二千里。三弄何由一聽之。慕堂嘗謂其吹笛有橫吹三弄關山合。直。休休與孤舟涕淚俱之句。極為阮亭先生稱賞。吟一

管 榆 據 梧 詩 集 十 五 卷 小 游 仙 集 一 卷

管榆。字青村。武進人。少為舅氏楊大鯤所撫。大鯤生子。乃復姓。宋肇刻江左十五子詩。尚署楊榆。度復

姓已在中年。官普安知縣。越補新昌。遷姚州知州。調師宗。卒于雍正元年。以集中壬申康熙三十一年除夕半甲全過語。推其年當爲六十二。撰據梧詩集。已刻者吹萬集二卷。柏軒草二卷。修琴閣集二卷。鷗馴集二卷。天外集二卷。圃華集二卷。寓巖稿三卷。附小游仙集一卷。與四庫存目微異。未刻稿二十八卷。爲寓巖稿十一卷。汗漫集二卷。青蛉稿四卷。堪隱集四卷。不准集一卷。貴耳集一卷。縱橫集二卷。維摩集三卷。檣詩出入蘇黃。才氣無雙。清詞麗句。不失先正矩矱。自康熙二十二年癸亥至六十一年壬寅四十年之詩。不下數千首。江左十五子中。可謂篇章最富者。

點夫行

夜投龍里縣。喧呼聞點夫。三戶成一舖。五舖當一隅。遠者來百里。近者沿山居。排催保仍押。弟去兄相扶。奔波面目黑。負背形神枯。水深泥沒踝。衣破肩無膚。苦情不敢說。欲語先嗚嗚。自從寅卯後。寇賊盈村閭。毀廬委榛莽。殺人棄土苴。十室九死竄。二日千征輸。官軍從東來。逐賊如驅雞。敗漁本民本。幸者殍爲奴。承平十四年。稍稍聚孑孤。哀鴻始來集。僵骸行將數。前歲忽時變。蠢爾倏負隅。山邑大騷動。鞭撻紛街衢。自此供億苦。從朝抵日晡。或歌采菽什。或征皇華車。或宣揚明詔。或拜爵遷除。動輒計千百。要不有錙銖。今年更太數。十日九長途。山田正插蒔。不能把耒鋤。夜半打門叫。驚走號妻孥。雞犬飛上屋。牽走寧須臾。黃塵赤日道。列火燒洪爐。山高更礪礪。路遠還崎嶇。又聞昨前站。死者非形羶。大都舉家竄。何苦傷微軀。縣官聞亦苦。終日相奔趨。國賦既不足。典質無釵楡。沿家苦哀諭。閉戶如視瞶。出財

用民力。民困其無如。匪勉存喘息。恐亦淪溝渠。我聞斯言苦。太息長欷吁。用一緩其二。昔人言非誣。子來不終日。此獨非民歟。觀風知大槩。所係非區區。何人鄭監門。上書復繪圖。報汝慎勿嗟。聖澤常涵濡。九重念民瘼。今歲還獨租。據梧詩集九

案此詩康熙三十三年作于普安。

秦松齡 蒼峴山人詩集五卷詞一卷文集四卷

秦松齡。字留仙。無錫人。順治十二年進士。入翰林。以奏銷案褫職後。舉康熙十八年己未詞科。洊擢諭德。二十三年主順天鄉試中。蜚語下獄。徐乾學爲之力解。始得放歸。家居三十年。卒于康熙五十三年。年七十八。詩文和厚。無淒苦之音。與王士禛交善。故以寄阮名集。

砍樹謠

江南六月天不雨。縣吏呼農去砍樹。京口將興下海師。造船近奉軍前羽。前邨百畝禾已焦。後塘有水誰能厚。農夫不忍坐死禾。手持斧柯屢回顧。昨朝砍及相公墳。今朝又伐中丞墓。相公中丞子孫貧。追索無錢縣吏怒。安得鯨鯢一掃清。長使農夫事耕作。蒼峴山人集一

德州謠

德州城邊日欲晡。德州城外行人呼。百里驅來苦飢渴。市上今朝無酒沽。城南旅舍舊無算。盡插弓刀作

公館。行人搖手戒勿前。將軍南來卒精悍。錦裝絡繹多朱輪。坐擁高牙勢絕倫。前驅壯士赤羽箭。後隊美人羅繡巾。銀盤玉碗照白日。辯脯行觴遲便噉。此時歎息者誰子。殘書撲被河之汜。僕夫相向慘顏色。瘦馬饑臥不肯起。可知不是貴官騎。宛轉塵沙亦徒爾。去年天子曾東巡。翠蓋鑿輿德水濱。父老親教陳疾苦。金錢賜與路旁人。人言天子憐吾民。令如風雨仁如春。羽林不動市上塵。嗟乎將軍何獨非王臣。

蒼峴山人集二

曹 禾 未菴初集文集四卷詩集四卷

曹禾。字頌嘉。號未菴。瓊子。瓊字子玉。崇禎十年進士。戶部主事。入清與弟諸生玠。皆擅名畫竹。以高逸終。禾于康熙三年成進士。官內閣中書。告歸養母。十八年舉博學鴻儒科。授編修。屢官至國子祭酒。以事註誤去官。卒于三十八年。年六十三。事具清史列傳文苑傳。撰未菴初集文集四卷。詩集四卷。詩文學韓杜。文尤有成就。視同時諸子。陳玉璫或稍亞。汪懋麟則遠遜之矣。詩字字錘鍊。在金臺十子之列。此集爲丁酉順治十四年至丙辰康熙十五年之詩。家居困于征徭。南北困于行李。一官浮繫。將母食貧。故多感慨。去官年僅四十。膺薦再出。終于不達。蓋性耽詞賦。卽沈滯之由。而沉縱酒嗜弈。樂閒品茗。是時黨見甚清。門戶各別。稍一參差。動致傾墮。禾註誤未知何事。爲人排擠中傷則可必也。禾初師陸世儀。世儀爲之作介子魏裔介王崇簡。力戒其不可先文而後道。禾竟背之。終致鑿羽而歸。酒友喬萊汪懋麟皆幾卽于禍。

淮水歎

黃河決。淮水漲溢。人民漂流。縣官役民夫築堤。鞭楚之聲數百里。目窮心傷。情迫辭盡。庶聞于采風者。丁未九月十四日。

淮流雜河濁。孤帆際窮秋。逆風無端來。水勢當空浮。我本多愁人。以茲添百憂。遠望極千里。波濤徧神州。淮土本低下。河形過人頭。何當九派聚。一瀉無陵丘。人鬼寡寧宇。鵝鸕天邊遊。方看田塍沒。稻熟無一收。更慮大堤決。魚鱉棲高樓。人民縱所緩。城郭殊宜留。運道倘梗塞。孰應大府求。誰爲寄堤防。疎略濟國謀。河遷可咎河。淮潰將誰尤。嗟此淮揚民。防河苦搜搜。髓竭骨不完。洪水還相讎。丁壯尙能避。老弱同時休。君相日辰慮。當事殊悠悠。水衡費何所。民力安能酬。諸口一時破。中夜百役鳩。雷動千夫動。鞭扑猶摧揉。波中鬼咽咽。岸上人啾啾。死者鮑魚腹。生者行填溝。觸目動心魄。廟堂知豈周。況乃內地卑。寧許倬濁投。所憂東南腹。今已衝咽喉。及此尙不慮。江河定相哀。神禹既不作。底績知何由。我繼春陵篇。涕泗縱橫流。高歌再三歎。波光亂征裘。當事慎心力。毋貽君父憂。

未著初集詩稿二

嵇永仁抱犢山房集六卷

嵇永仁。字匡侯。改字留山。無錫人。諸生。父廷用字觀南。弘光時官中書舍人。入清不仕。永仁囊筆游四方。後客福建總督范承謨幕中。與同死耿精忠之難。事具秦松齡所爲墓表。子曾筠既貴。乃哀爲抱犢山房集六卷。一爲吉吉吟。二爲百苦吟。三和淚譜。皆被繫時之詩。四葭秋堂詩。五竹林集。爲舊刻之詩若文。六同繫王龍光沈上章之詩。葭秋堂詩中所往還者多前朝遺老。詩皆五律。未附初秋雜詠七絕十二

首。詠順治己亥鄭成功江上之師。集或刻于此時。有金人瑞書云。同學弟金人瑞頓首。弟年五十有三矣。自前冬一病百日。通身竟成頹唐。因而自念。人生世間。乃如弱草。春露秋霜。寧有多日。脫遂奄然終歿。將細草猶復稍留根莖。而人顧反無存遺耶。用是不計荒鄙。意欲盡取狂臆所曾及者。輒將不復揀擇。與天下之人。一作傾倒。此豈有所覬覦於其間。夫亦不甘便就湮沒。因含淚而姑出於此也。弟自端午之日。收束殘破數十餘本。深入金墅大湖之濱。三小女草屋中。對影兀兀。力疾先理唐人七律六百餘章。付諸剗。行就竣矣。忽童子持尊書至。兼讀霞秋堂五言詩。驚喜再拜。便欲舉舟入城。一敘離闊。方瀝米作炊。而小女忽患疾。其勢甚劇。遂爾更見遲留。因遣使迎醫。先拜手上致左右。夫足下論詩以盛唐爲宗。本之養氣息力。歸之於性情。旨哉是言。但我輩一開口而疑謗百興。或云立異。或云欺人。即如弟解疏一書。實推原三百篇。兩句爲一聯。四句爲一截之體。僮父動云割裂。眞坐不讀書耳。足下身體力行。將使盛唐統緒自今日廢墜者。仍自今日興起。名山之業。敢與足下分任焉。弟人瑞死罪罪頓首頓首。又有徐增題語。永仁嘗作游戲三昧。揚州夢。珊瑚鞭。續離騷。雙報應諸曲子。以才人自命。故與金徐如針芥之投也。

京口訊潘江如

亂後家園在。天留處士貧。入城看敗瓦。居巷寂無鄰。水活宜栽柳。山低好負薪。齊門難鼓瑟。歸老著書

人。抱拙山房
集四卷

季麒光 蓉洲詩稿七卷華陽懷古一卷文稿四卷史論一卷

季麒光。榜姓鄭。字聖昭。號蓉洲。無錫人。由內閣中書。出爲梅溪知縣。調東寧。又調諸羅。以艱歸。起補華容知縣。未詳卒年。撰蓉洲詩稿七卷。華陽懷古一卷。文稿四卷。史論一卷。麒光制義名家。詩文雖未入格。而詩筆甚健。能發胸中所蘊蓄。其文恣肆。善于持論。紀閩中事甚備。尤詳于臺灣。如臺灣誌書前後序。臺灣府堂鳳山縣堂碑文。遍遷別紀。臺灣雜記。番俗紀略。風諭說。尤以寧靖王傳。沈光文傳。鄭克塽妻陳氏傳。述鄭氏末年事。足備稽考。史論首曰桃園之拜。謂桃園聚盟。古今第一奇事。亦第一快事。瑜亮并生一語。久在文人學士筆端。于麒光又何責焉。

田婦行

臨淮道上逢田婦。赤脚蓬頭立高土。却指斜陽向客言。淮西風物由來苦。地疏水闊瘠且荒。昔年曾此生眞王。千里蕭蕭禾稻少。平原脈脈多膏粱。富家問僮兼問婢。貧家耕作尋常事。大婦前行中婦隨。少婦紅顏能荷耜。夜習機杼晝督田。茅簷籬戶朔風穿。聽來蟲鳥知晴雨。舉室蒼茫出看天。三更催起裳衣倒。四更盪沐鷄鳴早。五更挈伴走中遼。天明始到田頭好。阿翁復向坑前呼。兜粟移薪又刈芻。黃口啞啞啼土榻。竹筐瓦缶相攜扶。阡陌高低互凌躡。壯者躑躅弱蹙蹙。鎌鋤在腰兒在背。面面汗流仍背浹。削遍桑麻更摘瓜。白楊高栗啼悲鴉。大風颭颭黃塵滾。肌膚寸寸積泥沙。酷日當天烈如火。尺布蒙頭衣肘裸。渴掬

河流飲樹邊。饑餐麥飯田塍坐。生來憔悴長荒村。低頭倩視臂間痕。一身耕織劬勞併。滋味長年哺菜根。爲言辛苦猶不足。食無餘粒衣無幅。頹牆敗草壓床頭。夜雨秋風長痛哭。吁嗟乎。人生百歲曾幾日。鬢毛空向秋霜白。面黛指皺味涼隨。環堵殘年夜啼泣。生平不識脂粉香。好花不戴真可惜。爲語珠樓金屋人。田婦何嘗少顏色。楚洲詩 稿二

朱 襄 登下和鳴集

朱襄。字贊皇。無錫人。諸生。著易章。本漢儒之說。毛奇齡爲之作序。朱彝尊頗稱其詩。久客于宗室岳端。爲刻其織字軒詩一卷。

擬古

古來有志士。多爲謀食累。得飽固所難。得餓亦非易。世態分炎涼。遇之在相忘。夏葛不知炎。冬裘不知涼。世事分明晦。處之莫相背。朝鏡不知明。夜燈不知晦。登下和鳴集

陶孚尹 欣然堂集十卷

陶孚尹。字誕仙。江陰人。所居白鹿山莊。爲東坡居士田舍。饒園林水竹之勝。故號白鹿山人。貢生廷試。康熙二十五年遷桐城教諭。越五年告歸。卒于四十八年。年七十五。撰欣然堂集。爲詩六卷。文四卷。詩

文有才氣而未入格。性喜結納。當世勝流自錢謙益以次。姓名俱見集中。嘗投書尤侗王士禛。以通殷勤。又介錢陸燦以其集求士禛點定。所謂名士裝點。乞休書言夏苞子之變。孚尹請駐師桐城。為之料理軍需。奇在學官而嫻武事。前此有與梁化鳳辭薦戎職書。言入其幕府。寄以腹心。命司偵緝。雖事變之頃。士人不暇擇途。而孚尹乃以此為志在四方經營幹濟。何其慎也。

曹頌嘉漫園大會賓客即席分賦

吳山越水快同羣。刻燭揮毫共夜分。九畹三湘看不厭。又教佳壻抹微云。
頌嘉世以蘭竹擅名。其尊人蘭泉先生墨蹟為當代珍重。是日出卷軸遍觀。其玉潤

鄧君壽夏亦工畫。故并及之。

西泠詞客寄情長。天寶遺音金屑香。雞肋浮名等閒事。人間贏得舞霓裳。
座客錢塘洪文昉思。曾譜長生殿傳奇。攜入都門。聽金鑼演於山左趙秋谷執信行

寓。為巡城者發其事。秋谷欣然登落戰。洪君亦微國子生云。集一

蔣中和 眉三子半農齋集八卷

蔣中和。字本達。一字蘊幾。號位公。晚號眉三子。謂人之一身。唯眉最無用。兩且為贅。而況三乎。又號四不居士。謂進不成進。退不成退。耕不成耕。讀不成讀也。靖江人。順治九年進士。磨勘罰停殿試一科。選蘭陽知縣。奏銷案降一級調用。補滄州州判。請養歸。康熙二十年。年五十六。刻眉三子半農齋集八卷。凡詩文論策部各一卷。史部二卷。說部二卷。自撰眉三子本傳以見生平。中和當官。敢于任事。所遇

多忤。中懷鬱勃。時露不平之概。又喜說理。故其詩文連篇累牘。辭繁意複。然辨才無礙。史部論人論事。時有俊快之筆。說部頗尊陽明。論學不免膠擾。

元旦治田事里兒詫爲怪妄戲拈四十六韻

大塊一丸幅。資生妙化育。芸芸者何爲。轆轤如車轂。大舜耕歷山。伊尹隱莘谷。未聞薄不爲。晚乃登華屋。沮溺耦而畊。名亦非碌碌。惟有尼山公。掉頭勿屑逐。泰山小丘垤。丘垤甘臣僕。自問還自知。難蹈道傍築。所以昔之人。坎坎患伐輻。江阜有眉子。此意頗能蓄。自幼把犁鋤。間或握書讀。薄墮幸逢年。唯恐譏覆鍊。急返舊時廬。三徑荒如沐。自顧無長策。時復悲杼柚。如何不力畊。坐令母無鞠。年少里中兒。拍手笑黃犢。每當歲華改。冠服新且或。結隊相奔馳。飄忽如霧縠。俄頃歷數村。酒歡復擊筑。老眼眼生花。腰軟頭撲檉。恨恨不能隨。霎見春草綠。飯飽力稍雄。私念當惜福。舉手荷新鋤。鋤土培新穀。行人闕相傳。觀者來如鐵。矢口恣恢諧。視我如槁木。我豈異人趨。自笑還自卜。禮卽爲我設。我亦厭重複。吾母髮盡白。搖手勿受祝。吾族趾相錯。朝夕相親睦。吾隣多素心。虛文不我穀。吾令未常干。竊欲比閔叔。拖沓旣已捐。套數亦已熟。奈何不自營。終日徒鹿鹿。吾非不愛逸。吾實有吾腹。一日食勿充。面色黃如菊。七日食勿充。奄奄登鬼錄。吾聞古人言。須辨麥與菽。老農諳陰晴。荒熟知倚伏。小農筋力強。十羊笑九牧。富農糞沃勤。倍收數十斛。數者吾一無。安得不動速。不觀古之人。寸陰惜忽倏。春朝豈不吉。天子豈不肅。三推勸民耕。古風歌穆穆。

眉三子牛
農齋集一

陳維崧 湖海樓詩集八卷文六卷儷體文十卷詞三十卷

陳維崧。字其年。宜興人。父貞慧以世廕文采。與冒襄吳應箕並稱。維崧以諸生應康熙十八年博學鴻儒之徵。授職檢討。康熙二十一年。以頭癩卒于河南。年五十八。專具清史列傳文苑傳。幼有神童之譽。吳偉業稱爲江左鳳皇。長而才名益著。意氣若雲。當世名流。無不酬唱訂交。所著湖海樓詩集八卷。文六卷。駢文十卷。詞三十卷。文多表章舊事。駢體尤擅盛名。詞多至千八百首。一代詞家。莫之能比。清中葉以後。駢文規摹六朝。填詞取塗南宋。作者輩出。跨越前代。然皆不如維崧之爲大家。亦不如其使筆如舌。曲折盡致也。維崧早年與朱彝尊齊名。刻朱陳村詞。今不可見。

開河

前年大水廬舍沒。今年無雨井泉竭。江南江北盡開河。官司夜點開河卒。朝開河。暮開河。河身龜圻將如何。千夫舂鑿競邪許。淤泥堆積成跛陸。三日開一尺。五日開十步。監河使者河上住。虎囊錦繖一何怒。尙畿大編誰家子。楓林祭賽刲羊豕。船頭打鼓催發船。那得河中一杯水。官輸馬吏罵夫。爾曹飽飯何爲乎。河夫聞言淚雙墮。家貧路遠夫常餓。君不見。河乾田焦冬復春。滂沱須賴皇天仁。缺斂洵得送沽酒。官莫枉却開河人。湖海樓詩集二

任繩隗直木齋全集十三卷

任繩隗。字青際。號植齋。宜興人。更名方斗。舉順治十四年順天舉人。以奏銷案覈革。仍復原名。初師事張溥。頗與社事。聲名甚盛。宜興諸任皆有文采。元祥最著。繩隗文不及其堅卓。亦俊快可喜。而詩詞清麗則過之。元祥詩專學杜。與侯朝宗合。繩隗則由長吉以摹雲間。與陳維崧齊名。稱為陽羨雙絕。撰直木齋集。詩七卷。詞三卷。文三卷。詩各體皆工。氣力深厚。樂府諸篇。不規規漢魏辭句。淒清婉約。頗得風人之旨。贈答俚格五絕句。及為格題畫諸作。知繩隗工寫黃庭。為格所重。毛節婦傳。序述極有生氣。蓋以愧其時士大夫志氣之不堅定者。

催科

楚地連師日。吳中重賦年。鬼妻猶吏鬻。交子率官錢。鹿挺何時靜。巢空幾處煙。奉行誠有道。明詔豈虛縣。時有旨免漕一。直木齋分。官不果行。全集四

春興辛丑吾鄉以抗糧待罪。泊甲辰不得與南宮試。公車至河間而返。於道漫賦。

春去春來日已曠。為牛為馬任君呼。高人欲插紅犀道。世事惟榮金僕姑。試看北山移討檄。莫教東郭斃韓盧。藝蘭九畹應空谷。學種當門鋤也無。直木齋全集五

周茂源 鶴靜堂集十九卷

周茂源。字宿來。號釜山。華亭人。順治六年進士。刑部主事。晉郎中。出爲處州知府。十八年。以隔邑冒戶追糧左遷去職。茂源爲諸生時。已有聲名。與幾社六子相亞。以王景略自負。守處州將及五載。兵戈如麻。海上之師。山寨之衆。縱橫出沒其間。供張師旅。招集流亡。頗有幹濟。晚歲葬夏允彝存古父子之喪。厚恤其女及嗣孫。尤爲人所稱。存古其門人也。卒于康熙十六年。年六十。事具其子綸所撰行狀。撰鶴靜堂集十九卷。凡詩十三卷。自十八卷起爲文。中闕四卷。四庫著錄本亦如此。殆志傳之屬。或觸忌諱。遂付闕如耳。詩善比附。字字工切。才不及臥子而深穩過之。近體遂盈十卷。文無高詣。皆率爾酬應之作。

偶感

徵求久已困江村。巖谷依然井稅繁。何處有花堪共醉。幾人無土自言尊。朝煙不改青山色。野水平添老樹痕。遙見隔溪多繫馬。催租長吏到柴門。鶴靜堂集八

閩民就食江右

滿目流亡劇可憐。尙餘殘喘適江天。哀鴻不定羣飛翼。怖鴿唯求施食緣。空有曉煙生荔圃。更誰春雨種蚶田。何時銅柱南征遠。拓地蠻僚入漢邊。鶴靜堂集九

卽事

使者巡行瘴海邊。驚傳旌節到吳天。餘酥醉臥千人帳。翡翠裝回萬里船。不信城狐常有窟。從教田犬悔

難牽。始知運去遭嚴譴。空鑄銅山鄂氏錢。

鶴靜堂集十

既中產納兵事以來不見機杼感慨及之

夜涼斗帳小樓眠。聽徹蛩聲思悄然。明月自隨更漏永。流黃罷織已多年。

鶴靜堂集十三

周 綸 不礙雲山樓稿二十四卷

周綸。字鷹垂。茂源子。少有雋才。茂源明季有名。輩行甚尊。故綸得與當世名流抗手。甚著聲譽。十赴秋試不第。以貢生廷試。得候補國子監學正。撰不礙雲山樓稿二十四卷。凡詩十卷。詞二卷。文十二卷。文多序記之作。唯南霽岑明府廳事落成記記撥餉之困。李公祠碑記述松江點充里役及北運細布收兌蘆草原委甚備。役說述革里下差押之事。皆足備參稽。綸詩文不脫雲間之習。而序事之作。頗具條理。詩亦多可徵事徵人。不礙雲山樓者。元張溪楊謙之所居。楊鐵崖爲作記。貝清江有賦。綸以之名集。或得其遺址歟。

望亭見饑民千許赴食有感

憶昨嗟其雨。焦原痛不毛。天心憑旱魃。民命屬黔敖。井稅恩難貸。春耕望正勞。何年邊埃靖。矜恤遍江

臯。不礙雲山
樓稿三

維揚兵阻

數數維揚路。歸心促長年。那知獻俘役。還阻下江船。天地兵戈窄。庭闈旅夢牽。一行南去雁。鍛翮轉堪

憐。不礙雲山
樓稿四

姑蘇竹枝詞十八首 錄三

禁旅纔聞出禁城。捷書預草達神京。舳艫一夜驚相告。爲撤貔貅直北行。

金昌亭外袞龍舟。赤棒黃旛壓上流。無數櫓歌行不得。萬年天子本崇優。

吳歛逐隊雅稱奇。幾許傳頭世未知。聞說兩階無事日。虞廷宣索比來儀。不礙雲山
樓稿九

沈 荃 一研齋詩集十六卷

沈荃。字貞蕤。號釋堂。別號充齋。華亭人。順治九年進士及第第三人。入詞林。官至詹事府詹事。禮部右侍郎。康熙二十三年卒于官。年六十一。事具宋學所撰神道碑。及孫在豐沈文恪公家傳。有一研齋詩集十六卷。乾隆二十六年。曾孫泰所編。近始有人爲之梓行。雖晚年之作。多所未備。而編次有法。讀之可以按年得其行事。康熙初吳之振嘗刻荃詩一百八十首入八家詩。此編盡取之。復有增輯。卷三同天垂六益過崔容齋。時朗詣雪竇楨起研德聖野諸子在坐有贈七律一首。卷五津門別錢瞻百彙寄允武朗詣雪竇

七律一首。自注云。瞻百作乾清宮賦極佳。雪竇爲魏耕。瞻百爲錢价人。順治十八年。以通海爲孔孟文告。密誅死。株連甚廣。當時皆諱其名。此獨不爾者。稿藏于家。幸不爲人所見也。荃工詩善書法。明清之際。已有聲名。詩不及雲間三子恆套。獨會心于高岑王孟。頗足見其性情。然中年以後。唱而不歎。詩思匆。遂乏佳致矣。

安山聞警再宿而行

歷落征途秋漸過。驚魂無際奈愁何。寒林露白封狐滿。衰草燐青戰鬼多。日暮千家聞巷哭。月明幾處動樵歌。相看此夕悲行路。潦倒雄心繫薜蘿。一研齋集一

武城道中見飛蝗感賦

橫流苦未息。赤地更堪悲。白日飛蝗蔽。枯楊野雀飢。人煙荒坂隔。香火亂村祠。客路重經眼。潸然淚暗垂。

十載流亡道。頻年水旱仍。天心真莫解。人事更難憑。梨棗先秋落。禾麻幾歲登。哀鴻中澤滿。愁絕正填膺。一研齋集五

松陵莊琦月聯舟北上詳述塞外情事爲賦二十韻

萬里投荒日。三年遠戍身。風霜悲大漠。歲月倚深仁。目斷燕山月。魂飛海甸春。遙天惟白草。入夜有青燐。板屋炊煙冷。寒泉汲水頻。關河空杳切。形影劇酸辛。坐臥應穿榻。行吟或負薪。窮年信使少。異域友

朋親。耕鑿原依化。詩書或比鄰。穹廬誰嘯詠。絕徼自咨詢。沙嶺連長白。

沙嶺即金上都。與長白山相距數十里。

龍江接巨津。

烏龍江東即大海。

山川仍鬱秀。習俗本龐淳。扼險孤城鎮。防邊一旅屯。中宵吹簫粟。向晚聽車轅。安土渾忘陋。偷

生豈厭貧。漸通重譯語。還見遠彝人。自分棲遲老。寧知雨露新。金雞來紫塞。白骨起黃塵。精衛軀何惜。

微蠕志可伸。鳩工誠黽勉。祇役敢逡巡。伊昨欣連棹。長途語浹旬。相逢仍客路。載筆漫含顰。

一研齋集八

王鴻緒橫雲山人集廿六卷

王鴻緒。原名度心。字季友。號儼齋。婁縣人。康熙十二年進士。高第第二人入翰林。官至戶部尚書。卒于官。事具清史列傳大臣傳。著橫雲山人集二十六卷。其詩不脫雲間之習。以藻績勝。鴻緒于徐乾學爲門生。于高士奇爲姍戚。三人奉密諭合謀以逐余國柱明珠。復自立黨相角。遂至俱敗。後俱再起。徐已先歿。高亦不壽。唯鴻緒兄弟保持富貴。終康熙之世。世或以其專任史局著明史稿之故。而不知實充耳目偵伺之役。今故宮尚存所繕密奏。故李光地榕村語錄續錄以奸猾鑽刺目之。真小人之尤也。鴻緒與揆敍比而奉戴胤禩。幸雍正元年即卒。否則誅矣。光地論詩。謂立齋儼齋足比新城澤州。徐元文不必論。鴻緒安能比王陳。光地此言。正以輕王陳耳。

燕京弔古

文淵閣下萬籤書。宋刻元鑄世莫如。兵燹一衝奎壁府。縹緗殘破劫灰餘。

橫雲山人集五

王九齡 嬾雲書屋詩彙七卷

王九齡。字子武。號薛澱。華亭人。項齡弟。康熙二十一年進士。官至左都御史。四十八年卒。事具清史列傳附王項齡傳。撰嬾雲書屋詩稿七卷。其詩不脫雲間派別。迄康熙三十年止。四庫著錄九齡所著艾納山房集五卷。而無此稿。提要稱其金陵雜感十里青樓原上草。六朝紅粉路旁花。亦不見此稿。艾納或晚年所刻。

穀賤歎

連年禾稼傷蟲賊。徧野膏腴同瓦礫。去歲西成幸有秋。泥沙穀賤無人糴。豐凶皆病真束手。虎吏催租聲霹靂。吁嗟乎。三吳財賦雄江東。荒城十室今九空。嬾雲書屋詩彙

沈宗敬 雙杏草堂詩稿

沈宗敬。字懋庭。號獅峯。荃子。康熙二十七年進士。特授編修。官至太僕寺卿。雍正三年卒。年六十餘。宗敬工詩。以畫名世。此其未第時所刻行卷也。

弔興濟舊縣

孤城昔日作藩籬。滿目荒烟歎黍離。雉堞猶存棲故老。琴堂久廢有殘碑。江南夢冷山青遠。薊北沙寒草

緣遲。飄泊自憐曾過此。臨風懷古不勝悲。雙杏草堂詩稿

王圖炳 江左十五子詩選

王圖炳。字麟照。華亭人。著有櫻香書屋詩。

遊仙

羅梁萬里碧天開。徐福方從海上回。鑄就金人如得道。焚餘丹錄未成灰。偃佺空想排雲至。劉項非因竊藥來。莫笑嬰兒姪女幻。世間鹿馬更難猜。

青雀西飛繞集靈。麻姑仙訣悟熊經。玉杯日暝黃雲護。金掌風微白露零。望氣方壺猶寂寞。祈年太乙尙丁寧。君王最有長生術。不道郎官是歲星。江左十五子詩選十三

案康熙中葉以後。忽尙服食長生之術。上起宮禁。下迄四方。二詩卽詠此。

畢大生 登下和鳴集

畢大生。字雨稼。華亭人。有蘭秋介雅堂詩略。

昌樂縣東十餘里有伯夷待清碑胡三十五廣昌慨然有作依韻和之

朝出昌樂城。驅車向東發。平岡騁遐矚。林木自疎越。道旁碑大書。風雨漬石髮。是非孤竹封。不葬西山

骨。謂夷此待清。慷慨讀未卒。緬想商周間。撥亂盛征伐。不遂叩馬志。終當采薇蕨。清風百世師。空山留片碣。讀書疑古人。湯武無乃闕。題詩紀茲行。戊辰夏六月。壁下和鳴集

黃之雋 唐堂集五十卷補遺二卷續集八卷冬錄一卷

黃之雋。字石牧。華亭人。爲諸生四十年。康熙五十九年始登鄉舉。翌年。成進士。選庶吉士。雍正初撰文稱旨。特授編修。充日講起居注。與修明史。擢贊善中允。督福建學政。爲巡撫毛文銓所劾。降編修。旋革職。三歲之中。三遷三黜。遭遇頗奇。蓋之雋師事陳元龍李紱。或黨與牽連歟。丙辰乾隆元年薦試鴻博不敢終

卷。力辭律呂正義館纂修之徵。不赴開復驗看。不詣朱邸。歸田後。家中不中資。唯藏書二萬卷。後遂屢辭

江寧鍾山書院。福州鼇峯書院。山陽淮陰書院。揚州安定書院。廣州粵秀書院之聘。固有所誠。而艱強忍饑。亦人所難也。撰述甚衆。初在史館成鐵鉉張昺姚廣孝張玉張輔諸傳。修江南浙江通志。兩淮鹽法志。已刻者香屑集十八卷。樂府六卷。撰唐堂集五十卷。補遺二卷續集八卷。冬錄其自序也。下筆務極才思。惜少檢擇。學不如毛奇齡。而筆舌互用似之。前輩查慎行查嗣琛趙執信周彝。皆賞其奇才。詩多五七排。清人集中所罕。文如楊義士傳。述金堡上書定南。請收葬瞿式耜張同敞。書未達而式耜客義士楊藝已得請。堡謂不可以吾書揜義士之功。是曾讀徧行堂集者。書孫延齡事較他書所紀爲詳。蓋皆親得之桂林。鎌山堂全集序。謂王玠右光承。明季再辭福王之召。年方四十。奉親隱于華亭石笥里。老而無

子。唯一女雙鳳。善詩有玉榮草。適楊懽。光承依之以居。卒于康熙十六年。年七十二。後六十年外孫日微。哀刻其集。凡序記疏策書傳題跋雜著墓志祭文二百二十九首。詩三百一十五首。作于前明者什四。入清者什六。周勒卣先生遺集序。謂其玄孫京取壬申文選。幾社六子詩。編爲五卷刻之。頗譏錢謙益有憐于學二國兩京六代三唐之學者。斥爲繆種。故列朝詩丁集不錄雲間一人。然于所爲有學集詩注序。稱美謙益。亦不沒其善也。之雋剛介不隨流俗。故官不達。然達如張照。在律呂正義館編曲操鼓。如狎客伶官。曾不得比于大晟樂府。身後藉沒。幾至族夷。亦何貴于達官乎。早歲羸弱多疾。及壯稍充。晚患頭瘡。癬復滋蔓。竟登耄耋。乾隆二十五年庚辰始卒。年八十一。及門沈大成能傳其學。

蠶女

浙中盛蠶事。吾邑無之。故作此詩歸示鄉里。

纏綿身上衣。辛苦千萬緒。鮮衣盛服人。聽我歌蠶女。蠶女十六七。嫁夫結鴛侶。作家甘勤劬。歲寒秉機杼。三月蠶事起。樹上黃鸝語。妝成不出遊。垂簾理篋篋。蠶生先後齊。蠶飢當啖茹。金環約皓腕。采桑往東墜。道逢遊冶郎。低鬟首不舉。還家剪綠葉。哺飼順時序。圍爐溼氣驅。密室旁風拒。颯颯食葉聲。急雨響蘆渚。忙月倩女伴。來助蠶事者。俗謂之忙月。相助爲黨與。嬌軀本孱弱。匪勉奮腰膂。繁紅枝上稀。不知春已去。寢食於斯寶。養蠶家呼蠶爲寶。何暇相延佇。三俯三起時。插簇一尺許。微蟲競効命。吐絲自織褚。數日繭乃成。滿屋白滑滑。桑根釜下炊。繭子釜中煮。織手抽不遲。併合五六纒。牽引上緯車。軋軋無所阻。宛轉動清響。家家

弄新暑。新絲皎於雪。十倍麻與紵。蛾蛹爲夫妻。拍拍相狎處。產子實蕃息。浴種藏善所。促織鳴東廂。流黃照秋炬。織帛已成疋。寒來不愁禦。西鄰養蠶婦。衣褚敵籬芋。借問何爲爾。蠶月運齟齬。苦練一筐絲。賤價售商旅。本以完官稅。豪右責逋糴。公私償不足。且用飽吏胥。叶上一一絲不到身。奚望篋笥貯。同力蠶桑務。脈脈受酸楚。霜風遠相尋。淚下不及杼。唐堂集三十三

打穀詞

東土多種穀。謂之
荳。五穀之一。

打穀打穀先築場。場如砥平銅鏡光。四圍堆穀高若牆。裁韋束竹竹柄長。若不用汝相贊襄。十指劍擊安得將。東場打穀西場歌。枷聲抑揚與韻和。就中五音角音多。白日燥脫葉與柯。大風西起紛相按。腐餘飛揚逐逝波。甌窶穰穰真滿篝。三年大無今有秋。邑有賢宰仁優優。謂有符檄不許橫索求。能使汪濊皇恩流。鄉農踊躍爭納官。升斗餘儲婦子歡。新篲滿缸蔬滿盤。殺雞召隣酌且餐。蓬頭赤足昨打穀。今日衣冠新沐浴。去聽神絃太平曲。唐堂集三十六

桃樹開棉花歌

紅雨落地春風薦。枝頭灼灼開木棉。吳中但作異聞說。詩人爲詠紀瑞篇。可憐繁華盛江南。桃花人面豔神仙。園林三月爛如錦。桃葉桃根載滿船。寒女炙日栽木棉。逢秋作花黃滿田。羅袖香車那肯顧。濫竊花名殊不妍。皇天當此出新意。略使點綴春色前。以示無用變有用。淳樸直收妖浮鑿。君不見。吳中荒歉連歲年。棉花稀少貴金錢。茅簷紡車久無響。杼柚不知何處邊。欲采桃花織不得。青齊絲履非吳植。絡緯蕭蕭

蕭促織鳴。涼風窗下吹絺綌。安得桃花千萬樹。開徧木棉以爲布。坐令無襦皆五袴。唐望集 三十六

水碓

轉輪在水稻在屋。糠粃如塵米如玉。誰其爲之機與軸。坎臼在地杵在木。橫貫輪心輪運瀑。以溪之水代
人足。列杵五六杵齒齒。一杵入臼一杵起。圓輪迫杵水迫輪。急急晨昏春不止。溪女鬢插山花紅。列坐白
旁如課功。從容揜袖簸揚畢。勞逸不與吾鄉同。我來如聽一部之水樂。輪音爲商杵音角。唐望集 三十七

刺梅園古松

封氏物傳
自元時種

下馬入門尋古松。不見松樹見老龍。老龍臥此數百載。伸縮壯態爲懶容。鬚胡糾紛春雨刷。鱗爪皴裂秋
霜縫。蠱腰橫陳不解媚。強項仰視殊非恭。天公壓抑直不得。偃蹇四出相撞春。拔地屹屹與地爭。下體
却被泥土封。不然黑夜徑飛去。風雲雷雨尋無蹤。龍乎龍乎非爾變化託林莽。世人安得上天與爾逢。

唐望集
三十七

踏車謠

田婦踏右。田夫踏左。田夫打鑼。田婦打鼓。田婦白足運兩跌。田夫赤臂踊雙股。身倚橫木脚不停。俄頃
捷行萬步武。不離轆轤平作梯。倒挈飛流注乾土。淙淙洶洶水上坡。行人助爾唱秧歌。江南梅雨落未多。
抽起清江浸綠禾。低田尙可。高田則那。桔槔一木。羣脛相摩。官噉俸米。我勞如何。唐望集 三十九

高不騫 傅天集一卷

高不騫。字槎客。華亭人。曆雲孫。康熙四十四年。南巡獻賦。賜官翰林院待詔。是年北上。撰傅天集一卷。戴名世爲之序。

南陽見刈麥

來牟濡雨露。先熟占年芳。碧浪兼天靜。緗雲覆隴長。刈纒紛婦子。碾却競農桑。日夕炊烟起。應聞餅餌香。傅天集

李 雯 蓼齋集四十七卷 蓼齋後集五卷

李雯。字舒章。青浦人。諸生。入清薦爲內閣中書舍人。卒于順治四年。年四十。雯負才名。官中書。一時詔誥書檄。多出其手。致史可法書。其最著者也。近從內閣大庫檢出攝政王致唐通馬科書彙各一通。亦其手筆。是時草創方始。舍人之職甚重。多擢卿寺方面。龔鼎孳嘗疏薦雯。稱爲文妙當世。學追古人之李雯。國士無雙。名滿江左。石祿天祿。實罕其儔。陳名夏尤交相引重。非無騰驥之路。又其時給假至難。雯卒前一年。南歸葬父。期以經年。頗稱異數。必有大力左右之者。乃憂傷憔悴以卒。擊交陳子龍。以順治四年五月十九日就義。雯方北行道病。抵京卽卒。同一死也。而有輕重之分。撰蓼齋集四十七卷。後集五

卷。刻于順治十四年。爲詩三十二卷。文十五卷。後集詩四卷。文一卷。少與子龍齊名。倡雲間詩派。高擬三唐。極才情思致之妙。然集中樂府遂至六卷。不脫七子窠臼。所謂規北地而述信陽。蓋猶實錄。祖昭明而瀾李杜。則誇語也。入清之詩。眷念平生。摧抑不堪卒讀。文摹六朝。尙有才調。摹左國史漢則支矣。秦漢韻文。無一字之似。大約與子龍同病。撰策盈至五卷之多。頗有見到語。顧炎武引其策鹽就場徵稅。天下無公鹽亦無私鹽。意頗重之。

旅思

家國今何在。飄零事日非。依人羈馬肆。鄉夢憶牛衣。有淚吟莊鳥。無書寄陸機。鷓鴣真羨爾。羽翼向南飛。懷南之鳥。初 藜齋後 出必南飛也。 集二

臥病射陂喜逢萬內景有贈

故人雞髮意如何。一縷無遺足嘯歌。野袖最宜蕭寺靜。綵毫更覺白雲多。班荆亂後無餘話。贈藥愁中日再過。海內弟兄零落盡。非君孰與慰蹉跎。藜齋後 集四

哭周生

亂後身名可自由。憐君不及鄭台州。劇秦新論誰爭草。月旦家風乃世讐。國事既看如覆水。斯人豈合付刀頭。平生尙有延陵劍。不敢高懸隴樹秋。藜齋後 集四

案此哭周鍾也。四指其兄銓附馬阮以劾鍾。鍾見吳應箕祭周仲敷文。

王 原 學菴詩類五十七卷西里文抄十二卷

王原。本名原深。字令詒。號學菴。晚號西亭。青浦人。康熙二十七年進士。四十三年。由銅仁知縣。行取工科給事中。奏參吏部文選司郎中陳汝弼。違例起用投誠僉事道黃鐘爲溫處道。軍前委用昆陽州知州卓仕傑起補趙州知州。列舉婪贓納賄五款。事下法司。罪皆徵實。當汝弼及鐘絞罪。汝弼福山人。己未康熙十八年進士。官刑部郎中。以理學矯飾。受知李光地。光地時以直隸巡撫兼吏部尚書。因薦汝弼調任文選司。是年春。原與給事中黃鼎楫湯右曾許志進宋駿業合疏劾光地。水災漫無經理。光地引咎得留任。至是原復劾汝弼以撼光地。所謂更端求勝。原與房師陳公書云。邇因銓司穢劣。鷹章入告。現在察議。各款皆實。月杪臺疏應上。但此人百足之蟲。又佐以堂司之力。堂司理學名儒。素隆聖眷。自知疎戚不敵。知原志在搏擊豺狼。不專問狐狸也。聖祖果以涉及光地爲嫌。力庇汝弼無納賄確供。四十四年五月初六日。親審于暢春園。黃鐘遂反口苦打成招。十七日。議政大臣九卿覆審定案。都御史舒輅及原等革職。刑部尚書安希祿侍郎常授等降級有差。汝弼已革職無問。事具實錄。原自述其事。見所撰鸞臺集三。酬元朗云。友道今如此。君恩故有餘。儘翻雲雨手。祇笑鵲鳩居。自注。余論選司奸貪事。獄旣成。仇人出其門生私書。誣余及元朗東發三人。同時遭黜。其門生余輩故交也。向在內廷供奉。元朗東發旋被命以丹青供奉內廷。罷其門生供奉。故有鵲鳩居之句。此所謂仇人者。陳汝弼也。故交者王式丹也。元朗爲給事中吳

環。東發爲給事中王銓。蓋三人獲罪。由汝弼呈出原等請託三書。而式丹爲之證明。王懋竑白田草堂存稿。十翰林院修撰叔父樓村王公行狀。記此事云。公選拔同年二人。同譜一人。皆以縣令行取。例科道兼補。而三人者欲補科。選司陳公持之。意未決。陳公者。公鄉試座師也。三人以公同年同譜相好。託爲之言。又于給諫湯公西崖座上作書致之。西崖湯公。亦某某同年也。科臣某既入垣。即疏劾陳公以重罪。陳公性剛少合。選事或行己意。廷臣多嫉之。事下法司擬大辟。會聖祖自南巡歸。廉知其事。聖祖素重陳公。得召見。陳公具言科臣挾私陷害。以公手書爲證。聖祖領之。命內大臣覆審。公具言手書始末。語與陳公合。于是陳公得免罪。三人者皆罷職。湯公與同席并奪俸六月。公亦僅奪俸一年。又遺事云。王公令儀吳公元朗公選拔同年也。王公東發公同譜。而王公令儀吳公元朗又湯公西崖同年。先是公已爲言于陳公矣。至是又託湯公促爲言。公卽爲座上作字。陳公以公言切。勉從之。蓋本爲三公言。其後王公令儀入垣。卽擊陳公。蓋不復爲公地矣。當內大臣覆審時。不敢不以實對。非特師弟之誼不可以負。而于三公非有嫌怨也。議者或謂公不當累及吳王二公。此未深悉其始末者。故附載之于此。果如懋竑所述。私書請託。式丹親爲作書。不止居間。且爲預謀。汝弼呈出三書。不皆作于湯右曾座上。其中必尙有曲折。原以爲誣余及元朗東發三人。如真請託。何得爲誣。吳曝西齋集次和西崖送別二首云。傷心趨走地。猶有未焚書。西崖復用前韻見詒酬答二首云。多君中發憤。爲草絕交書。是試式丹賣友者。不止吳王。卽湯右曾亦與絕交矣。斯卽懋竑所辨議者。或謂累及吳王二公之所由來也。唯懋竑自負史學。述其家事。乃有

數誤。吳暉由戶部郎中。王銓由中書入垣。而曰三人皆以縣令行取。聖祖親鞠。而曰汝弼得召見。汝弼論
紱。而曰大辟。議政大臣九卿覆審。而曰內大臣覆審。書生不知朝內事。極爲可哂。亦可見紀載之非易
事。大約私書必有。而請託未必出于原等三人。不然。原不致以爲被誣。陳廷敬序吳暉西齋集。但言以酒
食細故落職。實則聖祖以私書罪原。本屬借題。觀與原合疏劾李光地之許志進。亦借與阿山互訐事被
職。知事同一律。蓋原爲徐乾學親近門人。原婦翁蔡羽明博通羣籍。鼎革後高隱于醫。乾學父開法避難。
匿羽明靜室期年獲免。乾學兄弟既貴。父事羽明不改。知其不可挽。諄問似續。乃薦原質敏勸學。此徐王
會合之始。事詳褚聯明齋小識。徐亦與志進有關。徐李分黨角立。原等劾光地。若爲乾學報怨。故聖祖必
痛抑之。宋駿業獲免。以故輔宋德宜舊恩未替。黃鼎梅未獲罪。必有其故。湯右曾吳暉皆乾學會試門人。
一罰俸。一革職。而令暉入直武英殿修書。亦必有其故。光地撰榕村語錄續錄。謂乾學罷歸後。風波始稍
息。而不料十餘年後之猶有此波也。終遼帝眷。故許志進自爲巧宦。陳汝弼之獄。牽連多人。實爲一大
獄。故備著之。原歸田後。頗事著述。卒于雍正七年。年八十四。所撰有學菴類纂。世人所見多不得其全。
子藏學菴詩類。爲短檠集四卷。北鄉集五卷。閩海集二卷。寒竿集五卷。小草集三卷。過嶺集二卷。端州
詩集三卷。惠陽集二卷。岫雲集五卷。桐江詩集十卷。鸞臺集三卷。滄江集十三卷。自康熙八年己酉。迄
五十六年丁酉。凡十二集。五十七卷。又學菴經類歷代宗廟圖考二卷。學菴史類明食貨志十二卷。又見
有學菴文類茂名公牘七卷。銅仁公牘六卷。疑當時文集必有刻本。西亭文鈔乃光緒中青浦劉汝錫得古

文辭稿本六巨冊。爲編十二卷。刻成于十七年辛卯。蓋未見學菴類稿也。據明齋小識云。西亭雜稿有張孝子兩傳。知原文集本名西亭雜稿。張孝子傳不見文鈔。則所得手稿。未得爲全。原嘗從陸隴其湯斌游。故喜言理學。又嘗從徐乾學修一統志。故頗知問學。學文于朱彝尊。學詩于王士禛。詩文雅飭。不斤斤于雲間派別。撰述近百卷。哀然大集。議論可取。舊事足徵。是亦足重矣。

史鍼師

史翁少服賈。居奇鹽官市。市尾遇道人。草衣曳革鞮。手內俞伯鍼。斃者當之起。翁願受其術。與世掃痰瘡。叩頭乞道人。笑領謂少俟。一日邀之野。持授鍼四矢。窳穴一卷圖。絲髮疏脈理。言已忽不見。試之詫奇詭。其名不脛走。吳山遍越水。羔雁交四衢。舟車會千里。但得翁施治。人無枉而死。所至僑廣宅。雜遝塞階阨。爭席只一尺。其貴百朋似。先至僅廁足。後至空徒倚。日集百千衆。風擊暨鼓飢。勞瘵並關隔。瘍毒及癢痞。或害在耳目。或患屬肢指。或寒戰筋骸。或炎灼脂髓。或虛屬一息。或實發狂侈。晨到蹙頞愁。夕還開顏喜。來時須扶攜。去時捷步履。呻者忽以吟。盲者忽以眎。如臂與以掌。如足與以趾。篤癘脫其痼。疣贅釋其累。在昔司馬氏。倉公列方技。吾詩載翁跡。可以備國史。短策集二

吳中吟

民生日愁苦。惟有巨估樂。擁貨射時利。百業隨所託。陸行乘堅車。水行駕高舶。娛坐雜倡優。一指百唯諾。求取不瑕疵。氣勢吾所作。出心區是非。信畫別榮落。貴吏不成倨。亦念充囊橐。囊充豈徒然。神叢借

一博。失小償百千。民膏竭腴削。觀此胸結轡。慮與按騰躍。不見照螢人。窮老青芸閣。巨估寒等集二

葉映榴 葉忠節公遺稿十二卷

葉映榴。字蒼巖。號丙霞。上海人。順治十八年進士。官至湖北糧儲道。康熙二十七年。死夏包子之役。年五十一。贈工部右侍郎。事具清史列傳大臣傳。撰葉忠節公遺稿十二卷。有雍正中葉鳳毛重刻本。故但題芳輯。有曹一士所爲傳。較康熙原刻本。增公牘若干首。刪詩文數十首。次第亦易。清初雲間詩派稱盛。李張二董三周諸曹各擅勝場。映榴雖未足與之連鑣并駕。而造詣亦深。四庫存目乃謂以人傳。不必以文傳。非篤論也。

漢松

在臨城文廟庭東。云是漢時植。

一枝西向指斜曛。勢欲奮騰徑入雲。風迸霜皮枯墨皴。苔緣錯節碧螺紋。得依漢曆誇年代。幸免秦封漏斧斤。千尺孤根蟠壁水。好憑雨露長龍文。葉忠節公遺稿二

唐槐

在臨城隍廟。大可四圍。轟然一物。云是天寶時植。

但言天寶已堪哀。桃李梧桐盡劫灰。此地結根非建始。問誰移植向蓬萊。婆婆猶自含生意。擁腫都應是散材。無奈里人喬木思。青碑勒字號唐槐。葉忠節公遺稿二

張 宸 平圃遺稿十五卷

張宸。字青瑯。號平圃。上海人。順治中以諸生考授內閣撰文中書。康熙三年。遷兵部主事。告歸。卒于十七年。年六十餘。撰有平圃遺稿十五卷。卷一爲頌及詩。二制草。三奏疏。四議及呈。五書。六啓。七賦論說引。八至十一序。十二傳碑祭文。十三松郡輿地考異。揚郡水利論。淮郡水利論。十四中書述。雜記。十五塞北紀程。昔藏此本自何紹基鈔本傳錄。有咸豐九年紹基跋云。嘉慶己卯_{二十}夏。在龔定菴處見是書。假歸閱未竟。爲魏默深取去。采入經世文編。知世無刻本。唯上海徐紫珊家有之。因借鈔寄都。今考龔定菴續集有上海張青瑯文集序。謂嘉慶二十五年于上海李筠嘉得張宸所爲文集三十卷。喜而錄其副。與此本卷數不同。龔序又謂雜事記五篇。此本雜記無篇數。曾見又一本多四則。此本亦別出二則。度皆非完本。紹基稱采入經世文編。爲吳淞江應濬條議。及建閘議二篇。而未畧宸名。此本凡畧年在康熙十七年戊午以後者。皆非宸作。不知何以屢入。使粵草八卷。宸康熙二年使粵所作。爲六世孫第手錄。有程可則序。每體之首。有宸自作小序。當爲宸手訂。或曾付梓。遺稿之詩。語氣有不類者。恐亦他人所作。宸爲陳子龍高足弟子。素負才名。以所撰長平公主誄。擬享祭孝獻皇后權厝文得盛譽。今讀其集。條議鄉里興革事宜。極有卓識。水利皆可施行。不同空論。詩亦當行。不盡規摹七子。吳喬園爐詩話。譏宸當進生大黃一斤。洩去腹中陳臥子。始有語話分。實爲門戶之見。卷首有徐元文所撰張平圃六十壽序。有云。武

林安男子上飲章。告吳中士大夫。語多不經。皆深中當時之忌。公泣而號于衆曰。孰是西銘介生。而戊亥之交。虎邱猶列于會耶。主者以此詰之。其人無以應。而彌天之禍以平。又龔鼎華請寬奏銷之獄。原奏爲宸所草。卽見本集。以此二事論之。草創之際。宸能爲人弭禍患。或亦足取。不知所謂妄男子。卽梅村家藏稿告子暎疏之陸鸞否。

憫憂述

腸斷經離亂。移家月黑時。榜村燐火濕。欬枕吠聲疑。欲隱天俱窄。求生力已疲。艱難且骨肉。乘暇煮羹

藜。平園遺藜一

張永銓 閑存堂文集十四卷待刪詩集五卷薊門游草一卷豫章游草一卷西村近藁一卷

張永銓。字賓門。上海人。康熙三十二年舉人。撰閑存堂文集十四卷。待刪詩集五卷。薊門游草一卷。豫章游草一卷。西村近稿一卷。據目有張氏族譜八卷。補編一卷。所見各本皆缺。卷五缺明史論一首。他文間有缺葉。疑因忌諱抽刪者。然卷十缺王父傳。而頁數次第不缺。良不可解。永銓以西山游記得名。其文雅飭。議論足觀。志傳之作。多有可采。詩亦侷儻。于張宸爲猶子。信淵源有自。與汪東山書。力論科場之害。知通榜之害。至康熙中葉以後。未之有改。詩有河上紀事九十六韻。敘述甚備。體格極近香山。與寧都魏禧兄弟納交最篤。而集中有天文論。人論。性論。請復上海文廟禮樂議。請實行鄉約議。請作興義學

議諸篇。蓋亦有志經世者也。

悲淮民

悲淮民。淮民大半作波臣。千載神宮巨浸沒。百年祖墓深淵沈。壞我室廬魚遊釜。野老策堤勤畚土。脚穿手爛不辭勞。泥水齊腰草沒肚。以車戽水水未出。一夜平添四五尺。乍喜禾苗簇簇青。旋驚波浪皚皚白。嗚呼河伯何不仁。矯首呼天天冥冥。不願俟河清。但願隄無傾。河臣之績勸貞珉。勸門游草

水碓歌

昔在淮上見風車。借風戽水灌桑麻。今到湖中看水碓。沿溪杵臼紛成隊。從來利在天地間。因勢導之任其便。豈爲風車忘婦子。莫因水碓笑胼胝。君不見。力田農。不怨后稷酷。畢竟勤勞鼓其腹。若使安坐可生人。始皇早已廢播穀。豫章游草

蔡湘竹濤先生遺稿四卷

蔡湘。字竹濤。上海人。詩繼雲間遺響。年二十入都。爲一時名流所推。與朱彝尊李良年潘耒友善。以縱酒卒于康熙十一年壬子。年僅二十有五。尙小潘兩歲。朱李則幾長二十歲矣。夙慧早成。奇材天授。撰竹濤先生遺稿四卷。後百餘年。曾孫陸始輯刻之。皆北游所作。凡一百一首而已。

龔芝麓宗伯席上聽柳敬亭談隋唐遺事限韻

晉陽龍起說興唐。鐵馬金戈舊事長。草昧君臣私結納。亂離豪傑走關梁。聽來野史風雲驟。貌出凌烟劍佩莊。側耳良宵俱上客。明燈高映六街霜。竹濤先生遺稿一

姚淑海棠居初集一卷

姚淑。字仲淑。號鍾山秀才。工詩善畫。有儀容。爲達州李長祥繼室。長祥沒後。晚境拮据頗蒼涼也。閩人之詩如絡緯吟之類。多出良人代筆。淑詩明秀過長祥遠甚。其爲自撰無疑。

憶鍾山

萬方之天。豈不明矣。五嶽四瀆猶來朝。只山山不見。雲霧厚起。不得見兮。泣涕如雨。海棠居初集

外甥唐大陶至

扁舟到毘陵。天涯嗟爾至。當軒置尊酒。雲盡月下地。對月語重重。此會良不易。今日吾家客。明朝煙水次。海棠居初集

王文治吳越游草一卷後村雜著三卷後村詩集七卷

王文治。字後村。先世歙人。業商。其祖徙居江寧。文治少羸弱。讀書龍河。與翁奎先著爲友。兩人皆有高致。文治亦不事科舉。吳越游草一卷。刻于康熙四十五年。後二年又刻雜著三卷。多論史事。謂明之亡。

由于民窮財盡。又謂明季舊京風俗之敝。正少陵詩所謂朝野歡娛後。乾坤震蕩中。頗爲有識。後村詩集七卷。附刻文二十三首。約刻于康熙五十八年。翁荃稱其哀樂一往。以詩爲志。今觀其效左思詠史十八首。明故宮曲四首。詠史絕句十五首。擬漢時童謠二首。讀史雜感三首。讀方正學先生詩集有感一首。和陶飲酒二十首。皆發憤有慨而作。特未顯言。若以當時之事證之。不難得其所指也。

飢民歎

朝飢賣我妻。莫飢賣我兒。賣兒幸爲奴。賣妻奚以爲。骨肉一朝盡。餓死安足辭。垂絕忽三嘆。悔不忍須臾。團團入溝壑。魂魄長相隨。含悽訴四壁。有淚將安施。不聞哭死哀。猶悲生別離。行矣勿復道。泉臺謝寒飢。羣鴉噪枯骨。陰風吹瘞藜。鬼妻與鬼子。茫茫天四垂。後村詩集一

詠史

釣黨居然姓字香。空教衣鉢賣高陽。排牆死遜王彝甫。承旨官夸趙子昂。夢繞白麻憐鼠鬪。手翻青史恨鷓鴣張。請纓何意終搖尾。賈白相看傀儡場。

誰云江左見彝吾。故紙堆中一暖姝。心緒何堪聞舊雨。頭顱如許拜孤塗。抗言在昔無文謝。善嫁于今有夏巫。白首看花空淚落。息鳩終自媿羅敷。後村詩集四

打柴詞

老農在田朝苦饑。老婦入山風吹衣。枯枝敗葉爭俛拾。終日僮僕經頹巖。負薪歸來山徑晚。荒林破塚青

燐飛。茅檐壁立無一物。饑寒舉室相因依。艱難自古媿生理。嗟爾夫婦安能辭。

吳越
游草

憫田家

深夜起飯牛。天空星斗寒。牀頭聞雞聲。驅牛履嚴霜。殘月照村巷。荒陂宵漫漫。野風來水際。吹我鴉衣單。積苦悲牛瘦。幾自忘艱難。終歲劇動動。一飽不可干。何如游手輩。高臥且加餐。

吳越
游草

何 絜晴江閣集三十卷

何絜。字雍南。丹徒人。諸生。屢試不第。撰晴江閣集三十卷。刻于康熙十五年。凡詩八卷。文二十二卷。有章性良何雍南先生紀略。書晴江閣集後一首。述絜事不備。且有夸辭。謂絜受總督于成龍聘修鎮江府志。書成上之。詔曰可。全不類識世務人語。又謂今年七十。竟不知何年。絜頗自貴其文。人亦以是稱之。然詩文皆乏滋思健筆。詩于盛衰之際。深情一往。間有足觀。文喜蒐滄桑間事。如堵胤錫傳。周遇吉傳。張春傳。皆不遺實。順治己亥^{十六年}。鄭成功陷鎮江。事後與大獄。世多不詳其事。往往與金壇案混爲一談。絜所撰烈婦傳。微露其端。一鱗一爪。稍可參稽而已。近人以絜集難求。唯俞樾嘗采入薈萃編。因據傳鈔本印行所撰傳三卷。言丹徒後先百年間能爲古文者。唯張玉書何絜張崇蘭三人。而絜文尤有關係。竟忘却冷士帽何也。士帽人品筆力。過絜遠甚。

四憶詩
二錄

健兒十萬半城屯。猱獍叱咤驚人魂。一年首重上元節。怪底於今早閉門。淮西秧歌搯花鼓。傀儡傳傳演雜舞。狹邪攘臂濁旗丁。閭巷逢迎受欺侮。二十年前號治平。逢人笑語偏多情。一到上元相慶賞。家家燈火樂春晴。高堂暖閣張華宴。光分紅燭生嬌豔。呆愚擁座繪珍奇。琉璃映徹尋常見。丹陽絲燈擅窮工。鏤脂刻羽何玲瓏。八寶裝成萬態變。九微透出千絲紅。三五親朋入燈市。夜游無忌任行止。流星珠幌月如銀。捲霧雕棚人似綺。火山火樹更分明。絳紗冰穀晚風輕。竹葉酒傾簾幙底。六街歌吹賽流鶯。桃花笙和金縷曲。鷓鴣絃撥簫吹玉。清風橋通綠水橋。火龍盤繞月華高。無那韶光同轉轂。極盛春燈看不足。牙旗分幟割軍營。辛苦民生多踟促。幕燕飄搖少定期。不堪回首淚沾衣。但願虎皮包甲冑。復見太平全盛時。

上元
燈火

陽彭山上游覽多。陽彭山下風日和。華堂傑閣矗空起。梨園選勝早徵歌。點染雙文王實父。玉茗堂空燦花主。吐納宮商悞後生。檀板低敲因按譜。南調流傳梁伯龍。紛紛相和許誰同。懷寧尚書荊州守。演出新聲李笠翁。種種傳奇翻不足。綠鬢子弟喉如玉。鳳羽裁成翡翠妝。驪珠轉出麝脂曲。二八歌姬勝小蠻。螺黛纖纖柳葉彎。蓮步蹁躚羨長袖。花枝婀娜舞輕鬢。絳唇鶯吐成黃絹。嬌羞閃映桃花扇。曲罷歌臺夜似霜。樓頭早下雙銅箭。自古繁華不相待。桑田尚爾變滄海。燕舞鶯歌能幾時。雕欄繡樹須臾改。回首華筵逐斷雲。歌場開府總千軍。十年習慣伊涼調。玉樹霓裳那處聞。

西江關
晴江關
歌舞集三

入金陵二首

悠悠客思對斜陽。迢遞愁生路更長。江上龍飛秋水漲。關前虎臥暮山涼。松楸無氣通霄漢。樵牧何人識帝鄉。佇望昔年冠履地。五雲深處下牛羊。

千載埋金氣已寒。舉頭誰復望長安。銅駝雨泣炊烟重。石馬風嘶牧笛殘。歌吹竟寰天外聽。旌旄繡織夢

中看。香銷玉冷胭脂井。何處龍舟泛紫瀾。晴江閣集五

乙卯仲冬卽事

方訝長虹冬日見。電雷旋作雪寒初。救時難上天人策。仰屋惟刪賦役書。滿眼山川飛羽檄。幾人壇坫會兵車。生來不是從軍者。且覓清溪學釣魚。晴江閣集五

陽彭山同七襄子發千一賦

寂寞高臺俯下方。盤旋眼底盡堪傷。千家繡織分軍府。十里荒蕪弔戰場。山下西南十里。卽己亥戰場。依舊江山還旖旎。到今風日獨淒涼。何年牛馬都歸放。喜見花飛遍地香。晴江閣集五

爾止以丙丁龜鑑相示因口占一絕

讀罷傳書涕欲零。愁看三月柳條青。甲申無限傷心事。何用頻頻話丙丁。晴江閣集八

陳名夏 石雲居士文集十五卷

陳名夏。字百史。溧陽人。崇禎十五年進士第一。廷對第二。授修撰。未一年。驟擢兵科都給事中。寢寢用事。北都覆。降李自成。自成南奔。馬阮方嚴從逆之科。間關入浙杭閩。經贛入楚。徘徊豫皖間。順治二年七月。投成克鞏于大名。克鞏告保定巡撫王文奎薦之于朝。復原官。旋擢吏部左侍郎。五年。擢尙書。八年。授弘文院大學士。晉少保。兼太子太保。九年。解任入旗。給俸隨朝。十年復補祕書院大學士。兼吏部尙書。是時有南北黨之爭。北人馮銓劉正宗爲之魁。南則名夏及陳之遴也。各倚滿人自固。復通中貴以結主知。名夏初爲多爾袞所賞。後倚譚泰。譚泰誅。名夏屢爲銓所阨。賴世祖護持得免于死。十一年三月。寧完我舉發名夏留髮復衣冠立致太平之言。首劾其姦貪十二款。寧完我自負能文。爲名夏所輕。又名夏方以擅改御批朱帝眷。故嚴劾之。廷鞠。銓正宗證之。遂于是月十二日賜名夏死。年五十四。幸帝知其冤。置株連南士四十一人不問。翌年。之遴亦敗。事具貳臣傳。所撰石雲居士文集十五卷。約刻于十年。四庫著錄有詩七卷。今未見。名夏以制藝得名。自負能爲歌會之文。今觀其文。冗滯無法。馮銓謂舉業有名。餘亦易見。實爲公評。然朝局社事。未嘗不可窺見一二。寄王中丞書云。仙霞之事。想見塘報矣。奸人厚毒當世。善類凋落。眞足泣下。今旣隕于厲鬼。江南老少。莫不歎舞相告。蓋謂阮大鍼也。又答韓聖秋書。自述爲舉子時。與閩爾梅絕交始末甚悉。魯一同撰爾梅年譜。載名夏屢招之書。孰爲失實。二者

必居其一矣。

哭李舒章

白馬悲鳴處。朱紱斷絕時。總因才子盡。不見建安詩。鴻草埋深雪。龍泉泣故帷。修文天上召。多是李家兒。名家詩 永一

馬世俊 匡山詩集六卷前集六卷

馬世俊。字章民。號甸丞。溧陽人。順治十八年一甲第一人及第。授修撰。官至侍講。卒于康熙五年。據集中泣言詞生兒惟己酉句。推之當年五十八。事具清史列傳文苑傳。撰匡山詩集六卷。前集六卷。世俊早著才子之名。能爲詩古文辭。工書畫。有二右之稱。謂右軍與右丞也。少以制舉業與同縣陳名夏宋之繩齊名。獨數奇晚遇。順治十四年始得鄉舉。家故不豐。大兵後繼以大潦。父兄皆高蹈。不務進取。獨世俊屢試有司。泣血詞云。雙耳閉桃源。萬慮憂米薪。蓋迫于貧累以甘旨奉親。臚傳日徒步歸寓作云。却憐十里無車騎。自愧才疏欲避名。是時不應無鼎甲歸第之儀。或以國喪而罷。然不能自具車騎。亦其貧也。故其詩多酸辛之語。登第後不改。未及下壽。或以此歎。詩集爲順治十七年辛丑至康熙五年丙午之詩。其子宥容刻于康熙九年庚戌。宥字千見。容字千賦。皆諸生。能詩。前集爲順治三年丙戌。至十七年庚子之詩。刻于康熙十九年庚申。其詩不分唐宋。不名一家。溫純典麗。無矜才使氣之習。亦不膚泛。五言學選

體。竟能入格。可謂作手。不養與名流往還。集中陳宋外。唯一及襄鼎孳孫承澤。獨眷眷蕭雲從邢昉陳允衡。非不慕高逸者。泰山婦人行書酷吏傳後云。去年五夫作虎脯。今年吾子葬虎腹。便欲辭家擇樂土。趨起未行心畏縮。君不見商君論囚渭水赤。寧成一怒誅三族。殺身豈肯全寡妻。破家無復存弗屋。婦人猶在泰山下。終身辛苦守艱獨。吁嗟乎。食夫食子留我身。翻謝猛虎何其仁。此詩作于康熙二年癸卯。當有慨于山東于七及江浙哭廟通海莊史諸獄殺人如麻。而後見之詠歎。惜詩皆選刻。有避忌者。已從刪節。不然。必更有可采也。蔣超序其集。謂注李杜二集。凡數易稿。惜未梓行。又謂尤長于古文。

得容兒書

書來無幾字。字字說家貧。南北雙親眼。饑寒七尺身。凍雲催暮色。薄雪舞空塵。正憶辭家日。梅花復早

春。名家詩永五

魏慶徵 石屋詩鈔八卷

魏慶徵。字蒼石。溧陽人。康熙六年進士。歷官杭州延安邵武曲靖知府。未悉卒年。四十七年。官邵武時。已六十五矣。撰石屋詩鈔八卷。有西湖和蘇詩。閩行日記詩。閩中吟。擬漢魏樂府。陶詠。和白香山樂府。皆各爲一卷。而以其他所作爲雜詩。居首末各一卷。似即刻于邵武。觀其和陶和白。所尙可知。詩中多陳民風。樂府中尤多諷諫。六君子詩曰。史可法黃道周左懋第張春孫奇逢閻爾梅。謂存沒先後不同。而同乎

君子。非爲齊物。蓋有慨于明季任事者。同于書生。不能救亡圖存。而書生之沈淪者。未必無匡時之略。欲求其故而不可得。但曰君子而已。

杜陵叟

杜陵叟耕杜陵田。杜陵家居幾百年。年年穫罷蚤輸課。課完聊自供粥饘。穀貴不敢飽。穀賤亦可憐。常思減米救鄰餓。復去糶菜充官錢。邇來官長多苦貧。正供之外規額新。吏豈皆能自肥囊。頗聞使者徵求頻。僻邑猶暫可。路衝急於火。且復濟然肩。庫支借幾許。吏如此。民安逃。但聽獨租人祝頌。不聞絕食人悲

號。石屋詩
鈔七

官牛

往年官牛送戰車。前年官牛運軍需。今年聞有招墾例。官又借牛兼借租。租以給穀種。牛以闢積蕪。去年苦遭牛大疫。存者百一皆瘠羸。索牛無以應。惟剩身一區。此身不能代牛耕。猶可爲官手執鋤。索租無以應。饑困待何如。年年新穀未及熟。常奉倉裏催捐輸。石屋詩
鈔七

運軍謠

官運費在官。民運困在民。一從改長運。貧勞獨運軍。司農執成例。入手貲已分。戍兵借敦促。坐索土物勦。公私歲積負。婦子時酸辛。何當棄舟去。荷戈守城關。石屋詩
鈔八

繭織詞

兗州宅土宜蠶桑。飼蠶得繭纒絲長。不比吳蠶絲力軟。織成真素非文章。草廬機杼響四壁。男工引絲女工織。一衣所用十尺許。著取星霜十數易。更聞東海出山蠶。纍纍樹間盈抱拾。珍重一匹錦綺同。初可作弦韻琴瑟。江浙休矜花樣新。內家催辦無停役。石屋詩 鈔入

宣重光 江上詩集十卷

宣重光。字在辛。號江上外史。句容人。順治九年進士。由刑部郎中轉湖廣道監察御史。巡按江西。以事黜。居于鎮江。江上之役。與張九徵同事捍衛。終未再起。工書畫入能品。日與田夫野老游。時流中最善。龔賢張風程邃。皆逸士也。卒于康熙三十一年。年七十。著有江上詩集十卷。其詩不甚經意。而有閒曠之思。議論時復可取。如湖上云。西湖浪把西施比。湖比西施更誤人。其言沉痛。蓋不獨爲南宋言之。

賽太尉

歲鼓闐闐動。春旗匝匝飛。村人迎太尉。繞巷復巡陂。雉尾攢神冠。繡襦爲神幃。神來日顛倒。神喜風披靡。兒童戴粉面。丁壯舞紅衣。恣睢魏武皇。曼娜越西施。簾管雜銅鉦。彩繩揮金椎。三社互爭雄。四村無敢窺。雙豨上姜盞。千艇呼潘詞。鯉魚及雞鶩。一一皆有詩。所祝弭災祲。又願豐年時。創爲樂府題。神兮知不知。江上詩 集一

蔣 超 綬菴詩稿

蔣超。字虎臣。號綬菴。又號華陽山人。金壇人。順治三年進士高第第三人及第。官修撰。少耽佛典。喜游山水。盡歷五岳及黃山九華匡廬天台武當之勝。晚告病。買舟直入峨帽。康熙十二年。卒于山之伏虎寺。年四十九。金壇迎降之獄。殺紳衿甚衆。超在首告之列。內疚于心。故欲以佛法釋冤愆。有綬菴詩稿一卷。即施閩章所序者。其詩得吳偉業稱賞。王士禛舉其過舊院有句云。荒園一種瓢兒菜。獨占秦淮舊日春。可謂善于寫悲。但不載此集。

季冬月杪從沂州早發宿青駝寺時多寇警

離親驛路初回夢。作客飢腸始有瘡。寺號青駝疑出塞。山連白雪似排牆。雞聲催落野塘月。馬頰攙殘古澗香。幽景甫移詩步遠。又愁豪客索詩強。綬菴詩稿

吳 綺 林蕙堂全集二十六卷

吳綺。字蘭次。號鸞翁。江都人。順治十一年拔貢生。薦授弘文院中書舍人。升兵部主事。奉詔撰椒山樂府。即以椒山之官官之。爲武選司員外郎。曲子得官。唐宋所未有也。康熙五年。由郎中出爲湖州府知府。八年以風雅好事失其官。貧不能自振。游食四方。卒于三十三年。年七十六。事具清史列傳文苑傳。

及綺所撰聽翁自傳。王方岐後傳。有林蕙堂全集二十六卷。凡文十二卷。詩十卷。詞三卷。曲一卷。廣州長壽寺僧大汕爲出資二百緡刻之。乾隆中有重刻巾箱本林蕙堂全集者。文集十二卷。續集六卷。詩鈔四卷。詞鈔四卷。非其全也。綺工駢體文。與陳維崧陸繁弢齊名。詩摹徐庾。以清新爲主。詞有雋語。又譜秋風嘯繡平原院本。所謂才子也。

韓繡行

天上雲襄隔銀渚。吳宮絲絕難重數。泖水曾傳顧氏娥。蘇臺今見韓家女。韓家女紅稱最奇。劉郎珍重不輕攜。官間畫舫陳烏几。酒罷巾箱出紫綈。鶴紋素綾不盈尺。八幅神鍼留異跡。設色如開張藻圖。寫生欲奪邊鸞筆。第一梅枝第二蘭。幽香拂拂指頭看。唐英偃雪魂俱淡。湘佩臨風影不乾。三爲古石四水草。玲瓏蕩漾皆天巧。辟邪僵臥莓苔深。沙虹跳擲蘋花老。五六蛺蝶飛秋華。碧畦菘菜茁霜芽。次七靈芝光爛熳。次八老竹形欹斜。內中此君尤叫絕。碧幹蕭疎才幾葉。瀟湘江上一枝風。篔簹谷裏三更月。後題小楷字難捫。玉篆鈴朱更絕倫。都無彩筆臨摹跡。況復金鍼點綴痕。虎頭家製多曾見。霜禽露卉生宮線。一朝斂手作夫餘。尹邢並坐應低面。劉郎劉郎誠快哉。此卷何從覓得來。請君更展紅牋帙。爛醉冰堂綠酒杯。

林蕙堂全集十四

卓爾堪 近青堂詩

卓爾堪。字子任。號寶香山人。江都人。以選刻遺民詩十六卷得名。撰近青堂詩一卷。附于遺民詩之後。

清初人選詩。多以己作屬其中。近于自詡。唯魏耕今詩粹。曾燦過日集。及爾堪此選。以己詩附卷末。較爲得體。爾堪嘗從李之襄軍。自浙攻耿精忠。頗有戰功。棄去不顧。家累數十口。遨遊四方。得資以贖之。且急人之急不少吝。有豪俠名。然喜從諸逸老游。展轉求得其詩刻之。晚節不終者。削其名。如紀映鍾是也。諸卓有居瑞安者。有居錢唐者。有居江都者。有居蕪湖者。頗有聞人。本瑞安人。卓敬之後。敬建文時官侍郎。死靖難之役。家屬徙遼陽。子孫寶其過所。以示不忘戍籍。沈德潛不察。以爾堪爲遼陽人。近人編八旗文經。遂歸之漢軍。可滋笑噱。爾堪與梅文鼎交好。其事見續學齋文集者可信。見孔尙任湖海集者不可信。

所聞

北出遼陽城。四野結黃霧。自古無人行。道里不知數。荒江浩浩流。鴻鴈不能度。江風捲大旗。江岸新立戍。暮春草未青。孟夏冰尙涸。虎狼白晝行。狐狸啼日暮。聞見異生平。豈不懷親故。有夢亦迷離。豈識還家路。生爲異域人。死背故鄉墓。含悲前致辭。蚤觸戍長怒。執法罪當誅。譴戍遭殊遇。聽言雙淚收。餘生沾雨露。近青
堂詩

桃花嶺

憶友
人事

丘壑含兵氣。當關鳥道斜。銜枚趨夜月。拔幟入朝霞。斷盡村墟火。開殘戰壘花。飛來雙燕子。曾記有人家。近青
堂詩

宗元鼎 芙蓉集十七卷

宗元鼎。字定九。號香齋。又號東原居士。江都人。諸生。康熙十八年貢太學。考授州同未仕。卒年未詳。所居東原。在城東數十里。宜陵之南。榜其處曰新柳堂。堂後芙蓉別業。相傳爲謝墅遺址。故以名其集。初刻芙蓉集。在順治二年。至康熙元年。編所爲詩文存少作十之二。爲芙蓉集二十六卷。其弟之瑾作注。並爲寫刻。然僅十七卷。與四庫著錄者同。疑虛張其數。刻成者止此。壬寅以後詩文。別爲新柳堂集。汪懋麟百尺梧桐閣集有新柳堂集序。朱鶴齡愚菴小集有宗定九惠新柳堂集詩。今未見。殆已湮沒久矣。元鼎早年胎息溫李。驚才絕艷。晚更仰攀初盛。才情不減。文頗雅飭。生于萬曆四十八年庚申。至康熙二十八年尙與孔尙任酬唱。年已七十矣。張貞或語有元鼎癸酉題辭。又在己巳後四年。

隨車雨

癸巳廣陵天不雨。早魃橫行當卓午。徒勞大罽舉二辛。眼穿不見商羊舞。編戶四鄉罕一存。流亡白骨埋無主。榆皮食盡啖荒根。暫飽斯須委黃土。共歎天道不仁慈。惟望人間生邵父。頃聞太守簡蕭公。治行昔與龔黃同。是年六月正大旱。荒山赤日盡焦紅。一琴一鶴攜至任。飄然簡易如清風。皂蓋朱轎纔入境。江城夜色忽駢幪。須臾少女微風鼓。濃雲四集走靈醜。枯苗稿稷皆生起。黎庶歡呼溢田里。濯枝潤澤真足奇。維昔雨珠堪配此。曾聞鄭弘守淮陰。隨車白鹿渙甘霖。我今又諧蕭君事。留被管弦作遺記。

芙蓉集四

汪楫 悔齋集五種十卷

汪楫。字舟次。號悔齋。江都人。舉康熙十八年鴻博。授檢討。嘗出使琉球。著中山沿革志二卷。未幾。出爲河南府知府。詞林而爲外吏。無異貶謫。積升福建布政使。又無故開缺。鴻博之遇。可謂窮矣。卒于二十八年。年六十七。撰悔齋集五種。曰悔齋詩六卷。山間詩一卷。山間續集一卷。京華詩一卷。觀海集一卷。爲丙午康熙五年至癸亥二十一年之詩。閩中獨無所作。楫詩名早著。與族人懋麟齊名稱二汪。文不多見。而詩律細密深穩。似非懋麟所及。爲贛榆學官時。力推吳嘉紀。爲之刻集。嘉紀由是致盛名。又與孫枝蔚酬唱。知楫之初志。未嘗不慕高逸也。

老農嘆

老農握紙形顛頽。紙上大書賣田字。自言生長湖水邊。不學商賈學種田。桑麻纒纒到白首。衣食歲歲憑蒼天。頻年苦旱復苦潦。入口不得一口飽。心勞力作已難支。何堪賦役多紛擾。從來差徭半官稅。近比稅錢多一倍。練餉幸開來歲恩。運夫又受官河累。鬻兒暫得免鞭笞。吏胥那肯獨常例。同時鄰田多富人。只今十家九家棄。棄田一輩盡身閒。獨我偏傷道路艱。朱門欲掩日欲暮。低頭淚下如潺湲。我勸老農勿復泣。有田終不愁無食。不見大沙小沙田。今年額稅徵尤急。梅齋詩二

一 錢行

甲辰春。林茂之先生來廣陵。余讀以時。有沽酒都非萬曆錢之句。先生瞠目大呌曰。異哉。子知我有一萬曆錢在否。符左臂相示。肉好溫潤。含光耀人。蓋先生之感深矣。更為賦一錢行。

前朝萬曆之八載。茂之林叟生閩海。一十名高走京洛。六十國亡遭凍餒。鍾山脚躅幾春秋。那有酒錢懸杖頭。屈指今年八十五。春風重醉揚州醉。讀我詩篇忽失聲。老淚縱橫不成雨。為言昔曾買藜藿。手持一錢人錯愕。方嗟舊物不逢時。又遇孫兒索買梨。市上孩童都不顧。老夫心苦傍人嗤。一片青銅何地真。廿載慙慙繫左臂。陸離彷彿五銖光。筆畫分明萬曆字。座客傳看盡黯然。還將一縷為君穿。且共開顏傾濁釀。不須滴淚憶當年。悔齋詩二

魯般橋

在休寧八都梧桐巖下。攢石為梁。不施斧鑿。真神工也。

梧桐巖上石岩巖。梧桐巖外天沈瀟。澗水淙淙流不斷。行人都過魯般橋。山聞錄集

汪懋麟 百尺梧桐閣詩集十六卷文集八卷遺稿十卷錦瑟詞一卷

汪懋麟。字季用。後更蛟門。晚號覺堂。江都人。康熙六年進士。以刑部主事與修明史。効歸。杜門謝客者三年。卒于二十七年。年五十。事具王士禛所為傳。及清史列傳文苑傳。撰百尺梧桐閣詩十六卷。文八卷。詩刻於康熙十八年。身後復刻遺稿十卷。則己未康熙十以後之詩也。其文凡書八首。序四十九首。書後二首。跋九首。傳十五首。墓志銘八首。墓志一首。陰陽二首。雜文四首。祭文十四首。先後增刻至乙未康熙五始得成集。與遺稿同布。懋麟沒已二十餘年矣。文頗修潔。善為表幽之作。董姬傳言屠城之慘。知十四年

揚州十日記未必盡誣。詩有捷才。韻響格清。聲名甚盛。蓋緣早得科名。交游濶廣。最受梁清標知賞。鴻博未試。薦入史館。一時名士。咸推獎之。得罪不悉何事。喬萊祭汪蛟門比部文曰。佞文黨社。釀禍非常。乃荷殊恩。放歸故鄉。省愆學道。影匿形藏。吟諷一室。號曰覺堂。是其晚景亦甚淒涼也。

彰義門行

彰義門西日色變。十丈煙塵人不見。高車寶馬紛從橫。兩道門旂馬前轉。車中端坐何郡郎。新授南方好州縣。家人弓箭各在腰。小妾金珠飾顏面。此行作吏廉乎貪。百尺梧桐 關集十一

礮車行

風雨莫宿德州道。忽聞街卒譁聲。爭言礮車自北下。黃牛一百夫千名。官吏縛船架木石。大河一夜如地平。我起曉行過村店。守牧將士紛旂旌。霑泥策馬帶弓箭。礮車十棗來轟轟。水深泥活道路澀。長鞭鞭牛牛不行。千夫挽牛杖齊下。屹然山嶽相崩傾。紅衣自昔位大將。應手一發無堅城。東南殘黎苦荼毒。紛紛家室遭機槍。國家用兵已三載。何爲「羣盜」猶從橫。安得將軍展神力。蕩除「賊」壘原野清。女歸織兮男歸耕。六軍自此常洗兵。百尺梧桐 關集十四

許承家 獵微閣詩集六卷

許承家。字師六。號來芙。江都人。康熙二十四年進士。官編修。承家與兄承宜齊名。先後入翰林。家頗富

厚。有藏書。猶及見先代著舊蔣易杜濬。與之酬酢。才力雖弱。而矩矱猶存。有蘊藉修約之致。律絕勝于古體。間有佳句。池陽賽會歌言八月十二日祀昭明太子。傾城賽會。鼓吹旌幢。雜陳百戲。窮極侈靡。頗足以見風俗。燈市行述揚州今昔盛衰。不失詩人諷諫之旨。詩起順治十六年己亥迄康熙三十年辛未。末附其子昌齡碧摩亭詩一卷。昌齡字眉右。

己亥夏秋雜詠

羽書江上急。赤脚走城東。萬騎邊沙黑。千風落日紅。乾坤新轉戰。身世老飛蓬。孰是雞棲地。長歌任朔

風。獹數閣
詩集一

郊居雜詠

出門望四疇。禾黍已離離。載經風雨夕。言念春歸時。螟螣下曠野。虎豹宿荒畦。婦子欣相聚。徭役會有期。媿彼不耕者。空飽稻粱爲。學士爲飢驅。農夫更何之。誰爲荷鋤老。精誠吾所依。獹數閣
詩集四

史申義 使滇集三卷過江集四卷過江二集四卷

史申義。原名伸。字叔時。號蕉隱。江都人。康熙二十七年進士。入翰林。轉禮科掌印給事中。以病歸。卒于五十一年。年五十二。嘗刻少年至登第之詩曰蕪城集四卷。己卯康熙三十八年典試雲南曰使滇集三卷。庚辰三十九至戊子四十告病之詩曰過江集四卷。事前一二年所作曰過江二集四卷。申義有清才。童年以瓊花賦

擅名。尙及見先輩孫枝蔚。同里三汪。嘗共唱和。與顧書宣同號二妙。登第後游王士禛之門。士禛謂申義及湯右曾。可傳衣鉢。世獨稱湯者。名位較崇故也。受知陳廷敬。與周起渭並稱。申義學劍南。起渭學眉山。實有工力。韓荃目申義爲真秀才。集中刻板甚多。或人復爲鈎補。無關禁忌。多及科場事。或詆訶時輩。或家室勃谿。蓋申義受知徐乾學。恩怨未盡。時有報復。不能顯達。殆卽由此。喜近婦人。妾寶月能詩。有寶月軒集。寵之專房。致家道隳軻。復嬰羸疾。詩中刻去查嗣庭錢名世之名。而虞山翁山不改。讀史六首。詠吳三桂事。于永曆不無戀戀。亦並存之。知雍正時忌諱。與乾隆禁書不同。自注頗有軼聞。謂朱書輯粵滇末年事甚悉。故楊寶謂南山集之獄。朱書幸已先沒。不然。禍不可測也。

讀史

當年羣盜踐中原。青犢黃巾孽燼繁。席上橫刀看李特。帳中跋扈指孫恩。空憐渡馬江邊識。竟作遊魚釜底魂。趙氏遺兒危一綫。天風颯沓打匡門。

崎嶇八桂散風雷。越嶲千峯轉戰來。大樹颺搖愁落葉。荒池劫燒見飛灰。牧牛恥作羣兒戲。功狗慚無上將才。共觀龍顏真帝子。珠庭日角仰崔嵬。

猿鶴蟲沙一窖塵。杜鵑冤魄叫青春。推枰不忍看殘局。濡水真難起涸鱗。虛想六軍同幸蜀。幾聞三戶解亡秦。年年嗚咽金沙水。哭倒蒲甘騎象人。

鐵券功名益部強。竟膺茅土拜真王。殘山剩水無餘恨。細柳新蒲各自芳。頭白王敦終叛晉。行歌侯景蚤

投梁。山頭作賊羞廷尉。漢大何人比夜郎。

戎馬荆湘大出師。東南半壁有人支。金鉞震地搖梅嶺。烽燧連天燭武夷。征斂祇悲秦父老。衣冠虛仗漢威儀。未膏斧鑕全腰領。馬革平生一裹屍。

鐵礮金戈萬馬營。覆巢破卵可憐生。椎牛帳底軍歌急。掘鼠城頭夜火驚。表上牙門誅叛卒。波開洱海洗天兵。薰街乳臭空函首。猶恨歐刀赦老偷。使漢集下

案前三首詠桂王。後則吳三桂也。

答殷彥來見簡四絕句

滄海今寧有剩珠。漢廷彩筆半三吳。憐才狗監非難覓。怪爾凌雲一字無。

太學諸儒半見猜。橋門聽講又空回。襦衫利市真難脫。長伴先生苜蓿來。

當路公卿總好文。朱門賓客爛如雲。善題鸚鵡才原有。誰向筵前更記君。

忍使驩驅逐後塵。清河藻鑑歎如神。韓城在江南。顧東南巖穴搜尋遍。不識菰蘆有此人。過江集二

顧圖河 雄雉齋選集六卷

顧圖河。字書宣。江都人。康熙三十三年入翰林。撰雄雉齋選集六卷。詩格不高。然有才氣。前輩餘風未泯。文教尙盛。浮響荒率之作。決難出手。唯讀書不多。于題蕘郎單馬歌。自注云。蕘郎一作佛郎元人。可

資笑曠。集中屢稱尙書公。錢唐公。蓋奔走徐乾學高士奇之門。寒士攀援。自忘其醜。官止編修。殆受高吳之累。四庫提要誤圖河科分爲己丑。復以爲江左十五家之一。不知何以不檢如此。

二隱詩

先生將家子。銳頭竦青鶻。一朝棄兜鍪。不肯道官闕。變形走攝山。面垢脚不韞。破書八九束。土室三兩窟。四山猛虎嘯。一穗烟生突。蒲團五十年。支拄巉巖骨。口哦霞上篇。手寫遺經闕。石窪可抔飲。松風足晞髮。此外復何須。滿地拳新蕨。往往夜殘時。半山清嘯發。張勳衝自怡

一馬兩兵吏。馬蹄聲得得。馬上大中丞。湯公潛菴走謁隱君宅。隱君門何有。布路麋豕跡。隱君家何有。空釜敵牀席。隱君何以娛。閉門工水石。興來山數堵。萬仞縮盈尺。千金不許購。或以醇酒易。避客如避仇。逃名似逃役。踰垣段干木。乞食陶彭澤。斯人邈難求。山高溪水碧。徐隱君雄雉齋選集六昭法

又二隱詩

披披關領裘。揭揭高屋帽。被服古衣冠。東海行可蹈。朱門偶逢君。台背已云耄。道廣來朋從。名高起羣噪。老謝鶴書徵。人以由光號。風塵不浣衣。眉睫皆談道。爲文恥按古。鑿古能意造。鈎章棘句中。一一逞排募。況復家多書。搜奇伐幽奧。吾猶及老成。懷哉敦宿好。黃徵君太冲

膺滂被逮時。一網盡鈎黨。亡命奔南荒。麻鞋破幾兩。華表鶴歸來。城郭非疇曩。裏糧入周京。公卿盛延訪。禿髮犀顛墜。長毫虎眉廣。譏訶與唾笑。滾滾走豪蕩。詩篇信手得。文筆開蒼莽。稿本一尺高。瀏覽令

人爽。茶癖比季疵。論斗曰洗盪。鐵塵淨不留。素月胸中朗。錢道良 雄雉齋 飲光 選集大

熊維熊綠雪軒詩草一卷

熊維熊。字偉男。江都人。諸生。撰綠雪軒詩草一卷。刻于康熙二十八年。有閔仲文序。稱其不及汲于名利。然有落第詩。且遠客京師。非不思進取者。詩尙平澹。時方貴白居易陸游。成爲風氣。自不能獨異耳。

己亥夏共集方言齋頭悼余涓陽之亡各賦十韻未踰月而吳子學製閔子文仲並殲于

『寇』方言亦浮沉杳然獨坐追思泣數行下任昉云徒想平生人余之謂矣

罡風乍捲日月昏。魘魅跳躍爭攫人。滿城膏血潤野草。如壓不寤口難呻。侏儻兇黠無人理。其名爲漢非漢臣。我友幾輩羅斯難。衣冠倏忽爲青燐。呼天搶地知何益。勝敗難憑昔日論。爲善不報天胡忍。金玉無聲蘭蕙隕。可憐扶創聲哀啾。亡者方言弱者閔。余時踉蹌歸故里。故里但見虎與兕。死人藁葬生人傷。食無完粟飲無水。吳子爲述顛沛時。氣咽神衰只自悔。秃袖短衿身不周。血痕滿漬酸人眸。余亦忍悲相慰勞。詎知此別會無由。典型既喪無老成。奮淚未乾新淚并。年年徒作別離歎。枝頭長聞求友鳴。君昔題詩弔白邱。今我思君何日忘。肝膽照人如曉日。義氣激發無存亡。念君之誠行自愧。笑言時復親寤寐。夢中不識前致辭。羣游猶憶生者未。綠雪軒 詩草

庚戌歲暮大雪累尺兼以雪後所寒堅冰載道哀我憚人逢此鞠凶死亡者日不給瘞作

苦雪吟

春日桃花百川溢。霉零響接黍稷失。流人愁歎指路渠。不知身作何方物。天意悠悠訴愈曠。陷溺何容百一出。晝饑夜寒風露中。此時無靈仙與佛。凜凜王章不可干。羞恥豈復論天秩。親友相看盡漂泊。茫茫蕩蕩依誰恤。施濟從來堯舜難。人意參差靡盡一。饑者饘粥寒者衣。亦有高原斂暴骨。曲薄相連蔽風雨。自悔從前怨主事。兒女枕籍無寸草。伸縮無能常僕屈。困頓暫得一時眠。夢遶團團舊家室。野外荒雞傍曉鳴。雞鳴豈顧人湮鬱。那堪昏霧四瀰漫。朔風又奪朝來日。綠雪軒詩草

章性良 種學堂詹詹吟四卷

章性良。字聖可。江都人。諸生。考選教習。以詩古文名。著種學堂詩文集十卷。刻于康熙四十七年。此其時。而文則不可踪跡矣。詩無絕句。似未刻竣。性良尙及見東南諸老。與魏禧葉燮游。故其詩有法度。以議論勝。是時宋詩盛行。已開雍乾風氣。意盡無餘。殊少蘊藉之致耳。

燕臺六十韻

北鄉隣大漠。南人動長吁。陋俗莫可耐。奇禍多不虞。層城屆三月。開溝役千夫。亡命入坎窞。赤脚蘸泥塗。便液漉籌籃。濁汗沃頭顱。平地防爲池。當門掘成冷。穢德欲熏天。巨慝將阨儒。惴惴觸危機。縮縮踐

畏途。掩鼻氣侵腦。逐臭滴穢襦。鎮日生涯斷。經旬來往無。漚淖中間濕。飛灰面上鋪。瞋目墮寶穴。失足遭沾濡。阱深詎能出。馬陷與之俱。朱明敷潤澤。白雨流盤盪。東舍忽傾壁。西家蕩作湖。蛆蟲綠廁屋。蝸角戰繩樞。憑虛連棧道。出郭倩輪輸。愁遇淋頭客。憐隨沒髀奴。驕陽起燒空。烈饑易焦膚。元氏蠅難遣。周公枕易蘇。陵烏墜巖岫。壁蝨上氈毹。痛痒手捫摸。糜爛血模糊。黑夜嗅沖龍。惡味如螻蛄。蚤跳費驅遣。蝸走羣驚呼。味微肌暗吮。尾螫毒潛痛。秋蟾輝滿窟。顧兔土爲模。逐隊歡鳴鼓。焚香拜習膜。三冬狂颺吼。四境光景殊。洩渤汚人塵。齒頰含垢區。點染增厚顏。清白失故吾。戰塚裂指拇。冰凍結髭鬚。甃輒床炙背。火糞霧騰鑪。燃炭淚教落。爆星裘每枯。釀金羅秦越。鬻食奏笙竽。縷經選梨園。宰殺集浮屠。雜遝易竊鉤。閉寂慣穿窬。媚神繁社會。尙鬼敬師巫。綆修汲水濁。麥末灌腸羶。燒春辣于薑。涑酒苦似茶。簪髻老嫗怪。粉黛少婦嫵。燕煤流步蓮。噓煙辱唇朱。茹葷釀口過。慕羶貴酪酥。頑童爭女寵。里曲奪吳歛。衰色態故妍。哇音耳寧娛。逢迎半白望。厚薄論青蚨。分疏無一可。擬律有餘辜。或云宜節取。已甚胡爲乎。鄉音萬國聚。方物薄海輸。騏驥驟都市。輪轂聯街衢。瓜李沁肺肝。桃李耀槃盂。魚雉珍遼左。鹿豕甘邊隅。寶刀芒射斗。羽鏃利盈筈。西山積雪皴。盧溝印月孤。經碑序存古。石鼓籀垂謨。雖云本多瑕。似亦不掩瑜。聞此輒然笑。如彼焉可誣。六朝便舟楫。堯封罕我徒。無心戀雞肋。莫怪憶葦鱸。將辭黃金臺。能看疊翠圖。亟歸足高臥。不去何其愚。

種學堂詹吟藁一

送張五歸吳門

張子稗昭。歌場老輩。曲部名流。幼按宮商。紅雪久稱絕伎。長游京雒。青雲舊屬相知。已而賀老顏蒼。王耶髮白。鴻來自北。馬首又東。客邸朋儕。方快飄萍之聚。驛亭迎送。旋生折柳之情。各賦七言。共登

一筵。用據別意。實有同心。

當年稗齒自風流。文祐衣裳總舊遊。崑玉桂枝傳麗質。錢牧齋贈詩云。人間張五。知誰是。玉樹臨風第一枝。遏雲振木擅歌喉。秦青伎老名逾重。宋玉知希鬢已秋。忽發淮濱歸去疾。江南春色滿行舟。種學堂詹詹吟卷四

郭元鈺江左十五子詩選

郭元鈺。字子宮。江都人。諸郭繼諸汪而起。以文學著。元鈺諸生。弱冠爲詩。三年而有集。以薦入三館修書。官中書。改知縣。著有一鶴齋詩十卷。

十番詞

秋烟絡空月如水。小氎紅雲吹不起。酒闌歌倦燈炮紅。濕濛一聲羣耳喜。鼓師雙杖縣黃檀。兩手病瘋頭青山。篋奴搗調飛霜吻。不怕空雲裂成粉。雙銅戛手如風颭。間以丁星響嘈雜。紅魚數鳴板稀打。小鑼聲荒大鑼啞。玄頭風韻似聯珠。七事爭能不相下。初如秋檐滴淋漓。又似晴空雲斷續。忽聞萬騎背同馳。手如急雨心不知。茫茫醉骨蕩無主。似見蓮心柘枝舞。繡窠齊露彩雲飛。風際落花開復聚。迴旋頓折疾于鴻。縱處鼓牀疑碎乳。孤程壯士歸飛鳥。老婦鰥魚江浩渺。繁聲促節正宜人。萬籟忽沈天地悄。斟酌橋西半塘寺。紅簾小舫圍珠翠。宣徽弟子有新聲。常恐惺靈畫脂記。何年此曲成金屑。又撤圓鞀彈雨雪。

江左十五子
詩選十五

退耕老農 韻餘集一卷續集一卷

退耕老農。江都人。康熙末。官刑部主事。告歸。喜填曲子。有楚江晴再生綠諸雜劇。撰韻餘集一卷。續集一卷。多感慨盛衰之作。廋詞二十首。皆有所指。不止自傷身世。六一堂云。去年燕市今年歸。歸來風景昔全非。畫舫雕樓繁初地。冷烟蔓草黯斜輝。欹園廢榭傷心目。蕪蕪悲風出楊木。自注。北郭諸園亭。金粉凋零。大都鞠爲茂草。西湖云。明聖湖頭蕪蕪殷。水流不似舊潺湲。自注。甲午康熙五再至。湖流漸涸。葑田淤塞。遠望若棋布星羅矣。南北兩山。水陸幾不能達。遑問其他。唯見蕭森牢落之氣。出沒于遠山巖巖間。祇餘芳草斜陽。猶是當年故物也。蓋抑塞不平之氣。觸處多感。與歌盛世。祝太和者。又自一格。

悲田夫行

商風乍起煩熇斂。煙霧迷瀾雨如霰。乘軒偶出西郊行。禾黍芘芘壓郊甸。依稀似聽水淙淙。縱目平疇枯棹現。我聞田夫舊歲多艱辛。離離原上徒荆榛。斗米十千何處尋。吏胥銀鑰來到村。攘鷄攫豕逼典禱。公然自比王侯尊。田夫苦。田夫苦。爾不能言我代語。終年胼胝手足龜。徒爲豪家供租賦。新逋雖完舊逋深。朝朝撈掠創難禁。潛歸泣向妻孥計。賣子希完積貫金。鬻爾鬻爾爾莫哭。有年將爾來回贖。傷哉此語不忍言。彼蒼惘惘胡不聞。上帝怒然拯爾苦。十日一風五日雨。千困萬箱豐且繁。壤歌擊缶祀明神。小者

持糶大獻豚。歡然和樂萃一門。萃一門。爾須記。去年此日兒分袂。謾誇骨肉完聚多。兒向朱門獨垂淚。

說餘集

再生緣院本壬子所作距壬戌復加改竄校峻漫弁八截于首

八首錄一

龜年已老善才亡。擊缶歌鳴近擅場。縱有霓裳任淪落。不將法曲按宮商。近日棄聲。頗中時好。風俗佳。說餘者。反致感慕。不勝今昔之愴。集

范國祿 十山樓稿二十卷

范國祿。字汝受。通州人。父鳳翼。東林眉目。入清不仕。以文章氣節稱。國祿屢試不第。嘗欲納貢入太學。不得謂之高士。然藉其父聲氣。與一時遺老名士交游。嘗以文字避難。避禍于外者數年。詩文皆有才氣。撰有十山樓稿六十卷。未見刊本。手寫本二十卷僅存文部。又缺十九卷傳狀之屬。稿中史可法論。極致責備。雖揚州人怨恚之語。然頗中其失。至謂可法棄城而逃。未免過甚。然可法之死不明。則實事也。崇禎辛相年表序。謂宰相五十人。皆一時人才。惜帝不能用。或不竟其用。能爲此創論。無絲毫門戶恩怨之見。可謂卓識。兄國祐。有天庸齋集。子遇。有一陶園存今詩文集。今皆不傳。

辛酉九日邗江公集紫翠亭分賦

滿堂遊子類飄蓬。並爲憐秋賦惱公。廿四橋邊聊載酒。十三樓上欲凌風。天涵遠水霜華淨。歌散浮雲鶴唳空。籍有二分明月好。照人顏色喜相同。名家詩永九

季開生 懫臣詩稿二卷

季開生。字天中。泰興人。順治六年進士。選庶吉士。改授禮科給事中。十五年諫買揚州女子。幾置之法。卒戍尙陽堡。居四年。爲光棍毆死。聲言欲焚其尸。官司不問。疑有主使也。年三十三。撰懫臣詩稿二卷。爲冠月樓詩。壬辰癸巳順治九年至十年間謁假南歸所作。出關草作于戍所。題識者甚衆。有憚格一再題語。不知何以得此于高士。其詩亦有規格。善作苦語。尙陽堡卽事云。岩風易結杯中雪。炕火難融被上霜。衡門盡日空車馬。冷飢連宵織網絲。頑山入屋霜連枕。斷壑當門月上衣。窗中旣得林巒對。門外從多虎豹踪。泰興季氏自寓庸始興。寓庸字因是。以天啓二年進士。官吏部主事。其子開中振宜先後登第官科道。歸莊謂四衙門貴要。季氏有其三。寓庸名在逆案。致資無慮鉅萬。其時言富者。恆數北亢南季。亢晉人米商。季則行鹽。嘗斥十萬金買書畫古籍。振宜字滄葦。多買宋板書。至今爲人稱道。然歸莊譏其驕。王時敏家書言其刻。獨開生溫潤若處子。善畫山水。而受禍甚慘。康熙九年編修劉志紀劾督撫貪縱不法。振宜居間消弭。奪職歸。未幾卽沒。寓庸頽老尙存。其業漸衰。然則繁華殊易盡也。逆黨毛一鷺子升芳。登康熙己未鴻博。與寓庸二子略同。

掛劍臺眺張秋新決口

來登掛劍臺。橫睇張秋水。長河隔重湖。滌瀆數百里。入夏又淫霖。決堤如破紙。咫尺衆水歸。交鬪遠空

裏。崩雨接奔雷。驚弦激怒矢。臺上草招搖。潮汐相移徙。過鶴不能鳴。舟楫安敢恃。冠月樓詩

玉門感興 四首 錄二

邊將紛紛邊餉催。可憐公帑不曾開。果因厚積能持國。何怪軍需耗客財。內府或煩他日慮。長垣寧恃數重臺。那堪帥纛疑頻集。縱有魏貅志亦灰。

降臺縱飲月如霜。忽見飛驍襲大梁。後勁不聞環虎帳。中樞早擬避龍荒。邊材入選推裘馬。俘獻誰知雜估商。休道玉關天下險。曾驅十萬葬東洋。出關章 輯遺

阜莊驛

舊吏饑而逃。新吏饑而死。百姓姑勿言。驛吏已如此。落日下枯楊。亂鴉飛不止。冠月樓詩

王國璉三瞻草堂詩集二卷詩餘一卷

王國璉。字汝器。儀徵人。舉人。撰有三瞻草堂詩集二卷。詩餘一卷。刻于乾隆五年。有懷寧朱卉序。謂國璉卒已二十餘年。此集爲康熙四十八年己丑。至五十八年己亥之詩。國璉當即卒于己亥。其年則不可考矣。卉字草衣。以詩名雍乾間。先是休寧汪灝工詩。亦字草衣。故吳敬梓說部託爲兩牛布衣以譏之。國璉窮而游食。北至燕趙。南適邕桂。襟抱鬱紆。吐辭不免哀怨。然詩筆清麗。藻績山川。時發奇想。甚有理致。如醉中吟云。天地有大山。毋乃積壘成。天地有江海。毋乃爲缺傾。我將推山填江海。一令高下皆歸

平。其餘篇章。多清婉可誦。填詞尤俊快可喜。不識何以無稱道及之者。金陵懷古云。欲賦江南淚幾行。石頭終古是巖鄉。虹橋納涼次曹使君韻。曹使君者曹寅也。能沾溉人。結句云。等閒莫話興亡事。回首城陰易起愁。康熙中葉以後。承平雅誦。成爲風氣。國璉乃作不入耳之言。宜其窮矣。

題鄒舜五太湖采蓴圖

四首 錄一

治亂相生豈偶然。哲人應自識幾先。采蓴當日誠何日。板蕩崇禎十五年。三瞻草堂詩集上

板子磯弔黃太保

仗劍危磯氣節伸。衣冠祠廟是完人。當年盡瘁誰能匹。只有揚州史道隣。三瞻草堂詩集下

成永健 毅齋詩稿八卷

成永健。字乾人。號毅齋。鹽城人。康熙三十三年進士。官贊皇知縣。分校順天鄉試。得士十三人。年羹堯其一也。調福建南安。起補日照。爲政有惠聲。撰毅齋詩稿八卷。六十年刻于日照。多及民間疾苦。詩格頗近杜陵。詞新氣逸。饒有作意。卽以詩論。亦復不讓名家。然頗不爲人所知。

江行紀事

己丑舟中草

東南比歲災。民命懸一髮。聖主下明詔。百萬一時發。並藉荆豫米。流通飭舟筏。權使扼要區。買客畏阻絕。誰其上紫闥。勅憫此遺才。白糝縱所如。市價賤于雪。何妨百貨增。緩一計匪拙。廊廟多臯夔。樞管與

喉舌。此意寧寂寥。江水聞嗚咽。殺齊詩
卷一

溪叟

歲歲築河堤。日日決海口。古道既已湮。黃河南向走。詎不順水性。上下坐束手。往者清刷黃。強弱不相受。天子宵旰勞。謀畫周且久。水衡用儒臣。經營竭薪柳。豐岸亦何堅。賞懸印繫肘。元圭方告成。所築旋不守。因之鑿下河。范堤十去九。我家瀕滄溟。颶起潛蛟吼。切膚有餘恫。望若空疾首。一葉復何之。輟耕事漁筭。變幻理茫茫。喑焉溪上叟。殺齊詩
卷一

紀事

陰陽易乖舛。南北異燥濕。我至自燕趙。川原色於邑。所食及草根。澤枯泉亦涸。如何鄰郊南。陸地橫流溢。山雲繫終旬。征雨感蕭瑟。廣陌躡行軌。蔽畝沒黍稷。太息造化心。毋乃失軫恤。調變義所須。菲亭聊抱膝。殺齊詩
卷一

膠西紀事

己亥東國凶。膠西禍尤熾。白馬鼓怒濤。涎蛟出平地。太息城西偏。千家倏沈墜。死者魚腹填。生長虎狼吏。繭絲理猶繁。賑貸多空議。大府本深仁。奉行寡實意。先是此邦否。蒼赤心怖悸。潭龍久不馴。吉了未見試。災沴雖天行。胎釀實人事。我至百無裨。一髮千金縋。窮冬苦責貢。陰霾白日翳。不見汲陳州。空下長沙淚。殺齊詩
卷一

鬻子歎

蒿生茶藜間。子結落復苦。岸水浩白波。飄蕩不自主。梗泛隨清鷗。萍浮逐烟浦。方其離本根。萬藟此何許。降凶自彼蒼。茫茫視東土。鬻子棄路隅。持抱出村塢。骨肉當生離。哀難失乳哺。尙聞征徭促。長吏劇豺虎。殺齊詩 藟一

老婦行

甲申年。過東昌作。

道旁老婦向人泣。榆皮剝盡杏葉澀。兒女盡鬻夫死饑。風雨乞錢短衣濕。我聞聖主正宵旰。悉除逋賦恩浩瀚。更聞減糶遣官僚。千艘漕精來河岸。如何泰山滄滄側。白骨如麻慘天色。萑苻三五趁餓人。日月何曾照鬼域。鬼域何人吏方喜。嚙倉漁貨從中起。我自東來塵鹿鹿。簫管檀槽何處屋。清調紅粧一串珠。皇華夜宴燒銀燭。銀燭燒殘樂未央。起來寶馬獵康莊。鬻骸蟻穴君不見。猙獰犬噬鷹飛揚。殺齊詩 藟二

米珠行

米如珠。珠不如。珠不可食世可無。饑食菜。菜亦稀。十旬不雨草離披。戍卒西山來。稱貸聲喧廝。伏莽東山起。村落如驚雷。榆樹柳枝葉盡。惻惻吞聲顏色困。青囊不着腰鎌間。牛羊大疫空溪山。來日官租吏又促。冷烟黯淡誅茅屋。殺齊詩 藟二

王台行

王台村邊婦夜哭。夫死路隅女已鬻。女聞走哭枕父尸。哀鵲啼猿聽不得。行人凄惻各淚垂。霾霧冷風暗

山谷。對此酸心復踟躕。何人袖手空縮胸。使君羸馬泥鹿鹿。倒囊典衣女爲贖。溝壑難回既死魂。尸素空糜太府祿。吁嗟豪華厭梁肉。管絃夜飲猶不足。綬齋詩 卷二

膠州豬

方十四養虛作膠州豬古詩。字字沈痛。可入樂府。因和以寄感。

吁嗟乎。膠州豬。不知何人作俑供給上官廚。十月風雷郡符下。郵車絡繹如徵租。吏胥四出覈大索。牙儉偃仄窮追呼。閭閻相戒畜剛鬣。驚怖雞狗無村無。馮夷鼓怒劇災變。死者什一生存遺。空城蹙額坐束手。長吏恇鬱馬逃誅。君不見。啼猿啖鶴滿天地。海岸白骨枕籍安有豬。吁嗟乎。膠州豬。綬齋詩 卷二

雜紀 四首 錄二

哀鴻嗷嗷水雲灣。蒿自瘡痕鬢髮斑。乞得緩征方喘定。何人猶問大珠山。

南船不到海膏虛。濱死溝中展轉餘。忽報郵亭征騎緊。徵求歲貢尙如初。綬齋詩 卷八

讀晚村先生梅花詩跋後

寒山寂歷晚烟村。一代風流在石門。最愛先生幽絕處。梅花香土葬詩魂。晚村詩。安得梅花花下土。留與詩人葬魂魂。 綬齋詩 卷八

李必恆 江左十五子詩選

李必恆。字百樂。一字北岳。高郵人。諸生。工詩古文。著有三十六湖草堂詩集。不傳。

民夫篇

郵俗重耕稼。務本羣力田。歲每至秋成。菽粟如流泉。上納官家租。私室亦苟完。一自周橋開。淮黃執滔天。沃壤蕩爲湖。沮洳淪爲淵。恆產旣失業。難免飢與寒。稅稻來遠方。粒粒如珠璣。北風況怒號。腹餒衣裳單。殲死道相望。遺骸飽烏鳶。昨日八口家。同縊今尙懸。近聞販人買。云向黔與滇。少女易斗米。中婦價半千。亦有所嬌兒。棄去無慘顏。嗚呼我聖皇。田賦歷歲蠲。更遣大臣來。開廠賑粥館。用此保朝夕。稍殘喘延。十月湖水平。司空符檄傳。鳩工趣築堤。夫從里甲編。一甲派十夫。兩夫派一船。流亡已過半。見存自遭患。里長夜捉人。如火相迫煎。租稅幸荷免。敢復憚胼胝。但悲凍餒軀。春杵力不堅。恐遭官長怒。不足勞扑鞭。道從執袴子。手足遭拘繫。此曹累尤重。昔富陌與阡。羅綺被纖體。玉指撥鸚弦。生不慣春鋤。願早溝壑填。更或恣欺瞞。左右相牽扳。吏胥肆追呼。雞犬不得安。嗟哉九重上。誰知此煩冤。一旦詔旨下。惻然拯民艱。金錢自召募。不在民而官。老弱得休息。丁壯集如雲。會見宣房塞。喜氣兆豐年。我聞古三征。力役自應殫。用一苟緩二。在昔已稱賢。盡除戴聖主。隆恩曠無前。所以堯湯時。水旱不爲愆。史冊宜大書。磐石深瑠鑄。長謠效輿誦。采風錄此篇。江左十五
子詩選十

陳忠靖曉堂律詩二卷

陳忠靖。字爾位。號曉堂。秦州人。順治四年進士。由中書擢刑科給事中。降懷慶府經歷。告終養歸。卒于

康熙二十五年。撰曉堂律詩二卷。致力唐賢。筆能包舉。孔尚任施世綸作序。稱其敢諫。據州志忠靖有早舉經筵速差卹刑二疏。又爲鄉里水患請改帶徵爲全免。得允。究不識緣何事降調。其詩答王蜀隱云。已負三年西掖久。敢忘一日北山深。六科題名錄。以入垣列于己丑。順治六年則謫官當在九年。實錄未載。不可考矣。

夜泊南陽大風雨

草木山川變。吾來濟泗東。寒飈五夜雨。愁鬢一天風。疑有魚龍泣。將無神鬼通。誰憐飄泊者。平野又飛

鴻。曉堂律詩一

繆 沅 餘園詩精選四卷

繆沅。字湘芷。一字澧南。泰州人。康熙四十八年進士高第。入翰林。官至刑部侍郎。雍正七年卒。年五十八。初宋犖選沅詩入江左十五家詩選。乾隆十年。其子集刻分體詩六卷。板毀于火。至乾隆癸巳。距沅之沒四十五年矣。少子樓乃汰少作增新篇爲餘園詩精選四卷。其詩有神韻。爲王士禛弟子。才不及湯右曾。而清麗過之。書拜鵲詩後絕句十六首。哀感頑豔。與游鐘山聽某常侍話啓禎事。俱有滄桑之感。當官而後。此情頓減矣。二十八喪偶。即不再娶。亦無姬侍。感事詩附祭其妻文。蕩氣迴腸。情深一往。讀之令人增伉儷之重。驟擢卿貳。或由張廷玉援引。張鄂分黨角立。其傾軋必有難言者。故卒前二日。有

老夫別有關心事。說與兒曹記得無之句也。沈德潛謂詩外有事。今觀飛花詩為廢太子作。安溪家難詩書後。知與李光地投分至深。白葵以芟鉏不及為幸。然則沉固黨局中人也。他可援證者尙多。斯為顯著者矣。

書拜鵬詩後

鐵衣秋冷草蕭蕭。芻糗輪邊響剪刀。吳淞已降兵未息。滿天烽火陣雲高。余讀先生戊午雜興詩。因別有所感。

獵火關山暗寢門。故宮禾黍已無存。頻經天壽諸陵望。醉酒悲歌楸樹根。集中登天壽山詩最夥

詩篇哀怨續梅村。一曲青門感慨存。集中有讀蕭史青門詩四章朱戶玉襦驚尙在。口脂面藥劇銷魂。餘園詩精選一

釋元玉 石堂集十卷 石堂近稿一卷 金臺隨筆一卷

釋元玉。字祖珍。號古翁。晚號死菴。石堂在泰山之下。其靖室也。南通州人。俗姓馬氏。為金粟弟子。木陳再傳弟子。康熙初。住持泰山普照寺。卒于康熙三十四年。年六十七。事具唐夢齋所撰祖珍和尚塔銘。撰石堂集十卷。吳雲刻于丙辰。康熙十五年一為語錄。二偈頌。三文。四樂府。五四言。六五古。七七古。八五律。九七律。十絕句。石堂近稿。為戊辰紀興詩。及小札。金臺隨筆為法語。雜著。尺素。詩偈。皆刻于庚午。康熙二十九年尙著石堂菊花百詠。及華嚴頌。夢齋為之梓行。又有聖遇錄。紀甲子康熙二十三年東巡命高士奇問答機緣。此本三種。嘉慶中尋得板片。合以行世。而其餘不可問矣。道光中。徐宗幹復求得畫象塔銘。銘不

載志擊堂集。尤可貴。元玉喜爲詩。頗近陶韋。友高珩唐夢賚孔尙任。而王士禛盛稱其詩。謂如獲異嗜。啖江瑤柱。今讀其集兼通儒學。尤精易理。論學論事。識解甚超。苦口誥誡。殺人深省。如賦得長安今日少年行二首云。燦燦銀鞍朱勒馬。盈盈玉面翠眉兒。自憐得志年方艾。人羨成名世遍知。不惜千金謀買妾。那辭萬貫爲敲棋。逞時託寵恣輕薄。醉銷前賢憂國癡。誰謂長安年少子。祇知榮貴不知源。欲教寸念存忠信。正用全身委醉昏。有妓且從歌羽扇。無花亦使弄金樽。賈生心爲憂君急。遠去長沙莫報恩。悲閱之懷。與株宏如出一轍。詩多恬退語。順治中禮部行取天下高僧。供奉萬善殿蕉園。及大內御苑。至康熙初未改。僧流奔競恐後。而元玉獨不與。有句云。一循雲鶴意。未識帝王尊。又云令身能快樂。于世只無求。殆彼教中之高隱者歟。

止李子象先之登萊

昨日陳子至。謂子欲東遊。陳子知子意。長嘆海風秋。蓬萊其渺漠。極目惟洪流。仙人何定蹤。沉復濟無舟。總有夜光璧。非時豈可投。不若自深佩。俟價以王侯。寶劍卽請置。且共此山丘。石堂集六

辛丑賦事

勝日多遊俠。區區獨閉門。一循雲鶴意。未識帝王尊。百卉春容媚。孤松老氣存。南山諸故舊。近可爲招

魂。石堂集八

孫宗彝 愛日堂文集

孫宗彝。字孝則。號虞橋。高郵人。順治三年舉人。六年成進士。官至吏部考功司郎中。出爲薊州分巡道副使。告病歸。康熙二十一年。以論治河汴河道總督靳輔。誣以侵用官銀千三百兩下獄。二十二年九月。瘐死。年七十二。此集其元孫全邵刻于乾隆三十五年。凡文集八卷。詩二卷。外集一卷。則詩文之近于釋者也。首有康熙十一年壬子李灝序。四十二年癸未先著序。述宗彝壬戌春就訊金陵。獄少解同游靈谷。與語易憂患之書也。註易甫成而難作。且告以得禍之由甚詳。末附錢陸燾所爲墓志。謂宗彝居鄉。努力爲善。先後爲民除優免馬差房差田差丁差之害。十九年。靳輔掘高郵堤。爲滾水壩。田廬盡沒。城垣水浸數版。宗彝具呈訴水災。語及侵欺。河夫工銀每日四分。只給四釐。又造廬河干以居災民。大爲輔所忌。因誣宗彝及子舉人弓安。侵用搶築夫銀。致宗彝死于獄中。陸燾與宗彝同舉崇禎八年拔貢。又久館其家。爲之課子。故備知其事。此文頗有關係。而不入調運齋集。蓋猶有顧忌也。是時靳輔議築長堤束水。以敵海潮。力闢開濬海口之議。淮揚人皆非之。侍讀喬萊尤持異議。聖祖疑築堤獨不利于巨室。遽來議以從輔。而召萊來京居住。遂以憂死。輔意在鉏抑豪強。故宗彝不免。然宗彝所不滿于輔者。非必爭濬海口。特摘其浮費害民。與施工不力而已。其論河書皆見本集。後來郭琇劾輔及陳潢。未及宗彝冤死之事。頗不得其故。吳世杰澗湖草堂文集亦不載宗彝事。而頗稱鄉紳孫公均役。知宗彝爲福于鄉里。確有其事。

也。詩文古質有筆力。李瀛稱其學問。自經史百家。天官地志。星曆象數。無不深造貫通。今觀其文。蓋尤深于史云。

賁田

吳民雜纂組。淮南僅種穀。吳田畝二鍾。淮南歲兩斛。況復多汗萊。五年一成熟。繁華名勝區。千里差同俗。那知此一方。爲目不爲腹。豐年名富兒。荒年卽羸獨。荒歉萬事非。豐年十端哭。纔罷打場歌。旋聞長歎續。正稅曾幾何。供辦相什伯。宿債未得償。徭役何時復。國恩有蠲除。胥吏肆貪黷。多寡是耶非。止憑算手畫。知之不敢問。問之懼生毒。俛首復奚辭。賤糶毋賤著。倉庾一朝空。婦子夜仰屋。水耨與火耕。幾博唇沾粟。上戶質衣衫。下戶屠牛犢。有手淘河泥。有足曳鱸舳。祁寒任爾僵。暑雨任爾觸。溝壑及道塗。時有死屍伏。念之不可甘。皆是田爲戮。欲逃籍在官。將棄何方躑。遺田便遺窳。祖父智不足。愛日堂詩集一

李 栴 藥圃詩不分卷

李栴。原名葉。字倚江。號木菴。興化人。康熙十二年進士。由檢討官至左都御史。四十三年告病歸。旋卒。年五十八。著大遠堂奏議文集今未見。有藥圃詩。分集編年。曰燕臺稿。曰恩假集。曰甘雨集。曰漁陽紀游。曰上元祈年詩。曰扈蹕吟。而以少作曰幼學吟殿焉。復附補遺十三首。其子炳石所編。刻于康熙四十八年。詩不能工。足見一時交游而已。栴父清以故明給事。爲新朝遺老。巍然靈光。繫一時重望。著述

浩博。三垣筆記。南北史注。尤為藝林所重。而納取科第仕宦。與其父出處頓異矣。

趙州觀吳道子畫壁

異哉是平陸。爭傳趙州水。東西素壁間。文伏而武起。壁東西俗號文武水真屬化工手。縱筆千萬里。居人募市利。奔

流難遏止。真贗雖有別。彷彿詎無以。古人能不磨。往往留遺趾。人生寄天地。疾若脫兔耳。千秋後世名。

勿輕此片紙。我歸欲學畫。敢望神理似。燕地風吹時。作此淨塵几。藥圃詩 甘雨集

于墳

南枝兀相向。欲撫阻斜曛。急返西冷棹。還經故相墳。意誠回一主。謀定却千軍。無復留題在。憑欄憶大

文。楊相國嗣昌題聯云。赤手挽銀河。公自大名垂宇宙。青山埋白骨。我從何處哭英雄。今失之矣。藥圃詩 雁歸吟

李國宋 羸隱集七卷二集八卷珠塵集二卷

李國宋。字錫山。號大村。興化人。瀚子。康熙甲子二十三年舉人。不赴公車。是年遂哀其戊戌順治十五年以後之

詩。為羸隱集七卷。越五歲丁卯康熙二十六年復成二集八卷。別編所作西崑香奩二體。為珠塵集二卷。國宋詩

以老杜為宗。多及時事。而格老筆蒼。聲情並茂。自謂樂府聲調久亡。只擬謠歌。五古隨題寄興。不拘一

格。以示不欲高談漢魏。又謂較長七古。而乏沈鬱頓挫。近體失詩人溫厚本色。可謂知言。五古戊戌歲九

月十日于東田穫稻十七首。述懷四十四首。南征五首。五言排律輓故吳相國二十二韻。水至一百韻。七

律金陵秋興八首。七絕明宮紀事一百二十首。皆精心結撰之作。是時兵革未息。河淮昏墊。國宋念亂傷離。慨然有作。類此篇章。政復不少。以云詩史。庶幾無愧。清初江南詩事。虞山裏東雲間角立爭盛。江北若無預焉。世方貴宋。亦似無睹。及觀王仲儒爲此集作序。謂嘗與國宋論詩。以爲今之人至于弁髦唐人。而標幟宋元。抑又過矣。乃知一江之隔。不爲習氣所染。實賴諸李二王之力。淮揚地近情親。遂有同風矣。

大兵謠

大兵來。走甲騎。馬前驅婦女。馬後繫官吏。

大兵來。過萬溪。不聞斬將奪纛旗。但聞百姓啼。

大兵來。過鄂渚。章華宮。王者府。開牙門。播大鼓。錦衣玉帳教歌舞。蘇隱初集樂府

哀江南

六郡良家同受戮。江南義鬼吞聲哭。天寒白日顏色慘。野馬黃羊各相逐。爺孃妻子驅爲奴。死生何處收骨肉。君不見。黃昏明月照江頭。白項老烏啼空屋。蘇隱初集

農女行

海濱農家女粗醜。衣多蟻蝨面多垢。早負犁動晚踏車。生來赤脚能趨走。富農辛苦田有秋。新霜屋角橫耕牛。蝦蟆鞋子布裹頭。遠村近舍誇風流。轉眼明年動春作。依舊牽牛赤雙脚。蘇隱初集

挑河行

海風驅寒凍大澤。挑河役卒無人色。手龜腹枵土力剛。百里程期杳難畢。爲我謂里正。迫促何太愚。明知功不就。且請寬須臾。自從黃河失故道。胎簪合派同奔趨。山泉湖堰匯衆勢。蕩成星宿民爲魚。下流疏塞總非策。金錢空耗事事無。奉土防川計已拙。建衣穿渠謀亦疎。行旅齎送苦欲散。剝脂和雇徒區區。往時朝廷正全盛。黼座殷憂在淮甸。水衡少府費不貲。尙飽貪胥任潰橫。況今四方久用兵。算緡賣爵增新令。豈有餘財佐工役。溝壑殘生枉乞命。復恐侵漁重敲朴。何如忍死安懸磔。東南虎鬪堆伏屍。深岩密箐逃瘡痍。車裝婦女日北去。兒童掠賣換馬騎。念爾邀幸保腰領。又共妻子相提攜。皇天覆載於女厚。便填鮫窟理亦宜。慎莫疲勞絕地脈。死兵死餓誰慘悽。黃昏詩罷聞野哭。終夜無眠對寒燭。高隱初集

賑船行

昨歲衝波進城郭。城中水高三尺強。撫軍飛章請捐賑。詔下不免災田糧。今年糧完骨髓盡。科派漕項偏多方。忽聞官賑抵邵埭。不知是米復是糠。何不留之充兌運。毋乃割肉來醫瘡。府帖到堂胥吏喜。領賑捉船如虎狼。關廂行牒搜索遍。又委硃粟掠四鄉。皂頭折船十六隻。放大取小喧河梁。縣尉歸衙貨滿載。米魚雞鴨豬羊。嗚呼。饑民望賑項欲痛。賑未果腹招禍殃。爾曹慎勿貪似鼠。撫軍清廉奏殺汝。高隱二集

生日

我生之日死劫至。饑寒盜賊滿天地。四海丁男半爲鬼。朝廷爵祿養魍魎。乾反坤覆非一春。年過五十猶

顛頽。湘衡閩嶺血模糊。江淮之間民化魚。陽侯驕橫從天吳。黃熊竊壤帝不誅。盡驅老幼填溝壑。我乃未死談詩書。妻兒罄罄夏空闌。兩親棺柩未入土。骨肉傷心百事缺。僅存視息良亦苦。山僧引客來拜揖。跼蹐低眉向誰語。但使六合康泰身無慚。含笑下地分所甘。浮雲富貴何足貪。羸隱二集

徐用錫 圭美堂集二十六卷

徐用錫。字擅長。號魯南。又號晝堂。宿遷人。康熙四十八年進士。選庶吉士。授編修。五十四年乙未會試。李光地王預齡爲總裁。用錫與儲在文爲同考官。一手把持。爲御史董之璠嚴劾。以光地故不深究。別以他事視職。雍正初。李紱特疏薦之。復爲年羹堯所劾。世宗遂謂姦險小人。李光地素爲所蔽。官且不可。何況掌教。乾隆元年。與楊名時徐元夢同召。皆理學之久擯者。超擢侍講。入直三禮館。二年謁假歸。旋卒。年八十一。撰圭美堂集二十六卷。詩文浩汗。不務修辭。工書兼善篆刻。集中字學劄記。于書法變遷。碑帖源流異同。考訂精審。蓋與何焯交稔。習聞其議論。故能辨別是非。敘述不苟。罷官後。客于揚州馬氏玲瓏山館。或卽以此游食耳。用錫嘗倡立董誥生祠。以酬奏罷屯田之惠。後又力爭祠不宜毀。時靳輔方得君。勢張盛。毫無避忌。其倔強如此。他無顯惡。只以一生依倚光地。不離黨局。故屢致人言。光地既沒。爲編榕村語錄三十卷行世。語錄續集二十卷。多論當時黨爭。貯于祠堂。祕不示人者。度亦同出用錫之手。

驟夫行

陽烏催曉裝。昏鴉噪高柳。駸駸盡日程。感此僕夫厚。迎勞衡陽馬。辛苦澤中久。借問衡陽路。廿日能達否。流冗何方來。故業不能守。嗟哉況瘁人。道路爲隴畝。豈謝胼胝勤。缺掌甘囚首。日暮謹驟驢。殷勤到勃溲。劇疲不自知。焦渴復何有。先領之水泉。沙場滾抖擻。三更僮奴斲。摧株明薪燠。五更篝火呼。已復揮糝帚。亭午盼頓舍。饑腸蛟龍吼。到來早櫪間。忍汗料升斗。芻豆未登棧。糗糲忍在手。諒乏泔涓術。詎或五穀偶。問君果何爲。四蹄寄八口。雖無三百禾。聊免素餐醜。小人食其力。異類如昆友。矧民吾同胞。混然大父母。重以皇王命。刑賞隨其後。云胡草土視。恨聲吞八九。赤子委井中。獨不懼索朽。旣分虎竹符。慙茲牛馬走。世有孔距心。庶將警座右。圭美堂集二

長隨行

羈宦捧除書。劇緜不能續。何問千里糧。晨炊已無粟。宕宕京城子。流塵逐輕轂。導言且致金。願齒輿臺錄。自從上路來。百端竭勤劬。隨方巧鑿柄。相人轉轆轤。侈口趙杵臼。居然霍子都。主人時自賀。財力兩余輸。平日愿樸流。差縮向一隅。秋風破臆紗。一隙通中外。此輩閭達言。鳴鼓暴奸獍。昨夜金百鎰。今宵錢萬挂。子母權進身。取息已千倍。兩枝麥不生。四馬門將壞。主人憑軒怒。鼠子敢吾賣。意氣看春容。談言緩相對。君誤索忠良。初交本以利。圭美堂集二

朱海行

雍正三年六月半。朱家海子水平岸。星火一勺試可撲。司事乘夜正荒宴。河決一百四十丈。貧弱男婦死鹵莽。可憐天子不知誰數。豈止萬家田廬隨漂蕩。君不見。邵陽人民誤死兵。賊臣隱匿八百名。赫然之怒屢按問。一一賜卹合邑且免徵。此地死者自安命。獨詫生者重不幸。當事愛惜大農錢。抑配糶積萬牛送。哀哉牛乃農之天。匍匐凍餓哭霜田。虎胥鷹役忍不顧。驅迫留索巧萬千。薪蘇踴貴不可說。高門白日突無烟。歲宴堵築合龍口。向夜流澌掃復走。蟻附夫役隨斷纜。水面紅燈甫脫手。平時腰鼓燥春雷。相逢面面如死灰。儼向犁鋤事東作。定看溝壑轉飢羸。中牟武陟決後河身高。今年例較水實尺寸不滿槽。朱海已下高增倍。況復搜刮各工儲料無秋毫。杞人之憂非一端。洪澤洪流逾半年。淤填淮泗何以容。淮揚一髮千鈞懸。苦憶園林動春事。柳暗花明成錦綺。去年柳陌看花人。轉眼潛寐泥沙底。滄桑陵谷在達官。

咫尺君門信萬里。

圭美堂集三

020-552

清詩紀事初編卷五

甲編下

陶 蔚 鑾 響 一 卷

陶蔚。號卷翁。實應人。澂子。少從葉燮讀書于橫山。集中有過二蕙草堂拜已畦先生主六首。自注云。小山後一室。舊題曰獨立蒼茫處。先生主在焉。又學畫于石濤。有贈大滌老人詩。自注。卽苦瓜也。忽蒼髮爲黃冠。題其堂曰大滌。同人遂以此呼之。然則大滌子乃道士之稱。今人與苦瓜混而爲一誤矣。家貧。游學四方。嘗客張玉書所。有夜坐偶題與諸同學云。列炬分編丙夜中。紛紛估畢競雕蟲。不知何與絲綸事。逐字平章屬相公。自注。時纂修佩文韻府諸書。凡在詞臣。各有分職。雖首輔亦蚤夜不遑。康熙四十九年。知鄆縣。當官十閱月。視職。經歲不得東歸。未知所坐。有書事云。封疆連帥任。衆目豈能欺。一物歸私囊。千秋生大疑。獅糖難飾說。薏米亦支詞。誰似楊夫子。中宵凜四知。則由索賄不遂所致也。撰鑾響一卷。自序云。自庚申_{康熙十年}歷今三十二年。有問天樓集二十卷。古近體一千四百十首。辛卯_{五十年}秋。將自渭陽東歸。悉檢出焚之。亡子曾武有錄存本四百六十二首。不忍沒其意。更名鑾響。蓋傷之也。其詩學激而辭無不達。語語凌厲則過之。自謂俗人所不愛之作。實則過于詆訐。不知何與絲綸事一首。使有怨家

告發。恐較汪景祺天子揮豪不值錢詩。所傷尤甚。亦幸而免耳。

擊柝謠

城中聚嘯夜爲虐。夜夜戒嚴傳擊柝。五日循環坐十家。柝聲聒耳疑風鶴。富家重門高大牆。千方百計保厚藏。貧家一室空四壁。擊柝之役何倉皇。瓦燈半滅長街路。苦大哭天鴉失樹。雙驛走斷眼血枯。幾番失點官曹怒。君不見。擔夫覓食初息肩。茫茫遙夜不得眠。天明父子對相哭。缺少今夜燈油錢。書

苦寒行

丁卯冬。入都道中作。

僕夫催我起。起視夜未央。雞鳴殺殘漏。結束心倉皇。篝燈猶在壁。孤光照我牀。籠手低鞭恨行路。身未出門足已僵。出門就古道。不見古道唯見霜。霜濃馬蹄滑。砂土隨風狂。人命豈金石。耐茲途路長。不學灌園住鄉里。胡爲愛挈風塵裝。吐氣凍結鬚鬢蒼。宿酒不熱酸辛腸。君不見。破村老媪尤太苦。曉寒炙火呼賣漿。書

關中雜詩三首

壬申以前。西安鳳翔二郡事。

西風遶奇虐。億姓恆苦飢。飢死不暇掩。共與溝壑期。大野絕糧粒。觸目唯見屍。昏夜飼狐鼠。白日栖鷲鴟。稔歲艱積儲。大殺無可支。催科竭其髓。漁奪枯其脂。先時不爲保。後時何及之。叫閭誰爲憐。吁嗟良有司。屍滿野

束手閉門泣。並日無炊煙。棄此各流散。匍匐不可前。夕死難自料。那復求生全。鬻身婦何從。鬻婦心愴

然。剗肉拋向人。出淚流血鮮。觸地土爲痛。捩胸呼老天。花落冀復開。月缺有時圓。生離難再面。相與期

重泉。

驚婦詞

關西千里野。旱魃久廢耕。杲日照阡陌。赤地草不萌。金錢賤如糞。百穀資以生。粒粒保民命。待斃安所營。使節從東來。運粟車縱橫。彊者得以食。弱者烏能鳴。浮雲載行雨。被之有枯榮。願言均沛澤。慰茲黎

庶情。

賑粟詩

摘柳謠

沙河縣

沙河水落沙吹灘。曉日照耀沙光寒。民間田災失耕播。近年日食多艱難。仰天束手歎無策。耳聾目瞶饑腸寬。榆皮草根覓食盡。摘取柳葉充朝餐。官柳行行種古陌。三春葉出陰成團。作羣婦孺就匍匐。攜筐負莒遙相看。經營努力謀一飽。猿猴臂引虛空盤。柳眼初開著雨嫩。樹頭葉盡枝如刊。家家計算救生活。迢迢十里陰凋殘。我問老嫗食此慣。水淘作塊濡之乾。但能入口少緩死。那辨滋味甜鹹酸。嗟哉此法罕聞見。食譜漏略尋無端。眼前瘡痍臥不起。身肉可補誰當剗。君不見。保釐大府厚祿俸。囊攜囊載民脂彈。烹羔割鮮下箸厭。庖人私祝生喜懽。似此嗷嗷遍大野。當須粒食相遺安。吁嗟嘻。君門雖高尙可啓。當須粒食遺民安。

馮

隄上謠

汴州城郭大如斗。黃河北護繞東走。河外層層築大隄。隄邊綠樹多楊柳。白髮老翁柳下立。悵望隄前暗

垂泣。我問老翁泣何事。老翁欲言淚轉急。汴州自昔稱雄都。高門邃屋千百衢。丁男在籍記萬萬。笙歌叢裏爲懽娛。家家共樂太平世。倉箱狼籍多豐歲。皇天轉眼屢降災。國運顛連遘末季。忽傳「流賊」闖王來。紛紛殺掠經幾回。排山倒海久盤踞。千村萬落俱爲灰。崇禎壬午薄城下。兵戈密密鬼神怕。忽然掘水直灌城。是時九月十七夜。須臾滿城水滿天。家家命與波濤連。我赴城頭苟延命。老弱盡死我壯年。高城倏忽水衝破。沙土淤填屋角過。屍山委積沙土中。萬死一生能幾箇。至今舊蹟俱荒丘。新城築在舊城頭。舊人似我亦罕見。話來惹我彌天愁。語罷老翁失聲哭。行子聞之亦慳慳。賴此長隄防未然。長官下令時增築。異響

觀黃童所畫覆載一統圖

餘姚人。名千人。時年十三。從其尊翁竹農先生遊京師。

姚江學統溯往代。黃氏述作由家傳。名山書卷積數世。國門紙貴爭高懸。遠追墳典崇六籍。諸子集說皆旁淹。仰窺青穹俯大塊。時從掌握精窮研。神童十三更奇特。玉含在璞珠藏淵。薰陶家學無不有。晝天量地尤能專。繪圖覆載一統象。縮歸便面殊方圓。蠅頭瑣屑細書註。萬無一漏驅毫顛。渾天儀形徑數寸。週遭分野推星躔。紫微垣中北辰次。角亢諸宿沿旁邊。三百六十五數度。赤黑二道中盤旋。河漢互空視微渺。日月出入寒暑遷。安排位置多不爽。貫通七政能司權。人生日日井底坐。何期咫尺觀遙天。坤軸廣遠浮一撮。六合外內同幅幘。東西南朔列中土。條分幹引爲因緣。五嶽分峙五方鎮。中流四瀆疏咽喉。九有畸零八表錯。險關絕隘通人烟。窮荒之服四海窟。六幽屬國知幾千。何曾足跡去家塾。能於簡冊窺其全。

我覽此圖忽辭舌。自慚壯大非髫年。仰觀象緯一管見。山川遍歷徒憂煎。羨爾讀書得領要。恥談雜藝羞拘牽。慧心敏手寫成竹。譬之漁者都忘筌。遭逢盛世難避影。會須側席承明前。吁嗟帖括豈實用。世間兒子皆徒然。饒

喬 萊 直廬集一卷使粵集一卷歸田集一卷

喬萊。字子靜。號石林。寶應人。康熙四年進士。官中書。擢禮部主事。試己未鴻博。授編修。官至侍讀謫歸。卒于三十三年。年五十三。事具清史列傳文苑傳。著直廬集一卷。皆所爲文賦。同試汪琬爲之序。盛稱其賦心之工。謂有良史才。使粵集一卷。則康熙二十一年。典廣西鄉試。途中往返之詩。附使粵日記。使粵贈言。王士禛稱其詩奇秀峭拔。善于敘致。歸田集一卷。爲二十六年南歸後所爲文。嘗修縣志。因以人物志入此集。滄桑間如余增遠梁以樟事賴以參稽。餘則孫承宗墓表。最有關係。蓋萊頗知讀書。究心經世之學。嘗著易俟二十卷。推求人事。參以古今治亂得失。故詩文皆有實際。尤善論事。康熙初歲歲河患。河臣靳輔主置閘築堤束水注海。萊疏陳四不可議以阻之。爭論得失。至于角黨。紛紜累載。遂奉特旨來京居住。入都卽以憂死。萊父可聘明季官河南道御史。有直聲。入清高蹈不仕。年過八十。係東南人望。築柘溪草堂及陶園以聚賓客。萊復得白田隙地修縱權園。父子繼盛。文采又足以彰之。爲時所忌。殆由此也。

過應山縣弔楊大洪先生

嗚呼有明神宗之季國晚脆。光宗繼之更短折。維時先生官給事。顧命乃與大臣列。防微肩鉅定大計。選侍移宮一朝決。再起中丞赴雙闕。大柄已被闖人竊。乾兒義孫滿廟廊。二十四罪憤所切。赤縣爭高官者祠。彤廷逼染忠臣血。詎有婪臧楊大洪。舍人寧死心如鐵。或言漢之廚顧潔其名。唐之牛李營其穴。宋之蜀洛明東林。黨禍紛紛蹈覆轍。封疆已被門戶悞。遂譏先生太激烈。假使君子不與小人爭。遂與張禹孔光更何別。君子豈能禍國家。目爲黨人正氣絕。嗚呼正氣絕。國乃滅。使導集

長沙弔賈太傅

暴秦燔詩書。炎漢起庸保。六國燼既收。三代法如掃。吏但治申韓。后亦嗜黃老。曆仍水德訛。儀襲綿葛巧。封建踰古制。法度鮮深考。將相皆軍吏。非知仁義好。年少得賈生。挺出殊矯矯。豈惟絳灌怒。頓覺蕭曹小。他年七國禍。聽生苦不早。未覩因革宜。翻議紛更擾。驢屑去闕廷。卓涇栖荒嶠。臨流弔屈平。止舍愁服鳥。拓廉伯夷貪。鼎棄康匏寶。再逢宣室召。更值懷王天。命也君如何。天乎余未曉。最難逢聖明。乃亦就枯槁。枯槁不足云。漢制終草草。使導集

水車

齒齒灘中石。矜矜峙當路。滿目皆危機。對之心所怖。世人多巧思。到此發奇悟。借彼撞擊力。製茲灌漑具。竹截虛如瓶。輪轉機肖輅。輕圓圭角稀。翻覆俄頃寓。既無觸石危。更得引流注。建瓴良可樂。抱甕何

其悞。使專集

過高郵

萬里渡瀟湘。洞庭一葦駕。不圖返故鄉。蒼茫與之亞。崩奔萬雷鳴。潏沆一川瀉。浩浩無陵谷。湯湯兼冬夏。孩提飽虺蛇。鴉鴨栖桑柘。舛猛婦子巢。場圃魚龍舍。買薪須論斤。賣兒不計價。古人貴防川。蟻穴嚴一罅。如何村落間。深流匯其下。耕鑿計已休。畚鍤役未罷。死者長已矣。壯者不得暇。哀哉此蒼生。誰將奇禍嫁。使專集

案此詩作于康熙二十一年壬戌。

王式丹樓村詩集二十五卷

王式丹。字方若。寶應人。康熙四十二年舉進士第一。殿試復以一甲第一人及第。授編修。修書武英殿。以重聽不爲聖祖所喜。五十二年罷官歸。卒于五十七年。年七十四。事具從子懋竝所撰行狀。撰樓村詩集二十五卷。自康熙三十年辛未迄四十五年丙戌。分六集。式丹少有詩名。嘗從葉燮田雯游。以詩受知王士禛。而詩格不類。宋肇選其詩爲江左十五子詩之首。而去其涉及時政得失人物臧否者。式丹與姜宸英查慎行皆早成晚遇。阮壑亦相類。宸英以科場事下獄瘐死。慎行爲其弟嗣庭牽連被逮。僅得免死。而式丹亦罹趙晉之獄。晉典江南辛卯康熙十年鄉試。案發于程光奎吳泌槍替中式。晉被參入獄。式丹往探問。

是夕。晉自縊。蘇撫張伯行奏其死為十不可信。金典史誣扳式丹名帖致饋。格外用情。疑式丹僕人張大代死。而晉潛逃。又有胖鬚酒飯之說。胖鬚指式丹也。纏訟經年。至康熙五十五年始奉旨結案。式丹得無累。世傳此獄。其辭多異。故據白石草堂存稿為備著之。式丹性不諧俗。屢與世忤。觀其題徐枋畫贈戴務旃詩。復與宗人源游。是皆當時號為遺逸。式丹自居何等乎。嘗怪源父子兄弟。明亡後。舉室遷江淮間。及讀此集稱源父為中齋九叔。乃知其支脈相連。昭穆未遠。源南遷所恃在此也。

七月七日感舊事偶作

留題覓硯亦堪嗤。飄飄何須絕妙詞。記取三言十二字。沿途勸得口頭碑。動上本。懶結案。准說詞。竟到底十二字。乃江南傳誦口碑也。樓村詩集二十四

案此詩為張伯行作。

朱 經 燕堂詩鈔四卷

朱經。字□□。恭亨。寶應人。撰燕堂詩鈔四卷。自康熙二十五年丙寅。迄三十五年丙子之詩。有辭意甚美者。自云。生于丙午。康熙五年年僅三十。可謂逸才。唯多伊鬱。宿清涼菴偶題云。野鶴沙鷗逐浪猜。片雲流滯碧雲隈。我來不是求名者。準擬春風看早梅。是時淮揚多水災。督河者靳輔。與士紳齟齬。郎中孫宗彝下獄死。待讀喬萊奉命來京居住。三十二年以憂卒。經父克簡。順治四年進士。曾以御史巡按福建。久在廢籍。亦同時卒于鄉。萊。經妻父也。其間必有危及門戶之事。悼亡云。汝亡二日泰山頽。北望長安一放哀。

地下若逢應茹歎。啞然相對不須猜。只一猜字。寓意無窮。除棘逐鴟二詩。其辭更顯。此集別本有作八卷者。

地震行

康熙乙亥四月六日。平陽府臨汾洪洞二縣地震。

入歲四月多風雨。大江以南農作苦。昨聞平陽搖地軸。樑摧瓦裂餘環堵。自辰及酉無停時。道路號泣驚聾聵。須臾烈火天上来。毒焰燦爛那可數。僵尸腐骨幾千人。不亞長平坑降伍。縱有一二強奔逃。蟻附厖喧長如虎。君不見。春秋二百四十有二年。文襄昭哀之間地震五。方今天子至神聖。九州四夷皆樂土。何爲西北罹此災。震盪燎原迭賓主。有耳已覺心魂忡。此身豈堪親目覩。我欲乘風上叩闕。試問天心嗜殺竟奚取。安得重爲斯民整棟宇。燕堂詩 鈔四

纈絲行

丙子三月

院竹青青半翻籜。黃雲壓壘堪刈穫。反舌無聲雙燕飛。家家綠車施帷薄。嘈嘈似來風雨聲。宛轉鳳尾彈濩索。大婦辛勤小婦忙。一家大小歡嗷嗷。近聞天子詔下親西征。上將元戎授方略。此時難用魏絳策。整陳蒐兵期面縛。又聞官家詔下緝戎衣。小民豈得輕司約。但願綠絲無斷縷。絲長萬丈充國囊。今年不似去年時。縱成羅綺何忍着。燕堂詩 鈔四

稽宗孟立命堂二集十三卷

稽宗孟。字淑子。號子震。山陽人。崇禎九年舉人。入清由餘杭知縣官至杭州府知府。以廉明好事稱。未

悉卒年。撰立命堂二集十三卷。先曾刻其詩文。故曰二集。凡詩文七卷。小集曰蠡史。曰星路陽秋。曰識小箋。曰詩拇。曰甌樂行舊錄。詞曰酒古董。各爲一卷。文中序記之作不免纖仄。詩則通雅。山陽耆舊頗衆。而宗孟甚有聲名。爲吳偉業激賞。今觀所作。夫亦猶人。不知何以致此高名也。

樂邑頌衣

道左哀鴻未忍看。朔風獵獵起驚翰。饑驅誰解翳桑餓。踵決徒憐東郭寒。挾纊千人歌趙旭。授衣九月見周官。悽惶不忍悲隅泣。四海還期枉席安。立命堂二集四

甲辰王正安輯流民過茶山留壁

茶山之壁木蒼蒼。路滑峯回人面涼。雲母水春千尺瀑。梅花春醉一樓香。問津擬入桃源路。採藥還思勾漏方。最喜桑麻渾太古。莫教海鶴嘆無糧。立命堂二集四

靳應昇渡河集一卷

靳應昇。字璧星。號茶坡。山陽人。順治十三年以貢生應廷試。不遇。卒于康熙二年。年五十九。撰渡河集一卷。應昇與張養重閭修齡相唱和。嘗刻三子秋心集。稱三詩人。丘季貞爲此集序。謂其怨尤不形于色。愁歎不見于聲。或指其爲人。詩則觸緒生悲。有不勝其掩抑者。兵艘。田無禾。苦雨歎。淮瀆勅諸篇。幾于怨而怒矣。惜稍近率。晚年之作尤甚。篇章無多。蓋不自收拾。脫手卽散去也。

淮無女

順治年十五。是歲當戊戌。十月甫初旬。風聞自京國。長門須女工。下令天下覓。我郡南北衝。傳播說非一。始也皆觀望。逢人卽相詰。有客金陵游。見聞果得實。一傳通國驚。家家咸變色。有女在閨閣。轉盼行若失。父曰計若何。母曰急求匹。日月少遷延。他時悔何及。倘得結其禰。庶幾免乖隔。兄曰勿遲疑。令下在晨夕。弟曰我更聞。官府行事密。搜檢不及防。隣里無容匿。小姑暗攢眉。邱嫂復啣唧。東隣有嬌娃。西隣非親戚。南隣見兒郎。北隣女應適。因此比戶間。作合夜不輟。更奇兩日喧。十九與二十。士夫逮庶民。遑遑如迫逼。豈煩媒妁通。立談六禮畢。廣衢連隘巷。擾攘皆接跡。或則結彩輿。或則巾車出。或則策蹇奔。求配卽頃刻。甚者背負女。登門送入室。寥廓水泊中。搖艇復絡繹。富家饒珠翠。誰容待雕飾。蜀錦及吳綾。不及用剪尺。貧家探空篋。躑躅怨倉卒。欲縫疏布裙。何須理襲積。但使雌得雄。親迎不卜吉。肴核無一陳。況復奏笙瑟。門第未遑詳。甲子未遑息。燕婉歸成施。老嫗偶弱息。釋女髮未齊。畫眉尙狼籍。安知作羹湯。何能侍巾櫛。矯強嫁於人。愛極翻爲賊。屈指嫁娶時。沸騰將一月。道路肩相摩。都與新郎揖。郡中女既空。採選事仍寂。回視向者忙。顛倒殊可惜。且聞朝命來。原不強追責。胡爲朱陳歎。一切就草率。雖曰無曠夫。婚早多成疾。雖曰無怨女。笑中還復泣。世人亦何愚。聊爲來者述。

渡河集

十月水

十月青霜繁。陽烏暄於暑。黃河水氣驕。汗漫無乾土。淮西有高堰。繇來憑險阻。西風浪拍空。天地皆震

怒。蛟龍不敢眠。搖撼駭失所。浩淼一無涯。飛濤如沸釜。崩騰轉盼間。見者慄雙股。官吏亦何爲。哀鳴徒自苦。徬徨督萬夫。隄防愁不鹽。浸淫魚鼈宮。晝夜連風雨。我聞天下平。五行皆得序。水當歸壑時。何以無安堵。居者憂牆屋。耕者哭禾黍。危哉淮陰城。不灌僅如縷。顧告大司空。治河重合古。疏築紹禹功。應先念淮浦。渡河集

杜首昌 綰翠園詩選一卷 詞選一卷

杜首昌。字湘草。山陽人。諸生。入望園詩社。家有園亭之盛。而性喜游。與高士奇交好。士奇于康熙三十七年序其詩。謂年近七十。未知卒于何年。撰綰翠園詩選一卷。詞選一卷。詩有才語。不免粗豪。七絕頗有作意。登太白樓。秦淮曲。皆可誦。唯以江海之人。而有恭擬瀛臺應制之作。又恭題溫王月香亭應教五排一首。竟不知溫王何人。填詞亦近蘇辛。然有雲在水流之趣。似較詩爲勝。

柳敬亭持筴索書口占贈之

能令千古事長新。一往從何辨假真。天地欲存三寸舌。江湖難老八旬人。綰翠園詩選

丘象升 南齋詩集不分卷

丘象升。字曙戒。號南齋。山陽人。順治十二年進士。選庶吉士。授編修。官至大理寺左署丞。卒于康熙二

十八年。年六十一。事具王士禛所爲墓誌銘。李澄馮景撰傳。撰南齋詩集。刻于康熙三十五年。象升先有桐園雜詠。楚游草。舫齋集。嶺海集。三入燕集。西清焚餘草。七入燕集諸刻。晚年始自訂爲此集。爲詩四百八十五首。初以編修外補瓊州通判。開詞林未有之例。同于遷臣謫官。必有排擠傾陷之者。後改武昌通判。入爲寺丞。終不復原官。傳誌不言其故。或有所劫不敢言也。使他人當之。必且抑塞假蹇。而象升勤于吏事。其詩深情一往。多友朋酬答之作。一時名士。無不交好。懷人詩六章。獨拳拳于金堡阿字龔賢張養重。皆高逸也。平生寄托可知。傳稱其孝于親。與弟象隨齊名。友愛不衰。尤篤故舊。臨沒猶刻故人張虞山養重古調堂集。新茶坡應昇渡河集。可謂古道。

都市口占

報國松前廟市張。退朝官府雜工商。誰開祖帳昆盧閣。滿院笙歌沸海棠。

昆盧閣左有海棠院

天寶樓開製造新。琳琅時過到烏銀。鮮衣怒馬來如織。賺盡長安富貴人。
梁家園北好盤餐。沿岸垂楊遮畫欄。公子王孫擁歌妓。夜深猶未罷吹彈。
天壇門禁無塵惹。日射琉璃五色瓦。壇中道士不黃冠。東開酒肆西茶社。
金魚池繞柳如烟。隨地氈鋪人醉眠。忽聽衡衡神會過。往觀攜攘競摩肩。

南齋詩集

李時震 去來吟一卷

李時震。字雷中。號恂菴。山陽人。順治十八年進士。康熙十二年。始補內閣撰文中書。逾二年告終養。二十五年服闋赴補。遂乞假歸不再起。卒于四十年。年六十六。撰去來吟一卷。蓋取淵明歸去來之義。其詩淡遠。一如其人。

梅花嶺尋史道隣先生葬處

嶺上梅花千樹橫。笛聲吹徹暮雲平。招魂曾把孤忠葬。感慨偏深弔古情。去來吟

阮 晉 自吟亭詩稿二卷

阮晉。字鶴緜。山陽人。監生。入國子監。試得知縣。未及選。卒于康熙三十六年。年六十三。撰自吟亭詩稿二卷。後二十年其子應商始刻之。晉少與閻若璩共學。又學詩于靳應昇。與李挺秀黃申及應昇諸人結望社。家富于田。有水園。山園。益丘草堂。夏雲草堂。皆田莊也。多田園漫興之作。詩筆力追香山劍南。稍傷率易。查慎行序其集。譽爲必傳。無乃過情乎。曾孫葵生。本名芝生。官侍郎。有文譽。撰茶餘客話二十二卷。稱晉爲先徵君。阮元爲葵生作傳。亦謂晉與閻若璩同徵。然已未鴻博百八十六人中。無阮晉姓名。俟考。

養蠶謠四首

清明蠶種萌。穀雨蠶種出。家家養蠶忙。不分夜與日。
典盡筒中衣。賣盡倉中穀。采采桑滿筐。一一闌蠶腹。

蠶飢勝己飢。蠶眠不敢語。可憐租稅完。所剩能幾許。

東家女兒啼。西家女兒哭。喫盡後園桑。新絲無半幅。自吟亭詩稿上

螟蝗篇

丙寅七月上旬中。滿村滿野皆蝗蟲。丙寅七月下旬中。滿城滿市皆蝗蟲。其初無翅走匆匆。千里百里花
椒紅。依稀將帥統軍戎。問從何來自山東。大毬小毬結爲叢。黃河滾過若飄蓬。遮牆蔽屋密蒙蒙。俄而漸
與簾戶通。習衣敝帽窺箱籠。掃除不盡呼兒童。一朝羽翼能高翀。直上層霄塞碧空。黑如煙霧響如風。日
色爲之翳朦朧。路上行人憂忡忡。抱頭似遭急雨同。撲髮撲面撲雙瞳。入人項領芒刺鬚。墜枝壓樹亂瓦
瓦。西園綠竹變枯桐。指蝗驚訝訊老翁。老翁九十貌尙豐。爲言追溯到鴻濛。未聞如此蝗無窮。朝來急往
視田功。處處驅蝗敲竹筒。揭竿搖幟紛爭雄。誰知蝗衆不可攻。嘉禾一片烏紗幪。須臾莖穗成斷葱。東啼
西哭傷我衷。哭聲直令耳欲聾。吁嗟聊紀褚國公。我賤何由達宸聰。自吟亭詩稿上

夏雲草堂紀異

春到暮春春已老。衆卉欣欣日杲杲。田父操豚祝滿篝。共云牟麥收應早。紅雲百朵自西來。萬丈冰山碎

錫倒。天道無端忽雨雹。桑麻一片盡枯槁。大麥灰飛小麥空。平疇四顧淨如埽。夏日景同冬日凋。樹頭無葉野無草。自午濩落及未止。大似王瓜小荔子。行人抱頭何處奔。牧兒無避擊多死。禽獸逃匿疑雷霆。雉兔道斃毛血腥。鴉鵲鐵羽飛不得。雲中愁遇海東青。更聞婦子相奔逐。傳說堅冰似巨木。從空直透三重茅。霹靂一聲穿老屋。我來課稼東村東。東村八十一老翁。一一指顧向我言。援筆載之入詩筒。自吟亭詩稿下

戴 晟 寤齋研齋學文一卷學詩一卷

戴晟。字晦夫。號西洮。山陽人。兄曾。字闈士。號唯一。同師鄞縣萬斯選。復因斯選以師黃宗羲。傳陽明戴山之學。又師閻若璩。稱爲太原先生。兄弟藏書萬卷。研尋經史。黜然自修。不慕榮利。晟卒于雍正十三年。年七十七。撰寤齋研齋學文一卷。學詩一卷。辭筆爽勁。論水利及風俗之敝。知未嘗不留心世事。有宗羲康熙三十三年所爲序。甚獎許之。而詩文有撰于康雍之際者。數十年間。所存僅此。自好可知。至乾隆七年。其子始爲刊行。晟嘗刻南雷文定三集。明文授讀。而不自刻其集。孤介絕俗可知。

授一公車過我賦贈

八載一相逢。握手涕漣漣。君今騁高足。雲路喜新遷。何爲舉陳言。觀縷盡君前。感彼成我思。不得報埃涓。魂魄無依歸。日夜心熬煎。問訊凡五六。積疑脫糾纏。拘執形家說。是誠繼嗣權。收涕更慰藉。呼童出遺編。剪燭再三讀。收拾恨未全。此事我獨任。明年始雕鐫。因念甲戌秋。八月月上弦。夢君入我室。同侍

杖屨邊。訓迪若平生。如對缺月圓。忽忽越十日。小力自南旋。爲言值含飯。乃在是日焉。爲位服哀服。痛哭徹三泉。精誠若爲通。豈限道里千。君今將適我。我夢相周旋。德容猶在目。情話多勉旃。講堂舊芸冷。几席尚依然。相視各黯傷。相期善承先。君具鴻鵠志。抱負古聖賢。倘得展才猷。尙思忠節傳。萬氏家傳 四忠三節 致
澤當身事。無爲俗習沿。癡研齋 學詩

許志進 謹齋詩稿二十卷

許志進。字念中。號謹齋。山陽人。康熙三十年進士。閱五年官鐵嶺知縣。東巡獻賦稱旨。三十九年入爲戶部主事。翌年擢禮科給事中。性豪邁。精騎射。能爲滿洲蒙古語。罷官後。歸隱珠湖。闢園亭。手栽花木。購書數萬卷。月夕花晨。呼賓召友。彈弦清歌。引觴輒醉。一時門館極盛。築來鳳樓以居其妾玉岑。珠簾繡旗。甲于郡城。及卒無子。園亦鞠爲茂草。玉岑白髮青裙。委頓無依。年已八十。阮葵生猶及見之。本白門舊家女。工詩。附見集中。此集曰虛槎集一卷。壬午康熙四十年六月後作。曰戊子康熙四十七年年稿二卷。曰己丑康熙四十八年年稿一卷。曰庚寅康熙四十九年年稿一卷。曰辛卯康熙五十年年稿三卷。曰壬辰康熙五十一年年稿一卷。曰癸巳康熙五十二年年稿二卷。曰甲午康熙五十三年年稿一卷。曰乙未康熙五十四年年稿一卷。曰丙申康熙五十五年年稿三卷。曰丁酉康熙五十六年年稿一卷。曰戊戌康熙五十七年年稿二卷。曰己亥康熙五十八年年稿一卷。志進舊有遼海按垣京華三集。自序謂南泝沅湘。北走燕薊。二十年内。吟諷約數千首。漫不檢拾。散佚多矣。又壬午以後戊子四月以前。亦富有詩。恐俱失

稿。志進罷官。阮奏生茶餘客話但謂其劾曠禮。顧嗣立序謂其天性曠直。不避仇怨。彈劾所傷。輒多投鼠之忌。張大受謂其直言忤物。致官而歸。章藻功謂其看此時之鴻鶴。高舉空冥。問當日之豺狼。退歸何黨。俱未明言其故。考實錄志進罷官。由與江南江西總督阿山互訐。康熙四十三年。阿山劾江西巡撫張志棟舉薦不公。部議志棟及布政使李興祖按察使劉廷璣道員韓象起等革職。允行。阿山復爲興祖廷璣奏請開復。志進劾其操縱自如。恩威已出。阿山遂劾志進係淮安漕標營卒之子。素行不端。爲志棟私人報仇。志進復劾阿山貪淫各款。得旨阿山留任。許志進狂妄。素行不端。另旨處分。阿山言志進品行不端。聖祖遽信之。且目爲狂妄。蓋是年春。志進與給事中黃鼎楫湯右曾朱駿業王原等。合疏劾李光地于水災漫無經理。光地方以大學士吏部尙書管直隸巡撫事。被殊眷。故帝惡志進。借事去之。今讀其集涉及時事者至多。他人所不敢形之筆墨者。無不見于歌詠。廢太子事。尤一再言之。雖或託之諛辭隱語。然證以當時史事。約可得其什九。誠詩史也。戊子詠史二首云。何事邯鄲於善相。却驚曹植是天人。蓋詠相面人張明德爲胤禩看相。貴不可言。有飛賊十六人。已招來二人。謀刺皇太子。明德凌遲處死。一德二首云。驚聞新詔勸離居。指四十七年九月先已誅索額圖。至是復誅索額圖諸子格爾芬阿爾吉善二格蘇爾特哈什太薩爾邦阿。遂于是月丁酉。禁錮胤禩。以黜廢太子。布告天下。漢家一首。深望有如田千秋之悟主也。問道一首。四十七年十月。諭廢皇太子見今安養咸安宮中。又諭父子之情。不能怒置。召見兩次。此詩爲此而作。禳除一首云。已破狡謀分邪正。方知帝德軼唐虞。詠四十七年十月貝勒胤祉奏大阿哥使

蒙古喇嘛巴漢格隆明佳噶布楚馬星噶布楚用術鎮壓皇太子。掘出鎮壓物件十餘處。巴漢格隆等。供認不諱。凌遲處死。胤禔革去直郡王。即在其府內幽禁。四十八年正月。諭馬齊交胤禔嚴行拘禁。李榮保免死枷責。馬武革職。其子孫革職。妻子發黑龍江。漢官王鴻緒李振裕蔡升元楊瑄人品不端。俱原品休致。蓋治胤禔之黨也。壬辰相違二首云。尙書劍履動宸楓。此日南遷感慨重。誰道雷陽寇司戶。扁舟江上恰相逢。不知誰指。疑爲王鴻緒也。癸巳此日二首。五十年十月。以託合齊歌額齊世武朝奇鄂縉迂圖都圖悟禮楊岱皂保武拜張伯良等結黨。鎖拿治罪。五十一年十月初一日。再廢皇太子胤禔。幽咸安宮。詩中有此日憂生淚。他年獻壽杯句。蓋廢太子生日也。古詩此日足可惜。意蓋取此。甲子感懷二首。丁酉此日一首意同。潛德二首云。褒衣揮涕淚。唯有近臣知。志進竟以近臣自居耶。年長一首。傷廢太子輔導無人也。馳書一首。似詠朱天保戴保請復立胤禔爲皇太子被誅事。然事在五十七年。而入之癸巳稿何耶。或別有所指。丁酉讀史二首。似指王揆密奏。及御史陳嘉猷等八人公奏請立皇太子事。志進于廢太子惓惓無已。未罷官時。必已潛侍東宮。四十二年拘禁索額圖。其家人告變。尙在前三年。帝疑太子已久。志進之謫。當與此不無關連。後來誅託合齊歌額齊世武及得麟白通父子。株連甚衆。志進竟得安然無事。可謂天幸。癸巳關塞二首。爲南山集之獄。方登輝父子兄弟出塞而作。乙未詠史二首。及丁酉農部縱談史事。語多可采。因次以韻六首。皆痛詆李光地。至闢爲官途每恨馮道巧。天下皆知盧杞姦。又云。死戀中書指鹿心。生還括盡四知金。光地亦志進辛未座師也。構怨之深。形諸毒口。足徵其時黨爭之烈。自謂受

知新城秀水。其詩風華掩映。爲王士禛嫡派。才情標格。在湯右曾之上。黃任爲志進壬午閩試所得士。詩才淹雅。極似其師。志進爲有傳人矣。

疊麥飯行韻謝求夏廣文稼登中舍

自我歸田辨麥菽。豚蹄歲祝登千斛。平生雅志笑溫飽。居貧況味兼酸俗。青編濁醪挂牛角。醉吟餘暇耕遺讀。爲農風味學農家。細碾麥仁春磨熟。清風簸揚去糠粃。白水澆淘淨珠玉。舊穀已空笑瓶罄。新麥充虛矜旨蓄。不勞作賦誇老饕。徑須晚食以當肉。四時氣備甲五種。中和暑月寬腸腹。駑馬低頭方戀棧。騏驥鹽車空碌碌。自矜善飯養堅頑。亦復分甘贍宗族。彭澤飢驅或行乞。顏魯全家時食粥。賢者於世無多求。天道從來有盈縮。摩臍穩睡北窗風。起看庭陰轉修竹。雖無祿米耗倉廩。免竭緡錢市官穀。時江浙告饑。留南漕四十萬石。分貯減糶。人日百錢買一斗。張陳二子新詩好。也說朝糲謀不足。未能糠覈解肥人。麥飯聊應勝採菹。君不見。長安達官生趣少。菜色方憂退維谷。我生寧羨官倉鼠。曾供侏儒一糞粟。何當作達倣三閩。木蘭露墜餐秋菊。南畝雨盈秔稻長。登場竚待青霜肅。千邨簫鼓迓田祖。飲蜡吹豳同介福。作賦雖非蜀使才。挾書且護高生曝。兩君俱是素心人。合向槃蔬歌弗告。謹齋詩稿二

詠史

光騰碧海詠扶輪。協符膺圖舊有真。何事邯鄲矜善相。却驚曹植是天人。
卜者王郎詔獄成。妖書巫蠱禍相仍。書生仗節驕王懼。此事誰知汲黯能。謹齋詩稿三

案此詩爲廢太子作。曹植指鳳麟。

糜粥

糜粥真能活幾人。要於一勺使君仁。三更風雨奔馳路。十萬飢寒現在身。搜粟儘教胥吏飽。獨貲先使富兒貧。救荒誰道無奇策。一郡饑殍減縉紳。

枵腹休言仰縣官。新來芻牧貸旁觀。鞭笞儘爲三征設。糠覈誰論一飽難。望歲預憂麩麥少。獨租舊憶主恩寬。何人擬上匡時略。蒿目雲天萬里看。謹齋詩稿五

姚文然 姚端恪公全集四十九卷

姚文然。字若侯。號龍懷。桐城人。崇禎十六年進士。選庶吉士。翌年北都陷。脫歸。順治三年。荐授國史院庶吉士。五年改禮科給事中。轉工科。十年遷兵科都給事中。以終養乞歸。康熙五年。服闋補官。十年授副都御史。遷刑部侍郎。調兵部督捕侍郎。十二年。遷左都御史。十五年。擢刑部尙書。卒年五十九。諡端恪。事具清史大臣傳。及魏象樞所爲神道碑銘。是集其子士暨所編。凡詩集十二卷。文集十八卷。又合白雲語錄六卷。功過格拈案三卷。感應篇備注三卷。及日記摘抄六卷。共爲外集十八卷。附行述碑志一卷。文然不以文名。而詩文皆有根柢。詩不爲派系所拘。盡所欲言。頗具標格。文議論足觀。惜不能敘事。白雲語錄舊集堂諭說帖。辨別所附。深入細微。蓋以清律依明律而作。動改新例。去律愈遠。出入愈鉅。

文然怒焉傷之。欲加改正。乃有此作。雖未成書。而具有深意。後來果改律例。采其說居多。文然官刑部。寬恕得平。爲人所稱。而不知律例之改。造端之功。爲尤難得。大抵文然不務高論。讀其書懇款動人。唯功過格感應篇。爲通儒所不道。而文然深信不疑。雖爲中乘設教。而科名利祿。深中人心。實不能爲諱。行述稱南鄭令高世豪任內。未完追賠銀二千二百兩。例應妻子入官。將就道矣。文然爲之倡助。一門孤兒。始得免于蕩析。是時新例嚴酷若此。陳名夏子居易戍尙陽堡。康熙中猶未釋回。文然歲周恤之。皆他書所未載及者。

封船謠

四月六月五封船。桐山官長縱川眠。大船使風殺捕吏。小船穴板沈深淵。傳聞聯纜鎖湖邊。夜半舉火灰漲天。舟師哭罷仰頭笑。赤手生還學種田。君不見。舟斷粟死田家苦。徹夜追呼吏如虎。吞聲荷校時以懲出衙前。黃稻在園青在土。時穀賤 姚端恪公 無售 詩集十

龔鼎孳 定山堂集四十三卷詩餘四卷

龔鼎孳。字孝升。號芝麓。合肥人。崇禎元年進士。官兵科給事中。以敢言著。降清。起吏科。轉禮科。逾年擢太常寺少卿。屢遷左都御史。與馮銓劉正宗爭門戶。爲所中。驟降十一級。補上林苑蕃育署署丞。再降三級調用。康熙元年。突以侍郎候補。明年。再起左都御史。官至禮部尙書。十二年卒。年五十九。事具清

史列傳貳臣傳乙。撰定山堂集四十三卷。詩餘四卷。先有過江尊拙香嚴諸集。身後吳興祚爲刻此集。其詩純恃才氣。以好客故。爲士流所歸。因有江左三家之刻。以與錢謙益吳偉業並重。實非匹敵。李清三垣筆記數稱其反覆。順治初爲孫昌齡所劾。謂日惟飲酒醉歌。俳優角逐。前在江南。用千金置妓名顧眉生。戀難割。多爲奇寶異珍。以悅其心。淫縱之狀。哄笑長安。眉生卽此集所謂善持君。一時名士稱爲善持夫人者。鼎葦爲人。實無本末。唯好集令譽。時兵餉嚴急。賦斂繁興。屢疏爲江南請命。復請寬奏銷案之被革除者。官刑部尙書。宛轉爲傳山陶汝鼎閩爾梅開脫。得免于死。艱難之際。善類或多賴其力。又頗振恤孤寒。錢謙益所謂長安三布衣。累得合肥幾死。吳偉業謂傾囊囊以恤窮交。出氣力以援知己。以是遂忘其不善而著其善。得享重名。亦由此矣。

挽船行

用少陵最
能行韻

鷓鴣夜叫秋草死。戰場鬼哭江頭水。灘高風急船須上。縣吏追呼到貧子。科頭赤脚沙中語。長繩短纜隨征旅。峽險猿猱驚石墮。月黑豺狼愁徑阻。兵船積甲如山陵。千夫萬卒喧催餉。悉索村巷閉空舍。枵腹負舟那卽能。排門攤錢城苦窄。朝朝暮暮還行客。何時戍罷科斂輕。鷓鴣歸飛有完宅。定山堂詩集四

歲暮行

用少陵韻

天寒鼓柁生悲風。殘年白頭高浪中。地經江徼飽焚掠。夜夜防賊彎長弓。荒村葉落寡婦泣。山田瘦盡無耕農。男逃女竄迫兵火。十年不見旌旗空。昨夜少府下急牒。軍興無策寬蠶鴻。新糧舊稅同立限。入不及

格書鵞庸。有司暴暴罪貶削。緡錢難鑄山爲銅。朝廷寬大重生息。羣公固合哀愚蒙。揭竿扶杖盡赤子。休

兵薄斂恩須終。

定山堂詩集四

萬安夜泊歌

用少陵憶昔韻

石壁陰森埋白日。城上野蒿連十室。高灘遠吼鬼嘯呼。空城人少虎充實。夜來三虎饑捉人。卽今掉尾騷不出。行子未黑已燈火。持挺結伴恆恐失。淒涼士卒那可仗。蒼黃老眼暗如漆。沿江戍舸仍雜遝。閱勞萬一寬軍律。縣吏催租不敢臥。鞭撻殘邨忍見血。男耕女絲固有時。牛車負戴爭虎穴。獨脈歲看三輔徧。痛哭誰將荒徽說。皇天愛物豈擇地。諸老分憂況顯秩。夜半酸風射短裘。月黑江深轉愁疾。

定山堂詩集四

刺舟行

用少陵賈新行韻

廣南人物矜奢華。綠珠容色傾天家。不知風俗始何代。刺船柁婦偏愁嗟。終朝赤腳波心立。背上兒從囊中入。白浪層崖片槩飛。烹魚裹飯隨時給。惡踏嬌啼恆在頸。一身男女劬勞竝。地味隄涼耐袂衣。天教螺蚌生枯井。平生不識粉脂痕。夜夜呼兒哺菜根。爲問墜樓金谷裏。何似辛苦長江邨。

定山堂詩集四

李天馥容齋千首詩

李天馥。字湘北。號容齋。安徽桐城籍。河南永城人。順治十五年進士。由檢討歷官至武英殿大學士。卒于康熙三十八年。諡文定。事具清史列傳大臣傳。撰容齋千首詩不分卷。天馥素好士。嘗舉彭鵬陸隴其

自知縣行取御史。文士從游者衆。其詩體格清備。自注時事。足爲參考之資。別有古宮詞百首。蓋爲董鄂妃作。自序昭陽殿裏。八百無雙。長信宮中。三千第一。愁地茫茫。情天漠漠。淚珠事業。夢蝶生涯。在昔同傷。于今共悼。語意甚顯。詞中高睡足猶慵起。薄命曾嫌富貴家。明言董鄂先入莊邸。又云桃花滿地春牢落。萬片香魂不可招。明言悼亡。後來因有避忌。宮詞遂未入集。

贈古古

時授昭敬詣歌
自首。獲免。

逃名事業釣珊瑚。物色誰教致野夫。劫過乾坤驚老大。夢回城郭認妻孥。徒紅鵲石傷歸去。不白烏頭感畢逋。從此餘生皆浩蕩。應令亡命悔屠沽。

頑民蹤跡遍天涯。老病粗疎意獨乖。半世風塵無姓字。幾年刀劍有形骸。紅燈白髮人偏壯。詩史歌豪調自諧。向後如閒須過飲。莫教談笑冷衙齋。容齋
首詩

李孚青野香亭詩集十三卷盤隱山樵集八卷道旁散人集五卷附錄一卷

李孚青。字丹壑。天馥子。康熙十八年進士。入翰林。時年十六。撰野香亭詩集十三卷。盤隱山樵集八卷。道旁散人集五卷。附錄一卷。孚青詩才清麗。毛奇齡王士禛皆亟稱之。四庫提要。謂其年未四十而沒。功候猶淺。氣骨未遒。此皮相之論。不足以知孚青。道旁集中有康熙末年所作。其年將六十矣。安得謂未四十即沒。殆只見野香一集耶。

都門竹枝詞

女伴金籠燕尾肥。手提長袖走橋遲。前門釘子爭來摸。今歲宜男定是誰。
棚底層冰一百車。端陽已過少榴花。萬衣紗裙新興樣。穿往河邊看象牙。

野香亭詩集

偶憶洪昉思己已被斥事即題其集後

奉勅填詞歲月多。飄零何處賭黃河。六朝樂府平生熟。不記元嘉□曲歌。

長生殿比醉蓬萊。桂子飄香是禍胎。即日杭城得歸去。保安十載轉堪哀。

用錢塘羅長史事。昉思亦杭州人。

垂楚功名已放休。依然捫蝨見王侯。網羅纔脫蛟龍得。豈憶西湖是濁流。

昉思與客飲湖上。中夜大醉墮水死。

道旁散人集五

案此詩作于康熙乙未。闕字當是讀字。蓋用彭城王義康讀曲歌事。歌云死罪劉領軍。誤殺劉第四。此而須諱。則毛奇齡長生殿序所謂廉莊親王世子之請而作。為有旁證。董鄂本莊王之妃也。

許夢麟楚香亭集六卷

許夢麟。字仁長。號雙溪。合肥人。事實未詳。卒于雍正六年。年六十五。撰楚香亭集六卷。詩學范陸。有作意。與李孚青酬唱極多。尤善田實發。實發有才不偶。號玉禾山人。夢麟壻于李天馥。瑣瑣嫻嫻。而不求仕進。一門女婦。皆耽吟詠。不鳴高。絕無牢愁。但偶及貧薄而已。又是一種胸襟。

玉禾山人以狂放罹文網潛踪壽春權公處始得力免於其歸也喜賦以詩兼美權公

六月二十有二夜。天陰月黑。嗚嗚。嗟君底事落坎窞。忽爾平地翻波濤。貝錦成章堪髮指。左右任袒聲喧聒。百無奈何能擺脫。萬不獲已思奔逃。忘歸信往初曠弩。護關弱息愁深宵。虎符使者動碣磳。森羅胥卒窮昏朝。面目矍眊氣慄慄。橫徂逼似狐羣妖。縛人急走莫敢問。貪冒欲刮僕句毛。坐株連難更僕數。幾於烈火靡遺集。乾樞坤軸俱震蕩。摧心斃魄紛哮喘。校昔博浪之一擊。十日遍索尤兇梟。壽春先生信陵伍。忼慷挺出樞迎勞。半生龍臥八公下。久冠藝苑推人豪。勿懼波累見臆識。寧辭足繭還頭焦。倒篋搜箱非所惜。獨存戚誼情吾曹。惟恐漏洩蹤跡祕。匿以密室何堅牢。舉凡良壽爲指畫。意氣直矗秋旻高。此道古敦今則罕。私用迸淚流滔滔。安得豐碑與巨碣。特鐫大義芳名標。身雖瓦全事益裂。終如涸水蟠神蛟。去年獻賦千萬乘。寂然徵召來蓬茅。那期白衣變蒼狗。赫赫威焰春冰消。遊魚竟脫釜中厄。羔犢可免屠門刀。福轉禍兮禍轉福。因倚原不差纖毫。才士十九遇險阻。從此劫過誰瞿瞿。但乞敗漁理故業。潛修昔昔焚蘭膏。文字有靈決不負。拾取青紫胡涓掄。東門之役宜釋憾。恢矣器局須涵包。我作斯篇書信筆。一志酣悅一嘉褒。謹勿忘戴邱山德。致貽後世相譏嘲。楚香亭集二

田實發 玉禾山人詩集十卷

田實發。字梅嶼。合肥人。諸生。師事李天馥。故其詩頗事雕琢。時有秀句。雖未成家。而纖不傷雅。與王概兄弟游。頗以才人自命。竟潦倒以終。

過鄂王回師處

一件陳橋舊赭衣。怎生贈敵尙嫌遲。黃龍府遠兵南轉。夾馬營寒祚北移。失祭祖宗危寢墓。望塵父老哭旌旗。風波獄就臣心竭。不及諸君痛飲期。玉禾山人詩集五

姚文燮 無異堂文集十二卷

姚文燮。字經三。號羹湖。晚號聽翁。又稱黃柏山樵。桐城人。于文然爲再從兄弟。順治十六年進士。官福建寧寧府推官。裁缺起補直隸雄縣知縣。陞雲南開化府同知。署阿迷州知州。吳三桂稱兵。不屈下獄。後逃歸。安親王奏聞得召見。然不補官。居京師三年。會三藩亂平。請終養歸。未幾。失母。以哀毀卒。事具清史循吏傳。稱文燮著有雉麓吟。壬寅康熙元年詩。雄山草。滇行草。黃柏山房詩文集。今俱未見。雉麓壬寅滇行三草。自序皆見無異堂集。當已刻行。無異堂集凡十二卷。有黃柏山房記。稱母年八十四。己年六十。是康熙二十二年所作。集即刻于此時。文多作于滇中。以所修志序入錄。在今日視之。亦足供稽考。楊太傅詩序。爲嗣昌訟冤。洪經略傳。稱承疇盡釋俘虜。滇人德之。兩文頗有關係。餘多使筆。略無淨涸。未爲善于文者。李長祥作序亟稱之。兩人所患皆在才多。文燮作李賀詩注有名。舍文徵事。足爲論世之資。自謂二月成書。何其速也。工于畫。今不見得。他書謂文燮六十後得奇疾。竟不識字。旋卒。王士禛蠶尾集有送姚綏仲編修歸省因寄羹湖詩。綏仲名士萬。康熙二十七年進士。入詞林。官至贊善。此詩作于康

熙三十一年。其時文變尙存。年已七十矣。張英篤素堂詩集。乙亥康熙三十四年題蕩湖畫冊巾車歸里圖云。碧落
仙居剛十載。黃爐客去已三年。是文變沒于壬申。卽士蘊歸省之歲。

鐵索橋

絕岸輕一擲。身命爭絲毫。良冶鼓洪爐。始信煉石牢。鐵絙結危繩。虛空凌危濤。天地不自主。終古鬼畫
號。分明落深壑。置我萬仞高。六合已隔別。飛渡神工勞。青龍常偃臥。蛇虺安足逃。驅石鞭出血。驚拙嘴
仙曹。桐舊集五

黔中謠

三川失穴竄貴筑。天遣黔黎京觀築。殺人愈多天愈笑。燐火無光鬼不哭。軍中勸進王百越。促裝帝褒建
帝闕。南明河溢血髓流。貴州城內挑御溝。潰敗歸命急朝天。倉卒燕火火不然。梁間呢喃舊巢燕。認是降
王舊宮殿。桐舊集五

案此詩爲孫可瀛作。

張英雙溪集五十三卷

張英。字敦復。桐城人。康熙六年進士。入翰林。官至文華殿大學士。四十年予告歸。四十七年卒。年七十
二。諡文端。事具清史列傳大臣傳。撰雙溪集。爲存誠堂詩二十五卷。應制詩五卷。篤素堂詩七卷。文十

六卷。四庫著錄改稱張文端公集四十六卷。誤。應制詩爲四卷。文爲十卷。詩文雖未能工。而春容大雅。頗耽田園之樂。紀事之文。足備參稽。飯有十二益說。恆產瑣言。聰訓齋約語。語多退讓。蓋康熙十二年。英首以文學入直南齋。兼日講。傳東宮。以至臺閣。同時徐乾學葉方藹高士奇諸人。立黨相競。多所凌忽。英與陳廷敬甘心自下。始得保全。英乞假家居者五年。未及杖朝。遽以引退。以不與翻覆之局爲幸。然許志進謹齋詩稿。有桐城相國輓詩四章。作于太子再廢之時。蓋追輓也。其次章云往者□□禍。株連盡老成。呼冤填北寺。請戍走邊城。牛李終相怨。園綺去亦輕。仙人衡岳裏。導氣失長生。明明謂英之去國。由于黨爭。其沒也。由于恐懼。英沒于是年九月。與太子之廢幾于同時。雖非嚴譴。而憂危震撼。殆有不得其生者矣。閱兩月。卹典始下。亦非故事。

擬白樂天秦中吟

葛藟庇本根。行葦勿踐履。古人重畿輔。滋植良有以。聖人宵旰方苦辛。恤此三輔耕鑿人。隴間稚子田間婦。視之不啻如周親。二麥不登穀不熟。撤懸減膳猶含顰。何來無賴東隣子。乍稱逋客在鄉里。狐兔白日橫噬人。官吏秋歎不能止。遂使天子愛養之良民。桑桑多爲若輩死。牽衣垂涕入長安。老者幼者飢且寒。鞭笞不前長官怒。沍寒陰雨尤心酸。昔時蹤跡類狐鼠。那知倏忽變豺虎。豺虎食人有飽時。此輩株連不堪數。我願執法寬且平。但教罪及逋逃豎。里社蔓延置勿懲。自此蒼生獲寧宇。葛藟。寬逋逃也。雞犬不收戶不閉。休哉此風誠至治。或駕單車賊壘清。或縫綵線渠魁斃。能使桴鼓長不驚。漢家京兆稱

能吏。不聞上避考功法。聞雷掩耳成壅蔽。年來水旱多窮民。荒邨雞黍無寧歲。老翁匍匐訴縣官。未語吞聲先出涕。縣官無端怒且嘖。案頭老吏識官意。區區爲爾稻梁謀。誰肯明廷干吏議。吁嗟老翁夫豈愚。翻然搖手向官吏。昨夜荒邨犬不吠。老翁抱孫且酣睡。雞犬誠說盜也

我聞壽春令。始駕牛車來。三年報政去。仍駕牛車回。一犢且不攜。留置清池隈。于今入仕何草草。橫將民社營溫飽。真謂五色石。可以補蒼昊。真謂精衛力。可以填浩渺。向使貪吏長子孫。負郭千頃高于門。蹙額不受鬼神瞰。車中煮苡今常存。胡爲乎昔人祇自苦。萊蕪釜內無饔飧。君不見。鷓鴣十百魚舟上。日日爲人涉風浪。長喙徒勞腹苦飢。幾曾飽食還飛颺。何如白鶴遊青田。少飲少啄全天然。敷天各勵素絲節。何難立致身平年。素絲徽墨吏也 存誠堂詩集二

張茂稷 芸圃近詩一卷 芸圃詩集八卷

張茂稷。字子藝。桐城人。出身貴介。淡泊無營。不求仕進。戴移孝高士也。稱其好深湛之思。放情山水。寡銀青金紫之懷。多所憤發。俯仰于今古。卒以食貧客死武昌。時康熙二十二年。年四十七。撰芸圃近詩一卷。皆五七律。刻于順治十八年。芸圃詩集八卷。刻于身後。其詩早學溫李。然無題四章。是疑雨而非西崑。壯年以後。善能變化。形迹漸泯。詩境日進。張與方姚世爲昏媾。三家多能詩者。莫不遜其才思矣。

兵過

十丈黃塵起。春風裹陣雲。倒戈聊偃息。增竈但喧聞。乳酪汗旗畫。膏脂澁劍文。錦袍能戲馬。稱是上將軍。

逍遙專闕外。調遣到江邊。一路皆懸磬。千騎幾控弦。青山供羽獵。白梃索嬋娟。轉餉誰艱苦。拋殘絕可憐。芸園詩集四

讀史偶感

李陵心事久風塵。三十年來豈臥薪。復楚未能先覆楚。帝秦何必更亡秦。丹心已負紅顏改。青史重翻白髮新。永夜角聲知不寐。可堪思子又思親。芸園詩集七

案此爲吳三桂稱兵而作。言其反覆。末指三桂父襄子應熊。皆不得其死。

姚 宛 緘秋閣遺稿一卷

姚宛字脩碧。桐城人。張茂稷室。早亡。有緘秋閣遺稿一卷。

懷子藝長安

細雨燈花暗。寒愁夜夜新。此時君夢裏。可有憶君人。緘秋閣遺稿

方孝標 鈍齋詩選二十二卷

方孝標。原名玄成。字樓岡。號樓江。桐城人。拱乾子。順治六年進士。由編修官至侍讀學士。以弟章鉞罹十四年丁酉南闈之獄。父子兄弟同戍寧古塔。十七年冬納贖放歸。嘗著滇黔紀聞。爲戴名世南山集所采。致被戮屍之禍。其卒年不可考。集中丁未元且詩。有半百才更始句。是歲爲康熙六年。孝標年五十。當生于萬曆四十五年。方都秦梅谿文集。有孝標鈍齋二集序。作于庚申。康熙十年孝標年六十三矣。撰鈍齋詩選二十二卷。分體不編年。詩之畧年者。至庚戌。康熙九年刻集約在此時。其詩頗有事實。論事詩與某友作。言遇地藏菴僧法乘云。于榆關西七里。親見太子定王爲李自成所殺。永王獨存。歸郡作一首。述自塞外放歸。交水驛遇折臂翁一首。述孫可望李定國事。是亦滇黔紀聞也。上靖南王四十八韻。靖南世子四十韻。作于丁未。康熙六年上祝平西親王一百韻。庚戌平西六十生辰所作。有通家會忝竊。猶子愧趨躄句。又先人前代末。懷廟講筵旁。獨力挑簧鼓。深心保棟梁。及遠蒙垂問語。更感寄書望。序交情始末。入滇由吳三桂之招。又有滇南留別詩四章。是庚戌入滇。未久即去。某人記桐城方戴兩家書案云。三桂反時。孝標被留。伴狂逸去。與詩違異。方都秦鈍齋二集序云。賜環以後。又十餘年。放浪于山高水長間。偶游楚粵。再逢世難。而毒雲南岳。得遂忠貞。似孝標逸去。頗有佐證。然是離滇後又游楚粵。適在三桂反時也。其他可以印證者甚多。孝標留心史事。能爲滇黔紀聞。故其詩不同泛作。惜鈍齋文選無從一見。王遠涇

孝慈堂書目曾見著錄。

論事詩與某友作

某友有弘光三大賦。一謂僧大慈乃真福王。而弘光乃由柏非福王也。一謂董氏婦乃真福王妃也。一謂王之明乃真定王。而孟津王文安公鑄。必以爲假。猶馬阮也。

居心貴忠厚。立論貴和平。勿謂文事小。奕禩是非陳。不見董狐直。千秋著令聲。不見崔浩曲。一傳須兼金。身敗而名辱。三緘戒後生。論詩且論字。昨議何縱橫。雖有小異義。不害大同心。唯觀子集中。弘光三議成。不能無管見。試言子勿喧。弘光昔踐阼。奸臣水火分。予時尙諸生。已擣馬阮嘔。避地東海上。時事絕睹聽。故於前二獄。不甚晰紛紜。獨是假太子。知其事最明。太子悲殂落。二王亦黃塵。斯人名穆七。王昺之家忤。昺固先朝戚。宮闈事略聞。昺死七逃散。寓與穆虎隣。兩人因同姓。遂結爲弟兄。虎挾七南走。中途資斧貧。假稱王昺子。誘脅獲金銀。遂有妄男子。中途與深言。見其宮闈事。依稀語有憑。乃教假太子。可致拙載行。路傍愚惑者。見之或沾巾。泊至石頭城。事遂不可泯。虎固有家主。鴻臚高少卿。恐懼且歡欣。上疏叩九關。弘光初頗喜。急召舊內臣。曰盧曰韓監。往視汝其欽。少海尙虛位。果爾卽前星。韓固福邸舊。昔未睹龍鱗。盧亦典兵久。未見長大辰。時有王與劉。王鐸劉正宗東宮昔橫經。載詔往視之。斯人匿床櫺。再三始出見。應對舛且繁。爲問講讀書。不能誦其文。爲問宮殿制。不能舉其門。爲問崩裂故。先後說紛更。且其貌甚狡。不類太子誠。太子長且揚。斯人短而髡。太子聲洪鐘。斯人蒼蠅鳴。又命三法司。聚觀鞠廟庭。彼當烈日下。遂難隱遁情。冒曰王之明。斯亦僞姓名。一僞且再僞。吐實甘服刑。維時寧南叛。借端欲逞兵。乃長繫詔獄。論久將平衡。五月大兵下。君逃相亦奔。市儈者吳二。率衆破棘垣。擁戴出監

國。胡床作輦輪。曰陛下視我。我爲開國勳。封爾搶國公。斯人之如綸。卽此一事觀。豈是隆準孫。自始至終事。皆以太子稱。並無定王說。頰舌何自騰。是年燕都事。不知何許人。亦號假太子。事與此相仍。慟哭駱主事。辨別謝青墩。若云南者是。北者從何興。北者且非是。南者烏復徵。痛彼太子故。有人目擊曾。平西哭庭日。榆關戈甲臨。李『賊』倉皇出。三王俱北轍。榆關西十里。螳臂思奮虓。有菴曰地藏。有僧曰法乘。親見李『賊』至。南面坐稱尊。三王立左右。從璫谷大寶。私謂法乘言。此俱天潢親。賊敗拔營走。僧亦俘搶擄。西行三十里。蓐食紅花邨。忽見『賊』傳命。太子遽告崩。揮刃向定王。痛哉同時薨。谷璫頭搶地。亦飽楔犬斷。只有永王在。馬上髮鬚鬢。僧時賜寸裂。欲救力不能。此予出塞日。親遇此僧云。永王獨至京。或見之賊營。雙履色尙赤。衣帶接以繩。自言兩哲昆。已是未招魂。惟恐它人狙。四顧泣爲吞。賊臣劉宗敏。須臾命成禽。哀哉赤帝胄。又揜白楊墳。前後合所聞。沈痛迫心神。嗟乎明祚絕。不與古先并。人心因思漢。庶幾永祚存。又惡馬阮奸。欲甚其貫盈。故於此等事。組織成意林。不知史臣筆。權與天王均。疑或傳以信。譌且淆其真。懷宗死社稷。天屬循彝倫。較彼衝壁者。鴻毛與千鈞。何必設疑端。翻令大義溷。馬阮禍人國。罪比秦賈深。卽無假儲事。遺臭何滅增。當時四鎮強。輕權弱朝廷。門戶伺反覆。至死立屏藩。君子亦有罪。小人絕天根。國亡妖孽多。議論當清源。勿效湘東錄。于今費討論。鮑齊詩選二

交水驛遇折臂翁

颯颯盤水遶。汨汨臘溪長。崇丘冠古驛。控帶雄炎疆。我來庚戌秋。崖谷何蒼涼。興衰尋古蹟。紀載隔天

荒。偶逢折臂翁。殷勤捧酒漿。禮數亦嫻習。兩手胡低昂。再問不我語。久之淚浪浪。告我明末事。欲紀恐不詳。此地滇黔衝。自昔稱阜康。有明賴黔國。坐鎮久昇平。嗣公失控御。羣雄藐帝綱。比聞蜀陷賊。乘障召蠻羌。有酋沙定洲。蠶食擅甲兵。私慕昆明盛。乘機擊鼓鐘。甲申十二月。詭辭玉帳箱。鵠起奪門巷。嗣公走永昌。是時『賊』在蜀。渠魁已斧斫。因獸突餘孽。裸體遁叢篁。曾侯樹義幟。重慶扼汪洋。『賊』阻不得渡。萬計奪餘糧。徐收散亡卒。饑鷹飽復揚。敵虛擴遵義。閉變跨盤江。壺漿迷父老。覺後已含瘡。所幸逐沙酋。窮搜鮮枿萌。返戈雖僭竊。瞻顧尙惶惶。旋說陪京破。俄聞閩海亡。海濱擁帝昴。山負阻蚊虻。遂成僵蹇志。殺戮無吠龙。姓名難記憶。孫李最陸梁。又有劉與艾。同時號四強。其餘更彙彙。殘暴總豺狼。昔皆斯養子。拳勇悉相當。至是孫僧號。同輩毗裂眶。或勸以奇計。殘明借寵光。果得分茅土。庶足儆諸偷。于時遣介副。已自署秦王。經年至行在。聚訟實徬徨。鄙儒慎繁縷。豈非古道行。奈何時勢變。強同獻納爭。峩峩一字爵。冊寶共輝煌。自詡羈靡巧。其如缺望成。箕踞見來使。嫚罵抵牾糠。雖致褊裨忿。潛通問典常。問關竟不達。數載斷梯航。孫賊時在黔。偷息日縱橫。川粵大用兵。河鼓隕天潢。是即劉李輩。分途猥噬狂。黑山且響應。烽火達瀟湘。夫豈王師失。吊伐正蒼茫。樓船指梧桂。不暇救江黃。未幾嶺表復。未幾湖南降。柳州尋漂杵。南寧載裹創。堵何皆授首。陳鄧繼牽羊。草間啼共主。衢路泣嬪嬙。普天乞寸壤。無地作河陽。乃用登臺請。覩顏甘下堂。孫賊終藏怒。何知迂玉珩。再三乃遣將。要求千百方。背鞭待臣血。頭懸官女粧。安籠蛇鼠地。疆索尙分張。三宮纏密箠。九廟側青篋。大庖間日麵。妃主或不嘗。惟於

朔望日。籌唱列丁糧。宮老有承業。酸辛冀一匡。帶中銜密詔。省寺共經營。事已同魚爛。謀將救探湯。強藩誰足倚。幽岐機可迎。握兵方外略。何計致匡襄。乃命黃門往。中涓繼翱翔。誓以刺血詔。寵以晉王章。包羞帷幄祕。日夜望旌幢。何來華子魚。露刃清君旁。責之以偶語。證之以謀桑。刀俎羅卿尹。繫累及椒房。倘非嵇紹死。難辭伏后戕。幸哉李王至。洒血濺衣裳。初欲奔官守。何來搖手防。遙意南陽甲。能無逆命將。乃知同反正。合力護龍驤。自是李在滇。鞠躬頗趨駘。調停求長物。仍欲化參商。孫賊有妻子。滇海寄明璫。厚賞歸貴筑。懷惠或相忘。那知謀益急。所慮只姬姜。忽見魚軒返。指關頓飛颺。大蒐謀將帥。僉云舊者良。軍中三命錫。不識二心藏。丁酉九月望。相期此戰場。滇衆雖號武。悉索頗怯惶。兩軍夜成列。月靜水淙涼。一騎款軍門。呼李上崇岡。密語人不聞。依稀識其臚。滇軍遽竦踊。秣馬礪刀鎗。十九夜方半。摩食鷄未鳴。突出擊秦軍。陣後聲琅琅。誰呼秦軍敗。崩奔遂莫塘。又聞精銳走。還邀橫水塘。新安二十萬。兩地盡誅阬。孫賊逃至黔。無面復城隍。又爲留守給。何地託倉皇。聞說洪丞相。持符赦夜郎。遂來呼解胃。誰意荷分璜。滇軍振旅歸。羣誇亦伏祥。登朝太封賞。井陌塞圭璋。盜賊終成性。前車罔戒征。已彰擊柱狀。漸露請隧情。臣強君燕雀。民弱卒披猖。縱非天討速。亦必死搶攘。郭相深籌畫。炎火遠轡韁。尉佗雖負漢。蕭銑已歸唐。憶昨賊初至。伏匿何踉蹌。好言誘我歸。棄金市壺飜。一旦拔營去。千騎夾房廊。捉生無一逸。劍割間笙簧。老幼雖幸免。斷腕山崢嶸。飄蕩死者樂。骨肉幾能生。王師昨過此。盆水焚都梁。但恨不能捧。拜跪互頡頏。長者中原秀。早爲堯舜氓。未知邊民苦。幸爲述行傳。我聞淚沾臚。還爲

惜變更。羣盜真犬豕。阻封謀不滅。故致兩虎鬪。社稷殉膏肓。吾謂謀即協。駕馭盡英豪。亦必隨興廢。誰能抗彼蒼。地僻車書阻。時久見聞厖。漫從採風使。樂府愧鏗鏘。留供稗史料。採者助繆緇。鮑賈詩 選四

方登嶧 述本堂詩集七卷

方登嶧。字疊宗。號屏柘。桐城人。兆及子。孝標從子。康熙中官工部主事。五十年。有戴名世南山集之獄。牽及孝標。親族皆論死。得寬減。方苞方貞觀諸人隸旗籍。登嶧及子式濟。從兄復齋其名俟考及子世莊。長流黑龍江卜魁城。登嶧卒于雍正三年。年六十七。撰述本堂詩集七卷。爲依園詩略。星研齋存稿。垢硯吟。葆素齋詩。葆素齋古樂府。葆素齋今樂府。如是齋集。登嶧詩名早著。體近杜韓。筆力健舉。垢硯以後。皆作于戍所。詞多悲苦。今樂府三十章。繫馬東城隅。長城行。望大路。感盛詞。迎神詞。禮斗詞。燈官曲。葳瓠船。斗魚歌。塞春歌。掘土窖。昇茅泥。苦霜歌。塞上月。寒號鳥。王干歌。打貂行。老鎗來。貪狼行。犬獐狷。霜遲樂。賣糧謠。木石謠。悔莫追。將軍獵。廢花吟。婦獵詞。打鷹歌。麩子米。打草歌。皆歌民風。陳教戒。考邊事者。所必取資也。

燈官曲

官乘馬。吏擁燭。馬來不許行人觸。昨日街頭阻僮兒。今朝馬上威儀肅。燈政司門字大書。放衙人跡奔如鹿。夜火南門三里紅。行行虎侶聲徵逐。官何除目吏何司。將軍令釀邊關俗。月落燈殘元夜過。不知官吏

誰家宿。述本堂
詩集六

打貂行

打貂須打生。用網不用箭。用箭傷皮毛。用網繩如線。犬逐貂。貂上樹。打貂人立樹邊路。搖樹莫驚貂。貂落可生捕。皮頑脯肉供匕箸。索倫打貂三百戶。白狼蒼鹿齊同赴。九天闔闔上方表。垂裳治仰蝨蟲助。述本堂
詩集六

賣糧謠

密雲壓雨雨不飛。涼風吹動清江湄。黍麥不熟牛羊肥。牛羊日飽官倉粟。開倉賣糧三百斛。買糧不是絕糧人。且喜賣糧金滿籠。酒如泉。弗賁肉。呼同心。夜秉燭。述本堂
詩集六

將軍獵

霜落家家磨箭鏃。爭道將軍獵平陸。幾回騎馬復騎歸。野外風晴寒不酷。佇眸十月雪彌天。凍草蒙頭冰結腹。此時躍策馳林岡。蒼鷹翅硬韓盧突。冰洗刀鋒雪擦手。夜深人抱瓶羊宿。平明上馬五更飯。霧帳火紅千點簇。黃羊雉鹿積如山。弁卒驅車西入關。關吏記名檢毛角。尙方匕箸陳瑯盤。黑雲罩地黃沙飛。八百甲士同時歸。鞍上帶禽衣帶血。蒼白不辨鬚與眉。腐儒撲灰煨兩足。敗絮圍腰如蛭縮。述本堂
詩集六

糜子米

糜子穀粒碎。黃金粟邊人。匹布換一斛。挽輸城外車音續。糜子生。糜子熟。炕頭壓席焙新糧。婦子橫陳

糧上宿。夏雲罩地雨如注。播種不覆人盡去。氈幃木柵秋霜白。草根細軟牛羊陌。今年鋤地向城南。明年

移家種城北。述本堂詩集六

賣魚歌

前年四月江冰坼。賣魚車上飛殘雪。去年江冰三月開。大車小車如雲來。大魚三尺小徑寸。小者棄去同塵埃。今年時節逼上已。鄰人告我魚入市。落日柴門賣有聲。值昂不與當年似。欲買不買又手看。吻饑未動嘗羹指。窮邊別有農書目。雞占以外增魚卜。米魚貴賤互乘除。魚多豈是居民福。前年四月不雨至七月。寒霜早壓沙皮白。去年麩子花開實未成。風吹四野波濤鳴。萬錢糴米不盈簞。兩年水旱如珠玉。家家夏釜切銀絲。漁人拍手農夫哭。今年魚貴米或賤。侯鯖客飲毋徒羨。一犁春雨羈沙田。十里清風網江面。但願魚多穀亦多。飽抄稌粒腥盤薦。述本堂詩集七

方式濟 述本堂詩集二卷

方式濟。字沃園。登嶧子。康熙四十八年進士。官內閣中書。南山集之獄。隨父長流黑龍江。五十六年先沒于戍所。年方四十。撰述本堂詩集二卷。爲陸塘初稿。出關詩各一卷。詩有父風。自謂如東坡之有斜川也。出關多紀程之作。別撰龍沙紀略一卷。附于集後。紀黑龍江方隅。山川。經制。時令。風俗。飲食。貢賦。物產。屋宇。甚有體例。事多目擊。筆亦雅飭。

水車謠

布穀聲殘農事苦。四野已振莎雞羽。形曠絳旆火車來。耗斲炎威三尺土。蘭塘艇子搖晴波。雙槳漫發蘭塘歌。藕絲荇帶船頭多。玉山誰顧田無禾。柳根乍過水車見。走雪跳珠自流轉。恨不足踏江河翻。濯潤千畦一時徧。柳葉暗。柳陰濃。天空不見雨垂脚。月斜空受灣堤風。老農老困向人泣。筋力全非年少日。家有丁男可相助。昨夜入城納官賦。臨塘初稿

布塔哈烏喇

珠江也。官歲采珠於此。采獲於山。采船於野。並為東鎮寶產。

部曲千騎強。前代邊疆冠。神龍起天潢。沙蟲腐頹岸。鬱鬱城市狀。稠沓詔井閉。生齒鮮編民。徭役半流竄。清冷汨深淵。珠光倒星漢。南海豈寂寥。貢舶扶桑畔。維地不愛寶。邊產歲無算。令嚴私采罪。官采春泳泮。巨蚌剖葳瓠。革囊繫腰盱。鮫室凜失墜。入眼波沔沔。采獲復采貂。足繭復何憚。出關時

方都秦 梅谿文集六卷

方都秦。字百二。桐城諸生。撰梅谿文集六卷。刻于康熙二十三年。時年七十一。未幾卒。有方孝標序。稱其古文時文擅名三十載。都秦自序。謂少時文字毀于乙酉弘光元年兵燹。集中有代龔鼎孳所撰壽序。度亦一時之能文者。而其文中理法何也。孝標序以此集與其詩嶺雲集并稱。而詩不傳。

胡少游過訪挹古軒共話

相逢不必嘆沈淪。秋浦芳蘭手自紉。山出奇書便爾腹。天無老眼滯斯人。登樓作賦才驚代。刻燭揮毫句有神。莫食僊文成脈望。還從風雨化延津。名家詩 永五

方貞觀南堂詩鈔六卷

方貞觀。本名□□。以字行。號南堂。桐城人。于方苞方登嶧爲從兄弟。南山集之獄。方氏族屬皆隸旗籍。貞觀與焉。雍正改元釋歸。舉丙辰乾隆元年鴻博不赴。卒于乾隆十二年。年六十九。撰南堂詩鈔六卷。初刻于淮安程氏。繼刻于儀徵汪氏。再刻于方觀承。汪本多初秋晚坐一首云。輕雲如縠掩殘暉。向晚涼風動葛衣。木葉漸凋霜未降。社錢纔斂燕初歸。苦空禪早聞三昧。隱見星休問少微。久已無心事書卷。流雲還入破窗飛。此本有乾隆戊午乾隆三年汪廷璋序。卽集中所謂令聞集予詩數百首。繕寫成卷者。然無初秋晚坐詩。或卽觀承并方扶南春及草堂詩鈔合刻之本歟。戊午以後不應無詩。嘗見一本有續集一卷。其詩直抒胸臆。深情一往。老妻書至勸歸家一首。藉甚人口。他詩亦俊快可喜。實撫僉山體。所謂沈淫貞元大曆者。未得其實也。不悉何故列入禁書。集中擬古邊詞云。中華多少未耕土。偏愛荒邊一片沙。又云。可愛猜疑漢天子。尋常甥舅作仇讎。爲征準噶爾而作也。已傷訐直。重有感云。聖世窮兵武亦羞。又云。漫道弓藏綠鳥盡。則爲年羹堯鳴不平。遭禁或由于此歟。貞觀工書。晚客揚州。賣字爲活。別撰輟錄一卷。

望見京城

潞河西面繞祥煙，遙指觚稜是日邊。獨有覆盆盆下客，無緣舉目見青天。南堂詩
鈔三

曹燁 曹司馬集六卷

曹燁。字尔章。號石帆。祥符籍。歙縣人。崇禎□□年進士。十七年官副使分守南瑞道。東明既建。晉參政。備兵蒼梧。旋巡撫廣西。兵部尙書。李成棟爲清兵取梧州。出降。順治六年以後。流寓佛山。卒于十一年。年五十三。事具曹度所撰傳。第度謂成棟建藩。與通鄉曲。起受事。枝拄兩粵之界。卒無所爲。則渾燁之降清與成棟之反正而言之。明史瞿式耜傳行在陽秋東明聞見錄僉謂其降也。聞見錄并記蒼梧知縣萬思夔大書曹燁姓名于木龜一事。其人偷生苟全不足論。然固以春秋獲僞者也。瞿式耜與之詩篇廣和。不幸又藉其集而傳。曹度。石門人。自號聶恥民。入清不仕。

郟城行

疇昔乘城闢埤坵。浴鐵長驅千萬騎。王師河上日逍遙。至尊宵旰籌全計。諸道援兵非不多。公家犒賚窮金幣。巖邑名城所在屠。將士飽煖黎民斃。我今于役次郟城。入目愁經良可涕。市上皚皚盡縞衣。強半拋骸未及瘞。婦女無復少者存。不事臙脂但鬢髻。男兒健者已從胡。問道逃歸髮尙繫。鮫背老人徒倚行。手持漿粥糊殘喙。憑軾爲語遭虜事。語未出口潛潸淚。訴說無兒值暮年。當此兵戈荒亂歲。廬灰物燼亦已

矣。老妻散去知何逝。有地數畝不得耕。佃召無人復誰藝。只今縣裏又開徵。里正傷亡拘我替。曹司馬集一

哀許昌

馬啼僕僕風塵忙。夕炤孤烟野草荒。道旁古塚高于屋。知非近代漢耶唐。許昌在昔稱蕃庶。此來極目何郎當。市廛殘壁橫蒹葭。老嫗嚮餅踞破牀。斷椽不復庇風雨。夜頂星斗延曙光。壯丁荷鍤汗膏手。穉子執筆方捕蝗。到得城闔天入暮。猶自荷衣映女塘。青錢翻蓋淨如拭。歷亂紅粧炫眼眶。入城觸緒驚心魄。街頭燈火胡蒼涼。不見葦簷千萬礎。空餘瓦礫東西望。可憐魏家宮闕地。悠悠千載同宵茫。耳邊唧唧居人語。道非『賊』燬爲兵殃。『賊』來不聞鳴鐵馬。『賊』去徒爾能鳴張。男兒自抱封侯骨。誰爲腰金佩上方。曹司馬集一

吳苑北黟山人詩集十卷

吳苑。字楞香。號鱗潭。歙縣人。康熙二十一年進士。由檢討官至祭酒。三十三年請養歸。後六年母喪。以哀毀卒。年六十四。撰北黟山人詩集十卷。曰潛虬。所居山正與黃山雲門峯相對。曰吳船。甲寅康熙十年後公車北上。道出吳門所作。曰蕪城。曰黃山。客揚州與吳嘉紀論交。曰花底和鳴。官翰林時作。曰橋門。祭酒時作。掘獲元進士題名碑三。明碑二十餘。清只丙戌順治三年一科有碑。乃爲之補立。曰將母。甲戌告歸後作。曰擊壤。丙子三十年春方有事于厄魯特。是年冬復出塞至鄂爾多斯。明年春。噶爾丹死。巡塞上自大同至寧夏。因有漠北樂府三十章以志慶焉。曰銷夏。曰聯句。凡分九集。苑詩得力于范陸。格律清整。不知

乾隆時何以遭禁。殆以集中有屈大均姓名之故。初禁凡有錢屈姓名。即予全毀。後始改爲抽毀。而曩之焚如者。已不可勝計矣。集中有萬柳堂補柳詩。距馮溥初種時。不足二十年。何以遽致芟夷。然則名迹亦何可常耶。

太學新立進士題名碑紀事

進士題名碑。嘗在太學。國朝創科。始丙戌。碑列大成門東。厥後一十七科。未之繼也。謀於朝列。伐石鳩工。鑿之大成門左右。閱一月。探明進士碑。計永樂至崇禎凡七十八科。土蝕辭剝。僅存三之二。太史朱君竹垞作日下舊聞。嘗慨其闕。余非循既久。令吏掘地搜索之。首獲宣德庚戌。次獲成化甲辰二碑。皆先族祖登第之年。同儕咸爲撫掌。旣而碑盡獲。惟缺永樂首科。一日宮牆傾。臺吏諱曰。永樂碑得矣。視之果然。一代之碑遂全。後於啓聖祠土中得元碑三。一爲正泰國子貢試名記。蒙古色目漢人列三榜。皆有正副。一爲至正十一年進士題名記。蒙古色目爲一榜。狀元朵列圖。漢人兩人爲一榜。狀元文允中。皆無榜眼探花。一爲至正國子中選題名記。蒙古賜正大品。色目賜從六品。漢人賜正七品。亦有正副三碑。可徵一代取士之制。鑿訖爲文三篇。復爲詩以紀事。

國家誰與奠山河。關門籲俊動網羅。近世掄才著爲令。三年大比崇制科。珊瑚木難收溟渤。祥麟威鳳搜岩阿。題名伐石鑿太學。用彰文治垂不磨。聖朝豐碑惟丙戌。此後未繼將如何。鳩工補勒橋門外。鴻儒碩輔名巍峩。勝國碑存三之二。其餘沙礫埋藏多。搗鋤掘地動彙集。一一出見荒坡陀。始信列宿光不掩。詎非神鬼潛護呵。更從土得元碑三。一代典制重摩挲。同爲建豎還拂拭。用傳千禩正舛譌。因知歷代取士貴。補載日下無偏頗。作歌用告後來者。爭自砥礪無蹉跎。北影山人詩六

江 閩 江辰六文集十八卷

江閩。字辰六。歙人。康熙二年舉人。舉鴻博不第。選益陽知縣。有治蹟。擢均州知州。再擢解州直隸州知

州。撰江辰六文集十八卷。凡文八卷。詩五卷。詞一卷。官益陽時所刻。雜記二卷。鈔撮說部書十餘種而成。略無體例。未足以言撰述。不知何以刻之。續刻文詩各一卷。成于均州。閩能噉名。爲吳綺女夫。當世名流錢謙益而外。皆與結納。尤受知于王士禛。然士禛序其覺古集。稱閩善論史事。今觀集中論史之作。殊少發明。有過李贄墓詩。推許備至。知其辨香所在也。其題宋太宗史後一篇。幾疑宋太宗史爲一書名。不學可哂。詩詞皆有才筆。文則蕪累。唯祭黃虞稷母文。樗齋先生詩鈔序。寄閩賓連書。少足參稽。不知何以早獲盛名。閩自署貴陽。號牂牁生。又自稱黔人。欲合滇黔志而修之。然爲其父七十徵詩文引。序先世甚詳。居歛之江村。爲天一從孫。不知何以入黔。及觀閩稱許虬爲房師。虬官黔。未官江南。乃悟閩以黔籍鄉舉。又閩初姓越。留松閣青蕪詞。刻于康熙十一年壬子。尙署越閩。有吳綺序。稱越而不稱江。初疑一人兩姓。且江與越何關乎。及讀閩哭兄源詩有云。一自嬰多難。卯完巢則毀。必天一之難株連甚廣。故閩父舉室遷江都。與子源同棄諸生。變姓名。閩遂遠游。士禛所謂早歲絕江淮。泛洞庭。南窮夜郎盤瓠之鄉是也。其復江姓。則當在舉鴻博之時。四庫書目嶺南風物記提要云。未審閩實籍何地。而益陽縣志江公德政碑。乃云歛之貴陽人。足資啓顏矣。閩赴解州。卽卒于任。時康熙□□□。別有二十四卷本。當益以解州所刻詩文續集六卷耳。

己未七月廿八日京師地震紀異

四方苦兵革。茲地殊堪喜。造化本至仁。奮怒曷爲起。沙土忽掀騰。跬步迷舉趾。京城十萬家。轉盼無完

壘。震蕩及禁廷。摧殘連堵雉。比隣哭喪亡。狼藉雜犬豕。朱門抱恐怖。何有于賤子。百慮轉爲消。奚遑問祿仕。莊烏歎無歸。寇盜隔西珥。驅命爭斯須。迅雷莫揜耳。蒼茫驚窳窳。無從辨所始。陰氣何驟驟。經旬猶未已。時如攫蛟龍。時如犯虎兕。如乍立危橋。四顧失何倚。如據將崩石。臬兀無生理。如寄水上萍。如身觸荆杞。又如江海覆。洶洶波濤裏。露處無定在。中夜凡幾徙。彷徨不成寐。倉卒拋衣履。眞幸意如何。神京竟若此。通州達三河。城郭盡傾圯。莊堡瓦礫多。所向無不毀。水火更爲災。白骨溝渠委。斃者成丘山。存者愁卵累。恍惚戒終朝。啼號數百里。最憐畿輔地。皇居尤密邇。直疑坤軸折。相顧呼天只。乙巳三月初。郎當未如是。戊申夏六月。齊魯酷相似。甲午震隴西。彌月廢村市。災曾太頻仍。往往傷生齒。全活亦苟延。偷安羨螻螳。鼃足眞可撐。我思女希氏。共工且罷戰。山川奠流峙。我皇敬昊天。下詔重罪己。叮嚀戒三公。痛迫示百揆。率之以乾惕。倣之以臧否。乃出內帑金。急切蘇垂死。已見回天眷。星雲降繁祉。堯湯弭水旱。于今見其比。江辰六文集九

洪 鈇 七峯草堂詩稿六卷

洪鈇。字孝儀。歙人。諸生。撰七峯草堂詩集六卷。曰栩莊小草。爲壬戌康熙二十一年迄甲申四十三年之作。曰北游草。爲丙子三十五年入都鄉試之作。曰黃山游草。作于庚辰三十九年曰黃山續游草。作于甲申。曰梅舫詩。作于己卯。三十八年其詩殊有風骨。廣志詩七律三十首。詞意皆工。自是向上一流。王士禛謂鈇舊鈔唐詩踰萬首。取瑜去

瑕。三百年中詩人之面目盡露。戴名世頗稱其所注杜詩。知于此事用力深矣。此集有王源序。不載居業堂集。而有洪去蕪文集序。謂新安黃自先洪去蕪皆奇人。不得志而以天下爲己任。去蕪錢之兄也。所謂一門之中。自相師友。疑皆奉行顏氏四存之教者。

下河歎

積雨淫淫不肯住。東海黃淮涌濤怒。一從蕩蕩分河流。平野滔滔勢難禦。下河居民目無策。抱木援條保朝夕。側身四望俱狂瀾。眼看生死不盈尺。斷雁橫拖天際空。寒鴟亂叫林邊黑。微茫版屋水底沈。淒涼獨樹烟中立。須臾隄決傾天來。山嶽崩摧聲震嚇。人號犬吠白晝昏。窮檐盡作龍蛇宅。悲哉天地一顛覆。十停八九填溝瀆。秋風颼颼日無痕。落葉蕭蕭新鬼哭。七葉草堂詩稿一

輓開之先生

故國遺喬木。先余六十年。衣冠猶漢晉。杖履棄林泉。耆舊身徂矣。吾宗事渺然。高蹤知尚在。歿世有名傳。

不出門前柳。幽居十六年。巷深人跡靜。苔滿履痕新。見服何曾賦。爲龍詎可馴。謀生有令子。差可以

清貧。七葉草堂詩稿二

江南大水行

地維天柱傾今古。神媧石破何能補。有曰商羊跳且舞。月之從屋以風雨。維時乙亥五月中。晝晦不絕聞

豐隆。天雨如注五十日。人民魚鼈同龍宮。我家新安萬山窟。多有蛟鼉不知伐。巽然破地張頑兇。風涌雷濤屋皆沒。吁嗟我父歸櫬思起墳。殯宮權厝漸江濱。兒身浪跡隔天末。何由展省憂心焚。禮贖三月尙淺土。卒哭而祔作神主。日月有時將葬矣。敢云不封亦不槨。音書千里未得通。一朝忽至心忡忡。傳言水漲剛離尺。風轉波平奠幽宅。城傍松柏垂卑枝。攀援枯涕霑麻衣。七集草堂詩稿二

天津歌

蛟龍鬪天走千里。海水怒飛地中起。江淮河漢生波濤。民爭入魚腹中死。淮徐之民生不樂。洪流到處都成壑。產龜沈窻等閒事。十旬霖雨天爲虐。我行五月別蕪城。昭回雲漢農輟耕。今思草鱸反鄉國。陸沈南北悲郵程。水涌天津忽歎息。欲尋前路杳難得。星月流天水波白。樓船倒影囊烟黑。漁人張網柳樹梢。邊秋鴻雁鳴嗷嗷。網雖得魚人不食。曰余其魚安所逃。滔天昏墊有堯舜。夔龍益稷契禹臯。就中禹稷躬耕稼。至今誰憶八年勞。七集草堂詩稿三

汪樹琪眉洲詩一卷

汪樹琪。字玉依。歙人。世居阮溪。近黃山。家有水香園之勝。樹琪富室少年。獨樂蕭曠。故作眉洲園。撰眉洲詩一卷。生當康熙末季。嘗周旋王士禛陳鵬年之間以爲名。其詩雖未成家。而熟聞先輩議論。清詞麗句。往往亦有可誦者。

歲暮感懷

甘心遜跡絕逢迎。荏苒風光歲又更。毀譽常隨趨世客。煙霞祇護住山情。寒深愛日依欄坐。病起看花出戶行。到處紛紛盡棋局。靜中着眼最分明。眉洲詩

施閔章 施愚山先生學餘文集二十八卷詩集五十卷別集四卷遺集六卷

施閔章。字尙白。號愚山。宣城人。順治六年進士。由刑部主事官湖西道。康熙六年。以裁缺歸。十八年舉博學鴻儒。以卷中有清彝二字。幾被擯。李蔚力爭得列二等。授侍講。轉侍讀。卒于康熙二十二年。年六十六。事具清史列傳文苑傳。及湯斌翰林院侍讀前朝議大夫愚山施公墓誌銘。有施愚山先生學餘文集二十八卷。詩集五十卷。別集四卷。遺集六卷。閔章少從沈壽民問學。深入其室。爲文樸宜說理。動合矩矱。嘗序石臼集及顧與治詩。及編集時。幾盡易之。知其慘淡經營。不自滿假。誌傳之屬。無溢美亦無溢惡。足供稽考。清初詞宗。必詩文並茂。而後可以樹幟。錢吳而後。朱王施宋繼之。朱王學錢。若閔章者。庶幾足以繼響婁東也。宣城詩教。倡自梅堯臣。閔章由之加以變化。章法意境。遂臻絕詣。愁苦之事。皆溫柔敦厚以出之。尤工五言。王士禛爲作摘句圖。載于池北偶談。順康間。好事能主持風雅者。推周亮工龔鼎孳。士多歸之。閔章後起。而收恤寒賤。得士與埒。爲世所稱。然人不同科。即詩文靜躁。亦當有別矣。

上留田行

傷婦死于兵也

里中有啼兒。聲聲呼阿母。母死血滯衣。猶銜懷中乳。愚山先生詩集二

皇天篇

憫飢民也。都城外數百里。積糞成壑。民匍匐轉徙。時逃入法重。州邑閉關不敢納。死者相枕。哀聲動天地。故爲之驚天云爾。

皇天眷萬物。雨師寧不然。神州葢穀地。高阜成山川。蕭條何所有。飢獸竄頽垣。嚴冬邊雪至。朔吹先苦寒。分與藜藿絕。敵繼復不完。遺黎伏路側。聲出不能言。矯首望樂土。重關限我前。眼前一步地。艱於太行山。逝者葬魚腹。生爲豺狼餐。嗷嗷澤中雁。飛飛雲漢間。飲啄雖失所。天地何其寬。感物一撫膺。淚下如奔湍。愚山先生詩集四

仙霞嶺見閩婦北行者

故鄉南水去。薄命北隨人。辭家遠萬里。附書無六親。誰憐眼中淚。濕盡嶺頭塵。愚山先生詩集九

海民篇

飛蓬思故根。遷人思故里。道傍乞食兒。海濱千金子。家世饒田園。佃漁給驅使。暮操舟出浦。朝負魚入市。金盤列海錯。被服紛紈綺。廟算清海疆。編戶悉內徙。骨肉各奔散。徒步棄行李。長風吹四野。日暮無宿止。蒙袂蓋叩門。接踵吞聲死。生時背丘墓。歸魂戀桑梓。何如委白骨。東流葬海水。愚山先生詩集九

贈陸侍御紀事

君在順治十七年。以御史抗疏指斥權戚諸王貝勒大臣。上知其忠直。召見南苑。稍出爲冀寧觀察。且命內大臣溫體有。加御史刻有聖恩錄。余讀而喜之。

誰能張寸舌。長號排九關。誰能捋虎鬚。攘臂拔本根。矯矯陸侍御。亮節何奮騰。鳴爲阿閣鳳。搏作北溟

鷓。埋輪已都下。抗章驚至尊。天潢資彈射。百僚安足論。翠華駐南苑。羽衛森雲屯。召見識名字。咫尺天威存。御榻顧之笑。汝舌不可捫。柏府雖暫遠。慰諭王言溫。汝實骨鯁臣。垂翅毋聲吞。優容略忌諱。曲折昭殊恩。驅馬且西去。回夢猶畫門。鼎湖龍忽逝。攀髯餘淚痕。到今朱檻折。旌直古所敦。愚山先生詩集十四

案此爲陸光祖賦。其事不見記載。是時入旗勳賞。與世祖之爭甚烈。陸事亦其一證。

高詠 遺山詩四卷

高詠。字阮懷。宣城人。諸生。屢試不第。年近六十。始貢太學。爲徐元文家塾師。未幾。舉鴻博。授檢討。旋祈假歸卒。事具清史列傳文苑傳。詠爲詩多清微澹遠之作。與施閏章齊名。號宣城體。清初稱滿洲爲金。唯汪琬翁類稿及詠集有之。詠通籍後所作。非頌聖即貢諛。連篇屢牘。讀之生厭。蓋懼以文字獲咎。不惜宛轉隨人。既乏情性。復失詩旨。清初文士往往如此。不獨詠也。所爲遺山堂集。不傳。王相得舊鈔本。汰爲遺山詩四卷。

感時

四方豺虎盡縱橫。落魄乾坤一腐生。悲似杜陵難臥蜀。才如王粲恥依荆。持餐餉客嫌麤糲。懷刺投人厭姓名。但使太平身獨散。東臯斗酒自爲傾。遺山詩一

悼廣陵女子

金人南下被執。題詩盤間赴水死。

無復黃金贖蔡姬。誰從青塚弔明妃。傷心廿四橋邊水。環珮依然月下歸。遠山詩一

案此所謂金人。即指滿洲。

梅 清 天延閣前後集二十六卷

梅清。字淵公。宣城人。順治十一年鄉舉。卒于康熙三十六年。年七十五。此集爲天延閣刪後詩。曰擬古樂府。曰稼園。曰新田。曰燕征。曰宛東。曰休夏。曰驅塵集。曰越游。曰連琴。曰寒江。曰歸舟。曰岳雲。曰梅花溪上集。曰雪廬偶存草。曰菊間集。凡十五卷。大抵崇禎十五年壬午至康熙十三年甲寅之詩。附敬亭唱和集一卷。續集曰天延閣後集十一卷。自甲寅至丙寅康熙二十五年之詩。附贈言集四卷後。又合丙寅以後之詩編爲瞿山詩略三十三卷。今未見。其詩清逸可誦。以與施閏章並稱。則嫌根柢未厚。性愛丘山。以書畫自娛。尤擅墨梅。然十上春官。僕僕風塵。乃託爲游蹤所尙。無乃隱顯同科。喧寂齊視者乎。早預社事。頗富聲名。觀其附刻唱和贈言二集。知啾名之心。至老不衰矣。宣城梅氏。代有文采。清年少輩尊。同時諸梅有稱譽者。若磊。若庚。若錫。若文鼎。皆其從孫行。磊字杓司。尤有盛名。撰響山集。閩章稱磊伴狂。喜觸忌諱。不敢爲之作序。其人蓋遺老也。惜集不傳。文鼎亦不求仕。

重過秦淮竹枝詞

當年大內一何存。半入蘼蕪半菜園。獨有靈和枯柳在。幾聲鴉語伴黃昏。

會聞故府大功坊。雜遝叢中下馬忙。此日王孫何處所。伶仃孤影逐牛羊。

兒時午日甲申前。甲午來游又一年。兩度鼓聲俱在耳。可容還上太平船。天延閣後集六

梅文鼎續學堂文鈔六卷詩鈔四卷

梅文鼎。字定九。宣城人。曆算之學。當代第一。著書甚多。有續學堂文鈔六卷。詩四卷。卒于康熙六十年。年八十九。事具清史列傳儒林傳。當南都之覆。已成童矣。織田爲之父。觀湖爲之師。皆逸民也。所友爲王源卓任周燾諸人。皆負經濟才。欲有所爲者。故文鼎出游結交。殆不爲噉名。洎玄黃已判。天下大定。然後以曆算爲專門名家之學。而以其鬱勃之懷。高尚之志。一寓之于詩與文。世乃稱其璀璨玉衡賦。工麗過于鴻博諸君。曹溶亦稱其能詩。文鼎不任受也。然舍是更無以識文鼎之心。毛際可方苞何足以知文鼎。讀其所撰傳及墓表。令人抑塞。

金陵雜詩

宮殿樓臺廢作營。却嫌高屋礙行旌。名材總付牛車盡。飯甌蕭條野草生。續學堂詩鈔

案此詩作于康熙十年。明故宮即毀于是時。

贈劉望之先輩

遷移國是焚。勢激羣情怒。公戰怯危疆。私闢先門戶。吾鄉獨聘君。中立無攀附。尙志薄青紫。力學恥章

句。忠孝懷古誼。草茅關世務。論兵捫蠱譚。石畫出暇豫。公卿爭折節。廟算借前箸。修攘諧幾宜。小試資防禦。尤精昭代典。六官存掌故。識大有成書。列朝詳考據。子舍依舊京。編纂侍朝暮。手彙落人間。闡誦靡缺誤。年來史局開。鴻博盛辭賦。豈不寬網羅。何時舉撰著。君移侍講書。深衷托毫素。匪紆局外籌。實切裏讖懼。作史十難并。一一披情懷。紀載裨因革。憂時更遠慮。遺編滋抱痛。金門仍却步。憶昨游燕薊。曆志謬參預。巨艦涉洪濤。聊爾一篙助。良朋數甬東。多識亦韋步。安能集兩長。腹筒徵參互。傳聞酌信疑。虛公獨黨護。大義明千秋。衆論衷平恕。徽猷藉表揚。瀚雪慰呼籲。寧惟先德光。文成殆其庶。吾友寧波萬季野。

熱于有明三百年掌故。積學堂爲今史局諸公所資。時鈔三

案此詩作于康熙三十三年。本集有與劉望之書。自謂不喜風雲月露之文。而願好經濟有爲之學。有真義會與義館之願。欲望之共事。集同志講授。倣蘇湖規制。于經義之餘。兼綜庶務。又有次吳街南園。送劉望之歸百泉詩。自注。吾鄉劉望之精史學。僑居中州四十年不返。今忽旋里。仍以家累子身北去。己未庚申間。史局初開。予曾寓書施愚山侍講。言作史必資考訂。宜迎望之以備諮詢。望之亦答愚山書數千言。具言明史事宜。惜浮沈未達。文鼎推望之經濟史學甚至。吳肅公以史事自負。撰皇明通識百有二卷。而與望之交好。其人必有過人者。著述不傳。名字亦不爲人所知。惜哉。夏峯年譜。有門人劉釋祖。未知卽其人否。待考。

袁啓旭 轡下和鳴集

袁啓旭。字士旦。宣城人。諸生。入太學試不遇。喜游覽。詩足以發之。爲宋實穎所稱。著有中江紀年稿。

太湖漁船歌

太湖漁船天下無。高桅六道開烟蒲。白浪掀天黑風惡。撒網張帆始快樂。一網張來直萬錢。銀鱗潑刺高於天。漁婦單衫七寸袖。朱顏雲鬢銀釵溜。風中梳洗月中眠。兒女滿船不記年。今朝賣得魚多少。爲儂買繒製寒襖。羣下和鳴集

巫之巒 盱游卮筆一卷

巫之巒。字巒穉。號癡全。當塗人。以舉人謁選南康推官。終孝感知縣。頗負一時才名。撰盱游卮筆一卷。罷南康後。游麻姑山而作。雖篇章無幾。而蘊藉有致。唯無序跋。不得其年。詩中有媿曾信州官。緣何亦昭武句。清史文苑傳黎士弘傳。授江西廣信推官。裁缺改永新知縣。託素齋文集永新試牘序。欽邑三載辛亥康熙十年冬量移去。之巒過臨川。適遇士弘自廣信入省。時當在康熙七年秋。是集即作于此時也。之巒有梅影樓詩集文集。見蔡書書目。今未見。

遊從姑山

拳石孤撐衆阜中。自開生面闢蠶叢。懸崖深蔽一庭瀑。雙峽平分獨壑風。絕壁飛橋疑好事。危陂碁石信天工。憑虛忽動滄桑感。禾黍油油半故宮。盱游卮筆

張扶翼望山堂文集四卷詩集六卷志論二卷

張扶翼。字容圃。霍丘人。撰望山堂文集四卷。詩集六卷。志論二卷。皆康熙元年至八年。官湖南辰州府黔陽知縣時所刻。扶翼文不拘繩墨。而能暢所欲言。詩頗有氣格。其人有吏才。所言皆關民事。謂驛後城中茅屋三十餘戶。後漸增十倍許。衙署廟宇書院次第營建。不費民力。皆出捐俸。時兵事未息。西征凱旋。吳三桂家口入滇。皆需夫役。而郝劉李馬盤據西山。康熙二年。朝命三大帥統滿漢川陝河湖四省兵。三路進攻。所謂西山之役。議用背夫十五萬。匠役萬。皆取之湖廣。黔陽應出夫役七八運近數千人。扶翼倍給其值。民無怨。亦無逃者。人皆以爲難能。武岡淑浦諸瑤屢挾仇自相攻擾。時議大舉用兵。扶翼力持不可。竟單騎撫定羅翁之瑤。集中上兵憲五書是也。陳五典爲之撰撫瑤紀略載于耆獻類徵。稍足以見扶翼行事。其文集有光緒十二年黔陽黃忠浩重刻本。稱扶翼有治績。迄今百餘年。人猶誦思之。因求得文集。商之湘潭羅順恂。稍易其集中題之未安者。舊有評語無當事實者節之。編次則悉仍其舊。今按重刻本多紀與邊老人語。與陳麻陽書。書蘇明允項籍論後。墨梅說。送陳子賓廷四文。蓋後有增益也。

築川城

甲辰小暑月。大雨旬如注。屹屹沅州城。浸淫倒回互。蕩我關外廬。鱗鱗雜魚鮒。莊莊谿谷苗。漂泊旅風雨。何當築城夫。嚴檄限晨暮。青青蒨樹藂。淙淙河漢渡。所轄既遼邈。追攝苦無路。西山尙阻兵。夫役動

盈數。寧驅懷中兒。敢干上官怒。河伯已不仁。兩師抑何靈。墮我新築城。不顧民力具。強言慰父老。努力事奔赴。亦知民命殘。都邑須完聚。我有分身術。會與子偕作。望山堂詩集一

許登逢 青笠山房詩鈔五卷文鈔六卷

許登逢。字聽菴。舒城貢生。選江陰學官。以年近七十不就。嘗從潘江游。著青笠山房詩鈔五卷。文鈔六卷。詩文率直。通會樓晚眺句云。不須往事從頭憶。自注辛卯予曾以急徵過此。變態云。變態想非非。偏教與願違。煩冤羅落日。啼蹟慘春暉。別矣何緣別。歸歎那易歸。可憐懷舐犢。空有淚頻揮。了不知何事。催車忽向東。傷心千古獨。蹇運六人同。塵面融飛雨。茸裘戰逆風。餘生無不可。慵復問天公。蓋六人同。速。不知何事也。辛卯爲康熙五十年。方大與南山集之獄。方氏一門就逮。登逢母出自方。必以此牽連。然諸方皆隸旗下。雍正元年始赦歸。登逢之歸。在康熙五十七年。處分又復不同。未得當時愛書。莫能詳究矣。

泌令劉子又臺以才能被憲檄委運軍儲西至蔡漢搜爾出塞幾四千里歸過京師爲子

續述所歷

市易集紛紛。一城僅如斗。邊人以茶布易羊馬。俱集歸化城。知是古豐州。曾經百戰後。居人若鱗次。時平亦已久。憑弔意未已。忽入青山口。巖巒不知數。蒼松徧其首。上有白雲浮。下有長溪走。遙聞伐木聲。丁丁出翠阜。京洛風取

于此山。此間良可畫。誰擅丹青手。青笠山房詩鈔二

趙吉士 林臥遙集三卷

趙吉士。字恆夫。休寧人。順治八年舉人。官山西交城知縣。行取戶部主事。擢戶科給事中。康熙二十七年以勘河不稱旨罷。所居寄園。在下斜街。極花木樓臺之盛。復營西山蓼莊。往來其間。所與游者。皆一時俊侶。吉士有萬青閣全集八卷行世。林臥遙集三卷。則全集之一。起于三十年辛未迄于三十五年丙子。林居嘯歌凡一千三百六十七首。同于工部一生篇什之數。往復疊韻。故曰疊韻千律。詩分上下二卷。後又成詩五百餘首。題曰千疊餘波。自為一卷。合為林臥遙集三卷。

家閔仙太常謫遼手札偶自北至感賦

香城分手兩年餘。己巳王正。別閔仙于南西門外趙公菴。雪窖冰天絕塞居。公鷹預催千里駕。四家斷送一函書。閔仙與馬鹿兩侍御高耶中同時出關爾今殿譴貧兼病。我久屏居嬾復疎。長日閉門浪餽飪。可曾飽吃混同魚。林臥遙集上

江銘勳 粵遊小草

江銘勳。字□□。休寧人。撰粵游小草。為順治中入粵紀游之作。其詩有才情。時露桑滄之感。拜文丞相墓。兼懷漳浦前聲詩。蓋指黃道周也。不著其名。已有所諱矣。程守序中稱先侍御。或江東之子也。

舟過文丞相墓有懷漳浦前輩

丞相祠前聽子規。還傳故里北山陂。作歌就市猶如在。拔纛檻車每若斯。紅塔忽來知有屬。黃冠縱返究何爲。停舟不盡興亡感。今古難堪落照時。粵遊小草

蜀俘婦馬氏有色藝陳子仲獻客蜀憐而贖之還其故夫同人爲賦完鏡追和以志美焉

古釵既墮不知主。寶鏡一破歸何處。蓬飛沙暗風亂鳴。旌旗畫掩高天去。李娃隕涕傷無家。蔡姬旋軫拍短笳。紅顏飄泊凡幾許。幾有白璧無纖瑕。軍中上客天下才。邂逅嬋娟驚且哀。南金一贖無餘囊。宛宛秋月出塵埃。君不見。譚笑青油推小杜。十年夢繞邗江滸。又不見。將軍揖客握錐郎。醉臥詩成樓上牀。明珠尺玉何難抵。獨有傾城耽莫比。岷峨山下羞見君。多君高與岷峨似。粵遊小草

汪森小方壺存稿十八卷

汪森。字晉賢。號碧巢。休寧人。居于桐鄉。迎周質至家。從之學詩。因得交兩浙名士。選刻視昔編。築桐谿草堂。以擬玉山。然質未嘗以文辭假借之。又與王玠右周旋。禮之如賓。後官桂林通判。遷太平。擢知鄭州。未赴。以憂歸。撰小方壺存稿十八卷。爲古體四卷。今體十一卷。填詞三卷。載詩止于康熙四十年。集當刻于此時。詩未成家。而時有合作。高涼雜興五十首。紀山川風土人情物產甚備。辭亦侷儻。風人之所必采矣。

宿田家卽事

客行阡陌間。藝植多桑麻。老翁有田舍。門外谿流斜。風吹楊柳樹。日暮聞啼鴉。借宿不我辭。鄰沽近可賒。爲言少壯時。微尙亦堪誇。衣食頗饒足。而不競紛華。何知糴格闕。烽火從三巴。羽騎日奔突。饋餉無停車。健兒負弓箭。雜沓鳴悲笳。生理不得遂。田疇半泥沙。大男從軍去。生死天一涯。小男闕租賦。時苦刑罰加。園中李結實。纍纍皆如瓜。夙昔聞童謠。黎庶徵無家。我老未卽死。永夕空咨嗟。聞此不成寐。披衣待晨霞。臨別問何適。戰地黃雲遮。孤舟得垂釣。出沒蒼蒹葭。小方壺存稿一

應州銀礦歌

聞邸報云山西大同府應州。有山中裂。乃是銀礦。從高望下。纍纍如簞。或可濟斯民之困。喜而作歌。

晉中舊是冀州地。形勝險固多良騎。桐圭弱弟啓唐封。表裏山河稱特異。吾聞世運當休隆。天子垂裳萬國通。丹鳳來儀玉麟見。負圖龍馬當河中。苟非盛德常修省。治道一失虞災眚。旱潦饑荒歲屢仍。山川震陷時交警。與朝敷治三十年。四境倏忽生烽燧。帝念黷兵非得已。招安撫集恩猶偏。勢同騎虎不得下。紛紛格鬪何爲者。坐使瘡痕骨髓枯。飛芻挽粟難停罷。應州山石高嶙峋。劃然開裂呈礦銀。大者如拳小如粟。燦巨耀日光華新。軍與此日需方急。戡亂持危在呼吸。天人感格誠須臾。動地歡聲遠相及。君不見。崑山之壁合浦珠。饑難作食寒難襦。又不見。鄧氏銅山郭金穴。保聚區區良易竭。何如盛代德澤長。天不愛寶地獻祥。料得濺恩深雨露。捐租更免今年賦。小方壺存稿一

自濡須至維揚回舟取道吳江見水潦瀰野感賦

辭親遠行游。言截大江北。波濤千里間。勝情飽所得。爰解濡須裝。親申共遊息。維時春夏交。經月雨如織。一望空瀰濛。川原莫辨識。茲邦田事蚤。十戶九稼穡。實恐決隄防。顛沛從此卽。回艫道維揚。洪水正泛溢。土人相告言。七載失種植。往往鬻男女。至今尙艱食。念此實可傷。中心罔不盡。側聞南北分。高下各異域。平原爲沃壤。汗下稱水國。所賴風雨時。猶可用農力。那知天降災。曾不問晷刻。雷霆怒未止。陰雲尙昏黑。斯民困已深。斯害曷有極。轉徙成餓殍。淚下幾能拭。惟昔聖王世。水早有仁術。免賦與蠲租。賑恤每孔亟。運代有遷移。人情如鬼蜮。茲焉罹凶荒。於理亦云適。奈復遭流離。四海半兵革。饑寒久迫身。鮮有不爲賊。所冀天意回。早布好生德。小方盤存稿一

程瑞訪 槐江詩鈔四卷

程瑞訪。字姬田。休寧人。內閣中書。卒于康熙五十八年。年五十四。事具汪由敦所撰墓志。瑞訪有槐江詩鈔四卷。約自康熙三十五年甲戌至五十八年己亥之詩。皆紀遊迹。家居日少。僕僕南北登臨懷古之作。善使議論。松爲所喜。每見篇章。京師封氏園古松。尤數數及之。足見襟抱。少受知杜濬。遍交當時名士。詩亦刻意求工。俊快處亦自可喜。

觀象臺儀器歌

九衢終日雜塵埃。欲超雲外窮俯仰。共指東南有古臺。峻嶒入雲高百丈。上陳法物自歷朝。措眼摩挲頻鑑賞。范金爲器殊陸離。體製非一費遐想。容成造自有熊時。測驗以此觀天象。馮相保章不可作。周髀宣夜猶可做。銅龍高架渾天儀。按此推步愁恟怳。天度不與汴梁同。銅駝荆棘堪慨慷。太史郭公術最精。簡儀新製勝疇曩。窮高何計候中星。玉衡直窺如指掌。團圓有物肖天形。銅球一具不須兩。匱方象地可函之。旁鏤列宿何朗朗。周天度數遠難稽。量天有尺不差移。劉時孔吳宗韓解祖述下。捧負不失神扶持。北面有室上穴頂。日中留此測春曦。其餘儀表難辨識。立運玲瓏皆儀名安可知。銅壺滴漏另安放。闕几景符皆儀名無缺遺。測天之儀十三等。咄哉陋儒徒管窺。星辰躔舍不能遁。盈虛消息辨以時。吁嗟乎。天體圓穹孰可測。前人制器能辨識。以圓求圓用仰儀。欲定天樞須候極。儀名槐江詩

海陵水災紀事

汎濫來何速。千村一夜浮。田廬烟水裏。魚鱉土城頭。野哭朝朝慘。年荒事事愁。流亡驚滿眼。不獨是揚

州。

槐江詩
鈔三

案此康熙五十一年事。

淮南秋日聞鄉人述宣歙水災用少陵三川觀水漲韻紀之

宣州與歙州。崇山間平陸。淫雨激狂波。白浪迷谿谷。天海倏混茫。那暇展遊目。近火類先焦。下者傷窮蹙。何地可逃生。洪濤萬山曲。窮猿齊奔林。古木高崖踣。人命輕鴻毛。不及豕與鹿。山溪多橋梁。津口屍

填塞。廬舍隨波神。洞燒一何速。茫茫稱禹甸。瞬息成四瀆。吁嗟千萬村。浪裡恣翻覆。兆庶變爲魚。口黃與髮禿。羣驚天吳駭。似欲迴地軸。百里斷人烟。從何謀止宿。雞犬杳不聞。村空但鬼哭。無劍斬蛟鼉。積怒千年蓄。不見亭午時。陰風愁怨曠。海若殊曠官。河伯忘約束。捉足一微塵。坤元何太踣。聞此淚交流。舉趾驚縮縮。宜歛萬千人。同時葬魚腹。回思七尺身。進退遜黃鵠。六月廿五夜。驟雨忽來。明晨。廬舍湮沒無數。休編數千人。郡河西漁梁一帶人民烟舍。夜半間墮浪去。績溪村落亦淹千餘人。下至旌陽太平。罹災不減新安。黃山源內相傳出蛟。沿河沈而涇邑爲尤甚。至有數百家烟燼。無一人存者。嗚呼。宜歛之民。自開闢未罹此酷也。聞鄉人言。讖之如此。 魏江詩 鈔四

案此康熙五十七年事。

黃文彪 香雪居詩草一卷

黃文彪。字炳仲。號弼中。休寧人。貢生。卒于乾隆六年辛酉。年六十。事具沈德潛所撰歲貢生黃君墓表。撰香雪居詩草一卷。文彪不得志于有司。以商賈起家。樂九峯三泖之勝。遂移家焉。賦性恬澹。慕淵明之爲人。故多閒適之作。詩筆清絕。尤善寫景。夙工繪事。摹四王能得其趣。黃山諸詩。皆有畫境。令人如置身雲海中。亦畸人也。

松蘿舊刹西廂有樓十二爲金太史讀書處古址猶存不勝感愴

舊寺荒殘新寺留。變遷人事不勝愁。空傳虎嘯三千界。不見仙歸十二樓。丈六金身猶露宿。一雙丹桂獨悲秋。老僧閒說前朝事。太史名高文謝儔。香雪居詩草

余光耿 一溉堂詩集

余光耿。字介遵。一字觀文。婺源人。祖懋衡。東林眉目。官吏部侍郎。忤璫削奪。明史有傳。父維樞。入清官兵部主事。光耿少孤家落。久困場屋。康熙四十四年。鄉舉榜發即卒。年五十五。事具縣志。撰一溉堂詩集。四庫存目有此集。謂懋衡之子。又疑其年歲不相及。蓋未一譚其集也。詩自庚午康熙二十九年迄甲申康熙四十四年或身後所刻。詩格老成。不矜才使氣。亦無敗筆。自適其適。不與當世名流往還酬唱。聲名所以未盛。

庚午武林晤黃廉遠自餘姚來出其令伯梨洲先生詩曆見示且言先生垂念寒好意殊

懇篤因賦長歌爲贈并呈梨洲先生即用詩曆中葉訥菴太史送董在中原韻

桐梢露未晞。劍啄聲滿門。良友感契闊。觸熱背鄉園。授我南雷詩。蠶測見淵源。鞭心追大雅。砭俗破厓言。有如衝燭龍。吐燄照羣昏。煌煌一弓中。目擊道已存。閱予負陋質。詩書好徒敦。總角失庭訓。縹緲廢討論。冉冉歲月徂。無媒近帝閣。頻年逼飢驅。長路苦崩奔。斷梗委中衢。愴惻念本根。今也冬胡萎。昔也春胡溫。今也賤如土。昔也貴如璫。眷言先太宰。聲價重三君。狂瀾手自障。排奸舌忍捫。感時憂天傾。屹立等崑崙。激彼節甫怒。蔽日盪妖雲。含沙射人影。鬼蜮毒無垠。君家忠端公。批鱗慷慨陳。元黃戰屢交。涇渭溷不分。生嘆同文館。羅織獄紛紛。處堂巢既覆。大廈棟亦焚。至今兩家裔。譚虎尙逡巡。偉哉梨洲翁。薪火傳其真。才名動黼座。獻策薄河汾。閑情戀山水。老癖寄典墳。忠門有孝子。吾道誦功臣。經師與

人師。四海歸一身。況聞在留都。文酒集嘉賓。金甌正全盛。鐵鎖未沈淪。當時交吾父。情好日以殷。倏忽改滄桑。筐篋隔仗纜。頃者聞君言。念舊意猶勤。賤子何敢當。庶幾慰亡親。從此羹牆夢。長繞姚江濱。

一慨堂詩集

後白鹿山房歌

壽春庵是青藤草表處。龔余曾為作歌。頃與侶杯來遊。山僧因言謂於少保而斃之者。即此庵僧也。因再成此篇。

青藤山人氣崖粵。筆搖光怪壓臺閣。有才無命老風塵。日逐齋魚飽飢飢。山僧不識人中龍。雷霆激怒吼晴空。血肉淋漓澆堦阨。遊魂悔惜碧紗籠。睡毗蒂芥固區區。豕立人啼鬼亦愚。劍樹刀山同幻泡。生死況與才人俱。試看西風過客弔青藤。何人不問杖斃僧。一慨堂詩集

章永祚 南湖集鈔十二卷

章永祚。字錫九。貴池人。康熙二十年舉人。五十年截取陝西清澗知縣。民多逃亡。荒田賦無所出。永祚為定令耕種納糧。五年以外不歸原主。額魯特軍興。永祚解駝得敍。六十一年行取。雍正二年補工部都水司主事。逾年乞養歸。著南湖集鈔十二卷。凡文八卷。詩原為八卷。今存四卷。至清季始刊行。其文多切實政。如原內務府。原馬田。原條糧畫一。清澗招迷贖地議。皆可供史事佐證。傳志之文。尤有關係。神虎說。書軼事。仙技雜傳。足備舊聞。代廉親王讓宅。及辭輔政二疏。或曾為胤禩賓客。乞歸當以此歟。詩多及時事。有詠點燈子過天星二首。點燈子為趙四兒。以撰黃巢傳。遭名捕。遂以六千人起兵。後戰死。過天

星爲惠登相。後降于左良玉。二人皆清澗士人。可補史闕也。

採茶謠

杉山僧人生計拙。賣茶易穀望茶苗。山多田少茶滿山。雨前雨後盈筐擷。計茶可得二萬觔。兩寺十庵焙具設。苦道今年茶歉收。春芽盡萎春霜雪。而今盼得子芽生。十石已是五石抑。焙茶簇到山下人。觔售四兩心猶缺。況復溼雨不能采。十百爲羣坐啖噉。甌中糧絕茶又長。以此輾轉愁腸結。我來山中二日晴。七日之雨若河決。物力艱難僧俗同。天意摧殘那可說。相對歎歎自不禁。檐前雨驟風聲颯。南湖集 鈔九

野油菜歌

西峰杉山之神釋。山中到處標靈跡。軼事怪誕殊不經。野老至今猶藉藉。翻身頭觸三靈湫。井中木自出真州。水蛭偏今栖樹杪。叱豬成石塞溪流。耳食之談十居九。目所未見皆否否。遺下西峰野油菜。此物世間真罕有。山寒四月小收遲。野菜結角正離離。聞師握手撒且祝。何須人力播種爲。至今樂利僧安享。一炬焚山去榛莽。非其種者勸去之。麥秋只辦腰鎌往。西峰神通亦幻哉。余今日擊奚疑猜。安得此術徧九垓。直令原野無蒿菜。南湖集 鈔九

景德鎮觀瓷密歌

朝夕羹煖食在口。朝夕羹煖斃在手。於今乃向景德遊。饒瓷之製親見取。乳鉢家家研浙青。白泥近出祁門樓。七十二番始成器。坯房相接密於藪。燒密即在闌闌間。密烟如墨迷高柳。畫工之筆僅纖毫。受直亦

復分妍醜。鑲金滴翠新式多。本朝薨在宣成右。上者進御次通洋。扶桑若木航之走。旁有老叟前致詞。審戶之苦君知否。往者閩賊縱掠時。倉皇殺戮絕雞狗。後來欽差監御窖。驛驢連歲苦黔首。近者守土少循良。官價取薨例已久。十金便索百金薨。交薨稍緩遭杖梏。去年罷市且三日。審戶十或逃八九。我聞苛政猛虎如。歎息無言對老叟。南湖集 鈔十

飢民謠

客行兗州道。飢民何纍纍。欲語氣難續。勉向客致詞。五年遭大滂。麥黍化爲泥。草木嚙已盡。榆柳皆無皮。石米賣妻室。斗米賣孀兒。豈無骨肉痛。苟且飽一時。側聞青萊境。屠人同性讎。此間尙不爾。但割死人肌。天子重愍悼。丁糧悉蠲之。大發常平粟。計口授朝糜。賂賣亦官贖。護送返舊居。近且留漕艘。減糧惠災黎。內帑數百萬。不惜安流離。買牛復給種。兼爲營茅茨。遣官分監視。此輩多旂斨。恆酣達晝夜。願我陸危。侵漁入己囊。公然相爲欺。敢怒不敢言。庭羸恐遭笞。時艱余蒿目。聞此心酸悲。惜哉聖主恩。不能及子遺。南湖集 鈔十

由蕪湖舟行至高淳被水災黎慘難寓目遂成長歌

東壩逼水水西走。西走直達蕪湖口。就中圩田盡膏腴。風搖穰穰盈秋畝。今年水災災異常。連旬淫雨如傾甌。江湖倒灌山漲奔。到處圩田十破九。圩堤田沈廬亦漂。田廬捲盡復何有。一綫長隄約略存。兩邊惟賸參天柳。無家且向隄頭棲。茅葦撐持接鄰偶。敗棺撈厝所居旁。更雜牛羊與猪狗。炊烟常斷甌無

儲。鵝面鳩形真覺醜。劫商昨被官長擊。若輩兇徒皆擊杵。飢民無計捕魚蝦。捕得魚蝦換升斗。向苦水
滂無田廬。預愁水涸魚難取。先朝萬曆被此災。於今一百三十年久。陽窮百六數使然。蒼天何意困黔首。

南湖集
鈔十一

剝樓謠

剝盡樓枝皮。樓根亦傷夷。傷根那復惜。上借入京師。里正列前列。縣胥向後隨。嗚嗚誓不止。云逾官限
期。東區剝樓惡。西區交樓遲。南區秤量短。公堂俱遭笞。虎狼啖酒食。仍索錢物持。勸君莫種樓。剝樓如

劍肌。南湖集
鈔十一

催糧行

連朝飛檄皆插羽。立促軍精實軍府。春貸倉糧又要完。背負驢馱入官庾。積雪堅冰載道途。衝寒跋涉多
藍縷。縱道今年大有年。家家未必饒紅腐。剝肉醫創困已空。何緣脫免追呼苦。撫字心勞勢轉窮。左支右
絀慙無補。安得天雨粟紛紛。了茲逋欠蘇編戶。抽函朗誦春陵篇。有司掣肘良自古。南湖集
鈔十二

鄧旭林屋詩集九卷

鄧旭。字元昭。壽州人。順治四年進士。由庶吉士授檢討。外轉洮岷道副使。罷官歸。家于江寧。買城西萬
竹園居之。有大朝松石之勝。遂爲江寧人。卒于康熙二十二年。年七十五。撰林屋詩集九卷。詩學唐人。

不事塗抹。亦不作頽唐語。古體尤奇放。半生蹤迹。多在山水間。莫釐九華廬。山華山衡山皆屢有題詠。不啻一部游記也。

東湖寺天祐大師以副總戎棄職披雍知余結茅歸隱雅有同志遂由西灣過東灣導余

看嚴氏山居留別

老將拋金冑。棲心投子山。千峯間白日。一衲駐蒼顏。南北嶺頭判。東西水面灣。遠公蓮社近。好與看雲

還。林屋詩集四

劉凡 清芬閣詩四卷

劉凡。字元歎。壽州人。康熙十五年進士。官河陽知縣。行取入爲部曹。四十年出爲秦邊道。罷歸。五十六年。罰修密雲縣城。康熙時。每有此役。以苦臚仕。然亦有不盡富厚者。故凡晚年之作。意酸辭苦。少與其弟志昂志豈志岑皆受業于計東。故其學有本。爲詩力求不凡。雕琢而不失渾淪。無一懈筆。自是作手。所撰清芬閣詩四卷。曰山泉存稿。岫餘存稿。于役存稿。

元臣郭守敬規引黃河溉溫孟田數萬畝因同主簿王君西至野戍潘岳祠相勢

黃河天上水。飢建下驚濤。共舉如雲鍾。分流作雨膏。觀成思往事。慮始在吾曹。莫效潘懷縣。悠悠歎二

毛。清芬閣詩岫餘存稿

龍東溟家看試燈雜歌

丁男粉墨懸腰鼓。柘槌雙揮如白雨。風鬢霧髻繡裙襦。燕姬越女年十五。戴笠漁婦更儵妍。村嫗大扇衣裳古。不知此戲起何年。流傳元夜燈前舞。或以傴僂勸勤動。或以嗚嗚報田祖。至今歌唱近華筵。膏粱方見農家苦。媿我坐深罰亦多。殷勤翠袖杯撐拄。客愁一醉散春烟。清芬閣詩于役存稿

李煜繡虎軒集十二卷

李煜本姓曹。字亮采。號凝菴。下邳人。本金沙人。順治十四年舉人。官太倉州學正。唐孫華吳暉皆出其門。撰繡虎軒集十二卷。詩文皆不入格。煜嘗刻繡虎軒尺牘行世。蓋亦徵逐聲氣者也。

烏船行

滇池妖雲乘風起。東川西川流黑水。長沙岳陽作戰場。三年流血憂天子。將軍畫策上書來。洞庭指日消烟燄。却用烏船四十隻。衝風破浪摧枯莖。天子色喜下部議。誰敢抗言撓軍計。天下大計天下同。獨作江南一省事。勒限森森八月中。不賞之費將何功。官紳捐助好名色。萬戶均攤聊通融。通融議就取大木。尋遍山巔與水濱。催夫催匠向江邊。日夜斧斤風雨速。速如風雨夫匠難。夜眠濕土晝無煖。烈烈酷日炎如火。死亡纍纍漫江干。只今纜成二十隻。民間膏髓亦已竭。何時皇天雙眼開。憐我江南苦獨絕。神功鬼斧助船成。萬里長風波浪平。一戰克捷報天子。萬古千秋不用兵。繡虎軒集五

程鑾 只拙齋詩鈔七卷

程鑾。字真江。號士坡。安東人。家于江都。康熙四十三年以工部虞衡司主事。擢浙江糧儲道。賜予駢繁。疑是內府賈辦商人。後三年罷官。甲午康熙五十年入都。己亥康熙五十八年南歸。十餘年間。撰只拙齋詩鈔。爲江淮集武林集京華上中下集己亥集留情集各一卷。其詩略有筆致。殊少淳澗。是時爲詩競尙尖新而乏唱歎之致。鑾在時流中尙非其至者。讀漁洋集乃曰自思述作無多讓。何其自負。先刻有岑樓詩鈔。未見。

祭耒

田家勤力作。必先戒田器。既備復告神。田疇賴以易。天地不愛寶。願有不穫穰。爲語持耒人。勞勞識此

意。只拙齋詩鈔三

鬪鶴鶉

長安市上多少年。青絲絡馬披錦鞵。紛紛游俠誇輕蹇。花燈縱博酒家眠。更愛入冬鶉懸市。滿城把弄無空拳。錦囊繡袋腰下佩。腥紅作褥柳爲椽。纏頭堆滿不知數。重重環堵觀摩肩。對對平分較輕重。出囊振鬪先盤旋。兩雄敵面如爭鬪。擊啄猛過乘風鷗。碎頸穴胸驚血濺。誰令鬪狼徒堪憐。負者奔飛勝得食。鳥爭粒粟人爭錢。試念天空野遼闊。微軀覓食寧無田。祇緣誤飛入羅網。縱有羽毛難高竊。只拙齋詩鈔三

舟行偶述

短棹指維揚。熱經三百里。浩渺忽無涯。觸目皆疑似。滄桑有變更。非可論於此。曾記報安瀾。飛章猶在耳。如何目所見。驚今非昔比。東岸高若山。屋脊平河底。零落西隄基。兀絕如殘齒。河運既混一。焉覓人居址。長年訝我情。鼓髀呼客子。客是遠歸人。請爲說終始。憲府倚福洪。任此今一紀。百川自效靈。頻年無駭水。惟黃引泥沙。日入茲河裏。漸積水漸高。水高恃隄起。不得清其源。不得濬其滓。歲歲幸無虞。張樂歌功偉。今夏淮流漲。高堰幾危矣。決口奔風湍。洶湧勢莫擬。淮揚兩郡邑。什九無城市。倉皇萬姓號。天地爲披靡。官吏集長隄。晝夜如旋螳。急策保東偏。可憐西盡鬼。異慘不忍言。客見惟一咫。即今水痕收。事過無庸悔。我心輾轉悲。所悲非已死。顧茲未死人。憂懷如在杞。好生本天心。贊參需佐理。只拙齋詩抄六

范士楫 橘洲詩集六卷

范士楫。字箕生。號放樵。定興人。崇禎十年進士。官山西陽曲洪洞知縣。入清起禮部儀制司主事。典陝西乙酉順治二年鄉試。調選司。官至文選司郎中。順治末告歸。遂未再起。著橘洲詩集六卷。爲乙酉至丁酉順治十四年之詩。有周天成序。稱士楫十年扃戶。其詩于良辰多顧惜。于往事多痛歎。于逸興多悲愕。竹恨霜鐘。曉聲欲活。月溫金井。寄賦冬青。村墟解愁之名。吟成不夜之句。士楫有句云。總媿吾家蠹。無端賣五湖。又云。不死爲明史。殘生更杞憂。他亦憔悴自傷。悲楚欲絕。蓋爲家門計。不能不仕新朝。自負才氣。故不與熱宦酬酢。有瑟居久矣。爲吳駿公祭酒一開蓬徑詩。然謂之閉戶則不可。選司勢要之地。孫奇逢辭薦。尙

求解于士楫。不能置身事外可知。士楫頗有文名。報吳偉業詩云。雅頌猶多事。千年況國工。自負甚高。譏鍾譚體弱。自謂不古不今。實則欲學長吉而無其奇麗。四庫提要乃以爲未脫明季惡習。似于其集未暇細觀。何足爲定論乎。著有鑑古人交一卷。孫奇逢爲之序。蓋范鹿世好。奇逢又交于兩家祖孫父子之間。述清兵破定興。鹿善繼死之。士楫父文源幾死。乃臥守善繼尸三日以護之。可謂生死不渝者矣。又求其生錄一卷。士楫知陽曲時。抵晉府惡宗朱小三以罪。大有聲名。後遂哀他所治獄辭爲此錄。與匪棘堂集俱佚。唯此集與范陽說略十卷有傳本。

紫荆虎

有序。順治壬辰三月廿六日。張山人勸爲余言。今正月有羆虎闖入紫荆關。先是門卒夢介士數十扣關。已而虎至。乃爲樂府紀異。且告志五行者。

黑砂濛濛三日雨。怪風翦路諸河語。抱關有夢不敢占。公然虎過日亭午。懸崖離立荆塞天。誰透天門絲一縷。眼驚不辨非羣羊。乙字之威千尺長。宿衛森羅平地盡。逝將負嵎求山岡。山岡猶是窮民有。歲收榛子不盈斗。人煙稀處月輪高。恨能歌舞犬能酒。深松絕磴早排衙。英雄獨向偏蹄誇。歎起白門帶日閉。秋來幾里無桑麻。紫荆紫荆編爾障。京師控提內外鷄。官司縱橫度虎如度蟻。虛名天險實荒陂。不測耽耽無暴客。斬關拔幟誰復知。今莫尤人但祝虎。虎寧不見畿民苦。土鏗無煙啼朝雨。皮皴骨立不中咀。豺食人。狐假汝。三躍搏之汝王彼虜。如不足者。亂臣賊子天所怒。何不就飲其血茹其腑。人天痛快景星吐。道傍棄兒汝卽乳。堯瑞麒麟今瑞虎。橘洲詩集四

多事

畿輔山東大水

嶽土殘埋劍。江沙費枕戈。無辜惟赤子。多事是黃河。天上爲魚歎。中原沈馬歌。地連清角動。何計著雲
箋。橘洲詩
集五

邯鄲行 讀直督李公
流民疏作

霜打黃河萬木燥。皇天淚眼邯鄲道。邯鄲道傍長百草。根莖生死土相抱。吁嗟流民草不如。婦牽子曳追
蓬車。有穫尙歸阡陌氏。無炊可守甕置居。落日啼聲雜籟雨。破刹無僧實我宇。行人衣單木皮厚。閉門閉
籬皆殺汝。秋夢迷離之樂郊。誰知一步故鄉遙。黃棘逐客客不怒。似言地窄蒼浪高。羽旄翕絕制使來。青
塵不動風悲哉。馬首雲腥人氣惡。龐眉雪涕鬼吟哀。掬泪題書叫闔闔。深恐中途字變血。此身難上監門
圖。當時猶得相容納。弱水扶桑互廣輪。勞勞穠結況幾人。督亢亭邊杏花白。原隰蒼古人牛新。多愁老子
聽鶉鴂。崑攻守令谷永法。紫殿何人發白鱗。則壤中邦偃兵甲。橘洲詩
集五

梁清標 蕉林詩集十八卷

梁清標。字王立。號蒼巖。正定人。崇禎十六年進士。選庶吉士。入清歷官尙書大學士。久縮兵部。略無建
樹。康熙三十年卒。事具清史列傳貳臣傳。撰蕉林詩集十八卷。詩筆清麗。讀之能令人低回不已。清標立
身從官。風雅好文。與王崇簡略同。而才筆過之。持祿保位亦過之。崇簡獨未入貳臣傳。是其異也。真定
梁氏自明中葉以來。人物蔚起。清標兄弟清寬清遠皆官吏部侍郎。清遠著雕丘雜錄十八卷。祓園文集

五卷。詩集四卷。清遠父維樞有王劍尊問。性譜日箋。內閣小識。羣王直譽等集。清標之後。乃遂無聞。然至今數藏弄者。尙以蕉林與退谷並重。

落日行

落日城頭畫角吹。羽林裹甲收南睡。點兵秣馬無停刻。令嚴霜雪生旌麾。師行糧從謀最急。況復諸軍并深入。長蛇當道瘡痍多。如雲飛輓何由集。司農仰屋空太息。路傍行人爭走匿。軍書旁午風雷同。縣官捧檄無人色。田夫閉門吏夜呼。逋稅敲扑無完膚。往時水旱苦穀貴。今年傾囊不能完官租。穀賤傷農古所歎。鬻兒賣女死道途。君不見。前年樓船下閩海。村村烟滅空廬在。又不見。伏波將軍度洞庭。桑麻雞犬無時寧。百戰苦爲封侯計。萬家祁寒夜流涕。蕉林詩集三

挽船曲

寧爲官道塵。勿爲官道人。塵土踐踏有時歇。人民力盡還戕身。長安昨日兵符下。舳艫千里如雲屯。官司催夫牽纜去。扶老攜兒啼滿路。村村逃避鷄犬空。長河日黑濤聲怒。繆夫追捉動數千。行旅裹足無人烟。窮搜急比勢如火。那知人夫不用用金錢。健兒露刃過虓虎。鞭箠叱咤驚風雨。得錢放去復重催。縣官金盡誰爲主。窮民袒臂身無糧。挽船數日猶空腸。霜飈烈日任吹炙。皮穿骨折委道傍。前船夫多死。後船夫又續。眼見骨肉離。安能辭楚毒。呼天不敢祈生還。但願將身葬魚腹。可憐河畔風淒淒。中夜憐飛新鬼

哭。蕉林詩集四

民夫謠

朝來點點山。令嚴如霜雪。鳥道何巉巖。千夫日流血。

縣官騎驢去。日昃無晨飢。吾儕貧賤人。安敢辭饑寒。蕉林詩集四

上灘行

曉起酸風來石甕。驚灘急峽江波溜。白日陰霾山鬼吟。飛流噴沫魚龍鬪。崩崖摩雲勢欲吞。蒼烟冑壁苔痕綉。荒城昨夜催灘夫。沿村比屋羣吏呼。鶉衣百結亦人子。倉皇追捉如逃逋。冥濛天黑帆盡濕。縣令雨立衝泥途。令言城空居人少。屯官降卒衆相黜。歲收租稅令不行。田家半菽何曾飽。供繁役重支柱艱。簿書期會皆草草。西江貧瘠昔所嗟。況復豺虎恣攫拿。空巖哀狖啼夜月。窮鄉密罽盤虺蛇。舟行轉側類毛羽。峻嶒湧地根槎牙。我來鼓枻三歎息。長年爭叫風飄色。民勞驛殫恤未能。浮家泛宅境轉偏。白首江湖徒爾爲。坐老孤村計亦得。蕉林詩集五

草橋

爲厭風塵色。行行過遠林。草蟲吟岸莽。花擔度橋陰。十里寒泉瀉。千年廢宅沈。相傳此地多元人亭館。今不可復識矣。蒼茫尋野

逕。迤邐白雲深。蕉林詩集六

完縣有木蘭祠

縣即陳平封邑

曲逆山城古。蒼蒼白日遲。風雲丞相邑。鼓吹女郎祠。血食存喬木。塵封洗斷碑。古今稱壯縣。遺烈使人

思。蕉林詩集六

梁清遠 祓園詩集四卷文集四卷

梁清遠。字邇之。號葵石。清標弟。順治三年進士。由刑部主事。官至吏部侍郎。降通政使。請養歸。卒于康熙二十三年。年七十七。撰祓園詩集四卷。文集四卷。詩文不事雕鏤。而皆有矩度可尋。捕逃事宜。遵諭陳言兩疏。皆切時政。紀事之作。亦多可取。詩閒適自喜。篇章甚富。刪存者僅此。頗事雜覽。別撰雕丘雜記。爲人所稱。

苦雨

春陰霑雨澤。籬落漸流澌。遊鯉驚新藻。寒蟬抱露枝。公卿憂國計。農圃怨天時。延望浮新漲。增人兩鬢絲。祓園詩集二

夏日園居時大旱將雨

家近掛飄處。人同臥雪心。灌畦成獨笑。倚劍足清吟。石瘦風聲細。花繁月影深。胡勞長太息。天意厭菑祲。祓園詩集三

梁穆 列翠軒詩一卷

梁穆。字敬仲。號改亭。清標孫。貢生。官袁州府同知。擢蘇州府知府。康熙五十五年。刻列翠軒詩一卷。
爲壬申康熙三十一年至乙未五十四年之詩。近體輕倩有致。

除夕風雨竟夕

立春以來雨不歇。濕雲漠漠散還結。欲爲東皇清路塵。不管行人苦跋涉。連日霏微未破塊。一夕傾盆似川決。欹枕臥聽淙淙聲。萬畝蓮塘響枯葉。短篷已漏燭已燼。颯颯空林勢猶烈。我聞雨澤亦有數。莫使恩膏容易竭。猶憶年時苦旱乾。滴盡農夫眼中血。列翠軒詩

題周崑來畫龍

周生丹青天下奇。前有公麟後和之。裁紅暈碧皆異彩。千纖一幅人爭持。與酣偶爾貌神物。鬚張鬣奮鱗之而。元氣淋漓生意足。銜銜勢欲翻天地。雲影如墨四擁蔽。黯黯千里天低垂。爪痕時於罅際露。恍觀天矯盤空姿。神龍見首不見尾。俗學未許窺藩籬。青華山人癖好古。購來不吝千朱提。空齋素壁走雷雨。鱗甲欲動雲爭飛。客來不辨紙與畫。祇覺颯颯萬壑寒飈吹。周生周生技至此。信有天授非人爲。列翠軒詩

崔岱齊坐嘯軒詩一卷

崔岱齊。字青峙。平山人。康熙二十九年刻坐嘯軒詩于揚州。一時名士咸爲之序。王仲儒且刻其詩入離珠集。岱齊父華字蓮生。順治十六年進士。時官兩淮運使。頗喜結納士流。人皆仰其沾溉。故于岱齊不無

過情之譽。然年未及壯。才情麤發。亦苗而早秀者矣。沈德潛別裁集選其詩。目爲江都諸生。豈誤平山爲平山堂邪。

雨中讀杜茶村集

柳色暗高樓。遺文讀未休。山川司馬淚。風雨少陵愁。六代空芳草。孤魂隔上游。白門沈醉夜。猶憶看吳

鉤。坐嘯軒詩

題蔣前民新居

烈焰非無意。驅君到此間。近牆花舊植。侵徑草新刪。勝友攜壺至。寒禽認主還。一枝棲已穩。高臥好開

顏。朱其恭曰。前民先生自糧兵燹後。貧無所棲。於陋巷中得草屋三間。客至無坐處。有訪之者。門外略語而別。前民意殊踟躕。余亦竊心傷之。己巳春值鄰家失火。草屋亦付一炬中。同人咸爲歎。謂天之厄善若此。余獨舉觴以進曰。是屋狹隘卑溼。焚之便。先生不日有居也。同人驚問故。余曰。前民固高士。其力不能遷居。又不欲累及友朋。故恬然安之。今天既爲驅除矣。豈親友稍有力者。能坐視乎。衆皆唯唯稱善。越數日。朋舊餽米餽金者踵相接。先生積金篋中得若干。遂卜居城南僻地。向之草者易而爲瓦。三者增而爲五。中有一軒。可以坐客。庭前有花竹。亦復楚楚。每得酒輒呼好友醉於家。吾儕亦時時攜壺過之。不復似草屋中踟躕矣。同人乃益歎余言爲不謬。今讀青時詩。首云烈焰非無意。驅君到此間。與余言隱相脗合。且卜居之事。青時與有力焉。故附識之如此。 軒詩

王崇簡 青箱堂詩集三十三卷文集十二卷

王崇簡。字敬哉。宛平人。崇禎十六年進士。選庶吉士。北都之覆。挈家南游。金陵不守。栖遲吳越間。順治二年入都補官。十餘年間。洊升禮部尙書。十八年以疾告休。年方六十。時人嘉其勇退。康熙十七年卒。年七十七。撰青箱堂詩集三十三卷。文集十二卷。其子照刻于京師。少子燕增文八首。重刻于鎮江。

詩文皆無詭隨之習。爲人醇厚。喜從諸名士游。故其出處。人頗諒之。顧炎武擇交最嚴。獨許爲有心人。申涵光稱其古道。必有由也。

哭楊商賢

商賢歿於昨年臘月。至今年四月始得其遺札。乃病中口授女書爲永訣者。覽之未終。不禁泣然。聊以志懷。嗚咽不能成音。

數行留永訣。呼女楊前書。囑筆聲頻斷。開械淚有餘。千秋常自命。一旦盡成虛。哽咽悲涼語。花飛月影

疎。青箱堂詩集二九

案此詩作于康熙十三年甲寅。

王熙王文靖公集二十四卷

王熙。字子雍。一字晉庭。號慕齋。崇簡子。順治四年進士。改庶吉士。授檢討。順治中頗需用。十七年遂官禮部尙書。將入相。不果。草世祖遺詔有名。康熙二十一年。始授保和殿大學士。四十年致仕。後二年卒。年七十六。事具清史列傳大臣傳。是時大學士備位不問政事。雖各兼部務。亦見奪于滿尙書。間有建白。無關大政。故馮溥李蔚宋德宜及熙僅以文學備顧問。暇則結納名士。競尙詩文。諸人皆各有集。熙撰王文靖公集二十四卷。篇章甚富。惜無真詣。碑版之文至多。而可采者至少。唯富貴五十餘年。門生故吏滿天下。所居園亭華好。文酒之會。照映一時。稱爲盛事而已。

思陵紀事

明莊烈愍皇帝陵也。御製碑文在焉。大駕經過。焚楮拜奠。且為下泣。感而紀之。

悵望思陵路。蕭條易愴神。鼎湖龍去遠。禹穴鳥耘頻。園寢存先典。豐碑識至仁。後來傳竹牒。莫比怠荒倫。

千載興亡恨。前朝倍可憐。玄黃紛樹黨。門戶競持權。宵旰憂空切。兵荒勢豈延。翠華憑弔處。也為一潸

然。王文靖公集六

王承恩墓

承恩明內監也。從莊烈帝以死。墓即傍思陵。命大學士撰碑文。奉獻致祭。

會服貂璫貴。傷心國祚移。主恩原不淺。臣死自無辭。枯樹園新塚。豐碑待好詞。當時從『賊』者。寧不媿

鬚眉。王文靖公集六

李 蔚 心遠堂詩集十二卷二集四卷

李蔚。字景靄。號坦園。高陽人。順治三年丙戌進士。改庶吉士。授檢討。以善清書。十五年戊戌。年始三十。遂擢祕書院大學士。官至保和殿大學士。卒于康熙二十三年甲子。年六十。事具清史列傳大臣傳。撰心遠堂集十二卷。分體起順治二年至康熙六年。二集四卷。編年起康熙十三年至二十三年。春日西郊四首。作于康熙八年。自注城南韋祠海棠奇勝。今不可睹。御花園詩。擬宮詞四首。重過西苑感舊。西苑感舊諸詩。于順治間事。似有欲言不言之隱。頗慕名德。有贈孫徵君九十。送李天生徵士授檢討歸養。贈杜

徵君越字君異。康熙初。政歸八旗。漢人若杜立德馮溥王熙宋德宜與壽。皆無所預。僅備文學顧問而已。故皆好與文士游。辭翰亦頗斐然。

久旱快雨竟日

伏後數日風。秋行百物瘁。昨夜猶繁星。茲雨出不意。土潤適宜時。況爲滌炎熾。早霞映窓紅。俗諺乃足誌。翻盆聲砰洶。決渠力奔恣。百川會神靈。九陌怯塗暨。驕陽歷三時。疵疹蒙動植。霑灑雖時有。滋溼今方被。一洗瘡痍蘇。晚收田畝利。草竊得銷亡。兵災俱偃避。共觀熙穰時。重乾子遺淚。區區持斯願。天心或不棄。心遠堂詩集一

投河歎

引哀流民也。甲午春大饑。民多南徙。夫婦攜子女至淳沱。欲濟無資。舟子難之。遂舉室赴河死。魏石生給諫哀而賦詩。余感其詞。有同悲焉。遂有此作。

彼嗷嗷者鴻兮。我生不辰。弗爾獲同兮。鴻有羽。東西南北征兮。我饑無力。匍匐難行兮。一哀哉凶年。我廬已捐。我田改阡。我突無煙。我婦子斯遷。二洵乎其流。溇沱之水兮。子乎其遊。流離之子兮。招招舟子。艤船近岸兮。我囊無資。不濟以歎兮。仰天長號。淚不可以斷兮。三溇沱之水。流漸漸兮。安得鱗鬣。飛渡無淹兮。嗟我骨肉。於斯殲兮。踴如鼻浴。浮且潛兮。瘦膚枯腸。蛟鼉所嫌兮。四咄舟子兮胡不仁。競刀錐兮怒人神。舟子笑曰。彼峨冠而高坐者。夫寧匪人。咄舟子兮何足嗔。五
心遠堂詩集四

城北卽事

三首錄一

青青路旁禾。短短禾頭穗。新收未作花。殘菽半委地。道逢腰鎌夫。爲我談農事。今年得雨遲。早苗頗頽

頽。晚收雖有望。不盡南畝利。所懼乏軍興。糠覈豈敢覲。撻伐方未已。紛沓羽書至。糞食更多憂。生理何由遂。心遠堂詩 二集二

楊思聖 且亭詩

楊思聖。字猶龍。鉅鹿人。順治四年進士。入翰林。官至四川左布政使。十八年卒。年四十四。少壯登朝。深結主知。而出爲外吏。疑劉正宗忌之。集中送王玄芝蒼糧江西詩。卽今流移豈至尊。與子閉口不須論。可以爲證。其詩未必過人。而能奔走一時名士。魏裔介推爲五子之首。猶是北人之見。然與申涵光隱顯殊科。交情不改。固見涵光高致。思聖亦頗難能也。臨沒能致傳山千里命駕。爲之視疾。山非輕許人者。卽此足以見思聖矣。

查伊璜抵燕不預闢事賦詩爲送

君來何所事。歸去各凄然。夢破江南月。愁深薊北天。狂吟聊閱世。青簡互編年。余與伊璜有明史之役歎息河橋別。

空悲遠道篇。時以遠道 且亭 詩屬序

大雲寺

寺臨絕壑。前枕巨江。石工隨山刻像。大小在心。誌者其能悉其數。名曰千佛崖也。不知何代所經始。多宋元人留題。

絕壁開龍象。飛巖立渺冥。千身原自幻。百丈竟誰銘。梵放潮痕白。煙環佛頂青。宋元成往事。今古自亭

亭。且亭 詩

案此寺當在漢中。

故宮行

黃雲黯黯悲風起。萬捲洪濤咽河水。孤城半沒睥睨浸。傳是當年王孫里。珠樓紺闕已成塵。萬戶千門生荆杞。熊羆不復守故宮。民間往往拾金璽。白頭老吏雙淚垂。指點猶能憶舊趾。最後有山鬱龍嵒。委蛇直與前殿通。問之知爲古良嶽。崩頽石壁嵌玲瓏。草深磴道已無路。洞壑雨塌倒亂蓬。兩朝繁華歸何處。滿眼山河感慨中。我行至此欲安往。夕陽老樹搖春風。且亭詩

郝浴 中山詩鈔四卷 文鈔四卷 中山史論二卷 中山奏議四卷

郝浴。字冰滌。又字雪海。號復陽。定州人。順治六年進士。官刑部主事。翌年改授湖廣道御史。巡按四川。忤吳三桂。遣戍盛京。至康熙十四年始免罪取回錄用。復原官。計自受譴至是凡二十二年。歷兩淮巡鹽。屢擢左副都御史。巡撫廣西。卒于二十二年。年六十一。事具李呈祥復陽郝公行狀。撰中山詩鈔四卷。文鈔四卷。史論二卷。奏議四卷。浴以密疏力陳三桂跋扈。至于久戍。直聲震一時。素以經濟自負。而頗好文。詩取逕韓杜。文及史論皆作于謫居時。奉天遼陽州千山剩禪師塔碑銘。最有精采。奏議爲按蜀疏。還臺疏。巡鹽疏。撫粵疏。多足考見當日時勢。

全州道中松

自全州抵省三百里。皆合抱大松夾路。路以石墁。直貫全省。深阻豁露。庶天兵易下。想見秦漢來服學規模。至翠擊華蓋。示我周行。又天下所無也。

當年嶺外歸秦路。海尉攔時猶是新。再遣西京崇信俠。無將黃屋老夫臣。蒼龍密護朝元驛。魑結驚回舞羽春。萬古清陰凋不去。多年風雨化龍鱗。中山詩 鈔三

郭 棻 茶學源堂詩集十卷文集十九卷學源堂詩鈔六卷

郭棻。字芝仙。號快菴。亦曰快圃。清苑人。順治壬辰九年進士。選庶吉士。授檢討。歷贊善。丙申十三年以考試

清書不純。降補山西按察司知事。丙午廣熙五年入為大理寺寺正。薦復原官。屢擢內閣學士。戊辰二十年告歸。卒

于辛未。九年六十九。事具潘應寶所為快圃郭公傳。撰有學源堂詩集十卷。文集十九卷。詩文皆未入格。

而才氣浩汗。時有得失。自謂謫官時。牢騷感憤。易涉粗豪。老而養氣斂醇。始稍近風雅。可謂善于自狀

者矣。其文多足考見清初舊事。翰苑撰擬之文。為皇朝文典所未載。總理保定等處軍務司理太監方公

傳。刑瘋子傳。言甲申崇禎十七年保定城守。稱太監方正化之賢。極詆督師李建泰。出于耳聞目擊。當較可信。

中和殿大學士證文敏鹿菴馮公墓誌銘。為馮銓作。銓在明為奄黨。在清為貳臣。清議所不與。無可載筆。

純以儷體行之。銓卒于壬子。年七十八。計天啓入相。未滿三十。故有小馮兒之稱。前後四娶。曰劉。曰

范。曰徐。曰納蘭。滿洲總管鄂貌圖巴圖魯公之女。則為賜婚。此與張佳氏鄂貌圖撰白海集者為別一

人。子二。源淮廕武職。源濟國子監祭酒。銓以丙申順治十三年罷政。至庚戌廣熙九年時巡過涿州召見。尚有文綺

二十四端。銀五百兩之賜。不知何以得之。銓事無人述及。得此稍知一二。蔡尤善言政事。遵諭陳言疏。請酌旗下買人之例疏。書江南慕鶴鳴撫軍請捐通賦疏後。請禁私圈民田疏。皆切中當時之弊。康熙七年。停止圈田後。尙有私圈者。唯此疏言之甚詳。爲人通倪。家中資而喜周人急難。其沒也幾無以爲斂。初降官以諳諛招忌。及官內閣學士。當時率爲督撫儲才之選。而卒不遇。意必有嫉之者。其徐乾學高士奇輩歟。

穫麥歌

萬頃黃雲剪剪收。滿車滿轡滿場頭。東阡却愛西阡好。南陌爭誇北陌稠。了了芒齊攢蝟背。垂垂穗重擺刀緞。蝟背刀緞忙婦子。來觀真教田畯喜。兩岐莫更羨漁陽。五穗誰將歌渭水。霹靂夜無鬼借車。螭峒晝有香生藥。一麥三秋慶正除。田家老叟漫咨嗟。今年春雨還懸霖。今年夏仲飛塵沙。青黃續斷幾斛麥。纒道食新詎租譁。詎租不比來官府。田是屯莊隸營伍。計畝索錢麥作錢。笑舌不肯留糠土。來便羣隨牧馬兒。遺秉一空寡婦苦。吁嗟乎。且莫歌村頭。又聽打傳鑼。兵來過。馬來過。一片愁雲壓綠莎。學源堂詩集三

臺閣行

皇帝御極十四載。閏五月中之十三。都城亢旱烟生土。樹葉焦卷如僵蠶。二麥蔦蔦已枯槁。三農未種且焚燄。飛沙蔽日幽薊北。鑠石萎草黃河南。河南薊北千餘里。延袤赤地誰舉趾。蝗蝻羽亂蹄馱鳴。樺柳葉連靡蕪死。大戟小戟剝苦根。深泉淺泉汲濁水。中甸六月節已交。茲時不雨絕耘耔。京兆尹設祈雨壇。詔

遣宗伯步長安。五鼎其如白牡腐。九衢無那紅塵乾。梨園子弟閒聚語。神龍最愛菩薩蠻。扮演雜劇耍龍喜。不怕都人作戲看。裂繒剪綵結臺閣。千尺巍巍半天縛。象神象鬼象獼猴。有樹有花有簾箔。五歲童子冠進賢。四齡女兒衣錯落。高竿聳座雲中行。畫幃繡葆枝頭縛。兒童粧飾纓笑嬉。風搖日曝旋狐疑。叫渴喚龍飛凌顛。啼饑綵絡散糖飴。雄幡寶旆排前導。鳳管鸞笙次第吹。旛旗崢嶸圖鬱壘。管笙繚繞動封姨。打鼓縱金聲。湧洞。提漿汲水勢倥偬。轟轟遙播十六遠。鏡篋密擁千百腔。金鞞繡褱擊朱輪。霧縠冰紈襯彩幟。五王高館杖與鄰。四姓小侯伯和仲。玉花獅子白鼻騮。照照攘攘揚塵沙。寶轍千條海中屐。朱纓十里洛陽花。闌樓架屋香蠶笑。揮汗噴烟白面誇。菜傭酒胡都罷市。童頭豁齒亦離家。罷市離家羣來往。高招已過黑窰廠。頻年日羽月羽飛。今朝龍師雨師賞。都道白雲觀裏仙。不及黑龍潭上饗。礮礮無火列缺暗。誰云巫覡有神爽。西山變黶雲陰陰。海子啾啾過水禽。早識神龍好畫閣。成湯何事禱桑林。學源堂詩集三

苦雨行

長庚六月伏赤道。鬼車纒駕天河倒。嗟予傲居如齊嬰。半畝湫溢臆生草。水之就下如建瓴。決決灌漑積黑潦。雪鴻堂中深三尺。漫漫不見簷前碼。一架薈薇水底香。幾拳礫何沙中碧。香鴨動欲泳而游。牀龜活似踰復躑。釋子縮版學操舟。奚童疊案當登樓。雙走巒隨相抵觸。燕迴鴿轉相啾啾。須臾牆角轟然颺。須臾檐牙轟然投。牆斷檐投雨不歇。瓦溝滲漏衣裳溼。簾笥展轉不時停。風奪疏櫺銀缸滅。夜分轟聽鄰舍號。飯甑紛飛茅茨折。坐等雞啼寂不聞。料是摧頽埒與桀。須臾侵曉啓戶看。蒼頭抖擻不勝寒。乾封七載

狠云苦。墨雨三朝更足歎。學源堂詩集三

孫赤崖以修城樓工從謫所放還用陳心簡韻

破帽波驢過錦州。風霜絕徼飽經由。蘇卿不老黃龍塞。韓珀真修五鳳樓。海鴈孤飛憐楚澤。江天一望見吳舟。還家倘憶鴛鴦賦。春草池塘夢裏愁。學源堂詩鈔五

魏裔介兼濟堂詩集八卷兼濟堂文集選二十卷

魏裔介。字貞白。一字崑林。號石生。又號貞庵。柏鄉人。順治三年進士。選庶吉士。改工科給事中。官至保和殿大學士。素稱敢言。先後爲所彈奏者。張縉彥沈□□陳之遴劉正宗無與于南北之爭。而依倚寧完我。康熙初。完我失勢。又與四輔委蛇。爲李之芳所劾。十年。遂不安其位而去。卒于二十五年。年七十一。追諡文毅。事具清史列傳大臣傳。四庫書目稱裔介著述刻于江南者。有兼濟堂集十四卷。刻于荆南者有兼濟堂集二十四卷。刻于京師者有文選二集上下二編。崑林小品上下二編。崑林外集一編。奏疏尺牘存餘七卷。其刻于林下者有文選十卷。嶼舫近草五卷。樗林三筆五卷。詹明章哀輯諸本。簡繁汰冗。刊爲兼濟堂文集選二十卷。分奏疏三卷。序六卷。書牘二卷。傳誌二卷。祭文論二卷。雜著二卷。樂府古今體詩三卷。此兼濟堂詩集八卷。四庫未著錄。或爲最後定本歟。裔介以理學自任。詩文皆不能工。而好弄筆。尤喜與文士游。田茂遇吳父結納最深。尤惓惓于孫奇逢申涵光。當時號爲遺老者也。刻觀始集。清

詩湖洄集。雖爲競名。然勝于高談性命。束書不觀者矣。其時理學名臣。若魏象樞熊賜履李光地皆好士。略同于裔介。士亦往往歸之。

秧歌行

鳳陽婦女唱秧歌。年年正月渡黃河。北風吹雪沙撲面。瑟瑟腰鼓自婆娑。衣衫襤褸帕在首。自言出門日已久。前年壽州無雨澤。今歲泗州決河口。父母生我亦嬌姿。藏在深閨學絡絲。織成合歡鴛鴦被。嫁與輕薄年少兒。少年輕薄學縱博。日日娼家醉平樂。粧奩典盡鬻黃牛。公頭童。齒已落。我唱秧歌度歡年。完却官租還種田。南來北往如飛雁。如此艱辛實可憐。兼濟堂詩集二

哀流民

田廬水沒無乾處。流民紛紛向南去。豈意南州不敢留。白晝閉戶夜蹲踞。簷前不許稍踟躕。恐有東人不我恕。上見滄浪之天。下顧黃口小兒。命也如何。婦語絮絮。逃人逃人兮。爾獨何爲背爾主。使我罹此荼毒。我將爾詛。我欲爾詛。其口維坎。路有杖杜。益者誰子。烏鳶曉曉。旣歟而羶。彼蒼者天。哀此黎庶。

兼濟堂詩集二

張衡 稷亭詩選二卷

張衡。字友石。號晴峯。景州人。順治十八年進士。官至榆林東路道。康熙四十年卒于家。年七十四。其詩

皆作于塞上。多危苦之音。山川景物。賴之以傳。惜無豪情健筆以寫之。知行役牽輓之勞。足以減其壯心矣。噶爾丹之役。征戰連年而不見于吟詠。得此點綴。稍資藻飾。所述延安龍山及千佛洞之勝。不禁神往。

巡查袁賑觸目慘傷漫成口號

豈是長平陷陣來。乾陵道上滿屍堆。褰帷一過難留賑。掩骼無文一寫哀。乾州白骨如堆。捐墾場外。爲文祭之。

整哭無詞淚滿衣。阿誰賂賣小文瓊。檢囊恰有青錢在。贖取嬌娃認母歸。婦告略女甚哀。當卽代贖。文瓊女名也。

少小從夫慣食貧。三年不恚買臣薪。飢來驅向池陽道。一個青銅便賣身。夫婦逃荒飢欲死。將孀妻以圖存。有估客詣曰。歸我當贖百錢。夫欣然委妻而去。

妻嗔呼曰。夫去永訣矣。妾有餘錢欲贖一飽。夫掉頭不顧。解囊數之九十九文。攜歸于客。是以一錢得妾也。

餘皇千里送湖糧。楚協軍饋十萬。牛以賑飢。舟車挽運。千里備置。官民無停晷。撤盡屠蘇燒畫梁。多少經營供續命。可憐南鄭莫封倉。稷事詩選下

馬之驢 古調堂初刻六卷

馬之驢。字旻徠。雄縣人。爲江都主簿。王士禛頗稱之。因以立名。撰古調堂初刻六卷。自崇禎十五年壬午至順治八年辛卯之詩。詩格老蒼。無卑弱之習。古體多合作。同時北方詩人鮮及之者。惜無續刻。之驢行實不詳。能交孫奇逢。亦豪傑之士。邊汝元漁山詩草。有其乙亥所作序。計年當七十矣。文有法度。惜無人哀其辛卯後詩文。不然必有可觀。感舊集錄其三詩。在此刻之外。然賞其近體。未爲深知也。

西洋火器

歷朝戈弩繼殳折。西器遙來大武揚。允可安民襄一怒。自然無敵靖羣方。田單在昔牛終劣。諸葛生今敵孰強。聞肅天威本天德。莫令炎烈逸崑岡。古調堂初刻四

顧 沂 鳳池園詩集八卷文集八卷

顧沂。字伊在。號芝巖。長洲籍。大興人。康熙十二年進士。由庶吉士授編修。官至禮部侍郎。出爲河南巡撫。以事鐫職歸。再起爲禮部侍郎。降大理寺少卿。調奉天府丞。宗人府府丞。四十八年致仕。後三年卒。年六十七。有鳳池園詩集八卷。文集八卷。沂少有詩名。入仕以後所作。非不周旋規矩。而無性情可言。亦無事可述。慮觸禁忌惟謹。而不意其無解于三仕三已也。

過同年顏澹園寓觀蹴踘

大鈞元化含樞紐。祛篋縕縕鼓萬有。天機運轉翊太和。圓智如神逐飛走。吾聞黃帝開毬場。貔貅習練都跳梁。又聞神仙養生主。實擅虛捻安規矩。後來俠少分朋籌。十千賭勝翠雲裘。今見投閒客舍裏。酒酣聊樂破羈愁。脫冠易履徐審諦。庭院寬平正如礪。直躬壁立手若提。宛轉迴旋少滯滯。滄海浴日起復落。望舒炫耀長空礪。霹靂一聲風雨來。鷓鴣飛星實多煜燿。屏翳張旗青女嘯。二十八宿失靈曜。南箕北斗易方隅。驅電鞭雷閩闔叫。天馬逸足馳雲車。蛟龍蟠舞走鱷魚。碣石欲倒地軸折。山靈罔象靡寧居。百里千里

跳丸勢。六步七步營門制。連山不斷雲滿身。鳳唳虎掌傳絕藝。堵牆觀者但愕眙。悄視無聲心目悸。中軍神氣何安閒。左旋右軸皆如意。翻然鈎住恰中節。滿庭粲然聲不置。掉頭迴顧碧天高。舊燕來巢海棠睡。

鳳池園
詩集二

閻中寬 芸暉堂詩集六卷續集一卷

閻中寬。字公度。號易菴。蠡縣人。康熙十八年進士。歷官戶部郎中。四十五年引疾歸。越三年卒。年七十一。有芸暉堂詩集六卷。續集一卷。中寬與顏元李堪爲友。迎王餘佑于家。與共講習。蓋留心經世之務者。韻語非其所長。以五七古爲五七格。昔所未聞。堪爲之序。稱其恬淡名利。有守拙安卑之致。又稱發爲歌詠。皆有法度。足以起宋元之衰。則過分之辭。

秋日顏習齋先生書到勸予歸里却寄

西風蕭瑟鬢蒼浪。潦倒京華近十霜。自笑塞翁頻失馬。誰憐顏駟尙爲郎。追思往事空槌壁。逆料前途類築糠。却被局旁看得破。故人書寄勸歸鄉。芸暉堂詩集四

袁 佑 霽軒詩鈔五卷

袁佑。字杜少。號霽軒。東明人。貢生。官內閣中書。舉博學鴻儒。授編修。歷官中允。丙子康熙三十五年典浙江鄉

試。祈假歸。後二年卒。佑有捷才。五官並用。對客數千言立就。撰述甚富。詩禮左史老莊荀楊離騷杜詩皆有所釋。不傳。沒後幾二十年。門人陸師楊守知。始求得遺詩。刻為霽軒詩鈔五卷。分園居集。西清集。予省集。補史集。歸田集。為庚子順治十七年迄戊寅康熙十七年之詩。佑生于燕趙。而詩格明秀。無河山塊莽之氣。自是當家。惜其傳不廣。鴻博諸人。聲華消歇。殆無如佑者矣。

閩古古逸人自邯鄲入鄴書期上已過訪兼示近詩依韻賦寄

野老行藏萬里天。隴梅曾寄早鴻先。平原壘盡餘春樹。魏武臺空有夕煙。白骨還家諸子在。青山作客故人憐。便能褻日重攜酒。草閣東風已十年。

老去詩篇字字新。廬山晴雪踏輕塵。傷心偶問長安路。揮手終為太古人。張儉有家仍作客。管寧分席已無鄰。叢臺又向銅臺去。何處鶯花不負春。霽軒詩鈔一

六鏡詩和蔣靜山

秋水菱花絕點塵。明霞一片玉盤新。臨妝漫掩雙啼袖。鏡裏蛾眉不妬人。菱花鏡
炎火含精畫吐芒。遙看引燄燭天長。燧人空自鑽榆柳。何似微丹依日光。火鏡
投壺一笑電光生。細碾玻璃楮葉輕。却怪雙眸青白在。翻緣遮隔轉分明。眼鏡
雲物微茫一鏡寒。大千毫髮靜中觀。人情對面誰能識。縱目何勞遠處看。千里鏡
鏡中顧影已成多。多目多心奈鏡何。曾向冥搜觀萬象。沙飛點點滿恆河。多目鏡

纖毫照眼羨離朱。誰使纖毫影更殊。物態雲翻千萬狀。空明檢取入冰壺。顯微齋軒詩

龐 塏 叢碧山房集二十八卷

龐塏。字霽公。號雪崖。晚號牧翁。任丘人。康熙十四年舉人。薦試鴻博。授檢討。大考降中書。遷工部主事員外戶部郎中。改福建建寧知府。告歸。卒于康熙四十六年。年六十九。所著叢碧山房集。文八卷。雜著三卷。翰苑稿十四卷。舍人稿六卷。工部稿十一卷。戶部稿十卷。建州稿五卷。和陶稿一卷。歸田稿一卷。四庫存目無和陶歸田二稿。塏詩專意學杜。一以性情禮義為歸。田雯稱為蘇陸。提要譏其率易。皆皮相之論。王士禛不喜杜。故不甚稱塏。塏不隨風氣轉移。其可貴正在此。能為李澄中刻集。又篤于風義者。

田家

老農世西村。不知村東道。春雨事耕耘。秋風熟梁稻。場圃接門前。牆下植桑棗。隣里情分篤。長幼呼叔嫂。男婦三四人。小孫長在抱。謂言急紡績。今年節氣早。叢碧山房集二

聞孫悅之死哭於京邸孫同邑人。工醫。善針灸。有起死回生之妙。

溽暑蒸蒸裹客裝。門前握手笑郎當。即看白髮鏡強健。忍接鄉書報喪亡。濁酒空期來盞下。素車誰送到山岡。相憑寄語傳諸子。莫令人間失禁方。

六十餘年成底事。長將盃酒寄牢騷。壯心不肯隨時折。奇症曾經應手消。黃土埋身千古恨。白雲哭友一身遙。旅亭人靜傷心處。月色松聲共寂寥。

胸懷鬱鬱恨難平。不合時宜孫子荆。未免有人忻一死。定知惟我感重生。余患癘將死。孫爲余針灸。出血數斗立消。眞重生也。骨埋夜壑無歸路。月靜柴門息吠聲。孫性傲。頗不理於口。身後莫愁家計窘。小兒能讀大兒耕。巖碧山房集三

陳 儋 燕山草堂集五卷

陳儋。字鶴公。號餘菴。又號想園。清苑人。拔貢生。舉博學鴻儒不第。康熙二十一年。刻其所作詩文爲燕山草堂集五卷。儋年十三有聲文社。爲陳名夏李雯獎許。稍長。南游江淮。遍交其碩彥。顧夢游陳瑚諸人。尤善許東。東推其文爲河朔第一。然儋南走趙。北走盧溝。漁陽。日與游俠酒徒徵逐。欲締交賢豪長者。期大有爲于天下。自稱丙申順治十三年始折節讀書。事科舉。集中有贈吳商賢詩。商賢亡命。志在復明。與儋行逕不類。而必別有相合者。又有與友人談乙未順治十二年之禍詩。似曾以文字賈禍。次歲遂復南游。自後稍晦其迹。觀所作名人贊曰。南陽先生眞我師。自題其集以宗慤爲言。何嘗一日忘世。故顧炎武會晚皆迂道訪之。傅山稱爲光明俊偉。王弘撰許其丰稜孤峻。李因篤結納尤深。儋與王士禛書。乃言人皆富而我獨貧。人皆貴而我獨賤。疑其飾辭。當陳名夏煊赫時。儋嘗致書勸勿與舊人如寧完我輩爭寵。又以吳偉業不當應召出山。終不免于一出。則命也。放還後。聲光闐然。亦命也。勸之安命。施閏章入翰林。所以規之。

者。曰早退。其辭直諒。且有見地。豈有自怨不得富貴之理。應特試時。與弘撰同居昊天寺。不投刺朱門。蓋志別有在。不然。龔鼎孳梁清標徐乾學兄弟。皆與之親暱。先後二三十年間。豈不能爲之道地。所謂不得志。蓋指世事無可爲而言。世俗之人。既不知僖。而僖又恟恍其辭。因略辨之。既自甘放廢。則肆其力于文筆之屈伸高下。無不應節。尤善紀事之作。吳偉業乞其甲申保定紀事以資撰述。自謂流傳之言。萬難輕信。所作每數易稿。然謂毛文龍之死。由陳繼儒一言。李自成攻寧武之衆。死者七萬人。亦不免輕信傳聞。他作可信者。多言明季事如兩金吾傳。郭大夫傳。足補史闕。客牕偶談述東廠錦衣衛事甚詳。知其留意者廣。詩經屢焚。存者無多而皆有所指。春感十五首。雜詩十三首。不啻自道生平。誠奇人也。

禽言 十三首
錄一

行不得哥哥。嚴有公。狠有婆。娶婦惟喜粧奩多。大姑索簪珥。小姑索綺羅。荆釵裙布可奈何。雖成夫婦。不得好和。行不得哥哥。行不得 燕山草 堂集五

擄婦怨

從軍坐犢車。填滿大將營。行疑娘子軍。住若夫人城。陰氣兵不揚。將軍不肯聽。竟自驅我來。分隊東西行。夜半戰馬嘶。夾雜兒啼聲。四顧無知識。惟見鬼火生。欲認親骨肉。燐燐不分明。亂世無樂土。胡不慘同情。

行行重行行。鎮城數里餘。傳聞禁屠割。禱雨重耕鋤。物命猶知惜。人胡物不如。哀痛發長號。自分填溝

渠。郡伯攬轡來。相見而歎歔。口脚開府令。傳諭出萃車。暫寄旅舍中。日給錢與糶。出榜招親人。認去各歸闕。白骨荷重生。如聞肆赦書。開府天地心。何必叩玉虛。猶恐親人絕。終是筮中魚。燕山草堂集五

皇木

丁未五月。從楚藩邸木植入鄧。詩以紀之。題曰皇木。依差名也。

先代藩封好。楚中木合圍。玉龍虛繞棟。鐵鳳枉橫飛。舊趾生青草。新基映紫微。移來王室貴。不爲帝京希。

三百八十木。經營動萬人。按行當五月。計日歷三春。積汗揮成雨。颺風驟起塵。泉枯渴不釋。載道幾逡巡。

彭彭方欲已。採辦報將回。王事誠靡盬。庶民又子來。劬勞行役盡。興作太平開。不日工成後。茅茨果陋哉。燕山草堂集五

同友人夜話

時談乙未之禍二首錄一

往事重重述。傷哉鸚鵡危。遭逢思李涉。急難念袁絲。俯仰猶堪信。文章近可疑。同君寥落久。時命降心期。燕山草堂集五

別吳稽田

禾水吳公子。先朝老布衣。八年勞在外。三月喜言歸。東海波濤湧。西山薇蕨肥。堂前舊燕子。應傍故人飛。

無可作歸計。相隨亦便行。平安報兒女。艱苦說餘生。流落非張儉。還家豈少卿。尙留三徑在。課讀不如耕。燕山草堂集五

感興
巳丁

羽林十萬駐荊州。甲冑光芒射斗牛。誰報南人不復反。競傳西顧尙多憂。土揚金幣頒軍士。星散牙籌急廟謀。弓掛天山何日事。鴻飛遼渚自悠悠。

熒惑雍州塞上明。漢陽烽火震西京。將軍驍騎防河套。戰士貔貅戍渭城。龍節催車愁餽餉。虎符插羽又徵兵。禁中頗牧臨邊久。傾耳鑄歌朱鷺聲。燕山草堂集五

邊汝元 漁山詩草二卷

邊汝元。字善長。任丘人。諸生。撰漁山詩草二卷。成于康熙三十八年。狀物抒情。時有佳詠。詩格甚似龐垲。或所心摹手追者也。有馬之驪序。謂鄧孝威詩觀錄六百五十四人。而燕趙之人僅三十有二。引以爲恨。運會轉移。時有不同。予收順康人集部江浙有盛名者多不可求。所得者魯人最多。亦幸偶存耳。河北則去三十二人之數尙遠。蓋有足傳而不傳者。世不知好。則不傳之由也。

麥秋歌

五月至日二麥熟。腰鎌荷笠紛爭逐。車聲麟麟載登場。大車小車穀擊穀。薄田種麥纔十畝。帶青摘穗充

春白。收來作粥能幾時。餽我嗷嗷十七口。屈指乘權憶暮收。噉噉鳴蟬報早秋。雨暘以時復無蠹。甌兮
窶兮俱滿篝。鴈鴻飽飲稻粱謀。稻粱謀。疇能必。西成足食三之一。年豐啼飢真堪恤。君不見。麥秋日。

瀛山詩
草上

龍震 玉紅草堂集十六卷

龍震。字文雷。號東溟。天津人。蓋狂生也。不及禍爲幸。驚才絕艷。時作俚語。與當時名士。皆無往還。獨
善陳儀。儀負經濟才。專心水利。著直隸河渠志。亦獨奇震。爲作龍東溟傳。人奇事奇文亦奇。震必有大
過人者。此外與吳雯交甚篤。狂相近也。與蔡方炳朱書唱和。蓋偶然遇合。其所戀戀者閑社諸友潘倦翁
陸筠巢李霖臣張帆史梁芟梁及其弟叔敏果村王野鶴徐聲祖孟書門劉詩奴解怡園僧恆秋查漢客。而性
命之交則爲張笨山。今皆不悉其人矣。張死。屢有詩哭之。遂至廢吟。此外往還。僧及酒友而已。著玉紅
草堂集十六卷。末一卷爲文。自康熙三十三年甲戌至五十二年癸巳之詩。凡四千餘首。濟陽少幸行。讀
史有感二詩。必有所指。恨歌排悶病中三十首。鬱勃極矣。讀屈翁山詩云。未遂報韓意。長安不再游。使
有人拊搯及之。必與文字獄。亦幸免耳。烏衣巷云。猶有明朝舊公子。短裳破貌走街坊。明朝二字爲當時
厲禁。吳下口號云。索得姑蘇錢。便買姑蘇女。多少北京人。亂學姑蘇語。又云。買得女如花。抱上桃花
馬。是時正買蘇州女子進御。所以傷之。亦刺謔也。

農老從軍歎

欲作無懷民。嘗夢華胥國。九家同井飲。百畝分田食。朝則負耒出。暮則拋鋤息。飽煖歌康衢。逍遙忘帝力。思我治苗稼。積恨填胸臆。雨露嗟難均。旱潦獨相逼。可憐好桑麻。盡化枯榛棘。魚含野水沙。蝗鼓蔽雲翼。空倉號饑雀。土竈炊埃墨。手足雙胼胝。面目常黧黑。朝廷重邦本。官吏多漁色。憂歎屢經年。催租不緩刻。牛羊羣早空。雞犬禍莫測。尙從玉關征。誰許桃源匿。親戚哭永別。兒女成虛憶。涼風起隴西。高鴻辭塞北。淚映烽火紅。氣被驚塵塞。未爲百夫長。徒列三軍側。事事死弗顧。處處身當直。農書雖全廢。兵法今粗識。大將心忌能。賤子言須默。微勸何日立。豐歲幾時得。送老耕戰間。傷哉苦已極。玉紅草
堂集二

成文昭 暮觴詩集六卷

成文昭。字周卜。號過村。大名人。克鞏諸孫。官中書舍人。撰暮觴詩集六卷。爲湘西集上。湘西集下。商聲集。之荆集。東吳萬里集。文昭嘗及王士禛之門。而詩格乃不類。門才最盛。顧與寒峻爲伍。時雜酸辛語。生長北方。除下商外。蹤迹多在江湖間。爲不可解。詩不喜作七律。殆聞殷岳之風而興起者歟。

潞王墳

叢棘荒岡路不分。蒼黃野日弄斜曛。昏燈塵磬僧伽宅。古殿風鈴帝子墳。馬過草痕驚虎跡。人來松頂散鴉羣。無堪繾綣西陵意。雨濕榴花學舞裙。暮觴
詩集

020-654

清詩紀事初編卷六

乙編

鄂貌圖 北海集一卷續集一卷

鄂貌圖。字麟閣。號遇羲。姓張佳氏。滿洲葉赫人。崇德六年辛巳舉鄉試第一。嘗翻譯會典。詩禮二經。通鑑。纂修太祖太宗實錄。隨豫親王定陝洛。下江南兩浙。多羅貝勒征閩。單騎說鄭芝龍降之。鄭親王征川湖。安親王征喀爾喀。鄭世子征閩。降黃梧。多羅信郡王取雲貴。凡清初用兵。靡役不從。隱然爲監軍焉。官至中和殿學士。兼禮部左侍郎。卒於順治十八年。年僅四十八。事詳徐元文所爲傳。此編初集皆軍中所作。居滬稍久。得詩獨多。首冠洪承疇序爲最奇。承疇自謂能詩。今更不可見矣。續集其子賽圖所編。皆閩中所作。賽圖言初集刻于順治中。今審此編兩集字體板式如一。蓋皆康熙初所刻也。鄂貌圖爲滿洲入關第一詩人。鐵保輯熙朝雅頌集。褒然居首。其詩清穩可誦。知崇德時業已尙文。八旗子弟皆習儒書。暨乎入關。濡染益深。或競篇章。或登科第。幾與漢人無異矣。高珩栖雲閣文集有內翰林祕書院學士鄂公墓志銘。此書失載。志作于康熙十五年丙辰。稱其子賽圖中書舍人。徐傳謂今官監察御史。是志在傳之前。滿蒙御史題名。雍正以前。皆所不詳。不知賽圖官御史在何年。此集之刻。當在丙辰以後。

沅江土俗

誰知南詔地。風景自相懸。人熟桄榔味。山含鑿鑿烟。分明霜雪日。却是豔陽天。客路從何處。相看鳥道邊。北海集

岳端 玉池生稿九卷

岳端。字兼山。號紅蘭主人。安和親王第三子。卒于康熙四十三年。年三十五。此集曰紅蘭集一卷。蓼汀詩二卷。出塞詩一卷。無題詩一卷。附顧卓雲笥詩。朱襄織字軒詩。刻于康熙三十四年。續刻者曰就樹堂集一卷。松間草堂集二卷。題畫絕句一卷。桃坂詩餘一卷。則其族姪德普。爲刻于四十三年。已在身後。此本無所附顧朱二家詩。寒瘦集爲印選孟郊賈島詩。爲之銓釋。刻于四十八年。其詩頗爲王士禛所稱。與問亭詩同刻入蔣景祁輦下和鳴集。瓣香溫李。無題尤得義山神韻。納交東南名士殆遍。與博爾都同。與文昭異。是固一代宗潢之秀。後來無及之者。卽較之江南香宿。亦足自樹一幟也。紅蘭兄安郡王古香閣主人。又號谷園藥鉏。與弟雪齋。妹六郡主。俱善畫。能詩。

題陋軒集

泰州野人吳嘉紀。一生貧苦數何奇。我訪朱襄坐書室。偶於架上得其詩。詩中情思何淒絕。讀之細細生涼颯。調高句古人莫及。巉巖絕壁枯松枝。野人之面人不識。野人之詩世所奇。野人處世隱其身。謝世何

能隱其辭。我爲付梓傳百世。當與李杜相追隨。與之同時不同遊。嗚呼此恨何能有已時。玉池生稿
紅蘭集

西洋四鏡詩

數片玻璃珍重裁。攜來放眼雲烟開。遠山逼近近山來。近山遠山何嵬嵬。州言九點亦不止。海豈一泓而已哉。君不見。昔日壺公與市吏。壺中邂逅相嬉戲。自從神術一相傳。而後市吏能縮地。斯言是真非是僞。今設此鏡蓋此意。君若不信從中視。千里鏡

一拳卽是山。一勺卽是水。大鵬鷓鴣同羽翰。二禽各具生理。小至鷓鴣亦不止。更有蟻螟來巢蚊莫知。

人雖有目何能視。何況目力不同科。離婁師曠二子是。安得空青千萬斛。均分世人令醫其目來觀此。嗚

呼聖人之言曰。莫顯乎微。豈徒然而已。顯微鏡

雞聲絕。明星滅。火輪飛上海猶熱。羲和射光穿玻璃。不學燧人鑽木穴。一團龍腦爐中熬。火鏡

有客攜鏡來。命我持鏡視。一人當我前。便見二三四。十人當我前。其數不勝記。濟濟皆衣冠。竟無絲毫

異。如蟻復如蜂。揚眉而吐氣。去鏡更一窺。餘不知所逝。眸子蔽一層。卽莫辨真僞。今始覺其詐。此鏡從

此棄。將此棄鏡心。可以推而及萬事。多寶鏡
玉池生稿
夢汀集一

博爾都 問亭詩集十二卷

博爾都。字問亭。據皇朝文獻通考封建考。輔國公拔都海。太祖曾孫。順治十七年卒。謚恪僖。子博爾都

封三等輔國將軍。康熙四十七年卒。後坐事追削爵。其事可考者唯此。著有問亭詩集。凡白燕栖草八卷。東臯雜詠一卷。茫茫吟一卷。聯句集句一卷。紅吟一卷。雜詠專及隱居游釣之作。茫茫則悼亡。紅吟所填詞。博爾都少壯耽吟。清穩可誦。一時名士畫人。多從之游。結納及于劉獻廷。可謂好奇矣。其集傳世甚稀。震鈞天咫偶聞至不能舉其集名。他書著錄但云有東臯吟而已。集刻于康熙三十五年丙子。在卒前十一年。自云。總角失怙。卒年正六十也。贈汪琬詩。有吾從千載志句。琬爲此集作序。盛許其明道之功。蓋亦究心理學者。

觀湯季良點星圖歌

濡毫欲贈西湖客。語覺驚人苦未得。忽觀座上點星圖。珠騰銀海與何極。倒挂銀潢一縷長。西崑發源幾萬億。三垣二十八樞輔。勾陳大角隨手植。磨墨滴露書星名。題徧經緯天體成。內外二圈黃赤道。但恨周無日月行。二十四氣沿邊造。一日一旋全酷肖。斯圖莫作等閒看。應知時展爲一笑。白燕栖詩草一

索芬輦下和鳴集

索芬。字素菴。滿洲旗人。事迹不詳。有晴雲書屋稿。

迎年曲

貴戚紅粧翡翠樓。長安豪俠白狐裘。內城多少嬌兒女。蓮草爲花插滿頭。輦下和鳴集

文 昭 紫幃軒詩三十二卷

文昭。字子晉。號薌嬰居士。又號北柴山人。閑散宗室。其子逢人改名逢信。出繼贈固山貝子屯珠爲嗣孫。

襲封奉恩輔國公。聖祖嘗有文昭詩學甚好。可惜身有殘疾。不能行走之論。集中有辭俸語。第不悉其有

無爵秩。詩分二十一集。約起康熙三十四年乙亥迄雍正十年壬子。末章云。年登五十二。今與世間別。自

注生子庚申。康熙十年應即卒于此年。文昭嘗及王士禛之門。詩格頗與相似。多流連光景之作。自恨宗室。

非奉命不能出京邑。高山大谷。浦雲江樹。未嘗屬目。故詩不能工。然正以此。其詩無江湖油滑之習也。

輩行亞于博爾都岳端。而篇章較富。詩律較細。皆就林泉。其胸襟過于塞爾赫胤禧遠矣。篇詠中不乏遺

事。飛騰集庚子康熙五十九年四月過萬柳堂自注。今改爲拈花寺。松風文集丁未雍正五年王正。琉璃廠買燈并國初諸

家全集詩。頗足備京華掌故也。

踏燈竹枝詞

舞象搏獅各弄威。花腔紅鼓唱成圍。都人扮傀儡。腰鼓而唱。謂之打花鼓。又或蒙紗繪作獅象狀。謂之舞博戲。繡花鞦韆窄前門遠。看過東華緩緩歸。

鼇山點過又星毬。蕩眼春蒸市上樓。底事金吾還呵導。自十三至十五夜。五城察院導紅燈籠市上。較平時呵從甚都云。幾人閒步有通侯。

甲第連雲夜宴開。照天烟火紫崔嵬。京師烟火大者。多至三十餘。奇巧不可名狀。每放必以長竿云。五陵公子豪華甚。倒挂金鞭放地雷。爆竹大者謂之

地雷。本西洋製法也。

長竿短索六街連。帖地掀風色藝全。南方走索者多少婦。近京師亦時有云。一似天魔初舞罷。粉香吹過鬢雲邊。古集一

塞爾赫 曉亭詩鈔四卷

塞爾赫。字慄菴。一字曉亭。號北阡季子。太祖母弟穆爾哈齊曾孫。康熙三十七年。授奉恩將軍。官至兵部侍郎。卒于乾隆十二年。年七十一。著曉亭詩鈔四卷。事具李銜所撰家傳。乾隆二十年。胡生藻詩獄。牽涉鄂昌。于鄂昌家中查出塞爾赫曉亭詩鈔。有杜姬詩。變亂黑白。爲不敦實務本。諭戒八旗。杜姬詩詠明秦妾杜。從明秦譚寧夏八年事。不知變亂黑白。究何所指。蓋深惡之。以爲藉口。雍乾時所最惡者。宗室旗下沾染漢人習氣。蔡珽以交結查嗣庭爲大罪之一。塞爾赫婿于蔡毓榮。又以女字珽子永福。兩世昏姻。不免受珽牽連。其實塞爾赫與屈復友善。備致推崇。復惓惓故明。使有人搆及。則曉亭得罪。當在鄂昌之上矣。塞爾赫及見王士禛。詩格極相似。較岳端博爾都婉而多諷。集中西洋鏡詩云。西海霜侵漢使頭。葡萄數醉月支秋。歸來要領都無得。爵賞居然博望侯。明明刺譏。與題不應。蓋用口語西洋鏡一戳即穿耳。其他多有所指。

嵯關

來水會津門。東流勢浩瀚。溜灑辨東北。飛湍激洄瀾。浮梁跨奔流。長虹亘秋漢。萬落迤市廛。千櫓集鵝鵝。煮海堆白鹽。分飛從泮渙。皚皚玉砂明。峨峨雪山燦。咫尺價懸殊。關橋之南。斗鹽三錢。過橋增價。不啻倍蓰。公私競昏旦。嗟

哉天地利。何年成壠斷。壠外起歌樓。錦綺光零亂。轉念煎者勞。隆冬揮熱汗。晚亭詩鈔三

胤 禧 花間堂詩鈔一卷 紫瓊巖詩鈔三卷 續鈔一卷

胤禧。聖祖第二十一子。封慎郡王。高宗列其詩國朝詩別裁之首。以代錢謙益者。號紫瓊道人。又號春浮居士。卒于乾隆二十三年。年四十八。著有花間堂詩鈔一卷。紫瓊巖詩鈔三卷。續鈔一卷。外家江南陳氏。故喜從南士游。工書畫。作字神似鄭夔。居朱邸而有江湖之思。人情之相反也。

觀傅雯指頭作畫歌

傅生傅生。爾既不學昌黎手。分天章。挾銀渚。復不學倪寬帶。經把鋤。樂園圃。胡爲經年以指代毫錐。破墨顛。籠如糞土。靈山秀水不自惜。時爲人家掃廊廡。長安酒肆半題名。石塊松魂亂撐拄。當其醉後狂叫疾。走不可當。墨海掀翻落煙雨。青天晝陰黑蛟鳶。舉小將軍大斧劈。齟齬紛紛不足數。時秋八月日十五。置酒高堂。還擊鼓。解衣爲我掃素楮。奮臂怒搏氣如虎。觀者如堵目眩不得語。日岫雲濤樓觀飛。圓不因規方遁矩。橫槍秋水暝煙生。亂點春風落花舞。顛復連。倒還豎。物類輸形各就伍。吁嗟乎。昔日張顛以髮濡墨得會聞。今日傅生以手代墨誰見許。會當爲爾致墨千萬車。共老雲莊爲墨侶。花間堂詩鈔

范承謨 范忠貞集十卷

范承謨。字觀公。號嶧山。漢軍旗人。文程仲子。順治八年。選充侍衛。是年始令八旗滿漢子弟。與漢人一體鄉會試。承謨得鄉舉。九年成進士。選庶吉士。散館授侍讀學士。康熙六年。爲浙江巡撫。十一年。擢總督福建軍務。翌年。三藩事起。爲耿精忠所囚。十五年。精忠事敗復降清。爲滅口先殺承謨。及幕僚吏卒五十三人。時承謨年四十二。事詳畫壁遺稿自序。此集劉可書所編。一爲碑傳。二三奏議。四吾廬存稿。五百苦吟。六畫壁遺稿。七雜著。八九十則宸翰挽歌挽章也。承謨幕中多名士。魏際瑞許旭皆受敬禮。稱永仁且從之死。雖由文士乞食。而主人好客。不矜勢位。或亦一得歟。

行田紀懷

單車瘴嶺驅中夏。千里炎荒度夕陽。自是先憂期後樂。却緣聖主視如傷。幃帷戴雨行泥隴。使節馳星破曉光。每值道塗全梗塞。忍看比屋半流亡。芻蕘幸不煩民力。糗糲何妨亦自將。我黍漫言嘗旨否。吾民久未厭粃糠。雁鴻欲集聲先咽。鳩鵲相逢色已愴。草澤三空寧類漢。桑林七事却同唐。瘡仍無肉何由補。繭已窮絲不及忙。滿地榛蕪成草昧。稽天崩潰竟洪荒。老翁行役悲溝瘠。寡婦誅求哭路旁。聞道使君生化虎。更傳令史共爲狼。埋輪已誓從都候。叱馭誰能畏太行。飢溺只今寧幹止。澄清於此慰懷望。敢云善政能匡植。豈爲虛名起激揚。但使鞠躬恭臣貌瘦。寸心聊以報吾皇。

范忠貞
公集四

吳興祚 留村詩鈔一卷

吳興祚。字伯成。號留村。漢軍旗人。以貢生官萍鄉大寧知縣。遷忻州知州。康熙二年。降補無錫知縣。遷行人司行人。仍留任。十五年擢福建按察使。人以爲奇遇。實則在任早已加至按察使矣。此例唯康熙中有之。遂歷福建巡撫。兩廣總督。號爲知兵。頗有聲績。二十八年以事降副都統。鎮守大同右衛。旋謫沙克所坐臺。三十六年卒。一生遭遇。始豐終賤。則上之愛憎使然。撰留村詩鈔一卷。與祚喜與文士游。一時名士。多共唱酬。頗能沾溉寒士。故人望歸之。其詩吐屬清雅。氣度蕭散。與其人不類。亦不識簿書叢脛中。安有此閒情逸致。是殆有兼人之才力者矣。

抵香山捨舟從陸經翠微邨前山寨官開口至濠鏡壘遍觀砲臺及諸形勝薄暮留宿

參差車馬赴朝霞。山勢逶迤路轉賒。徐行緩轡一回首。城郭依稀塔影斜。馬蹄踏碎草頭露。巖壑微茫幾重霧。斷橋東向曉雞啼。烟起山根變蒼素。嶺外雲深抹翠微。翠微邨外落花飛。負販紛紛多估客。辛苦言從壘裏歸。前山寨接官開口。鬼子來迎羣稽首。自從逆寇逞狂瀾。蕪草涼烟斷行走。天威赫赫靖妖氛。海宇忻然瞻慶雲。年來花柳無春色。春色於今倍十分。迴環島嶼如鱗次。昔日腴田荆棘蔽。從茲萬姓樂昇平。老幼扶攜返村肆。烟鎖雙城峙砲臺。神威八面一時開。聲驚百里撼山岳。始信鯨鯢不敢來。蠻鄉別是一風景。樓危海岸波披影。落日千家打暮鐘。令人不覺發深省。南望蕭疎十字門。青山雙畫兩眉痕。波斯

未至珊瑚香。維舟空載月黃昏。黃昏月上烏柏樹。繩床瓦枕留客住。明日還看九里香。春風春雨寧相如。

留郢
詩鈔

三巴堂

未知天外教。今始過三巴。樹老多秋色。窗虛迎月華。誰能窮此理。一語散空花。坐久忘歸去。聞琴思伯

牙。
留郢
詩鈔

達濠

鼠寇今宵遁。山南空戰場。風吹溪瘴黑。日落嶺雲黃。岸草衰猶碧。巖花慘不香。何年閩左復。哀鴈集潮

陽。
留郢
詩鈔

南澳峙立閩粵海中爲兩省海道咽喉

渡海登南澳。浮天曉日紅。山形皆向北。水勢自朝東。浪捲晨昏霧。帆懸閩粵風。咽喉成鎖鑰。控制兩相

同。
留郢
詩鈔

盧震說安堂集八卷

盧震。字亨一。自署竟陵人。頗怪其爲巡撫不避本籍。及讀陳奕禧春謁堂集。有盧中丞行狀。乃知震先世
盧老始遷竟陵。洪武初。督水軍有功。其子觀音保隨軍北征。襲世職。遂隸籍京師。震爲范文程女夫。順

治九年。以諸生特試。授弘文院編修。參畫朱瑪喇軍。討李定國。康熙初累擢祕書院學士。八年爲湖廣巡撫。吳三桂事起。棄長沙遁。論絞獲釋。管烏喇船廠。放歸。卒于四十一年。年七十七。然奕禧所述。有與所撰說安堂集牴牾者。集出于自述。當較得之。凡奏疏二卷。杜詩說略二卷。五律一卷。七律三卷。奏議皆亂後經營。略足窺見當時情事。荒地卽授墾者爲永業。由震持奏。部議屢駁始允之。遂爲例通行各省。唯此一事有關係也。說杜有悟入處。詩頗春容。嘗以就養至江南。喜與文人逸士游。嘗識冒襄陸嘉淑。震當爲漢軍旗人。而署竟陵者。蓋不忘所本。過大凌河詩注云。少保母舅劉公會困于此。津門詩注云。母舅大司馬劉公國初監軍于此。不知何人。記注闕者多矣。俟考之。子詢。字舜徒。官至雲南布政使。亦能詩。

鐵嶺道中

古今不改舊山川。幾許淒涼馬首邊。百里金湯餘缺堞。數家村落冷炊煙。諫臣逐客多先代。舊俗遺民自昔年。處處扶犁稱沃野。老翁猶記用兵前。說安堂集八

施世綸 南堂詩鈔十二卷詞賦一卷

施世綸。字文賢。號溇江。又號靜齋。漢軍鑲黃旗人。琅仲子。康熙二十四年。以廕生官泰州知州。擢揚州府知府。有天下第一清官之目。歷湖南按察使。猶稱其操守果廉。但遇事偏執。百姓與生員訟。彼必護庇百姓。生員與搢紳訟。彼必護庇生員。五十四年。由戶部右侍郎。出爲漕運總督。閱五年。命勘西安至河

南府輓運路逕。翌年回任。卒于康熙六十一年。年六十五。事具清史列傳大臣傳。撰南堂詩鈔十二卷。詞賦一卷。詩自官泰州以前。至六十年入陝止。專摹唐賢。詩格風流。殊與其人不類。在揚州最善黃雲宗元鼎。皆處士也。世傳世綸居官事。至演為說部。多附會不足信。然亦有實事。施不全之稱。見顧公燮消夏閒錄。謂其貌甚奇。眼歪。手癢。足跛。口偏。寶二冬見紀昀閱微草堂筆記。又康熙時。南北道途多梗。京保間亦然。行旅者有戒心。皆有記載足據。所云太平盛世。竟如斯乎。

遊龍潭

有上下二潭

策馬涉谿澗。問龍斜照來。碧潭上下月。瀑布古今雷。地僻僧年老。峰深寺影迴。蜿蜒不可見。終擬化為

槐。面潭上禪院。有古槐一株。盤礴數畝。枝撐二十餘柱。若舞空遊龍。殊足異也。

南堂詩鈔十二

納蘭成德 通志堂集二十卷

納蘭成德。本名性德。以避廢太子嫌名胤而改成德。字容若。正黃旗滿洲人。明珠子。康熙十二年進士。官侍衛。卒于二十四年。年三十一。事具徐乾學一等侍衛進士納蘭君墓誌銘。成德舉壬子康熙十年秋試。由乾學房薦。遂師事之。以三六九日至乾學所。鎮日講習。乾學素附明珠。盛稱成德之學。先于己未十九年為刻通志堂經解。復于辛酉三十年輯刻其詩文。為通志堂集二十卷。是時明珠已罷相。實由乾學受聖祖密旨。嗾郭琇劾罷之。旋乾學亦解尚書任回籍修書。明珠外甥傅臘塔官江南總督。正督過乾學兄弟。為明珠報

復。徐元文憤恚而死。乾學之刻此集或意在釋嫌修好歟。集凡賦一卷。詩詞文淥水亭雜識各四卷。附錄二卷。成德喜填詞。初爲側帽詞。後改飲水詞。一時以秦觀柳永擬之。詩吐屬清雋。文多經解序錄。經解之刻。順涇實任校勘。疑其序皆涇代撰。雜識鈔撮成書。頗及西洋農具。謂西人風車藉風力以轉動。可省人力。此器揚州自有之。而不及彼之便易。西人取井水以灌溉。有恆昇車。其理卽中國之風箱也。又謂中國用桔槔。大費人力。西人有龍尾車妙絕。其制用一木柱徑六七寸。分八分如螺旋者圍于柱外。斜置水中而轉之。水被誘則上行而登田。又以風車轉之。則數百畝田之水。一人足以致之。大有益于農事。苟得百金。鳩工庀材。必相仿效。通行天下。爲利無窮。其及時事者。唯熹宗張后一則。述故明宮監王永壽之言。謂冒稱天啓皇后者。爲魏忠賢養女任氏。熹宗朝封貴妃者。此事由順治初收養故明妃嬪。有天啓妃張氏。世遂疑張后未死。復有好事者。造爲王永壽之言。以證冒稱者之爲任氏。反生枝節。明史書張后自縊死。最爲得之。野史以訛傳訛。本不足責。此復加以徵引。則爲不知黑白。成德喜延接文士。最厚善者。嚴繩孫。顧貞觀。秦松齡。陳維崧。姜宸英。徇貞觀之請。贖吳兆騫于戍籍。俾居西席授讀。未幾兆騫沒。復歸其喪。以是尤爲人所稱。然如徐嘉炎所言。則門客爭憐妬寵者。大有人在。康熙初。侍衛主傳宣。與南書房主擬制者。對掌樞機。貴要莫比。成德卽不藉父勢。固足令蠅集蟻附而有餘矣。

輓劉富川

人生非金石。胡爲年歲憂。有如我早死。誰復爲沈浮。我生二十年。四海息戈矛。逆節忽萌生。斬木起炎

州。窮荒苦焚掠。野哭聲啾啾。墟落斷炊煙。津梁絕行舟。片紙入西粵。連營倏相投。長吏或奔竄。城郭等廢丘。背恩寧有忌。降賊竟無羞。余聞空太息。嗟彼巾幗儔。黯澹金臺望。蒼茫桂林愁。卓哉劉先生。浩氣凌斗牛。投軀赴清川。噴薄萬古流。誰過汨羅水。作賦從君遊。白雲如君心。蒼梧遠悠悠。通志堂集三

西苑雜詠 四十首 錄二

進來瓜果每承恩。豹尾前頭拜至尊。正是日斜花雨散。傳呼聲在望春門。

纔翻急雨暗金河。曲罷催呈雜技多。一自花竿身手絕。那將妙舞說陽阿。通志堂集五

揆 敘 益戒堂自訂詩集十二卷益戒堂詩後集十二卷

揆敘。字愷功。正黃旗滿洲人。明珠子。康熙三十五年。由二等侍衛特授翰林院侍讀。後六年。遂膺掌院學士。兼禮部侍郎。官至左都御史。仍兼掌院。卒于五十六年。年四十三。事具清史列傳大臣傳。撰益戒堂自訂詩集十二卷。為壬申康熙三十一年迄癸未四十年之詩。益戒堂詩後集十二卷。其子永壽哀遺稿。自甲申四十四年迄乙未五十二年之詩。并前集刻之。揆敘少師吳兆騫查慎行唐孫華。詩筆通敏。篇翰甚富。二十年間。謁陵游幸。南巡出塞。無役不從。詩皆編年。于山川道里產物風俗。紀載特詳。域外見聞。多可徵信。屬辭巽雅。多作恬退語。世宗獨深惡之。謂大臣中居心奸險。結黨行私。唯阿靈阿揆敘為甚。揆敘挾其數百萬家資。與阿靈阿合謀。買囑優伶。每于官民譙會之所。將二阿哥即廢太子肆行誣蔑。二阿哥之廢。阿靈阿揆敘攘

爲己力。要結胤禩等。同爲黨援。肆無忌憚。令于阿靈阿墓碑改鑄不臣不弟暴悍貪庸阿靈阿之墓。揆敘改鑄不忠不孝柔奸陰險揆敘之墓。蓋康熙四十七年。太子旣廢。令于諸皇子中舉奏一人。揆敘與佟國維馬齊阿靈阿鄂倫岱。皆舉胤禩。後來阿塞年隆之誅。幸已先死。不然。決不能免也。明珠高士奇多藏。歷百餘年至道光中始盡。又貪運之久長者。

連夕觀放煙火

暖風幾日回青甸。傳柑處處開春讌。正是天家賜酺時。月光偏照笙歌院。綵樹華燈未許誇。煙火新從火攻變。祕方傳得細修治。百巧千奇國工擅。或懸高架或深埋。或貯錦函藏不見。歌停酒半月欲午。忽吐微光細如綫。一聲霹靂火城開。萬象空中爭涌現。忽成華樹忽樓臺。忽作城垣忽宮殿。忽如士女共游嬉。忽若魚龍爭曼衍。忽然砰訇殷山谷。伏兵四起相攻戰。忽然一騎冒火入。亂掣長虹走飛電。礮車下震地軸搖。星毬上射天頂穿。賞心未足翻欲驚。注目難窮不遑詢。但惜變滅太迅速。未許奇觀久眷戀。豈知巧藝無盡藏。夜夜改移重結撰。有如樂師譜新聲。一曲各成一徹遍。上元讌賞自年年。今歲連宵不知倦。樂哉此舉豈易逢。幸際聖明臨寓縣。光華燭照偃烽煙。長得燒燈慶清晏。益戒堂白
訂詩集一

詠冰牀

嚴冬水澤堅。夾岸冰牀作。宛然大尺簾。上容數人坐。一夫挽之行。迅若飛鳥過。層冰平如砥。滑淨紗榻瑩。比舟無傾側。比車絕轆軻。不唯資行旅。兼以致百貨。年年流傭輩。藉以救寒餓。推挽八九里。履直三

五箇。安坐得代步。談諧樂無那。我獨爲僂然。足酸背汗流。臨深復履薄。前賢慎爲大。觀井勤繫輪。飲水防反壅。行險而爭先。可用不可賀。凝陰不久長。轉瞬陽和播。赫然金烏昇。春爾狐冰破。嗟爾坐牀人。安能免跌蹉。益戒堂自訂詩集二

鐵花

有序 冶鐵既流。以大鐵擊而灑之者樹間。輒逆火成花。灼爛奪目。此煙火之又一變也。

鐵擅利金號。獨任爲五兵。當其未成器。爐竈相煎烹。久之輒消鑠。化作水一泓。精神不自閱。騰上如飛英。何年老冶師。取媚俗眼睛。矧此百煉餘。灑向空中明。春若雌霓起。霍若閃電驚。瞥見寒林中。千花萬花生。枝幹所格閔。激射尤縱橫。豪家鬪煙火。未許裂眼爭。老翁擅擲火。讓爾狡獪并。筵前就此戲。往往熬五更。奇觀來所詫。我獨心忤忤。在冶苟踴躍。不祥禍始萌。從革失厥性。休咎占五行。今爾人所措。非以怪自呈。釜鑪則可鑿。犁鋤則可耕。何況作刀杖。可以致太平。惜哉有用物。但博喧笑聲。良材視所用。美質視所成。對此三歎息。持杯不能傾。益戒堂自訂詩集二

風槍十六韻

禮樂昌文德。菟苗習武功。選徒紛合沓。剛鐵備瓊璫。誰識矛端利。須資囊口風。經營雖哲匠。指授出宸衷。飄颻收殞末。颯颯聚匣中。摧鋒非步伐。飛擊上虛空。鉉取邪谿鋌。神驚重巽通。揚颺驅屏翳。擁扇使豐隆。勢震昆陽瓦。吹疑解谷筒。良金亦自躍。堅木信能攻。奔激穿林葉。超騰逐斷虹。綠沈宜暫臥。黑稍未稱雄。勝器真難測。神機孰許同。潛飛抨狡兔。捷發落驚鴻。驅使兼天籟。靈奇奪化工。萬年珍武庫。垂

法永無窮。益戒堂自訂詩集三

攢花

有序。煙火始見於元趙文敏公集中。近世多於元宵設之。其製如爆竹。吐火成各種花者為筒花。連吐白光三四。高數丈如月照耀者為賽月明。綴於葦末。直上天半。若曳尾之星者為起火。今益奇巧。合三種為一。得火則高下齊發。目不給賞。洵大觀也。而名不雅馴。上賜名曰攢花。恭賦以紀。

煙火著自松雪詠。桃紅絮白爭紛拏。爾來流傳四百載。巧匠踵事頻增華。只今新樣更奇絕。百花聚集成一花。傳柑席上試點放。頓令佳節添繁華。微茫一縷着朱火。倏忽四面歎紅霞。花叢飛繞玉蝴蝶。月輪躍出金蝦蟇。大花小花互明滅。千月萬月紛交加。看場畜眼驚未見。贊嘆希有聲囂譁。此樂人間豈易得。修治祕法傳天家。曾邀龍顏為一解。攢花特賜新名嘉。奇觀夜夜客寓目。同樂喜沐君恩奢。却笑鷗波亭上客。燃燈鍊藥徒矜誇。益戒堂自訂詩集四

種桑詞

浙西家家業種桑。東風吹林婦子忙。舊條采盡新葉發。春月飼蠶冬飼羊。蠶頭戛戛絲成繭。羊尾襍襍毛乍剪。種根入饌絹作衣。人間何物得自私。四方仰給一方苦。朝暮辛勤無少補。當年太史應未知。千戶侯空說齊魯。益戒堂詩後集三

詠鳥鎗

古法翻新擅火攻。利於矢鏃迅於風。星流文豹先投谷。機發珍禽已墮空。得雉郊垆矜妙製。消烽火陸奏奇功。天威遠震渾無外。一統聲靈萬國同。益戒堂詩後集五

詠白鳴鐘

司晨候節例應齊。機轉輪行按不迷。萬里乍回雲帳蝶。六時寧誤雪窗雞。蒲牢韻每煩撞擊。蓮漏形還費考稽。何似經營超意匠。巧呈新製海洋西。益戒堂詩後集五

修世思 與梅堂遺集十二卷耳書一卷 鮮話一卷

修世思。字儼若。正藍旗漢軍人。康熙二十六年以廕生選授賀縣知縣。調思恩。三十二年卒于官。年四十二。撰與梅堂遺集十二卷。一至十卷爲詩。十一卷詞。十二卷文。耳書記所見聞。分人物神鬼四類。自謂譚天誌怪。鮮話則乙丑康熙二十三年客游過恩平時。記其地風土。及荒寂無人之狀。世思少負雋才。喜結名流。嘗謂自顧而喜者三事。作詩飲酒與不說謊。亦俊人也。詩多深情一往。詞尤俊邁。文則未能入格。先高曾祖三世行略。述修氏世居撫順。洪武間。始祖達禮以邊功世襲指揮同知。至高祖養義始徙遼陽。萬曆中。族人養性之叛。養義父子坐繫永平獄中以死。祖方年孀于范楠。從滿洲軍戰死灤州。得卹金二百。曰人命錢。遺孤國禎六歲。舅氏文程撫之成立。順治五年。貢生。謁選無爲州知州。屢官江西巡撫。是卽世思之父。鮮話記繡花鍼王輿者。李定國餘黨也。本朝定鼎。仍負固據恩平。從來催科之法。止于扑責。輿則殺擄橫加。恩平近日賦稅。除荒纒四千金。人丁除缺纒七千餘丁。焦頭爛額。悉斷送于挺兮刃兮之下也。大兵勦輿。輿闔室焚死鳳凰山。唯此二事。足備故實。遺集爲其弟世集所刻。有世集序云。壬子康熙十一年以

後暫停滿洲制科。亦記載所未及。

二月初八夜慟哭成此錄一

海天貫索明。三年伴豺虎。可憐肉在几。一身已無主。豈不能富貴。甘心齒刀斧。鐵石此心堅。茹藥復荼苦。寄語三致意。欲吐不忍吐。死後錫青眸。孤兒與寡母。與梅堂遺集二

讀田間集有作

綠柳江城春水邊。東風破屋困青氈。先朝耆舊誰仍在。九死酸辛剩此編。薄醉垂簾街鼓盡。寒宵苦雨夜燈前。尋思野老頭如雪。瘴海吞聲萬里旋。與梅堂遺集八

十三陵錄一

國破長秋未死身。淒涼往事記來真。天清地白思歸骨。鶴髮雞皮病向人。香火百年多涕淚。起居八座舊麒麟。梨花麥飯行吟處。老仗青驢跨下馴。贈宜者孫敏公也 與梅堂遺集九

桂林雜感八首錄一

獨秀山前端禮門。興亡人說靖江藩。千尋葱嶺梵王座。一炬咸陽高帝孫。管黑射來秋殿月。廊虛夜出鬼娃魂。更看死難孤難嫁。都尉安西不必言。孔定南以殉難死。孫廷齡以作亂死。俱在靖江舊邸中。與梅堂遺集九

龍潭酒家家大人喜飲花氏酒。此行訪其家索醉而去。

楊柳晴江一住船。白頭老婦舊墟邊。親來把酒郎君醉。細數春風十六年。與梅堂遺集十

曹寅棟亭詩鈔八卷詞一卷文一卷

曹寅。字子清。號荔軒。又號棟亭。內務府包衣旗人。自署千山。蓋其先爲遼陽人。寶砥則受田所在。父
璽。康熙元年。從文鈔重葺難鳴寺浮圖碑記以郎中差江寧織造。十年。寅年十三。挑御前侍衛。二十九年。以郎中差蘇州
織造。越二年。改江寧織造。四十三年與妻兄蘇州織造李煦。疊兼巡視兩淮鹽務。官至通政使。卒于五十
一年。年五十四。撰棟亭詩鈔八卷。詞一卷。文一卷。寅天資穎異。詩詞皆有逸筆。文亦雅潔。顧景星爲之
序。謂寅門第國勳。長江南佳麗地。如臨風玉樹。甫曼倩待詔之年。腹卿嶼二酉之祕。貝多金碧。象數藝
術。無所不窺。弧騎劍槊。彈碁擊阮。悉造精詣。寅亦自謂少寄名浮屠氏。頗習其書。兼嫻天竺文觀。其所
爲詩文。記問亦頗醜博。每詳徵故實。重修周櫟園先生祠堂云。順治二年乙酉。前明背約。羈使臣。王師
南伐。羈使之事。爲從來載筆者所未及。當必有據。性喜聚書。多得季振宜徐乾學所藏。後俱進入內府。
南中名士。無不交往。盛有所遺。或爲之刻集。唯稱顧景星舅氏。爲不可解。曹氏祖孫父子承襲織造。專
其利至六十年。寅沒。虧織造公款近三十萬。乃命兩淮巡鹽御史爲之填補。恩紀之隆。從來未有。蓋推奉
聖之恩。命之供耳目偵伺之役。司採買傳辦之事。鹽課所餘。半以供織造。半以備進奉。然南巡六次接
駕。全唐詩佩文韻府開局刻書。王公貴人。不時婪索。所費無算。皆取之府庫。兩淮鹽課。遂不可問。雍正
初清算。綱商大半破家。曹頌李煦亦至籍沒。則不盡關鍵事。蓋惡其爲廢太子舊人也。

菜花歌

吳中菜花天下無。平疇照耀黃金鋪。朝陽夕陽幾百里。惟剩白水連青蕪。四月吳中春事足。四郊花氣穿城灑。平分千巷畫船閒。農家兒女無拘束。農家兒女飯出遊。踏歌不出畦兩頭。頭戴纒絲二麥穗。油菜結子柔桑抽。勸農使者停征稅。廳前畫諾花前醉。水曹散吏舊期門。也騎細馬傍山村。君不見。他鄉井逕無尋處。春風遠拓黃花戍。含哺鼓腹只吳儂。菜花中朝菜花暮。棟亭詩 鈔二

銅鼓歌

雅州銅鼓鳥羽青。四蟾蝓鈕鏤虺形。豈堪懸注肆考擊。或疑烹飪充蠻廷。又云丞相渡瀘時。鑄以張軍留模型。前賢遺迹不可測。語患怪誕多離經。物非適用貴取意。居常磨洗來寒廳。納水三斛副是腹。爬梳膩垢光而熒。毫芒差若列支紀。圓轉直可窺盤星。刑天獨舞猛志在。一于腐朽求精靈。豪華徒誇子父鼎。賞鑿何重哥密餅。增除蔓青吐紫雪。吾方灌溉開墮町。鼓面若儀器。四鈕峙立。疑可測驗水土。以待知者。棟亭詩 鈔二

諸敏菴彈平調琵琶手法特妙無和之者感賦長句

近代四絃誰第一。野乘虛傳查八十。能操北調變清鐘。前有短朱後曠鐵。二子神理苦未超。鷓皮玉撥矜兒曹。紫花扎扎白翎雀。聽風有耳臨官橋。高宮入破無繁徵。楓香一拍崑崙死。雙彈重按海東青。邊關略犯河滿子。蘆管角角雞登木。胡撥嘈嘈怪鳥啄。輕擺慢撚得餘閒。猶截紅牙整巾束。葉兒恂惡笑揚州。官筵粉墨雜啾啾。套數空翻村衙鼓。晚風不唱十三樓。錦堂壁月荒煙冷。隋唐宮調無人省。羣看輪手拂檀

槽。四座蒼蒼亂花影。棟亭詩
鈔三

夜飲和培山眼鏡歌

銅盤磨雲光綴綴。晶瑩刻得棘端刺。白頭巾箱何所爲。便便已飽五經笥。殘年眵淚如撒沙。漫空赤暈生狂花。琉璃自信眼根見。黠黠豈尙工倕夸。生人六鑿宜藏用。五官首出司明重。電光一抹寧再來。兩眶秋水搖春夢。追曉寓碗世玩多。蛛絲倒影成壁窠。堆案還愁束帶熱。等身其奈操觚何。六義精嚴神不滅。萬象芸芸親手澤。指穿腕脫敢云勞。墨華直灑心苗血。塗朱抹碧妄男子。涅烏拔白真羞死。雙環奉君君志矢。吾衰抽筆猶堪此。與君半百皆稱翁。花檣荻戟頗憶嬉庭中。羲和縱轡肯相待。會鼓猛氣驚盲聾。移家定載三十乘。請君覆酌乾千鍾。棟亭詩
鈔四

望雨謠

海雲轟轟吹龍風。玄芝倏變金芙蓉。江雲飄飄急奔馬。江北譌傳雨符下。朝來巷陌仍如焚。几榻灼手不可捫。蒼生垂頭望蘇息。九衢寸步飛黃塵。去年六月雨翻盆。鍾山朝朝雲出門。今年六月竭陂澤。膚寸不肯通細縑。山兮巔童耳豈聵。赤子嗷嗷亦可畏。幽天赫赫勢霧霏。雷公振鐸驅山碎。旱魃聾聵慘莫支。家家當戶綠冰絲。陰陽順馭安河嶽。眼見西成鼓腹時。棟亭詩
鈔五

客餽洋茶半開戲題

淺擘程紅嫩瀨開。半含寶氣脫珠胎。豔應蠻女咀香去。奇爲商胡販海來。吉了詛春渾不省。唐花紛笑總

成堆。謾矜貴種披帷出。還遣當風更築臺。棟亭詩
鈔六

李興祖 課慎堂文集十四卷詩集三卷詩餘一卷

李興祖。字廣寧。號慎齋。漢軍旗人。家于安肅。所謂鐵嶺李氏。蓋成梁之族裔也。以廕官部曹。康熙三十三年。出爲慶雲知縣。歷河間府同知。擢知府。簡山東鹽運使。擢江西布政使。以事罷官。好文學。喜結交南士。嘗爲其師王餘佑編刻五公山人集。又爲魏坤刻水晴樓集。風雅好事。貧交依以託命。撰課慎堂文集十四卷。詩集三卷。詩餘一卷。三十二年權離時所刻。詩文議論皆似餘佑。自謂癸亥康熙二十二年讀禮。徒步入山。敦延先生至里門。朝夕請業。自恨鈍根。于濂洛薪傳。經濟諸務。均茫然未曉。獨聲詩一道。略嫻吟咏。微辨體格。古文不敢妄作。粗識源流。皆受先生之教于萬一。然餘佑翌年卽沒。興祖師之不及一載。此集祁州孝廉非有刁公包墓誌銘。卽餘佑病中不能屬筆。興祖受命爲之者。然則興祖爲詩古文。先已具有規模矣。其他紀事之文。清故真隱申之王先生佑行狀。魏坤卽本之以作傳。明都察院左都御史念臺劉公傳。但言乙酉五月。公遂不食。積二十日卒。明兵部武庫司主事元修成公德傳。言福王立。贈大理寺卿。諡忠毅。明尙寶司丞魯念孫公鑰傳。言邊烽孔亟。少師宗奮義倡守。與城爲存亡。又言十一月七日。兵至城下。不及滿洲一字。皆當時文人踟躕不敢落筆者。顯考德貞府君恒行狀。述其家世甚詳。先世朝鮮。自七世祖英。游襄平家焉。以軍功授鐵嶺都指揮使。英生文彬。文彬生子五。長春美。生涇。涇生寧遠。

伯成梁。次春茂。生潤。潤生成功。成功生子三。長如挺。三如梓。生恆忠。卽德貞。又述如梓于明季殉難。族氏被驅北行者甚衆。太祖訪問族人。欲錄用之。因得如挺子思忠。及族人獻箴。授以世職。思忠妻佟偵得恆忠主家。罄資贖之歸。奏上。太宗喜曰。此明太師寧遠伯後裔也。賜名宜哈納庸。備宿衛。狀不稱如梓官守。但言殉難。以見爲清兵所殺。太祖太宗何以亟亟求李氏後人用之。世傳成梁養太祖爲子有恩。後如梅又與滿洲爲昏。其優李氏。可以爲傳說得一佐證。清初佟郎李皆關東舊姓。貴盛莫比。三氏互爲婚媾。皆有文采。未嘗以八旗自居。故南人亦樂與之游也。詩分樂府鬲津草醉餘草各一卷。詞頗旖旎。

憶申之王先生隱居

棲遯衡門事事幽。忘機魚鳥日彝猶。園堆怪石留雲住。岩湧清泉帶月留。寫就鸞羣堪一醉。賦成鸚鵡足千秋。意中林壑應相待。遮莫籃輿得共遊。課愼堂詩集二

寄申之王先生

門掩松筠境最幽。檢書燒燭幾春秋。頻將詩送長年恨。肯使杯空鎮日愁。問字人來皆屈宋。坐花客到半應劉。君家不亞山陰道。乘興還憑雪夜舟。課愼堂詩集二

劉廷璣 葛莊分體詩鈔

劉廷璣。字玉衡。號在園。漢軍旗人。官至淮徐道。撰葛莊分體詩鈔。自謂屢刻其詩。今所知者。有在園詩

鈔不分卷。刻于康熙二十三年甲子。時方少年。已得王士禛稱賞。後益驚名交海宇詩人。而有葛莊編年詩鈔十三卷。分體詩鈔刻于五十三年甲午。大約爲最後定本。廷璣讀書不多。詩未必足錄。然詞清意遠。亦有可觀。生當文盛之時。耳濡目染。遂能小有成就。若文昭胤禮皆此類也。

勸農行

勸農勸農使君行。從者如雲擁出城。未聞一語及民生。但言橋圯路不平。未知何以惠編氓。却怪壺漿不遠迎。東村淡薄胥吏爭。西村更貧難支撐。使君已博勸農名。唯願及早迴雙旌。不來勸農農亦耕。勿勞再

勸雞犬驚。葛莊分體詩鈔

祖氏園有感

春末夏初。攜酒遊城南寄鶴園。都城舊事也。主人卽世。營兆於此。亭樹依然。羽鶴尙在。撫今念昔。感慨殊深。因占五韻。以示同遊。

春風猶剩此亭孤。亭外淒然鳥自呼。樹有高低青不斷。水無深淺綠平鋪。分明淚落花千點。多少愁澆酒一壺。仍是中丞舊池館。屏山六幅漸模糊。在園詩集

祖園卽景

洞外垂高柳。堦前睡矮松。塊然幾頑石。隨意疊成峯。

香過雨冥冥。橋連數畝青。荷花共荷葉。團抱水中亭。在園詩集

郎廷槐 江湖夜雨集四卷

郎廷槐。字梅溪。漢軍旗人。自署千山。康熙三十七年戊寅官新城知縣。後陞達州知州。以事落職發往軍前効力。年羹堯委充監收同知。題補遵義府通判。雍正三年。以黨年革職治罪。見永憲錄。西陂與之書。有棠陰舊望。棟寧訂交語。李紱穆堂初稿二十五漕運總督郎溫勤公墓志。兄弟九人。公與故湖南按察使廷棟。及成都通判廷槐。皆出于母廕。按廷極以康熙五十四年卒。年五十二。廷槐丙子康熙三十五年年三十。少于廷極者四歲。廷極行第四。廷棟第五。廷槐第八。見紱所撰廷棟墓志。詩極稚弱。王士禛特以琴堂假借之。屈復弱水集。稱漁洋在官時。郵筒奔走天下。里居三載。空函兩封而已。然則周旋廷槐。亦所以慰窮愁歟。

泊清江感河決有作

袁浦維舟夕。崩奔沸水聲。魚龍多夢穩。壁馬少功成。草漫枚臯宅。鴻飛韓信城。秋風歌瓠子。下榭偃長

鯨。江湖夜雨集二

案此詩作于康熙三十五年。

高其倬 味和堂詩集六卷

高其倬。字章之。號芙沼。又號種筠。鑲白旗漢軍。康熙三十三年進士。屢官雲貴浙閩兩江總督。入爲工部尚書。調戶部。卒于乾隆五年。年六十五。著味和堂詩集六卷。才筆生新。吐屬輕倩。若以詩論。與其同年生顧圖河。周起渭。足以相亞。集中多寄內詩。妻蔡琬。字季玉。工詩。有蘊真齋小草。辰龍關云。殘碑酒盡諸軍淚。苔濕塵封四十年。九峯寺云。赤手屠鯨千載事。白頭栖佛一生心。感懷云。星槎曾逐泛銀河。首按珠宮第一歌。夢破不須重話舊。當時驚鶴已無多。八面旌旗七寶車。曾揮彩袖鬪朝霞。秋風原上無人識。獨倚柴門看暮鴉。皆傷其父毓榮平吳三桂被讒而作。感慨悲涼。定非其倬所能。

褒城

官舍無垣翠巖圍。閒花落盡吏人稀。江生新水魚龍喜。草滿空城雉兔肥。十載流亡終未復。幾家烟火自相依。昇平漸喜無征繕。蜀塞今看戰士歸。

味和堂詩集一

案此詩當作于康熙四十一年入蜀典試時。流亡未復。而云昇平者。以無征繕也。其辭甚婉。

劉正宗 通齋詩四卷雪鴻草一卷

劉正宗。字憲石。安丘人。崇禎元年進士。由推官行取。授編修。入清。授國史館編修。順治十年。爲弘文

館大學士。聖年改文華殿。十七年以罪革職。籍家產一半。歸入旗下。不許回籍。康熙初卒。正宗當國。有權姦之目。丁酉順治十科場之獄。爲其一手把持。與慎交水火。自負能詩。力主歷下。與虞山婁東異幟。擠二陳一死一謫。而獨得善終。其詩筆力甚健。江南人選詩多不及之。門戶恩怨之見也。此集爲丁亥至己丑順治四年至六年詩。雪鴻草丁亥以前所作。庚寅順治七年以後有二集二卷。三集二卷。

枯槁

晨起髮未櫛。枯槁儼在耳。沾塗亦云勞。聊以終舉趾。蒙茸雜水涯。婦子互相倚。已看比屋灰。生齒可屈指。勤動補當年。安敢偷暇晷。干戈幸暫遠。卽是徵輸始。早輕薄有秋。壠畝因荒累。壠畔桑葉黃。新絲隨逝水。遑爲卒歲謀。醫瘡從茲起。德音近屢宣。獨貸慰延歧。所慮久凋殘。涸轍難緩死。況復值軍興。越東初因壘。軍實于焉資。催檄宜仗篋。盤內粒果艱。饑饉者誰子。回首憶故鄉。石田易荆杞。天行或不若。延頸俟糠粃。聽此畦中聲。似欲甘泥滓。農事難終陳。三歎但隳几。

孫廷銓 泚亭自刪詩集一卷泚亭刪定文集二卷

孫廷銓。本名廷鉉。字伯度。號泚亭。益都人。崇禎十三年進士。官永平府推官。順治元年迎降。改天津府推官。內擢吏部主事。十一年遂至兵部尙書。調吏部。康熙二年。都察院劾廷銓會議時與杜立德喧爭。御史李秀復劾廷銓爲劉正宗親黨。巧舞奸弊。遇會議會推閉目俯首如木偶。并得寬免。竟擢祕書院大學

士。翌年以疾歸。卒于十三年。年六十二。事具清史列傳大臣傳。撰泚亭自刪詩集一卷。泚亭刪定文集二卷。詩學七子而能變化。生平有詩千餘首。刪存者不及十之一。文多奏疏。順治初政局。頗足窺見一二。畢自嚴墓碑。述明季籌餉事甚詳。他文亦多雅飭可觀。別撰漢史臆二卷。論事有識力。顏山雜記四卷。摹水經注。文筆奇峭可誦。記山蠶琉璃窑器煤并鐵冶特詳。南征紀略二卷。述祁彪佳余煌余增遠高節。若有深慕焉。則公道之在人心者也。

後挽船行

十年不向滄州城。此夕重來秋風生。孤舟欲泊無處所。滄州城下船縱橫。樓船銀榜征蠻府。戈船連營雜婦女。珠纓繡相錦兩襠。高掣牙旗奏簫鼓。孤城斷壁幾家存。半入荒煙半塵土。有風帆自開。無風奈何許。不衫不襪誰家郎。且擲刀鎌帶纒組。中男短小義不辭。盡汝四隣不獨汝。丈人不怒勝晨餐。意氣橫生力如虎。南下江陵北上真州估。但下篷艙坐河澗。投籤既有程。牽船亦有伍。發糧當歌汝即歌。但不得言汝辛苦。吁嗟勿愁汝辛苦。船上將軍神且武。泚亭詩集

孫廷鐸 說研堂詩四卷

孫廷鐸。字道宣。別號烟蘿居士。廷銓弟。崇禎十五年舉人。康熙八年。遷陽江知縣。閱六年。援新例捐納中行離任。又五年始得北歸。時年五十八。遂不再出。撰說研堂詩四卷。爲嘉樹堂集。庚寅順治七年至己亥十六年

公車屢上之詩。緒園詩集。庚子^{十七年}至丁未^{康熙就選之詩}。烟蘿居集。戊申^{八年}至乙卯^{十四年}。官粵之詩。緒園新集。丙辰^{十五年}至己未^{十八年}。候咨北歸之詩。此後不應無詩。或此為當時刻行者耶。廷銓兄弟詩。皆源于濟南一派。務極才思。廷鐸五言。尤清警。唯不事渲染。未能稱大家耳。

七百墳 乙卯新興中黃村。有七百人避兵樓上。以為負固也。而焚之。燬燼之餘。共為一墳。里人徵詩以哀之。

禍福由人莫問天。多人豈合盡逃蓮。曾聞三月咸陽火。又見孤村綿上烟。骨肉已灰猶有夢。冤親平等永無愆。一丘便是清涼境。力役何能到九泉。說研堂詩

馮溥 佳山堂十卷二集八卷

馮溥。字孔博。號易齋。益都人。順治四年進士。由編修官至文華殿大學士。康熙二十一年告休。三十年卒。年八十三。事具清史列傳大臣傳。撰佳山堂初集十卷。刻于康熙十九年。二集八卷為歸田後之作。青州馮氏世皆有集。溥詩或傷之率。然捷才鬪靡。不失雅音。其時文網未峻。略無忌諱。是集不難見之。又其時居高位者。皆稱好士。逸民野老。常與黃閣均禮數。溥尤喜延接。以此頗得士心。相業雖無可稱。而言不宜以大臣監督撫。言春收夏糧及預借關鹽稅之非。言強盜人命宜定限結案免累證佐。皆有裨補。為人所不敢言。詩中每可考見當時典故。告歸紀恩三章。述上遣侍衛二格翰林院掌院學士牛鈕陳廷敬。賜之詩文墨刻印章。以待衛列于掌院之前。足見康熙時侍衛之重。納蘭成德以進士為之。蓋傳宣之任。幾

與後來御前大臣相同。故一時皆以侍中擬之。與南書房繕擬詔旨。同屬機要。爲康熙八年革四輔政後特制。蓋不待軍機處之設。而內閣早成贅旒矣。

紀異

己未秋七月。廿八直官廡。震動起重淵。衰老適相避。初聽蛟龍吼。水勢湧澎湃。復擬雷霆怒。擊物不必決。奔走爭一門。洶洶羣奪隘。帽脫鮮結纓。袒楊任衣袂。跬步暗前途。舉足迷所屆。造物胡不仁。或是天地噫。倉猝遽乖異。喘定神尤憊。戰慄色各變。相對不能話。招魂幸得活。傾壓分一界。豈是九河復。溝裂紛多派。屋覆勢連鷄。牆徹溷貴介。嗟哉土中人。狼藉如填債。上帝降鞠凶。下土橫彫瘵。貧者束縛去。富室或歌薤。逆旅親戚絕。慘被蠅蚋嘍。皇仁真浩蕩。發帑賑頹壞。無主勅官瘞。丁寧勸告誠。小人復貪利。木石十倍賣。至今露處多。入室如畏蠶。席亦不易得。婦子衣裳絳。街頭燈火繁。團聚渾結砦。淒涼逢陰雨。鄭圖非所畫。災祥昧其原。夫子不語怪。俗訛薰極翻。吾將具十情。佳山堂詩集二

趙執信 飴山詩集二十卷文集十二卷禮俗權衡二卷聲調譜一卷後譜一卷談龍錄一卷

趙執信。字伸符。號秋谷。益都人。康熙十八年進士。入翰林。官至右春坊右贊善。二十八年。以非時演唱長生殿傳奇。去官。卒于乾隆九年。年八十三。專具清史列傳文苑傳。著飴山詩集二十卷。文集十二卷。禮俗權衡二卷。聲調譜一卷。後譜一卷。談龍錄一卷。執信與王士禛異趣。所以角立樹名。其詩鑣刻清

新。歸于渾厚。斯爲可貴。文有才思。而氣格未醇。王鳴盛遽推其掩過。王士禛宋琬田雯。則好奇之論。詞多贈妓之作。頽老放廢。故寄情于醇酒婦人。然皆清約可誦。自云。嘗助洪昇成長生殿。知于詞曲是當行也。談龍錄專詆士禛。謂士禛祭告南海出都詩云。盧溝橋上望。落日風塵昏。不知孤臣譎官。更作何語。足令士禛無辭以對。執信南游。拜馮班墓。以其論詩于己有合也。求吳喬圍爐詩話未得。喬爲徐乾學舉交。執信放廢。卽由乾學兄弟修怨。幸未與喬相見。否則論詩有合。而論乾學則必不合矣。書癡意氣。思之啞然。

紀蝗

夏至之明日日中。飛蝗蔽天來向東。前驅瞥若鳥碎羽。後陣紛若米變蟲。初疑黃塵迷遠樹。漸覺白日昏陰風。散如頽波趨下濕。聚如雲氣生奇峯。急雨千重動莽蒼。鐵騎萬里行倥傯。是時山郭足禾黍。新雨一洗爭芄芄。野老倉皇田婦泣。斯須立見隴畝空。迴翔欲下屢不果。却投曠僻依丰茸。小留旋去跡如掃。恍惚神物相遮籠。里社釀金謀報賽。爲問此舉將誰功。盛朝澤大豈偏及。長吏政異今難逢。吾土之外亦稼穡。枵腹知向何方充。天災無時垂鑒戒。地靈有力持荒凶。史臣失職仰廊廟。載筆義引春秋蠡。鉛山詩集三

後紀蝗

蝗去還復來。十日不得息。青天無風亦簸揚。赤地有土皆涌溢。山間曉夕相招呼。白髮黃頭綴行出。拚將婦子死前身。奪取馘螟口中食。長竿縛衣五色新。蝗落如山不畏人。但覺齒牙挾急雨。空悲禾稼失連雲。

東家田多西家少。打撲不如東家早。豈知災至兩難憑。高原並盡油油草。傳聞北飛將入海。形勢蒼黃那
可待。又聞吳楚沴氣同。常恐東道由茲通。蝗乎蝗乎且莫殫我穀。告爾善地棲爾族。一爲催科大吏堂。一
爲長安貴人屋。鉛山詩
集三

感事

碧山勝賞已全非。誰向西州淚滿衣。解識貴官能續命。可憐疏傅枉知機。

戟幹底事各紛紛。萬事秋風捲亂雲。誰信武安作黃土。人間無恙灌將軍。鉛山詩
集四

案二詩感于徐元文之死而作。幾于毒置。知執信被劾罷官。殆爲徐氏兄弟所陷也。

唐夢賚 志壑堂全集四十九卷

唐夢賚。字濟武。號豹齒。淄川人。順治六年進士。官檢討。數訐直言事。以救李呈祥得罪放歸。遂未再
出。卒于康熙三十七年。年七十二。所著志壑堂全集。爲詩文各十二卷。詩後五卷。詩餘一卷。文後三卷。
夢賚究心當世之務。以經濟自負。天經地義。性理體數。會計之制。無不貫綜洞悉。詩文特其餘事。王士
禛目爲文近蒙莊。詩近東坡。不免過譽。蓋務爲韜晦。寄情山水。栖心禪悅。然詞雅意和。無復怨尤。類乎
學道有養者。與高珩李呈祥可以並稱。踪跡亦頗密。居鄉勇于爲義。故士禠傷之以爲鄭子皮死。無與爲
善云。

塞海門

黃河浩浩來萬里。龍門積石何時止。當日九河俱北流。冀州毫都常遷徙。今日驅遣與淮通。東使迎漕非本旨。岷峨諸山爲江源。英霍諸泉爲淮始。江淮合併勢滔天。東流就下歸揚子。太湖餘響下姑蘇。尙屬細流不能比。廟灣之間立海門。前賢創爲奔濤砥。海潮來閉江湖開。諸水東歸皆瀉此。前年遷海初塞之。一時原爲防海起。詎知一塞不可開。江河怒鬪河身圯。司空日夜蕩黃金。誰說海門惟禁齒。江河壅遏高於山。淮安城伏狂瀾底。東去高竇四五城。年年不得保桑梓。西風一浪高堰崩。漕艘安有飛如駛。河伯逆流又無歸。簫鼓金龍徒享祀。譬如有人閉尾閭。日日醉飽其人死。假使神禹爲河臣。問水之性此何理。早晚但能開此門。勿徒伎倆陳空紙。挑則真挑修真修。卽今閩海平於几。草野今聞開汴河。田夫恐懼舟師喜。大抵河水若羶龍。不可繫糜如臂指。逆水之性祝效靈。汴河雖開徒爲爾。勢必金堤棄不修。重歸馬頰與太史。坐使黃流奔九河。恐謾神京策非是。志察堂詩集十一

高 珩 栖雲閣詩集十六卷拾遺三卷文集十五卷

高珩。字葱佩。別字念東。晚號紫霞道人。淄川人。崇禎十六年進士。選庶吉士。入清授檢討。洊至刑部左侍郎。請急歸。鄉居十餘年。康熙十八年。魏象樞以清節薦。復起爲刑部左侍郎。明年以老病乞骸骨得允。卒于三十五年。年八十六。事具王士禛刑部左侍郎念東高公神道碑銘。撰栖雲閣詩集十六卷。雍正

九年。趙執信始論定之。拾遺三卷。乾隆二十一年。宋弼所錄。文集十五卷。乾隆四十一年。陸燿選刻之。詩筆超拔。出手即成。平生詩不下萬首。不甚愛惜。隨手棄置。或勸以刻集。輒笑謝之。文有典則。其關於國計民生者。往往足資參考。詩文皆似白居易。爲人坦率。自適其適。而悲悶爲懷。亦于居易爲近。

後長恨歌

後庭玉樹傷心曲。六代茫茫烟草綠。永嘉南渡不成龍。五侯七貴已紛逐。當時阮馬氣熏天。得意金吾亦盛年。鳳翼龍鱗誇侍衛。金貂玉佩儼神仙。小兒程李何足齒。賈鄧元勳一屈指。天子無愁將相驕。只言千載常爾爾。趙李經過珠箔開。連錢細馬下朝來。呼盧客賭青娥伎。滅燭人分紫燕釵。鸚哥嬌語鸚鵡舞。藏春別院驪姚府。花奴羯鼓杜秋詩。天魔小隊霓裳譜。重興詔獄殺清流。甲起晉陽朱桁愁。乍傳鐵騎飛天塹。又見降幡出石頭。降幡一片江頭豎。墮馬啼妝江北去。羅綺春寒青塚霜。胭脂淚灑白門樹。麻姑書信幾時傳。滄海桑田劇可憐。樓櫓共驚銅馬火。勾陳新闢玉京天。鴛鴦七十深深宿。誤向綺筵誇碧玉。遙接金陵曲未終。爭知鐵騎來相續。建業荒亡怨狡童。坵墟亦復坐諸公。祁徐流落臨春廢。璧月瓊枝回首空。昏昏叔寶已黃土。次第天誅及社鼠。自古奢淫是死媒。曩臣懷璧誰容汝。紅顏無主任飄搖。又向何門鬪細腰。輕薄花方辭舊砌。翩躚燕亦換新巢。豪華百歲元難保。步障錦絲春悄悄。東市誰憐石季倫。珍珠十斛驚波渺。就中別有斷腸人。慷慨相期贈紫雲。細揀花枝鑿琬琰。鴛鴦待缺喚眞眞。那知三日存亡變。宛轉蛾眉空掩面。月榭綺窗鬼火青。彩雲一散何由見。目成苦憶曼波明。掛玉風流一座傾。銀灣乍涸瑤宮

圯。紅淚珊瑚曉鏡裏。叔夜不仙廣不侯。千秋恨事多如此。座客纔聞已斷腸。如君那不消魂死。幽懷禪觀竟難忘。尚憶縷金夢裏香。人生莫作多情物。才有情時恨更長。栖雲閣詩三

案此詩疑詠劉澤清事。

李呈祥 東村集十卷

李呈祥。字其旋。又字吉津。號東村。霑化人。崇禎十六年進士。改庶吉士。入清。仕至少詹事兼侍讀學士。順治十年。上辨明滿漢一體疏。引漢光武不以吏事干功臣爲言。謂八旗重臣不宜與政。下獄論斬。改徙盛京。十七年。釋歸。自是徜徉林下者二十餘年。嘗以壬寅康熙元年乙卯十四年南游江淮。丁巳十六年且與高珩唐夢賚同游浙中。卒于二十六年。年七十一。事具孫光祚少詹李公墓誌銘。有東村集十卷。文頗質實。誌傳頗足考事。詩學唐人。早歲多憑弔興亡之作。謫居後。與釋函可唱和甚多。不免怨悱。晚歲田居。辭氣和平。有閒適之趣。而錘鍊之功。亦漸少矣。

新秋詠和敬哉玉立諸同館

十首錄一

西來山色翠相仍。白鳥飛還第幾層。古木寒雲封斷石。玄宮斜月照觚稜。羅衣紈扇爭承露。玉盃銀絲醉倚燈。上苑梧桐猶昨日。秋風休過漢諸陵。東村集一

與涓村貽上兩公商刻徂東集金塔鈴有小序萊陽左大來先生博羅剩人禪師皆卒成

所遺詩徂東金塔鈴各數卷攜之南來共謀剞劂嗚呼大雅不作詩道淪墜苟非可傳

何能阿比剩公在時嘗言林茂之貧且老矣今乃無恙欣慨交深故並及焉

奎壁落天東。雪窖埋雙友。其一黔丈夫。長身而僵後。其一僧公子。蟠腹恆張口。幾時成兩頑。予到添三醜。遂使冰海瀾。澎湃聞龍吼。唱和七年間。篇什雜箕帚。丁寧付一編。垂死明授受。生還身與俱。出入必懸肘。遍觀天下士。此道竟誰有。吾郡兩君子。冰玉輝山藪。流涕拜致詞。積血今當剖。但恐失良時。地下終相負。雄文一揮灑。春色回衰柳。陶公共遠師。炯炯心難朽。臨義豈復遲。千載見君手。眼底緇帙開。早爲寄林叟。東村集四

法若真 黃山詩留十六卷

法若真。字漢儒。號黃石。又號黃山。膠州人。順治三年進士。入詞林。官至侍講。十年外補。是爲清代翰林外轉之始。待次丁艱。十六年起補福建興泉道。十八年遷浙江按察使。以母憂歸。康熙七年補江南右布政使。九年復以母憂去官。霽景要園莊以償賠累。十七年擬補河南布政使未用。遂歸隱州西七十里黃山上莊慈元菴。卒于三十五年。年八十四。撰黃山詩留十六卷。爲順治三年丙戌至康熙三十五年丙子。先後四十一年之詩四千一百三首。中缺庚寅至癸巳。順治七至十年凡四年。壬寅至丁未。康熙元至六年凡六年。同里張謙

宜所訂。兼撰傳。稱其官浙時。私史獄起。以不能救七百家爲恨。莊史株連至七百家。唯見于此。卽本集丙子八十自壽詩。所謂恨不移恩七百戶。自注。唯七百戶之婦子。非人臣所能挽者爲鬱鬱耳。傳又稱改元以後。時局復變。宜其不得志。蓋指四輔政及索額圖明珠相繼擅權而言。若真丁巳康熙十五年三月十九日引見。戊午康熙十七年擬補豫藩引見。皆不見用。是時馮溥以同鄉後進。李蔚以同年同在政府。無能爲力。必索額圖明珠未入賄。有意抑之。若真乙卯懷寧夫子相公感書。自注。公諱完我。蓋感昔傷今莫我肯顧也。丁巳和孟百聚落花詩。翻翻直敵蛟龍怒。上下輕談風雨交。自注。時有顛倒跋扈之雄。卽指索額圖。壬戌紀事。大道旣淪亡。斯文漸委棄。誰爲章句儒。不負天子使。文章已如斯。聊下杞人淚。則指明珠賄賣學差。壬申有鳥詩。借問層雲天上侶。爲誰大翻落山頭。自注。時有豪貴退位者。不得其解。疑亦指索明也。大約康熙一朝。大政操自滿洲。索明二人尤肆惡。賴若真詩一爲發泄耳。他詩多及時事。戊子登虎丘詩。豎儒猶惜舊衣裳。文章之禍恐不小。自注。遲十三年果驗。蓋指哭廟之獄。丁巳正月十六日登毘盧閣詩。直擁江淮分界外。自注。時海禁江淮之涯皆畫界。知是時海禁浙閩而外。江北瀕海亦在其列。康熙號稱全盛。然萑苻不靖。苛斂無已。時于詩中見之。己巳元日看梅詩。驚聞八駿飛江上。正是澄清攬轡時。自注。時盜賊橫發。皆以恪遵功令。致諱盜而盜益熾。是不止以恪遵功令爲諷。而且指斥及于乘輿矣。壬申月上詩。村間荆棘霜千畝。夜走豺狼雪萬家。自注。一時城隍之役。倉廩之工。獵狐狼之皮。集保息之賀。加之履畝稅穀。帖迅風雷。將豫充腹于後來。先勾割肉于旦夕。萬戶嗷嗷。何堪剝膚。聊注里句。借補詩

亡。十二月朔一日詩。早苦充膚先割肉。自注。時括穀備飢。獵山索皮。乙亥長夜三首。按村搜脫粟。薄海括花鬃。自注。時有軍需括馬之令。皆略無避忌。不幾謗訕乎。後來唯見許志進謹齋詩稿。多及時事。可
以證史。然尚不若若真之敢昌言也。傳稱其早宗李賀。晚學杜陵。蓋本于若真贈周履坦詩。真也北海人。
七歲僭爲詩。十歲好李賀。憑弔天寶時。然若真詩文自成一體。略無長吉氣息。晚漸平淡。有杜之悲感。
無其格律。不能以杜擬之。別有黃山集六卷。刻于康熙癸卯。皆順治一朝所作。時方選刻王崇簡魏裔介
楊猶龍三家詩。皆北人也。因以己作殿之。若真晚年詩泛濫波靡。一題動至數十百首。以云工力。早年較
勝。此二百六十餘首。有不入詩留者。有後來竄改者。良工之璞。或有足珍者焉。

登虎丘

此戊子作
十三年果驗

秦王用兵天下斃。鑄鐵風消及二世。用賢尙不如夫差。胡不相憐而相噬。發塚羞稱兄弟君。白虎精搖天
地厲。試劍痕留風雨開。胥江車馬影徘徊。寂寞千人一片石。秋水山橋滴變哀。十年樓閣憐青草。江聲歌
舞荒山道。顧楊諸子讀書堂。花濺雨細巢歸鳥。豎儒猶惜舊衣裳。文章之禍恐不小。不見生公說法臺。蓮
花幾處種青苔。空惹石人鑿太古。十二山河安在哉。黃山集二

案所謂竟驗者指哭廟之獻而言。

錢塘江上謠

暮上錢塘船。早渡錢塘水。水氣搖長天。烟撲曉霜紫。南雁三四飛。不繫十行紙。北望樓臺倒影空。血漬

南屏楓葉紅。越王宮殿埋古瓦。駱駝兒掣垂楊下。寂寞孤山賣酒家。畫船若箇修春社。昨夜江頭禁旅過。牽夫白骨漲江波。烟雨一城夫六千。一千五百去不還。兒女新縫白布冠。君不見。王旅市馬買彫弓。鬻婦盤雲小市東。又不見。江南財賦已非舊。馳書飛輓到江右。戍兵中外苦更番。安得休息弛甲冑。大風長歌守四方。且留商賈走餘杭。黃山集二

冷玉娟 研鱸閣詩集五卷

冷玉娟。字姍姍。自署人間業者。萊陽宋氏家人子。入周西齋家爲女樂。教之學詩。得千餘首。康熙十五年丙辰。年始及笄。適吳川知縣膠州宋禕。千世遠爲副室。翌年。西齋錄其詩二百五十首。刻爲研鱸閣詩集五卷。詩學七子。頗有筆力。時方貴宋。獨能不趨風氣。和秋興八首。頗有寄託。不意于閨檐得之。

次和小青無題

日暮秋蟬不可聽。風吹花落滿空庭。愁來擬作傷心曲。一束還須寄小青。研鱸閣詩集五

杜 漢 涑 涑湖吟九卷遺文一卷

杜漢。字子濂。號涑湖。濱州人。順治四年進士。官至河南開歸陳許道。卒于康熙二十四年。事具王士禛所撰墓志。撰涑湖吟九卷。遺文一卷。刻于康熙十九年。故無歸田以後之作。道光中。女孫受田爲輯遺文。

一卷。士禛稱其詩有奇氣類徐涓。自今觀之。五七古偶有似此者。律絕即不爾。蓋學杜而工于錘鍊。陳元衡國雅以之冠首。未知賞識所在。然律格老成。不墮王李鍾譚之習。亦不學宋人。實豪傑之士。清初詩人中。足以自樹一幟矣。

梧垣中例入則酒迎出則歌送口號示同輩者

自昔梧垣號近臣。遷除無奈往來頻。主人幾度今爲客。作客還應到主人。涓湖吟三

李陽冰皇帝祠宇四篆書在縉雲夫子廟堂碑陰索得之

誰道蒼公沒。今來無此碑。面牆與飛去。總使後人悲。涓湖吟四

宋 琬 安雅堂集七種十八卷

宋琬。字玉叔。萊陽人。順治四年進士。官至四川按察使。卒于康熙十三年。年六十。事具清史列傳文苑傳。及王熙所撰墓志。其集安雅堂詩集無卷數。文集二種各二卷。康熙五年罷官寓吳中時所刻。二鄉亭詞。則孫默留松閣國初名家詩餘之一。安雅堂書啓一卷。祭臯陶樂府一卷。皆自刻。安雅堂未刻稿庚戌十卷。刻于乾隆丙戌。凡爲七種。琬之所著。或以此爲最全矣。琬與玫爲兄弟行。才名早著。願一官累躓。庚寅順治壬寅康熙兩爲人誣告。繫獄困頓。十年再起蜀臬。三藩變作。遂以入覲卒于京師。一生遭遇。豐少屯多。故其詩多愁苦之音。世與愚山并稱。然才氣充沛。似過于施。文則仍明季之習。未見其足以加

人也。

重晤李舒章

漠漠陰風吹草萊。故人悲喜更銜杯。競傳河朔陳琳檄。誰念江南庾信哀。避地何如金馬署。傷心莫問柏梁臺。蛾眉自昔逢諛詠。嗟爾登高作賦才。安雅堂未刻稿四

壬寅除夕作

已屈知非日。猶餘未死身。十年重墮井。兩度恰逢寅。庚寅余以逆僕誣擗下獄。今之禍壬寅歲也。故云。繫械今時法。冤愆夙世因。殺機巧乃毒。妖夢幻耶真。辛丑三月。余夢提騎。覺而惡之。果驗。撩尾知防蠶。焦頭憶徙薪。乾坤容翹翹。刀俎賤麒麟。有客哀同楚。何人哭向秦。木囊隨假寐。鐵索似垂紳。陸續寃誰雪。稽康性已馴。糲糠充亞飯。蕪積捋重茵。雀角無完屋。鴿原已化燐。死應爲厲魄。痛欲徹高旻。邱嫂懸絲活。孤兒對簿頻。蹀枯還受榜。血濺不遑顰。履虎寧遺類。連雞到比鄰。事同朱並罔。獄與洛陽均。瘴隱層霄日。霜飛六月辰。隸人咸慘澹。法吏亦酸辛。孤姪及同繫諸人。每就訊。呼號震天。司獄爲之惘然。吏卒有淚下者。淑問情斯剖。平反臭屢陳。嚮晨星噓噓。得意犬狺狺。蔓引胡由底。株拘不計旬。那容書牘背。一任鼓簧脣。范李悲前代。金張乏要津。素交多自絕。公論鬱難伸。齟齬嬰微纒。帆檣滯水濱。伶仃憐病婦。奔走賴周親。簪屐無留跡。圖書半委塵。平生思著作。一旦付沈淪。胥靡奚堪辱。黔婁未擬貧。灰心成槁木。翹首望陽春。柳色回青甸。鐘聲出紫宸。梟臣百口淚。阿閣九重闈。茶蓼皇天鑒。勾萌大造仁。願言祝湯網。沒齒作堯民。安雅堂未刻稿五

王士祿 十笏草堂詩選九卷 辛甲集七卷 上浮集四卷 炊聞詞二卷

王士祿。字子底。號西樵山人。山東新城人。順治壬辰^{九年}進士。選萊州府教授。遷國子監助教。擢吏部考功司主事。遷員外郎。以事免。旋荐復原官。又免。卒于癸丑。^{康熙十年}年四十八。事具清史列傳文苑傳。初有瑯琊二王合刻。士祿所著曰表微堂詩存。久佚。繼有十笏草堂詩選九卷。自丙申^{順治十三年}迄庚子^{十七年}之詩。凡三百九十七首。無題募玉溪。幾于神似。辛甲集七卷。爲辛丑^{十八年}春詩。西轅集辛丑五月以後作。塵餘集壬寅癸卯^{康熙元年}兩歲作。拘幽集甲辰^{三年}秋詩。上浮甲集甲辰冬詩。凡分體詩四百一十二首。以奉和龔總憲二月二日恭送大行皇帝梓宮移景山五律四首。恭和嚴給事哭大行皇帝七律四首。爲人所稱。七古長安驛亭後四古槐歌。飛龍宮行。頗有筆仗。上浮集四卷。爲乙集^{乙巳}編年詩二百一十八首。丙集^{丙午}編年詩一百八十九首。以廣陵春游曲十首。焦山古鼎歌。西湖竹枝詞二十首。湖墅竹枝詞四首爲擅場。皆其弟士禛選定。不知丙午以後詩何以未刻。頗工填詞。有炊聞詞二卷。士祿及弟士禛。士祐。士禛。皆工詩有集。唯士禛不第。士禛高位著年。爲一世所宗。主詩壇者五十年。士祿修潔不及士禛。而筆力勁健過之。若謂士禛大家。則士祿當爲名家。然皆早達。迴翔仕路。櫻情好爵。刻畫多而感歎少。去風人之旨有間矣。

普菴堂吳道子水陸畫軸歌

有序 吳生畫筆。其在於今。殆片楮爲重矣。平陽西偏普菴堂水陸社。乃有吳生所畫水陸百二十軸。社之得名以此也。姜子綸季爲余言。聞之寺僧。述畫所由出。蓋

奇甚。明世宗朝。西河郡王城北有隙地。傳爲廢寺遺址。其地中間方數尺許。兩下不濡。雪甚不積。又中夜常見奇光。王心異之。乃掘地以窺其密。掘深五丈。得巨石函一。以鐵紐二道束之。發之。又得銅函。其最中函以木。木函啓而畫軸見。乃希代之奇寶也。王甚珍焉。其後王薨。嗣王不知寶異。以乞揮使呂。呂又死。其家落。寺僧以恆直得之。因創殿以藏焉。則崇禎間事云。因姜子言。亟求觀。得見三十軸。信奇筆已。遂作歌志之。

聞昔吳生圖天宮。裴旻劍舞解豪雄。借發奇思動真宰。振筆萬象紛來從。又聞玄元廟壁嘆。杜老解衣盤礴非草草。五聖千官貌奇傑。翠柏紅梨映深宵。擅場當世曾無對。睥睨顧陸聊前輩。惜哉妙蹟千年稀。寸縑直等天球貴。今秋縹馬平水陽。那知奇物居然藏。此畫出見事亦怪。豐城寶劍同光鉞。朱隱碧巖神理在。絹素古黯增蒼茫。爲臆捉筆百靈急。搜讀抉詭誰容匿。幢環冠珖天人儀。雲烟龍鬼幽冥色。會稽姜生爲余說。乃得發篋觀奇絕。風塵躑躅難盡窺。安得窮年傍禪悅。十笏草堂 辛甲集二

宋荔裳四漢瓷盡歌

論瓷無過哥柴古。李唐以往蓋無觀。以茲坐輸銅玉尊。漢血秦斑遠難伍。萊陽詩伯雅好奇。酒酣向我誇漢瓷。鄙夫少見怪且詰。乃是得之秦隴陲。荔裳曾 憲隴西爲言杜老不云秦州城。北寺傳是隗囂宮殿之遺基。土人掘地得此器。竊攫其四恆提攜。指揮奴子取示客。開匣發袱光離離。其一形模精詭異。恆製魚吹細浪搖玻璃。其一差大二差朴。各各古黜非時姿。赤伏之世去今一千六百載。茂陵玉盃幾肩隨。陶質上掩金石壽。銅雀古瓦年猶卑。恍如置我兩京際。爲汝一醉誰能辭。惜也少陵客秦汝。未出定有驚人詩。大食之刀桃竹杖。嗟乎其後何堪追。吁嗟乎。宋侯今日之杜甫。萬首新詩繼夔府。野夫才非杜宋儔。醉眼摩挲奈

何汝。十笏草堂
辛甲集二

焦山宋繡觀音卷歌

平陽水陸嘆希有。平陽普善堂有吳道子水陸百廿軸。余曾作歌。瓦官錦裙還屢聞。瓦官寺有錦。是則天錦。裙所製。貼上有詩。屈指異物那數遇。誰者鼎足堪

爲羣。枯木堂中看宋繡。古光黝色鐘彝舊。詭製應從巴焚傳。奇紋祇訝春蠶糝。其前變相凡有三。摩睺乾

闔形鬢髮。最後莊嚴備相好。寶珠瓔珞垂優曇。火羅乙僧徒有筆。鍼絕吳宮亦非匹。道玄意匠盧女絲。恍

惚普門神異出。金題玉璽雲濤間。世人觀此誠哉艱。願著芒屨服屈陶。雲烟作供依禪關。十笏草堂
上浮集一

王士禛 阮亭詩鈔十七卷帶經堂全集九十二卷漁洋山人精華錄十卷惠棟漁洋山人精華錄訓纂

二十卷年譜二卷惠棟漁洋山人精華錄訓纂補二卷金榮漁洋山人精華錄箋注十二卷補

注一卷年譜一卷伊應鼎漁洋山人精華錄會心偶得六卷

王士禛。字子真。一字貽上。號阮亭。晚號漁洋山人。士禛弟。順治十五年進士。翌年。選揚州府推官。康熙

三年。入爲禮部主事。十七年。李蔚薦其工詩。由戶部郎中改翰林院侍講。入直南書房。未幾罷直。洊至

刑部尙書。四十三年。以王五一案失出革職。蓋士禛與廢太子唱和。借題逐之。卒于五十年。年七十八。

事具清史大臣傳。及黃叔琳漁洋山人本傳。撰帶經堂全集九十二卷。初士禛十五歲。刻落箋堂初稿一

卷。後與兄士祿有琅琊二王合刻。康熙元年刪定丙申順治十三年至辛丑十八年之詩一千二百二十二首。爲阮亭

詩鈔十七卷。錢謙益以次二十八人爲之序。凡丙申以後所刻。有秋柳詩。無題唱和詩。香奩唱和詩。白門集。過江集。入吳集。白門外集。秦淮雜詩。鑾江集。歲暮懷人絕句。皆編入此集。所謂編詩斷自丙申是也。後棄之別刻漁洋集。漁洋續集。南海集。蠶尾集。蜀道集。雅益集。古夫于亭集。蠶尾後集。沒前一年。復就諸集刪併爲帶經堂集九十二卷。從來刻集之多。刪芟之多。均無過于士禛者。先于三十九年刻其詩三之一。凡千餘首。爲漁洋山人精華錄十卷。託名盛符升曹禾所選。近人得士禛與林佶書札。載烟畫東堂小品乃知出于士禛自選。爲精華錄作注者。有惠棟漁洋山人精華錄訓纂二十卷。年譜二卷。棟經生博洽。家有四世藏書。所注稱爲精當。然非采自原書者。亦復不少。多引時人評語。頗近標榜。世或謂棟竊取徐夔之注則非。訓纂凡例明言故友徐君龍友嘗注詠史小樂府一卷。近體詩六卷。余略加刪潤。盡採入訓纂中。葉昌熾見此注原稿。稱注不稱訓纂。後六卷皆題徐夔龍友注。惠棟定字補。後始復有改易也。采他人成書。唯于鈔錄言之。古人本有此例。今注中皆稱徐夔曰。安得謂爲掠美乎。訓纂補二卷。訓纂既行世。一時同人有所就正。乃復采綴他書。以補前所缺漏。且自承其誤。不愧學人之作。金榮有漁洋山人精華錄箋注十二卷。補注一卷。年譜一卷。頗襲棟注。復有增益。然錯譌百出。棟作金氏精華錄箋注辯說一卷。附于訓纂之後。謂有引書之誤。地理之誤。人物之誤。所舉九十餘事。似尙未盡。然世人不察。金箋且較訓纂爲通行。是可異也。伊應鼎有漁洋山人精華錄會心偶得六卷。應鼎幼嘗親見士禛。故爲精華錄作注。其體例頗似屈復玉溪生詩意。雖于作意無所發明。似評詩而非箋詩。挈取惠注。更無補正。然于秋柳

詩娟娟涼露欲爲霜一首云。此詩可與板橋雜記參看。東風作絮糝春衣一首云。此詩當與庾信哀江南賦並讀之。桃根桃葉鎮相憐一首云。此詩殊有深閨麗質淪落風塵之歎。亦稍露端倪。特不敢明言耳。是于惠金兩注之外。未嘗不可備一格。士禛不屑追逐劉正宗濟南一派。乃倚錢吳以取重。稱吳爲師。然不若視錢之重。詩格風流。吐辭修潔。倡爲神韻之說。聲氣復足以張之。遂至名盛一時。泊乎晚歲。篇章愈富。名位愈高。海內能詩者。幾無不出其門下。主持風雅。近五十年。過于錢吳遠矣。然其詩辭重于意。趙執信譏爲朱貪多王愛好。然乾隆中士禛竟以工詩補益文簡。精華錄風行一代。莫之能比。其文亦頗雅飭。然欲以博見長。不唯遜錢。且不敵朱。則讀書與不讀書之別也。

彰義門

白日紛紛距來弩。彰義門邊泣徒旅。黃封御貢不得行。競說前途盛豺虎。紅颺鼠盤青兕衣。南塘朝出暮旋歸。司隸京兆那可問。日日孤兒行射飛。阮亭詩選二

養馬行

建旗臂隼號一萬。爲馬大小尤倍之。碧眼駱駝足千里。此軍云是舟山師。濟南城。駐大帥。秣菘芟芻日三饋。三十二縣何苦辛。昨朝兵去蝗旋至。帶經堂集二

抱琴歌

爲鄭生作

暉陽之桐何泔泔。緯以五絃發清商。一彈再鼓儀鳳凰。鳳凰不來兮我心悲。抱琴而死兮當告誰。吁嗟琴

兮當知之。帶經堂集四

丹陽十字碑

延陵風義著勾吳。十字千年映練湖。却去闔廬城畔望。可憐麋鹿滿姑蘇。帶經堂集八

沙民歎

沙洲連袤幾千里。昨日高門今廢址。稻黃如雲不敢收。欲穫恐遭君馬箠。朝來官長親驅逐。雞狗無家苦遷徙。東鄰西里半燒焚。微命何堪驅螻蝻。連江大帥如雲屯。紅旗金印開轅門。江頭戰鼓一聲動。中堅魚爛前徒奔。但願盧循徐覆一朝死。身同精衛填海水。帶經堂集二十一

阜城感偽齊劉豫作

殘堞昏鴉外。人煙古阜昌。龍蛇逢戰鬪。殺糶慨興亡。父老思宗澤。朝廷負李綱。紛紛齊與楚。一笑對斜陽。元裕之詩。河邊投鞭尚能飛。無角無鱗自一齊。張邦昌亦河間東光人。帶經堂集二十九

傅辰 漬槻堂四種

傅辰。字彤臣。山東新城人。順治十二年進士。由河間府推官。行取山西道監察御史。巡按江西。王士禛順治十八年歲暮懷人絕句。侍御平生左氏癖。閉門日讀春秋經。偶然按部西江上。詩滿廬山九疊屏。卽謂辰也。是歲乞養歸。康熙十八年舉鴻博不遇。卒年七十四。事具清史列傳文苑傳。漬槻堂集四種。刻于順

治十五年。曰瀆槻堂近詩。曰燕南日征草。曰落花詩。曰春閨集唐百首。瀆槻者。瀆槻爲墨。書之不脫。義蓋取此。志稱其有瀛海。燕居。柏臺。于役。南游。家居。美芹諸集。而士禩謂晚歲詩文稿散佚。獨標舉其滄洲道上柳枝詞。即在燕南日征草中。

鄭州有感

百雉金湯已渺然。祇餘四野抱清泉。虔劉毒後居人少。敵竈平沈萬戶烟。

燕南日征草

何世璠 何端簡公集十二卷

何世璠。字澹菴。一字坦園。號鐵山。山東新城人。康熙四十八年進士。官檢討。雍正元年。改御史。擢兩淮鹽運使。三年。授貴州巡撫。六月補刑部額外侍郎。改戶部右侍郎。署直隸總督。七年正月卒。年六十四。諡端簡。事具清史列傳大臣傳。世璠登第甚晚。雍正間任遇驟隆。忽以爲不勝巡撫之任。而命爲總督。其時君相操縱。不可測度如此。喜爲詩。嘗師事王士禩。述其論詩之旨以教人。曰然鐙紀聞。撰何端簡公集。文八卷。詩四卷。至道光甲辰始有刻本。詩清婉有致。文奏議二卷。可參稽貴州改土歸流之事。

懷李象先

憶向青門別。又逢朱夏來。可能忘北闕。只是樂南陔。清暑荷衣扇。承顏竹葉杯。江雲空望遠。海上乃蓬萊。

何端簡公集十一

丁耀亢 丁野鶴集十二卷附樂府三種

丁耀亢。字西生。號野鶴。晚年病目。自署木鷄道人。諸城人。少爲諸生有名。入清以貢生選容城教諭。陸福建惠安知縣。告歸。卒于康熙十年。年七十三。撰丁野鶴集十二卷。爲逍遙游二卷。陸舫詩草五卷。椒丘詩二卷。江干草。歸山草。聽山亭草各一卷。附化人游赤松游西湖扇樂府三種。大約自崇禎六年至康熙八年。先後三十七年之詩。略備于此矣。據故山游序。壬申崇禎五年以前。有問天一刻。其子慎行跋西湖扇。歷數先人著述。尙有天史。漆園草。表忠記。非非夢。星漢槎。并已刊行。今皆未見。又近人有藏所撰出劫紀略。家政須知者。耀亢家世甚盛。父維寧。從兄自勸。皆成進士。仕宦有聲。弟耀心。從子大毅。崇禎中鄉舉。獨耀亢不第。少從董思白喬劍圃游。嘗與陳古白趙凡夫結山中社。又與王子房同負經世大略。自言丁亥順治四年于役淮上。逍遙一集。唯缺山陽游未刻。或慮觸時禁。故諱言之。既不得志。乃泛海北游。爲升斗計。有無聊生理缺。奴僕請逢迎之句。晚以著書被禍入詔獄。僅而得免。喪明逃禪。文人之遇。斯爲最酷。自述年譜以代挽歌一詩。不止悉其生平。亦當閱其厄運。王士禛稱許陶令兒郎諸葛妻一首。謂後來詩格。無此風致。此詩不見諸集。逍遙之作。尙相仿佛。或在問天一刻中歟。集中紀事諸篇。頗可參證時事。有贈賈彘西詩。乃知爲兗州人。且以微官候補京師。非遺老也。

薙髮

秋髮啼陽短。晴簷快一髡。客塵清瓠蔓。霜氣到蓬根。故鏡勞憑弔。新纓笑獨尊。人情習不異。如此任乾坤。陸舫詩
草一

流落

豈不嗟流落。因依借一廬。驥衰迷故道。雁冷就荒烟。小道歸豚笠。雄談坐馬羈。劉琨今罷舞。新授上林種。

出市獨行遠。城隅落日黃。發兵愁觸馬。賽鬼喜分羊。面瘦憐生口。音同問故鄉。夜眠聞鼓角。征雁不成行。陸舫詩
草二

盜亂

已見燕畿擾。相傳鄒嶧空。如何焚比屋。不復樂歸農。路斷民頻徙。烽連虎暗通。移家無可住。吾道已遼東。陸舫詩
草二

田家

亂後有田不得種。蠶後有絲不及用。官家令嚴催軍需。雜差十倍官糧重。縣官皂隸猛如虎。荒田不售鬻兒女。門前空有十行桑。老牛牽車運軍糧。何時望得大麥黃。陸舫詩
草三

哀浙士陳章侯

時有黃祖之福

到處看君圖畫遊。每從蘭社問陳侯。西湖未隱林逋鶴。北海難同郭泰舟。鼓就三搥仍作賦。名高百尺莫

登樓。驚看溺影山雞舞。始信才多不自謀。臨訪詩
草四

案此詩作于順治九年。陳洪殺以不良死。他書未及。

同張尙書過天主堂訪西儒湯道味太常

鬆鬢竊停垂雙耳。渡海東來八萬里。相傳印度浮屠外。別有宗門號天氏。天氏稱天人主教。自謂星辰手所造。因緣亦與儒釋同。不識天人原一道。璇璣法曆轉銅輪。西洋之鏡移我神。十里照見宮中樹。毫髮遠近歸瞳人。亦有井中暗靈巧。激而上注及東隣。手握寸石能五色。照人炫惑皆失真。鐘依漏而自擊。琴繁絃而自操。造化雖小稱絕巧。童年不識陰陽數。老人九十顏如丹。駝腰高鼻古衣冠。漢書鳥譯皆不識。此亦大違非波瀾。安得聃尼言化理。無用小技擊肺肝。臨訪詩
草四

大俠行

君不見。長安馬販屠沽子。豪富一朝雄閭里。門前金碧起高樓。後房箏管披紈綺。名倡各領大官錢。長吏遙尊猾胥旨。翻覆立見起寒暄。喜怒令人判生死。郭解朱家集滿門。座客三千跋珠履。不但聲名逼衛霍。亦能車馬通金史。炙手可熱天可回。自謂富貴長如此。誰信風波在須臾。父子囊頭入都市。勸君莫羨死莫嗟。天道昭明直如矢。臨訪詩
草四

移兵德州

瀛海人將盡。移兵駐德門。連營無鳥過。百里見塵昏。車力勞三郡。田封徙萬屯。莫愁禾黍失。明主有

恩綸。時方發帑賑飢

經行如雁陣。萬幕競臨河。雛女牽青兕。羌兒製白駝。插旗收土著。牧馬散平坡。正好圖王會。民生莫

浪嗟。椒丘詩一

案此詩作于順治十一年。

捕逃行

嗟爾逃人胡爲乎來哉。昔爲犬與豕。今爲虎與豺。犬豕供人刀俎肉。虎豺反噬鄉邑災。爾生不時遭殺擄。不死懷鄉亦悲苦。何爲潛伏里中村。一捕十家皆滅門。擇人而食虎而翼。仇者連坐富者吞。嗟爾已爲人所憐。何爲害衆禍無邊。皇恩新赦有寬令。都護愛人惜爾命。甘死北地莫投親。普天何地非王民。椒丘詩二

乙巳八月以續書被逮待罪候旨至季冬蒙赦得放還山共計一百二十日獄司檀子文

馨燕京名士也耳予名如故交率諸吏典各釀酒三日一集或至夜半酣歌達旦不知

身在籠中也各索詩紀事予眼昏作粗筆各分去寄詩誌感

獨坐憐寒夜。圍牆起鼓聲。雪晴光不定。月暗影空明。掾史藏文士。翳交仗友生。莫輕談往事。一醉頌昇平。歸山草二

焚書

帝命焚書未可存。堂前一炬代招魂。心花已化成焦土。口債全消淨業根。奇字恐招山鬼哭。劫灰不滅聖

王恩。人間腹笥多藏草。隔代安知悔立言。歸山
草二

丘石常 楚村詩集六卷文集六卷

丘石常。字子廩。築海石山房于九仙山。因號海石。諸城人。副貢生。入清選利津訓導。陞高要縣知縣。不赴官。卒于順治十八年。年五十六。撰楚村詩集六卷。文集六卷。刻于康熙十二年。凡詩五百一十二首。文九十七首。右常家世貴盛。少與兄子和及劉子羽陳木公戴賓庭讀書鐵水園。早著聲稱。與丁耀亢齊名。子羽序其詩謂不爲公安竟陵虞山雲間所移。賦性若劍鋒江濤。任氣若雷鳴電掣。不爲格法所繩。石常亦自稱文嘗喜聳牙。詩不愛選體。詩文皆有奇氣。富于辨才。古體浩汗縱橫。不可一世。律絕才思才語。莫能端倪。補和宋玉叔送李舒章四律。格律深細。置之蓼齋集幾不辨。能者信莫測也。其詩有事可指。如感時云。愆然噉麪卽行吟。處士何妨橫議深。殺菽霧霜非令甲。嚙人兒女豈天心。竹居誰勝揚州鶴。海物唯甘瓜子金。葦絡護窗書一寸。且消新茗聽幽禽。有感云。銀河只隔水盈盈。詔下文姬不許行。才貌如卿值一死。風流無主奈多情。嫌籠嬌鳥開何日。抱柱汪生哭有聲。聞道南宮皆賜配。夢中嚙語望成名。陳子瑜辭家有年矣。城破後歸來云。鯨鯨血盡始歸來。城郭人民強半灰。誰意吳門老乞士。及看漳水沒高臺。故宮離黍收三徑。荒草孤墳破一堆。南北地天惟笑傲。野籬花發日銜杯。喜山市醉人云。山市居然有醉人。數錢買蟹便沾唇。嬉嬉笑指挑柴漢。他把藍衫砍作薪。新詔隱逃發旗下爲奴詩喜云。新法初寬天地

開。遺民今始免銜枚。市中酒價增多少。到處歡聲笑若雷。楚弓何必太分明。盡是堯天部下民。滿得漢奴奴得頸。南陽河內各添丁。皆字字沈痛。重足而立。民不聊生。卽此可見。王士禛稱其過梁山泊云。施羅一傳堪千古。卓老標題更可悲。今日梁山但爾爾。天荒地老漸無奇。不載此集。有爲內人買水滸傳云。玉鏡臺前一架書。西游水滸及詩餘。挑針纔罷傳盃酒。紅綻櫻桃念奪魚。文多贈序。張大司空八秩序。蓋爲張鳳翔作。有云先生抵京日。以少司馬召。當事者趨立從逆罪案。先生與大司寇解公次輔王公。默爲調護。首輔怒。出先生督撫浙直。旋又罷之。貳巨傳乃云。李自成陷京師。鳳翔身受拷掠。及賊西遁。乘間歸里。尋至福建。爲明唐王朱聿鍵浙直總督。蓋傳聞之誤。序又云先生流寓武林山中。內院請以許衡之禮聘之。瑯琊丘海石好奇計。先生首薦防河。已報聞矣。亦與先生俱罷。絕愛信之。亦勸先生曰。一身尺度甚小。天下生靈至重。救一分天下受一分之賜。西行禍解。是所望于先生。據此知鳳翔降清。出于石常慙懇。又招亡妻馬孀人文云。王師入杭。余與孀人避于山中。時浙東未賓陳。大將軍言于張內院。索余任浙東事。孀人引衣留之再三。堅以家室未復。勸余勿出。雖古之義士。何以加諸。然則石常輕于出處。有愧其妻多矣。大約石常與丁耀亢皆權奇好事。不屑計較名節。且視富貴甚輕。及其窮也。雖末職亦復甘之。不樂又復棄去。視殺身成仁爲無濟于事。兩人才情行徑略同。故祝丁母八秩序云。野鶴言滿天下無口過。交遍天下無朋禍。則以其與世推移。玩弄澹宕也。是雖以稱耀亢。不啻自稱。他文有關係者。邑侯夏公除荒碑記云。夏津舊賦于司農者。爲地八千餘頃。荒于水旱。荒于兵燹。荒于盜區。去其七矣。我清改

革。令茲土者未經申明領解藩司者。猶三千九百頃。五年審編實徵者止一千一百頃。而二千餘頃部司常作拖欠。積五六七八九年總計之。是今之一畝。包往年數十畝之費矣。況地減矣。而驛站不減。河工不減。祿廩工食等項不減。是今三千一百頃。應往日八千頃之徵。弱者安得不流離。強者安得不挺險。是以地愈荒而欠愈積。欠愈積而地愈荒。石常一學官。而究心地方利弊若此。亦權奇好事有以致之。然當時水深火熱之狀。賴此猶存其實。石常沒。耀亢有詩挽之。因得推知石常卒年。

聞膠鎮變深憂子姪家累

海水迴波漾紫瀾。鯨鯢上岸擇人餐。徵書罔號韓擒虎。舉案空隨梁伯鸞。仰仗山靈堪寄託。憑將心坦祝平安。倘師故智揚帆去。幾日能行皇恐灘。楚村詩集四

祠竈口號

蒙正題詩便狀元。竈王權柄大於天。文章倘得人間重。不學劉生揀大錢。楚村詩集六

惜薪

三稜草鞋牡蠣街。赤條條地去擔柴。日煎臂上白鹽出。按畝供廚不算差。楚村詩集六

丘志廣 柴村集文十二卷詩五卷賦一卷自藥一卷

丘志廣。字海粟。又字洪區。號蝶菴。世居柴村。復以爲號。諸城人。由歲貢爲長清訓導。自譬如僧納之住

院寺。羽流之住宮觀。無害也。與從子石常齊名。共劉鞏爲友。踪迹行年相似。而自謂才不如鞏。卒于康熙十六年。年八十有三。是集首附李煥章所爲序。及丘先生傳。稱其文長于議論。如東坡志林。自今觀之。文不入格。稱謂鄙俚。關夫子劉皇叔之稱。同于演義。然清言娓娓。入情入理。不以詰屈怪異爲高。亦有足取。喜讀程朱書。著理學函不傳。傳其自藥。多閱歷有得之言。心平氣和。宜其有耄耋之壽。作章丘女子梁秀仲傳。秀仲工詩。爲富家妾。屢不安其室。終從韓生朋。相爲貧賤夫婦。以詩相唱和。甲申之變。著難游草。有風樹流泉不辨聲之句。志廣激賞之。贈詩云。醉吟三畝宅。夫婦一牀書。因許秀仲著籍爲女弟子。謂三百篇首風。未嘗不以情許人。信非腐儒矣。

亂後

五畝宅空劫焰微。蓬蒿滿院舊居非。淒涼白骨寒秋雨。蕭索青林掛落暉。補葺一茅塵灶冷。荒埋三徑野花飛。縱餘幾個人如鼠。狐兔相憐問瘦肥。

夕陽影裏壁參差。秋斷縹緲細雨時。繡闌草深雄鼠坐。畫堂土滿野蒿欹。三更鬼哭生寒夜。百雉雲荒落女陣。多少五陵公子去。半成白骨半山移。柴村今體詩鈔三

李澄中 臥象山房集十五卷

李澄中。字渭清。號漁村。又號雷田。諸城人。舉康熙十七年戊午博學鴻儒。授檢討。官至侍讀。三十年辛

未放歸。卒于三十九年庚辰。年七十一。事具清史列傳文苑傳。此集文一卷。詩二卷。滇南集一卷。賦一卷。白雲村文集四卷。詩正集七卷。較四庫存目少良齋文選一卷。然四庫有白雲村集八卷。龐塏爲刻于建寧。較此本少三卷。疑館臣未見原書。言之未核。澄中詩學杜甫。辭多比興。雅而能切。文筆道鍊。善于碑傳紀事之作。鴻博五十人中。足稱上選。四庫謂其篇章不富。未能與王士禛田雯抗衡。實則自訂其集。刪汰已多也。別撰滇行日記一卷。亦該博可喜。

鐵鎖橋歌

盤江之水稱奇絕。雙峽壁立如截鐵。驚濤澎湃戒舟航。行人眼穿骨欲折。曾聞唐末閣羅鳳。創爲鐵鎖勢飛動。千年橋在襲遺跡。山河南北遙相控。我今遊滇過此橋。江流滾滾風蕭蕭。兩崖疊石說仙客。斜支短柱通雲霄。鐵鎖似臂貫兩旁。小徑細碎懸中央。穿石面上爲屋棟。穿木而下成橋梁。鐵鉗木板平如掌。牝牡相銜自寬廣。飛閣朱欄橋始成。車馬朝朝共來往。下臨江水淼無際。倒懸藻稅風雨閉。逆賊一炬總煙銷。皇朝重修加壯麗。遠觀飛橋落彩虹。近視鐵鎖何玲瓏。天地補救待人事。萬年無敵車書通。臥象山房詩正集二

曹申吉澹餘詩集四卷

曹申吉。字錫餘。號逸菴。安丘人。貞吉弟。順治十二年進士。授編修。康熙十年爲貴州巡撫。年始三十八。後二年爲吳三桂所執。逆臣傳謂不知所終。楊鍾羲雪橋詩話三集。言申吉庚申遇害于昆明之雙塔

寺。鍾義未言所本。乾隆中曹益厚序珂雪集。但言先叔曾祖中丞公死黔中之難。未嘗及昆明也。鍾義又引法式善與邵晉涵書。謂申吉在功臣傳言其殉難。在逆臣傳則言其從逆。與實錄方略同。自相牴牾。宜改正。案國史館無功臣傳。從逆殉難兩難考實。實錄方略所據者奏報。未可盡信。張貞渠邱耳夢錄載申吉陷賊後詩。如千里風烟沅水月。一生心事越山薇。又云。兵戈淒斷楚江湄。君去滇南懷莫悲。回首故鄉真萬里。此生倘有夢還時。信如貞所謂幽憤結轡。語多悽悵。據此似其鄉人亦不信申吉從逆。貞謂遺集俱在。乃今不傳。僅傳澹餘詩集四卷。至戊申_{康熙七年}止。順治中。劉正宗力倡濟南詩派。申吉兄弟于正宗爲外孫。得其指授。加以變化。居然作者。不得以七子少之。

北風行

建子之月多北風。寒威日日凌長空。風師鬼馬不知數。靈旂飄曳有無中。雙臺昨夕淡月明。中宵切切聞風聲。始如錚錚裏碎玉。繼如鐵馬相爭鳴。怒驕午夜開窗幕。夢回更覺重衾薄。亂離處處嘆無衣。安用互寒理相錯。蕭瑟平明勢益張。微陽慘澹無晶光。萬物當之靡不弱。飛鳥斂翼精髓藏。敝裘納手冷於鐵。貧家漠漠炊烟絕。閉門但苦飛埃輕。亂捲簾帷硯冰結。我聞海畔彗星飛。機槍欲動鯨鯢肥。狂飈一拂海波沸。鼓盪全生戰伐威。君不見。王師出。疾如掃。千騎夜走之罟島。風乎風乎胡不憑凌借勢息羣氛。坐見時和冬日杲。澹餘詩集一

康熙元年元日作

曾向風塵寄一枝。歸來重遇紀元時。新綸競喜如天澤。時聞詔往事仍深隔歲思。治亂山中情尚切。烽烟海上靜何遲。閒居自怪辛盤儉。淄淄春寒罷酒卮。潘餘詩集一

蠶多桑盡聞有瘞蠶土中者作春蠶怨

養蠶苦不多。蠶多桑葉稀。葉稀猶自可。時復空筐歸。一歸來見蠶饑。對蠶寂無語。瓶中數升粟。不堪持飼汝。
二主婦怨春蠶。胡不生雙翅。不見滿園蝴蝶飛。草間栩栩無人餒。三主人自外來。呼婦首常俛。
今年絲貫官租急。願蠶忍饑且成繭。四春蠶怨主人。爾貧何相迫。我聞亦有朱門客。繰車不動常衣帛。
五陌上桑既盡。瓶中粟亦無。人蠶相對饑。空腹兩躊躇。六主婦同主翁。長跪謝天蟲。未忍相看死狼籍。
不若汝先歸土中。七呼兒助舉筐。瘞蠶桑樹側。徘徊不能去。婦子冥沾臆。八日長因臥時。鄰家聞繰絲。回念二三月。力盡爲阿誰。九乘時速植桑滿壠。沿門更乞來年種。待得桑葉再生時。攜筐一上春蠶塚。解十

潘餘詩集一

冰牀行

長安冰牀穩於屋。大不盈丈足無輻。遙望還疑河上舟。片帆不見行空速。數人箕踞一夫牽。寧似篙師徒碌碌。北風吹寒冰正堅。兒童奔挽兼水陸。更藉黠毳耀眼明。衝塵足倦羣相逐。寒威漸減春漸來。天道由來易轉覆。一日須牽一百回。乘時早渡愁足縮。須臾河畔柳新青。驢了歡喜爾曹哭。敲碎冰山喚賣冰。銅

盤自擊冰千斛。澹餘詩
集三

曹貞吉 珂雪集一卷朝天集一卷鴻爪集一卷黃山紀游詩一卷珂雪詞二卷

曹貞吉。字升階。又字升六。號實菴。安丘人。康熙三年進士。考授內閣中書。出爲徽州府同知。內召禮部儀制司郎中。以疾辭湖廣學政歸里。未得卒年。事具清史列傳文苑傳。撰珂雪集一卷。朝天集一卷。鴻爪集一卷。黃山紀游詩一卷。珂雪詞二卷。王士禛嘗選宋琬王又旦顏光敏葉封田雯謝重輝丁焯曹禾汪懋麟及貞吉之詩爲十子詩略。世稱金臺十子。貞吉詩從七子入手。世貴眉山劍南。乃稍變其體。故爲士禛所賞。然讀其七古諸篇。悲歌慷慨。自是才人。與弟申吉可稱二難。蓋盛衰之感。不能寓于膚闊。此其所以折而入宋歟。尤工填詞。出入南北宋。無語無寄託。不爲閨檐靡曼之音。時人以比嘉善曹爾堪。稱南北二曹。然其變化無端處非爾堪所能及也。

吁嗟行

吁嗟乎。白日何黯黯。衰草何蕭蕭。紙灰何飛揚。敗葉何飄搖。頽垣三尺牛羊臥。疾沙撲面風颯颯。盛衰翻覆如轉轂。婆婆清淚憶唐堯。先皇求治恢前業。金華畫敝勸三接。細旃促膝出連鑣。賜得天閑馬蹀躞。黃扉七載佐昇平。政府由來冰蘖聲。侍直頻霑長樂酒。春明時聽上林鶯。淋漓翰墨承清讌。橫經直入蓬萊殿。珊瑚筆格玻璃牀。金泥玉冊題皆遍。驚傳供奉到人間。妙筆圖將麟閣顏。想像臺端雙鬢雪。依稀夢

裏五湖山。乞骸未遂孤臣願。白首彤墀矢靖獻。東門不許二疏還。北山空使猿鶴怨。虞淵日落蒼梧愁。我
公示疾歸丹丘。三年填向玉泉峙。遺書無復茂陵求。午橋綠野皆寂寞。秋光慘澹浮雲薄。叔敖之子行負
薪。廉吏于今那可作。故里誰稱宅相賢。短衣破帽青門邊。辭家趙壹仍貧賤。入洛陸機非少年。京兆原邊
一杯酒。手披蓬蒿延佇久。騎驢颯沓卻歸來。緇塵落落空搔首。車馳人散高梁河。狐狸塚上夜還多。北邙
松柏雜笙歌。古今賢達將奈何。噫噫古今賢達將奈何。珂雪集

案此詩傷劉正宗而作。正宗爲清議所不許。故以吁嗟名篇。

觀樂行

己酉歲暮月嘉平。南宮闕技來咸英。魚龍百戲歛然集。鈞天之響繁中庭。霓旌雲罕輝清晝。九功七德紛
前後。高歌不復辨宮商。似爲艱難王業奏。壯夫綽板立當筵。崑崙琵琶龜茲弦。冰車鐵馬應無數。一彈再
鼓聲淒然。長弓大矢忽馳驟。正如豐草從原獸。蒼兕黃熊皆飲羽。稱觴卻獻南山壽。梨園小兒清且妍。珠
襦繡祿白中單。急管催成鸚鵡舞。反腰貼地凌飛仙。渤海吹殘蘆葉碎。教坊又喚□□隊。依稀弄丸復承
蜩。翻覺翠盤無意態。我聞此樂自鎬豐。年年待詔未央宮。至尊寧爲耳目玩。聊同稼穡陳幽風。須臾舞罷
歌亦止。觀樂平生有如此。珂雪集

燈市嘆

十載遊長安。曾未值燈市。今年結伴來。遣懷聊復爾。其初見市不見燈。腰裏駿足相憑陵。肩摩轂擊不得

過。緇塵襤褸踏春冰。列廬櫛比隘環堵。珠明歷歷差堪數。自識雍門客到稀。入眼先看青州士。料絲五色稱絕倫。鏤空繪影爭鮮新。草野那知此物貴。千金詎我薄遊人。都門好手皆可辨。剪綵迷離驚創見。邇來頗重米家燈。摹得老蓮舊畫片。太平物力富年年。五侯七貴囊金錢。一揮中人數家產。持向深閨伴綺筵。嗚呼金可竭。燈不滅。六齋皆上繁星列。斑斑照見蒼生血。珂雪集

山民嘆

軋軋機聲徹曉催。機聲未盡剪刀裁。問君何事匆匆極。長吏新膺上考來。風吹榭葉半林霜。新葉抽萌舊葉黃。似蟻春蠶難作繭。官家早晚又開倉。如掌山田蔓草青。兒童菜色婦鳩形。不辭努力躬耕去。里正勾人到縣庭。天行人事兩堪悲。鞭扑難勝軀命危。今歲社錢還倍出。循良要勒感恩碑。泪墮邨邨各有碑。兔園老子手如槌。鴻濛削鑿山靈笑。何用磨崖大筆爲。木皮爭似草根香。婦女攜籃似采桑。聞道帝城寒食近。踏青挑菜一時忙。朝天集

贈街南先生

閉戶著書一千卷。烏衣白袷自年年。脩琴買藥時來往。猶恐人呼作地僊。五柳村中陶栗里。成都市上嚴君平。誰言心跡難雙絕。避世牆東有此清。耆舊人傳鄭谷口。隸書卓犖信登壇。先生腕底千鈞力。只作雕蟲小技看。

闡義高文敵史遷。名山光怪要人傳。如何尙學琅環秘。只少塵中造業錢。鴻爪集

王曰高 槐軒詩集四卷

王曰高。字監茲。一字登孺。號北山。荏平人。順治十五年進士。官工科都給事中。撰槐軒集詩四卷文四卷。四庫著錄爲詩文各五卷。此本刻于康熙七年。偶失其文。曰高詩學唐賢。與王士禛唱和。亦頗清逸。所乏者健舉。

魯高士墓

披榛迷廣路。駐馬拜荒丘。戰國一高士。荏山萬古留。尺書服燕將。大義著宗周。餘憾天曾醉。臨風咽未休。

入鄉問古俗。赫赫到於今。快意終長往。逃名蹈海濔。孤城飛片羽。一笑却千金。回眺荒原上。蕭蕭秋

草深。槐軒詩集二

毛漪秀 遊秦草一卷

毛漪秀。按縣人。順治十五年進士。官平涼同知。值王輔臣之亂。轉餉兵間。事平。擢戶部郎中。主試黔中。督學雲南。乃哀其所爲詩而成此集。雖未爲合作。而戎馬倥偬。詠歌不廢。當時情事。猶可于字句間

隱約得之。是亦非徒作無逸者矣。

時困輓輸憂旱

土屋眞懸磬。催輸又在門。曾無絲穀賣。祇有骨皮存。赤地添民困。黃雲吹晝昏。額天誅旱魃。霖雨潤千

村。遊秦
草

盧世澹 尊水園集略十二卷

盧世澹。字德水。號紫房。晚號南村病叟。德州人。天啓四年進士。官戶部主事。告終養歸。起禮部。改監察御史。崇禎十二年。命償漕運。十四年告病歸。降清。起復原官。以疾不赴。益縱酒。卒于順治十年。年六十六。程先貞爲之狀。王永吉爲之志。黃景昉田雯爲之傳。雯稱其詩酒自污。庶幾比于阮籍陶潛。此猶論其迹也。世澹以幹濟有爲之才。文章聲氣。足以奔走一世。知時不可爲。而又不無以身字爲念。等一降表。迹其行事。或與錢謙益吳偉業有所分別。世澹始撰讀杜私言。謙益因之有小箋及箋注。然謙益詩不似杜。而世澹則悲感淒愴。無一字非杜也。卽其詩可以觀其人焉。撰尊水園集略十二卷。刻于順治十七年。庚子後又增補遺一卷。當時印行甚少。修明史時。廣求其書。僅得一部于吳偉業家。蓋盧氏後人不欲出其書也。

正夫家藏思陵石墨錢牧齋先生題詩其上余次韻奉和

石墨鑄華蘊寶香。虞山短詠動寒光。可憐雲漢成煙霧。淒斷銀鈎四十行。尊水園集略四

蕭惟豫 但吟草四卷

蕭惟豫。字介石。號韓坡。德州人。順治十五年進士。入翰林。官至侍讀。盛年告終養歸。遂屢薦不起。撰但吟草四卷。刻于康熙五十年辛卯。年七十六矣。恭紀詩有四十四年迎駕之作。而吟草止于二十一年壬戌。此後不應無詩。或奮于資未刻歟。惟豫詩境淡逸。不事摹擬。不矜標格。躬行孝弟。篤于交友。自謂慈母在堂。幼子繞膝。門外之事不與。天倫之樂有餘。餘姚葉公旦高士也。一見傾心。載之北行。爲之謀生。惟豫詩。閉戶安貧者。云何向越行。笑余疎世故。爲友代謀生。卽爲公旦作。他詩若晨昏候母安。此外便響啞。不入深山隱。不遂長安轡。斯人爲誰歟。天地一聾聵。強仕年過矣。無才幸不官。不官人易懶。無累病皆輕。是非不解休經耳。牛馬憑呼早閉關。謝客多年唯道懶。安貧百畝轉須勤。我共園丁懶。晨眠未灌園。養生能却病。守拙豈嫌貧。有酒陶潛醉。無錢原憲貧。蕭蕭閉戶讀南華。多病人疑隱士家。歸去傳子瓜味好。囊中那得太平錢。借宿貧家無可贈。任君借取案頭書諸句。皆樂道安貧。足使熱衷奔競者讀之。渾身汗下。然過黃家嘴時。居民被河決之患云。功成瓠子歌誰聽。億萬金錢付渺茫。又舟次東溝河水爲災。河決有感。庚申康熙二十九年十一月一日紀事諸作。未嘗不繼以慨歎。則亦未能忘世者也。惟豫告歸。自謂

年三十三歲。當在戊申。康熙七年然與寄杜子靜同年詩四十傷妻人易老。九年不宜與全疎不合。集中有己酉六月耿隱之枉過涓墅二首云。燕市經年別。平原十日留。田雯爲其集序。謂于馬頰河之濱。嘗涓園以奉母。所謂涓墅也。是惟豫戊申尙在京師。或前二年即假歸。戊申始得請終養歟。上巳涓園四首云。肺腸經苦藥。耕釣作天民。其告歸必有不欲言之隱。康熙中詞林如金德嘉陳大章梁佩蘭皆不樂玉堂。然較之惟豫。家貧且有長兄。而能棄官。爲不佞矣。癸丑戊午兩游浙東。皆爲李之芳。又嘗徘徊于上谷大怀之境。蓋謀升斗以繼白華之養耳。

魯仲連村

鬪狗爭堪笑。先生不帝秦。謬悠非所事。學術轉能醇。地近三齊地。人非六國人。無勞東海地。身在武陵

津。但吟
草四

謝重輝 杏村詩集七卷

謝重輝。字千仞。號杏村。德州人。陞子。以父蔭中書舍人。官至刑部郎中。少工詩。與同里田雯同官京師齊名。王士禛選金臺十子詩。兩人與焉。歸田後。撰杏村詩集七卷。爲壬午康熙四十年至戊子四十七年之詩。詩格一變。專作閒適語。極近香山。詠家存遺物二十首。冠簪。飛魚。象笏。玉帶。朱綬。牙牌。朝裙。賜履。朱盒。黃尊。皆先朝法物也。語子孫世世保之。蓋不勝其懷舊之思矣。

朝裙

邪幅當時製。玲瓏玉織成。貢來玉瀕國。不出錦官城。立處香烟近。歸逢返照生。每思同綬解。擺落臥柴

荆。杏村詩集一

程先貞海右陳人集二卷

程先貞。字正夫。德州人。工部侍郎紹孫。通判泰子。官工部員外郎。順治三年告終養。遂不再起。卒于康熙十二年。年六十七。所著海右陳人集二卷。刻于康熙三十五年。有錢謙益序。稱其汲古起雅。盧世灌其師也。謂爲王孟韋柳。自歎七言不如。先貞自謂學陶兼杜。詩中自注。頗及時事。是可取也。自題小像第三像云。乙酉順治二年北調。賜蟒衣一襲。濫江干之役。腰橫玉具。行色匆匆。據此知清師南下。先貞亦在行間。所以招錢謙益也。然則王鐘南行。蓋爲王鐸。而史可程之爲史可法。概可知矣。當時用兵。布置如此。謙益于崇禎十年被逮。句留德州者匝月。藉馮銓以通曹化淳。而盧世灌實爲之樞紐。程盧世好。故謙益主先貞家。有學集中何處東樓好詩。卽爲先貞父子作。柳如是題壁詩。後來王萃尙及見之。此集有和柳姬詩。故必以先貞招錢。大約先貞不斤斤于細節。亦不榮于一官。父子皆好事。艱難之際。可以依倚。故顧炎武過德州。亦主先貞。集中相贈詩。多至數四。必有相喻于無言者。不只以講易投契也。

丙戌秋日初至桑園舊莊作

依依將陵道。宛宛衛河濱。十年作戰場。不見舊居民。時有兩三家。秋風禾黍新。我行日欲暮。疲馬涉荒津。孤城去漸遠。何處吹笳頻。蕭騷下木葉。冷月照青燐。漫游餘緬想。觸目淚盈巾。人生復幾時。終年懷

苦辛。海右陳人集上

丁未六月漫紀

今年正月節。雪花大于席。埋卻街衢人鑽穴。鴉鵲凍死不須射。二月以後旱魃來。修羅風起翻塵埃。三月二月閏四月。無端燒作劫餘灰。五月看飛蝗。飛蝗之身幾與燕子相頡頏。赤白分文武。中亦有蝗王。障日遮天不可當。中人腹背如刀槍。青苗食盡不知歸何所。殘孽游魂地下。戢戢皆其兒與女。蕪田復見新禾生。饑吻垂涎豈肯吐。六月才能雨浹旬。始知上帝憫窮民。奈何決破天河口。顛江倒海或然坤軸遭沈淪。家家竈突無煙薪。客從外來譬如蛙黽。接腋持頤泥滿身。昨日初二與十六。連有轟雷擊兩人。今年吾土何災屯。噫吁嘻。今年吾土何災屯。海右陳人集上

糶麥行

麥直傷賤。而賦數孔急。民皇皇然難結夏稅局。當事者不知何故過糶。商賈散而他之。農人怨咨。丁未夏五月。

麥田苦旱多稂莠。薄收僅可餘升斗。顆顆粒粒似珍珠。饑腸未忍充八口。負米城市換朱提。庶幾國課於茲取。逋逃不敢學奸農。身戴鞭瘡如豬狗。望見商人即父兄。商人睨目頻搖手。大筆連圈告示紅。閉糶誰能私授受。麥翁四顧立傍徨。租吏登門作虎吼。海右陳人集上

後羅麥行次前韻

遇權者使麥市阻僧輩。荷校于塗。大亡其財。而厲禁乃弛。于是農夫始敢糶麥。計日勾當了公事。

極目荒原惟稗莠。茲州雖大才如斗。轉糧實賴有鄰封。聊使吾民糊其口。不然逼糶設關防。通商裕國誠何取。阻僧重將線索牽。汝曹亦足稱功狗。麥翁自詫十斛多。易錢兩貫難盈手。勾當官賦了愁腸。敲扑幸得無膚受。向來躑躅夢魂疲。今宵鼻息應當吼。海右陳人集上

李 泂 陶菴詩集三卷

李泂。字霖曠。德州人。順治三年進士。官山西芮城知縣。姜瓖起義。以失城守罷歸。撰陶菴詩集三卷。王士禛評定其集稱爲學陶。其詩能錘鍊有作意。然語語倔強。時露不平。與陶相去甚遠矣。

長安書事

浪迹揖公卿。主人非夙因。感此長安奕。盛衰隨局新。

求羸趨似羶。鬼目洞於燭。寄語金穴翁。世情多反覆。陶菴詩集中

田 雯 古歡堂集三十六卷

田雯。字紫輪。號山薑。德州人。康熙三年進士。由內閣中書歷官江寧貴州巡撫。丁憂起補刑部右侍郎。調戶部左侍郎。四十年告歸。又二年卒。年七十。事具其弟需所撰行狀。有古歡堂集三十六卷。爲雜著八

卷。序四卷。題辭一卷。記二卷。銘表二卷。傳一卷。跋一卷。雜文三卷。又詩集十四卷。別撰點書二卷。長河志籍考十卷。雲推美七子而詩則不類。趙執信盛致詆訶。且謂其詩空泛。謂之他人所作亦可。皆過甚之辭。王士禛譏其好奇。點書或有之。他作皆文從字順。稍近鍾譚。意在新警。雜著論詩平易近理。其餘劄記。亦耳目習見。未見其能奇也。詩富才氣。與士禛途轍不同。而同致盛名。蓋由喜接納後進。遂爲士流所歸耳。

淘金謠

淘金戶。戶戶無寧居。背上都盧。西走巴渝。巴渝田可耕。依山蓋屋。孖犴兩兒女。禿速一黃犢。苛政十倍。橫索官錢。先賣黃犢。後鬻兒女。不如巫州歸去。涕淚漣漣。踉蹌入籍。淘金猶故。楚山高兮沉江深。瑤村無路。古歌堂集一

田 霖 兩津草堂絕句詩

田霖。字子益。號樂園。又號香城居士。康熙二十五年丙寅拔貢生。授堂邑教諭。以病不赴。兄侍郎雲。編修需。俱以文學著述致高名。而霖獨寂寞自甘。篤詠閒適。雲與王士禛爭名角立。每持異同。而霖獨喜從士禛游。奉其詩教。所著兩津草堂詩集。曰五字古體詩一卷。五字今體詩一卷。絕句詩一卷。又七十以後詩爲菊隱集南游稿各一卷。此絕句詩乃其集之一。嘗單刻先行。霖素以此自負。所作亦此體特多。讀之

當可以悉其生平矣。

客有遺余人參種子者戲占四首

價敵璠瑒信不虛。竟成土產更何如。要將播種人參法。補入齊奴致富書。

託根遼海抱巉岨。吾土移來卻亦難。倘得三椹五葉發。直堪聊爾佐盤餐。

馬鈴牛膝同爲藥。鴨蹠烏頭亦佐醫。何似呼人名更好。階前種爾頗相宜。

使者帆懸鴨綠灘。曾聞采取有專官。廟堂新下羣公議。不禁書生種紫團。

西津草堂絕句詩

馮廷樾馮舍人遺詩六卷

馮廷樾。字大木。德州人。康熙二十一年進士。官內閣中書。二十九年卒。年五十二。事具清史列傳附趙

執信傳。王士禛居易錄志其卒于庚辰九月十六日之夕。蓋中煤炭毒。庚辰爲康熙三十九年。史誤。廷樾

早歲驚才。晚愈錘鍊。雖與士禛境地日遠。詩格却不似馮班。強被執信牽引耳。

朗陵行

郟城以南數百里。廬舍蕭條。田野不治。訪之士人。蓋數十年於茲矣。夜抵確山。感而賦此。

荆河惟豫州。厥賦實第一。汝南天之中。亦屬中上地。漆絲既繁興。織絮以時致。泊乎井牧荒。農民乃多事。或爲早潦侵。或因兵燹棄。阡陌紛錯陳。溝洫久廢置。朝廷重稼穡。特設牧民吏。厚以賜復恩。重以荒田議。匪惟念民依。亦將收地利。豈知羣有司。相視等兒戲。荆榛翳邱隴。瓦礫羅市肆。我欲呼流民。裹糧

千里至。相彼高下田。畀以耕耘器。播穀居其始。種菽及其次。三時課晴雨。豈曰非善智。惜非勸農官。懷此終何試。馮舍人遺詩二

趙善慶 重知堂詩二卷

趙善慶。字怡齋。德州人。官國子監學正。撰重知堂詩二卷。嘗從王士禛學詩。又與馮廷樞趙執信交好。詩格頗近之。古體沈著似勝律絕。題尊水園集後云。錢盧並駕幾春秋。一臥南村到白頭。又云五十年來方論定。虞山德水竟誰優。此尊一先生之言也。順治元年六月。謝陞有降表歸順。連名者。世灌與趙繼鼎。俱以御史徵。上章疾篤不能就道。得旨原官在籍調理。然謙益不理于清議。不僅在首先迎降也。

西洋瓜

競傳異種遠難詳。且剖寒漿自在嘗。因產西方皆白色。爲來中土盡黃羶。誰將响嘍山尖字。書向故侯瓜內藏。繞子虬文似科斗。紛紛映日吐光芒。重知堂詩二

感懷

長安豪富多。甲第連雲起。車馬鬪翩翩。絲竹競靡靡。繁華難久存。勢失如覆水。朝爲富室兒。夕成無賴子。僮僕逐風散。親故無可倚。始知積萬鎰。不如負一技。一技可資身。窮達皆足恃。而況抱道者。巋然超生死。斯人不可遇。遙望暮山紫。重知堂詩二

安致遠 安靜子全集十四卷附綺樹閣稿一卷

安致遠。字靜子。號緘菴。又號拙石。壽光人。順治十一年拔貢生。卒于康熙四十年。年七十四。少與李澄中李煥章齊名。爲周亮工所賞。而致遠有藏書。文詞近雅。與澄中皆工詩。煥章及張貞徒以文傳而已。清初青齊海岱間。人文之盛。足與大江以南相匹敵。後來則稍衰矣。全集曰紀城文稿四卷。玉磴集四卷。紀城詩稿四卷。吳江旅嘯一卷。爲所填詞。蟹音一卷。則遺命也。

徵兵

王會車書盡八荒。炎天兵氣吐寒芒。遙傳符節催征騎。幾處河山入戰場。廿載人烟成聚落。百年吾土但耕桑。昇平合有諸公咎。瘠歲心懸意倍長。

下瀨樓船日日開。南征推轂尙方來。烽烟幕府魚書急。風雪山城□□催。海國翹關蹋鞠士。朔方健手羽林材。十連虎旅雄三輔。莫遣憂時在草萊。紀城詩 萬一

□□歎

民貧稅乃逋。因循非一日。俞跗起沉疴。調劑豈無術。翼虎橫飛來。吞齧及萬室。寒飈刮地皮。急雪慘慄栗。天地多愁顏。日月化斧鑕。一隸催十丁。綖頸雜繩繻。威尊知命賤。倉皇不敢匿。血肉踐公堂。嚴笞祇對膝。對膝 刑也 颯颯朔風號。凍雲黯如漆。生死寄牢頭。魂魄何當出。

老者七十餘。幼者十四五。纍纍牽持來。黷黷淚如雨。吏怒速與杖。笞爾倍加數。少壯匿何方。唐塞充弱戶。老翁杖下亡。幼者僵衙廡。積屍不敢收。冰雪爲黃土。吏見掀髯笑。逋稅渠自苦。昂首訴蒼穹。有言不敢吐。紀城詩 卷二

安 寔 綺樹閣稿一卷

安寔。字青士。致遠中子。著有綺樹閣稿一卷。附安靜子全集以行。

尋廣固城遺址

繩水帶城爲廣固。厥初造之曰曹嶷。茲城蟠踞堯山陽。絕澗深隍開九遠。憑跨實能藉地嶮。南燕霸業雄東垂。憶昔慕容起西北。烏丸突騎驅魏緜。夕火秋月戈劍光。辟閭竄殺旌旗靡。竊弄神器僭紀年。六州甲馬鋒鬣鬣。封孚韓諱盡人傑。夾輔遂成角。逐資。祖明小兒真狙獍。身匿金刀私夜馳。壞輾破轍由茲始。終成癡骨裹妍皮。老成已矣讒佞進。畫開峴口揖王師。天齊淵湧女水竭。如馬之鼠遊郊墟。申胥空作秦庭哭。原軫難扶晉祚危。美人登城泣紅袖。英雄氣盡悲虞兮。銜璧求生固不肯。奮劍決死將何施。鉉文計塞五龍口。萬羣馬散巖城隳。跨有全齊僅再世。吁嗟來者復爲誰。至今城郭已銷毀。北邙四顧冢纍纍。歌臺舞殿餘禾黍。蔓草頽垣走鹿麋。唯有雲劈峯千疊。依舊三匝爲藩籬。行行驅馬勿復道。萬物廢興自有時。君不見。典午符秦俱消滅。況茲區區者何爲。綺樹閣稿

董 訥 柳村詩集十二卷

董訥。字默菴。號俟翁。平原人。康熙丁未^六進士。以第三人及第。官編修。至左都御史。丁卯^{二十}爲江南江西總督。時靳輔爲河道總督。主修重堤。清理屯田。而侍郎孫在豐直隸巡撫于成龍。議濬下河海口。爭議久不決。朝命尙書佛倫侍郎熊一瀟等同訥及總漕慕天顏案之。在豐天顏與輔相左。佛倫等奏宜從輔議。訥依違其間。不敢立異。而實贊天顏。竟劾屯田書民罷之。民思其惠。爲建生祠。翌年。左都御史郭琇嚴劾輔去官。訥亦降補侍讀學士。庚午^{二十}以訥有治績。起漕運總督。壬申^{三十}內召左都御史。時黨爭方亟。有欲排訥以撼郭琇者。遂告歸。庚辰^{三十}罰令出資鑿黃河引河修挑水壩。翌年。沒于河上。年六十三。撰柳村詩集十二卷。其詩不事修飾。信筆疾書。往往有合作。屢進屢黜。不可以常理測。其沒也。適南巡過平原。臨柳村南樓。謂用之不盡。書眷念舊勞四字刊于墓門。而無卹典。士大夫不悉意旨。致無表幽之文。其事無徵。唯略見徐用錫圭美堂集與劉縣尹書。此蓋從詩集中考訂得之。

偶憇淮城郊外父老云歲大稔因憶己已賑荒情事感而有作

大地控徐揚。孤堞臨河海。長堤鎖萬流。廬舍抱煙水。秋霽過西郊。雨氣涵芳沚。一望何青蒼。林木光如洗。犢牛驅道傍。餉婦攜筐篚。遙睇遠山涼。畦稻拂雲霧。枝長帶碧煙。穗結搖新苞。盈盈出淺波。離離無滓糝。有秋已可期。有麥先盈穉。五月貽來牟。香氣如粳米。大者供盤餐。小者充賓簋。銀餅看晶瑩。清芬

伴綠薺。鼓腹快民生。相對生歡喜。父老傍車前。踴躍首還稽。咨嗟向我言。豐年寧有幾。向年愁不登。凶荒在己巳。半菽苦朝餐。褐衣無完體。況復燕齊間。流民亦轉徙。來依淮浦雲。零落但知死。何以集哀鴻。賑粥連都鄙。老病許先餐。次遂及婦子。其餘飽壯夫。條分記姓氏。日以午爲期。何曾爽寸晷。生全數萬人。從容返故里。何幸得逢年。可歌亦可涕。我聞感嘆深。勸慰還疊疊。歲月當辛勤。風俗尙淳美。聖代陰陽和。皇恩每下逮。但欲安農桑。愛養須賢宰。長淮見我心。秋風同樂愷。

柳村詩集五

堤夫行礮齊唱土腔以鼓衆力因做竹枝詞六首令其歌之

多用夯礮好築堤。堤成百里障流谿。從今得土人無患。田在堤東水在西。三三兩兩便成村。只恐長湖水到門。但得堤成樓自穩。兒郎日夜少啼痕。如鳩夫婦向堤頭。忍辱含飢爲口謀。換得一錢泥一籠。終朝奔走樂無憂。生怕虛鬆土不堅。堆成萬疊亦徒然。同聲努力休忘却。天設長虹鎖巨川。二月堤頭月正懸。只宜用力不宜眠。若非早作生涯計。那免哀鴻似去年。

柳村詩集十二

董訪似山亭詩四卷

董訪。字季問。號裕菴。訥弟。以善病。己卯康熙三十八年後。卽絕意進取。撰似山亭詩四卷。刻于康熙五十年。訪

已前卒矣。其詩似河汾諸老。清絕類不食人間烟火者。有絕句云。朗月清風是所親。澹然相對淨心神。邈來堪笑塗鴉手。不得工夫謁貴人。想見丰神。他可誦者皆類此。

答友人借米

我亦無生計。饑贏歎友朋。只餘糧一斗。且贈汝三升。不謂交情薄。翻令愧色增。歲荒心共苦。相救有誰能。似山亭詩四

孔傳鈔 補聞集二卷清濤詞二卷

孔傳鈔。字西銘。襲衍聖公毓圻子。撰補聞集二卷。清濤詞二卷。刻于康熙四十五年。詩詞亦復爾雅。康熙初。闕里孔顏以文采相尚。一時作者甚衆。若傳鐸傳鈔。亦後起之秀也。

田家行

朝耕田之南。暮耕田之北。不惜終年胼胝勞。惟願苗生滿阡陌。四月麥熟黍乍生。五月桑肥蠶又成。家家男女無閑暇。一半縑絲一半耕。賣絲買得耕田鐵。煮麥餽作田家食。收穫千倉與萬箱。室中幸免人交謫。大兒課令讀論語。小兒亦能織草屨。阿翁鄰里扶醉歸。新婦當窗正鳴杼。秋成禾黍家家足。租完免教官吏辱。嗚呼安得一生足跡不入城。長放閒身伴黃犢。補聞集上

甲申夏五月旱既太甚耕失其時加以疫癘爲災作詩憫之

上帝何不惠。早魃恣縱橫。赤日麗中街。酷若釜飢蒸。時雨久已乖。炎風正憑陵。稿我原上苗。三時無可耕。亢陽積驕氣。癘疫來相乘。少壯相枕藉。杖扶不能興。老弱多暴摧。奄如春後冰。昔我聖人里。十室信可徵。今皆苟存活。弦歌化無憑。或言父鬻子。持以換斗升。或言夫棄妻。乞食他州城。往往多菜色。彙彙臥溝塍。雀鼠捕已窮。樹皮價亦增。終焉委溪壑。餉彼蚋與蠅。安得泰岱雲。觸石膚寸興。殷殷南山下。雷鼓百萬鳴。一掃早疫除。再使苗稼成。天澤貯可俟。吾何百憂并。

補闕
集下

題桃花扇歌

金陵三月飛桃花。金陵城頭啼暮鴉。珠樓翠院皆寂寞。菜畦瓜圃交橫斜。憶昔南朝太平日。占勝秦淮與桃葉。王孫苑外驟鞭過。少婦樓頭靚粧出。往來狎客恣經過。買笑追歡駐錦窩。豔妝婢子擎高燭。冶服仙娥整翠蛾。路人錯認公侯宅。爭知盡是烟花窟。東家荳蔻尙含胎。西院芙蓉已堪折。就中尤數玉娉婷。二八香君是小名。偶然心許知名士。髻臂焚香早締盟。皖城逐宦權闌友。見攢清流時已久。欲招狂客入私門。願贈香奩媚行首。豈知巾幗心偏烈。視若鴻毛渾棄擲。才子天涯去避讐。佳人掩鏡甘淪寂。開府樓船勢正炎。千金不惜聘鸚鵡。長齋謝客嚴辭拒。十二紅樓不捲簾。從此芳名遍吳下。桃花扇影胭脂寫。何限男兒逸指柔。斯人却是純鋼者。詞客吾宗老岸堂。清歌一闋譜興亡。同時賭勝旗亭者。更數江東顧辟疆。悲歡聚散尋常事。話到滄桑發深唱。三寸蘇張舌辯鋒。一腔信國憂時淚。總作浮雲過眼看。何論拆散與團圓。紅兒按拍周郎顧。猶可樽前助合歡。

補闕
集下

孔尚任 湖海集十三卷

孔尚任。字季重。號東塘。又號岸堂。自稱雲亭山人。曲阜人。康熙二十三年。由監生授國子監博士。後二年丙寅從侍郎孫在豐疏濬黃河海口。又三年己巳還朝。遷戶部主事。進員外郎。卒於康熙五十七年。年七十一。撰湖海集。凡詩七卷。文六卷。自丙寅迄己巳。蓋奉使揚州時所作。己巳以後詩。見蔣景祁輩下和鳴集。曰岸堂稿。凡古今體詩六十五首。尚任以桃花扇曲子。負一時盛名。詩極清麗。而骨格未遒。然情致纏綿。頗亦可誦。文則具體而已。喜藏古物。在揚州得盧僂銅尺。司馬文正公布帛尺。因作尺考三篇。徵諸經史。取證不能謂確。然言之有物。非全不讀書者。清初山左諸家中。未嘗不足以獨樹一幟。嘗得大小忽雷。大海潮小吟蟬兩琵琶。皆有詩。因作小忽雷傳奇。可謂好事。小忽雷清季爲劉某所得。今不可踪跡矣。忽雷不乏存者。曾于廠肆見之。尚任尚有節序同風錄一卷。會心錄四卷。爲四庫著錄。其祖庭新記二十四卷。未知有刻本否。昔從估人見長留集三卷。擬古宮詞一卷。惜未得之。在園雜志有尚任秋水亭記。作于康熙五十四年乙未。他文當不止此。恐皆散佚。所謂岸堂文集。僅存其名而已。

鈕燈行

北風捲雪壓江岸。揚州簫鼓雪中斷。寂寞春燈向佛開。客來閒坐燈前翫。此燈製出鈕元卿。絲絲琉璃織屏幙。人馬禽魚百花叢。間以錦文分十段。紅蠟灑點透精光。色色活跳來几案。名家新樣世纔興。畢竟不

同君細看。琉璃寶料產青州。土人質蠢解燒鍛。作器大率兒童嬉。混沌風氣未全判。一到江南賃可居。頓使樓臺增燦爛。家家做樣娛時人。誰知鈕氏年年換。好奇偏是廣陵商。新勝行頭仰面贊。嗚呼人巧終何窮。客去燈殘發三歎。湖海集四

顏光敏 樂圃集七卷

顏光敏。字修來。一字遜甫。號樂圃。曲阜人。康熙六年進士。由國史館中書舍人。官至吏部考功司郎中。卒于二十五年。年四十七。事具清史列傳文苑傳。撰樂圃集七卷。其詩初刻入金臺十字集。近體明秀可誦。善接納。知交遍海內。顧炎武詩案獄亟。光敏爲之經營頹力。精騎射蹋鞠。喜山水。嘗西登太華。循伊闕。南浮江淮。觀濤錢唐。溯三衢而歸。所至命畫工爲圖。蓋振奇人也。

昔聞

昔聞老農言。所患惟饑饉。婦子勤經年。私喜空倉匱。匹夫罪懷壁。斯語良亦信。奈何稼穡艱。遂使嬰禍釁。愚氓貴苟全。良苗復奚吝。遠竄昧生理。隱忍求纖潤。頗聞軒蓋中。薰蕕得互進。矧我微且燠。獨能守貞順。朝逐中山狼。暮追東郭媿。甘爲徒侶嗤。但懼鄉里訊。中宵擊壤歌。痛思康衢覲。我始亦良農。傷哉負堯舜。樂圃集一

野老

野老對門巷。侵晨蔭榆柳。偶坐壺觴前。似是商山叟。東方一騎來。幡然解趨走。掃室移困倉。隔離障雞狗。東臯雨新足。布穀鳴北牖。三朝廢鋤犁。坐歎生稂莠。市門習猥薄。冠蓋賤已久。闔閭有嘯詞。獨在軒車後。君子無令德。惟能忍瑕垢。茲豈無懷民。遺俗民獨厚。先王親饋醕。盛事今則朽。奈何鞭扑威。竟忍

施黃耆。樂圖集一

驅蝗

夏蝗乘南風。蠶食逼鄰邑。百里互傳警。一朝逼原隰。側聽風濤湧。仰驚霰雪集。良苗鬱芘芘。凶年變呼吸。比屋爭喧騰。余亦操竿立。袞袞搖旛旌。婦子列伍什。攘袂或暫休。斷穗紛爭拾。決旬得晴乾。子孫復蟄蟄。田祖空有神。厲瘞竟相襲。惟昔有仁人。四境期不入。阡陌莽交通。驅除豈能及。矧我比閭閻。饋粥常難給。人情賤惻養。追呼獨爾急。我倉雖未盈。鴈鷺時餘粒。忍令偏罹菑。坐見向隅泣。投竿對童叟。壺漿可共挹。且息嘉樹陰。清風挂臺笠。樂圖集一

思悲翁

問翁何所悲。悲翁不能言。故鄉有息女。人言似天孫。空山豺虎驕。三歲扃重門。昨遺繡羅襪。乃在銅鞮村。偷生伏卓櫃。終夜聞哀猿。哀猿終夜啼。我獨空煩冤。樂圖集一

戰城南

百里聞寇警。大憲何衙衙。不聞格鬪聲。積血盈溝渠。昨知喪亂後。有令寬田租。曖曖桑麻村。誰使成廢墟。人生盜賊間。何似鷲與烏。烏鷲實甘人。豈解聞號呼。樂圖集一

有感

殊方猶戰鬪。歲晏且飄零。笛裏江梅發。兵前塞柳青。霧深連積水。夜久出妖星。萬慮空搔首。淒涼戶早

局。樂圖集三

顏光猷 水明樓詩六卷

顏光猷。字秩宗。光敏兄。康熙十年進士。由庶吉士改刑部主事。陞郎中。出為河東鹽運使。未悉卒年。著有水明樓詩六卷。與光敏稱二顏。皆學唐人。光猷歌行。頗有佳者。

苦旱行

長安奇旱天地閉。晨興紅日色如血。蟲噬蝗吞已二年。那堪三歲猶不歇。鵲面鳩形衝道來。掩涕忍視中腸熱。昨聞傳語下天墀。囹圄死罪為一雪。九重宵旰真憂勞。戾氣何由未全滅。貧者農傷籽軸空。富者輸邊囊金竭。古今財賦祇此餘。兵餉未給空愁結。吁嗟今年租稅敲扑成。明年租稅寧無缺。眼前空有救荒謀。官吏中飽誰能說。水明樓詩二

流民

四路出流亡。三春誰見將。橋邊遺幼子。樹裏落行裝。苦納公家賦。難逃歲事荒。鄭圖如可畫。留恨滿
縑緇。

黔庶今無祿。筐箱早出門。村墟榆盡白。兒女稚猶奔。蠲賦寧云救。發倉誰與論。況兼兵火後。敢有子
遺存。水明樓詩三

王萃二十四泉草堂集十二卷

王萃。字秋史。先世浙江臨山衛人。年十四。隨父鉞自江寧徙居濟南。遂爲歷城人。康熙四十五年進士。授知縣。以母老改成山衛教授。逾年乞終養歸。卒于五十九年。年六十二。事具清史列傳文苑傳。撰二十四泉草堂集十二卷。刻于丁酉。康熙五十六年自辛酉。康熙二十年至丙申。康熙五十五年三十五年之詩。一千二十六首。未刻者尙三之二。二十四泉者。所居千佛山腳有望水泉。濼水旁出七十二泉。齊乘列望水次二十四。元有萬竹園。明曰川上精舍。萃得數椽其中。因以名堂。其詩清拔絕俗。以亂泉聲裏才通屐。黃葉林間自著書。黃葉下時牛背晚。青山缺處酒人行。受知王士禛。目爲王黃葉。田雯唐夢賚畢載積皆奇賞之。雯稱爲騷體之遺才人之高致。惠周惕謂其詩佳處直逼文長。蓋屢不得子有司。又患狂疾。患耳聾。遂多悽楚無慘之音。然才情之富。語言之工。并世罕儔。不作傷時危語。意存戒懼。故有句云。交絕自無鉤黨累。然其所慕。終不

能掩。如讀吳野人集云。海上吟詩到白頭。菱花滿地幾沙鷗。一生不出東淘路。自有才名十五州。蘭陽縣
逆旅主人能言王王屋遺事云。孤店燈昏欲雪天。蘭陽耆舊問從前。主人解道王才子。家在城南渭水邊。
松椒山是董樵隱處云。斷壑隱匿峯。修林暗空谷。不知春淺深。谷口草自綠。曾聞耽隱人。此中劇黃獨。
序注中多存舊事。養疾僧廬遺懷十首。有句云。前輩風流說杜亭。注杜亭廬侍御德水築。今歸吾師田公。
又云。紅袖裁詩臨妙墨注。虞山河東君題詩亭中。崇效寺與泰初上舍雪場道人茶話。海棠何處老梧桐。
注云。昔有海棠大蔭數畝。蓋金元時物。又大覺退院訪體如上人。作于甲午。康熙五
十三年注云。上人謂崇效古
槐盡伐。棗花亦斬艾殆盡。風氏園老松云。金源老樹性難馴。注云。松下石壇。相傳築自龔尙書芝麓。聞
同年張陽朔爾羽卒官。因感呂編修無黨。朱翰林字綠。同年趙河南豐原。今年相繼歿謝云。宿松朱翰林。
鄉薦乃壬午。聲洪身八尺。奇氣出眉宇。按此詩作于丁亥。康熙四
十六年韓家潭酒樓是故同年朱杜谿園居云。門
巷都非一畝居。酒旗風裏過樵漁。銷魂只有垂楊在。曾映秋窗七錄書。皆足備宣南掌故。萃有藜村文集
四卷。淵雅有法。

正月十七日大風撼屋念子靜罹禍經年未解得詩一首

去年慘毒邊春朝。今日顛風撼寂寥。會對銀鑪悲杜密。最憐血淚祭臯陶。天荒地老冤無盡。草屨麻衣恨
未消。爲報汝南須定力。齋前新柳又長條。二十四泉
草堂集三

弔張布衣 布衣今年八十有二。明末布衣上書開府。陳職守之策。不用。杖四。十。推置城下。不死。計其上書日。布衣年甫二十五。布衣名奉。漢。

拜杖醺樓血肉飛。少年帕首奮重圍。惜君生後陳同甫。獨使丹陽有布衣。二十四泉草堂集四

癸未東州大飢思欲賦詩紀事客子兀兀未暇以為今年夏五遇竹塢於興聖寺齋具述

壬午沂州飢饉諸狀因感憶見聞所及即事成吟示竹塢得五十八韻

我昔癸未春。甫下南宮第。濛濛柳花中。殘書束臚背。遄歸經師門。深扈討奇字。德州司農田公。余受業于門。抵家春之

殘。山城麥信吹。維時禮百神。大臣持節出。往迎崑山公。時座主徐公。以萬壽節祭告闕星至山東。嶽路官風值。浩蕩觸不周。岩

壑欲辟易。五月廿日風。異數日不息。未幾六月雨。見聞心彌悸。六月二日。怪雨三日夜不止。山東通省同日告災。以下詳紀其事。并蒙恩截漕捐租業民請舉。初疑決天河。奔崩過

鐵騎。旋如道馬陵。萬弩發不意。復如陟匡廬。天神溜簷際。且如戰昆陽。飛瓦乘雨氣。有風固憑陵。無雲

亦洸潰。齊頭逮紫海。魯尾連青岱。原田付波臣。巨浪打埤堦。生民盡其魚。遠樹浮若薺。傳聞水橫流。咽

鼓天吳戲。高岡亂泉生。下澤匯膏膩。山東百州邑。告凶同日至。大吏但長吁。監司之末議。無粟苦開倉。

無謀苦決背。更有蒼鷹徒。肉食逞恣睢。旁皇惟上聞。洵洵不敢諱。天子眷東顧。一朝布德惠。轉漕截江

南。追呼緩夏稅。發帑大養民。潞河疾遣使。護彼菜色還。賜復九重切。吁嗟大小東。才遺等百卉。長養只

吾皇。雨露濡汪濊。萃也源上居。瓜蔓破屋被。奉母仗園蔬。盤餐徒風味。秣蹇望燕雲。負米策稱貸。冬春

得家書。開看驚雪涕。此後紀飢交流。亡道殫諸事。流亡里閉空。田廬卒汚菜。骨肉霑中途。大半溝壑棄。米價不肯平。縣官

秦越視。擾擾駭桑人。皮骨存臍胎。朝饌屋上茨。晚食道傍飢。榆麵共柳糜。珍重至餽貽。飢人磨榆皮為麵。屑柳皮為粥。食屋草。啖

積屍。其尤慘者。春來復大疫。十室九戶閉。默疾中餓夫。牛豎爭相致。死者爲蟲沙。存者亦魍魅。蕭條湖山間。誰灑北邙淚。埋骨法苾蕪。茫茫鮮封識。甲申春疫。人患數疾。死亡枕藉。官于歷山下。決深坎數十。以貯積骸。紙竟尙指陳。惻愴吾猶記。於虜玄枵域。富強風未墜。稼穡兼魚鹽。蓋藏夙櫛比。胡爲飢薦臻。蹙耗成大戾。幸逢堯舜君。生聚偶然遂。仰瞻農丈人。炯炯明隳次。海邦庶屢豐。長畝有滯穗。以下敘因竹塢賦詩之意。旅食厭緇塵。茶話逢初地。問君東方來。連年苟無歲。歲星出山東度。已十餘年矣。觸我石壕悲。思得元結輩。根觸爲此辭。可似春陵未。君言亦復佳。太息願何爲。不見沂山中。壬午豈有異。禪榻姑淹留。試聽蟹眼沸。二十四泉草堂集七

林之蒨 偶存草堂集十三卷

林之蒨。字素園。濟寧人。家于鄂中。以游爲性命。嘗自京師出塞外。歷晉秦豫楚。南至嶺表。然後浮贛江。渡彭蠡西歸。又自閩入浙。遍游大江之南。三十年間。足迹多在道途中。所未至者。兩川滇黔而已。康熙六十一年。自序其偶存草堂集刻之。自後謁選京師者數年。雍正五年補武邑知縣。至十三年。續其集爲十三卷。時年六十四。或卽卒于此年。俟考。之蒨述王士禛之言。以爲山川游盡。歲月歷深。始可言詩。故其詩率紀游之作。又視離家卽爲出遊。居官則爲宦游。勸農巡堤。與登臨固無以異。詩凡二千餘首。雖不足言簡潔。而各體皆備。海內名勝略盡于此。從來游記游詩之作。問民疾苦爲上。留連景物次之。考證沿革最下。斯集在上中之間。偶亦採及土風。如舉康熙末京師戲園有慶春園天樂園之類。惜未多及。蓋

能雅而不能俗。且不知俗之足貴遠在雅上也。

倉糧行

江南江北發官糧。鬼運神輸千萬倉。準酌升斗計何詳。忍使鶉衣色青黃。里長團頭去匆忙。眼見男女泣路旁。枵腹歸來不滿筐。半帶砂礫半是糠。新穀未種採柔桑。應知剜肉醫其瘡。聖明雨露深且長。贏得豪吏氣揚揚。君不見。斗米千錢人盡死。車薪之火救杯水。又不見。太倉之粟紅朽不可食。八口嗷嗷空九

室。偶存草堂集一

饑烏行

饑烏饑烏復饑烏。日日簞溪樹上呼。一春三月多苦雨。入夏淋漓后土污。青黃不接人烟冷。小麥已爛大麥枯。荒荒野水草爲宅。老者溝壑壯者逋。饑烏饑烏何所棲。哀鳴不已切其膚。下食遭泥翅復濕。或前或後聲嗚嗚。大鳥受饑皮骨老。回頭啞啞顧二雛。東魯遊子看且泣。長與客舍一事無。陰雲千疊山帶雨。年來偏側胡爲乎。坐對饑烏愁轉劇。搔首淚盡日南珠。饑烏饑烏向我啼。萬類羣分夫何殊。安得驅雷公而捕石燕。一輪紅日破雲霧以上扶。饑烏饑烏。汝引二子飲啄以時棲乎高梧。吾將駕一葉之扁舟。載酒一

瓮過南潯於姑蘇。偶存草堂集二

東壩

天地洪荒來。山川各有屬。治水導水性。盈科分遲速。朝宗赴滄溟。難以強拘束。高淳上下壩。粵自有明

築。吳江水勢安。遂使地脈縮。宜歛羣壑奔。蕪湖出江蹙。泛溢沒樹巔。浪高天可蹴。江漲翻逆流。高淳甌
爲窟。捍禦失圍堤。黔首無餘屋。得意舞蛟龍。雜然集水族。官民日徬徨。河伯智亦促。桑田半泥沙。百年
穀不熟。淳民何其輕。蘇民亦何福。作俑者伊誰。庸陋復相續。忍令耕鑿民。坐因此荼毒。我來東巖行。淒
淒蒿吾目。征途繞荒村。平湖草蓼蓼。停舟問子遺。開口只欲哭。指點話根因。心動不敢宿。安得平成手。
故道爲一復。租調均且平。四野雜麥菽。生聚待十年。家給人可足。

偶存草
堂集二

春日偕王怡菴陶素堂王茂弘天樂園觀二歌者十六韻

氣萃皇都壯。乾坤又一春。山晴開翠黛。梅爛選芳辰。好友通蘭譜。周行結善鄰。園名天樂舊。歌調教坊
新。紅雪今稱妙。秦青久絕倫。逸聲穿棟響。嬌面出簾親。藹藹香風送。深深玉壘巡。懷開天地闊。交擊酒
盃醇。剪燭酬長夜。烹鮮割素鱗。形從忘處淡。情向此中真。禮數容疏放。風光共主賓。浮雲今世界。流水
百年身。雅量惟憑醉。清狂不諱貧。悠悠歸市口。沉沉逐車塵。未盡乘時興。還思避世人。相將重有約。竹
葉細沾唇。

偶存草
堂集六

望雨行

君不見彈丸武邑。三春無雨四月旱。濁流落盡西河岸。重滯米船拖泥沙。老人拄杖臨風嘆。共說十家九
室空。勢將化儻西復東。官家租賦無所出。暫緩鞭箠賴我公。一聞斯語心轉戚。薰風駐馬橋頭立。招集父
老聽我言。爾須忍耐安家室。水旱不均事亦常。風景從來是故鄉。雖然二麥無收穫。眼前猶可種稻梁。老

人聞言心半喜。牽衣導我綠楊裏。轡轡憤捷獻清泉。指揮無禮說終始。揮手夕陽促歸鞍。滿眼黃塵靡草乾。揚鞭背指明月隱。雲擁奇峯天外攬。天乎天乎雨須早。龍行電掣神功巧。倒轉銀河翻盆傾。一夜滋生

萬類好。偶存草堂集十三

朱之俊 吳越游草一卷 硯廬詩二卷 崧園詩草一卷 排青樓詩一卷

朱之俊。字擢秀。號滄起。汾陽人。天啓二年進士。選庶吉士。授編修。歷官國子監司業。以忤璫歸。崇禎改元。原官起用。數年。復謁假歸。築解脫園居之。初之俊與同榜黃道周文震孟方逢年蔣德璟鄭鄆。以文行相砥礪。震孟逢年德璟先後入相。己獨不預。少耽禪悅。嘗自謂四十之年。便當避位。尋山訪勝以畢此生。果不負其所期。順治二年。執政有薦之者。敦迫入都。授官侍讀。典順天鄉試。事竣力辭還山養母。竟得請。門人胡世安陳名夏方用事。實左右之。是時功令嚴。違者幾以叛逆論。然亦有破例者。盧世澹拜官始終以疾未入都。李明睿至官五月。錢謙益之俊六月。唯吳偉業稍久。雖草草結此一局。然世論終薄之。之俊有辛丑順治十八年大行皇帝輓詩。又錢吳集中之所未有也。傅山頗與酬酢往還。或許其不躁競歎。撰有吳越游草一卷。附西湖游記五首。崇禎二年。皇子誕生。奉使頒詔浙江所作。託之陳繼儒評選。之俊幼師事繼儒。故詩格頗似之。硯廬詩二卷。附園記二首。崇禎中至順治二年之作。崧園詩一卷。載詩至乙未。順治二十一年排青樓詩。附賦七首。已及癸卯。康熙二年時之俊年七十矣。詩多漫興。無復錘鍊。唯不作傷時

語。姜瓖之變。晉西雲擾。竟無一字及之。蓋其慎也。

韓雨公年丈同西洋金先生訪予山中

草廬語別一星終。今日尋盟喜再逢。未艾驟逢頭已白。纔秋又見葉初紅。書隨十乘遊何壯。友結三壺眼更空。強欲留君留未得。道傍爭說列仙風。硯廬詩一

乙酉都門贈湯道味先生二首

放眼先天上。傳心晚世中。人言爭說象。見內典我見是猶龍。

三教今爲四。端然一巨靈。赤心常自白。碧眼不須青。硯廬詩一

贈傅青主

雲客不慣城市步。要入千峯萬峯住。嘯聲散作滿林風。鶴語時墜青天路。乘興偶來汾山側。挈壺懷刺人爭識。一見開襟勝所聞。樽前頓頓長青松色。星冠鶴氅何歲始。云經離亂才爾爾。書著一部晉春秋。詩紀三年新甲子。滿腔肝膽不盡吐。霜夕哦成月卓午。兒問題詩贈阿誰。太原高士傅青主。榆園詩草

春夕懷傅青主觀壁上書如或見之

契闊三時思若焚。其如野鶴與孤雲。奚囊半貯參苓劑。行脚常羞麋鹿羣。聞道志遊曾有記。誰云既隱不須文。何時得遂平原約。書破羊欣白練裙。榆園詩草

贈鍼醫孫貞我茂才

孫郎冠蓋詞場久。漢澤一方推祭酒。龍門點額尙爲魚。九鍼法授醫王手。活人度世大士身。南走吳楚北燕秦。六徵五態都精諳。沈疴往往回陽春。目前國手無足比。徐熙殷浩差可擬。貫髮徒稱句驪君。走瀨空傳海陵子。去年相邀汾水陽。下榻蝸廬半載強。方懸肘後非金匱。篇翻指下皆青囊。神功大德通蒼蒼。冥鑿答脫非尋常。黑籍舊名應蚤落。青華定錄遊雲房。探篋遺余書一卷。妙訣玄機傳自扁。但余負疾與人殊。療得煙霞癖也無。排青樓詩

傳青主惠陽泉四景圖各題詩於左時稱三絕援筆答謝輒成二十四韻

西嵒多孤峙。對雄惟陽泉。鷲巒凌漢表。雉堞突雲邊。涓滴溪流潤。縱橫石路連。高原植美果。平隰開新田。北折覓幽澗。遙瞻疑洞天。池湧明星面。峯排列戟肩。牛筋生異木。鴨脚長新芊。懸葛狷猿鬪。危藤樵牧牽。織列形太古。崩剝勢多年。煙草迷筇路。雨苔膩屐屨。孤松能却老。半石可留顏。撥刺魚掀浪。綿蠻鳥弄絃。岩花垂爛熳。沼葉吐娟妍。撲鼻香頻接。明眸色屢遷。秋林紅欲擲。涼月淡堪憐。霜雪山辭客。脚踏夜入禪。撫茲四時景。願了百歲緣。我步白沙曲。君登姑射顛。平原恆有約。蓮社亦曾延。拂壁題愚谷。裁圖繪輞川。新詞跨入樣。妙墨詫通玄。似噉麟鳳髓。如乘珍珠缸。百朋拜盛賜。什襲付家傳。尤望矜予老。呵寒慰凍癡。排青樓詩

石鳳臺 石先生詩鈔一卷

石鳳臺。字六象。號逸齋。陽城人。天啓五年進士。官至寧前兵備道。入清。官陝西巡撫。改授荆西道。移關西道。順治十四年卒。年六十五。所著有西池集。秦邸秋音。楚游草。隴上吟。里人韓蘇鈔爲石先生詩鈔一卷。凡詩百首。詩雖不工。而頗有事實。弔薛國觀詩。介直垂方策。清貧付子孫。雖私其親厚。而韓城之介而貧。固有公論。以見死非其罪。鳳臺之詩。尙存直道。蘇撰鳳臺傳附卷末。文辭卑下。而敘遼事甚悉。謂陳新甲主撫。鳳臺時官寧前。上疏謂款不易言。然有可乘。必使受封。廣寧義州歸我。所謂權不失經。以此觸帝怒。逮治幾死。乃知新甲寔采鳳臺諸人之議。其事既泄。帝內愧于心。不得不誅新甲。遂牽連及于鳳臺也。此一事可補明史之所未及。清初入關時。親王領兵者。可以權宜委任巡撫。資歷不及者。卸任仍官原官。此例甚多。傳謂鳳臺未入賊。故由巡撫改參議道。實不盡然。

謁顯陵

五行相代謝。陵下發長嗟。柏古枝枝折。碑殘處處斜。雄狐營禁壠。桀雉叫荒沙。日暮淒風起。愁雲歸路遮。
石先生詩鈔

于成龍 于清端公政書八卷

于成龍。字北溟。永寧人。崇禎十二年副貢生。順治十八年。銓授廣西羅城知縣。歷官至江南總督。卒于康熙二十三年。年六十八。謚清端。前一年門下士李申素爲輯于山奏疏七卷。詩詞一卷刻之。身後蔡方炳就刻本增省之而爲是集。康熙時。吏治多尙粉飾。而清端之爲清官第一。至今無異辭。讀其書實有霸才。不獨實心任事也。同時漢軍于成龍。由通州知州。官至漕運總督。亦有清名。得謚襄勤。卽由清端力薦。以至柄用。世傳兩人政績。往往相混。不可不知。四庫提要謂清端前明拔貢生。則由讀陳廷敬于清端公傳諦視未審而致誤。又謂官至湖廣總督。則由清史本傳有安徽巡撫涂國相陞任湖廣總督。成龍兼巡撫事。二語句讀不分而致誤。當時館臣草率如此。

讀聘君歌

吾民不聽却因何。笞杖流徒總是多。偏與人猜猜不著。從容細讀聘君歌。于清端公政書八

白胤謙 東谷集三十四卷

白胤謙。字子益。陽城人。崇禎十六年進士。入清。官至刑部尙書。順治時朝局馮銓劉正宗與陳名夏陳之遴結黨相角。而皆不免誅黜。政由滿人故也。成其鞏梁清標王崇簡王熙父子諸人。持祿保位。不罹

黨禍。胤謙亦其比也。年五十九。遽求致仕。又十餘年始卒。陽城白氏。世以科第仕宦顯。皆言理學。胤謙撰學言三卷。謂無我之我。是謂真我。無知之知。是謂良知。四庫提要譏其語涉愴怳。而不知正其闕歷有得。足以免于亂世矣。胤謙從兄胤昌肥遁高尚。著容安齋錄談。多見道語。雖隱顯殊科。而與時屈伸。幸免戮辱則一也。胤謙以居官無赫赫之跡。竟未入貳臣傳。撰東谷集三十四卷。別有歸庸集八卷。獨缺桑榆集詩。文雖無文采。而不失雅正。明季亂歷。清初掌故。皆資探討。是亦足以傳矣。

役夫謠

寧爲畿縣薪。莫爲畿縣民。薪因畿縣貴。民因畿縣貧。我皇重加惠。特遣來賑巡。始報廿餘萬。躊躇恐難均。檄令汰浮冒。沾溉使得真。既歷豈忍觀。扶攜填街闔。疲癯給未周。役夫前啓脣。休言民力壯。民實備苦辛。有田被圈界。租稅猶在身。荷鋤入圈莊。傭作辦歲緡。見充河堤卒。捨命赴洪津。收逃令轉密。他鄉難容蹲。老壯同可哀。願君廣皇仁。東谷集詩五

上官鉉 誠正齋文集八卷

上官鉉。字松石。翼城人。崇禎十六年進士。入清授中書舍人。順治五年。擢御史。是冬巡按湖南。八年巡按江寧。衰敝之餘。頗有振作。順治十四年丁酉科場之獄。卽由鉉發其端。屢擢左副都御史。遇事敢言。康熙十二年。以事降調。請告歸。卒于二十二年。年七十三。自編所爲文。初曰桐山藏業。繼改題誠正齋。

文集。以理學自居。詞章非其所長。詩尤淺劣。其集編次凌亂。竟以哭李琳枝七古。次于祭文之列。唯奏議條教。足以窺見當時情勢。餘則無譏焉耳。

哭李琳枝

君不見。巧宦安驅履公卿。脂韋態度善逢迎。又不見。貪墨恣睢壑難盈。金玉山積自崢嶸。楚相當年稱廉吏。子孫蕭條不聊生。吾友琳枝產東土。一從特簡資裘補。英風破柱與埋輪。誰謂今人不如古。直道不爲時俗容。飄向東萊臥長松。世祖拊髀開言路。骨鯁孤臣再升庸。十年散落潛山沼。重來金闕瞻帝表。珥筆朝端讀彈文。螭頭正色仍矯矯。省方觀民仔肩難。攬轡澄清吳江寒。冰心鐵面搖山岳。獨留清風拂江干。抗言偶逢聖主怒。三吳童叟淚如雨。須臾昭雪故物還。猾蠹依然凜繡斧。國賦煩煩司農憂。荒熟不清古豫州。卿命一至涇渭辨。兩河士女共吟謳。十六年來長行露。百折不回守寒素。世祖特詔陟清卿。滿朝相慶公舉措。一旦汨露殞厥身。空無升斗灶無薪。五行氣盡理則已。公臨終。惟元日不言。氣盡則已絕家計。無忝所生若而人。晒彼流俗何足道。終朝營營聚金寶。回首石火與電光。一生身名俱草草。吁嗟琳枝猶有知。伯牙捧琴謝子期。頑夫廉兮懦夫立。東海洋洋百世師。知己哽咽有餘恫。匪關秋雲并春夢。泰山梁木異昔時。唏噓泣麟而悲鳳。誠正齋文集八

馮如京 秋水集十六卷

馮如京。字修武。又字紫乙。號秋水。代州人。崇禎□年進士。官灤州知州。入清官至廣東左布政使。卒年俟考。撰秋水集十六卷。凡詩八卷。文四卷。宮詞一卷。紀程三卷。其文事迹議論俱無可徵。詩格清穩。稱意而言。于同時雲間楚中兩派。皆無所染。不趨風氣。可謂自好之士。宮詞六十首。屢言射獵。卽咏當時宮闈之事。託云開元。亦如錢謙益和吳偉業豔體。謬稱唐時。若有所避。蓋本于長恨歌之稱漢皇。秋水一集。足當唱歎者。固應在此。

古邪瞻大佛寺

積石混茫古洞開。諸天曇雲落荒埃。莊嚴丈六傳新火。解悟三千大辨才。花散林風霏法雨。鳥通禪性集香臺。昨宵雲破飛寒玉。弔月清猿照影來。秋水集六

魏象樞 寒松堂全集十二卷

魏象樞。字環極。一曰環溪。號崑林。又曰庸齋。蔚州人。順治三年進士。由刑科給事中。官至刑部尙書。以疾告歸。卒于康熙二十六年。年七十一。事具清史列傳大臣傳。著寒松堂全集十二卷。爲奏疏四卷。詩三卷。文五卷。象樞久在諫垣。著直聲。屢有建白。多與時政得失有關。其奏疏最足參稽。喜吟咏。而詩文

皆非當行。好字說引漢關公之言曰。願天常生好人。願人常行好事。流傳俚語。據爲典要。其陋可知。素以理學自負。集中多說理之文。徵君孫鍾元先生墓表。可以知其嚮往。與柏鄉魏裔介齊名稱二魏。然屢仕屢已。近乎知恥。視裔介罷相。尙欲與鴻博之試者。迥然有別。其議論俱近人情。

剝榆歌

黃沙日暮榆關路。煙火盡絕泥塞戶。路傍老翁攜穉兒。手持短鐵剝榆樹。我問剝榆何所爲。老翁倚馬更咽悲。去歲死蝗前死寇。數十邨落無子遺。蒼蒼不恤儂衰老。獨留餘生伴荒草。三日兩日乏再饘。不剝榆皮那能飽。榆皮療我饑。那惜榆無衣。我腹縱不果。寧教我兒肥。嗟乎此榆贖我父若子。日食其皮皮有幾。今朝有榆且剝榆。榆盡同來樹下死。老翁說罷我心摧。回視君門真萬里。寒松堂全集五

魏學誠 一齋舊詩一卷

魏學誠。字去僞。號一齋。象樞長子。康熙二十一年進士。官內閣中書。請養歸。四十二年改授編修。歷官左諭德。此一齋舊詩一卷。爲通籍後十年之詩。刻于四十七年。淡雅不似理學家之詩。

秋日田間卽事

邊城秋事說今年。四野登場萬竈烟。雨早霜遲天意厚。徭輕賦薄聖恩偏。笛橫犢背斜陽裏。甕熟村醪社日前。我亦有田數十畝。時同野老一周旋。

見說東莊穀已收。心知八口又堪謀。文章竟不如禾稼。勤苦還應愧馬牛。坡上遠村黃葉樹。林間清嶺白雲秋。此中儘可藏迂拙。何事浮名更浪求。一齋舊詩

仇昌祚 漪園詩集十二卷文集九卷

仇昌祚。曲沃人。順治五年副貢生。謁選得郎陽通判。擢湖州同知。尙可喜之難。被羈不屈。事平。特擢惠州知府。晉分守嶺東道參議。撰漪園詩集十二卷。文集九卷。仕迹見于本集者如此。集有康熙二十三年王大作序。當刻于此時。詩有才氣。不染時習。所與往還唱和者。姚文烈方亨咸皆知名士。其集分體。而以正雅變雅別之。甚爲不經。分體之後。殿以登潮郎惠勝迹詩。與瞻卮集別爲部分。體例尤雜。詩文題目有堪噴飯者。文無繩墨。然記朝覲。記熙朝樂章。記潮惠海防形勢。皆可窺見當時情事。其嶺東兵備道題名碑云。每道分守巡二員。又有銜兼兩司者。昌祚即以按察司僉事管嶺東兵備道參議。可補明史之闕。言官制者不可不知。

雜興

江頭野老哭聲悲。幾度滄桑動感時。到處長廊成短屋。誰家故燕壘新泥。將軍自繪麒麟閣。士女徒傷蔓楚枝。解道西樓虛夜月。教人卻憶陳升之。漪園詩集瞻卮集

程康莊 崑崙詩選二卷文選四卷

程康莊。字坦如。號崑崙。武鄉人。崇禎九年拔貢生。順治十一年舉山林隱逸。後五年。選鎮江府通判。康熙六年。升安慶府同知。罷官起補耀州知州。卒于十八年。年六十七。事具清史列傳文苑傳。畢振姬耀州知州程公墓誌。撰有日課堂集。不傳。傳崑崙詩選二卷。文選四卷。凡詩一百六十六首。附詞四十三首。卽國朝名家詞中衍愚詞。僅少三首。康莊少負奇才之目。及官鎮江。風流好事。賓客總集。時王士禛官揚州推官。與之唱和。刻爲過江集。一時文士。盛譽康莊。實非士禛之比。詩文皆學鍾譚。詞則豔體。魏裔介乃稱程武鄉之文。過于江南錢牧齋。令人失笑。

贈李膚公

懸輿晏息歷艱辛。流涕時看諫草新。行砥必無慚柱史。數奇終自屬遺民。春申礪道游踪密。綺季山根築壑頻。誰謂商瞿蘭夢晚。丈夫五子更嶙峋。程崑崙詩選二

陳廷敬 午亭文編五十卷午亭山人第二集三卷

陳廷敬。榜名敬。字子端。號悅巖。澤州人。順治十五年進士。選庶吉士。授檢討。屢官至康熙四十二年。授文淵閣大學士。兼吏部尙書。四十九年。以耳疾乞休允之。仍留京修書。旋命入直辦事。卒于五十一

年七十三。事具清史列傳大臣傳。撰午亭文編五十卷。午亭山人第二集三卷。初廷敬屢刻其集而不示人。至庚寅^{四十九年}始命門人林佶編爲詩文五十卷。二集有詩無文。則身後續刻者。廷敬與王士禛汪琬爲友。而詩文各不相襲。詩名不及士禛。而工力深厚似過之。文摹歐曾。一變其鄉傳山畢振姬西北之習。同時達官無能及之者。性尙含容。不立異。無與人門戶意氣之爭。故能爲人所容。久直南書房。領官修書。始終恩禮不衰。同時達官亦無能及之者。集中經解四卷。頗涉獵宋儒之學。杜律詩話二卷。則平生所嚮往也。

東嶽廟像元劉元塑

元字秉元。薊之寶坻人。官至昭文館大學士。正奉大夫。秘書監。廟。

上都塑像今誰存。劉其同姓變與元。元昔黃冠事青帝。既貴愉悅營精魂。神居青霄清且尊。碧雲騰湧連朝暎。真仙上謁不可以面覲。況能搏挽以手捫。元也執藝高絕倫。帝命象教如通神。雕梁繡戶不入眼。石闥日觀皆微塵。運意豈覺滄海闊。凝思暗與春天親。駕言俗宗夫如何。設像已覺驚生民。其西炳靈公。其東司命君。絳紗玉斧蒼龍仗。宰執介士俱天人。元乎今也不可作。高墳何處荒麒麟。又聞大都城。遺廟秋原斜。古像亦元製。淒迷沉風沙。塞長路遠跡不到。撫卷稽古空咨嗟。人生一藝足自命。流傳百古稱專家。亦知虛名竟何益。吾生有涯憐無涯。午亭文編三

侯七乘 孝思堂集十卷

侯七乘。字仲輅。汾西人。順治十五年進士。官武平知縣。起補閩縣。陞廣信府同知。引疾歸。舉戊午廉熙十七年鴻博不第。撰孝思堂集十卷。七乘居官有惠政。喜詩古文辭。言無虛飾。敘事之文。頗依準繩。議論時有足觀。詩則過于率意矣。

和沈明府穀藹歌

汾人早餐。用二分穀。一分黑豆。再加糠磨成糲。水拌作丸。大小不等。瓦甑蒸熟。合以米飯。無貧富。皆以此充食。生則黃色。熟則漆黑。其所命名。有音而無字。茲沈明府彷彿其音。擬成穀藹二

字。因作歌見示。予戲和之。

何曾日食錢逾萬。下箸不得猶嗟嘆。曼倩索米向長安。却與侏儒較軀幹。堯花作羹榆作糧。飢來常覺剔牙香。怪他拾橡杜陵老。空隨雁鶩謀稻粱。天生汾人無飽菽。芒鞋破帽坐山谷。白頭不識五侯鯖。木葉草根皆果腹。更有一餐最出奇。朝來是處辨晨炊。佐以馮家蕪蕒豆。主以梁公春下皮。黃倅烝栗黑如漆。萊蕪飢裏風瑟瑟。愛錫佳名回鶴同。有聲無字譯不出。太倉五合聊充糜。婦歌烏鳥兒跳嬉。笑比衛倫糝汁麥。是李是否頗難知。憶昔神堯飯不鑿。大舜之糗神禹惡。算來都是平陽地。鄙哉肉食馨哉藿。勸君莫怨居官貧。且與吾民共苦辛。第五清資常赤米。桓階醬粳真大臣。君不見。夷門侯生今老矣。手鑊黃檗甘如旨。五十餘年窮不死。貯粟之瓶何所有。簸之揚之習鑿齒。孝思堂集九

大旱奇荒

劫火燒原一網收。酷如武庫不關油。攜家避地哀鴻淚。兀坐憂天洗馬愁。但有官租仍九府。更無顆粒報三秋。春陵得句題何處。城上新開八詠樓。時值李思堂修城集十

范鄱鼎 五經堂文集五卷五經堂野歌一卷

范鄱鼎。字漢銘。一字彪西。號莫山。洪洞人。康熙六年進士。候選知縣。告終養歸。十八年薦舉博學鴻儒科。以疾不赴。家居講學。輯明儒理學備考。廣理學備考。不分門戶。薛王并列。亦不專宗陽明。別有續晉垂棘編。三晉詩選。以存文獻。卒于四十四年。年八十。事具清史列傳儒林傳上。其詩文有五經堂文集五卷。亦曰草草草。曰五經堂野歌一卷。不甚置意。修辭。文以透關說理爲主。詩以行文之法爲之。嘗輯理學家之詩。爲別有詩。其自命可知。文集首載辭薦舉三呈。當時功令極嚴。首有稟傳。不赴者嚴參。府縣催促不力者。亦嚴參。鄱鼎前後奉嚴檄十三道。知縣親臨驗疾三次。事經半年。及奉旨未與試者不必再試。始得脫然。是科以疾力辭者四人。魏禧李顥應爲謙及鄱鼎也。

次韻奉和朱明府甘雨詩 兩首 錄一

鼻盤古鏡事無憑。枉向不空祈必應。豈有虎頭通洞渚。遂將牛背泥川陵。十年三日南康喜。五世兩門西漢徵。雲和老人尺鼎祝。古羊城外羊仍仍。五經堂野歌

郭九會 存草六卷續存草三卷

郭九會。字存齋。滄氏人。康熙十一年鄉舉第一。三十四年。謁選臨安知縣。越七載告歸。撰存草六卷。罷官後。有續存草三卷。刻于壬辰。五十年已七十矣。九會以制藝擅名。自謂詩不能工。特喜爲之。與衛旣齊同學相得。旣齊講學非知詩者。許其詩爲詩史。所謂善言愛人。煖于布帛者也。

田家

田父夜徬徨。生計擢中腸。雞鳴呼婦子。好與若商量。佃田不數畝。分水只一塘。作時嫌力少。成時無剩糧。旣積公私逋。復憂水旱荒。稻畦穢不治。水牛老且尪。何以償宿負。何以充蓋藏。曾聆老農言。勤儉不可忘。吾與若母子。努力以相將。婦聞長嘆息。神沮意激昂。蓬頭跣雙足。不作閨中妝。日中把鋤犁。日晡挑糞筐。小兒無氣力。騎牛牧草場。草色綠如玉。牛背穩如牀。大兒兼樵採。乾蒲與枯桑。婦於風雨日。完補破衣裳。田翁更嬰鑠。耕耘時刻忙。不惜汗成粒。所痛肉醫瘡。力作敢云苦。鞭扑難禁當。存草三

閻若璩 眷西草堂詩一卷

閻若璩。字百詩。號潛丘。陽曲人。先世行鹽山陽。遂家焉。父再彭。號牛叟。有高行。若璩屢試及舉鴻博皆不遇。遂專意研經。撰尚書古文疏證八卷。力攻梅賾僞古文。後來王鳴盛段玉裁孫星衍諸人。繼之有

作。取證愈確。幾成定論矣。然三國志所引尙書。今洛陽出土魏三體石經。皆合于僞古文。竟莫能明。若璩長于考據。尤善言古地理。著四書釋地五卷。潛丘劄記六卷。嘗正顧炎武日知錄遺失。爲炎武所許。世遂以顧閩并稱。實非其匹。鴻博之召。屈指海內人才。幾欲盡出所謂遺逸而官之。晚而客于雍邸。皆不可解。初印本潛丘劄記。附有行述。述雍邸恩數甚詳。何焯義門集家書摘錄。明言百詩先生扶病赴四府之召。加以炎暑。于初九日謝世。蓋康熙四十三年。年六十九。又跋困學紀聞云。丙戌春日。皇子四貝勒命爲閩氏校勘訛字。然則鹽商馬氏玲瓏山館爲之付梓。亦四貝勒之命。不知嘯亭雜錄何以必辨爲安邸事。更不可解。論文服錢謙益顧炎武黃宗羲。喜以辭辨折人。頗近于黃。晚乃言汪筆王詩。謂汪琬王士禛也。毋乃泛愛。有詩一卷。附劄記末。非其所長。

移寓雜興贈陳子壽先生五十首

錄二

宋史紛如聚訟深。霜松雪柏一人心。李燾字仁父。張南軒稱其如霜松雪柏。絕無世味。所著續資治通鑑長編凡四十年而成。天將遺棄歸東壁。君向人間何處

尋。公祇從錫山購得長編。余爲辨其非是。蓋此書乃錫山秦氏家藏。歸於牧齋宗伯。梓雲災後。此書絕矣。

莫言北地便無書。牧齋嘗云。內閣有謝承後漢書。爲一時相持去。今人一一牙籤觸手虛。亂後西州猶拾得。衛徐傳授

免躊躇。東觀漢記。杜林於西州得漆書古。衛徐傳授。堂詩。

吳 雯 蓮洋集十二卷蓮洋詩鈔十卷蓮洋詩鈔二十卷晉兩徵君詩鈔

吳雯。字天章。其先遼陽人。父允升以順治二年舉人。官蒲州學正。十二年成進士。翌年卒。雯遂占籍蒲州爲諸生。工詩。有名公卿間。康熙十八年舉鴻博不遇。游食于燕趙齊魯吳越秦楚。足迹幾半天下。家于中條山南永樂。故唐縣。玉溪在焉。李商隱居之。故號玉溪生。晚買圃于鄭谷之口。肘太華。面雷首。有竹有梅。將以終老。而迄不得。以母喪哀毀。卒于康熙四十三年。年六十一。事具王士禛所爲墓志。及清史列傳文苑傳。士禛賞其詩。謂有仙才。未刻者千餘篇。爲刪存若干篇。皆卓然可傳。趙執信頗不滿士禛。而獨善雯。深以士禛不能留布其詩爲恨。雯實才人。語必求工。異于同時噉名者。然其體不類士禛。相去甚遠。其集爲臨汾劉組會刻于乾隆三年。蓋得其手稿一帙。及洪洞劉氏藏本千餘首。又得黃叔琳所藏本。云出于士禛。合之得詩千九百餘首。後復有補遺。至乾隆二十九年。孫謬復編刻蓮洋詩鈔十卷。則選本也。然有遺文及填詞各一卷。後張體乾復就劉本增爲二十卷。是以多爲貴者。然今猶時時能得雯遺詩。乾隆三十二年。蘇爾貽劉贊選刻傅山及雯詩爲晉兩徵君詩。謂得蓮洋諸刻本及手稿絹素之未經閱世者。選九百餘首。獨士禛所稱一刻于吳中。再刻于都下。三刻于津門者。今皆未見。

貽洪昉思

洪子讀書處。靜依秋樹根。車馬何曾到幽巷。骯髒亦不登朱門。坐對孺人理典冊。題詩羞道哀王孫。長安

麝米等珠桂。有時烟火寒朝昏。拔釵沽酒相慰勞。肥羊誰肯遺鴟蹲。嗚呼賢豪有因阨。牛衣腫目垂涕痕。
吾子摧頹好耐事。慎莫五內波濤翻。屈伸飛伏等閒在。總於吾道無亭屯。前有萬年後萬古。剗那何用爭
鸞覬。君家西子湖。鵝湖交文鴛。湖上諸山太蒼翠。欲從海外飛崑崙。掉船載酒便亦足。天漿手挹神騰
掀。少伯百計乃得此。胡爲懊惱嗔山蕪。紅棍錦髻過蕭寺。虎靴桃杖投烟村。頽然醉臥藉芳草。忽忽明月
升金盆。蓮洋詩
鈔二

懷昉思

洪子謀生拙。移家古薊州。身支西閣夜。心隱北堂憂。卑己延三益。狂言罵五侯。林風憐道韞。安穩事黔
婁。孫謂注。昉思與天章竟先後逝。蓮洋詩
鈔三
余作哀曉。同時脫稿。愁夫。

梁錫珩 非水舟遺集二卷

梁錫珩。字楚白。號深山。介休人。候選郎中。蓋富室也。喜交名士。孫我山陳鵬年何焯顧嗣立陳季方。皆
與結納。後徙陽和。以康熙五十八年南游。遂卒于西湖。詩未入格而吐屬清麗。

偶詠美人喫煙

前身合是步非煙。弄玉吹簫亦上天。紅綻櫻桃嬌不語。玉鈎簾外晚風前。非水舟
遺集一

王道直 磊園留草二卷

王道直。字子高。高都人。諸生。康熙十一年集其二十年之詩。為磊園留草二卷。曰留者以有去留也。獨慕鍾伯敬。北人中僅見者。

夏日浴南龍洞

有廟宇久廢。石上止存工匠姓名。

南薰初試情先暢。浴學曾狂尋浩浪。洞裏噴成自在泓。峯前長就天然幘。盤桓牧子綠莎坡。信手小詩白石上。共道龍踪不記年。幾行姓字屬工匠。磊園留草二

王震龍 綠筠軒詩集九卷

王震龍。字霖九。高梁人。撰綠筠軒詩集九卷。分孝弟忠三集。詩無惡習。唯分類叢雜。題目稱謂鄙俚不經。乃與惲南田交好。為可異也。南田一札。及詩一絕。蔣刻甌香館集未采。可補入惲集。卷首有甯時文序。時文康熙五十一年進士。序中比之為衛武公。其時震龍當尙存世。詩中自稱壬寅。康熙元年三十五歲。至是已八十五矣。

流民

金刀告匱日不支。石徑攀緣樂國移。絲髻飄風縵與寡。竹筐挑露女和兒。匏飄長引衣千縷。土著輕拋腹半飢。革去遺逃惟緩賦。木蘭誰駕上重離。綠筠軒詩集三

清詩紀事初編卷七

丙編

曹 溶 靜惕堂詩集四十四卷 靜惕堂詞一卷

曹溶。字潔躬。號秋岳。別號金陀老圃。秀水人。崇禎十年進士。官御史。入清。仍原官。順治三年革職。十一年起廢補太常寺少卿。翌年。擢戶部侍郎。外用廣東布政使。降山西陽和道。康熙三年。以裁缺歸。自後薦鴻博。薦修明史。皆不起。康熙二十四年卒。年七十二。事具清史列傳貳臣傳。溶在崇禎時。與龔鼎孳同有聲臺諫。入清後。屢躡屢起同。而詩才如海亦略同。又與陳之遴同年相善。其降職正坐黨陳也。雜憶舊友首數之遴。次及鼎孳。論詩于錢吳皆有微辭。獨推李因篤詩。爲海內第一。自負可知。以好結納。富藏書。爲一時勝流所歸。林時對獨指其傾險驢貨。必非無因。撰靜惕堂詩集四十四卷。詞一卷。詩集雍正三年直隸總督李維鈞所刻。是冬維鈞以黨年羹堯得罪。故削去維鈞原序。及末板李維鈞校刊字樣。維鈞又刻周質采山堂集八卷。今更不可得。凡兵亂及前朝字樣。皆作黑釘。知是時已有忌諱。道光中王相刻清初十大家詩鈔。求其集僅得鈔本。選刻八卷。今日正賴信芳閣本。可以補其缺字。溶填詞最負盛名。靜惕堂詞之刻較早。不附于詩集。

廣應州童謠

乙巳春二月應之民謠曰。蝦蟇耕地鬼編田。一年收得兩年錢。莫知所自起。徐禪之。謂甲辰大饑。民賣牛且盡。僅僅在。若蝦蟇然。鬼則飢者所自傷也。已而果大收。余為廣之。

人食獨。牛飲水。牛病猶可醫。食獨之人瘦如鬼。人皆棄墳墓。鬼獨戀鄉里。開春當下田。努力呼牛起。邊山之下。赤石纍纍。去年殺我。今年難為。耕者未及息。長吏持錢來。爾牛存耶。為我飼之。爾有田有廬。可以忘饑。罷爾徭役免爾租。牛還生犢人扶犁。靜惕堂詩集一

游雲岡寺

釋氣理時服。頓轡西郊陰。荒陬非樂邦。得友諧所欽。猛志惜暇日。獨居多傷心。選徒越農圃。數席蔭飛岑。歡宴不知疲。長景招鳴禽。反顧丹堯高。諸天布黃金。整石象祇園。雙樹垂清森。寧意甲馬場。黯黯孤壑深。奔湍吹白沙。迫冬仍浸淫。徐悟區中隘。率性惟幽尋。行帳因風翻。長笛和哀吟。三復河清篇。覆爵還自斟。靜惕堂詩集六

蔣 薰留素堂集一卷留素堂詩刪後集六卷

蔣薰。字丹崖。嘉興人。崇禎九年舉人。入清官縉雲教諭。升甘肅伏羌縣知縣。卒于康熙三十二年。年八十四。朱彝尊為之志墓。稱為循吏。謂以賦詩立碑。與錢唐吳岱觀知成縣。修七歌堂以祀杜甫。先後為巡撫所糾罷官。傳者以為佳話。而惜其與萬泰金堡巢鳴盛同舉。而多一出。為有愧諸人。生

平爲詩萬首。刪之猶存其半。有留素堂集一卷。留素堂詩刪後集六卷。不事規模。第以怡悅。今觀其詩凌厲直前。空無依傍。而意透情深。亦復蒼涼有韻。每及離亂。輒多身世之感。未嘗不悔其輕出也。所爲詩尙有詩刪前集六卷。留素堂詩集別本天際草四卷西莊集四卷偶然稿一卷大石吟四卷凡十三卷

呂用晦見寄一刺自稱釋弟耐可戲言問之

無可無不可。那得有可耐。阿難會分身。作佛世情在。留素堂詩刪後集一

七月十二日有感淚下作

悲淚有時揮。愧淚無時已。忽念四十年。受恩不能死。終作老癡頑。塗顏對鄉里。隴外歸田不入城郭。下負周公友。亡

上慙黃夫子。先留素堂詩刪後集四

戲周青士三十七跌詩

周郎墮馬三十七。一路吟詩把足捫。未是習池陪醉後。想因先到侍中門。閑山至南村云。青士北遊爲貴人書記。中途數墮馬。凡三十七跌。作詩自嘲。故

戲留素堂詩刪後集六

曾王孫 清風堂文集二十三卷

曾王孫。字道扶。秀水人。本孫氏。入繼外祖曾氏爲子。順治十五年進士。官至四川提學道僉事。以康熙三十八年卒。年七十六。撰清風堂文集。爲詩二卷。文四卷。尺牘六卷。漢中錄三卷。都昌錄五卷。四川錄二卷。雜記一卷。王孫少與計東同學。有名諸生間。詩文皆有根柢。及入仕。一意吏事。不與名士徵逐。漢中以次三錄。皆公牘文移。深識人情真僞。閭閻疾苦。不愧循良。計東爲之序。以文太青吾猷錄孔邇錄爲喻。其足傳或在詩文之上。

偶成

賽神五月火雲新。紅粉成堆花撲塵。借問關山誰第一。底陽村似芋蘿村。清風堂文集二

案關鄉賽會蓋聞。天下第一。據此。底陽村又關鄉第一。清初已然。不知所自始也。

李明密 樂志堂集四卷

李明密。字山顏。號蓼園。嘉興人。少有才名。年十三以文得錢謙益知賞。十七從吳偉業游。與兄石友青來。兄子曉來。入復社爲眉目。崇禎十七年。年二十有七。家貧遠游閩中。以鄉貢署古田教諭。嘗擢粵中推官。辭不就。遂還里。葺故宅蓼園居之。以教子弟。時復出游。閩粵吳楚燕齊皆有游踪。其一病不起。口

占示兒曹。用陸放翁韻云。事到頭來一樣空。烏鳶蟻總相同。惟餘四十年前恨。腸斷江南陸放翁。據此以推。卒年當在康熙二十一年後。年將七十矣。撰樂志堂集四卷。所爲詩刻于閩中者渡江草。焚餘。旅吟初二編。未刻者南游草。閩中草。廣陵雜詠。勞勞亭畔草。北游草。萬里詩。凡數千首。手定諸編。去取各半爲樂志堂集。身後忽失之。子瑋綴輯僅得分體四卷。五百六十七首而已。詩初學長吉玉川。繼宗王孟。又繼乃上規老杜。體製日新。工力始厚。古意新聲十首。讀明紀十六首。一時才氣無雙。梅里諸李若良年兄弟。俱以才著。似尙遜之。施閏章以擬王岱。非其匹也。孫宗渭亦以詩鳴。有瓦缶集。

南陽有感

讀史憂離亂。誰知入眼中。襄南齊賣犢。河北又彎弓。沙闊迷虛白。烽傳落小紅。須知今夜宿。難與昨宵同。樂志堂集二

讀明紀十六首

五錄

金陵遺事問漁樵。三百年來王氣銷。故國鶯囀供涕淚。當時龍起動雲霄。澄江壁壘風雷壯。祠殿蒸嘗玉帛遙。高帝萬年功德盡。鍾山松柏雨蕭蕭。

維皇建極本神明。拭目中原望太平。罪按先朝誅節甫。策陳內殿藉良平。祇言龍躍時方盛。豈道狐鳴亂已生。十八年來天命改。不堪回首憶西京。

一木難支大廈傾。君王端不負蒼生。盧循已下新亭舸。陶侃猶屯楚塞兵。殉國亡身終有恨。主憂臣辱豈

無情。郭門車側看封樹。野老吞聲哭大行。

高皇創業本艱辛。曉日中天暮海濱。自散金吾三百騎。遂亡江左八千人。殷王竟是逋逃主。周勃元非社稷臣。剩水殘山同下淚。銅駝何處不荆榛。

鳥道羊腸去路長。天低海闊陣雲黃。匡山不救文丞相。汴水空哀李侍郎。豈有星辰歸北極。更無車馬在

南荒。自從頓首秦庭後。二十餘年事渺茫。樂志堂集三

苦雨

天柱西傾四十秋。補天無術杞人憂。世間定有迴瀾手。坐使淫霖遍九州。樂志堂集四

李宗渭瓦缶集十二卷

李宗渭。字秦州。明啟孫。康熙五十二年舉人。少爲朱彝尊所賞。詩多古體。專模齊梁。雖未化痕迹。而氣溫辭雅。與徒事叫囂無端感歎者有別矣。邀游南北。足迹及于隴右湘中。所至發爲吟咏。皆有寄託。嘉慶以後。盛行選體。降及清末。此風猶盛。而宗渭實爲開端者。

憶事

塞上三城戍。關中八水分。政歸新令尹。詔起故將軍。甲仗明朱火。旌旗卷白雲。投鞭臨水次。擊柝渡河汾。馬首瞻何急。烏啼定未聞。當時貔虎士。深入鶴鵝羣。餘勇誇高固。多方謝伍員。欲將天下計。上報聖

明君。下馬觀齊轍。升車望楚氛。非關肉食鄙。終愧洽絲琴。涉豕蹄何白。群羊首獨填。天心非厭棄。人事實紛紜。未有撓秦策。空勞詛楚文。一軍化獲鶴。萬里集蠅蚊。十月連兵革。三年罷紵紃。如何遼水哭。翻策未央勳。莫話封侯貴。徒令隕涕紛。回看征戰地。日日雪雰雰。五伍 集十

朱彝尊

南車草一卷竹垞文類二十六卷竹垞文類二十五卷騰笑集八卷曝書亭集八十卷曝書亭集

外稿八卷曝書亭詞拾遺三卷江浩然曝書亭詩錄箋注十二卷孫銀槎曝書亭詩集箋注二十

三卷楊謙曝書亭集詩注二十二卷李富孫曝書亭詞注七卷

朱彝尊。字錫鬯。號竹垞。晚號小長蘆釣魚師。又號金風亭長。秀水人。國祚曾孫。至彝尊家已中落。變亂以後尤貧。與同里周實繆泳王翊沈進李繩遠良年符兄弟結詩課。爲曹溶所知。漸有名里中。壯歲欲立名行。主山陰祁氏兄弟。結客共圖恢復。魏耕之獄。幾及于難。踉蹌走海上。會事解乃賦遠游。以布衣自尊。十餘年間。遂負重名。姓字達于禁中。舉康熙十八年鴻博之試。授職檢討。入值南書房。賜第黃化門。二十三年。以攜帶僕人入內鈔經進書。降級逐出內廷。二十九年復官。後二年復以事被褫。乃歸田。專意著述。論者惜其輕于一出。終傷鍛羽。然觀所作弔李陵文。早已決心自獻矣。而後削文類布衣之稱。題詩集騰笑之名。毋乃忸怩乎。卒于四十八年。年八十一。事具清史列傳文苑傳。及其孫稻孫所作行述。彝尊爲學。專務博綜。詞綜三十卷。成于康熙十七年。獨標正始。別擇甚嚴。轉移之功。遂成有清填詞之盛。采詞

集一百七十家。傳記小說地志三百餘家。然猶嫌祕笈之未盡覩。金石之未備錄。明詞蕪累。託言闕出。而孤陋寡聞者。乃競起而續貂也。日下舊聞四十二卷。成于二十六年。所見之書。乾隆中官修日下舊聞考時。已有不及知者。今則亡佚更多。舊籍日亡可驚。則彝尊博洽爲可貴。經義考三百卷。成于三十八年。分存佚闕未見四門。于十四經外。附以逸經。毖緯。擬經。家學。師承。宣講。立學。刊石。書壁。鏤板。著錄。終以通說。及身刻成者。易書詩禮一百六十七卷。乾隆四十二年。官爲刻竟。明詩綜一百卷。成于四十一年。著錄者三千餘人。采集部二千餘家。不薄七子鍾譚。頗與錢謙益列朝詩集持異同之論。盡以遺老舊人沒于清初者。歸之于明。最爲卓見。惜謹畏過甚。明初文士罹禍者。多以傾危目之。所錄順康時人之作。稍觸忌諱。輒爲改削。乃欲以其書擬史。何得謂之直筆。何焯菲薄彝尊。後生競名。不足爲訓。然謂彝尊此書奉陳子龍以斥謙益。而書中往往襲取謙益餘唾。頗中其失。世遂以之定錢朱優劣矣。彝尊尤以詩文著稱。顧炎武稱其文章爾雅。宅心和厚。著曝書亭集八十卷。凡賦一卷。詩二十二卷。詞七卷。文五十卷。文多考據之作。題跋一類。有意與有學爭勝。或竟過之。碑板紀事之作。多足徵事。在史館七上總裁書。備論修史首在徵書。而期限不可迫促。致身從亡之誣。瓜蔓十族之誕。謂東林不盡君子。非東林者不盡小人。當除門戶之見。尤爲有識。詩篇極富。趙執信因有貪多之誚。或謂得一佳語。便可敷衍成篇。今觀騰笑集中詩。有改題目而存者。既無當于實事。且何足以見性情乎。然興酣落筆。遂可陵駕古人者。亦復多有。晚年才華不免稍謝。終無愧大家。先是順治十四年。彝尊入粵歸。刻其詩一百三十首和曹

溶詩三十二首。爲南車草一卷。詩多不見本集。有蔗餘道者爲之序云。自變故以來。詩書之氣。無所附麗。天下之才人。往往化爲詩人。其言沈痛。不知何人也。嘉慶二十三年。海寧蔣楷始爲之重刊。竹垞文類刻于康熙十六年。尙題布衣朱彝尊。爲詩十四卷。文十二卷。竹垞文類二十五卷本。大約刻于二十三年。削去總目及布衣一行。并削去二十六卷一卷。中有弔李陵文。或以此爲諱也。騰笑集詩八卷。以續文類。刻于二十五年。取北山移文騰笑之語。聊以解嘲。世以彝尊佚文甚多。爲之輯補者。楊謙輯遺詩二卷。駢文二卷。未行。馮登府與彝尊五世孫墨林。從曝書亭類稿石樓漫與二集手錄本。更于斷紙零墨中。共相收拾。參以文類騰笑。得古今體詩約四百首。分爲五卷。附詞一卷。文二卷。刻于嘉慶二十二年。采之似猶未盡。後一年南車始重刻。故不及見。翁之潤有曝書亭詞拾遺三卷。從彝尊手稿錄其爲集中所無者。刻于光緒二十□年。之潤爲同縣孫。統袴而以好事取名。足徵文敝。爲之作注者。江浩然曝書亭詩錄箋注十二卷。刻于乾隆二十七年。曰錄者猶之選本也。孫銀槎曝書亭詩集箋注二十三卷。成于嘉慶五年。兩注皆略于注事。孫注并將屈五字樣剝去。以友人二字代翁山。其時文禁已疏。不知何故多此顧忌。楊謙曝書亭集詩注二十二卷。成書最後。較爲詳贍。然涉及屈五翁山者。并其詩刪之。更孫之不若也。李富孫曝書亭詞注七卷。成于嘉慶十九年。富孫經生。爲良年後人。經學詞章具有根柢。故徵引極博。人物考訂尤詳。且能是正彝尊之失。可謂佳籍。王鳴盛吳詩集覽序云。予門人范洪鑄注竹垞詩成。亦稱淹雅。正相與商榷開雕。又李注言無名氏騰笑集注言卯生人忌食河魀。先生忘其所出。然則彝尊詩注。尙有不

傳者矣。

捉人行

步出西郭門。遙望北郭路。里胥來捉人。縣官一何怒。縣官去。邊兵來。中流簫鼓官船開。牛羊羣駝蔽原野。天風蓬勃飛塵埃。大船峨峨駐江步。小船捉人更無數。頽垣古巷無處逃。生死從他向前路。沿江風急舟行難。身牽百丈腰環環。腰環環。過杭州。千人舉棹萬人謳。老拳毒手爭敲逐。慎勿前頭看後頭。竹垞文類一

梅市逢魏子

前年逢君射襄城。山樓置酒權平生。淳于一石飲未醉。孟公四坐人皆驚。今年逢君梅福市。潦倒羸疎已無比。寒暑推移六七年。眼前貧賤猶如此。悲君失意成老翁。況復奔走隨西東。攬鏡不知頭盡白。逢人先說耳初聾。山陰祁生賢地主。好奇往往相傾許。豈無上客朱與姜。齊高堂。飯雞黍。哀絲急管橫相陳。拂衣起舞任吾真。便當晨夕相怡悅。不用長齋事高潔。醉去狂揮白玉杯。渴時生飲黃獐血。魏生魏生奈爾何。百年強半成蹉跎。天生汝才豈屬下。何爲抱膝徒悲歌。竹垞文類三

舍弟彝鑒遠訪東甌喜而作詩

急難逢令弟。訪我自江東。頓喜羈愁豁。兼聞道路通。晴江空翠裏。春草亂山中。知汝南來日。西陵定遇

風。竹垞文類六

案彝尊以魏耕之韻。欲走海上。後聞事解。乃有此作。

穫麥詞

大麥已枯小麥黃。腰鎌荷擔相扶將。高田成穗低亦熟。私較去年多十斛。東隣西家田舍翁。一時作飯飽蓬蓬。兒童持竿歸晚食。雀噪中場雨漂麥。曝書亭集外詩一

布穀詞

布穀復布穀。高者成陂下者谷。老翁持畚祝家雞。稚子登高飽黃犢。官家徵求急如火。歲時誰識田家苦。新篔酒慰鄰人。好執豚蹄祭田祖。以芻爲狗紙作錢。村巫白晝歌神弦。舊穀數升泥數斗。持竿荷鍤歸中田。烏鷄嘴長雀嘴短。莫遣飛來共飽滿。曝書亭集外詩一

女耕田行

荷鍤復荷鍤。耒耜中田聲札札。誰家二女方盛年。短衣椎髻來耕田。自言家世多田宅。幾載征求因需索。長兄邊塞十年行。老母高堂兩齒落。前年賣犢輸縣門。今年賣宅重輸官。石田荒荒土确确。十日一晦畊猶難。自傷苦相身爲女。好與官家種禾黍。曝書亭集外詩一

漫感

禾與布衣誰比數。避世南村守蓬戶。已遣悲歌行路難。誰令樂歲終身苦。男兒失意真可憐。十口飢寒啼向前。出門暫免對妻子。入市重愁遇少年。強將語笑供鄰里。貧賤由來少知己。沽酒終無三百錢。餽糜且糴五升米。歸來茅簷日色高。鑿石取火汲水淘。侍婢吹塵言甑破。高堂進飯識薪勞。亂餘生計無良策。懶

慢相成已無匹。抱膝長吟此一時。羣居飽食仍終日。獨不見。田家耕穫期有秋。腰鎌荷插無時休。人生衣食在力作。我與汝曹何所求。曝書亭集外詩一

田家留客

剝剝復啄啄。野雞飛上屋。田家客至心徘徊。初疑或是里胥來。柴門方開未延入。短布單衣遙拜揖。蓬頭稚子抱兒孫。中堂有客逢開尊。濁醪新向糟床注。勸客頻行老瓦盆。主人既醉客辭遠。相對茅簷愁日晚。入門告語數叮嚀。慎勿稽留辦盆飯。兒啼呱呱不得哺。新婦中廚聞揀釜。曝書亭集外詩一

徐嘉炎抱經齋詩集十四卷文不分卷

徐嘉炎。初名焉。字勝力。一字華隱。秀水人。少穎異。與夏存古徐不識皆稱神童。又與從父善同歲同事施博。學姚江之學。善終于處士。嘉炎舉鴻博。授檢討。官至內閣學士。康熙三十八年告歸。年六十八矣。事具清史列傳文苑傳。撰抱經齋詩集十四卷。文列全目凡五十卷。每卷選刻一二篇。與四庫總目所稱頌一卷。論一卷。序三卷。雜文一卷者不合。又無所附焚餘草。大約初欲全刻。後不能繼。乃就已刻者編爲六卷。卽四庫所見本也。詩文頗富才情。詩摹初唐四傑。後乃學韓蘇。自謂不難爲之。其實痕迹未泯。文有筆勢。而年伯宗叔猶從俗稱。非能古者也。嘉炎與朱彝尊同里同舉。集中僅有贈朱錫鬯一詩。曝書亭集竟一字不及嘉炎。嘉炎父肇森。諸生有名。受知黃道周。嘉炎述八歲時曾見道周。正崇禎十二年。道

周居西湖時。母金淑修善畫工詩。有頌古遙合集。彝尊撰徐柏齡墓志。歷舉道周湖上從游弟子。獨遺肇森。又明詩綜不錄肇森夫婦。頗不得其解。及讀嘉炎玉臺詞自識。乃知兩人以爭名成隙。而彝尊未必君子也。識語謂同里矜才抒藻之士。馳游廣采。獨負盛譽。晉楚在望。不欲備魯衛。甘芴莠。卽指彝尊。又謂開亭淥水。雕槩梁溪。幾成終南捷徑。蓋指納蘭成德開詞社。與顧貞觀同選今詞初集。謂先選其詞而後見絕。非主人意。當亦彝尊搆之。獨稱李符爲愿士。則不愿者必彝尊。以李武曾與嘉炎交尙洽也。嘉炎集目有題六家詞。惜未刻。不及見其憤語。彝尊爲掌院牛鈕所劾。由徐乾學高士奇嫉使。嘉炎以宗叔事乾學。或有抑揚其間。遂爲彝尊不解之仇歟。彝尊賣古董擢宋桮之金。蒲伏安岐曹寅之門。本多可議。而不知尙有此事也。嘉炎集中不沒彝尊名字。足徵襟度之廣。文目附識所撰尙有說經。談史。五代史補注。明史辨證。見聞雜錄諸書。知欲以撰述自見。惜皆不傳。

贈別華州王山史兼呈秦晉諸同學

東南稱材藪。不如西北士。西北崇樸學。東南尙華靡。樸學必樸心。華靡徒爲耳。此固地氣然。人情亦復爾。黃河崑崙來。龍門漸南徙。兩戒首晉秦。分流鍾其美。名流爰挺生。前哲庶可擬。先生產華陰。人綱復人紀。自署爲無異。世皆稱山史。其言明且清。其道溫而理。手輯山志編。高風軼塵軌。令子成國器。孫曾茂蘭芷。三世習雍頌。一堂成燕喜。與余遇燕臺。相見忘執雉。傾蓋蕭寺中。悠然消鄙俚。時作五字吟。長嘯芬人齒。使我心如醉。移情未能已。我交秦晉賢。始自蒲吳子。吳嬰談諧腹可實。坊表跛能履。青主陽曲傳山

篤風烈。碩果誰能似。天生富平李雄夏聲。宏博無涯涘。孝廉武功李不勝衣。恬漠遺糠粃。大令涇陽李繩祖

武。敏肅如可起。藹公保定陳文獻存。和歌滿燕市。百詩太原閻富典墳。遺經究終始。凡此廣廈材。良非汙漫

技。冉冉聚將散。亭亭行且止。雖復隔形神。素心良可恃。贈君牽連書。感發情何底。習俗稱秀民。漓風額

有泚。鏤板數篇書。謁門累幅紙。好便豐羽毛。惡即成瘡痞。標榜必同流。排擠惟異己。何當學冥鴻。且或

迷失豕。駢語與枝詞。徒矜身不貲。芻狗視陳言。菁華誰徹髓。肉食笑懸疣。車多因治痔。不幸生三季。吾

黨還鑒此。翹首慕高遐。褰裳願濡趾。橘樹生南國。踰淮甘化枳。抱經齋詩集四

李繩遠 尋壑外言五卷

李繩遠。字斯年。號尋壑。又號樵嵐山人。秀水人。諸生。入國學。考授州同。未就。橐筆幕游。康熙二十八年自楚歸。買武林西谿龍歸塢竹徑菴居之。栖心奉佛以老。卒于四十七年。年七十六。事具自撰補黃村農生擴誌。撰有尋壑外言。刻成屢易其稿。後乃自訂為詩四卷。雜文一卷。其詩才華或不如其弟良年。而沈著過之。最善儷體文。良年所謂吾家伯季並擅斯長。阿京未欲爭勝。阿京良年小字。汪琬推為梁陳遺響。徐庾後勁。今存文不多。觀其功力之深。正應使陳其年吳綺避舍耳。

明懷宗御書四十韻

昔際屯蒙會。維皇御八鴻。謳歌歸聖瑞。宗社亮天功。文物千秋繼。車書萬國同。經邦自神武。與世實熙

隆。側席徠賢俊。臨軒達帝聰。石渠紛史籍。蘭省盡詞雄。奏事親桓典。儒生進馬融。天顏恒肅穆。睿想獨
謙沖。揮翰凌黃竹。當歌嗣大風。瑤章誠蠶鳳。彩筆欲騰虹。稽古淵源得。論文夙昔工。闕前頻獻賦。柱下
久呼嵩。嚴樂才偏盛。淵雲秩已崇。燃藜重閣上。持管掖垣中。郎署青纒帳。臺端白雪驄。廣吟應有頌。殊
錫定均蒙。眷顧雖儒術。憂勞屬聖衷。羽書飛隴右。烽燧起京東。枚卜思良佐。專征拜上公。一丸許設險。
五利失和戎。羣盜方乘勝。諸臣特內訌。廟謨真懜懜。時事日恩恩。宣室嘗移坐。綸言每責躬。朝班誰薦
蹇。戰士幾如熊。捲甲昭陽殿。鳴笳長信宮。翠華無復幸。丹禁忽聞終。鞀鼓連雕輦。塵沙暗綺櫳。瑣闥虛
侍從。宸極想槐楓。花擁鑾輿散。香飄講序空。茂陵書已出。湘水怨難窮。翰墨從茲見。威靈或可通。至今
留御筆。何地哭遺弓。園寢沉雲黑。松杉落照紅。珠丘春滾滾。銀海夜濛濛。一自攀髯慟。多慚貫日忠。勳
庸看奕葉。歷數任玄穹。紀述非孫盛。棲遲羨葛洪。西山今寂寞。北闕舊龍從。帶礪猶盟府。乾坤若轉蓬。
南陽迷淑氣。一旅總夢夢。尋常外
言一

滇池歌留別陸四左城

西南巨浸稱梁州。滇河之水如倒流。昆明城邊映花樹。炎天風日同清秋。憶君往醉燕臺酌。走馬南黔事
如昨。獨向滇池託勝遊。不辭萬里尙書幕。公府逍遙水戲多。畫橈錦纜焚童歌。文章爭羨鄒枚侶。詩句驚
看沈謝過。池流渺渺迴芳甸。彩雲何日重相見。金葉銀花滿翠棧。雙河空繞春池徧。興廢千秋不可論。上
林水戰晚池渾。漢家宮觀飛塵黑。此地澄波今尙存。嗟余北去與君別。洱海晴風夜郎雪。金馬重關斷碧

鷄。隨人獨有滇池月。尋壑外
言二

李良年 秋錦山房集二十二卷外集三卷

李良年。字武曾。初更姓名虞兆潢。字法遠。繩遠弟。諸生。家貧游食四方。幾遍海宇。康熙十八年。舉鴻博不遇。三十年。歸築秋錦山房。坐臥其中。弟子著錄者日衆。遂未再出。徐乾學放歸。開書局于洞庭山。良年嘗應聘與修一統志。良年集中有奉簡徐大司寇八百字詩云。嘉招愜所慕。菁華未銷歇。便擬一褰裳。稍待南風疾。是招而未至之證。撰秋錦山房詩文各十卷。詞二卷。外集三卷。則簡札也。卒于三十三年。年六十。事具清史列傳文苑傳。及朱彝尊所撰行狀。初良年于康熙十年入黔。客于巡撫曹申吉。選刻丙午康熙五年以後詩。自題其後曰。幼慕微之稱子美云。非有爲而爲。則詩不妄作。旋經兵燹。遂作爲牢愁激楚之音。後與周質鍾淵映聲相切劘。自是稍趨法度。蓋矜慎有餘。而排宕不足矣。出游萬里。不廢吟咏。要其所作。不過山川臨眺。友朋贈答之語。蓋田野之士所宜言止此。若夫有爲而爲。予則非其人也。觀其自評。可謂至當。蓋懼貽禍患。不敢傷時。而律格深細。正其擅長處。亦朱李齊名勝于朱處。四庫提要謂其詩蹊徑之狹。才分所限。文則長于議論。短于敘述。不足以知良年。其文有法。亦非彝尊所及。世徒震于鴻博。以爲彝尊長于考辨。著書滿家。而不知良年非不知學者。顧炎武嘗與之札云。此書中有一二條舛誤。未得高明駁正。輒乃自行檢舉。容改得再呈。所指爲日知錄。炎武未嘗輕許人。而視良年若畏友。

故不能謂良年學不如彝尊。

苦旱詞

五首之一

見說西江水接天。豫章城郭渺誰邊。只愁三版漂流易。不散句吳萬頃田。

秋錦山房集一

張氏園古松

先農壇西五畝園。中有古松當幕門。槎枒去地只數尺。橫開十丈何飛翻。三條廣路稍相背。過者不解窺籬樊。我來坐向莓苔碧。愛此寂歷銷塵喧。東風吹入春聲起。如泉出峽弦鳴指。詩卷茶香竟日留。不知世有閒桃李。龍鱗蛻處蒼藤纏。託根京國知何年。摩挲爲汝三嘆息。秦封不到終茫然。君不見。紅土游鞭紛好事。看松只說慈仁寺。

秋錦山房集二

口占贈柳敬亭

燕市酒人今散盡。白頭重與話春風。燈前歷歷開元事。只在棊聲扇影中。

叟以一棋一扇按節作口技

秋錦山房集三

水車行

黔人五月伐蠻竹。水車團團架江腹。百筒自轉洪濤風。晴日禾苗盡霑足。豈無桔槔與轆轤。終藉人力相持扶。未如老農日飽睡。坐待粳稻收膏腴。吾鄉水車製渾樸。胼胝僅足輸官租。吾將攬筆繪此圖。可惜江南水面平于鋪。水車僅可施急水。倘欲移置徒區區。古來財賦稱三吳。吁嗟民力何由蘇。

秋錦山房集四

出都下口占十一首之二

詞章捆載滿徵車。東笥蕭然覆瓿餘。好語平津真忝竊。幾曾三上閣門書。

先是御試未有期。實應喬舍人語予曰。昨高陽公論海內詩家首推子矣。他日有謂

宜造謝者。予曰不然。詩小技也。窮達命也。相國知吾詩。孰與使相國知吾守乎。聞者以為誼也。及予見黜始信。

太原無恙著黃冠。傅山先生關內陳情去不難。檢討兄

因篤更愛維揚孫處士。枝耐陸翁

嘉句裏說辭官。孫被徵以老辭。吏部驗之不許。被放

後。得旨凡年高悉授舍人。三開老列其名下。又以未老辭亦不許。盛唐詩有增年辭試減辭官之句。

秋錦山房集六

告災行

前呵擁旌旄。後隊挾弓矢。不知是何官。但見馬塵起。驕陽枯良苗。望望荆棘裏。童叟相扶迎。里正持數

紙。長踞欲有陳。聽者方掩耳。秋錦山房集七

觀舞

前除清音奏。泠泠竹與絲。後房香霧開。宛轉步障施。美人雙鳳皇。天女六銖衣。裾藏新月影。珠妥倭墮枝。迴風對垂手。貼地鬪腰肢。意靜似無著。態閒若有思。合并疑一身。輾側詎差池。戲楚久方嬾。斷雲飄已歸。張燈繼匿景。捧觴來何遲。滿堂照晶盤。神光交陸離。少長環四筵。勸我醉勿辭。歡場不為樂。慮招達者嗤。春夕未可旦。好花莫輕飛。萬事易陳跡。終朝看令姿。俛仰忽生感。此意無人知。秋錦山房集七

聞罷海取紀事

五畿物貢走梯航。更為姦闖權外洋。海若古來無互市。肯教桑孔筭扶桑。

海王震疊已多年。安穩魚龍溜夏天。一任插花帆歷亂。從今不駕趕船。海艘出洋。以敵春溜夏爲候。趕船船。插花估帆也。
市令今年勅罷初。山間麋鹿網應疎。始知闔外籌時策。不入中朝平準書。秋錦山房集九

李符香草居集七卷

李符。原名符遠。字分虎。號耕客。弱齡卽善屬文。與兄繩遠良年號浙西三李。嘗共朱彝尊周質爲詩會。三李餘一錫偏提。彝尊止一布袍。遇會則付質庫。兩家內相各紡績出之。率以爲常。曹溶方里居聞之驚異。出藏書資之。尤器重符。遂稱弟子。其詩清空一氣。不爲嘉隆體。詞盡掃窠臼。獨露本色。譽者稱爲稼軒後身。著香草居集。爲詩五卷。詞二卷。駢文曰補袍集則亡之矣。客游四方。康熙二十八年。卒于福州。年五十一。事具高層雲所撰布衣李君墓表。沈濤匏廬詩話云。吾禾三李秋錦而外。唯分虎足稱二難。詩固抗行。詞則有過之無不及。分虎客閩中某官署。其夫人亦能詩。慕分虎才。因越禮。某官偵知之。召分虎與眷屬共飲。酒半。昇一巨棺。強二人入之。遂葬後園。至今土人猶呼爲鴛鴦冢。是香師聞之蘭泉少寇云。按符詩至浦口一絕爲止。蓋絕筆也。墓表但云暴卒。未詳死狀。或難言之。然王昶言能歸櫬則不足信。

康郎魚歌

撫仙湖頭產嘉魚。康郎名載方輿書。荳蘭城中昔滿市。漁人籠挈來街衢。我來南土兩經春。枯者問得艱

鮮新。有客昨放潑江棹。餉我千條白錦鱗。銀鑲玉琢色可愛。短不盈尺頭尾勻。當筵不用鸞刀切。雕盤烹出香椒辛。巴西丙穴浪高價。甌東石首徒垂綸。松江鱸膾吳江蓴。吾鄉美味稱絕倫。萬里遠阻莫入唇。何期逆旅食異珍。罷彈長鉞且逡巡。行沽濁酒漉葛巾。持魚把杯夜及晨。香草居集一

秋夜宿慧建寺見一老僧頭白如雪聲音如女子異而詢之知為沐黔國故宮監也遂叩

其遺事為予道之甚悉聽畢愴然為述長句

金風瑟瑟涼秋至。客子夜宿慧建寺。白頭老僧夜不眠。為我深談黔國事。自言乃是刑餘身。小小曾為宮裏人。曲房深苑逶迤入。皓齒明眸歌舞頻。玉鳳銜鈴聞異響。金龍吐佩承香塵。第宅非由一朝建。分茅始自功臣宴。鐵券頻頒朱邸門。蠶書數下明光殿。二王一侯九國公。尚有將軍不襲封。子孫傳位十數世。勳爵食祿三千鍾。武禋之後愛文詞。傲外烽煙靜一時。滇池長讌書生客。阿瓦國王每夏五月以舟師會諸小國於江上。都督沐璘作詩曰。蛇首樓船十丈長。船頭鑼鼓樂笙簧。駕師百棹齊搖去。阿瓦城邊水似湯。滇人至今誦之。崇禎年中亂離始。臨安長官謀不軌。倉卒橫戈樽俎間。須臾

拔劍宮門裏。從官衛士不敢前。樓臺灰燼鶯花死。陳焦夫人竄西門。一旦自焚普吉村。可憐兩世金閨質。化作千年玉女魂。上公初遁瀟滄遠。一去□□不復返。會聞就義死從容。至今傳說多哀輓。聽君說罷涕交流。一門盡節真難求。三百年來事銷歇。卻恨當時沙定州。獨倚繩牀三太息。珠斗闌干月將匿。篝燈黯黯不能寐。清夜如聞鬼神泣。香草居集一

鄒天嘉西邨詩草二卷耦漁詞一卷

鄒天嘉。字駕枚。秀水人。諸生。卒于雍正十三年。年六十二。著西邨詩草二卷。耦漁詞一卷。凡詩二百餘首。詞五十餘闕。多吳越山水游觀之作。天嘉家住藏溪。不求仕進。時值承平。家計贍足。蒐羅異書。評量法畫。自適其適。故多閒情逸致。其詩刻意雕績。不免鑿積。詞則尙能行筆。間復高渾。清代嘉興一郡。文采甚盛。如天嘉等輩。亦有足觀。竹垞秋錦之風遠矣。

蠶娘吟

風颯颯。雨瀟瀟。攜筐挈筥路迢迢。東鄰載葉歸來晚。西鄰挈伴出溪橋。裁紘製錦誇靡麗。那知浴種條桑。且復宵。倉庚不住啼林樹。布穀時聞和寂寥。及早繰絲鬪市上。輸完官稅免征徭。噫嘻誰憐勤苦農家婦。依舊殘冬布裹腰。西邨詩草上

曹爾堪八家詩選顧菴詩選

曹爾堪。字子顧。別字顧菴。嘉善人。順治九年進士。入翰林。官至侍講學士。以事罷歸。卒年六十三。事具清史列傳文苑傳。工填詞。有南溪詞傳世。與曹申吉稱南北二曹。詩亦清麗。有南溪詩文略未見。傳其八家詩選中二百首而已。

養蠶詞

清明洗箔出蠶子。細小如鍼黑如蟻。綠髻不理剪嫩桑。半月辛苦一寸長。二眠起後筠筐滿。羅敷陌頭愁日短。不寒不煖四月天。薪炭何曾費一錢。銀釵換魚衫換肉。清還直待頭蠶熟。頭蠶已熟置蠶蚤。今年郭外綠車少。戰鼓頻驚成亂絲。養蠶那得如往時。八家詩選 顧菴詩選

魏 坤 倚晴閣詩鈔七卷

魏坤。字禹平。號水村。嘉善人。大中從孫。康熙三十八年舉人。卒于四十四年。年六十。事具朱彝尊鄉貢進士魏君墓志銘。魏塘魏氏文學甚盛。學泮學渠最著。坤少有志節。與嘉定陸元輔海寧陸嘉淑訂忘年之款。以貧客游南北。盡識當世名流。獨無所遇。其詩才情茂密。與同郡朱彝尊李良年相亞。而聲名不及。著倚晴閣詩鈔七卷。康熙三十四年李與祖爲刻于濟南。坤客游所主也。

捕蝗紀事爲李慎齋先生賦

齊州歲屢登。四野闢草萊。猶懼墜主憂。恐有遺蝗在。亟行掩捕令。傳諭遍海岱。弭災貴未形。申勅下者再。轉運官司驪。職殊守土輩。事關民命出。何妨越俎代。維蝗性本殘。致實自貪悖。種由魚蝦滋。色用文武配。當其初生時。形質最瑣碎。俄焉結陣飛。所過逞利喙。迅如風雨聲。肆虐更百倍。使君竟忘疲。趣行曉星戴。巡覽周山村。民方輟耕耒。告以上意切。爲汝豫除害。日給青銅錢。計口助不逮。衆噪入崖谷。爬

扶逼叢穢。捕法同蒐苗。旗幟分妮隊。高則掠峯巔。卑則襲壠背。始猶繩繩集。後乃稍稍潰。掩羣在疾驅。悉促瘞濠內。餘或卷曲薄。間亦裝夾袋。還昇炎火投。兼之充鼎鼐。務盡殺乃止。庶免貽後悔。診消氣轉和。好雨旋破塊。遂使麥有秋。村村觀銜刈。秫田縱晚熟。從此料無礙。茲功洵非細。直可史冊載。任事盡如君。民豈色憂菜。吾詩雜諺謠。爲略綴梗概。倘作采風陳。應有寵章賚。倚晴閣詩鈔一

歷下城東觀刈麥

海岱惟青州。白墳土宜麥。其氣備四時。食之好顏色。老農倚鴉鋤。墮經冬雪積。春壠何漸漸。碧浪吐花白。歷下泉脈滋。候早鳴螻蟪。芒寒麥有秋。大小競畢出。霜鎌亦偶試。剗全用鉏力。屈曲環如箕。椽杙柄同畢。似獸攫餓爪。似鳥翻勁翮。一人牽之前。迅掠聲策策。一人挾網包。伺後踵相偈。猶恐臂不勝。腰襟繫在脊。相傳自隴蜀。武鄉創此式。當其看邊初。齊俗麥初刈曰看邊。刈畢曰放圍。私慮歎所獲。及茲穡事竟。一畝約一石。將登碌礪場。遺穗尙狼藉。齊俗風斯古。放圍任紛披。坐者遂羣起。絡繹遍阡陌。以此占豐年。詎憂道捐瘠。

重羅玉屑霏。家家薦新食。餽託正賦滑。溫淘更滋液。因憶隔歲游。處處遭淹溺。誰乘霹靂車。高下淨如滌。今復來城東。喜縱觀刈穫。何必定漁陽。兩歧見史冊。恍聞空中聲。王老新拔宅。屐踏斜照歸。山禽叫

格磔。倚晴閣詩鈔一

朱介垣先生席上觀倒刺四首之三

回風吹雪墮西巖。入夜深杯且共銜。正是客愁難遣得。花羅看擺胡騰衫。入騰衫。

一坐彈箏一軋箏。絃絃柱柱語分明。羊家鹿爪雖言好。未抵當筵倒刺聲。

對湧蓮華引柘枝。二分捍撥一分絲。近來只尙崑山調。誰聽金元院本詞。倚晴閣詩鈔七

柯煜 輦下和鳴集

柯煜。字南陔。嘉善人。康熙六十年進士。以磨勘黜名。雍正元年。復成進士。官宜都知縣。改衢州府教授。雍正十三年。舉鴻博。未及試卒。年七十一。撰石菴樵唱七卷。煜受業于朱彝尊。工詩詞駢體。以王頊齡薦纂修明史。嘉善柯輦。輦子弘本。即煜祖父。皆以詩名。叔父崇樸。維楨。並舉博學鴻儒。煜嘗刻絕妙好詞。亦頗好事。

舟中讀牧齋先生初學集得一百四十字敬題卷後兼寄孺飴行人

輕橈緬吳越。初日開瞳矐。烟濤動簾几。搖蕩生青紅。哲匠邈不作。披卷哦長風。琢磨文章園。萬象歸香容。凝想施手初。古香蟠心胸。松圓邀翰墨。河東媚房櫺。逍遙神仙窟。疏鑿造化功。自負名世姿。吁嗟吾道窮。耦耕失沮溺。枚卜虛夔龍。煌煌大手筆。元音闕黃鐘。生平一瓣香。私淑存遺踪。鸞膠豈能續。馬鬣何當封。光焰久不息。風流杳莫從。今宵柁樓夢。愴悅石城東。輦下和鳴集

勞之辨 靜觀堂詩集三十卷

勞之辨。字書升。晚號介巖。石門人。康熙甲辰^三進士。由庶吉士散館改戶部主事。官至左副都御史。戊子^八十一月九日。以上疏保奏廢皇太子胤礽。革職交刑部責四十板逐回原籍。是時東官黨爭甚烈。滿洲人斷脰絕踵者甚衆。漢人僅薄譴而已。然有清一代言官受杖者。唯之辨一人。故許志進陳學洙皆以詩稱之。癸巳^五復職。明年卒。年七十六。事具楊瑄左副都御史勞公之辨墓誌銘。有靜觀堂詩集三十卷。詩摹香山。喜及時事。自註甚詳。如丁未^六淮揚道中云。南北舟楫。不由淮上。取道周家開入洪澤湖。以達于高寶。一望汪洋。盡成澤國。黔陽雜感云。水西有土無流。康熙初年。改設四郡。近以捐糧功。復安氏故職。甲子^三同滿漢樞部巡歷濠境嶼云。時初開海禁。置權官。癸酉^二元旦云。東宮前慶賀。自本年始。寄劉六皆視學山東云。丙辰^五康^十戊午^七捐生與減額之例並行。辛巳^四毀冢仆碑行。爲張蘧若侍御賦云。碑書總督東廠官旗。掌惜薪司內府供用庫尙膳監印務。司禮監秉筆。總督南海子。提督保和等殿。完吾魏公諱忠賢之墓。有孝官姓名。無年月。當是忠賢生壙。或云甲申^七崇禎^十後小奄葬其衣冠爲之立石。皆可補記載之闕。其詩意已明者。如乙丑^二康^{十四}當塗見雲南解京逆口云。水驛方經楚。方言未改滇。報國寺窳變觀音云。毘盧高閣戶常扃。上有天成大士形。庚午^二康^{十九}杪秋卽事云。斗室新糊紙一重。客懷早計禦三冬。暖留屋角因藏納。隙甚窗樞不困蜂。與琉璃廠歌。皆善于狀物寫情。桃源竹枝詞十首。

述兵役之苦。爲民請命。又不啻流涕而道矣。

紅剝船行

并序 天津以北。水趨大海。故上流易淤。漕船有阻淺之患。爲設紅剝船以供轉運。其來舊矣。船六百艘。出自通州永清等六州縣。其地旗民雜處。紅剝獨用民力。及起剝時。漕船又受紅剝需索。似乎兩困。然天下

事宜已而萬不可已者。此類是也。歲壬子。勞子晉權斯土。目睹情形。賦詩以告守土者。兼備采風云。

東南輓粟來京國。萬廩千箱供玉食。今歲官租隔歲裝。弁丁遠道疲筋力。長年三老歷風霜。脚尾嚴程無暫息。行盡黃河與運河。河西套子行不得。船沉沙淤不利牽。大船重運分小船。官家有船號紅剝。更番接濟往來數。按畝抽簽奉有司。呼名點驗由關權。昨夜青蘋吹綠波。頂凌船過春流濁。帆桅靈纜一不齊。爾曹安得辭鞭扑。船頭長跪諸父老。只怨東皇開凍早。今歲賣田來買船。明年田盡船誰保。急公且濟本年漕。使君何事督堅好。我聞此語怒焉憂。官差民累無少休。十家產破難辭役。數頃荒田仍駕舟。嗷嗷眼盼南船抵。百計攫金還盜米。少婦撐篙狎浪頭。衰翁捩柁藏艙底。世路風波小加大。大船俛首真無奈。回思冬兌臨江潯。悍弁驕丁猛於虎。巧立因公貼白蠟。誅求加耗防紅腐。莫言人事無循環。到此也歌行路難。君不見。田家作苦胼胝裂。官糧未了私先竭。軍剝民兮船剝船。一絲一粒皆膏血。靜觀堂詩集二

榆樹皮行

畿南夾路多青榆。十株九株無完膚。借問民間何所需。答言採取充朝餽。食之鼓腹了無味。舍此無以活妻孥。只愁今年皮剝盡。明年樹樹根萎枯。倘或天行仍不測。貧家數口胡能餬。況將勉力完官租。里胥黨正不容通。時時打戶來追呼。安得監門爲繪圖。吁嗟乎。安得監門爲繪圖。靜觀堂詩集三

琉璃廠行

長安遊冶兼佳麗。春日春風盛鳴曳。白雀爭燃蓮剎燈。青蛾競訪梳臺髻。正陽門外鬧元宵。金櫃花驄意氣驕。十里香塵迷錦障。三更烟火走虹橋。繁華更數琉璃廠。五色雲中黃赤壤。裝得龍樓帝子居。燒成鴛瓦冬官掌。人工天巧讓皇都。賽月光侔不夜珠。琥珀枕由脂作骨。琉璃鐘是玉爲膚。陶中變化多奇異。娛人能憚兒童意。鶯築吹來關塞聲。葫蘆現出魚龍戲。官署前頭作廣場。鼎彝書畫布成行。子卿善相君平卜。列肆垂簾一一忙。踏歌連臂無休息。爲趁蘭燈並華月。玉漏頻移縱勝遊。金吾不禁囚佳節。傲居兩載廠門東。年去年來嘆轉蓬。君不見。綵勝銀幡仍似昨。春風又起落梅風。

靜觀堂詩集十

苦雨

都門盛夏愁暑雨。泥污厚地少乾土。六月十六夜光匿。天公大笑鳴天鼓。豐隆前導聲軒轅。風伯雨師爭跋扈。三更達旦總不停。披衣起視神色沮。竟日之雨不可當。街衢頃刻成河澗。纔聞官署塌東牆。又驚私第隕西塔。架上書僭桁上衣。遷移避濕無處所。貧家破屋料難支。男呻女吟倍愁苦。比歲京畿驅旱魃。清齋只禱商羊舞。火雲射地百物枯。桔槔灌引煩農圃。竊恐今年雨太多。禾頭生耳先傷黍。安得早潦兩無憂。萬戶千家給四釜。

靜觀堂詩集十

觀刈麥

江北人家多種麥。平疇千頃無沙磧。兩岐雙穗靈巫占。應時成熟活閭閻。老農喜見年豐稔。刈用霜鎌盛

用網。大車小車走萬牛。趁晴婦子齊來收。還愁百草雨中死。麥田一夜飛蛾子。靜觀堂詩集十四

吳之振 黃葉邨莊詩集

吳之振。字孟舉。石門人。貢生。以貲爲內閣中書。卒于康熙五十六年。年七十八。撰黃葉村莊詩集八卷。刊于康熙三十五年丙子。呂留良爲之序。後集一卷。刊于四十一年壬申。續集一卷。刊于五十一年壬辰。其子姪所編。詩專學宋而無槎枒粗悍之習。與留良交厚。酬贈之作甚多。是時世貴宋詩。曹溶爲之倡。藏宋人集部一百八十家。元集一百十五家。黃宗羲呂留良及之振亦競求之。之振家富。所得最多。因合留良所藏刻爲宋詩鈔凡百餘家。刻之未盡。而祕本流傳已不少矣。或曰實留良論定。之振出資刻之。

常州歌

下車容易上車難。水到田頭漸漸乾。莫憚苦辛齊著力。十分收得總輸官。

早喚兒孫上壟頭。一車十軸數難周。阿爺不喫閒常飯。充作長年到晚休。吳俗呼僮爲長年

官糧擗當早冬前。社長騎驢去掠錢。愛殺城中好官府。催租不見下鄉船。

風風雨雨怨皇天。造化無私也偶然。新穀登場滿倉舍。雞豚只去謝田官。黃葉邨莊詩集一

李永祺河千詩集三卷

李永祺。字鶴君。嘉善人。諸生。撰河千詩鈔三卷。大要康熙二十年後十餘年間之詩。議論甚新。唯才多爲累。動輒數百韻。哭沈皆備至二千四百字。有呈玉峯徐大司寇六十四韻。蓋其祖次文與徐元文同歲鄉舉。借此攀援。遂得爲遂園之客耳。

苦旱喜雨

萬松鬱岩巖。素王宮北向。長夏卷書坐。早甚陽方壯。赤雲夾烈日。煎熬難運轡。萬物歸洪鑊。八荒成火炕。望霓不見雌。呼風絕少颺。金石盡銷鑠。草木俱焦煬。明湖一勺水。絳赭變厥狀。南北兩峯間。了無雲影漾。但爲樵櫟客。那有清淨相。蠅聲亂人語。可笑不自量。蚊蚋噉血肉。瘦削何堪餉。垢膩索爬搔。熱毒飽炎瘴。露坐汗不收。休糧膈猶脹。寧帷疑入甕。當食如挾纊。飲水酌火井。入淵投熱湯。癡龍喚不起。涸鮒更安仰。昨來石門道。河流不容舫。泥行三十里。篙師學稟盪。桔槔密鱗次。雷聲那能抗。羣龍吸長川。頃刻飛塵埃。時方五月晦。秧針十無兩。鄉人昨來告。青苗今盡荒。縣吏工催科。猛虎民大創。粟盡恥磨瓶。衣典看空桁。兒方離襁褓。鬻賣悲弱喪。遠近俱遏繯。黎民思搶攘。剜肉誠哉難。憂心悄然傷。迎貓豈免瘵。食人將見恙。中丞念民瘼。減膳斷濁醴。率屬日步禱。望澤深惆悵。人方積至誠。天宜弭怨謗。水滯濟火烈。陰生繼陽亢。驗諸數有然。測以理尤諒。朝來礎忽潤。樹杪風旋颺。赤烏曉初升。蒼狗俄爲障。犯

卯便慵騰。鸞午猶醞釀。遲遲喜懼并。藉藉公私望。引領情正殷。側耳神忽王。拉雜摧屋瓦。戛擊交兵仗。急疑冰雹作。怒訝海潮漲。其聲自遠近。其勢自上下。峯巔方霑灑。山足已泯泮。乾坤俱晦冥。雷電助修張。雨師未肯迴。風伯正豪宕。炎威被驅除。飛遁敢伏藏。淵冷灑毛髮。清涼沁肺腑。快哉凭几席。耳目忽幽曠。悠然拂枕簟。肢體得安放。入宵勢未已。傾注何淋浪。一雨連五朝。燥濕略相當。我病喜良已。勿藥誦无妄。民因始獲蘇。輿情消悒快。此雨早一月。鼓腹食皆缺。此雨遲十日。骨俱溝壑葬。天運有循環。前後如責償。憂極始得樂。不鬱那能暢。此誠彼蒼施。亦由中丞貺。我后雖裁成。贊化善誰讓。作歌謹誌德。

太史俟探訪。河干詩集三

滄墅關卽事

細雨輕帆薄暮天。如狼津吏索緡錢。青蚨一百傾囊去。贏得明晨早放舡。河干詩集三

彭孫適松桂堂全集三十七卷南淮集三卷延露詞三卷

彭孫適。字駿孫。號羨門。海鹽人。父期生太僕卿。以江西布政使守贛州。死之。兄孫貽求遺骸不得。不交人事者二十年。而孫適以順治十六年進士。官內閣中書。舉博學鴻儒第一人。授編修。由文字受知。歷十年。遂至禮部侍郎。久之始遷吏部侍郎。兼翰林院掌院學士。康熙三十六年。請告歸。越三年卒。集中于丙寅康熙二十五年自稱年五十六。卒年當爲六十九。撰松桂堂全集三十七卷。南淮集三卷。延露詞三卷。初孫適

僅自刻南游集。爲癸卯康熙二年至丙午游粵之詩。至乾隆八年。其子景曾始刻全集。蓋在身後四十餘年。其詩始於順治十年。迄康熙三十八年。各體皆備。世獨賞其香奩體。及應制之作耳。

沂州道中見流民作

道左流民轉壑時。停車一問陸沉悲。田夫久廢龜陰耒。室女長停岱畎絲。豈有九年勞旰食。惟言五日待瓜期。何人近作監門令。不繪鳩形獻玉墀。松桂堂全集六

江北謠

種樹莫種棗。多實亦多刺。果熟市得錢。刺多作藩蔽。枯樹採蠶絲。日織盈丈許。賣向江南人。傲殺江南女。乘驢涉淺水。莫向無人處。新婦無丈夫。驅驢不得去。松桂堂全集六

苦雨歎

入春常苦潦。破塊亘千里。中更兩月餘。浸淫不知止。稍稍浴咸池。少焉旋復已。女桑苑且枯。人柳僵難起。萬木徒向榮。無論桃與李。陽氣惡沉鬱。積陰乖物理。昨聞殷其雷。乃在南山趾。傾崖驟雨集。江湖流瀾瀾。田家爲余占。乘船行入市。土膏已覘發。東作今方始。二穀苦不登。三農飢欲死。陵襄豈病堯。天漏同憂杞。安得鞭羲和。一照生忻喜。玉燭四時調。泰階平若砥。松桂堂全集七

貧婦歎

姑蘇城外清濠上。大者官船小客舫。鱗集雲屯晚未休。風囊霧鬢來相傍。向船長踞淚四垂。手攜弱女懷抱兒。行人問婦何所苦。斂衣起立徐致辭。家住毘陵北山裏。良人本是千金子。自有田廬樂歲時。還餘僮僕供驅使。一朝不幸值踐更。縣符府檄何縱橫。官家稅一吏稅五。里胥溪壑猶難盈。忽聞征南大兵至。趨令軍需倉卒備。催符如雨絡繹來。此時漫說新安吏。二月新絲三月穀。賣田不給還賣屋。僮僕逃亡家計無。良人淚盡雙眼枯。遮莫無顏棲故里。竭來乞食走吳趨。吳趨客店聊饘粥。計食千錢過一宿。兩兒三女年比肩。飢來只解牽衣哭。七口艱難仰一人。他鄉況是婦人身。已知且夕填溝壑。尙忍須臾訴苦辛。語畢還聞嗚咽久。逡巡似愧紅顏厚。哭聲錯雜未分明。說苦終時不絕口。可憐天地未休兵。江南往往多橫征。道旁觀者聽婦歎。愴然終日皆心驚。我聞王師渡閩海。廈門舟山次第平。安能刻日銷金甲。處處春風鼓

腹聲。松桂堂全集七

老翁歎

曉發秦郵驛。晚投界首村。炊煙寒未起。十室九閉門。道傍老翁長太息。此地猶來稱樂國。大兵頃者一經過。頓令閭里無顏色。持刀投石碎門戶。百物縱橫恣所取。擊豕判羊事酒筵。趨迎猶恐逢其怒。此恨吞聲何足道。妻子堪憐不自保。今年猶有兩三家。明年漂泊成荒草。我聞此言悽惻久。自發吳閩經界首。但逢逆旅多致詞。處處煩冤如一口。老翁此語最酸辛。可知艱苦皆身受。誰言橫海建奇勛。用兵不戢徒自焚。

江南巨麗佳氣色。須臾蕭索生愁雲。稻梁鳧雁一朝盡。健兒躍馬猶紛紜。當年空笑魚將軍。松桂堂全集七

上洋農

嗟哉上洋農。耕田一何苦。種秫十畝餘。經夏不得雨。陂池變爲田。禾苗化成土。粒食不須言。官稅從何補。里胥雜逋來。追呼怒如虎。抱耒入市廛。聊用質子錢。子錢苦無多。僅可供酒筵。此日行已過。後日還復然。地著難永日。流亡轉可憐。穠蕪雖云勤。不如逢歲年。獨租下明詔。不若長史賢。松桂堂全集九

艤舟吉安城下聽父老說金王之亂感賦此詩寄胡三山司理

鷓鴣峯下暫停船。父老淒涼話昔年。征稅多時空澤國。亂離幾處有人煙。江城日暮吹燐火。贛水秋來沒渚田。休息于今猶未起。深知公府借才賢。南淮集一

徐豫貞逃奔詩草十卷

徐豫貞。字滄浮。號逃奔。海鹽人。監生。初刻滄浮子詩鈔十卷。年六十。復刻逃奔詩草十卷。詩自甲戌康熙三十三年至辛巳。四十一年自撰逃奔賦冠于編首。大意謂五噫見非。聊從鄭谷。足以見其所志矣。詩稱意而行。頗近香山。多見逸老。不免眷念前朝。唯話桑麻。故言農事綦詳。正可作樂志論讀之。

讀閩古古先生遺稿感賦

豐沛自來豪傑地。奇才偏出亂離辰。悲歌不爲頭顱計。窮走驚全骭髒身。恨我未逢天下士。哭君猶有舊

朝人。鷓鴣聲裏吟殘什。海色瀟瀟莫雨春。

冰海蠶崖路秋鷄。風塵何處著英雄。山河半落行吟外。天地都歸慟哭中。鐵匣有時開信史。銅駝無地問

遺宮。詩篇盡是孤臣淚。剪燭猶驚瀆血紅。逃葬詩 草二

題呂晚邨東莊詩鈔後

牢落東莊一卷詩。深情古抱異今時。故應此老扶疎筆。學得誠齋樸妙詞。化後蟲沙供涕笑。夢中日月老頑癡。且須祕著中郎枕。他日終同鄭史垂。逃葬詩 草三

仲夏田家即事

農務殷時乍雨晴。海墘卑濕氣尤蒸。發黃梅賽連邨社。浙西田家黃梅時將插秧。具牲酒祀田祖。召飲隣伴。名為發黃梅。上白魚安逆水醫。黃梅時積雨暴

漲。白魚逆水而上。鄉人競習取之。家報午雞人一飯。田驅秧馬日千墜。插青冀放農忙假。昨夜猶聞吏到曾。逃葬詩 草五

書白奪山人紀遊遺稿後

即沛上闕古 古先生也

狂走人間四十年。詩題歷歷紀山川。奇蹤只欠雷南地。匹馬曾經斗北天。舉世非之終不顧。千秋在此豈徒然。乾坤要著驚人句。肯死英雄未老前。逃葬詩 草五

觀刈稻口號

樓畝黃雲接井遙。田家收割趁晴朝。下鎌扎扎齊舒手。分稻鋪鋪互折腰。刈稻每十大科為一鋪。四鋪為欄。刈則俯身向前。盈握則起身向後置之。起俯不互也。故云。比戶作堆遮矮屋。隔溪歸擔答浮橋。水鄉今歲稱全熟。吾輩寧瓢也自饒。逃葬詩 草七

立春口號

土牛綵燕一番新。簫鼓聲中轉畫輪。高閣疎簾駢士女。飛衣飛衣著于肩上。昭代章服也。窄袖看官人。情知去日多來日。

老愛逢春却怕春。雪鬢梅花同歲歲。尙堪驅使筆如神。逃秦詩草七。

馬維翰墨麟詩卷十二卷

馬維翰。字默臨。海鹽人。康熙六十年進士。官吏部主事。遷員外郎。補陝西監察御史。遷工科給事中。轉戶科掌印。出爲建昌道。再起常鎮道。卒于乾隆五年。年四十八。事具清史列傳文苑傳。撰墨麟詩卷十二卷。分併浦偶存稿。計借集。歸省集。跨驢集。司勳集。柱下集。黃門集。劍南廉訪集。沈德潛評其詩謂學杜可循牆而走。其實才大氣盛。務求拔俗。有學韓者。有學溫李者。不專一家。雖瑕不掩瑜。而志不在唐以下。取徑甚高。入蜀以後。得山川雄傑之氣。詩事益進。其時查慎行湯右曾氣衰才竭。維翰務發揚蹈厲以振之。足與李宗渭抗手并稱。湖海詩傳不錄其詩。蓋詩傳以繼別裁。故不復出。此集本名詩卷。四庫存目誤奪一卷字。文苑傳因之。可資笑噱。維翰頗有執持。初登第赴驗看。不肯跪。隆科多曰。不圖眇小丈夫風骨如許。維翰答曰。區區一跪。尙不足以見維翰風骨。又自蜀解職赴部質審。以解職與革職有別。不肯去冠。蓋斷斷執持人也。

書漁洋山人精華錄後四首

蓬勃塵沙空北地。飛揚風雪滿東山。仙人愛爾維摩詰。合著松花筍□□。
風懷澄澹陶彭澤。冰雪聰明李謫仙。底事銷魂秋柳句。雪泥鴻爪動時賢。
鵲華秋色成駘宕。魚子春流最淼瀾。亦是長安騎馬客。天風吹袂捉吟髭。
瑤華崑崙皆娟妙。豈是詞場偶噉名。一種丰神聲色外。江籬沅芷見平生。

墨麟詩
卷四

陳之遴 浮雲集十二卷

陳之遴。字彥昇。號素菴。海寧人。崇禎十年進士。授編修。遷中允。以父祖苞巡撫順天失事下獄。仰藥死。牽連革職。永不敘用。入清。不數年。官至尙書。順治九年。授弘文院大學士。以事調戶部尙書。十二年復授弘文院大學士。翌年。以原官發遼陽居住。是冬令回京入旗。十五年以賄結內監吳良輔。免死革職籍沒。全家移徙盛京。康熙初。沒于戍所。蓋始終依附陳名夏。結黨與北人馮銓劉正宗相抗。同以文學受上知。名夏既敗。之遴自不能免。于此見當時黨爭之烈。撰浮雲集十二卷。有康熙五年之遴自序。別有乾隆十年周星兆重刻本。改題陳素菴詩鈔。星兆字衡臺。稱之遴爲外高祖。其人不足道。而詩詞則意趣語新。稍嫌才累。詩格頗似吳偉業。白頭宮女行。置之梅村集中。幾不能辨。永和宮詞。以少許勝多許。結局可憐龍墮烏號日。不及椒風短命人。似較漢家伏后知同恨。只少當年一貴人爲和婉。其餘篇章。率皆

有事。飛鼻指楊嗣昌。儼然東林聲口。喬木云。赫赫司馬。盜臣之渠。可謂極口而置。白靴校尉行。幾于指斥莊烈。故世謂之遴以先帝爲仇。請發明陵以充軍餉。不免惡之過甚。然觀其燕京雜詩云。烈皇亦是英明后。辛苦興邦反喪邦。秋日感舊云。宵旰豈應逢板蕩。久傾炎鼎自桓靈。詞旨大有抑揚也。秋日偶成云。南國餘黎供上切。輸將爭恨役車遲。作于清初。則褊衷滑口。與得罪後感懷二十首。雜詩十首。同一怨望。秋日雜詩云。致身匪不早。旋復得悔吝。又云。永懷身世間。萬死集方寸。知處境之危矣。感舊云。九邊冠蓋眞爲戲。七尺鬚眉怪尙男。知時世之惡濁矣。而詠白胡蝶詩。乃望再起。豈非頑鈍乎。頗與文人周旋。尤厚張遂辰吳兆騫。人遂以好士目之。其妻徐婉素工詞翰。閨房唱酬。屢見集中。爲世人豔羨。孰意同謫冰天。獨歸寒鴿。繁華盡散。畫佛奉母以終。

冰車行

城南玉河冰遶城。小車轆轤冰上行。絳纜縮版鐵斷輪。一夫牽挽如葉輕。金鞍倦客行次且。裘裳下馬坐此車。河冰若砥車若矢。四體逸泰神閒舒。長堤森柳含金霧。車中片晷江南路。明鎗錦袖交冰衢。彷彿吳船蕩春渡。寄言御者慎勿驅。壘冰作山傾斯須。伏流蠕蠕狐跡絕。蒼龍青輅來東隅。浮雲集四

陳殿桂與袁堂詩集十卷文集四卷

陳殿桂。字岱清。海寧人。崇禎十六年。選渾源知州。未赴官。南都立。薦授兵部職方司主事。順治七年。

從清師入粵。題授高州府推官。越六年。以事解職聽勘。歷久始結。貧不能歸。嘗客平南王府。後遂作浪游。先後在粵十九年。卒于康熙五年。年五十二。著與袁堂詩集十卷。文集四卷。其子奕禧刻于康熙四十六年。殿桂受知陳子龍。與陸圻兄弟交游。故詩文塗轍近之。有意摹古。不免澀體。然文情鬱勃。頗有議論。篇章甚富。所患才多。病廢七律八首。哭子七律十四首。迎春竹枝詞二十一首。清明詞四十首。燈曲二十首。重五前二日限韻七律二十四首。放言三疊元白韻至三十首。皆以多爲貴。殊嫌費辭。然亦有足以窺見當日情勢者。南行雜詠七首。作于崇禎十六年。寫政廢年荒。岌岌不可終日。南巡歌十六首。于弘光寄無窮之思。不及崇禎一字。世遂以陳氏有憾于思宗矣。初夏閒居十首。夜警十首與述夢詩。里中剽殺成風一首。知其時士夫降清者。皆由身家一念促之。五羊早秋十四首。秋江歸興二十首。垂老思歸。吐辭酸苦。其他粵中亂離情狀。隨事可見。自謂兄金莖而弟丁卯。兄指從兄之避。嘗官大學士。既得罪徒遼。殿桂亦垂翅不振。才人淪落固自可念。詩則不似許渾。

田家限十四鹽五十二韻

周禮重旬籍。幽風備閭閻。監門圖未繪。徵士景先拈。農事鄉鄰異。民情天下僉。四時多瑣雜。百務冗分兼。豐稔先秋望。平和隔歲占。棘梁圍菜圃。槐蔭蓋茅檐。柘燒留麥火。荆扉滿曉暹。樞樓從小慣。風雨逐時霑。麥飯三餐飽。雲箋四體恬。陸頭栽紫芋。屋角蔓青籜。屮水棹呀軋。薺茶鐫曼鈺。粗圃泥作簋。亂織荻爲簾。攜筇喧朝餽。支樓冷夜綬。窮冬經宿寺。仲夏賣新織。屨草從穿缺。銀荊不炤奩。男兒無狡獪。婦

女絕妖纖。蛛掛禳祥至。蠶眠禁忌嚴。築泥場納稼。瀝涵海燒鹽。率作營生瘁。奔波夢語沾。畜猪修斷柵。
 嫁女賞花贖。數米炊朝飯。量盡暮暮鷺。病侵虔鬼食。訟涉怕官籤。蛙鼓丘中沸。牛圖竈右黏。衙門火耗
 重。學究束修廉。野廟飄殘瓦。田莊覆短苫。瓦盆呼共醉。耐銷借亡嫌。食鬱難兼味。縫裳豈羨縻。蓬頭無
 暇櫛。直口勿容箝。東井西家汲。南蘇北舍爨。清溪鼓柁入。烏鬼按波潛。春酒泥頭煮。秋壺剝蒂醃。失雞
 鄰媪誓。賽蜡社巫譚。債低錢折。輪租小斛添。荒年鬻穉子。省吃贖鋼鎌。參馴驚晨夕。星杓識冷炎。蚋
 啼天顯熱。蚊出雨淫淹。闌藪廬追兔。深濠瀨祭鮎。風和芎葉茁。山漲麥溝漸。龍見心吹火。虹飛日薄暎。
 春秋澆墓哭。伏臘擊壤欣。巷犬獐如豹。籬藤古似蜉。錢糧依限納。牲口到年殲。雨足新蒲熟。霜濃晚稻
 甜。清明插楊柳。白露蓄葭蕪。碧水畦邊曲。青山屋後尖。豚啼操物眇。秉穗愜心慙。湯旱今無睹。堯天幸
 戴瞻。四方猶帶甲。萬物未離燠。帝力終難泯。時宜預可覘。南山蕪稗莠。北闕待榷榘。郢曲非能調。巴音
 願受砭。長吟任青白。寄慨在黎黔。與袁堂詩集一

車兒行

西風古道黃埃起。隊隊行裝逐鞭弭。好男好女是誰家。何處驅來若羊豕。鄉音啞啞不成言。齟齬悲啼孩
 稚喜。車兒載入營中去。從此耶孃千萬里。與袁堂詩集五

浮屍行

兵戈與徭役。橫死固其宜。歎彼遺屍者。浮沈江之湄。鳶鳥集背競啄肉。鯁魚噬腸下穴腹。敝衣猶見藍縷

青。可憐不蔽顛與頤。天覆地載耶孃生。止充一嚮飽水族。問汝民耶卒耶乞丐耶。死於饑寒疾苦刑法耶。汝有齒舌不能對。使我悲傷發長嘔。世亂民窮死多端。殘黎身命緣上官。有罪無罪皆陷溺。死者已矣生更難。水魄風魂浩無主。難向家人訴淒苦。一靈飄泊逐波臣。殘骸散漫隨漁罟。江河滔滔日下流。吁嗟靡屆還靡瘳。生其倖免死應爾。彭殤那得爭春秋。明明上天。照臨下土。求民之莫。羣生良苦。急望天心轉物情。干戈休息稅斂輕。水中鯨鯢。山上豺虎。世間官府。勿復相率來食人。水深火熱云小補。與袁堂詩集八

贈吳葛如大將軍

翹首粉榆望斗勞。將軍祖籍海軍相逢喜氣洽投醪。雄圖報國雙龍劍。素業傳家一兔毫。將軍出身諸生。長耶孝廉。日暎牙旗迴組練。風梳雲錦散餘駒。書生舊是參軍客。長揖轅門笑縵袍。與袁堂詩集九

雄州店家歌

十五年前投此宅。宅旁左右無人迹。家家燕子巢空林。伏屍如山莽充斥。是時雄州城始開。魚鱗萬屋飛成灰。殺氣橫天昏白日。陰風吹火起黃埃。死者無頭生被虜。有頭還與無頭伍。血泚□土掩紅顏。孤孩尙探孃懷乳。賈商裹足空市廛。焦茅赭瓦餘青烟。我提一劍逆旅宿。主人對語淚而漣。物換時移風鶴定。上游漸復稱繁盛。橫浦關頭馬似龍。凌江渡口帆成陣。有時將軍擁纛來。勢如轉岳聲如雷。莖藟扉履供億急。鞭撻長吏同輿臺。有時臺使坐大府。面如寒鐵威如虎。郊迎廚傳劇沸湯。借帑傾筐充阿堵。紛紛輪蓋此經過。十郡咽喉儼織梭。轆轤攜載山前去。不是朱提是紫磨。明珠文犀白象齒。一囊價傾五都市。陸賈

千金浪得名。南塘一出安能擬。夜來嶺上走窮奇。紫薇垣暑兼鳩司。一口吸空珠海水。三重捲去越地皮。眼見輜裝塞川陸。丁夫五千遵行速。召南昔日愛厭棠。嶺表今思食其肉。餘者東西南北人。計然不草一聲倫。風波身命牙籌手。三倍經營良苦辛。別有生涯關區媒。朝遊郡邑暮謁臺。殘膏冷炙頗沾足。敵裘垂褫詎速迴。人奴廝養多奇遶。乘車入幕騶長袖。割通抵掌動諸侯。卜式雄貨厲列宿。五鼎何辭主父烹。百金雙翅翔虞卿。赫赫華簪半羊胃。翩翩珠履盡雞鳴。富貴倉庾財祿海。寶山一任人樵採。山童海竭祝融愁。殊方充飮此方餒。越禍東南大都會。□□□相襟帶。火米重收等稗蕘。洋風洊泊饒排貝。民生照攘樂事多。寶篋貢賦遵條科。昊天降割此疆土。虎狼載路驅兵戈。敲骨擻筋還吸髓。牙遺箇箇成瘡痕。征求括地及捕虵。罪罟彌天總羅維。田園賣盡到祠堂。人鬼號咷走異鄉。鄭俠監門空作繪。聳叟春陵只自傷。僕本東吳釣鰲客。從戎久墮龍蛇厄。綵毫零落耗蠻煙。熱血輪困化寒碧。請纓憶昔指炎荒。珊瑚叱撥何飛揚。遊梁枚乘年正少。參軍孫楚意差強。一朝雙折搏風翅。斥鴳啾嘈柏侮戲。羞避長門買賦金。淚濕昭陽守官臂。當年刀筆氣橫秋。日皎霜清瘴海流。孤憤詎許因人熱。百鍊寧容繞指柔。吁嗟逼側還逼側。闔闔茫茫黯兩極。巴里翻嗤白雪非。道邊誰惜冰絲直。歸歎襍被來扣關。非復前此之朱顏。徒有壯心誇舌在。屈首低眉時命慳。居亭重訪舊時門。主人已死今其孫。知余宿昔棄繻者。燒鐙酌酒多寒暄。爲言來往皆金紫。君胡一寒尙如此。吾豈甘心金紫仇。金紫所爲寧餓死。夜闌月黑悲風頹。主人咄咄客罷杯。長歌不灑步兵涕。聊爲東方一告哀。

與袁堂詩集十

陳奕禧 春藹堂集十八卷

陳奕禧。字謙六。號子文。海寧人。由太學生官安邑縣丞。擢知深澤縣。入爲戶部主事。歷郎中。出爲石阡府知府。改補南安府知府。卒于官。年六十三。事具清史列傳文苑傳。此集刻于康熙四十六年丁亥。一至二卷香泉小稿。爲戊午康熙十年官安邑以後之詩。香泉者。戊辰康熙十七年知深澤時。飲甘泉作深州香泉記。因以自號。三至六卷含香集。爲甲戌康熙十三年入官戶部以後之詩。七至十二卷樂回集。爲甲申康熙十四年出知石阡至丙戌康熙十五年告歸之詩。樂回石阡江名。將欲往而期于回。故以名集。十三至十八卷爲雜文。多碑帖題識。奕禧書名蓋一世。所書碑板。照耀四裔。嘗奉召入南書房賦詩作字。又命鈔賦。雍正時。勅以其書勒石爲夢墨樓帖十卷。當官有治績。詩格風流。皆爲書名所掩。世且不知其工畫矣。少以斜日一川沂水北。秋山萬點益門西句。受知王士禛爲弟子。故其詩頗得漁洋神韻。自注多軼聞舊事。辛未康熙十年八月朔。眞定相國卒于位。悼詩四章。其三云。廿載典樞還舊省。注云。康熙五年。巴都公赦拜。與公不協。以大司馬自陳革職。赦拜敗。上特還公原官。居本兵前後二十年。張登旅次。步吳天章家草之絕句韻。其二注云。京南草堂。草之別業。嘗讀書其中。癸酉康熙十二年七月二十一日。自保定回。張登旅次。有吳天章及家草之題壁二詩。一見慰懷。卽步其韻。他日天章草之再過。又當色喜。必復有作。却成一段故事也。天章詩云。三年抱犢山中住。我亦香泉兩月停。破冢不須求筆法。牙籤親檢翰林經。草之詩云。與君自是一

家人。筆墨尋來義倍真。不料張登詩在壁。喜狂喚落滿頭塵。予庚午康熙二十九年過此題壁云。重巖高隱會天機。隸體精研入道微。上谷我思王次仲。翻山袖舉白雲飛。章之所題蓋指此詩。香泉在深澤城中。予自署香泉翁。己卯康熙三十八年七月十一日。恭呈皇太子紀恩詩十六章。注云。駕出便門。臣奕禧跪迎道左。皇太子下馬問是何官。臣答是戶部員外。皇上特點開河運糧大通橋監督。又問是何姓名。臣答是陳奕禧。皇太子笑曰。原來是汝在此麼。卽向隨侍諸臣曰。此人最善書。我有他的冊頁。又云。上命皇太子讀性理。故睿製集中有性理排律三十韻。丙子康熙三十五年春日燕臺雜詩。注云。宣武門內天主堂爲西洋修曆人建。西有自鳴鐘。東有音樂樓。樓中暨錫管大小長短二十餘。每時正刻。風起而樂自奏。又云。濟寧居在暢春園中。百官奏對之所。自濟寧居登舟。洲嶼環曲。林木鬱葱。儼若深山幽谷中。始達淵臺齋。齋中列圖書古玩。甲申康熙四十三年十月。聞少司寇丙齋兄罷官却寄。注云。以王天相吳謙事。與大司寇王新城夫子並去位。又滇行詩云。滇中衙舍皆拆吳逆臺殿所修。或卽其親屬鎮將公廨改建。由開滇以來。七省協餉。俱解藩邸。十四年積聚。且叛逆僧號者八載。故其營造。備極華侈。今雖移置。然富麗實甲于直省。又云。吳逆王邸在五華山菜海子之西北。填海子之半以成。後踞高坡。而前半低窪。爲城中最卑下之地。不識當時何取。海子一名九龍池。或有樂于此乎。文非所長。殊少合作。盧中丞行狀。奕禧與盧震子詢同官。且皆范文程家戚屬。故述之極詳。稍足備清初故實。

丙子春日燕臺雜詩

西華門裏打街嚴。無數行人避斷垣。後日親征期已定。乘輿歸自暢春園。

獨飯年年降旨頻。而今又奉詔書新。復租井及羈愁者。應見熙熙四海春。

二月卅日定期啓行。廿七日子至西華門。適遇打街。遂避光明殿。舊黃旗。積累年以來。各省俱蒙免賦之恩。種累頓清而水旱之地。又加開倉賑濟。民無流離之苦。今將用兵。復奉大赦。寬其舊逋。盜犯及小罪。其內外官非以屬私繫獄者。悉行超宥。

六千五百兩車多。二萬餘頭計馬騾。三省中丞均派出。不教州邑數偏頗。

鐵衣裹體厭輪囷。綿甲裝成逐隊分。噉火不穿飛鏑落。十行儼列水犀軍。

乘以舊袖包頭細縫。厚如皮革。

朝臣有旨許從戎。奏績歸來始敔功。珍重君恩思効力。西曹張宋兩郎中。

捐馬駟駱駝。自道府部以下即用。層累可得。宋主事亦捐郎中先用。在朝漢官運米者惟此。

綠野雖閒十載身。普天誰敢避辛勤。須知協餽三軍餉。更有調和一老臣。

運米事行。大治故相至京師。已七十三。大有所助。暫居都下。外官現任者。如直隸巡道許兆麟。江西糧道蔣興邑。河南開封知府曾瑞忠。山東東昌知府侯居廣。山西平陽知府王輔等。丁憂安徽按察使劉懋。原任天津道朱士傑。及候補候選革職贖罪開列大小文武各官四百員。分三萬餘石。每車裝正米五石。料豆二石。餘米三石。並帳房鍋飯各物。分爲廿七撥。隨春露堂續進發。集大

菜海子

雨雲翻覆事無窮。不信繁華且暮空。堤柳似含啼眼碧。渚蓮未褪舞衫紅。拋殘苑囿斃蔬圃。拆盡樓臺造

梵宮。獨有浪遊人過處。吟蟲唧唧冷西風。
二日飲於楊別駕。其書屋即吳逆西宮。西面紅牆猶存。下有地道二。自宮外內達城下。引水爲池。池中築臺疊山。山前通橋。以出殿庭。則正門矣。今池中尚有積水。

餘皆作首 春篇堂
稽團矣。 集十一

陳元龍 愛日堂詩二十八卷

陳元龍。字廣陵。號乾齋。海寧人。康熙二十四年進士。入翰林。官至文淵閣大學士。乾隆元年卒。年八十六。諡文簡。元龍以善摹董書。受知聖祖。初與徐乾學王鴻緒高士奇結黨。與士奇認爲叔姪。海寧陳氏。其先出于高氏。故自稱渤海。名其所刻帖曰渤海藏真。又以女妻乾學之子德秩。爲郭琇所劾逐歸。復起出爲廣西巡撫。入爲禮部尙書。富厚無比。園亭之盛。甲于東南。雍正初元。謫守景陵。後與尹秦同拜額外大學士。即協辦之始也。旋晉文淵。然世宗猶以廣西買糧一案苦之。追賠鉅萬。僕僕道途。僅乃寬免。及其予告。又令六部堂官祖錢。沿途官弁送迎盡禮。君臣以智數相御。其道良苦矣。撰愛日堂集。凡四集。曰敵帚集四卷。登瀛集一卷。却掃集一卷。環召集五卷。南陔集三卷。重徵集一卷。宜人集二卷。肆觀集一卷。還朝集二卷。蘭峪前集一卷。重臨集一卷。蘭峪後集二卷。黃扉集三卷。林泉集一卷。共爲二十八卷。不知提要何所見以爲二十七卷十二種。其詩未成家。鋪張恩榮。可謂頑鈍。然序與注多見當時之事。亦可資摭據也。

朱素培 歸自粵東旋將北上 枉詩留別依韻送之

詩史虞山老。箋疏析瑰奇。行囊珍拱壁。重訂削繁枝。落落無知己。便便可樂飢。刻成細帙貴。私淑未會

私。葉培新刻。愛日堂
山先生詩註 詩十三

朱嘉徵 止谿文鈔一卷 止谿詩集鈔一卷

朱嘉徵。字岷左。號止谿。海寧人。崇禎十五年舉人。順康之際。選授鉅州府推官。時大亂之後。居民離散。城中僅十餘戶。嘉徵一意招來。從四國回者百二十戶。從烏蒙回者千三百五十三戶。又贖難民十六戶。于是市井稍復。在官六載告歸。以著述為事。撰樂府廣序三十卷。妙年工詩。長益蒼勁。一門風雅。子若婦及孫三女孫一。皆能吟咏。為世所稱。卒于康熙二十三年。年八十三。事具黃宗羲所撰止谿先生墓志銘。有止谿文集二十卷。詩集三十卷。道游堂詩集四卷。川南紀游詩八卷。四庫存目未著錄。阮元輯兩浙輶軒錄。求之不能得。似皆未刻。羊復禮得其文八篇。詩百餘首刻之。嘗鼎一臠。可以知味矣。

哀三哀 三首 錄一

龍門後死者。曠世得談子。終老博士身。義風振閭里。礧礧臥江山。疎野氣味美。薄俗難使真。獨負蒼生恥。上下數千年。衡斷無與比。昭代十六皇。聖德繫泰否。蘭臺空汗青。名山正時紀。較讐魯魚編。直篇董狐史。甲申逢世患。徒步闕廷死。去列幕府雄。氣橫建業水。仗劍履閭關。畫河且高壘。責我義公徒。破家存國祀。悔不用公言。偷活溝壑耳。生歌平陵東。邱首高風起。

處士談 止谿詩 孺木選 集鈔

穀日歌

八日晨光射我屋。鳥喜新晴喚播穀。幽人曉起看農書。儉歲之穀豐年玉。憶昔昇平大有年。市上斗米贏百錢。雞犬自依門巷入。老人兒啼嘗醉眠。天下風俗亦淳樸。服食不淫器不琢。上供并稅得寬饒。長吏入門不夜捉。只今閩越庚癸呼。下瀨戈船杭舳艫。大率十鍾致一石。轉漕西楚東下吳。又聞府帖如羽下。軍興驛騷起中夏。新年賣絲兼賣犢。敲扑之令不忍罷。賣絲猶可寒無襦。賣犢誰畊原田蕪。吁嗟父老弗齒齟。今歲籌車定稷穰。君看日照東南隅。

止溪詩
集鈔

花朝雨嘆亥巳

花朝麗景春之半。江上老人坐花歎。前日芳林初蘸水。蕩槳如梭走馬看。看遍江北復江南。節氣暄妍三月三。東國二疏方解綬。河陽縣令始抽簪。相逢取酒臨花日。白露連朝暗江色。江裏流雲礎柱浮。天庭奇令豐隆得。殷殷透地竟天端。且釋七箸追遺歡。遂巡卻起占農歷。傳道春雷十日寒。果然大澍及停午。餘花雪片沉泥土。又聞花朝愛早晴。不爾連宵十二雨。況復雨纏春甲子。家家麥濫秧萎死。只今郡國傳點兵。役夫馬穀人夜驚。溼花倚樹悲落去。厭窺芳草天涯青。青青柳帶沾江岸。寒雲淅淅風吹斷。騷人縮頸撥爐紅。思婦凝眸心曲亂。故人薄宦到并州。近戍邊城東海頭。仲春草木肅然秋。江上花枝爲誰好。空階夜雨攬人愁。

止溪詩
集鈔

查慎行 他山詩鈔敬業堂詩集五十卷敬業堂續集六卷

查慎行。字悔餘。本名嗣璉。字夏重。晚號初白老人。海寧人。少學文于黃宗羲。受詩法于錢秉鐙。與朱彝尊爲中表兄弟。得其獎挹。聲名漸起。屢試不第。康熙四十一年荐試入直南書房修書。翌年成進士。尋授編修。所假歸。性不諧俗。有文愷公之目。假滿宦者進議。有毋庸入值之命。遂告歸。雍正五年。弟嗣庭以誹謗成獄。慎行及弟嗣璫。舉室赴請室。嗣庭瘕死戮尸。嗣璫戍陝西。慎行得放歸。初慎行嘗繼吳兆騫授明珠之子授敍讀。授敍附廉親王胤禮。謀奪嫡甚力。世宗命于其葬所鑄石不忠不孝柔奸陰險之墓。乃獨寬慎行。或故示不測歟。南歸後未一月卽病卒。年七十八。事具清史列傳文苑傳。撰他山詩鈔。卽慎旂初集。爲十八年入黔五年間之詩。慎旂二集爲二十二年入贛之詩。卽刻于是年。敬業堂詩集分五十三集。總爲五十卷。爲康熙十八年至五十七年之詩。卽刻于是年。敬業堂詩續集。分七集。總爲六卷。爲五十七年至雍正五年之詩。刻于乾隆中。別有敬業堂文集。有傳鈔本。惜無人爲之刊行。詩學蘇陸。嘗注蘇詩。甚有體要。知其癡饋功深。古詩氣盛。律絕純以議論行之。然局度精整。格調老成。無生澀率易之病。自彝尊之沒。主持東南壇坫。後進咸歸之。卓然爲一大家。蓋無異辭也。

滇南從軍行

漢家納粟重輸邊。卜式才高逐貿遷。不是涅中甌脫地。何勞封事策屯田。

天地鴻濛儼再分。別傳科斗出奇文。就中機密無人識。惟見飛書入北軍。

敬業堂詩集三

禱雨辭

康熙歲辛丑。閏厄六月杪。五行火息水。金氣鏗原燎。號萬性不齊。可憐羣就燥。焚如到松竹。況乃灌漑草。薪爇等摧殘。庖廚助煎燭。井枯池亦竭。是處開龜兆。瓢飲且維艱。腹枵詎易飽。苗田溥斯害。立作棲苴稿。民病思下泉。吏才貪上考。方徵晉陽絲。肯藉琅玕稻。吾寧忍聽睹。獨臥憂悄悄。巷北走里巫。門前來野老。紛紛聚其族。愁嘆際昏曉。或云堯湯年。七旱九水潦。周官列荒政。六祝五曰禱。村中有神社。禪自唐宋肇。曷不往乞靈。庶登稼穡寶。杖藜隨伴出。趁此星月皎。敢此衣涉露。翻覺沾溼好。古廟散羣鴉。荒庭無汛埽。片香倉卒炷。覬徹星象表。土偶了不聞。吁嗟向晴昊。天門跌蕩蕩。赤日仍杲杲。感應理豈無。祈年或宜早。況聞兵猶火。早實兵所召。不見閩海疆。烽烟接窮島。出車當此際。虎旅正南討。兩邦封壤連。免幸輓輸擾。平情易地校。擇禍此猶小。歸各語兒孫。家貧善自保。世界苦人多。豐年古來少。

敬業堂詩續集二

罌粟花

投種記中秋。向榮及初夏。閱時嫌汝久。開眼迨我暇。穀雨初過旬。牡丹已前謝。繁葩相繼發。紅紫弄嬌妖。轉瞬三日中。流光激如射。紛紛豔質萎。一一青房亞。感此花得名。象形出假借。罌儲能幾許。囊括乃無罅。自從去年早。穀貴吁可怕。野人方忍饑。望爾甚望稼。謀生遠遠慮。是物貪速化。少待粟粒成。石鉢

付碾研。煎熬比牛乳。何有平燔炙。撐腸或無力。養胃庶有藉。此法勿輕傳。吾將高索價。敬業堂詩續集二

重陽前四日沿海隄入邑城道中感賦

愁臥閱十旬。閉門何所之。今晨偶爾出。目觸中心悲。海霧一氣黃。秋陽敵炎曦。黍苗稿既盡。禍及菘與蕷。有如經戰地。顛倒橫僵屍。果然周餘民。慘慘靡孑遺。赴死聚百族。偷生無一機。曷不呼彼蒼。天高聽宜卑。傷哉莫以告。造物非不慈。田間老禿翁。罪歲微有辭。身謀良自拙。追恤斯人飢。敬業堂詩續集三

七月十九日海災紀事五首

門前成巨浸。屋裏納奔湍。直怕連牆倒。寧容一榻安。卑憐蟲窟掩。仰羨燕巢乾。海闊天空際。誰知寸步難。

借穿殊少屐。欲濟況無舟。我怯行攜杖。兒扶勸上樓。雞豚混飛走。鵝鴨亂沉浮。小劫須臾過。茫茫織室憂。

不有匏瓜苦。渾忘稼穡甘。奇災悲自擊。往事聽農談。高岸翻爲谷。窪居直似潭。連山浮島嶼。幾點戶東南。

驚魂招晷刻。沉氣晦連晨。身似乘槎客。誰爲裹飯人。滔滔方滿地。袞袞總迷津。久在人間世。徒嗟閱歷頻。

亭戶千家哭。沙田比歲荒。由來關氣數。復此覩流亡。痛定還思痛。傷時轉自傷。艱虞吾分在。無計出窮

鄉。敬業堂詩
續集三

三年來村家不種稻而種木棉頗擅其利今年間有因襲舊例者入秋風雨太多畝收失

望感歎成篇

木棉秋早實。經露復經霜。日給貧家口。年遭大戶糧。差宜沙雨潤。最忌海風狂。鄰有西成望。嗟嗟爾獨荒。敬業堂詩
續集六

查嗣璫 查浦詩鈔十二卷

查嗣璫。字德尹。康熙三十九年進士。入翰林。官至侍講。卒于雍正十二年。年八十二。專具清史列傳文苑傳。撰查浦詩鈔十二卷。嗣璫與兄慎行。弟嗣庭。先後官禁近。以詩鳴。嗣庭以非罪誅。闔門就逮。慎行僅得放還。嗣璫謫戍陝西。此集止于雍正九年辛亥。年已八十。似未生還。集中燕京雜詠一百四十七首。即明宮詞也。而詭異其名。以避網羅。亦可悲矣。嗣璫詩不及其兄之沈著。而才思不匱。盡絕浮響。亦自可傳。讀書似不甚多。所撰查浦輯聞。略無義類。視慎行爲遜。

道旁謠

莫打驢。打驢驢悲鳴。夜嚼一束草。日行百里程。驢兮莫嘆含豆貴。邯鄲草價騰十倍。

三六九。縣官給糧計身口。村東新婦未下堂。昨日隨姑出門走。道逢六親羞上前。誓守餓節歸黃泉。村西

大戶十圍腹。朝朝飽喫官廠粥。

夫削榆樹皮。婦捋柳條葉。門東踏榆兒夜泣。□□□阿翁一嚥三哽咽。土鏗自煮槐豆莢。查浦詩 鈔四

蠶月嘆

前簷後簷雨浪浪。句成蠶聲食葉如雨忙。大姑把蠶祝葉賤。戴勝降桑喚葉昂。俗云戴勝飛鳴則葉價貴三朝葉昂三暮賤。

吳楚喧爭幾攻戰。家家打粉充蠶糧。安得還汝錦繡腸。

雄飛角角小麥黃。村路曬絲作飯香。可憐二月已早賣。纔脫纛車抵徵債。西家婦勤兩月忙。滿頭亂髮如

絲長。東家婦嬌罷蠶織。髻學城中高一尺。蚤換柔紅晚蘸碧。查浦詩 鈔六

查嗣庭 雙遂堂遺集四卷

查嗣庭。字潤木。號橫浦。嗣璉弟。康熙四十五年進士。入翰林。官至禮部侍郎。雍正五年。以怨望譏刺死于獄中。仍戮尸梟示。有雙遂堂遺集四卷。首錄海寧州志文苑傳。謂嗣庭以隆科多薦得為內閣學士。又以蔡廷薦為禮部左侍郎。是時汪景祺之年號論。陸生柁之通鑑論。先後與文字獄。視嗣庭加酷焉。案汪以西征隨筆誅。不聞有年號論。又謂嗣庭子灑亦罹于法。而不及全家充配。其女題詩塞垣事。次沈守敬序。引山谷序謝師谷遺稿語。歎為芝焚蕙死。詞旨悲憤。謂已題其雙遂堂全集。近沈嗣叔收拾潤木殘稿若干篇。補全集之遺。末署乾隆辛酉賜進士出身順天武清縣知縣沈守敬撰。進士題名碑無其人。知是託

名。然則沈嗣叔亦未必真姓名矣。詩凡七絕一百九十六首。七律一百七首。七古十首。序兩篇。詩凡近不足存。且多壽詩及率爾酬應之作。論其工力視兩兄爲遜。唯除夕感事云。能餐白石家堪住。解作黃金吏待廉。語含譏刺。代皇子壽某云。柳色花香正滿枝。宮庭長日愛追隨。韶華最是春春好。爲近龍樓獻壽時。皇子與所壽者。俱不知誰某。玩宮中長日愛追隨一語。非椒房卽內侍也。交通宮禁諸王。豈能免于雍正之時。而況曾爲隆科多薦舉乎。乃知嗣庭殺身之禍在此。世傳嗣庭以試題遇禍。嗣庭兩主鄉試。癸卯山西試題。不患人之莫已知二句。宜民宜人句。子產聽鄭一章。三題皆平正。丙午江西君不以人廢言一章。日省月試句。山徑之蹊至茅塞子之心矣。則所謂怨望譏刺。若維民所止爲去雍正之頭。實齊東野人之語。停浙試亦止丁未會試一科。昔年曾見內閣大庫造送查嗣庭家一應書籍字札細冊。無雙遂堂全集之目。

讀素公南巡絕句爲補其未備十首存四

真珠一串選高喉。羅黑張紅被點留。知否不須三百萬。也蒙天子喚纒頭。

誰道林泉隔市闌。終南原只在人間。漢家可少求賢詔。爲語山人盡出山。

蕙歎芝焚事不同。賀知章口竟無功。歸來笑向旁人語。喜近天顏面發紅。

銷金轡首鑲金鑽。多少參軍語帶蠻。別有籠鞭紅騎入。一時攜手唱邊關。

雙遂堂集二

丁澎扶荔堂詩集選十二卷

丁澎。字飛濤。仁和人。順治十二年進士。官刑部主事。調禮部。十四年主河南鄉試。以罪廢。卒年無考。著扶荔堂詩集選十二卷。詩學晚唐。獨無擬古樂府。不盡依雲間矩矱。七律至四卷之多。最工此體。西泠風氣如此也。五古錄別八首。七律東郊十首。皆言遷謫事。怨而不怒。頗有蘊藉之致。七古風霾行。哀潼關。贈王鶴山給諫三首。有關史事。唯言周遇吉從孫傳庭死潼關。大誤。西泠十子中唯澎成進士。順治十七年^庚謫遼東靖安。五載始放歸。據實錄順治十五年七月。河南主考黃沁丁澎違例更改舉人原文作程文。且于中式舉人硃卷內。用墨筆添改字句。刑部議沁澎照新例籍沒家產。流徙尙陽堡。然則澎當以康熙四年放歸。錄別詩。有筋力日以衰。老至陞鄉里句。當已五六十矣。尙有老親。歸後甚貧。游食四方。亦足哀也。詩分京集。居東集。游集。雜集。首署李天馥許三禮編輯。分署輯者若干人。皆河南鄉試門生。或即刻于豫中。

聽石城寇白絃索歌

金陵寇白。本平康樂工女也。十三善爲秦聲。妙極諸藝。觀容纖飾。傾動左右。王孫戚里諸貴人。車騎填映斜閭。後爲故元勳朱公國弼采充後。屬樂伎。一時數坊名部。爲之寂然。迨金陵陷。沒籍入長安。尤工胡笳篳篥。宿所未試者。然憤懣不得志。而里中諸舊遊咸追慕。物色得之。屬其父廣募數千緡。贖歸故里。已流落十年所矣。姬每抱樂器爲予述舊事。恹然而悲。其音多闕塞之聲。哀繁怨韻。不可禁止。因譜爲歌以節之。

并錄樂部焉。

教坊新翻十二部。樂器特數箏琵琶。金陵寇姬好手指。亂撥驚風吹落花。自言生長秦淮里。家住朱門夾

流水。掛壁湘絃鵝管長。文窗畫鎖鴛鴦綺。崑崙琵琶李蕃笛。手揣心摩窮此技。春江三月可憐時。油壁青
驄夾道馳。燈前含笑嬌無語。月下聽歌出每遲。粧成自惜千金意。盡日樓邊折花戲。停鞭愛看張公子。挾
彈從遊寶車騎。侯家邸第填朱輪。斗量明珠不計身。舞袖長迴趙李座。歌管時傾鄆杜春。黃塵碧海多烽
鏑。粉壁雕簾芳寂寂。金縷能牽李綺愁。絳帷永抱韋郎感。代馬長嘶踏錦花。月明夜夜聞悲笳。隴頭風咽
蔡女弄。虎撥塵封穆護沙。都下喧傳禁中曲。玉手擲來絃柱促。五絃趙壁爲弟子。二十五聲隨調續。綠腰
軟舞銀甲紅。金絲瓊柱相磨碧。出破入破少嬋緩。大遍小遍無雷同。此曲傳言玉宸殿。回波簇拍紛難見。
錚錚細作金鐵鳴。絲絲散亂如飛電。翻聲忽變涼州徹。前若驚鴻後啼鴉。羅襪偷彈塞上塵。綠囊猶裹沙
場雪。十載關山得此聲。遷客愁聞淚嗚咽。曲終酒闌鐘漏稀。寒風白月吹滿衣。長安城高蘆管急。怪爾征
人歸不歸。扶荔堂詩集二

王益朋

清貽堂存稿四卷

王益朋。初名更。字鶴山。仁和人。順治十二年進士。選庶吉士。授吏科給事中。官至太僕寺少卿。康熙九
年卒于官。年六十一。撰清貽堂集。合詩文奏疏制義刻爲一集。其書久佚。從子琦注太白長吉二集有名。
乾隆中僅求得詩五十九首。文四首。合奏疏刻爲清貽堂存稿四卷。順治乙未_{年十二}丙申_{年十三}兩科庶吉士。
有未散館卽爲科道者。尙沿明初之制。益朋參松江提督馬進寶。與王命岳同號敢言。讀其參嘉湖守道官

靖共兩疏。參蘇松巡按王秉衡疏。大計糾拾疏。知是時官吏公然枉法贖貨。情節離奇。出人意外。草創之際。登用惟才。去庸急于去貪。所得皆善能窺伺意旨之人。其流弊往往似此。益朋詩音節道上。體製甚工。與孫治締交。嘗贈治詩曰。芳節秋猶勁。交情久更深。飲醇殊不厭。爲贈白頭吟。頗有古意。治撰序亦亟稱之。未第時。旅食四方。略見于詩。自後志在世務。不復措意聲律。故篇章甚少。然實能詩。

補鍋匠行

蜀中山川黝且曲。道逢山人騎白鹿。採芝餐柏往來閒。忽過瞿塘下魚復。魚復深深不可下。驅車還山入茅屋。雲橫草嶺榛棘間。青泥豺狼白晝逐。野人衣冠非漢時。誰謂桃源尙秦服。紆徐瘖鷲一老叟。補鍋擔負獨僕僕。時向山中覓舊遊。面餘淚痕體無肉。身上積垢時露肘。葛衣芒屨草中宿。姓名隱淪不可曉。問渠良久恒頻顧。去來秦蜀豈計年。故人往往聚林麓。喜得還山無俗朋。話舊那堪吞聲哭。金甌已破女媧死。聊從釜飴供微祿。清貽堂存稿一

沈峻曾 漣漪堂遺稿文一卷詩一卷附理言一卷

沈峻曾。字窺菴。浙江仁和人。順治十一年副貢生。卒于康熙二十七年。年五十有九。與毛際可林雲銘交好。詩文才或稍遜二子。而謹敕則過之。所撰漣漪堂遺稿文一卷。詩一卷。附理言一卷。即雲銘選定。文多序論。喜推盛衰倚伏之理。集中破甌翁傳。即自序也。詩只七律。且皆湖上所作。凄苦摧抑。讀之寡歡。

理言閱歷有得。而四庫提要乃謂頗近陳繼儒小品。何其昧昧。

賦懷

壯不如人老益灰。絕塵千里讓龍妹。研精未遂平生志。守拙全無入世才。仕宦早知爲外物。生涯一任所由來。三緘但慎金人口。任運浮沈不用猜。溧澗堂遺稿

戴 梓耕烟草堂詩鈔四卷

戴梓。字文開。仁和人。僑寓江都。康熙十三年。三藩之變。梓在康親王軍中。有巧技。爲製冲天炮。又造戰艦樹十五丈桅。事平。荐之入值內廷。賜官翰林院侍講。時荷蘭來獻蟠腸烏槍。立命梓造十槍賜之。其技更精。蟠腸烏槍者。形若琵琶。火藥鉛丸皆貯之脊背。以機輪開閉。其機有二。相衝若牝牡。擊一機則火藥鉛丸自落筒中。第二機隨之並動。石激火出而銃發矣。計二十八發。火藥鉛丸乃盡。始需重貯。梓子亨。康熙辛丑^{年六十}進士。紀昀猶及見之。爲昀言如此。梓好與西洋人爭勝。南懷仁造冲天炮。一年不成。梓以八日成之。又造法瑯器。五日而成。與徐日昇議律呂不合。皆慚憤。共侍衛趙某比而傾之。中以他事。徙藩陽。鬻書畫賣文自給。常冬夜擁敗絮臥冷坑。凌晨踏堅冰入山拾榛子以療飢。如是者三十餘年。沒于雍正四年。年七十八。子孫遂爲鐵嶺人。事具金兆燕所撰耕烟老人傳。有耕烟草堂詩鈔四卷。皆謫居之作。詩筆甚健。胸有奇氣。不可拘以繩墨。至不識唐人所謂長句爲七言律。然一時同謫者。若陳夢

雷。若江黃。若李蟠諸人之事。皆略見于詩中。所謂佳公子不知何人。或陳之遴子容永乎。

猛虎行

頭如堅城尾如纛。擡頭揚尾晴光燭。天風從擁出長林。一聲高吼搖山谷。猛虎食人不食鹿。居人戶戶編毛竹。竹如利刃列成城。一跳曾經洞虎腹。縣官昨日吏胥來。坐向牀頭索酒肉。稱言今歲納糧難。官止收錢不收粟。舉目周瞻四壁空。兩歲嬰兒難賣鬻。丈夫被吏牽見官。妻兒坐向窮簷哭。耕煙草堂詩鈔一

七十自壽

戊戌十月三日

一讀遼東三十年。痛深丘隴隔遙天。身存却是君恩厚。命舛非關世態偏。風截陣鴻還挺鬪。霜摧叢菊尙舒妍。老夫此日猶能醉。自聽餘生不學仙。耕煙草堂詩鈔四

湯右曾懷清堂集二十卷

湯右曾。字西崖。仁和人。康熙二十七年進士。入翰林。官至吏部侍郎。兼掌院學士。以多言多薦人罷侍郎。留掌院。六十一年卒。年六十七。世稱右曾爲詩受王士禛之傳。與朱彝尊相繼。主持浙中詩教。凡數十年。實則右曾少著才名。吐屬輕倩。壯歷四方。詩境益進。早受徐元文兄弟之知。與李光地不廢周旋。同于韓莢。其識揆敘。當由查慎行唐孫華引進。非不近勢利者。而不能登八座。則就詩縱酒。損其官且損其詩。是又胸襟才氣限之。

莽式歌

莽式者樂舞之名也。歲以季冬練習禮部。略如古者百戲之屬。甲戌十二月十四日。余得寓目。乃爲作歌。

季冬臘日烹黃羊。儼翁侏子如俳優。嘖拳雜伎鬧里社。細腰疊鼓喧村場。太平有象自廊廟。五兵角觝修總章。春官都試平旦集。萬人聯袂東西廂。南箕北斗供摟撻。繁絲軋竹同清揚。鬪驚出林吼虓虎。很訝當道蹲封狼。劃然忽變戰場態。金戈鐵馬聲鏘鏘。左旋右抽嫻進止。先偏後伍紛低昂。弓彎不射刃不斫。徐以一矢定寇攘。髣髴觀兵耀德意。詎止武力夸多方。卷鞞鞬騰起上壽。千年萬年歌未央。昆明池頭夾棚路。洛陽樓下列炬光。麟洲小水跨鴨綠。九部亦得諧官商。紫羅帽邊插鳥羽。絳抹額上搖金鏡。輕身似出都盧國。假面或著蘭陵王。盤古筋斗最奇絕。如電礮星光芒。解紅俄作小兒舞。文衣綵縵顏靨霜。戲馬闌邊身便旋。鬪雞坊底神飛翔。踏歌兩兩試燈節。秧鼓面面照春陽。牽絲底用魁礮子。阿鵲雅擅籛條娘。雙童夾鏡技渾脫。晚出絕藝驚老蒼。弄丸一串珠落手。舞劍百道金飛鋌。我聞殿前陳百戲。緬昔制作傳漢唐。魚龍曼衍雖技巧。亦與民物關禱祥。賜酬懸知俗安樂。拔河爲卜年豐穰。只今殿廷虞懸備。兜離僣佞咸賓將。鳴球拊石洽至德。散樂亦預鈞天張。恍從輜軒採謠咏。正以鞦韆懷要荒。書郎羸馬久憔悴。乍與鮑老同顛狂。爰居縱駭鐘鼓響。舞鶴自應參差行。千周萬市狀倏忽。舌捕目眩心蒼茫。作歌形容莫究悉。竊喜六律調歸昌。

懷清堂集五

送曹峨帽先生南歸

頭顛弘景尙嫌遲。六十狂生笑食其。種豆山南亦行樂。丹徒長憶布衣時。

懷清堂集九

朱曹禾官祭酒。康熙二十八年被劾。不悉其故。玩此詩種豆山南句。用楊惲事。乃知其以文字刺譏獲咎也。

沈近思 天鑒堂集八卷

沈近思。字位山。號闇齋。又號俟軒。仁和人。康熙三十九年進士。由臨穎知縣官至左都御史。卒于雍正五年。年五十七。事具清史列傳大臣傳。杭世駿端恪沈公神道碑銘。近思以理學著名。多所撰造。文學非其所長。有天鑒堂集八卷。汪景祺查嗣庭事起。近思疏論浙省積弊十事。其約束紳衿者。生員舉貢如有哭廟擡神等事。除將本身嚴加治罪外。其餘同黨之人。悉行褫革治罪。生員妄遞條陳。及連名公呈。俱以褫革治罪。士子逢迎權貴。刊刻詩詞歌賦。以爲獻媚進身之階。更有造爲淫詞小說。除追板劈毀。將本人褫革治罪。如無職之人。枷號示衆。鄉紳說情。凡有片紙隻字囑託求情者。有職銜官即將其職革去。如已革職者。將本人枷號示衆。紳衿犯賭者。即行黜革照例治罪。豪富之家。暗養打將。船埠橋埠。各有棍徒雄霸。以強欺弱。以衆暴寡。更有串通旗丁。威嚇鄉里。偶有睚眦。即肆行打降。破門毀瓦。污辱婦女。須將爲首爲從之棍。照律嚴加治罪。得旨十事切中情弊。照所請嚴行禁約。乃知明季風俗之弊。顧炎武所爲發憤而作生員論吏胥論者。經清初禁社盟。肅科舉。行奏銷。大興史案哭廟通海諸獄。所以抑制之者無不至。而俗終不改。及雍正觀風整俗。百年之弊始革。其端乃發于近思。然士氣亦自此挫折殆盡矣。

憂旱

向夕長風起。長風無息時。孤雲獨無依。不知竟何之。開荒南野際。草盛荳苗稀。炎火屢焚如。舉目情悽
愴。民生鮮常在。疇昔苦長饑。菽稷隨時斃。奈何當復衰。天運苟如此。天豈去此哉。人事固以拙。當復何
及哉。神力既殊妙。遠望時復爲。鬼神茫昧然。何以慰吾懷。天鑿鑿
集六

王 錫 嘯竹堂集十六卷

王錫。字百朋。仁和諸生。康熙四十六年。嘗應南巡召試。撰嘯竹堂集十六卷。卽刻于其時。沈德潛選清
詩別裁偶得其集。謂足與西泠十子匹敵。而歎其漸就湮沒。自後吳顥輯杭郡詩輯。竟不入錄。朱彭爲阮
元撰兩浙輟軒錄。乃再得此集。錄德潛所未及選者。自康熙下逮乾嘉。不及百年。而其集難得如此。其詩
才華吐豔。爲西河竹垞所賞。自是一時作手。然交游未廣。多應試之作。去取尙有可商。德潛稱譽。嫌其
稍過。倘掇其精英。去其浮采。豈不卓然可傳乎。錫爲西河高足弟子。西河合集卽其所編。載錫撰傳贊一
首。當自有文集及他著述。今不可見矣。

哀海賈

海水真不測。終古長滔滔。怪異或出沒。濁浪排天高。吞舟多長鯨。載山有巨鼉。胡爲爭利者。涉險營錢
刀。貨重於岱嶽。命輕若鴻毛。一旦葬魚腹。陰雨聞哀號。旣無鴟夷怒。空學精衛勞。牽車可服賈。何必馳

風濤。每見前船覆。往來仍千艘。嘯竹堂集三

難婦曲

七閩烽火照三衢。貔虎桓桓卷甲趨。鉦鼓震天逃士女。干戈滿地斷樵蘇。將軍戰勝歸營早。縱轡沿途掠金寶。覓得紅裙笑擁來。蹙損雙眉愁不掃。今日中權獲麗人。明朝前部索傾城。後先馬上纍纍負。淚濕羅襦無哭聲。風鶴忽遶淝水利。蔡州雪夜擒元濟。捷書奏凱詔班師。窈窕辭鄉共悲涕。婦戀良人母念兒。更多弱女憶嚴慈。曉風野店雞鳴處。夜月寒江猿嘯時。白刃幾傷蜀主妹。黃金莫贖蔡文姬。音書豈爲關山阻。生死難教魂夢知。聖代折衝在櫓俎。昇平焉用輿師旅。亂離最苦是朱顏。倚柱休嗤漆室女。嘯竹堂集五

毛先舒 選語八卷小匡文鈔四卷稚黃子文泚一卷思古堂文集四卷東苑文鈔二卷蕊雲集一卷晚唱

一卷東苑詩鈔一卷鸞情集選一卷

毛先舒。字稚黃。一名駉。字馳黃。錢唐人。諸生。旋棄去。卒于康熙二十七年。年六十七。事具清史列傳文苑傳。所撰文有選語八卷。小匡文鈔四卷。稚黃子文泚一卷。思古堂文集四卷。東苑文鈔二卷。詩有蕊雲集一卷。晚唱一卷。東苑詩鈔一卷。詞有鸞情集選一卷。先舒少受知于陳子龍。許以能文。爲作歌景樓詩序。長與柴紹炳相善。同訂西陵十子詩選。故文名甚著。爲文善持議論。所涉理學佛學音韻皆有闡發。選語中兩與顧炎武書。爭禮部韻略卽唐韻。與魏禧書。爭李國楨實爲死節。又書禧題王氏文後。爭不當

以賈誼葛亮許王安石。皆嫌近名。其他翻案。多不能使人心服。性惡小說。有止友作傳奇書。又說史謂士大夫輒取三國演義諸書。皆娓娓以資談塵而助行文。將來或有取西游水滸事。補入史書。而以琵琶曲傳入中郎文集者。蓋爲金人瑞諸人而發。集中少紀事之作。唯小臣文鈔有毛太保公傳。敘毛文龍戮于崇禎二年六月五日。年五十四。載屯田主事徐爾一爲文龍疏辨。足備參考。餘則傳聞失實。有屈殺君一刀。他日償君百刀語。極可笑。其詩一宗初盛唐。別以摹六朝者爲蕊雲。摹溫李者爲晚唱。嘗著詩辨坻四卷。論詩極精。舉詩戾凡十有七端。深以譏刺爲戒。故所作篇章。不涉時事。可謂善于自全者。他著刊行者十餘種。在十子中爲最幸。一生不出里門。晚居東園。卽宋之東苑。惲格賣畫養親。世稱高潔。每至錢唐。必主東園。自號東園客。則先舒之賢可知矣。

岳墳

鄂王祠廟大湖西。大樹蕭蕭向古堤。合殿氤氳生碧瓦。孤亭苔蘚落紅泥。露流古檜銅人泣。秋老深松石馬嘶。解得南枝何限恨。六陵殘處鷓鴣啼。東苑詩鈔

高士奇 清吟堂全集七十三卷

高士奇。字澹人。號竹窓。錢塘人。康熙初由監生供奉內廷。賜第西安門內。十七年。以典密諭詩文勤勞賜金。屢官至詹事府少詹事。與徐乾學王鴻緒結黨。攬權納賄。爲都御史郭琇嚴劾。休致回籍。三十三

年。再值南書房。三十六年告終養。擢詹事。四十一年再起禮部侍郎。未赴官。是年卒。年六十。諡文敏。撰清吟堂全集七十三卷。爲城北集八卷。始康熙四年迄十七年。苑西集十二卷。始十七年迄二十八年。歸田集十四卷。始二十八年迄三十一年。獨且集八卷。始三十一年迄三十三年。清吟堂集九卷。始三十三年迄三十六年。蓋自康熙四年至康熙三十六年之詩。共分此五集。下距士奇之卒。七年間。不應無詩。豈未刻歟。其曰隨聲集十卷續集一卷。經進文稿六卷。皆應制之作。附以竹窗詞蔬香詞各一卷。扈從東巡日錄二卷。扈從西巡日錄一卷。大凡七十三卷。他所撰述。有左傳紀事本末。春秋地名考略。天祿識餘。金齋退食筆記。北墅抱瓮錄。松亭行紀。江邨銷夏錄。塞北小鈔。皆不在全集之列。士奇才華膽敏。詩文各具體格。詩中自注尤足徵一時掌故。進身之始。清史列傳但言由監生充書寫序班。供奉內廷。授詹事府錄事。獨且集自述則謂康熙三年年二十。北上賣文自給。八年入太學。十年蒙御試第一。書寫經筵講義。十一年召對懋勤殿。十四年設詹事府。特旨補錄事。十六年擢中書。二十九年擢翰林院侍講。童槐過庭筆記云。士奇未遇時。爲人書禁門內關廟扁額曰天子重英豪。駕出偶見之。賞其雅切莊重。書法亦佳。遂召入供奉。事或有之。他書言其賣卜爲索額圖奴子師。得進于索。則爲稍過。獨且集偶憶詩云。坎軻年少旅京師。草土餘生金盡時。謂其所積頗厚。爲親友誑負。似隨其父入都。父沒即葬西山。城北集旅懷十首。有懷江村草堂。懷外舅園林。似非甚貧者。祇以遭逢過奇。攬權過甚。指摘之者。唯趁毒口。卽郭琇劾疏所謂出身微賤。徒步來京。覓館爲生。亦未盡得實也。

題倪文正公畫冊

倪鴻寶先生文章氣節。焜耀天壤。其畫世不多見。偶得七幀。意致閒曠。筆畦墨裡外別有天趣。所謂跡隨意淡。非學者所可及。

山抹青蛾水漾鱗。墨痕疎澹不由人。毫端別自開家法。肯與襄陽作後塵。

冊中有清吟堂變米法集二

苑中侍直和樹峯祭酒韻

禁園趨走小東門。

暢春園正門南向。東則小東門。再北為大東門。又北為悟嵐庵側之北東門。都院籍臣奏事入小東門之內。即瀟寧居聽政之所。居後額松軒凡五層。西隔小溪。崇岡茂樹。陰森鬱鬱。過橋有遠香亭。水多白蓮。山半小亭名蒼然。前

植芍藥。近北有龍王廟。在水側。

絕域言辭細譯翻。尊信文殊今聖上。遠人愚悃亦堪存。時用漢字譯西域土白特王語巴夷。稱我皇上為文殊菩薩皇帝。集九

顧永年梅東草堂詩七卷

顧永年。字桐村。饒唐人。康熙二十四年進士。官平涼華亭知縣。先是董訥官漕運總督。永年在幕中。傅拉腊為明珠報仇。以訥與郭琇黨比。欲借永年以撼訥。永年以一身任之。康熙三發遣奉天。居五年。康熙十後詩為梅援囑爾且軍前運糧草例。始得釋還。自後以文字游四方。先刻長慶堂集已佚。乃輯戊午七年東草堂詩七卷。以紀哀詩二十首見稱于姜宸英。謂為漢魏之音。餘多學白蘇。不免率易。然有氣局。永年少從陳祚明學。長受知于王士禛。游粵時。罄囊資以刻祚明古詩選士禛居易錄。為人所難。

次兒棟代運北征四首錄三

子丙

天子方自將。臨邊極西域。一揮百萬師。滅此而朝食。轉餉出關中。士不苦饑色。我沐浴蕩恩。顧竭疆場力。馬革可裹尸。行行何所怵。忽聞先慈訃。一慟氣欲塞。四體軟如綿。性命在呼吸。官符火速催。同伴相

促逼。有兒立身旁。垂頭但哭泣。長跪前致詞。此行是兒職。巾幗且從軍。鬚眉寧弗及。結束棄儒冠。弓刀親自執。躍馬去無踪。路旁心惻惻。望眼遠莫窮。吞聲獨歸宅。

生兒廿歲餘。教養無一善。既失阿母歡。父亦罕見面。寒不曾煖衣。饑不曾飽飯。雖負讀書名。誰與給筆硯。所生尚如此。何況疎與遠。兒命本來窮。父又遭譴遣。徒步出長城。三載忘其倦。方喜共生還。誰料復征戰。禾黍或不登。奠稗時亦薦。乃知秋實成。不在種貴賤。

我居遼東西。三月冰尚涸。沉涉漠北庭。草木萌未吐。千里擁流沙。馬嘶不敢渡。朔風畫悲號。黃塵蔽欲暮。所仗童僕親。苦與樂相顧。小心事長官。莫更逢其怒。汝當少壯年。風霜非所慮。所慮情性疎。未必諳世故。出門盡荆榛。有罪孰肯恕。豈乏老成人。藥石語無誤。志不圖封侯。圖此骨肉聚。安得柴桑翁。歸來及早賦。梅東草堂詩三

卓九基履齋詩鈔一卷

卓允基。字次厚。錢唐人。康熙十七年副貢。父天寅字火傳。順治十一年貢生。擅詞章。著傳經堂集。明季杭州諸卓。盛著才名者。曰禹。曰爾康。曰發之。曰人月。曰回。曰天寅。皆有撰述。允基因得與諸先輩游。借邀名譽。冬夜懷人詩十六章。足見交游之廣。撰履齋詩鈔一卷。刻于康熙二十三年。詩尚清穩。前此有北征雜詠。未見。

烏戍唐枚吉年伯遠徙遼左垂三十年矣令子武雲入籍得售南歸風土覺凄其動異鄉

之感予適同舟下西泠驚喜之餘撫今思昔慨然有作

風拂長裙席帽斜。一童兩馬走黃沙。搔頭哭向關前望。家祭無忘折桂花。

乘得丟丟一短航。隨風順逆水中央。茫茫不識阡陌。反道歸來不故鄉。履實詩妙

王廷燦似齋詩存六卷

王廷燦。字孝先。號似齋。錢塘人。康熙二十年舉人。官吳縣崇明知縣。卒于五十九年。年六十九。撰似齋詩存六卷。廷燦及與孫枝蔚周容毛先舒陸嘉淑周斯盛姜宸英過從。故其詩肫摯而閒雅。自見工力。尤多紀事之作。自注甚詳。別撰同姓名錄八卷。乘槎偶紀一卷。嘗刻湯子遺書。及應搗謙周容馮道濟遺稿。不止好事。兼好義已。

謁萊陽姜先生祠

士爲國之楨。可殺不可辱。廷杖古所無。明法此最毒。懷宗本英主。求治苦太速。僉壬竊國柄。輔之以刻薄。長安黃金貴。都御史劉公有長安黃金貴疏中外資貪墨。姜公起東海。批鱗而削牘。殿上呼延齡。正言不局促。天子赫然怒。囊頭下詔獄。勺水不入口。冰雪凍僵仆。中夜片紙傳。幾作牢底觸。懷宗密諭竊撫司。姜採熊開元即取革命。衛巨賂養性執笑不從。劉金與馮吳。劉宗周。金光宸。馮元屬。吳麟徵。公論諍反覆。上心爲少移。下詔與之扑。朱衣列兩行。布兜肩下東。黃塵塞口鼻。

朝衣裹血肉。皇帝誠堯舜。臣為龍比足。舌強猶爾爾。浩氣終不惡。扶一百。上問大環二臣。願何言。曰二臣言皇帝堯舜。臣為龍比足矣。上曰。舌強猶爾。

近君子賢。力使絲命續。名醫呂邦相。以刀割創處。去敗肉斗許。七日而痛。半月乃愈。邦相曾活黃公道周。京師號君子醫。明年父死難。遙向萊陽哭。未幾盧杞敗。

微忠應見錄。天子賜之生。不忍還故國。寧不念首丘。思君豈從欲。一坏敬亭山。全歸畢忠孝。許大聞昔

有仁人。義不食周粟。又聞有貞女。裹髮守空屋。哀哉此孤臣。奇節今所獨。貪夫聞之廉。懦夫不齷齪。公

祠虎丘傍。祀典春秋肅。國士不可見。山青溪水綠。似齋詩存二

洪昇 稗畦集一卷續集一卷

洪昇。字昉思。號稗畦。錢唐人。諸生。有才不遇。康熙四十三年墮水死。年六十。事具清史列傳文苑傳。

撰稗畦集一卷。為自康熙初至三十三年之詩。續集一卷。則五言律也。其詩頗有寄託。時與貴游齟齬。唯

趙執信論詩相得。尤工製曲子。長生殿最有名。蓋譜順治中董鄂妃。所謂溫成皇后。而成獄則由黨爭。世

多不詳其事。觀于同時詩人所詠者。可以得其梗概。李孚青道旁散人集五偶憶洪昉思已康熙二被斥事。

即題其集後。詩作于甲午。康熙五知此時稗畦集有刻本流行。其詩云。奉勅填詞歲月多。飄零何處賭黃

河。六朝樂府平生熟。不記元嘉三曲歌。闕字疑是讀曲。指彭城王義康讀曲歌死罪劉領軍。誤殺劉第四

事。然則毛奇齡長生殿序。所謂應莊親王世子之請。作長生殿院本。為有旁證矣。其二云。長生殿比醉蓬

萊。桂子飄香是禍胎。即日杭城得歸去。保安十載轉堪哀。自注。用錢唐羅長史事。昉思亦杭州人。玩即

日歸杭城語。同斥查慎行仍留京師。知防思罪名。當是斥革太學生。且驅逐回籍。梁紹壬兩般秋雨菴隨筆謂其編管山西者誤。其三云。捶楚功名已放休。依然捫虱見王侯。網羅纔脫蛟龍窟。豈憶西湖是濁流。自注。防思與客飲湖上。中秋大醉墮水死。與清史列傳七十文苑傳趙執信附洪昇傳。謂道經吳興澤溪墮水死者不合。孚青與防思交誼極厚。其言當有據。趙執信懷人詩亦言飲郭外客舟中醉後失足墮水溺而死。與孚青說同。國卹演長生殿事。戴本茶餘客話一云。趙秋谷執信以丁卯康熙二十六年國喪。赴洪防思廡。觀長生殿劇。被黃給事六鴻劾罷。又云。聞黃給事由知縣行取入京。以土物并詩稿遍贈諸名士。秋谷答以柬云。土物拜登。大稿璧謝。黃銜之刺骨。故有是劾。按客話所言有誤。孝懿皇后之喪在己巳七月。趙被斥出京。在是歲十月。演劇當在十月以前。所謂國服雖除未滿喪。指二十七日以日易月而除服也。安得云丁卯國喪乎。演劇之地。清史列傳謂在查樓。卽今肉市廣和樓。國卹禁止演劇。必無在查樓之理。當以洪厲爲是。據六科題名錄。黃六鴻江西新昌人。順治八年辛卯舉人。由行人升禮科。轉工科掌印。題名列于康熙二十八年。必非新由知縣行取入都者。璧謝之說。當無其事。趙執信鉛山詩集十懷舊集自述云。非時演唱。觀者如雲。而言者獨劾余。余至考功。一身任之。褫還田里。坐客皆得免。防思亦被逐歸。是獲咎者只趙洪二人。然查慎行敬業堂詩集十竿木集序云。飲酒得罪。古亦有之。好事生風。旁加指斥。其擊而去之者。意雖不在子美。而子美亦不免焉。題趙秋谷官贊罷官歸益都。自注。時秋谷與余同被吏議。秋谷贈余詩。有與君南北馬牛風。一笑同逃世網中之句。客話云。徐勝力編修亦與讎。對簿時賂聚和班

優人。詭稱未與得免。都人有口號。周王廟祝本輕浮。也向長生殿裏游。抖擻香金求脫網。聚和班裏裂行頭。徐豐頤修髯。有周道士之稱。是執信所謂坐客皆免。亦未盡然。慎行謂意雖不在子美。飴山詩集四十金鵝館集上元觀演長生殿劇十絕句。自注。亦謂余以此劇被放。事迹頗類蘇子美。然則此獄明明一黨爭也。王澤弘鶴嶺山人詩集十寄洪昉思云。貝錦誰爲織。箝羅忽見侵。考功原有法。給諫本無心。又十送洪昉思歸武林云。性直與時忤。才高招衆忌。何期朋黨怒。乃在伶人戲。皆可作證。然致執信于理者誰乎。及讀飴山詩集五還山集感事二首云。碧山勝賞已全非。誰向西州淚滿衣。解職貴官能續命。可憐張傳枉知機。戟矜底事各紛紛。萬事秋風捲亂雲。誰信武安作黃土。人間無恙灌將軍。碧山二字。明指徐乾學。黃土則指其弟元文。乃知乾學與明珠余國柱相爭。而波及于執信。意不在執信也。先一年戊辰康熙二十七年乾學使郭琇劾明珠余國柱罷相。然明珠猶得交領侍衛內大臣酌量任用。勢未全圯。故欲借國郵演劇再撼之。洪昇集中有寄大冶余相國詩云。八口羈樓屢授餐。又云。身微真愧報恩難。其親厚可知。慎行則爲明珠教其子若孫者也。故皆不能免。執信度必與掌院徐元文迕。因亦爲乾學所惡。至庚午康熙二十九年許三禮劾徐乾學高士奇王鴻緒皆被放。執信感事之詩。即作于次一年。明乎此而後當時恩怨報復之情。歷歷如繪。執信等僅以斥革了事。以意揣之。必明珠暗爲之左右。始得從輕發落。不然。以大不敬律之。其禍不可測也。乾學傾險若此。故執信于其敗也。爲之快心。然乾學特爲聖祖走狗。既噬明余。已亦不旋踵而敗矣。雖險亦安所用之。回籍後。遭兩江總督傅臘塔嚴劾。兼及元文。使之去位。傅即明珠外甥也。報復可

知。元文以三十年七月。乾學以三十二年四月。兄弟先後發憤死。黨局始稍結。長生殿始終未禁。當時所治者國卹演劇而已。若以劇文含有諷刺。加以窮治。豈不愈彰朝廷之醜耶。然後來長生殿付梓。竟刪去毛奇齡序未刻。是有所避忌也。

衢州雜感十首
錄三

姑蔑山川水潦餘。我來繫艇一秋歎。枯查亂樹橫殘堞。瘦日酸風冷廢墟。朱紱何人親洗馬。蒼生幾處免爲魚。村行所喜繁霜後。橘柚丹黃錦不如。

荒村野老暮相逢。爲說今年潦水衝。一夜波濤如潰海。萬山風雨出飛龍。支崖不見孤撐石。臥壑曾留倒據松。聽罷踟躕墮雙淚。可能入告免租庸。

噴阮嶺勢逼仙霞。阻遏妖氛建虎牙。障日叢篁未容騎。連雲列戟不通鴉。居人亂後惟荒壘。巢燕歸來止數家。一片夕陽橫白骨。江楓紅作戰場花。稗畦集

徵兵

萬里妖雲氣。千家夜哭聲。朝來羽書下。主將又徵兵。稗畦集

章撫功書圃詩鈔七卷

章撫功。字仁黈。號書圃。錢塘人。諸生。弟藻功舉康熙四十二年進士。撰綺思堂文集。以儷體著名。而撫

功僊蹇不第。爲人司記室藏書五千卷。悉毀于火。所爲詩三百餘首。爲偷兒祛篋去。可謂窮矣。有書圃詩鈔七卷。學杜極有筆力。多流連湖上之作。殊不足以盡其才思。

種秧歌

客行田野逢田父。種田兼說田家苦。春蠶夏麥餘幾何。芒種先忙及時雨。嘉種誰云降自天。豈知計畝却論錢。青青半束懸腰下。倒步灣身插向前。長繩十丈橫分畝。參差相望還相耦。汝偏帶笠影斜肩。我獨揮鋤忍傷手。夫高日午風不來。汗珠滴土水成隈。山田苦瘦湖田薄。秋成未卜秋糧催。自從少長田間老。恰羨青門種瓜好。較兩暈睛不復論。咨寒怨暑經誰道。嗟哉田父無苦辛。良苗可慰方懷新。城中萬戶皆胥食。誰是先知稼穡人。清嘯堂詩集四

胡榮容安詩草十卷

胡榮。字志仁。又字榮安。錢唐人。撰容安詩草十卷。家頗饒給。築容安園。有樓臺竹樹。被以雜花。日與一時名士。觴詠其中。所謂容安六君九子是也。毛奇齡嘗過之。爲作詩序。許其別擅性靈。獨來獨往。榮又邀游四方。北至燕趙晉豫之域。南達閩海。所至紀其風物。詩則摹擬奇齡。而遜其才思。然抒意寫情。亦往往有佳篇可觀者。

弔柴虎臣先生墓

吾郡柴省軒徵君。一代儒宗也。柴氏累世通顯。一門弟昆。先後成進士。徵君獨志節清峻。博極羣書。與陸麗京陳際叔諸先生。稱西冷十子。中年有所憾。隱居西湖。四方從遊講學者數百人。旌軍

忠貞范公奉詔舉山林隱逸。辭不應。嘗寓書於友人曰。日惟著老羊裘。篝火垂幕。擁殘書吟賦。不知門有車馬客。當世高之。卒葬於南山花家圩。學使周際初先生題其墓曰。崇祀理學名儒柴省軒先生墓。余少時即私企徵君名。今得與爾君臨升交。每借過墓門。不勝慨想。爰作詩以弔之。

西冷有十子。高誼溯柴公。青紫等末技。藏書著漸窮。講學繼南溪。明道抵中庸。鹿門常避世。縱情山水中。吟咏日自娛。經濟非樂從。徵聘返車騎。亘古亦希逢。長松喜蒼翠。好花開自紅。每從南山遊。瞻仰謁

高風。容安詩草三

陸進巢青閣詩集十卷

陸進。字蕪思。餘杭人。貢生。官永嘉縣學教諭。撰巢青閣詩集十卷。載詩止于康熙三十六年。源出雲間。浸淫七子。不墮膚闊之習。自具性情。唯順康間浙中詞伯。海內名家。無不納交共酬唱。讀之幾如名士譜。所不能屈者。虞山婁東二家耳。蔣平階稱其敦古好交。賓客日進。是固以交游爲性命者。而噉名亦稍過矣。

飛蝗行

崇禎辛巳秋七月。蝗蟲蔽天來江浙。共食青苗頃刻黃。羣飛紅日須臾沒。農夫勞力盡成空。仰天痛哭阡陌中。縣官堂帖到下里。捕蝗一石賞斗米。男婦捕蝗來告災。堆積縣門不得開。今年蝗蟲不傷穀。但向山

中食草木。皇天有意甦此民。父老感歎望秋熟。江岸積蝗盡蠢動。江頭小兒雙手弄。延年發論亦太奇。此蟲豈足供飼鳳。吁嗟乎。北關米船日益多。穀賤傷農又奈何。巢青閣詩集四

踏荒行和嵇淑子太守

積雨溢行潦。日日埵鳴鶴。四月麥無秋。五月秧悉爛。古杭十室九室空。隴畝誰能辨西東。不見于相及舉趾。祇見波瀾決潏吹悲風。田家婦子流。相向日嘆息。不能藝稻粱。朝夕何由食。不能藝稷黍。租稅何由得。幸哉賢太守。目擊民愁心惻惻。五馬出郊問民災。茅檐菜色良可哀。兒童父老走牽袂。有如家人父子相低回。謂民爾弗吝且怨。爲爾蠲租減稅無相催。淫雨倏逢膏雨至。洪波忽遇恩波來。古人爲民牧。有如父與母。龔黃召杜久不作。今也復覩賢太守。陽侯河伯且勿驕。行見明年樂大有。小民歌頌應無窮。日向

蒼天祝眉壽。巢青閣詩集四

洪若臯南沙文集八卷

洪若臯。字虞隣。臨海人。順治十二年進士。由戶部主事。官至分巡福寧道。康熙六年裁缺歸。遂未再起。撰南沙文集八卷。刻于二十七年。紀事之作。如閩難記。海寇記。宸駕幸浙紀略。皆可備稽考。東壁園隨筆亦多及時事。若臯有幹濟才。屢督通州草廠。權潞河居庸近京各隘口稅。當用兵時。權西新關。兼管倉儲。供駐防月糈。署福建糧道。供應軍糧。皆不擾民而足。事具集中吏牘。詩才橫溢。不可施以羈勒。與陳

伯璣書云。何李古詩宗漢魏三謝。律宗初盛唐。是專以詞與體論。于詩之性情。置不講也。又云。近代長沙。北地。信陽。歷下。瑯琊。公安。稽山。竟陵諸門戶。悉一切秉界炎火。豈不大快人心。于此足以徵其所尙焉。

逃難

丙申正月十三日。城守副將馬信叛入海。

丙申十三載。正月上元時。蒼茫聞盜賊。東方光迷離。須臾門巷裏。四路皆賊騎。翻身下床走。顛倒衣裳披。骨肉各自散。對面不相辭。單衣赴東鄰。越牆又度籬。籬高不可度。足失刺傷皮。我身已難保。焉復顧四肢。後園到鄰家。東西莫所之。鄰翁似認我。見我長嘆咨。汝是讀書人。不走尙在茲。我有夾牆內。急入莫再遲。攜我杵臼後。牆竇狹且卑。推我側身入。戒我勿動移。牆頭蓋薦簾。牆面掛蘆葦。布置未及已。賊忽劈門楣。老翁急他避。霍霍響矛鏃。魂飛膽已落。噤氣勿噓吹。中有兩小女。輾轉聲譸譸。俯首掩其口。高聲反問誰。惟賊眼奢侈。錦繡與珠琦。急打東房去。無心戀茅茨。不知誰家婦。嬌嬌哭甚悲。白馬奔封豕。繹絡走青絲。哀聲與鐵仗。慄慄寒心脾。漫漫長夜窟。手足無所施。低頭苦頸折。日出及西垂。皮肉已盡死。踟躕不知疲。砲聲四五動。聞賊將逃遺。撥身雜衆人。脫袍去接纜。要命爭先走。不復知忸怩。路逢吾妻在。偕出城東湄。顧我雖得脫。父母尙未知。母年六十餘。父年益暮衰。平時少行走。何以經險巇。父母養子時。百年有所資。生我不得力。身完縱何爲。行人指示我。適間有二者。云是貴家翁。雙雙東驅馳。從此十里許。尙可相攀追。既聽消息真。但走且莫羈。新來海上賊。遍插城頭旂。年少市棍徒。白裹混相

欺。老幼悉被擄。搶掠盡鋤箕。去去何甸甸。捐捐田溝澌。所遇多流血。呻吟道傍屍。往來慟裂闕。悲號振平苗。擔甌或負釜。提筐或擊蕪。壤壤數百輩。雜沓相擠推。夜深後嶺道。雨後北山岬。既無燈火具。徑滑泥又滋。水渦并突石。白影互相疑。平生苦短視。十步九傲傲。山麓逢幼弟。仗爾來扶持。安樂重友生。兄弟急難宜。迢迢踰巖谷。羣峯勢參差。昏鴉哺野子。林樹聲啞啞。寒坑泉幽咽。野竹風颼颼。回首斗城中。烈火照通達。蹙躑氣上積。皇天慘不怡。暮宿王家菴。晨過大寺基。深山雪如練。萬丈白長麾。龍門翻銀濤。千軍列素帷。春寒窮谷裏。風景自堪奇。早風吹折骨。冰霜生口髭。指落不得直。面凍色青黛。兩日未飲食。口燥腹又飢。吾妻臥路泣。掩面不能隨。艱難古不免。步步且自支。黃昏到寺中。僧去存老尼。脫衣換筐米。折椽向地炊。烟塵着濕眼。半夜成粥糜。血回湯入口。魂招飯翻匙。新棲且安息。生理漫圖維。三日歸宗鄉。父母亦來斯。昆弟陸續到。團聚哭淋漓。驚定還拭淚。喜極復鳴戲。村婦牆頭笑。村童滿堂窺。村老四五人。嘆惜前致詞。聞君新構房。今日可耘籽。灰爐并瓦屑。不留寸題椽。多謝父老言。世事誰爲司。人生有哀樂。天地有盈虧。桑田變滄海。何處是靈芝。一家幸會合。豈復論舊貲。攘攘唐黃巾。紛紛漢赤眉。無地無豪傑。顛沛是吾師。九州四海大。亘古長熙熙。軒轅造宮室。至今應勿隳。我無鄰家翁。今在海之湄。父母不得見。何況妻與兒。異哉鄰家翁。豁達露襟期。誰肯流離際。忘身濟人危。吾知丈人者。不受世磷緇。誓將與丈人。結歡致所私。妖氛猶未靖。夢寐長勞思。

南沙文集二

苦雨 丁酉都門作

孟夏入仲秋。紛紛雨不霽。后土無時乾。大燭日隱翳。疇是近漏天。淫盜須終歲。出門騎我馬。揭衣常恐泥。衣污不足惜。誠恐馬蹄蹶。衢路紆且長。往來錯相滯。萬家水氣中。椽爛屋無蒂。蕭蘆掛風壁。肩牆留腰砌。夜雷殷地發。蚊聲毒如蛻。將雨倍炎蒸。煩促不能寢。我聞近京邑。真定及涿薊。陸行擊方舟。麥死田施鬪。浙東山左右。狂葭並爲厲。禾頭黑生耳。何方出租稅。司農日告竭。法重將刳剝。安得誅雲師。陰陽氣不閉。時若暨九土。收穫不斂穧。南沙文集二

田家 三首

錄二

春曉村巷白。蓐食荷犂鋤。今年杏花早。蒲葉亦長舒。老農驗天時。力作知疾徐。同路逢侶伴。借語多欬歎。錯行入南陌。我田近西渠。蚯蚓土中出。饑烏候淤澇。丁少無人鱸。糗糲筐中儲。歸來桑榆晚。雞飛上茅廬。入門謂稚子。汲水澆園蔬。今日牛辛苦。藟草慎有餘。明朝天宜雨。亟須事東畬。

蠶絲盡官稅。杼柚徒參差。池塘青蛙噪。庭際落日斜。四鄰男和婦。乘月剗新麻。隔籬相對話。老農聲咨嗟。東鄉後租期。里胥夜叱呀。雞黍恣狼籍。摘盡後園瓜。大雨責輸運。車轂陷泥塗。公門不推恕。未能免扑搗。今歲芒種早。難望滿汗邪。舊貸勉力峻。新糧又已加。腰鎌方掛壁。兩手空自叉。聞道南山虎。黑影多張牙。橡蕨不能收。明春艱採茶。室貧無爲計。何以度年華。祖宗世守此。至死不移家。南沙文集二

巡城行

堪笑府中關東子。豪猪靴兒堂上遊。聞道官休尙不歸。海水悠悠長故里。哀哉陳公際搶攘。齒牙搖落髮

蒼蒼。脫帽盤坐會議堂。三鼓五更巡城隍。南沙文集二

徐倬 蘋邨集三十一卷附錄四卷

徐倬。字方虎。號蘋村。德清人。康熙十二年進士。入翰林。官至侍讀。三十三年以癸酉康熙三十二年北闈事爲

彭鵬所劾。得旨休致歸里。後奉命撰全唐詩錄成。驟擢禮部侍郎。五十年五月卒。年九十。撰蘋村集三十

一卷。爲修吉堂文集。道貴堂類稿。分應制集。寓園小草。燕臺小草。梧下雜鈔。蘋蓼間集。甲乙友鈔。汗

漫集。野航集。鼓缶集。及水香詞。倬所自刻。悉餘殘藩。及其子元正清嘯樓草鸞坡存草。則元正之子志

孝所刻。已在乾隆之初矣。四庫得此本。失其籤題。改稱蘋村類稿。非其舊也。集中凡涉及廢太子及呂留

良父子者。皆已剗去。賴他本得補足之。倬少嘗及劉宗周倪元璐之門。又與錢秉鑑柴紹炳陸圻諸遺老酬

唱。尤與呂留良交厚。登第雖晚。輩行甚高。康熙癸酉分校北闈。姜宸英查慎行劉燾顧圖河。皆出其門。

爲文典雅。詩早年學七子。晚乃折入香山劍南。盡棄少作。少入谷應泰幕。爲撰明史紀事本末。觀所撰全

唐詩錄。考證頗核。長于史學可知。自言喜收明季野史。惜無紀述。

晚邨致書云張叔祥善壘石種樹屬其爲余營築余謝之卽以詩代書答晚邨

蘋邨城居瀨塵俗。閉門無竹亦無肉。晚邨迷信俗結僧廬。緇衣啗肉還栽竹。天生高人自位置。嚴陵釣瀨子

真谷。妙山天不與香山。禁鬱留飽先生腹。妙山爲晚邨所居。昔白太傅刺杭。以不得至妙山爲憾。故有嚴鬱游處不曾游之句。今其遺蹟在壁。白沙翠篠娟娟淨。清流

激湍波紋縠。澄潭皎若秋波明。一峯秀峙修蛾綠。真如絕代有佳人。天寒翠袖媚幽獨。我會比擬輞川莊。晚邨掉頭意不足。前呼張老來空山。商略磴道取紆曲。設籬樹榭護名泉。紅亭傑閣搆山麓。欲分福地到朋儕。馳書勸余小卜築。聽渠指劃果神奇。堦除尺寸森岳瀆。家人從旁大揶揄。茲事荒唐等緣木。頽垣破壁地半弓。析無懸衣益無粟。經營斷手約後期。俟河之清言可復。杜陵日乞草堂資。徒被秋風欺茅屋。人間好事屬兒曹。吾輩登臨便奇福。一丘一壑置閒身。某水某山寓游目。車馬輕裘朋友共。君有幽居無異僕。風雨菴中容我眠。手把琅玕漱寒玉。

風雨是晚
邨名 瓚麥間
集上

許汝霖 德星堂詩集五卷

許汝霖。字時菴。海寧人。康熙二十年進士。官至禮部尙書。未悉卒年。集中自述詩。有句云。塵羈八表欠三年。已七十七矣。撰德星堂詩集五卷。曰拜獻集。應制集。冰銜集。使旋集。河干集。還朝集。酬應集。頌聖之作至多。以其屢稱皇太子。有觸時忌。故此集不甚流行。然所述開邊治河。亦偶有足資佐證者。與查慎行頗有唱和。晚年詩多諧謔。自笑詩。半殘蟻盡嘗欺口。百補貂冠且誑頭。巴唱盈筍誇李杜。吳儂滿座認應劉。讀之失笑。其詩輕率。或亦自知之矣。

自笑

六載歸田五載荒。窮年祈禱究茫茫。熱腸每惹蠅蚊嚏。囑首誰憐牛馬忙。口苦日嘗甘草味。湯香夜浸臭

皮囊。還餘一笑人知否。老淚沾巾唾滿床。德星堂詩集四

蔡升元 使秦草一卷

蔡升元。字方麓。號徵元。德清人。康熙二十一年一甲一名進士及第。授修撰。官至禮部尚書。六十一年卒。年七十一。升元嘗以女進索額圖。以希進用。士林不齒。至為皇太子所惡。身後遺妾李氏。攜資逃嫁同縣侍講學士戚麟祥。為李衛所劾。麟祥論斬。事見永憲錄。啓寵納侮。皆由婦人。其時士風之惡。蓋狼藉甚矣。使秦草一卷。為康熙五十二年萬壽。升元以內閣學士奉使祭告華岳。兼犒秦邊諸軍。沿途紀事之詩。

清涼山 在延安府東門外

渡水穿雲直上攀。金明城郭翠微間。清涼大地三千界。塵土勞人半日閒。絕磴振衣朝佛洞。上有千佛洞 深崖洗眼看詩灣。山半有石壁。歷來名作皆磨勒於上。名曰詩灣。 寺僧遙指溪南塔。范相曾題嘉嶺山。山上有石刻。嘉嶺山三字。使秦大字。傳是范文正書。 草

嚴我斯 尺五堂詩刪初刻六卷近刻四卷

嚴我斯。字就思。號存菴。歸安人。康熙三年一甲第一人及第。授修撰。官至禮部左侍郎。父某。字既方。副貢生。明亡隱居不仕。與陳元堡金鏡董說唐達為友。皆高士也。著春正月辨。嗜退菴語存。我斯少有名

社局。既擢高科。迴翔禁近。官非不達。年未六十。遽乞身歸里。撰尺五堂詩刪初刻六卷。近刻四卷。初刻爲甲辰康熙三年至丙辰康熙五年之詩。近刻爲丁巳康熙六年至丁卯康熙十六年之詩。自序謂本乎自然。發爲篇章。又謂與世之所稱漢魏三唐。少陵昌黎。眉山劍南。烏可同日而語。蓋不追逐雲間虞山之風氣。卓然期乎自立。其詩各體皆工。于唐爲近。少嫌未遒。當時聲名勢位。不在葉方禱之下。而後人稱道不及者。則不營聲氣之故也。觀其和東坡岐亭戒殺詩五章。自言終朝弄墨。性寡所嗜。讀豐草菴集感賦。乃云余也落拓困塵埃。自顧區區等蝨豸。安得相從掉臂游。芒屨踏破靈岩趾。挑燈夜半讀奇文。俯仰茫茫淚如泚。是皆作于通籍以後。且悔其一第矣。

柴窑酒碗歌爲曹峨眉賦

主人好奇復好客。開軒置酒城西宅。手持酒碗號柴窑。云是顯德年間之舊物。山河人代幾興亡。可憐何物不滄桑。黃鐘大鑪爲瓦礫。金盤寶鼎沈寒塘。此獨何爲留人世。埋光抱璞多年歲。大文不琢能善藏。不向人間誇珍異。摩挲久之開塵顏。青花黯澹珊瑚斑。貞如蒼壁堅如鐵。獨留真色天地間。世人往往愛金玉。琉璃瑪瑙光搖燭。那知無用爲有用。此物偏能做時俗。君不見。舒州之杓力士鎗。李白與之同死生。又不見。杜陵田家老瓦盆。共醉同眠竹樹根。龍頭七寶安足貴。名士由來有深契。李杜不作酒人無。碗乎碗乎爾之遇合何太孤。淪落千年誰識爾。世人皆棄吾獨取。江南曹侯爾知己。尺五堂詩刪初刻四

沈 涵 賜研齋詩存四卷

沈涵。字汪度。號心齋。歸安人。康熙十五年進士。入翰林。官至內閣學士。落職歸。卒于五十七年。年六十八。有詩自康熙十五年迄五十三年。凡六千餘首。失其稿本。子柱臣盡力搜求。刻于乾隆二十二年。爲賜研齋詩存四卷。其詩取逕近蘇。時窺韓杜。自謂學詩甚晚。而格律老成。居然作者。以較西厓。弘肆不如。而清快過之。竹墩沈氏世有聞人。涵與兄三曾同科翰林。三曾子樹本。壬辰^{康熙五十年} 高科及第。家門鼎盛。涵五十四年旋里。翌年。勸修密雲城工。倉皇北上。後二年暫歸。蓋措資也。晚遇艱屯。遽以致殞。去官不悉其故。據實錄康熙五十一年九月。沈涵自少詹事遷內閣學士。五十三年十二月。諭沈涵人甚不及。著革退。事出特旨。別無罪名。前一月方窮治胤禩黨與鄂倫岱阿靈阿。誅雅齊布夫婦。意涵或有牽連歟。當再考之。

燈市篇

惠風被廣陌。青陽撰良辰。南郊涂九軌。百物喧雲屯。華燈簇肆張。光彩爛重闔。大賈據案坐。良楛交雜陳。色眩貴公子。焰驚冶遊民。聯珠何錯落。中央鼎足分。衆星環助耀。儼若藩衛臣。琉璃出玉淵。巧匠風運斤。曲屏琢十二。晶瑩淨無塵。冰綃繪嬋娟。名卉嬌暮春。皎皎綠玻璃。浮動隱纖鱗。盤鴨陋漢制。蟠螭壓先秦。九微偕百枝。容色相鮮新。曜靈駕扶桑。夾道填朱輪。金貂七相盛。第宅五侯尊。被服都且閑。巧

笑聲相聞。千金一揮擲。遑惜價不倫。幽并年少兒。遊戲逞橫僂。角觝誇北里。鬪雞走東隣。行徒暫息駕。流連蕩精魂。流連曾幾何。白日倏斜曛。玉繩從東來。栖烏啼夜昏。促騎還城邑。擊柝扃衙門。朝來繁華館。日暮空復存。寂寂楊子居。藜火自氤氳。賜硯齋詩存一

憫農婦

他鄉惟餉婦。此地見耕妻。只合綠春繭。偏勞治夏畦。褰裳驅犢飲。繞畔任兒啼。脫粟休嫌薄。貧閭用不齊。賜硯齋詩存三

沈季友學古堂詩集六卷

沈季友。字客子。號南疑。平湖人。副貢生。卒于康熙三十七年。年四十七。初季友自刊南疑集九卷。至乾隆二十九年。其孫鎰乃并未刻稿秋蓬集。合刪爲學古堂詩集六卷行世。季友父棻。順治九年進士。官河南西平知縣。有才名。早卒。故季友能得諸先輩賞識。結交當代名士。其詩清麗。近于晚唐。長篇稍窘篇幅。波瀾未壯。然言之有物。如武林行。宮盤歌。飲馬行。吳伶篇。弋陽姬諸篇。一唱三歎。不失風人之旨。爲李因仲馬和衷兩高士啓當事。奉祀學宮。意在風勵薄俗。別撰橋李詩繫。朱彝尊稱爲足以行遠傳世者。乃多表章節概之士。季友爲人。亦從可知矣。

武林行

武林城外黃雲飛。武林城中征馬嘶。連年轉戰咽鼓聲。乃在越江之南閩嶺西。嶺頭夜半傳烽火。江上春來習水犀。十萬貔貅各控弦。驅來子女實堪憐。綠髮兒郎束輕縞。一旦離鄉相識少。日日腰鎌出武林。湖山斫盡青青草。傷哉婦女逢百罹。貧家富家悲流離。富家女。著金縷。虎帳酒行泣不語。貧家女。衣白紵。朝餒鐵腸暮炊黍。紫駝載盡如花人。關山遠絕知何處。縱有捐金贖翠娥。營門箕踞難相呼。錢刀索盡多行乞。那得還鄉歸故夫。馬上何人吹篳篥。憐煞邯鄲嫁養卒。螺螄門外月如霜。西湖一片傷心碧。我來恨無千黃金。書生碌碌走風塵。聖朝昨下金雞詔。願赦蛾眉一萬人。學古堂詩集一

陸奎勳 陸堂詩集十六卷

陸奎勳。字聚侯。號陸堂。又號坡屋。平湖人。康熙六十年進士。由庶吉士授檢討。撰陸堂詩集十六卷。分宜樓初稿。萬里游草。石耕韻語。西笑續草。格致外篇。橋西新詠。洛如詩鈔。五石瓠吟。涉江草。□□□。潛虬草。識真游稿。細草吟。金門小稿。藜餘草。希礪草。凡十六集。大約為丙辰康熙十年至丙午雍正四年之詩。刻于雍正十三年。年七十矣。奎勳少有清才。博覽多通。長奉朱彝尊之教。詩思無端。情溢緒衍。復工于造語。使人意消。所不足者寄託耳。題明詩綜後云。蒙叟詳于詩。姓氏有缺略。茲書妙甄綜。實之連璧若。蓋不免鄉里私見。謂慈仁寺東廊古松僅存一本。時在庚午。康熙二十九年又壬寅六十年有游陶然亭小飲臥龍松

下詩。其大輿紀哀自注云。初議移梓宮于南海子鄭家莊。上以地遠。仍定于景山壽皇殿。散館紀事自注云。清漢書共二十六人。于太和殿前分班行三跪九叩禮。館師捧出黃紙御題。各跪領試卷。向例初夏散館在乾清門外。因天寒移黑白大臣議事房。內設十二木榻。兼列火爐。凡此皆可入識小錄也。

京邸雜詠四首

木徑寸。銳厥底。揮短鞭。旋不止。軍中戲蹴鞠。似捷如風大腹子。羅陀

竹筒短短開風門。胡繩曳之獨足奔。牛鳴土窖宮聲存。我爲兒童發孤笑。好與土鼓廣同調。廣場箏琶紛

取鬧。放空鐘

赤頭蠅。性穢鄙。從何來。遽集此。揮塵非時宜。拔劍太猛武。竹絲聲颼颼。快若洒秋雨。竹響

酒毋渾。包子焦。叫五更。聲嘈嘈。或云清者不如濁。三閭悲愁漁父樂。焦頭爛額爲上賓。底用曲突謀徒

薪。渾酒 陸堂詩 焦包 集二

海舶行

海波今不揚。卅六沙岸千桅檣。不貯珠犀象齒桂蠹鷗斑香。但見炭積若平臺。木累如崇岡。番薯壓擔柚滿箱。嗟哉權奇不及三倍利。曷爲輕身以試龍蠶窟宅蛟龍鄉。牙子捷於猱。吏人猛於虎。白晝五木呼鼻盧。夜泊箏船關河汧。區區乍浦名埒粵東之佛山閩南之月溪。我來躑躅黃塵迷。杞天無時傾。楚猿有時亡。請爲賦大言。彎弓挂扶桑。沈莊老農絮語巢東西。明嘉靖間。徐海通倭入寇。據沈莊爲東西巢。拾鏃半斗鎗鉏犁。狐頂白顛向天

舞。海月亭亭正三五。陸堂詩
集六

刈稻行用子美負薪行韻

筆鋤墨稼鬢欲華。逢年遠不如田家。日費杖頭買新穀。蒙袂差免來食嗟。閒向秋原搔首立。澗雲織浪微風入。豚蹄操祝願不奢。十斛多收卽充給。小鎌插腰笠挂頸。稻堆高與茅簷並。粒粒如珠汗滴成。花厖夜莫惱鄉井。楓丹柏白霜留痕。殘冬飽飯味義根。生絹剪取繪祖德。毋忘耕讀城南村。陸堂詩
集七

剝啄

剝啄聲何怒。誅求俗已貧。驚心甯乳虎。結想宋陽春。國法須懲吏。軍儲豈病民。去年頒詔紙。如海誦皇

仁。陸堂詩
集八

築堤行爲李麟使作

淮流合泗本禹迹。通江刷河絕地脈。隄防涵洩規畫詳。此邦幸免蛟龍宅。鑿山鑄頑銅。不及煮海功。淮揚鹽筴額征二百萬。亭場三十瓜分下上中。往者范文正。長堤捍海隅。始釋昏墊災。永利豐國儲。泰州東臺場中央。清浦一道波茫茫。石尤風起斷行旅。捩柁長年顏色死。估船寸步不得進。挾貨惴惴萑蒲取。疇爲范公補闕略。高高下下勤相度。麟使李公清能者。命建新隄僉曰諾。富商願輸銀。貧商甘奮身。春鍤礎石紛如雲。登登夯杵聲相聞。方秋降水決下河。鳩形鵠面流亡多。救荒良策在興役。百二十里環坡陀。縱遇風濤惡。銜臚挽一索。支港架浮梁。斥堠謹宵柝。原田每每仰灌輸。磬磬雁戶那其居。何羨芍藥之陂龍骨

渠。前吁後喁歌夾路。豈知肝膽在平素。權貴斂手避秋曹。一筆勾除廣贍庫。五馬出郭鑪然香。曩聞是舉眉飛揚。書生束髮飽經筵。誰無先憂後樂志。力苟弗贖時我違。頌酒廣花空老去。竭來邗上五春秋。名蹟一一圖經搜。陳侯塘。邵伯埭。晏相溪。袁守櫃。滄桑陵谷幾變遷。惟人能支天所壞。實心實政享厥名。明年快睹李堤成。清風何穆如。作誦非古甫。更倩巨手韓歐蘇。書功穹碑曜千古。

明年離使病歿。臨堂詩惜乎其事中止。第十

汪文柏 柯庭餘習十二卷

汪文柏。字季青。號柯庭。浙江桐鄉人。康熙中官北城兵馬司指揮。汪氏之先。富于藏書刻書。文柏多所通習。爲學有本。嘗撰杜韓集韻三卷。故魏禧稱其詩奧兀多風。黃宗羲以爲槎枿排夏。喜結交當世名流。不爲萬斯同溫睿臨唐甄所薄。柯庭餘習十二卷。刻于康熙四十四年。年方四十七。未詳卒年。俟考。

庚辰秋琉璃廠監造屋宇冊籍走筆書懷

有明戶口聚。九門悉居民。皇朝定鼎初。出令徙城闔。圜地分八旗。天兵爲比鄰。外城足官地。架屋許都人。所以琉璃廠。衡宇如魚鱗。生聚六十年。結構非無因。秦魯豫吳越。黔蜀楚粵閩。九州同覆載。率土皆王臣。竭來多傲厲。名利羈其身。土著取租值。微薄堪養親。若論公家地。履畝稅始均。遺民費資斧。庀材及陶甄。奈何起間架。此議太不仁。況有雜徭苦。露肘衣懸鶉。皇恩方浩浩。四海獨租煩。如何輦穀下。翻令人歎呻。余有守土責。實難緘我唇。不顧司空怒。痛哭爲具陳。體君愛黎庶。豈愁大吏嗔。位卑恥無權。

有志終不伸。聊成五字詩。語鄙意頗真。倘值采風者。爲我獻楓宸。疲氓得蘇息。霜霰回陽春。柯庭餘習一

李昌祚 真山人後集二卷

李昌祚。字文孫。一字劍浦。號來園。又號遏廬。漢陽籍。玉山人。順治九年進士。選庶吉士。授檢討。官至太常寺少卿。撰真山人後集二卷。刻于康熙六年。時年五十二。由翰林告歸養母已數年。後或再起耳。昌祚素有才名。其詩無鍾譚之習。氣充辭沛。善寫胸臆。唯多愁苦之音。漫成十首。病中八首。鎮江哭內六首。自傷身世。淒涼掩抑。蓋玄黃初定。脫穎而出。與韜光養晦者。各有是非。遂致前却。壽周元亮云。重逢俱是再來身。喜徐巨源徵君來城步韻答之云。南州多老友。亂後幾人存。各有生平在。難將出處論。西京容曼倩。天寶泣夔門。浪迹誰能著。孤舟一夜言。合盤心事。吐露無遺矣。集中所附館課。各體皆備。尙是崇禎時之舊。與後來有異。別有真山人集。未見。

初夏望雨

天地職函蓋。萬物託羣生。入夏正滋長。蘊隆若爲爭。聖人鍾祥應。雨露答至誠。胡不流膏沛。而乃亢不平。佐理憂調變。府事念稻秔。憶昨楚江苦。驕陽經歲并。今方勤農事。雲漢章神京。仰視離畢上。星占失重輕。雨金不雨粟。金多豈爲禎。魯史紀六月。盛世有藉耕。時若古所重。非徒樂吾氓。逡巡籌盈尺。恤國廣幪幪。安得行吟者。歌爲大田賡。真山人後集上

濟寧有失其子者爲鼓人所得予覺之維舟三日遣告泉聞工部唐載歌年兄載歌訊其

家招諭周悉遂爲母子如初因作詩以詠之

豈不懷行路。難堪母子情。倚閭三日切。野泊一身輕。勸諭煩吾友。流離見此生。濟寧傳近事。善政及孤

嫖。眞山人
後集上

候兵衛輝城中偶病卽事

師還芻糗檄頻徵。重過荒城病不勝。瓦破燕巢塵到案。封殘鼠噉紙迷燈。連牀襖被常虛枕。退院蔬盂竟

似僧。縱有望京樓尙在。何人帶劍敢輕登。眞山人
後集下

汪爲熹紫山吟稿四卷

汪爲熹。字若木。浙江平陽人。以貢生官桐廬訓導。刻紫山吟稿四卷。癸酉初秋自述云。三十何心戀此邦。六年冷署寄桐江。是其赴官在康熙三十七年。年僅二十四。遽爲學師。其時學官俸滿得升知縣。後來遂無此例。詩不足存。存其交游。

戴南枝先生許過桐江久待不至率贈

八十猶爲客。方袍舊角巾。故園惟墮淚。碩果此遺民。字賈供藏蛻。賈字爲徐侯齊先生嘗稱。吳人
高其義。詳藝堂太史所作傳中。詩成託釣綸。

詠釣臺詩。多至千餘首。別號西
照頭陀稿三

毛奇齡 瀨中集十四卷 當樓集一卷 桂枝集一卷 西河合集詩五十四卷 文一百三十五卷

毛奇齡。又名甡。字齊于。又字大可。蕭山人。少嘗與義師。變姓名亡命江湖間者十餘年。事稍解。乃歸里。復以文學游食四方。有盛名。康熙十八年舉博學鴻儒科。授檢討。二十四年引疾歸。遂不再出。專意著述。事具自撰墓志及清史儒林傳下。撰西河合集爲經集五十一種。二百三十六卷。文集及他著六十六種。二百五十七卷。著述之富。一代鮮有能及之者。然于古今人多所詆謫。尤詆朱熹。聞者驚怪。全祖望作蕭山毛檢討別傳。述其父之言。謂奇齡于學無一不妄。祖望本之而有蕭山毛氏糾謬十卷之輯。別傳不獨非其學。且歷斥其無行。凡奇齡自撰墓誌所言。幾以爲字字皆謬。不識何以惡之如此之甚。然其言太過。有不待辯而自明者。如謂奇齡亡命。由于仇家殺其殺人。而奇齡自謂與義辭監軍爲妄。然又謂奇齡亡命時。妻陳囚于杭者三年。其子瘐死。于法非大逆無辜連及妻子者。則不僅僅爲殺人可知。祖望窮極醜詆。口不擇言。而不意其自相矛盾也。後來阮元刻學海堂經解。多取奇齡說經之作。謂于漢學有開始之功。當略其短而著其功。表其長而正其誤。奇齡之失。在引證間有錯誤。則由強記博聞不事翻檢之故。恐後人欲訂其誤。學生不能。其言較爲持平。于是毛氏之學稍顯。奇齡尤擅辭章。初撰夏歌集。瀨中集。當樓集。桂枝集。鴻路堂詩鈔。西河文選。今能見者。瀨中當樓桂枝三集。及文鈔皆采入合集。以詩文各體分卷。凡詩五十四卷。文一百三十五卷。初受知于陳子龍。詩尙奇麗。逕路與雲間爲近。後來復有變

化。由初唐上窺齊梁。思路綿邈。非人意嚮所及。文筆恣肆。窮極深微。皆能發洩無餘。使成光采。惟時地人物。不免顛倒。用字不經。頗費解索。題目鄙俚。至爲衰枚輩所譏。然不能掩其文之雄也。卒于五十五年。年九十四。亦最老壽。

明河篇

有序 毛姓游淮陰。查繼佐孝廉並帶過張吏部曲江園觀百戲。時秋八月十四日。江南北名士百來集。凡水亭當湖樓畫館舍。刺史諸王軍府伎樂畢出。驚見妙幻。目不及瞬。自曙起烏啼。迨夜漏盡。日初出兩竿。送呈絕

藝。如灌河接魚。勿得已矣。絲竹絳羅。露微幼眇。自傷淪落。未易遭此盛會。樂極哀生。易于感慨。又當烟竿熱。層累遞上。狀城郭宮宇人物狗馬簾幃紅幢。士女觀者。填塞落港。亦有簫管。燈紗相間。映水烟橫樹。李媿女郎。從烟霏霧中。載官舟去。亦又漢已。賜鞠者聞生。擲筆王生。有清歌絕妙。錫山朱生。吳門孫生。皆一時絕技。擲揚。幸一遭觀。明當散去。聊從醉若後。賦詩三篇。一樂府。一律。一此題也。時賦詩者十之二。姓與張公子初煊詩先成。人誦之。劉漢中贈姓詩曰。詞人罷唱曲江樓。王孫晉曰。賦傳明月夜。詩動曲江樓。張暮曾曰。今來同上曲江樓。崔顛題詩衆莫酬。餘載東山釣史集中。

明河潔潔秋夜長。草頭露白生微霜。淮陰客子感秋節。愁坐各言衣帶涼。東山釣史臥淮浦。私喜涼秋及三五。蹈海誰牽八月槎。臨淮須伐三洲鼓。三洲鐘鼓淮水濱。八月乘槎好問津。邀得江南流浪子。迎將河朔冶游人。江南河朔兩相望。河水星光兩搖漾。西園冠蓋翔綠池。東第笙簫啓華帳。張家舊院倚水陂。珠湖千頃漾琉璃。雲曰珠湖一名東湖。在張園傍。紅橋碧柳通油幕。叢臺複樹繞金羈。緋紗籠蠟安花裏。綵幔懸毵似霞舉。漢代名王久愛山。曲江吏部今開墅。初開湖墅接湖麥。重起烟樓布烟燎。將立星竿火樹枝。將貯三硝五花爆。懸竿貯爆俟斜日。列艇分燈畫如漆。但留幻舞到庭看。待駕明河泛槎出。斯時濯燕稱最輕。此際投竿舊有名。組懸傀儡戲東郭。鉤藏神祕來西京。誰翻竹筒弄漁史。誰聽皮鞞拂絃子。巾角彈碁四座驚。花門蹋鞠三郎喜。別有秦箏老朔客。曼節長吟變促拍。何事哀彈塞上聲。使予翻動江南情。江南一望欲起舞。

前亭又打閨門鼓。內部新分刺史家。明童盡出諸王府。晚風乍起烟滿湖。月輪推湧湖中珠。明雲薄霧繞河漢。蘭橈畫槳環菰蘆。燈前紫幔開杯翠。水面紅粧照綺疏。紅粧紫幔兩相映。水面燈前看不定。明河將月蕩爲烟。皓月連湖瀉成鏡。明河皓月午流沒。彷彿天星墮天末。吹將星籥燎花生。看到烟樓火竿發。烟樓星籥繞棹轉。甲燭鱗缸散珠遠。祇因畫舫隔烟多。翻使紅龍踏波緩。香燼銀葉放迸添。箭下銅盆滴將滿。別浦還營曼衍場。重城已下葳蕤管。大舸小艇歸不歸。霜寒月白烟霏霏。吳謳越唱本超絕。靜對流波一聲徹。繞屋驚翻桂樹烏。滿船涼浸冰壺月。只有傷心小樊素。看繫榴裙坐花路。不識初從何處來。幡然忽入烟中去。明河垂垂露華溢。良會何時再能得。賦就明河夜未闌。噉噉東方又將白。

瀨中集十

單隆周雪園詩集十五卷文集四卷

單隆周。字昌其。號雪園。蕭山人。諸生。幼與毛奇齡同塾師。小于奇齡者三歲。少長。同領東江文社。奇齡亡命江湖。隆周移居山陰。教授爲生。鬱鬱以沒。有康熙丁巳^{十六年}詩。自謂年五十二。後數年始沒。年將六十矣。奇齡謂其赴試。試必第一。似不以高隱予之。隆周撰五十賦有云。大夫未命。何以養鄉。官政不服。胡爲異振。雖則始衰。立待于庠。未嘗自居于高尚也。撰雪園詩集十五卷。文集四卷。以詠明史者爲似樂府。是時明史未出。猶有所諱。遂以擬古者爲古樂府。古近諸體皆工。命辭遺意。雖奇齡未必能過之。陳至言稱其鑊魚自沉。偏工愀愴之詞。窮鳥誰依。恒吐蒼涼之調。振采則沈雄激蕩。半夔州諸將之

篇。揮豪則淒惋淋漓。似潯口茶商之婦。可謂善于作評。文多儷體。作賦獨工。月食說。謂非災變。當次使然。甚有識解。

送客江上

孤舫逗前浦。葭莢何蒼蒼。膝席勸離人。別酒難盡觴。離人下北渚。送者遶南塘。舉篙漸迤邐。擊汰忽微茫。落葉爲淒其。哀鴻亦迴翔。借問彼何人。萬里赴邊方。雪園集五

穫稻

江光搖林端。欲曙猶未曙。田家炊黍熟。荷篠出門去。勞止歷三時。甚快觀百秬。草根漬宵霖。芒稻上晨露。陸澗漾金波。西疇盪黃霧。斂衣畦曲行。執卷松間度。濁醪作衆力。遺穉喧童豎。學稼雖小人。農臣洵當務。白薤旣羅筐。早菘頗供箸。落日竹痕青。歸雲山色暮。雪園集五

避兵小源

高丘無靜柯。淺瀨無潛鱗。所以塵埃外。每有避秦人。策杖走窮谷。亂石迷通津。頗見茅茨屋。時聞雞犬音。嵐烟停脩篔。岩光通綠陰。夕思虎豹過。朝連猿狖行。竹筍引山瀑。樹膚春溪輪。俗鞅寡所累。卽事多所親。幸遠兜鍪徒。莫傷饑渴情。雪園集五

武林夜望

關城吹畫角。烽臺懸旌旗。暝色蒼然來。寒烟亘東西。平橋停客軫。交衢合燈輝。明月起瀛海。波光何陸

離。浮槎不可乘。羿妃渺難期。登高攬清影。垂炤徒依依。塗紆廛市滿。風勁笙歌飛。惟見鮮卑騎。白馬聯

翩馳。雲園集五

避兵移家瓜瀝六月十七日却返西河舊居復集丁三俊日宣宅卽席賦此

浮江萬騎皆浴鐵。分營抽隊旌旗別。銅鉦鼙鼓動地來。犬吠雞鳴聲頓絕。青雀倉皇烟水深。回望顏緣愁未歇。家爲遷移始悟貧。人因卜筮方成拙。連朝蹀躞官道行。清風漸高塵漸滅。家人喜賀還舊居。赤日平波苦執熱。蚪斗綠塔蓬蔓長。螽斯趨趨上履襪。中廚絲粒隨征鞍。杆楹倒塌戶樞折。兵威熿赫何可言。生理蕩盡焉得說。汗流至踵枕席敝。不記懸鈴舊貴節。蓬頭奴子誰所使。懷抱尺素走黻躡。輾然把臂塵頻揮。西山半規清醕列。行觴稠疊多樂方。簾外颯沓雨聲發。須臾雷電空中懸。銜盃耳熱更騷屑。丈夫經營在四澗。讀書師古慕奇拔。卽今戶口俱瘡痍。舉眼乾坤日流血。江水江花空炤衣。疾步安能出吳越。有甌從生范冉塵。無魚恥動馮驩鉢。頭顱三十猶如許。那堪誹俊復疑傑。世途鹵莽難爲心。容愁何似容麴蘖。四座忼慨盡引滿。天潢倒注百川竭。清夜沉沉更漏徹。大醉開門又明月。雲園集七

張 遠 梅莊詩文集各一卷

張遠。字邇可。蕭山人。于毛奇齡爲同里後進。潦倒諸生三十年。年五十一矣。始于康熙二十一年以貢生赴廷試。又十二年。始選縉雲訓導。又五年。刻梅莊詩文各一卷。大約皆壬戌康熙二十一年以後所作。方象瑛爲

之序。稱與奇齡論越中名士。輒稱遠不置。毛際可亦謂奇齡獨極口遠之才。遠自稱管與奇齡參酌古今通韻。然西河集中不曾及遠詩文。遠多所撰造。有易經本義發明。詩經晰疑。昭明文選會箋。杜詩蒼萃。李太白詩箋。北曲司南。詩韻存古諸書。或奇齡所重者在此歟。其文有桀律而乏紀事之篇。詩學三唐。音節諧適。而無俊上之什。詩題下標懸腳體。偷青體。截上格。截中格。扇對格。轆轤格。殊不雅馴。提要謂得詩法于奇齡非也。奇齡脫胎于陳子龍。遠與西冷諸子。不止逕庭之隔而已。遠少作曰蕉園集。晚在縉雲有雲嶠集。與侯官張遠同時同姓名。同以詩文著稱。

送謫者

關門臨別各悲酸。遮道齊歌行路難。賸有丹心明萬井。何期皂帽向三韓。九方人遠驪黃沒。五兩風輕鴨綠寒。未許舉幡招夙隱。祇益雙淚爲君彈。梅莊詩集

姚祖振 叢桂軒近集十卷

姚祖振。字越士。山陰人。諸生。撰叢桂軒近集十卷。刻于康熙二十四年。有八十七叟王雨謙序。稱甲申崇禎十七年以後。余以絕迹。遂違講聚。然每見其有作。即慕之敬之。奉爲師表。辛酉之役。康熙二十年越士竟厄紅紗。令嗣子毅以第三人魁浙。未幾。而越士遂有炎州之命。子毅思慕悲悼。恨尊人抱濟世偉略。曾不一展所學。因出其遺文。謀梓之以壽諸不朽。祖振生平可悉者僅此。所謂炎州之命。不知何指。其爲有才不

遇。則無疑也。詩文學六朝初唐者。皆極當行。清初越風與西冷競軌。固曰風氣使然。而才豔亦關天授。

李侯歌

四坐勿喧聽我歌。我歌李侯怨恨多。少年辛苦螢牕裏。奪錦秦川起素波。公車三上落人後。選得郎官應列宿。東南佳氣最山陰。專城百里聊濡味。入與婦女慶平生。大男矍矍小男驚。陸行水走八千里。乃到耶溪繡錦城。果然山水不虛傳。得住蓬萊是謫仙。父老頗知新法重。敢不跼蹐戴穹天。踰年聘入棘闈裏。維吳與鄭公桃李。聯翩飛入龍門去。噴噴相稱真知己。越中利病在新舊。富者不役貧者焦。更有貴家別圖籍。如立天外不可招。侯以公明搜宿弊。百年冤窟一朝剗。其中或有漏網魚。大段已得寬于細。猶憶海上起狼烟。羽書迫切造樓船。民力不堪悲夜月。百役乃以一身肩。生死呼吸將軍令。銀鑕被體柔而勁。不舒不疾報功成。維侯能庇元元命。若此豈非能臣哉。鷹剡不至誅求來。悉索敝賦供喜怒。卑官安問才不才。夜夜催科坐到曉。精勤百倍天下少。何以能解渴與饑。鑑湖勺水便成飽。無奈蠹奸除不盡。狐鼠目中原無尹。一尹已去一尹來。玩之股掌如接軫。侯今已矣亦何惜。故園不改青葱色。回首秦關百二重。祇恨要歸歸不得。錢穀之數少萬千。徵符急下火相煎。不在官兮不在民。乃在胥吏中飽間。胥吏中飽旋復貧。百責相牽牽一身。身入獄中無訴處。燐燐鬼火坐愁人。可憐公子嬌如花。非刑敲斷骨如麻。踰年纔得脫圍圉。何日了期返故家。飄飄風中雨中立。不若牛衣相對泣。當年悔讀五車書。邇來一字難救急。豈無從前千謁者。炎涼已變聾且啞。墜淵下石聽諸天。廣絕交論真非假。噫嘻李侯李侯無咄咄。世事反覆樗蒲擲。

獨不見長孺死灰能復然。起身徒中二千石。叢桂軒近集二

蠶絲一百箔

蠶絲一百箔。羅綺何若若。貴人一尺錦。貧家十日絡。蠶饑蠶飽苦關心。身無寸絲寒如縷。安得織造暫時停。偷得工夫理帶索。叢桂軒近集五

傅仲辰心孺詩選十二卷

傅仲辰。字蒼野。又字心孺。山陰人。諸生。納資爲主簿。官山東。卒于雍正四年。年五十三。撰心孺詩選十二卷。曰東池集。薄游集。曹江鳴初集。曹江鳴後集。戊巳集。曉塘初集。曉塘次集。曉塘三集。曉塘四集。荏山初集。荏山二集。詩體格不高而清逸有致。惜交游不進。所與往還者。田霖而外。多尋常輩流。有贈陶暄詩。謂開局維揚。選國朝詩的。今詩的有仲辰詩。蓋生存者亦可入選矣。自述其家嘗合刻劉宗周人譜類略二書。當非甚貧。不知何所樂于簿尉微秩。竟羈遲以沒也。

猛虎行

曹江自昔邀神庇。夜半松杉堪獨倚。今年沴氣大流行。加以猛虎太無忌。牧童酣臥月明中。葉葉腥風忽作勢。牛奔眼赤不顧人。一搏何殊探囊易。微茫碧血染朝霞。剩骨無多忍睥睨。茲母哀哀哭未休。一望風烟門盡閉。我本支離困頓人。何堪念此增心忤。聞道曹江多巨豪。食人不啻虎而翹。一朝殄滅如驅羊。典

衣走慶齊揚輝。假虎除兮真虎來。斯民何罪遭此厲。撞鐘伐鼓祀江神。神其驅之無或遲。心攝詩 選三

飛蝗行

時維五月歲癸卯。連朝颯沓奔行潦。老農雨止荷犁鋤。赤脚蓬頭初種稻。青蔥彈指待秋成。瞥見飛蝗蔽晴昊。羣鴉得食喜頡頏。居人矯首驚懷抱。采桑方罷鬻新絲。月下追呼猶未了。何堪一集如秋風。翼翼良苗雲霧掃。僉稱是物洵有神。此無才遺彼完好。嗟哉十畝八九空。一二完好何足道。從來西北患不常。胡爲東南亦稍稍。曾聞入海化魚蝦。無乃神令赴洪濤。捕蝗或謂害天和。民物兩全神功浩。有司不德民何辜。敢以此言爲神禱。心攝詩 選十

迎蝗行

中宵微雨響蕉桐。曉來江上鮮芙蓉。雲物纖毫烟萬里。意行時復游郊東。瞥見家家列烟鼎。揭竿突兀招幡紅。田父蹙額向余說。此是迎蝗表微恭。瘠土三年逢龜拆。藜藿麥飯苦不充。今年陽雨頗時若。秋成稍稍慰三農。豈料飛蝗合沓至。一集縱橫田疇空。泥首蝗前蝗不知。連朝痛哭捶心胸。昨日比隣傷寡婦。朱繩畢命兒相從。鬻襦刲羊旋擊豕。享祀徒費重困窮。我聞其語腸欲斷。斯民何罪罹此凶。蝗不入境非偶然。捕蝗抑末詎爲功。飛揚旌旗紛出入。縱觀爽氣何從容。沙頭初雁矯雲翮。稻梁不足鳴秋風。吁嗟捕蝗復不力。區區寧勿愧姚崇。此堪繪圖誰入告。猶見持符催租庸。心攝詩 選十

霖不絕

自春徂夏田龜坼。索饗羣神禮圭璧。殷勤乞得雨滂沱。春麥半死秋苗茁。春糝作飯荷稷鋤。怒力公家輸
程秭。詎期白晝長晦冥。玄駒戴粒鷓鴣垤。馮夷擊鼓豐隆驕。村墟浩淼濤頭白。颺風動地絕驚塵。扁舟宛
轉沿阡陌。羣蛙得所競公私。林鳥低飛遲健翮。但聽危牆斷續傾。居人荷襖無安宅。前苦雨少茲苦多。災
異頻仍何太劇。漯河故道尚依稀。漯河屬東昌。久埋塞。平日因循誰疏洩。近聞黃河決怒流。吾民終恐爲魚鼈。陰氣
凝愁深閉門。角墊林中泥阮屐。不堪貧病客天涯。家鮮飽食馬無秣。四顧空濛發浩歌。歌聲然否同金石。
何時旭日麗飛甍。入夜玲瓏徧新月。莫嗟黍稷已成虛。三農猶望來春麥。心孺詩選十二

章大來 後甲集二卷

章大來。字太顛。山陰人。諸生。有後甲集二卷。爲康熙五十三年後三年間所撰詩文劄記。大來嘗從毛奇齡游。故詞章之業。頗有根柢。

咏徐天池先生青藤

山人宅畔留青藤。千枝萬枝相覆承。盤空天鼻有奇態。紛披珠珀交層層。忽疑天上蛟龍鬚。又如西城金銀繩。不然淩雲垂倒薤。興酣落筆書吳綾。大者徑丈細毛髮。行間茂密人未能。山人意氣殊骯髒。山人風流何跌宕。破帽青衫拜孝陵。窮年老守青楊巷。當時文采掩空華。倔強蒼藤兀相向。秦松已死漢柏枯。要汝冷落精神王。已看枝葉蔭天池。何煩天矯排雲上。只今花下寢牀欹。桐館櫻桃付泱泱。惟餘老幹閱滄

桑。鬢髮年年一舒放。中宵無人鶴歸來。月明彷彿還高唱。千秋萬歲知愛誰。枯樹蘭成賦惆悵。此籙青青終不改。時有雲烟互飄颺。後甲集上

陳至言苑青集二十一卷

陳至言。字山堂。又字青厓。蕭山人。康熙三十六年進士。官編修。嘗值南書房。與修一統志。四朝詩。佩文韻府。朱子全集。淵鑿類函。乃官不進。視乾隆時以四庫館爲捷徑者。有厚薄之分矣。撰苑青集。詩十二卷。文七卷。詩餘二卷。提要言無卷數者。未見其目也。詩五古極道鍊。律絕明秀。文多儷體。無纖仄之習。散文不爲八家所囿。體格俱不甚類毛奇齡。奇齡方標唐音。以其不學宋人。且鄉里後進才士。故獎藉之。提要以爲藻綺。音繁節壯。宜奇齡喜其類己。殆未審觀也。

江塘行

吁嗟乎。江塘行。東南巨海連蓬瀛。蕩天沃日搖蒼溟。百川萬派歸錢塘。江潮吐納隨虛盈。銀峯萬仞截江出。雪屋千重捍江立。西陵渡口蛟龍奔。越王城外江聲急。江聲夜發驚雷霆。斷岸橫塘五千尺。千尺橫塘長復長。大門小門如巍隍。怒濤滅沫盡消滅。海童不敢爭飛揚。可惜昨年四五月。野鬼穿塘水盡決。今年春漲水復來。兩渡紅潮誰可遏。馮夷擊鼓神蚪吼。排山裂石崩沙走。錢王鐵弩射不開。白雲青山兩環闕。倏忽城郭行江河。茅簷釜飢遊龍鼉。黑波滄滄數百里。高原峻谷流盤渦。可憐閩中婦。吞聲苦復苦。眼前

兒女同忍饑。忽聞水聲不敢啼。更有白髮人。仰天流淚俱沾巾。舊年種粟無官糧。今年耕田徒苦辛。吁嗟乎。江塘行。一曲一聲難爲情。苑青集

贈婁東村運糧漠北

鶴影琴聲百里封。才人未信說從戎。紛紛絳灌都相讓。鄴國當年第一功。
路入龍堆未敢遲。唱籌辛苦餉王師。胸中雅有安邊略。盡在陰山聚米時。苑青集

曹恆吉 曹江集十卷

曹恆吉。字可久。號石公。晚號曹江。上虞人。歲貢生。教授生徒。從游者衆。自負理學詞章。撰曹江集十卷。詩文皆無法則。而有時譽。豈以其制行甚謹歟。

笑西饑

少婦尙新粧。嬌羞泣道傍。一年兼水旱。鎮日怨農桑。鋤禿山山葛。鞋芒處處霜。哀鴻投絮塞。何處是家鄉。

墨吏千金易。流民半菽難。風霜愁遠道。魂夢怯驚湍。鬼嘯雲催暮。天高月訴寒。盈渠縱有淚。幾得到長安。曹江集七

宋起鳳 大茂山房合稿六卷

宋起鳳。字紫庭。號身山。自署蘭渚。謂世家潞之大峪。又稱與月峯先生同邑。然則餘姚人也。順治八年副貢生。官靈丘知縣。滿九年始調樂陽。撰大茂山房合稿詩二卷。文四卷。首陸來復序。亭林詩集。有陸賁士來復。武進人。述昔年代許舍人曦草疏攻鄭鄞事七律一首。自來不得來復行事。不意于此得之。來復與起鳳崇禎中同在國學。謂來復爲李執政座上客。時爲代筆。得東幣笏金。概以供客所最曠者。楊猶龍李長文翁仲千馮敦五。皆酒人也。李執政當是李建泰。自稱僑家西溪。有梅百樹。竹萬个。菓林菜畛稱是。梳田可佐釀。溪可漁。頗足藏身娛老。號山貞逸民。故炎武詩愁來忽遇同方友。相對支牀作越吟。頗引爲同調。起鳳謂于金陵交林茂之薛千仞宋子建劉純之蕭尺木。在都門與陳默公白仲調宋旣庭王匪奪結文會。皆一時名士。其詩逼近晚唐。才豐詞沛。隨物賦情。燕市篇。荒園行。有盛衰之感。揚州估。最能道明清間揚州鹽商奢縱情事。文善于序記。七誌言晉中七事。述晉商以鐵冶經商海內致富。又述樂戶始末甚備。是他書所未及者。

揚州估

二十四橋煙花繁。迎春驟躐黃金鞍。垂髻大腹目空世。錦棚寶邸等閒看。從奴簇擁多惡少。吹竽擊劍能弄丸。結交盡是五侯貴。日獻珍奇不計費。郡中良牧爾汝交。兒子姻親有太尉。大江千里巨舶走。海漉明

珠積山阜。吳楚食戶億萬稱。金錢易得惟量斗。年年塞下工種粟。軍國輸金猶未足。農官首策望羨贏。談笑捐貲無委曲。生男不使事詩書。生女不用禁門閭。天子富貴猶藉我。王謝子弟姑徐徐。生來坐擁佳麗地。細腰螭首日羅致。一笑珍珠一斛傾。石家梁綠尋常事。隋堤夜月吳絲張。廣陵濤起泛沙棠。醉來紅燭兩行列。提攜謔浪皆名倡。夜半呼城結隊入。折釵墮珥居人拾。十二高樓懸絳紗。牀畔香重擁爐立。晏眠直至宿醒消。白鹿青酥隔夜燒。千緡一饑不鑿口。中冷又汲過江船。自來巨富稱鹽鐵。不數銅山與金穴。如何朱門寒食墳。稀見樵灰飛白雪。大茂山房合稿一

余 縉 大觀堂文集二十二卷

余縉。字仲紳。號浣公。諸暨人。崇禎九年舉人。順治九年進士。官封丘知縣。爲民除包荒之苦。包荒者。清初河南人逃地蕩。募民開墾。設輿屯道廳董之。徵租反過于熟田。民復逃亡。郡縣乃以荒地之糧。攤于熟地。民盡失業。縉力請于總督李蔭祖。裁輿屯道廳。豁虛張之數。政聲甚著。十六年行取爲山西道御史。旋請終養歸。康熙六年起補河南道御史。出巡長蘆鹽政。伉直敢言。屢上疏陳民間疾苦。請撤三藩家口。議復撫臣兵權。雖不得請。實關至計。陳河防利弊。計地行鹽。籌慮周至。請復奏銷紳衿。請禁旗人販運私鹽。及請嚴禁畜優。謂近自京師。遠及外省。優戲煩多。幾等四民之一。而在外將軍副都統。及督撫提鎮等官。多自畜家樂。演習歌舞。此輩因得出入營署。恃勢凌人。往往索人賄賂。騙人妻女。浙東紹興

府佇雲玉蘭等班戲子。倚冒提標營勢。不分閩女孀婦。但訪有姿色者。即擁衆強娶。至有斷髮赴水而卒不免者。皆語侵勢要。爲他人所不敢言。十二年乞假葬親。遂不再起。卒于二十八年。年七十三。事具黃宗羲浣公余公墓誌銘。撰有大觀堂文集二十二卷。詩文皆有實事。不矜家數。亦無浮詞泛語。詩工力較深。七言頗有襟度。雜紀多足徵軼事。戊申康熙七年災異記。戊申歲山左奇聞續記。記是歲地震。戒嗜烟說。附錄嗜烟斃命之戒。知是時嗜烟者衆。及于閩閩方外。聖祖卽甚惡之。而不能禁也。兩浙利弊假逃詐害。言各處亡命。悉皆投賣旗下。滿地逃人。詐害無已。逆產株連。言湖郡自朱佑民正法後。奉旨變賣。搜查不遺餘力。刁惡棍徒。藉以報仇索賄。魚肉良善。無影飛報。脫空妄首。及審係無辜。已人亡家破。此弊蔓延多年。宜盡斬葛藤。以清株累。此等事。皆有關係。惜紀載無多。筆墨過冗耳。

貪吏行

貪吏安可爲。覆亡如轉轂。慘哉豺虎心。罷職罰猶薄。初似鷓能言。既效猱升木。譬彼波斯胡。藏珠挾其腹。又如醉渴徒。飲醜易其毒。狐媚結上歡。浸假恣威福。取索盡錙銖。烏攫寧遺肉。士民祝其去。日往神祠卜。胥吏畏其留。亦不辭握粟。數載地無皮。一日天垂矚。自云官已成。得時駕且擢。威聲震里門。氣餒吞流俗。忽爾心膽摧。白日驚幽獨。願君勿悲訝。得喪相循環。報者卽所施。何爲異此役。既免九族殃。又省一路哭。第恐孽未除。尙有禍根續。大觀堂文集四

癸巳冬日聞封邑河惠民疲書此志懷

大河之水日夜流。遺民何事堪徵求。愛民當效元道州。守官待罪無所憂。夜靜把酒登高樓。河津四望生百愁。平原茂莽皆神州。烽烟幾載成墟丘。幸今生聚稍樂遊。小吏乘時思噢咻。著書南牕告爾儔。東疇力穡待有秋。

大觀堂文集五

魚蠻行

客有從楚來者。語吾魚蠻之樂。又言其嘗稅之苦。作此記之。

洞庭五月波湧天。湘君山下無估船。月明照徹蒲葦裏。千家耦住聯菰田。菰葉田田盈洲渚。野人移宅雲深處。四時漁家在簷前。瓜菓離離生碧嶼。有時沽酒向村市。綠醪紫鱗共烹釀。童男少婦各陶然。醉鄉民謁無懷氏。睡起羣峯上晚烟。浩歌幾曲又堪眠。平明雨霽風清後。幾處扁舟共採蓮。自云本係楚編戶。浮家湖上忘年歲。南風吹往湖北住。北風又往湖南曳。雖愁巨浪履播掀。幸少官租與私稅。卜居陸地豈不安。安得長吏賢且寬。聊逐鷺鷥為伴侶。風月磯頭老釣竿。寧知苛吏如鯨鱷。吞嚙水鮮作羹臠。徵輸鞭扑及漁人。每俟秋冬湖水落。村農無計望涯泣。廢田不耕廬不葺。耨鋤拋却網罟焚。誰敢乘桴戴簑笠。吁嗟斯世苟可欲。雖在蛟宮猶逐鹿。波臣海若無寧居。渭上巖陵誰免役。水皮剝盡陽侯哭。矧茲地皮原在陸。

大觀堂文集五

癸丑夏日郡居苦雨

蠶城五月雨何密。濕雲壓簷黑如漆。街頭到處水圍門。路上行人泥沒膝。舟子艤岸如蟻房。亭午未炊空嘆息。牆摧未已穢生菌。兩月何曾脫簑笠。上年秋漲滄禾苗。農家比戶吞聲泣。幸有大吏請命勸。上邀官

清詩紀事初編卷七 余 續

八四五

家渙銖粒。賣絲糶穀望今年。誰道夏霖甚曠昔。一片洪濤浮太清。天風未吹海已立。麩麥方熟盡生耳。陂塘總決江湖一。侵晨插秋水浸階。薄暮耘田船入室。盎中粟罄婦兒啼。官裏催糧如火急。賣男貼婦安足悲。時有龔黃當見恤。大觀堂文集五

隴上行

委州帥初以淫虐不道。爲言者所糾。移鎮雲間。旋以通寇敗。賦隴上行。悲其愚也。

隴上傭。何太息。爲見城頭森劍戟。相逢攜手下太行。我曹均是少年場。生平扼腕富貴子。肯向遼東歌浪死。健兒馬上逞蹶張。同時亡命匿瓦岡。數年鼠竊那得飽。又有官軍常見討。黃巾昨夜破咸陽。天戈耀日來帝鄉。錦衣前驅爭拜舞。潢池革面皆迎扈。朝爲釜魚暮兜牟。意氣寧唯萬戶侯。南軍失守繫降王。乘風飛渡破建康。追亡直入婺州路。策馬臨江若神助。指揮已得劉現首。從此富貴真已有。蒼頭盧兒皆梟張。噴目裂眚誰敢當。搜剔珍奇翳塚墓。登輪督府歡相賀。黃金作屋貯娉婷。連房洞闔忘姬名。貧時思得田家婦。今日蛾眉滿朱戶。翠袖如雲盡可憐。明珠百斛水晶簾。有時咆哮類乳虎。美人歌罷色如土。有時歡宴遶山遊。羣姝環抱將軍頭。爲歡爲宴直幾時。一朝白簡帝聞知。詔移旄節向屢樓。寶劍分明賜杜郵。嗟哉傭夫思不得。月明猶想鮫人泣。大輸金壁餉中涓。欲作麒麟閣中緣。誰知器滿終當覆。空糞金錢莫相救。金吾飛騎自天來。綠珠碧玉尙歌吹。田園別墅遍湖海。倏忽有無唯一慨。最憐絕代幾才人。至此何曾得殞身。帳前屠殺夷丘壘。三木於今見廷尉。中丞執法劾無將。震電憑怒鋤緇狼。三尺已斷好頭頸。笑此癡兒尙未醒。士師豈肯議孛戮。不殺將軍冤鬼哭。隴上傭。應太息。寧知富貴生驕溢。酣歌恒舞膏王鉞。

豈是萇弘藏碧血。大觀堂文集五

王舟瑤 水雲集五古二卷長短句一卷

王舟瑤。字白虹。浙江餘姚人。舉人。官江西興安知縣。有才不遇。詩多悲憤抑鬱。不規摹一家。而時有合作。詞筆嫌重。殊乏輕靈委宛之致。所撰水雲集。僅存五古。疑有殘缺。據徐緘序其詞。謂所作多五古。然則原刻如此。選定其詩者陳允衡也。允衡選刻詩慰國雅。負鑿裁之名。頗稱舟瑤詩。以爲雄深雅健。故舟瑤爲刻勤補堂願學集以報之。附此集以行。

秋晚避地縣城率成

蕭索棲舊廬。非用躡高蹈。荆門日常掩。聊將適素好。固窮豈不難。知拙漸成傲。邈與世事疎。行吟獨浩浩。秋風動寒林。秋蟲夜愈噪。得性正寢跡。戒心迭見告。書室恃無恐。簞瓢賊所悼。寧知歲大侵。飢民聚作盜。縣官但漫漫。復助天爲暴。株守死密網。力田斃租調。揭竿緩填壑。玉石詎分燒。驚魂竝攢念。進退維有慄。靡神弗從卜。龜策未能詔。達者體變通。吉凶亦人造。白刃已交前。流矢那克料。舉家避地市。一塵暫相勞。脫粟既屢空。析薪置晨燎。如彼窮發奔。何暇擇木嘯。坐對憔悴色。臥聽雜沓譟。黃酒不成懽。餘帙忘翻校。荒宇積空埃。敗戶逐風標。濛濛夕雨零。械械繁華耗。遇物感節運。在否思泰道。水雲集二

毛際可 安序堂文鈔三十卷

毛際可。字會侯。號鶴舫。遂安人。順治十五年進士。官河南彰德府推官。改知城固。調祥符。舉康熙戊午鴻博不第回任。旋以事罷官。卒于康熙四十七年。年七十六。事具清史列傳文苑傳。著安序堂文鈔三十卷。較四庫著錄本多十卷。蓋際可先刻松皋文集十卷。有康熙丙辰李蔚序。後選松皋文。改刻板心。增以新作。爲安序堂文鈔二十卷。繼又取未選及新作增爲三十卷。卷末有受業王起東識語云。從留青全集中取失盜事。及覆勘仇板有據事二稿入集。又有先生後嗣克昌語。起東增訂。或在際可既沒之後。際可尙有松皋詩選二卷。拾餘詩稿四卷。浣雪詞鈔二卷。黔游日記一卷。春秋五傳考異十二卷。今皆不易見。則由乾隆四十六年王仲儒西齋集之獄。仲儒曾爲松皋詩選作序。上冊離珠集有際可贈王西齋詩。際可又爲西齋集作序。由際可曾孫原任江南道御史毛紹睿呈繳松皋詩選板片。又查抄際可詩文板片之寄存杭州汪日永家者。今文集尙易見。松皋詩選則不可求矣。際可專肆力于古文。記事之作。多有可觀。三毛并稱。際可爲較謹飭。若學則不足以望奇齡。

書琵琶亭遺址

商舟明月夜遲遲。絕勝紅樓歌舞時。却笑香山遷謫淚。無端淚對灑江湄。

名家詩
賦十一

方象瑛健松齋集二十四卷

方象瑛。字渭仁。號霞莊。遂安人。逢年孫。逢年明末以大學士死事。又東林也。故象瑛所至有聲。康熙六年進士。官中書。舉博學鴻儒科。授編修。歷官侍講。二十四年。告病歸。年方五十四。未讖卒年。事具清史列傳文苑傳。象瑛先刻詩文諸集。歸田後。哀爲健松齋集二十四卷。凡文十六卷。以下爲詩。曰秋琴閣詩一卷。爲少作。曰展臺詩鈔二卷。官京師七八年間所作。曰錦官集二卷。癸亥二年典蜀試時作。曰四游詩一卷。爲鄴游燕游越游楚游。曰萍留草一卷。甲寅^{康熙十三年}避閩難。遷杭州。與西陵諸子唱和之作。曰都門懷古詩。倦還篇。共爲一卷。南歸時所作。其詩律格俱備。個儻有致。顧自貴其文。與毛際可同。清初浙中爲文者。西陵越中競尙六朝。黃宗羲多記滄桑間事。象瑛與同里毛際可共爲八家之文。記序多而傳志少。適與宗羲相反。亦頗有名。然去侯魏汪姜尙遠。顧于詩文顯有抑揚。際可晚年遂不作詩。尤爲堅于自信者矣。

讀趙玉譜中翰隄上行感賦

道州春陵行。杜陵石壕吏。宛轉寫民哀。淒切詩中淚。關西老宿趙舍人。作令十年勤撫字。高標早竝赤城霞。再遷三輔還凋瘵。顛連婦子總關心。儒術由來通吏治。昨歲崇文詔選才。使君應召長安市。一官需次江南遊。徘徊隄上先涕泗。是時河決清水潭。淮徐千里皆崩潰。田廬決漉走蛟龍。秋風瓠子悲何濟。宸衷

憫恤命司農。水衡將作頻咨議。民勞民便務求詳。百萬金錢都不計。河梁使者冠蓋多。符牒倉皇謀水利。丁男死徒婦女充。鳩鵲千羣方集事。柳埽竹榿亦經營。策勳晉秩多殊異。不知何日慶安瀾。桃花乍漲還淪棄。吾聞禹績尙疏排。宣房築後隄防備。強水從人勞逸殊。橫亘長隄良不易。勞人草草將奈何。詩成未盡詩中意。君今身已致雲霄。西清掌籍絲綸寄。四方水旱盡周知。二賈成模應未墜。何不囊詩上至尊。莫令空負平生志。鍾松齋集十八

土穴

恆靈山中民。皆穴土爲居。窗榻几枕。悉就土成之。其巖依然鬱蘇也。戲爲絕句記之。

下營窟室上桑麻。几榻窓垣事事除。雨後炊烟青縷縷。始知土穴有人家。鍾松齋集二十

哀川北

七日發閬州。五日達潼川。中江近千里。四顧無人烟。蓬蒿沒道路。老樹長原田。豺虎白晝嘯。猿狖啼樹間。行旅各悄悄。怵惕未敢前。停車問野老。沃土古所傳。往昔全盛時。夾道多官廬。川北號陸海。民物紛喧闐。勝國當未造。焚燒徧郊原。兩川百萬衆。先後膏戈鋌。鋒鏑苦未歇。饑疫頻顛連。青燐照梓益。白骨橫巴綿。遺老哭吞聲。至今五十年。聖朝旣入蜀。下令亟生全。招民踰百家。爵賞殊翩翩。流移卒未復。曠土空連阡。比者再遭亂。才遺重播遷。婦子各相失。患難誰周旋。潼川亦都會。蕭條無數椽。州守傲茅舍。寥落同枯禪。城郭久圯廢。廡舍狐鼠穿。小民二百戶。眼勉輸官錢。大道通雲棧。力役復屯連。不知何時止。淚落如奔泉。太息語野老。慘實如君言。我行半天下。禍亂此最偏。天心幸厭亂。聖化方敷宣。兵革偃

不用。遺賦皆除蠲。汝等延殘喘。力穡謀所天。十年計生聚。烟火當依然。

健松齋集二十

廢墟

廢墟慘心目。烽火竟誰存。漫漶前朝碣。蒼涼舊日村。草深餘井臼。樹老出牆垣。感慨知何故。興亡未可

論。健松齋集二十

徐士訥亦種堂詩集五卷

徐士訥。字敏菴。淳安人。康熙十五年進士。官嵩縣知縣。陞濟寧州知州。二十八年。以開河賑飢二事勞劇沒于官。少工詩。撰亦種堂詩集五卷。詩有筆力。不事摹擬。毛際可稱其五言一撫七弦琴。再展風俗書。民物既康阜。我寧食無魚。眷此風俗佳。懷哉化日舒。所謂仁人之言。世間自有循吏。際可未爲虛譽也。

喜雨行

赭雲赤日烈且酷。高田低田水盡涸。四望忽成雲漢圖。三農愁絕豐年穀。撲扇無力兩手慵。難向陶潛北窓臥。夜半時聞桔槔聲。陡念家園幾負郭。尋幽何處石梁橋。驅炎欲抱玄冰宿。須臾西北片雲生。前雲未斷後雲續。賤子挈伴立門前。殷殷雷聲出山麓。倏忽涼生兩腋間。風雨欲來捲茆屋。方池水滿溝澮盈。披衣靜攝自捫腹。安步成吟興有餘。開軒轟飲當筵和。雲收雨歇月當空。千峯淨拭如膏沐。揮毫漫書喜雨

行。敢謂清吟追孟六。亦種堂詩集一

洪水行時寓邑邸

連旬淫雨如傾注。翻盆倒瀉無停住。陰霾不辨朝與昏。攤書難假隙光覩。黑雲四聚天欲垂。電掣雷轟亦可怖。晨起披衣急登樓。一江渾水籠烟霧。放眼山川盡改觀。南山之麓已無路。深恐蛟螭暗觸隄。無乃幽窟河伯怒。招招舟子覓蠅頭。一葉小舟疾如鶩。東薪搏樹如轉圜。賤售街頭不少駐。人家急數青銅錢。晨炊午爨喜有具。何處居巢梁棟傾。何物蛟螭能跋扈。人家半住水國中。灶不得黔人似鋼。滔滔汨汨卒未休。奔濤駭浪心神懼。蒼天蒼天聽我訴。願收積霖賜溫煦。麥秋強半在田中。莫將漂麥如流瓠。窮民流離不知處。亦種堂詩集一

見月嘆是歲寄荒。聞有歌曲聲。因有此作。

中秋月。皎如昔。見之令我百憂集。今年禾黍雖登場。秋來焦土遍原隰。田間餘粒富人收。貧者恐作溝中瘠。人生歡樂各有時。似此奇荒心轉急。俄聞宛轉來清商。知是豪華公子場。篋中無帛倉無糧。安能長樂夜未央。中秋月。皎如霜。見之令我摧肝腸。亦種堂詩集一

京師有以翻竿為戲者獨立一竿高可十丈直登其上翻弄不已口占一首

一竿高豎欲全欹。何啻層樓百尺披。渾脫不誇舞劍快。盤旋翻惜弄丸遲。倒身似鼠疑無骨。遶樹如烏尙少枝。浪說蹈江從未識。誰當絕技此稱奇。亦種堂詩集四

吳宗愛 徐烈婦詩鈔二卷

吳宗愛。字絳雪。永康人。適諸生徐明英而寡。康熙十三年。耿精忠之變。所部總兵徐尙朝陷處州。略金華。游騎至永康。故知宗愛有色。工詩及畫。必欲得之。令以宗愛獻者免。衆議紆難趨之行。至三十里坑。乘間投崖死。事具許楣吳絳雪傳。鄉人哀之。爲輯刻徐烈婦詩鈔二卷。詩思清絕。可入婦人集也。

舊宮人

宮人王氏。少時入福王宮。亂後流落江南。寄食尼庵。家君曾見之。歎舊事甚悉。命作詩記之。

回首深宮淚暗彈。過江消息路漫漫。霓裳有譜春聲老。綺閣無人夜月寒。空悔雨雲離楚峽。不隨雞犬侍淮安。衣箱賸有君王賜。零落寒宵秉燭看。徐烈婦詩鈔一

陳錫嘏 兼山堂集八卷

陳錫嘏。字介眉。號怡庭。定海籍。鄞人。康熙十五年進士。由庶吉士官編修。十八年。請養歸。居家八載卒。年五十四。事詳黃宗羲翰林院編修怡庭陳君墓志銘。錫嘏少從宗羲講學于證人學社。然于宗羲格物之說。不能盡從。粹然有道。不輕于著述。家貧。滄桑之際。先毀于火。繼爲兵所據。舉室蕩然。恃館穀爲生。然勇于爲義。同社董允璘早死。贍恤其家。終身不改。善詩古文辭。鄭梁爲選刻兼山堂集八卷。謂詩文不多。然試一讀之。天性之篤摯。問學之精微。立心之忠厚。制行之和平。不啻對其人而與之語。全祖

望亦稱其所養大醇。惜未施于用。蓋學道人也。

送梨洲先生歸竹橋

楓江一夜載舟來。杖底春風破碧苔。雪意前村歸未得。明山千嶂爲誰開。乾坤共是吾徒事。海嶠偏憐數子才。只恐凍雲猶莫掃。寒梅空逗臘中胎。象山堂集七

署中古槐歌

長安城中古木稀。黃沙市地烟迷離。闕東大道夾華轂。沉沉官舍相參差。吏部藤花翰林柏。好事紛紛傳帝畿。我來玉堂行柏底。牆邊斜偃虬枝低。柯亭無復舊時迹。樹木猶存人事移。惟有前廳古槐樹。凌霄高幹羅雙壩。此木或言元代物。周遮滿院光紛披。材大寧爲斧鑿用。根深不受風雨欺。歷年數百老垂鐵。疑有神靈長護持。經春未過棟花信。槐亭冉冉萌芽滋。夏來不覺生濃綠。長條碧葉香雲緋。清晨騎馬初入署。曠曠已上扶桑枝。舉頭却愛槐如蓋。篩光倒影垂簷扉。攤書嘯咏坐移晷。輕雲漠漠春晝遲。此時緩步長廊下。涼風吹花黃滿衣。徘徊嘉樹發三嘆。物生依託各有宜。此槐若委道旁種。飄塵誰復憐幽姿。不爾深山與大澤。寬閒寂寞徒自怡。今爾植根何得所。瀛洲且共青鸞栖。瓊臺翠閣儼咫尺。將毋造化爲爾私。古槐古槐慎自愛。婆娑莫令生意微。藹藹欲留千畝蔭。高寒直與孤雲齊。自是嶙峋多勁骨。不同桃李爭芳菲。天風一日挈空起。蟄龍出土蒼鱗飛。象山堂集八

壽林質菴先生

天留人物重東南。雙鬢羣看鶴髮鬢。往事斜陽五柳宅。新詩明月浣花潭。兩湖閱盡春光暮。萬卷收來午夢甘。且喜傳經爭繞膝。高堂容易酒杯酣。兼山堂集八

范廷諤 訥齋詩稿八卷

范廷諤。字訥齋。鄞縣人。父光陽。曾及黃宗羲之門。嘗攜廷諤聽講。師事鄭梁學詩文。光陽以康熙二十七年成進士。官福建延平知府。廷諤助治官文書。後遂游食四方。晚始以捐納知縣。選授福建會寧知縣。康熙五十八年卒于官。年六十六。撰訥齋詩稿八卷。詩格極類鄭梁。別有邊防要略。海防議。律例箋注。爲人所稱。今不傳。

自責

災祥在人不在天。此語上古相流傳。書生薄命何至此。年年處處遭迍連。憶自申年歷換甲。藥竈參爐日夕煎。乙酉正月初四曉。嚴親棄我忽登仙。老母高年稱善病。撫棺痛絕痰塞咽。二月下浣之五日。瑤池永隔紫雲駢。哭父哭母心如結。有妻相對淚漣漣。天復降禍丙戌夏。臥病七日歸黃泉。堂上雙親今何往。閨中妝鏡空自圓。親朋勸我離家去。免使哀愁胸膈填。丁亥客越越大旱。田如龜坼草如然。男啼女哭聞不得。大家小戶餐糠饘。入秋得雨連三月。池魚逐隊遊高阡。刺史日日具牛酒。叩頭流血湯公前。水退禾腐餘空草。夏旱秋霖皆可憐。一官無辜棄如梗。我亦空囊聽杜鵑。臨安郡伯父年友。戊子邀我相周旋。蕭齋

日聞簷溜響。高梧老柏淚潺潺。七月八日尤駭絕。螭狂龍怒吐腥涎。鎮東高閣隨風去。濱江船壓臥牀邊。高圩下岸皆潰決。蠲賑何能解倒懸。況有達官來審錄。死刑死法囚相牽。兩年浪迹逢天怒。己丑家食圖安眠。蠶蟲蛀稻市無米。疫鬼窺人命不堅。東鄰少年如虎猛。西家幼婦似花妍。三日五日歸黃土。遂使親戚相棄捐。甬東闔閭復大火。將軍親許攫金錢。火中攫金猶之可。未火欲令起紅煙。自訝吾生螻蟻賤。何至到處人睜睛。故鄉他鄉終有別。呼童爲我整行纏。今年五月來京口。小溝斷港成巨川。二麥發紅秧欲萎。羈人聽雨方踟躕。何爲一晴五十日。呼口將乾眼欲穿。茅山道人皆裹足。懶龍軒睡誰能鞭。我欲封章叩上帝。此災恐因我移遷。但聞齊魯與晉楚。歲俱未登疫未痊。有情憤憤莫可訴。毋乃天意非人緣。百花釀酒酒香冽。爛醉且眠猩紅氈。忽夢帝召趨金闕。闕前有鶴舞蹁躚。修文仙郎傳帝命。狂生之狂何時悛。汝父汝母踰七十。汝妻亦過半百年。死生豐歉皆有數。乃敢雌黃相詬訶。汝代三農憂水旱。何不勸之改業圖自便。降卒家奴皆八座。白丁黃口珥貂蟬。奚爲不度德。不量力。朝辛苦。暮顛連。婦子兄弟羣聚而耕此不可知之瘠田。詒齋詩 稿五

鄧西竹枝詞

結伴燒香謝女王。年年寒食十分忙。女王今變男王坐。趁早回船到墨莊。夏萬王廟祀爲謝女王。今已廢。正。墨莊張氏別業。即黃過草堂。
荒墳古廟枕江鄉。山伯凝眸望九娘。千載相思情未了。夫妻配得總尋常。梁山伯曾爲鄒令。至今廟食城西。廟前有祝英臺墓。
黃公林已換黃姑。缺少香錢廟祝無。不及公姑齊塑像。男穿犢鼻女當鑪。黃姑林。本黃公林。即黃公舊酒壇。不知何年訛事女像。刺使李公力爲改正。遠近

睿遊士女。遂無
復過而停車者。納齋詩
稿五

裘璉橫山初集詩十六卷文一卷

裘璉。字殷玉。慈谿人。諸生。少有雋才。撰橫山初集詩十六卷。文一卷。刻于康熙二十年。詩分雪耕稿。覽筠稿。桐帆稿。信菊稿。倚江稿。臥南稿。溯川稿。格調甚新。姜宸英爲之序。稱其辭藻豔發。足以名家。而不諧于俗。其文皆史論。筆亦廉幹。

西江紀事

漢帝醺彭越。晉王礮鍾會。冠履一已嚴。懷心安可貳。豫章楊將軍。本從海島至。田橫悔輕生。魯連暗大義。斗印垂金紱。櫺櫓貂璫戲。西南倣喪亂。楚蜀莽多事。迺當戎馬衝。而蕃敦溫志。賢哉中丞公。談笑擒逆帥。朝侯博陸邸。暮懸太白幟。杜秋金縷衣。夜帳琵琶醉。瓦礫歇歌舞。灰燼揚珠翠。哀蟲響頽垣。寒禽立壞器。誰知上蔡犬。千古有餘喟。橫山初集詩八

將軍行

將軍將軍自北來。動如江海疾如雷。且勦且援天子命。盜賊安壘民驚猜。昨日纔聞信州破。今日還傳建昌墜。撫鏡贛州望風降。旬日下城三十座。將軍飲酒還高歌。席旗枕鼓擁嬌娥。琵琶高翻塞上曲。齊姜宋子淚如波。韋帳不陳居夏屋。葛紵棄捐涼綺縠。東芻粒粟民脂膏。委巷填塗嗔不足。去病蒼頭衛青奴。日

碑況復降休屠。小官鞭箠大官咤。亂國由來重武夫。頃之急詔趨征戰。倉黃鹵掠民逃竄。健兒怒取成周禾。鞍馬逍遙飲河畔。將軍白馬茜繁纓。中有駟車玎璫鳴。借問七香冉冉誰。雜羅愛妾不知名。吾聞習戰吳宮女。夫人錦繖風中舉。未聞歌舞勝男戎。豈是妖姬惑晉主。天昏偵騎夾塵飛。丈人長子輿尸歸。可憐子女他人抱。可憐繒帛他人衣。血污遊魂號生土。新鬼故鬼羣相侮。死者能報生者仇。寄語將軍勿忘死將軍地下苦。橫山初集詩八

鄭梁 寒村詩文選三十六卷

鄭梁。字禹梅。號寒村。慈谿人。康熙二十七年進士。選庶吉士。改戶部主事。由郎中出爲高州府知府。未二年。請養歸。晚得風疾。號半人。素善畫。病後以左手爲之。益佳妙。撰寒村詩文選三十六卷。其詩曰見黃稿詩刪五卷。五丁詩稿五卷。安庸集一卷。玉堂集一卷。歸省偶錄一卷。還朝詩存一卷。玉堂後集一卷。寶善堂集二卷。白雲軒集二卷。南行雜錄一卷。高州詩集二卷。其文曰見黃稿二卷。五丁集二卷。安庸集二卷。雜錄二卷。雜錄補一卷。詩文合者曰半生亭集一卷。息尙編四卷。卒于四十九年。年七十四。梁詩學東坡。有極俊爽處。有句云。敢云坡後有寒邨。其瓣香可知。四庫提要謂其詩似偈。實摹莊定山。非篤論也。學于黃宗羲。得其文筆。無小說氣。亦無宗羲雄傑之概。豈才力有所限耶。究不失爲浙東一大家。父溱少與宗羲交好。因作二老閣以祀之。藏書刻書在焉。清季猶有存者。

告求舉博學鴻儒者

時新任臺省者。俱補牒續薦。

博學鴻儒本是名。寄聲詞客莫營營。比周休得尤臺省。門第還須怨父兄。

內多勢要子弟

補牒因何也動心。紛紛求薦竟如林。總然博學虛名色。袖裏應持廿四金。

聞鴻儒一名。價值廿四兩。

五丁詩稿一

姜宸英 姜先生全集三十三卷

姜宸英。字西溟。慈谿人。諸生。工爲古文。有盛名。以荐入明史館。纂修刑法志。後從徐乾學洞庭山一統志局爲分纂。康熙三十六年。成進士。入翰林。後二年。充順天鄉試副考官。以物論紛紜被劾下獄病卒。年七十二。事具清史列傳文苑傳。光緒中。鄞人馮保燮王定祥哀集宸英所爲詩文而盡刻之。爲湛園未定稿十卷。西溟文鈔四卷。真意堂佚稿一卷。湛園藏稿四卷。湛園雜記四卷。湛園題跋一卷。葦間詩集五卷。湛園詩稿三卷。詩詞拾遺一卷。都九種三十三卷。曰姜先生全集。唯四庫著錄之湛園集八卷未得。而藏稿則皆自宸英手稿錄出。序例稱于原集不敢增省。然未定稿原爲六卷。今改十卷。門目次第。亦俱變易。所稱初刻未定稿。較二老閣本多二十餘篇。亦未指出所多者。何不即以初刻本重雕乎。宸英集外詩詞。尙爲之補輯。而序文之散見于清初人文集者不少。乃不爲收拾。未爲得也。然宸英之書。久而漸佚。求之不易。今竟能刻爲全集。表章之功。爲不可沒矣。宸英之文。較侯魏爲近雅。較汪爲弘肆。敘事或稍遜耳。究不失爲清初高手。詩亦調高格穩。頗有寄託。自注尤足徵軼事。何焯素輕之。焯博覽。善校勘之。

學。固非宸英所及。如以文論。則焯集具在。安能望宸英乎。

贈陸翼王徵君

陸就徵召試前一夕。夢師黃陶庵手書碧血二字於其掌中。試果不過。

入洛知何歲。風塵且未間。夢中猶碧血。歸計失青山。學禮淮陽後。歌詩易水間。春風兒女態。莫苦鬢毛

斑。集三 葦間詩

偶題有韻

祗爲塵多舉扇遮。可知惆悵爲東華。三春已過芳菲歇。冷落棠梨一樹花。此人枚下不得。有須避東華仕宦人之句。時前朝進士止此一人。集三

雜詠

別殿新營灞水涯。鸞輿從幸盛官釵。俄傳長信金根出。一路期門促打街。

漢家守相重山郎。柱史何勞費皂囊。多爲錢神驅使得。故將考課惱京房。

大夏烏孫自鬪兵。王師薄伐豈無名。鑿山煮弩辛勤甚。贏得歸來太瘦生。謂二使臣。集三 葦間詩

徐文駒燕行小草二卷

徐文駒。字子文。號耿菴。鄆縣人。康熙己丑進士。官懷仁知縣。以虧空監追致死。全祖望續甬上耆舊詩稱其年少有才氣。致力于詩古文辭。成就可不後人。而性傾危。姜宸英素所嚴事者。科場之獄。以己不中。竟投石下井焉。他若乾沒人資。與僕從結昆弟交以婪貨。居官多致姬妾諸無賴狀。謂錄其詩。薄其

人。以爲有文無行者戒。有燕行小草詩文各一卷。康熙二十八年北游時所刻。蓋行卷也。詩頗清峭。文有才辯。圓丘賦不愧名作。顧自公先生墓誌銘。謂三不朽立德莫重于節義。立言莫重于文章。二者皆人可自主。獨至功名之際。則有幸有不幸焉。蓋可爲者人也。不可爲者天也。唯論時藝之作。幾及三十首。自社盟禁後。人人可操選政。以言資生。時藝所得過于詩古文者多矣。故呂留良戴名世何焯皆甘爲選家。文駒若始終衣食于此。猶不致縱慾敗度也。文駒後刻師經堂集十八卷。

送呂無黨南歸

客邸愁言別。君行奈若何。干城吾道少。樂事故鄉多。柳暗穿烟度。花明帶月過。方今詞賦重。漫說老松

蘿。燕行小草上

李元鼎石園全集三十卷

李元鼎。字梅公。吉水人。天啓二年進士。歷官光祿寺少卿。順治初兩爲兵部侍郎。兩定死罪。幸免。康熙九年庚戌猶存。年七十六矣。事具清史列傳貳臣傳。撰石園全集三十卷。爲星存草。太華游草。南歸日涉。焚餘草。楚游草。出山騰語。心遠廬吟略。潞游草。問津草。歸夢寓鈔。偶遂草。鴻雪草。東湖隨筆。聽鶯草。秋山紀游。凡十卷。遺詩四卷。灌研齋文稿八稿。皆元鼎所爲詩文。唱和初集。隨草。隨草詩餘。鏡閣心聲。隨草續編。亦園嗣響。凡八卷。則與其婦朱中楣唱隨之作。中楣本名懿則。世謂遠山夫人。中尉

議汝中女。元鼎詩不落王李鍾譚窠臼。追摹歐梅。頗具意境。中涓清才。陳允衡撰國雅。唯取中涓與黃皆令之作以當閨秀。可謂嚴于品題者。元鼎居官無可稱舉。獨喜從文士游。陳弘緒文德翼號為高逸。乃與元鼎周旋。錢謙益有學集遠山夫人四十初度序。作于庚子。順治十七年然則中涓已卯崇禎十年適元鼎。方十八耳。元鼎時年四十四。中涓才名。至勳帝王歌羨。廢太子指名索其詩集。又柳顧之所不及。

灌瓦研詩

余家有古研。得之金陵老友薛更生。其世藏也。研形五瓣若梅花。色如金粟藏經紙。中邊血斑。翳翠隱起。似出土銅。叩之作金玉聲。細膩發墨。亦奇珍矣。相傳為灌墨廟瓦。洪容齋守贛時。獲於零廟左池。竊為研銘以章之。語載續筆中。辛丑秋日。余偶遊零陽。考郡邑志益信。志云。研重十斤。兩關兩角。其光泚然。色正黃。余研光色則同。但厚止二寸許。重不及十之一二。豈後人剖而成器。不止余之一研邪。嗟乎。灌將軍往矣。今欲尋其廟之故址。無有識其處者。獨此一研。令人憑弔歎歎而不忍置。此吳融所為賦古研。有塵土依人而伍瓊瑤句。蘇子瞻銘龍尾而云。閱人於古今。蓋感慨係之矣。因賦小詩。貽同志者和焉。以成一敗佳話云。

梅花研久伴燈青。金質黃流范古研。漢代何人尋灌壘。零陽有志紀洪銘。方之銅雀歌鐘遠。潤以玉蝓戰血焚。珍重傳家供翰墨。毋煩端歛斲山靈。石園全集十

李振裕白石山房集二十八卷

李振裕。字維鏡。號醒齋。元鼎子。康熙九年進士。由庶吉士授檢討。官至戶部尚書。以黨于廢太子革職歸。卒于四十六年。年六十七。撰白石山房集二十八卷。凡詩十二卷。文十四卷。詩補二卷。詩文皆有工力。詩編年體。惜多紀恩之作。不足證事。文無甚關係。振裕當官無政績可言。而需用頗專。喜從文士唱酬。而物情不附。與王士禛齟齬。未得其故。度必同官傾軋。葉燮自謂因婪索夫馬。供應未遂。為其所螫。

罷官。振裕居憂時。流寓白田三年。與變失歡。必不止夫馬一事。或由文字相輕之故歟。

南昌卽事有感

八閩六詔烽煙急。萬騎千軍動地來。不謂江關無事日。翻令廬井等寒灰。中丞祇解防川術。上將奚勞更築臺。聖主宵衣親下詔。斯民何以報涓埃。白石山房集三

感事

東南民力近如何。牒吏沿堤盡日呵。天語疇咨憐赤縣。使臣辛苦閱黃河。十年未罷宜房築。九列同興瓠子歌。百萬錢刀填澤國。賈生三策孰爲多。白石山房集四

奉命勘荒畿輔感賦十首

七錄

上章敦牂歲。如月當芳春。于役燕趙間。策馬行峻險。風塵滿袍袴。奔走及五旬。所歷非一狀。艱苦難具陳。繪圖所不及。到處逢悲辛。天行亦何酷。使我涕霑巾。

東南傷白波。西北苦燠旱。火雲燒碧天。耀如九日爛。黃塵撲面來。極目吁可憚。縱欲焚巫尪。詎能紓此難。伊予飽天祿。束手徒浩歎。安得凌青霄。手自抉雲漢。挂流灑遠空。原野溥浩瀚。庶幾慰我民。復得事耕爨。

藟茨掘已盡。雀數捕亦稀。燕南千里地。道殣民命微。東風二三月。百卉揚芳菲。感彼鬻桑人。盡室恒苦飢。流亡滿道路。破屋生蟪蛄。蒿目不忍觀。攬轡情歔歔。

短柳覆土垣。炊煙冷荒縣。驛館暫停驂。馳驅未云倦。烝黎實孔疚。不飽藜與莧。遮拜迎馬首。鳩鵲無顏面。餘生寄溝壑。踉蹌手足戰。余懷爲酸辛。朝餐不忍嚙。

州里固蕭颯。村落尤荒涼。曠野日空虛。困籠無蓋藏。賣牛還鬻兒。攢首歎群羊。堪憐弱齡女。乞食大道旁。豈不知禮義。飢餓情倉皇。面鰲兩足胼。百結無衣裳。

矜嫻立老翁。襤褸走村嫗。滿目皆瘡痍。匍匐繞童穉。飢寒不能耐。徒倚陌頭樹。顧影不自持。前行每僵仆。乞歸藜藿羹。覲面那相顧。昔時朱陳村。羊酒歡嫁娶。今日聚道旁。相視如陌路。

西連井陘道。北與醫閭接。長路多野殍。飢烏啄其膏。敗屋儼枯槎。殘黎如病葉。渾河一線來。悲風爲颯沓。中有凍餒魂。飢腸苦疲茶。我馬亦已頹。殘陽空蹀躞。白石山房集七

伏雨徂秋霖潦不止復聞南省苦旱仍用前韻

城上啼烏飢攫肉。城外泥深馬沒腹。禾頭生耳苦望晴。珍重田家謹儲蓄。決渠放水走市人。寒裳濡足憐僮僕。長途一望白波連。老客難誇津路熟。樹梢明滅間煙墟。雨脚縣巨垂山麓。生憎暑溼損高眠。安得秋風掃茅屋。一罅纔明透火輪。萬條又見拖銀竹。蠶蟪出角似牛行。鵝鳩場翅如鷲禿。通衢委巷半乘桴。急溜衝簷驚瀉瀑。霍霍電鏡飛神光。隱隱雷車不停轂。東南聞說苦驕陽。俯仰枯槁空旋轉。頻年秦隴大饑疫。十室九空飯榆粥。今歲來牟三兩岐。定知天道更贏縮。幾人漂麥尙高吟。幾人挂角方行讀。祈晴禱雨異地殊。困倉那得珠千斛。飢溺時動膏肝憂。膏澤下潤需良牧。隨車德雨旣油油。臥閣清風還護護。如此

數輩布寰區。災沴無憂俗諧睦。白石山房集八

李來泰 蓮龕集十六卷

李來泰。字仲章。號石臺。臨川人。順治九年進士。官工部主事。出爲蘇松常鎮糧儲道。裁缺歸。舉康熙十八年鴻博。授翰林院侍講。二十年典湖廣鄉試歸。卒于京師。著蓮龕集四十餘卷。毀于兵火。雍正中從曾孫天申撥輯而成是編。爲賦一卷。詩三卷。文十二卷。來泰才氣橫溢。詩文皆近雲間一派。集中雁字詩三十首。與有學集此題和橋社吳不管十二章。當同是丁酉所作。又有和卮仙美人飲烟詩。知是時閨閣已吸淡芭菰矣。他作類此者不少。蓋才人之作而非詩人之詩也。王士禛居易錄稱來泰試璫璣玉衡賦列第一。陳其年彭孫適皆不及。此冊封面注明史列傳副刻。後遂無傳。殆湮沒矣。

道傍理織

曾聞紅女佐三農。太息年來杼軸空。大布尙方崇儉德。御衣中用松江三梭布公堂下里竭常供。使槎如識支機近。椎髻偏憐絡緯工。椎髻操作吳中僅見爲惜如雲諸女伴。空教步履費春風。蓮龕集三

游東昇綠映樓文鈔二卷詩鈔一卷

游東昇。字日生。臨川人。順治十五年進士。未仕卒。撰綠映樓文鈔二卷。詩鈔一卷。工爲古文。胡亦堂刻

臨川文獻十四家。其文與章艾羅陳並重。初有文集三十卷。經亂多佚。其孫祖魁。乃輯爲此編。其請免覆丈。陳時弊。條議大馬。禁買穀諸篇。皆關地方疾苦。所謂時弊。莫甚于土官。用兵之初。權宜招降。于是標下設標。委官復委。大者參軍。小者監紀。游都鱗次。守把蟬聯。招亡命。集奸民。開幕府。樹廳旆。搜括資財。盡歸豪右。次則土兵。土豪領劄。競爲召募。大者百人。少者數十。隨征則藉以掠財。坐守則資以謀利。每名按期責稅。謂之月錢。又次則衙蠹土棍之害。蓋改革之際。奸人乘機肆虐。東昇時爲諸生。不堪其擾。乃散家財。倡都禁爲鄉里捍患。傅振鐸之出。亦東昇愆愚之。以是得名。詩非所長。然皆有事可指。

傷農

載讀生民詩。種植洵有道。遺種育千秋。禮祀配蒼昊。國本賴於農。稼穡允爲寶。吉士昔橫經。躬耕蘊宏抱。仕宦捷徑圖。工賈濬餘巧。乃始餘農人。曩然田間老。衣食所從出。衣單食不飽。壯者棄犁鋤。尺籍行間躡。黠者委錢鑄。揚揚代耕好。惟餘衰罷翁。殫力媵茶藜。醫乃存心厚。不樂淪澆狡。稅給公家需。租供田主討。田主匪獨安。三征疊催擾。官庫及官倉。額編非可少。洊至猾吏胥。凶獍匹山獠。雜派逾正供。剋削無時了。黃鳥聲啄哀。腴田委荒草。相率避征徭。非特畏兵燹。雨暘豈不時。樂歲均早潦。所以道途間。往往悲餓殍。何處建德鄉。可以栽梁稻。我願從之遊。結屋誅菅菲。朝驅黃犢牛。夜夢繞旗旄。閑閱清靜篇。舒此中心慄。暢然古今同。不覺天地小。

綠映樓詩鈔一

弔鎖城

鎖城雄厚關門壯。三面阻水難渡飛。中藏戶口十餘萬。戶三男子數可齊。將卒不下三之二。驍騰戰馬決怒蹄。犄角未聯成牽掣。遲疑捕鹿有熊居。從來輕發喪功實。黃石素書不我欺。堅壁四望援師至。一戰敗。馭氣先摧。高山落日哀風送。別浦朝雲慘氣嘘。今我彳亍溝塹畔。颯颯寒聲有餘悲。綠映樓詩鈔一

春田捕螺

春田浩浩。育育歡多。問誰極歡。莫如田螺。去冬天大旱。湖焦川無波。田螺依岸草。苟活望春和。昨日捕螺之令下。縮肉斂體向湯鍋。步出城西北。有嶺泣山阿。阿夫無貨賄。觸害羅網羅。捕人尤甚捕螺急。可憐骨肉盡消磨。田螺雖死猶留殼。骨肉消磨奈若何。綠映樓詩鈔一

游 恢深柳堂遺草一卷

游恢。字廓治。臨川人。諸生。撰深柳堂遺草一卷。初有坎廛草之刻。比沒。李來泰復爲之選刻遺詩。謂其詩具體儲王。初或間近長吉。晚乃浸入郊島。不免過譽。然取徑甚高。一唱三歎。亦足吟諷。來泰又謂順治之初。江右劇亂。恢息影山中。爲友人急難。遠近有顧廚之目。今觀所與游者。彭士望傅占衡皆豪傑之士。恢之爲人可知。是則可稱者耳。

擬客歸者

亂離何處好。仍履舊山川。形影恨相識。聲情喜共全。問人多野塚。看屋半荒田。童僕羽毛散。寥寥悲此旋。深柳堂遺草

亂後入豫章

予今已有淚。欲灑不能留。聊學西臺哭。爲追故國秋。黃葉霜後落。野竹雨中幽。人事一朝盡。空留揚子

州。深柳堂遺草

病劇偶占十首錄一

淒風搖亂竹。似作不平鳴。時事三絨口。年華一轉睛。鍊煙分活火。按劍破疑城。弓影非吾病。痛心熱血傾。深柳堂遺草

憂旱四首錄二

荷上露珠傾未圓。龐眉野老疾呼天。弘羊有罪魘爲虐。鄭俠無圖誰見憐。石燕幾時翔澗谷。玉龍何日下溪田。未秋草木先黃落。安得南風譜七絃。

澧泉不應師襄絃。白鳥翻飛過野田。柳畔蟬聲因露咽。江皋木落使人憐。桐花有影偏嫌日。流水無波欲問天。笑畢難憑仍閉戶。怕聞今夜月還圓。深柳堂遺草

清詩紀事初編卷八

丁編

李因篤 受祺堂詩三十五卷文四卷續四卷

李因篤。字天生。更字孔德。號子德。富平人。諸生。究心經世之學。明季嘗走塞上求勇敢士。入清屢北游雁門。南游三楚。皆有所圖。欲師事顧炎武不可。乃爲友。炎武在山東以啓禎詩選作傳事爲人告發入獄。因篤走三千里脫其難。名日高。與李顥李柏稱關中三李。康熙十八年召試博學鴻儒。授檢討。以母老乞養歸。講學于朝陽書院。發明橫渠以禮教人之旨。論有守有爲之義。而斷之于審幾。以著思誠之體。其論學必縮以經。說經必貫以史。尤熟于有明事蹟。著有詩說。春秋說。漢詩音注五卷。漢詩評五卷。古今均考。及受祺堂詩三十五卷。迄壬申^{康熙三十一年}止。王弘撰待菴日札刻于戊寅。^{康熙三十七年}寄李中孚札云。孟常旣逝。子德繼隕。因篤當卒于此一二年內。考因篤試鴻博時。年四十九。至是爲年六十八九。清史儒林傳言王鴻緒明史稿成。就正于因篤。時老病臥牀褥。令二人讀稿。命之竄易。半年而畢。史稿列傳二百八卷。進呈在康熙五十三年。是時因篤不應尙存。就正事或有之。而不當在稿成進呈之時。其詩激楚淒涼。得工部之神。最善五言排律。哀然一集。足稱大家。故曹溶論詩。推爲一代之首。文集四卷。續集四卷。道光中始

刊行。非其至者也。

舊年寧人先生以無妄繫濟南走書報我觸暑馳視苦疾作辭還先生寄贈行三十韻詩

春日晤保州重會薊門奉答前詩廣五十韻

臥病三秋色。懷人五岳情。涼颺吹夢起。啄雀喚愁生。客返關中路。書傳曆下城。客秋有鄉人至自濟南。拜先生書。倒衣初罷

枕。垂涕復沾纓。巷伯詩難讀。梁園獄已平。長吟歸黯淡。別緒鬱縱橫。憶折前津柳。同炊古寺羹。前年與先生同客慈

仁寺。予先別去。有孚謀且窒。無角兆先成。遠道兼葭隔。周行坎窞并。莒萊矜野語。虞芮亂羣聲。歡起因小人事先生田歎權江

波大。潏揚海汐輕。時訟價株累多人。用已結海上事。羣疑紛所出。衆口漫多驚。智勇徵夫子。艱危詎此行。奮身甘下吏。微

服恥爲氓。易象繇斯昉。騷歌比類明。經旬喧地埽。舉國丐天晴。時地震。淫雨。節至通蘋藻。先生在難。不廢時祭。愁來憶弟

兄。會要肝膽契。況忝雪霜盟。草蕪虛炎月。雲高隱暮旌。罷呼燕市酒。過決薊門程。戊角迷丹幃。河陰護

綠衛。崩堤頻淖馬。廢塢剩聞鶯。水旱憂兼劇。誅求慘自鳴。時道多流亡。別自有時。此邦哀瑣尾。何室厭香橙。觸目難

俱述。驚時已漸更。馳聞灑隰盡。頗喜岱嵐迎。膏沐誰遑理。壺煖欲就傾。長途晨上調。羈邸夜班荆。續燭

探行筇。聯牀敞外楹。年華窮不減。日錄老逾精。先生時成日知錄若干卷。恨失登山約。嗟爲抱甕貞。徘徊違魯賻。劉大

放未能。避迓合秦箏。鄉人聞天木以事滯山左。閣彷彿溟嶽。泉憐趵突清。趵突泉東。有白雲樓。狂濤終砥柱。直道益崢嶸。旅食悲寒

及。歸舟阻潦盈。依然垂橐去。率爾采薪嬰。左次才彌拙。西還意若醒。貧非荒竹徑。渴豈募金莖。急難睽

良友。端居惕遠征。寸心如漭落。中夜幾屏營。自得分魚素。空教怨鹿茸。川原仍獨往。伏臘互相衡。甫定

他鄉榻。俄從上日旒。

先生以二月朔至

好音隨杖屨。佳會足公卿。律轉堅冰解。春迴早卉榮。斂才期近物。逃俗勵

修名。忽復追鞭弭。還來過帝京。□詢邛邑樹。誰薦寢園櫻。

時在清明

進履耽逢石。將詩悚報瓊。雍田關華好。

爲稱待躬耕。

時先生與無異有華山下築之約

受祺堂詩十二

張表 張右訥漱墨軒初集無卷數

張表。字右訥。朝邑人。順治六年進士。由庶吉士授國史院編修。謫鄭州州判。有張右訥漱墨軒初集。僅就詩文名體。略分次第而已。刻于十七年。詩文有真氣而不免粗率。表母年過八十。嘗以九年所假省母。翌年告終養。屢請不允。奉上傳京官所假丁憂限滿不回京。吏部從嚴參奏。是時所假最難。南人尤難。蓋恐其有貳心也。表告養呈文。皆載集中。可備掌故。

憂霖

麥秋逾月來。幾幾三伏毒。民間遍漁筧。天上水龍鬪。馬頭夜夜滴。玉京潭不究。粟棉根葉滋。稂莠隨乘茂。豫雍數千里。相嗟澤國卹。瓜蔬久廢墮。來牟場中臭。昨朝景微曦。雲掩不通晝。有時細如絲。有時霆電驟。高屋亦送濕。新築皆成漏。憲府忘雨徵。有司充耳裏。祈晴邑邑是。祝辭徒沿陋。可憐余小民。剜心已無肉。薪米市告稀。厨間且無糗。公賦追呼頻。大軍羣作蹂。流輸大小米。鷄鶩成輻輳。悲哀唯有天。百物復久滯。素餐愧微官。空教眉作皺。

張右訥漱墨軒初集

紀歲篇

兩陽三載殊不勻。丙申春夏魃入秦。處處呼饑與零祭。秋期半穫欲空困。三冬奇煖無冰雪。小至以後雨
潑塵。沿及丁酉寒食外。燧日長焚百水蘋。道路相逢各悴面。都說箇是溝塹身。余亦齋誠率衆禱。宿壇曾
過二餘旬。鶯喚來牟不盈尺。浴佛詰日雨初淪。枯苗不受涓滴意。稔時比比嗟赤貧。隄前窘乏不遑計。只
將甘霖顧青旻。午日幸沾濯枝潤。黍稷勾萌展積饜。三伏火雲仍燒野。有無共是自危人。市上乞糶絕負
販。洵洵綠林又布狷。憂亂心膽朝暮碎。嘗恐動我老慈親。倏忽雨逐梧葉落。秋疇從此一精神。新穀能償
農子願。謂是滌場竟似幽。花木欣欣感晚澤。霜侯爭鬪向時春。冬暖猶有客冬氣。雪重却異無雪辰。戊戌
之年更別令。風陳陳其雨因因。二三月來靈雨劇。萬物相見此時真。直到四月雨不絕。三日五日暗千闌。
禾花泥裏愁秀實。莠竊霑足並日新。渭川奮漲迷南畝。徒惹良農睡不仁。年來解得上天事。化育無贊豈
能均。張右訥漱
墨軒初集

補判之日余自志有矢忠唯飲鄭邦水之句抵鄭實歷因廣爲四絕四首
錄一

矢忠唯飲鄭邦水。此水鄭人亦用嗟。兩渡大軍兩額賦。家家稱貸賣桑麻。張右訥漱
墨軒初集

楊素蘊見山樓詩集

楊素蘊。字筠碧。號退菴。宜君人。順治九年進士。轉御史。以劾吳三桂鑄職。三桂反形漸露。峻擢京兆

尹。官安徽湖北巡撫。其行迹頗類郝浴。撰見山樓詩集。康熙二十七年所刻。已罷官矣。四庫提要稱其詩頗摹李夢陽。今細觀之。唯不學宋詩耳。律絕頗有佳篇。七古最下。蓋有才而未檢繩墨者也。四庫著錄者詩文同集。未見。尙有西臺奏議一卷。京兆奏議一卷。曲徒錄一卷。撫院治略一卷。撫楚治略一卷。穀城水運紀略一卷。今皆未見。

過虎丘奠五人墓作

昔在有明季。養亂由王宮。逆璫竊國柄。百執咸承風。希指排忠直。逢迎競自工。祠宇遍郡國。金碧極尊崇。爪牙布遠邇。睚眦慘禍鍾。嶽嶽周吏部。勁節摩蒼穹。所事見抵忤。闕恨蓄在衷。構誣竟連及。緹騎下江東。怡然詣逮所。志欲折奸雄。萬民同感憤。冤號塞衢鐘。嗚呼一何怒。民怨一何訂。壯哉五義士。顧佩室。馬傑。沈錫。楊念如。周文元。突起羣衆中。直前肆奮擊。應手斃元兇。佩章實首倡。楊馬爭相從。周沈亦踵至。神王儼飛龍。餘徒雖奔逸。氣奪等蝗蟲。節使論成獄。就死各從容。懷宗正天紀。殄逆表前忠。吏部却贈諡。義骸猶未封。璫祠旋敕毀。卽地葬數公。事理有反覆。仗義豈終窮。高名屬卑蘆。經過感叟童。粵有吳太史。題碑表芳蹤。稱人良不易。一字重鼎鐘。我來欽遺直。灑洒據幽棕。庶幾與頑儒。千古仰磨礪。 見山樓詩集

王又旦黃涓詩選十卷

王又旦。字幼華。別字黃涓。邵陽人。順治十五年進士。選潛江知縣。行取。補吏科給事中。轉戶科掌印。

卒于康熙三十六年。年五十二。專具清史列傳循吏傳。又且當官有治績。居言路有建白。而詩才清麗。不矜唐宋。自具品格。篇章不若孫枝蔚之富。而蘊藉過之。西北有此二君。爲不寂莫矣。好與逸士游。如枝蔚。如吳嘉紀。郝士儀。吳周屈。大均。陳恭尹。皆投分甚深。尤善顧景星。固一時風氣。亦緣宦情不熱。故其詩多山水友朋之思。時有幽情。傷時念亂。偶一流露。頗極刻畫。而不失之于瀟。

養豕詞

且插籬。貧家養豕如養兒。豕食麥粃兒食糜。夜繫曲突晝牧場。入市常恐市人欺。縵纏入手容易盡。盡作夫錢隨接軫。十畝田稅尙無着。告求寬假官不惑。漢江大道通水陸。兼兩方贖運不足。執策者騎白鼻騮。

驅人何如圈中豕。黃澗詩 選三

韓城道中書所見

蒼鷹黃犬伴朱輪。道路輝光事事新。歸去騎殘三嶺馬。年來哭咽兩河人。拈花妾媵驚厨傳。衣錦輿臺歷縉紳。却憶萊蕪不餓死。千秋猶說甑中塵。黃澗詩 選七

糜麥歎

夏陽城邊麥欲落。婦姑腰鎌壠頭穫。連村靡靡纒登場。彷彿如聞餅餌香。催租昨夜府帖下。倉皇先問西市價。輸官營私那得停。十日陰雨何冥冥。滿場糜爛真可惜。淒涼半掩苔花青。君不見南鄭倉中粟粒黑。雨淋日炙馬不食。赤羽使者又下鄉。野水光照黃金勒。黃澗詩 選七

小吏港

曲港蘋花泛夕暉。廬江往事總沾衣。教坊翻盡絲桐譜。忍見東南孔雀飛。

黃澗詩
選九

屈復弱水集二十二卷

屈復。字見心。號金粟。晚號悔翁。蒲城人。年二十七出遊。流寓郟城。周歷晉豫吳越。四至京師。其詩所謂七十有七齡。半百在行旅是也。關中三季。復欲師顛未果。柏嘗約復共隱太白。而因篤則父執也。此其淵源所在。清史列傳文苑傳稱復熟于諸史與亡陳迹。以及關河阨塞。兵馬漕鹽。天文律曆諸事。復詩亦云。隨行一卷書黃石。爛在腹中三十年。然則出遊非謀食。亦非噉名。蓋有所爲。故兩辭朱邸之招。舉丙辰鴻博不應。而終身不歸故鄉。與顧炎武劉獻廷略同。詩特餘事。以詩教人。及窮愁著書。皆非本志。然以詩論。如題柴虎臣高士傳後。題杜茶村小照。鬱勃之情如見。琵琶行詠王輔臣事。過流曲川及登東城樓感往事。皆詠順治六年蒲城被屠事。紅芝驛詠李自成追搢紳餉。無者悉殺于此驛。皆可備史闕。而立言之旨。在不忘恢復。其他隨時流露故國之思。以戊戌春日雜興秋日雜興諸詩爲最直率。此其集所以遭禁也。弱水者。示臨流而返。蓋傷天下事無足有爲。復八歲能屬辭。集中有十四歲所作私懷八首。悼其聘妻臨嫁而天。載詩止于乾隆甲子。有七十七言歸之什。集當刻于此時。梁序乃謂卒于維揚。豈遂未歸耶。

琵琶行

有序。琵琶行。悲西儒也。王輔臣叛。人民殺戮。婦女被擄掠。金粟子傷之。而作是詩。

崆峒山上風淒淒。崆峒山下邊馬嘶。美人騎馬不敢啼。有時紅塵逐足起。珊瑚鞭騎擊電歸。桃花李花歷亂飛。歷亂飛。銀瓶照。琵琶絃。梁州調。黑貂紫茸撲地叫。撲地叫兮雲陰陰。誰能測彼天地心。手牽芙蓉捲珠箔。飲殘西山山月落。月落羯鼓催。簾外東方早。起舞迴風錦牀曉。莫辭鴛鴦羅袖小。羅袖小兮骨酸。望東鄰兮長眠。東鄰長眠情脈脈。涇渭之煙生血色。翹水集四

過流曲川

有序。予聞諸父老云。順治六年。大同總兵官王永強高有才叛。自延安下蒲城。二叛本前副戎。以恢復愚民。民盡焚香花。但云迎王將軍。不知有高也。明倫堂設思陵位。補行喪禮。父老白衣冠痛哭畢。大宴。曰不圖今日復親漢官威儀。吳三桂兵至。戰於流曲川。煙塵蔽日。呼聲雷動。城中屋瓦皆震。父老意必勝。舉酒相賀。時王新募皆三邊勁卒。衣布衣。削髮椎為兵。一擊則人馬俱斃。是日吳軍敗。詰朝再戰伴北。散甲燹軍器盈野。王士卒爭利陣亂。即縱兵急擊。高竟拔營去。王大敗走死。城中守盡力。吳圍城不攻。親詣守者曰。汝不聞梁晉交兵乎。姑降我。彼果至。又降未晚。父老始知是三桂。捐名面數曰。逆賊。國家何負汝而汝如是。置甚毒且俚。發大炮擊之幾中。吳怒力攻屠之。死者十餘萬人。康熙丙寅。予始經行此。川。川在邑城西六十里。屬富平縣。

迴風陷日天如夢。流曲川平暮塵湧。行人馬嘶古道傍。離離禾黍旌旗動。殺氣騰凌古戰場。前啼鶴鶴後鶴鶴。降將雲臺曾未聞。三邊俠骨空自香。豈知到海涇渭血。寒潮不上天山雪。井底蛙聲竟何在。十萬遊魂哭夜月。閒花滿地生新愁。至今河漢皆東流。同入蒲城化為碧。仙人掌上芙蓉色。翹水集四

神水行

庚戌之歲二麥秋。五月六月雲西遊。日日東北風吹雨。禾苗生耳人重裘。神水忽從天上來。平地波浪如山丘。怒氣噴風雷霆鬪。魚鼈跳躍戲高樓。馬陵崩摧古鄰國。泰山破碎沈十洲。廿有六日唐橋村。黃昏虛

空吼萬斗。移時敵廬僅盈丈。屋頽人居屋頭上。雨聲哭聲水聲裏。哭聲水聲爭咽喉。須臾哭聲遂寂然。水聲雨聲相網繆。心疑無極混沌生。足踏太陰汗漫遊。所幸三更天已明。惟登高樹無扁舟。是夜止。交三更突明。雲雷烟雨勢嵯峨。七日誰作火食謀。或食浮瓜生水族得不死。鳥爭棲息嘖怒啼。身與乾坤晝夜浮。可惜藏書萬餘卷。溟溟飄散隨浮漚。偶逢相識桑田後。各言變怪從橫投。少壯善酒者入水輒死。老。有沈數日者。水退猶生。歸來夜眠夢猶悸。彷彿昏墊風颺颺。唐堯至聖有何力。大禹雖神安所籌。倉卒天吳亦莫測。陰陽徵應豈無由。傳聞是日東海乾。扶桑三島皆逆流。嗚呼扶桑三島皆逆流。集五

蘭雪堂夜譙卽事

並序 余少時聞京師有口中作技者。如雞鳴犬吠。房闈秘戲。無賴市井相鬪爭。齊聲並出。凡人世一切事。盡能逼真。及止。則一人一戒尺而已。丙子戊戌。兩至燕都。都不值。雍正元年冬。夜譙蘭雪堂。一警者善此術。垂帷而作。無不神妙。隻身白首。並戒尺無之。俗名曰像聖兒。亦名口技。此戲自子史而外。百家小說皆所不載。相傳明季有李警者江樓。左右手彈琵琶。善口技。古所未有。然拾遺記扶樓國備百戲之樂。樂府皆傳此技。得蓋亡緒。代代不絕。此或其一端歟。

仙人暮宴清都闕。空際流香轉飄忽。四座瀾翻羽觴飛。喧譁欲動中庭月。中有警者麻且鬚。歷歷碌碌六尺驅。主人指此前揖客。試令作技爲歡娛。獨閉空房簾垂地。衣履之外一物無。依微漫話招尋侶。往復披展通情佇。先時兩兩後三三。多或十十少五五。疾徐高下亂紛紜。陰陽少壯齊爾汝。未覩形容只辨聲。聲裏偏能傳眼語。賓客無言燈熒熒。童僕盡倚綺羅屏。非憂非樂參神會。不噉不睡側耳聽。忽聞喞喞兼絮絮。十二峯頭相送迎。雲飛雨散夜將半。小兒夢中啼伊嚶。忽聞使酒頭年少。號呶問巷鄰里驚。忽聞朱門張公子。泣罷前魚嬌鳥鳴。忽聞六街烈火然。忽聞雞犬叫寒烟。舉頭忽見衝簾出。霜濃星淡月當軒。四坐

賓客方大笑。傾壺覆盞誰能約。我亦不覺嗟神妙。曾說君王怒偃師。又傳絳樹歌兩辭。釋氏最幻頌千手。不聞一面生千口。山海刑天舞千戚。不聞長舌能諸吼。豈知末藝可通神。奏處稍令天地新。因憐羣雄噪山澤。屋瓦欲飛東方白。一燈化出千點燈。一帛裂成千段帛。如此小道猶因窮。文章何處哭秋風。翊水集五

阮咸行留別

有序 雍正四年丙午七月二十八日。遊朝市。觀阮咸一面。俗所謂月琴也。背有萬曆玉璽。璽下有銘云。自得。所以一經爾而上契乎重玄。楷書大五分許。左右聯云。披萬壑之松風。神游八極。抱一天之露月。爽入三秋。亦楷書大於銘三分許。其受軸處背楷書御製二大字。面書托口清之雅趣。樂吾道之自然。以上皆鑲金書。漆璽已成蛇文古斷。友人賤價得之。其賈云。售已三年。無有過而問者。嗟乎。以古器之沈埋。諒知音之不易。時予將往江南。因賦長句留別。

千人萬人噓瘴烟。紅日沸塵勢滔天。有目無目白晝昏。誰見奎光衝斗圓。茫茫平地沉明月。四條絃斷皮細裂。顏色黯淡賈者愁。吾友遙看嘆奇絕。浮華斂盡雲滿身。萬曆御製金鑲文。玉璽不是人間物。鳳尾檀槽尙可珍。當日廣寒誰運軸。至尊自按霓裳曲。倏然萬壑起松風。滴瀝清泉漱寒玉。一聲急拍落昭陽。鄭妃含笑六宮哭。百五十年如反掌。露痕雨跡仙山壤。小器猶勞謹鬼神。一朝賤價逢真賞。塚中銅器辨應難。圖有竹林能相仿。蘭溪初浴染泥沙。長垂錦條更颯爽。絃索調高素所嫻。雙手輕然發新響。寒蛩泣露小窓前。獨雁叫羣青冥上。絲中之樂壯復清。抑揚本是三秦聲。吾鄉盛行此樂尋常一聽雙淚流。況予明日之金陵。翊水集五

葛賢墓

有序 萬曆辛丑。內監孫隆私殺稅官。遠近罷市。邑人葛成。奮臂一呼。合城響應。擊斃從官七人。太守不忍繩之以法。成自投曰。殺人者抵罪請死。守益義之。易名賢。勉繫獄。江淮間咸呼云葛將軍。久之赦免。廬五人墓側。

卒遂葬於此。文相國震孟做吳季書法。題碑曰有吳萬賢之墓。

死生不傍要離塚。路半山塘別有羣。天上星流萬秋月。九原一箇葛將軍。翊水集十四

曹荔軒織造荔軒康熙間織造江寧。頗體賢下士。當時稱之。所著有樓亭詩集。

直贈千金趙秋谷。相尋幾度杜茶村。詩書家計俱冰雪。何處飄零有子孫。翊水集十四

周 燦 願學堂文集二十卷附南交四種

周燦。字紺林。號星公。臨潼人。順治十六年進士。改主事。外擢南康府知府。官至四川提學道。撰願學堂文集二十卷。南交四種。凡文十八卷。詩二卷。南交四種。蓋燦于康熙二十二年。以禮部郎中副翰林院侍讀鄒黑使安南。使回所撰之書。曰使交紀事。曰使交吟。曰安南世系略。曰南交好音。燦聲譽甚隆。孫枝蔚王士禛皆頗稱道之。

蒲州普救寺

按志。寺舊為西水清院。後漢郭威討李守貞。經年不下。延院僧善問之。對曰。將軍但發善念。城必克矣。威折矢為誓。明日城下。不戮一人。遂改名為普救。

老僧一語下重關。普救題名豈等閑。何事雙文傳豔曲。都將蘭若作桑間。願學堂集二十

釋如乾 行餘續草

釋如乾。字慈休。住持關中兜率寺。劉紹放二南遺音。不錄僧詩。續高僧傳四集者。不及關中。故其事迹弗詳。此集皆康熙十一年壬子至十四年乙卯四年間所作。既曰續草。當有行餘草。今不可見矣。懷本師

雲老和尚詩云。一世銜冤叨父訓。三年累德愧門人。疑明末忠臣之子。遁于彼法者也。詩甚雅而名不彰。僅得張恂爲友。恂前明進士。爲遺老不終。工詩善畫。聲名亞于三李。故能賞如乾之詩。

懷本師雲老和尚

移竿何處靜垂綸。鯨釣仍分汝水濱。一世銜冤叨父訓。三年累德愧門人。予自壬子囑法。於今三年。茶香鼎熟松窓語。

殿古寒深坐榻塵。好是行藏無可見。朋儕相向話來因。行餘續草

宋 權 宋文康公集二卷年譜一卷

宋權。字元平。號雨恭。又號梁園。商丘人。天啓五年進士。由陽曲知縣。官至遵化巡撫。迎降清軍。仍原官。裁一總督三巡撫以一事權。洊至國史院大學士。卒于順治九年。年五十五。事具貳臣傳。有宋文康公集二卷。初權嘗自刻白華堂詩集一卷。其子塾合爲此集。詩文各一卷。權好與文士游。鄉里能文者。買開宗爲故人。侯方域則門人也。然詩文皆若不經意爲之。蓋非工于此事者。文多奏議。合新舊兩朝而載于一帙。尙爲僅見。爲巡撫時。建白頗多。請停圈地及停祖軍民壯疏。皆切民生。年譜爲塾所編。所載順治元二間畿輔起兵者。較實錄爲詳。

買鉛行

農夫夜從城中歸。入門無言淚如雨。妻子驚疑魂欲散。急爇爐煤照藍縷。嗚呼連歲不逢年。天澤人功廢

石田。無奈官帖紛且急。買草未完又買鉛。名列大戶有清冊。持錢索鉛何處索。皂隸踵門聲似狼。幼兒幼女覆以袋。懇勸爲沽一壺酒。費卻家中十日糧。相看無計咽欲絕。願兒欲賣痛難說。實兒能值幾文錢。兒身不能化爲鐵。嗚呼公家豈不惜黔首。只爲跳梁有小醜。無煩懇懇訴艱難。共向公堂叫父母。商丘宋氏三世遺集上

宋 犖 綿津山人集六十九卷西陂類稿五十卷

宋犖。字牧仲。權子。少入侍禁中爲侍衛。及長。出爲黃州府推官。洊至江西巡撫。調江寧巡撫。值屢次南巡。竭東南民力以事供張。得久任。入爲吏部尙書。未幾。致仕歸。卒于康熙五十三年。年八十。事具清史列傳大臣傳。少有才名。共侯方域結社。習爲詩古文辭。及官臚仕。頗事籠絡文士。邵長蘅選刻王宋二家詩。以犖與王士禛并擬。犖又刻江左十五子詩。皆近標榜。所撰綿津山人集六十九卷刻于康熙二十七年。晚歲復增益之附以所爲文。別刻爲西陂類稿五十卷。凡綿津所有者。幾莫不有之。乃四庫旣以類稿著錄。復以綿津入存目。何耶。

登廢城

荒城互數里。形勢自森布。秋草碧參差。閒雲莽回互。停車陟其顛。披榛得徐步。白日忽西馳。乾坤入薄暮。行潦接洪流。歸人喧野渡。遠村蚤稷收。近岸寒鴉聚。縱覽感孤懷。含悽倚獨樹。往者全盛日。茲城稱虎踞。城中十萬家。歌舞不知數。狂寇來縱橫。蹂躪失險固。燐火照郊原。通衢走狐兔。遺鏃樵夫拾。廢堡

山僧住。回頭市井間。人烟已非故。淒涼二十年。小康猶未賦。暫此息鼓鞮。遙天看飛鷺。綸津山人詩集二

劉鴻臚歌

宣城劉叟名光揚。年過六十鬢髮蒼。一身落拓僅三尺。雙瞳如水分毫芒。十年海內盛翰墨。短碣豐碑盡鏤刻。琅華館與快雪堂。至今處處生顏色。憶昔先皇天縱才。臨池學書何勤哉。宸翰精妙古無比。上與雲漢同昭回。猶云絕技必古人。窮搜墨寶前具陳。真蹟雙鈎上文石。揚也奉詔無逡巡。元秘塔。九成宮。經年摹勒何其工。縱橫波磔無遺憾。本來面目將無同。搨成匍匐瀛臺奏。至尊含歲當清晝。賜金賜絹皆固辭。賜官拜受誠希覲。官列鴻臚承帝眷。從茲出入文華殿。退朝常得奉宸遊。日下人爭識君面。無何龍馭忽升遐。薄俸雖存罷曉衙。疲臚漫走長安道。手持御墨寶誰家。歲云暮矣臥茅廬。車馬蕭條故舊疎。無限傷心堪灑淚。柴門猶自署鴻臚。綸津山人詩集三

宋 至緯蕭草堂詩六卷

宋至。字山言。號方菴。舉子。康熙四十二年進士。選庶吉士。授編修。未詳所終。著緯蕭草堂詩六卷。初舉刻雙江集。至詩附見其中。後刻西陂類稿。復附刻緯蕭草堂集三卷。此集六卷。蓋至于辛丑六十督學浙江時。增輯而成。舉先後官江西江蘇巡撫。喜結納名士。至及見先輩。得聞緒論。時共唱酬。故其詩雖才氣稍寢。別無寄託。而矩矱不失。言猶近雅。及官禁近。意主頌揚。所增三卷。多館閣應制之詩。以視少

作。或尙不及矣。

永樂席帽盤

近代窰器首成化。益草蝴蝶鷄缸亞。高士亦成窯杯名尤誇品格高。薦入朱門不惜價。誰知永樂窰更工。賦白

如紙驚玲瓏。腹中暗花隱復見。一捧冰雪清心胸。我有嘉賓出侑酌。琥珀光搖良不惡。好當箸笠贈山人。

九日風高防吹落。律蕭草堂詩三

薛所蘊梓菴詩五卷

薛所蘊。字行屋。號行塢。又號梓菴。孟縣人。崇禎元年進士。官襄陵知縣。行取授簡討。擢國子監司業。降李自成。入清。屢官禮部左侍郎。順治十四年。御史高爾儼劾其年老。每會議渺無識見。原品休致。沒于康熙六年。年六十八。事具清史列傳貳臣傳。撰梓菴詩五卷。刻于順治十一年。初所蘊與王鐸同里相得。以學杜標榜。復與劉正宗同年唱和。其詩多及時事。錢謙益爲之序。遂謂石壕新安之覩記。彭衙桔柏之崎嶇。與少陵並爭者豈止一二偉麗句而已。其辭若甚揶揄之。然當時情況。幸賴其咏歎以傳。雖言不誠。而未嘗無可取也。別有澹友軒文集十五卷。刻于順治十六年。頗多志傳之文。唯朱□宇傳劉理順墓志稍有關係。子奮生。與王士禛友善。有集未見。

賈戒

常賈操奇贏。良賈善居積。獨有豪賈力通天。不惜金錢買造物。造物者。假以利權。吮人之血。吸人之骨。豈知人盡天地空。賈乎賈乎究竟還爲二儀毒。漁人捨餌魚斯得。將取必與老氏術。古人所以抑逐末。不見陽翟巨販貨居奇。赫赫強秦售其欺。粹菴詩二

咤惜行

崩崩山形何盤鬱。中有長松拱高墳。華軒輪奐擬丹闕。樹表嶽巖插青雲。試問此墳誰爲者。君側由來慣狐假。市朝久肆礫骨灰。何物空埋雲根下。怪事猶堪生咤惜。丁丁鑿泐石文白。雙碑蟠螭長且闊。官階兩行書猶窄。碑前祠宇更深悶。橫額新題清直字。彼殛何處得佳名。死後猶然冒欽賜。憶昔遭逢勢孔棘。火燄薰天天爲黑。芟除百爾如草菅。蠱惑一人危社稷。胸藏刀鋸九疑折。四海誅求民力竭。珍貨充庭鬼域工。清直二字何從說。嗚呼往事且休論。地下有無既斥魂。珠匣秘器亦何用。風雨啾啾暗古原。粹菴詩二

空城曲

大河之南生荆棘。昔日名城今瓦礫。雉堞半傾門不關。短牆猶浸舊血跡。淒淒白月下枯蓬。啾啾鬼泣天陰風。老狼孔子官廨側。黃狐晝立通衢中。粹菴詩二

供兵曲

傳道天兵歌馬至。五百里間秣糧具。丁男負米婦拽車。輸輓一鍾十鍾費。富家廩庾淨如洗。貧家盆甕空

見底。牽兒市上買無人。官司有牌刻期比。哀哀軍需何所出。仰天籲祝氛祲息。但願荒服盡臣妾。天山弓

掛秋月白。杼著
詩二

門夫謠三章

五鼓排門結伴去。挈筐負筥拍路至。千畚萬鍤勢如風。邪許聲與雷聲同。聞道鑿輿刻期出。筋力用盡敢
愛惜。長鞭大棒漫相催。日晡何曾得晨食。

火雲如幕日如釜。炙背煨胸猶負土。舌乾喉燥鼻生煙。擡頭叫水遭極楚。通身熱汗霖雨滴。將汗和土血
氣息。安得百和燃道側。只恐官家聞不得。

隻身在官妻在室。搜典舊衣充午餽。又道牌甲收使費。上司中火火急備。官有下飯馬有粟。班長棍頭同
厭飲。肥酒大餚冰水澆。那知俱是丁夫肉。杼著
詩二

老農歎

常年傷穀貴。今年傷穀賤。穀貴八口餒。穀賤官錢欠。聞道新徭多項名。雜糧糶盡未停征。牽兒上市刀剗
心。骨肉分飛血淚盈。一年動動足三時。指望有秋療兒饑。誰念秋成父子離。杼著
詩二

賈客曲

背井辭鄉長道路。風餐雨宿杳何處。競得刀錐膽妻孥。那知椎關新額浮。一尺船頭一丈算。連子和母猶
賁欠。但願將船並作稅。隻身無累得歸去。杼著
詩二

古窑行

玉屑爲胎玻璃色。龍蟠鳳蕩花文別。自昔良工經營苦。珍重方物輸祕府。祕府金鑲鑄重門。千萬斯年永寶存。琥璜琮彝分位置。荆璧郢鼎價同倫。蓼蕭湛露樂佳賓。洽禮和樂羞明神。黃流玉粢芬且旨。藉用文錦光有珌。世事何管歛聚散。得時爲貴背時賤。一朝露出遍塵闈。家家買得供常饌。野蔬市脯濁盤餐。瓦缶同陳渾等閒。古窑行。愴心顏。杼著 詩二

驛卒詞

閭閻因敵乏幫貼。差煩馬瘦芻蕘絕。典妻鬻子敢辭苦。惜馬無錢動捶楚。聞道軍中馳吉語。一日一夜行千里。昨年偶爾誤一時。縣官速治驛卒死。五更三點不交睫。頭枕驛門候消息。杼著 詩二

湯道味先生園中水石歌

先生海外好奇者。重三十譯來過崑崙下。無數名山大水堆心胸。却向京師放出寄在一畝園林中。園中有井二丈餘。不假纆索升作渠。噴射方塘如風雨。龍吟虎嘯盈兩耳。繞塘怪石多氣色。離奇共水爭標格。或嶽立而矜莊。儼然東帶擅笏丈人行。或嵌空而玲瓏。翩若靜女窈窕宛爾鷺鴻與游龍。時來問道先生側。便如跳出長安陌。心疑此水此石不是塵世物。何其升降于無形。崢嶸而突兀。先生一身備天體。仰探星經之奧。俯窮地紀之理。開闢以來日月指諸掌。手弄潺湲足躡雲根。時時栖心洪濛上。何時頓了婚嫁緣。常侍先生水石邊。庶幾撇却緇塵一萬丈。依稀枕漱三山顛。杼著 詩二

悲雲中

悲雲中。千年雄鎮一時空。青燐夜夜頽垣裏。殷紅血漲桑乾水。梓菴詩二

案此詩爲順治七年大同姜瓖起義而作。

劉世燧倚雲閣詩集一卷

劉世燧。字木次。河南新蔡人。崇禎八年乙亥拔貢生。入清。銓授西安府通判。擢鳳翔府知府。以終養歸。年才三十六。遂不再起。撰倚雲閣詩集一卷。力摹唐音。而不墮七子之習。間失之粗。而寄託有在。集中秋興八首。題蘆雁圖四首。偶及征戍之苦。賦斂之繁。無他違礙。不知何緣列爲禁書。新蔡劉氏。文采甚盛。劉華。字可石。諸生。著臨游集。西園集。石醉齋紀。石醉談。石史惑解諸書。年八十餘卒。卽此集所稱家石伯。

夏日雨中

麥壠浮望已過期。可堪半月雨微漬。鴉低晚照愁明日。米數朝糶計此時。潛聽鐘聲雲外濕。鷺聞疾痛野邊辭。只因鷗夢成佳好。漫道生民說已饑。倚雲閣詩集

彭而述 讀史亭詩集十六卷文集廿二卷

彭而述。字子鏡。號禹峯。鄧州人。崇禎十三年進士。陽曲知縣。入清補分守永州道。貴州巡撫。再起衡州兵備。移桂林。遷廣西按察使。進右布政使。移雲南左布政使。康熙四年七月告歸。卒于板橋驛。年六十。而述少入復社有名。與吳應箕劉城交善。爲人權奇自喜。王士禛稱其雄豪磊落。陳同甫一流人。汪琬稱其長身修髯。聲若洪鐘。一飲能進數升。一食進一盃肩。真撥亂之異才。故詩文皆雄奇。而不免失之粗豪。湘粵滇黔諸作。目擊戰爭。足爲詩史。文亦多有關係之作。而輕信流傳。下筆太易。如南都僞太子血書自署定王。田妃由自縊而死。李自成死于九江之類。皆不足置信。孫可望降清封義王。世祖親迎于彰義門外。乃目之爲孫渠。邵兵紀事邵謂征南將軍卓布泰也。譏其苛索。直言不諱。亦見倔強。而述與周亮工交好。詩亦約略相稱。

白米詞

三升白米七升糠。選得精糞上官糧。收糧長吏身手強。短袴提箕親簸颺。山田納錢又輸穀。白頭野老赤脚哭。只今南粵烽烟屯。永州運船塞江濱。黨正猶爲念鄉井。小胥夜來買捉人。去年白骨滿城積。食盡人肉不食石。稍寬一粒卽君恩。留與六親招魂魄。

讀史亭詩集一

估客行

平陽鹽商黃河來。左右牙儉塞滿街。貨得新鹽積如山。一時氣焰傾兩淮。揚州女兒姑蘇袖。密蠟簪子茉莉油。綺席笙歌無朝夕。醉後憑陵若王侯。縣官急爲輪邊錢。文學莫著鹽鐵篇。君不見巡鹽使者權關急。引見此物只長揖。讀史亭詩集一

戰城南

前年得桂林城。今年失長沙府。日南有象大如屋。身披裝具猛如虎。藥弩飛鞬鞭山來。萬騎辟易聲如雷。蠻蠻飲血。獅子蹉跌。佗尉壘邊骷髏積。崑崙關上馬嘶鐵。鷓鴣笑。胡馬啼。壯士沙場不得歸。讀史亭詩集一

周亮工 賴古堂集二十四卷

周亮工。字元亮。號櫟園。又號滅齋。祥符人。崇禎十三年進士。官濰縣知縣。行取浙江道監察御史。順治二年。官兩淮鹽法道。調揚州兵備道。遷福建按察使布政使。入爲左副都御史。遷戶部右侍郎。爲福建總督。修俗勸其貪酷論死。會赦得釋。康熙元年。起補山東海防道。調江安糧儲道。被劾論絞。再遇赦。卒于十一年。年六十。事具清史列傳貳臣傳。錢陸燦所爲墓志。姜宸英所爲墓碣。撰賴古堂集二十四卷。凡詩十二卷。文十二卷。亮工詩文未能成家。才名稍亞錢吳。好士憐才。一時遺老多從之游。屢躓屢起。由劉卍宗惡之。當時滿漢相傾。成爲風氣。亮工不死。屬有天幸。初亮工知濰縣。值滿洲兵南下。齊東諸城皆破。獨濰以堅守獲全。濰人德之。爲建生祠。及再起青州道。過濰見生祠。大哭而去。殆有痛于作兩截人

耶。刻書最多。晚年盡焚之。知虛名之無益也。此集爲其子重刻。

過東莞武劉二孝廉載酒談花之寺爲沂之勝境同楚中劉公蕃賦

諸葛溝前雁影疎。寒歸海縣暫停車。佳名獨愛花之寺。隱地誰尋石者居。

胸胸人傳國作石者居于雲黃山中

且喜酒成真是

露。青酒皆以露名。劉家露尤青冽。在玉露上。

莫言松化便爲樗。吳雲楚水知非遠。二十雙田正好鉏。

賴古堂集十

趙賓學易菴詩選一卷

趙賓。字錦帆。陽武人。順治三年進士。學易菴詩選一卷。爲其十四年官刑部主事時所刻。有自識云。丁飛濤客部有合刻之舉。檢奚囊十一應之。恐譙明灝亭及超尙白玉叔胤倩六七君子見之。不值一笑。飛濤爲仁和丁澎。譙明爲祥符張文光。灝亭爲餘杭嚴沆。及超爲鄆縣史大成。尙白爲宣城施閏章。玉叔爲萊陽宋琬。胤倩爲仁和陳祚明。然則合刻者。當有八人。詩學杜陵。蓋中州詩教自王鐸王鏞薛所蘊皆如此。亦不知有全集否。

人日是日得關東諸君作

濁霧濛濛暗曉暉。御河楊柳似江村。天涯歲序逢人日。京邸風塵夢鹿門。幾載東西傳望幸。何人冰雪賦招魂。三韓萬里春光少。野戍淒涼日暮猿。學易菴詩選

蕭家芝 丹陵集六卷

蕭家芝。字紫眉。號孝鯁。河內人。順治四年進士。官刑部主事。擢至郎中。嘗恤刑山西。時巡按欲定贓贖歲額百萬金。家芝力爭得止。知是時軍需孔亟。計臣搜刮之嚴。後以失出降一級補外。遂告歸。家居三十年不再起。卒于康熙二十五年。年七十二。事具喬騰鳳刑部郎中蕭公墓誌銘。撰丹陵集六卷。文不蹈八家門徑。而筆力廉幹。敘事有法則。所爲志狀多紀政治得失。人心榮悴。王中丞子房先生漢傳。尤有關係之作。王初爲河內知縣。家芝受知最深。後死封疆。海內歎爲奇才者也。詩率直吐臆。而有性情。讀之如見其忼爽也。

金隄行

聞道金隄決。河水盡滲漉。望望千里餘。陸地駕舟楫。莽榛高布翼。毀墮如落木。飛鳥亦沈湮。安問禾與菽。疑是天河倒。落地恐難復。日月無顏色。星辰慘淡出。蛟龍困欲號。聳首皆盧盧。鬼神道路迷。欲去去不得。不知幾萬井。十室亡五六。雖有數家存。掩淚向空國。天地豈不仁。造化互復剝。始知爲水沒。不如就殺戮。殺戮留家業。水復無完屋。祇今何所有。青蒲雜紅蓼。城闔驚兔狐。白晝聞鬼哭。哭聲使人哀。況乃賦稅蹙。丹陵集六

賀振能 窺園稿四卷

賀振能。字眉生。號蓬仙。獲嘉人。舉人。師事孫奇逢。著窺園稿四卷。詩文皆不入格。然喜言民間疾苦。頗足窺當時培克之政。孫君夔履難卷書後。言奇逢沒後。君僑急其弟君夔之難。南北奔走。數載中不遑寧處。迨君夔無妄禍解。而君僑不可復作矣。據孫徵君年譜。子六人。立雅奏雅望雅博雅韻雅尙雅。博雅字君僑。韻雅字君夔。清史列傳儒林傳孫博雅傳。康熙十五年弟韻雅坐事繫刑部。博雅竭產供弟。凡四年。往來省視。徒步烈日中。兩足皆腫。或遇雨雪飢渴。僵仆于途。卒以致病。病時假寐。口中喃喃。皆其弟事也。及彌留。猶張目曰。吾弟免矣。遂卒。年五十五。後數日。弟事漸解。徐元文含經堂集詹事崔先生_蔚墓誌銘。徵君之子韻雅誤罹辟。公亦力救之。韻雅兄博雅來赴弟難。客死。爲經紀其喪。所述稍較振能爲詳。究不識所坐何事。必與叛案有關。俟再考之。

初度日別墅聞兵

四十吾方至。干戈幾度周。如何廊廟算。偏作閭閻愁。漂泊悲雙鬢。征輸竭晚疇。太平容再見。投老伴沙

鷗。窺園稿一

東村行

辰甲

東村行。行東村。有叟零涕爲我言。二麥旣已薄。秋禾未種土。朝炊不給何從出租辦官府。紛紛亡去不知

鄉。才子居民良獨苦。誰司芻牧。不問牛羊。有虎而冠。鼠碩鷹蒼。錙銖算入泥沙出。古稱民賊。今循良將。叟無酸徒摧而肝。天災自古從人禍。命也不淑疇能寬。我本出世人。學道無有得。深山曠谷未能歸。因循留住人間國。恰當旱乾土赤黃河焦。雷枯電死神龍匿。熱風塵起目難開。魃鬼驚人天不測。嗟乎嗟乎永歎無長策。安得乘雲叩帝席。請息氛祲干大澤。魏園稿二

苦雨謠

己未之年秋欲暮。中秋直距重陽度。共解興朝雨露滋。何人孽重干天怒。孽龍爭吼雨師狂。曉夜淫霖傾若注。決旬簷聲流不斷。驚魂欹枕夢難晏。頽垣下瓦破人顛。激湍充堵沒人駭。中堂外舍久未葺。浸淫上漏成下濕。幾處流痕藉瓦盆。夜深烘火無乾褶。長鬚赤脚兩三人。戴箕屨立中宵泣。吁嗟哉。聚糧處廈還蹙蹙。轉憶窮黎在茅屋。比戶相傳并日炊。數椽誰保四壁廬。禾頭長耳聽人愁。竈下蛙聲對婦哭。三秋收穫總泥沙。二麥播種見漂漂。拚付家緣壑與溝。終憂國課鞭還扑。我聞北都近地震。天王省戒傳芳訊。安得艱危徹九重。倘可蠲租非望賑。眼前誰作繪圖人。悲歌空老秋風鬢。魏園稿二

馬上驪 初蘭齋七言律一卷

馬上驪。字天衢。孟津人。順治中舉人。官山東學官。康熙十四年。刻初蘭齋七言律一卷。有推爲孟津詩派者。上驪于王鐸兄弟爲姻家子。從受詩法。故篇翰斐然。綽有唐音。唯傷亂之語。時溢紙上。知其時北

地猶多未靖也。

汴梁城上

堞圯樓傾望欲迷。蒼茫河氣水雲齊。夷門事往人難問。良嶽煙空鳥亂啼。獵騎連鑣爭射弩。農疇懸耜罷耕犁。潛思淪溺餘殘孑。猶自吞聲羯鼓鼙。和闐齋
七言律

傅而師 枕烟亭集八卷

傅而師。字餘不。又字左啓。嵩縣人。舉人。兩試禮闈不第。陶澂賦才女行貽之。傷其不遇也。未幾卒。年僅及壯。康熙五年。婦翁王鑑爲選刻枕烟亭集。凡賦一卷。詩七卷。而師少有雋才。詩文不事塗飾。往往有合作。多作于順治十年以後。時兵甲未息。飢饉洊臻。故感事傷時。隨事吐露。雖詞尙含蓄。然怨而近于怒矣。豫中人文。商丘與洛陽競爽。侯宋之作。不事質言。若貴質言則而師爲得風人之旨焉。

南征詩

歲星照湖南。六月鑿凶門。竊聞荆湘地。未招遼左魂。舊卒皆已沒。下詔選兒孫。兒孫亦有盡。罷兵那可論。

大將插金貂。憂心辭聖朝。小人有老母。哭聲殷河橋。婦人領其兒。牆頭手亂招。不忍竟觀此。天際起風

聲。枕烟亭
集二

養馬行

君不見。靖南藩王麾下將。秋日養馬漳水上。高原一望爛屯雲。雲錦千羣森相向。傑者昂首向天嘶。疾者平野試霜蹄。肥者鼓尾瘦者臥。怒者駢囓過城西。憶昨僑寓京城久。此將買馬張家口。大漠風沙遠帶來。交廣烽煙亦何有。連年諸郡苦飛芻。鄴下青禾今有無。朝廷養馬爲赤子。肯令秋田日日蕪。枕烟亭集三

荒村

寒烟野火亂。白草滿荒村。碩鼠窺人面。青榛護石根。巾車緣瓦礫。野水上柴門。滿目何堪問。西風起暮

原。枕烟亭集四

春感和雲間吳六益韻

湖北風煙猶未息。閩南羽檄更如何。生愁梨蕊經春長。引子林鴉入暮多。吾道自應終白社。同誰高臥近青蘿。祝鷄曬藥年年事。倦看城隅滿橐駝。

游巖宅畔頽陽濱。憔悴如今傍隱淪。早起空青因雨重。恆饑倦鳥向人親。翻翻蝴蝶花間坐。短短桃花水外新。但願聖朝容巢許。著書常帶白綸巾。枕烟亭集五

聞湖南消息

懸爐千里閃旌旄。十月湖南殺氣高。介冑多年生蠨蝨。將軍前日賜龍袍。驚傳絡繹魚爲陣。遙見奔騰象戴刀。漢水方城那可恃。愁來不敢放香醪。枕烟亭集五

宿柏林寺聞警

傳聞海上兵戈起。旅客經秋更不城。鐵馬千羣屯薊北。貔貅十萬下江南。寅時吹角雲出塞。子夜占星月滿庵。却憶家書幾日到。年年紅葉占嵩嵐。枕烟亭集六

選女

使者初頒燕地詔。傳言次第下周秦。吳越遠人引領望。欣逢天子結朱陳。

官道鸞車日夜馳。調箏調瑟奉盤匱。君王忽厭紅粧好。更有新傳選少兒。枕烟亭集八

韓程愈 白松樓集略十卷

韓程愈。字幼平。號智度。又號柏潭。鄆陵人。諸生。明季避地南都。弘光元年。年三十。入閩。翌年從清師征粵。題授瓊山知縣。在官五年。戎馬之後。頗有設施。會李成棟反正。居羅浮二年。然後北歸。是殆計利害而不計是非者。自後終不再起。六十後不入城市。晏坐一室。自謂唯持龐公空諸所有四字。卒于康熙三十七年。年八十四。事具柏潭先生自傳。及其子維藩所撰先考瓊山令柏潭府君行狀。有白松樓集略十卷。程愈幼即以制舉文知名。歸田後。專意著述。手稿三百卷。刪訂入集者白松樓集六十卷。刻行者十卷。故曰集略。文多紀事之作。先友傳十七人。長老若阮漢聞張民表。人望若吳應箕萬壽祺。社盟若賈開宗。異人若理邕和李夔。皆狀其行事甚悉。筆亦足以副之。詩法唐賢。無門戶之習。不菲薄七子鍾譚。而

最服錢謙益。鬼國云。鬼國猶詞賦。人間不解詩。別裁終自得。活剝起何時。文字千年恨。功名一旦期。虞山頭白盡。初學尙孜孜。虞山詩鈔序。謂能盡七律之變者。于唐爲少陵。于明爲虞山。可謂拳拳服膺。然詩格不類。唯連篇累幅不休。冬懷至八十首。頗似謙益病榻消寒耳。又甚推服金聖歎。有論聖歎六才子文二首。復因聖歎而及王斲山云。識論如公少。百年架禿翁。書藏猶在肆。華貫幾全通。不欲分行解。空憐失始終。斲山今老矣。吾意此英雄。程愈持論喜翻案。不覺與聖歎有合而喜之。詩多刺譏。冬懷尤甚。如云。只今鄒魯法。節次啓彝蠻。又蓬瀛非我國。金谷半丘墟。剩水殘山破。滄江碣石餘。又自笑迷家室。無勞問屠蘇。近年多鬼物。生滅在須臾。又好大今無主。阮儒事偶然。早知人共死。無復禮金仙。于當時之事。盛有指摘。梅村集有物幻詩八首。咏繭虎。茄牛。猿鶴。蟬猴。蘆筆。橘燈。桃核船。蓮蓬人。當時名家俱有此作。未知所始。此集槐國詩三十首。自序云。柳子厚作永州鐵爐步志。亟譏世之無其實而冒其名者。曰大者桀冒禹。紂冒湯。幽厲冒文武。以倣天下。亦猶是也。偶雨中無事。思萬物之不得其實而冒其名。以欺鄉里小兒者多矣。要皆名存實亡。似是而非。是亦桀紂幽厲之類也。戲爲小詩三十首。以識感慨。梅村八題咸在。乃知首唱屬于程愈。蓋以譏其時之在位者。猶言望之不似人君也。快炙人口。喧傳遠邇。遂遍東南矣。此可爲箋梅村詩者。添一故實。

澤潞

澤潞厄中條。五行號都會。昔曾入其疆。氣象亦何大。風俗既醇美。凶歲無乞丐。二董峙北南。織造至今

賴。有臺號德風。佳名徽宗賚。余亦徧交游。醇醪真狼狽。白松樓集略一

鹽池

西望望鹽池。中條處其上。隸籍雖安邑。河東有官長。東西五十里。南北七里廣。熏風建古樓。行者恣來往。上有鹽池神。廟貌多開朗。余至值神會。神鉦萬山響。商賈幾千人。喧闐果俯仰。徘徊久始去。至今增懷想。白松樓集略一

問南晦

策斷檣櫓折。馬瘡僕亦痛。行役會有窮。近漸及門戶。榆茅塞道塗。松竹殊荒蕪。南阡無人行。誰復徹桑土。羣凶馳茂蕃。諸穢穴猘猢。風煙望不合。雞犬依老姥。薄命負皇天。春明虛膏雨。白松樓集略一

日出

皇天眞愛雨。吝惜此郊園。但使濕枝葉。徒煩多語言。百穀終未醒。八口敢重飧。疾首愁日出。民生定有冤。白松樓集略二

田家朝雨

田家朝雨夏苗青。跌坐當門鋪錦屏。囊已無錢堪贈客。庭餘稚子受殘經。石倉萬卷歸兵火。詞賦千篇對日星。獨有伯淮江海外。憑高日日聽鶉鴒。白松樓集略三

久雨

霖雨經旬不見天。眼前花竹盡雲烟。潭深千尺增魚水。浪起三江想釣舡。麥事愆期憂播種。書籤沾濕忍殘編。君門萬里難投告。何爲民生罹此年。白松樓集略三

東平墟

曹陽城下東平墟。與客同登傷在余。瓦礫在門庭生茅。敗瓦頽垣是誰居。大廈空懸數十棟。燕雀不愛將軍廬。奇石千本來江南。洞有狐狸池無魚。憶昔駢脇臥沙場。殺人如草劍如霜。微功得印掛肘間。開藩淮左月無光。賜爵東平號一鎮。內帑日夜投中堂。高歌痛飲意獨喜。曲眉皓齒鳴笙簧。羣盜縱橫屠中原。不徒羅才李汝才自成與張憲憲衰小營。烟火彌天竟不休。流遺百萬何足言。是時天子關中門。奸權阮馬合力欺至尊。債帥裹足戒不進。長江妄欲長兒孫。木妖爲官伶爲客。輿平高傑已敗猶昏昏。旄頭夜色臨江淮。白題拍馬奪金釵。櫓櫓東下不得行。強兵悍將謀中乖。長樂馮道是所師。老於敗國善爲辭。翻身歸命向賢王。投甲擲戈復何疑。從此功名冀萬年。東手營門色可憐。陳豨謀逆事多泄。淮陰入賀禽塔前。舉室駢死咸陽城。藁街悉飽雲中鳶。嗚呼鬼神有靈天有知。東平東平良足悲。白松樓集略四

黃河水

黃河水漲。泛溢至張楊市。漲南百里。壞民居無算。人畜死者縣息。其境上下感駭。余居去張楊市密邇。慮有不測。作是詩。壬寅六月廿八日。

是月霖雨未十日。黃河之水與天一。東西縱橫不可量。大梁四面水圍畢。餘波衝倒鄭州城。中牟縣去十之七。支派徧滿蓬池鄉。張楊一市無居室。三十六陂盡澤國。魚龍悉向禾黍出。官道寂無人。小艇價一鎰。所占非崇岡。晝夜滋戰慄。慮遭魚鱉殃。不得食其食。村中老人淚如泉。叉手浩嘆立我前。曾記萬曆

壬子秋。普天皆水水連天。到今多載猶安眠。忽見平地乘江舡。正值差繁賦重無一錢。與其終歲受拘攣。不如舉家悉化爲烏鳶。所耕既已隨百川。庶幾孑遺不致重牽連。嗚呼哀哉爲此言。此翁計策誠可憐。朝廷何事尊蔽賢。白松樓集略四

徐作肅偶更堂詩稿二卷文集二卷

徐作肅。字恭士。商丘人。作霖弟。順治八年舉人。初作霖與吳伯裔伯胤侯方鎮方域張渭賈開宗。爭爲詩古文辭。與洛陽王氏鏗鐘兄弟競爽。號歸德派。經亂多死喪。唯方域開宗存。益以作肅隣唐世琛宋犖。共結六子社。視前稍衰矣。方域文學東坡。而作肅學半山。善持議論。方域爲文嘗聽其一言爲去取。與人落落寡合。唯善陳維崧計東。卒於康熙二十三年。年六十九。事具劉榛所撰徐恭士墓誌銘。有偶更堂詩稿二卷。文集二卷。計東稱其詩自出機軸。吐陳啓新。蓋與方域開宗之學杜者有異。則時爲之。

大水

仲夏經秋雨不斷。城南大河平接岸。魚苗千頭縱道出。盤渦一視回雲燦。深涉來往恍行人。陰霾夕日濁水濱。水中豆葉苦飄灑。羨爾白鷺雙高躄。偶更堂詩稿上

苦雨

去年暑爲虐。越夏苦毒淫。今年熱不作。愁霖總見侵。一雨四旬失白日。三伏六月滌沈陰。貴宅回廓謂雨

好。淨洗庭花花數蕩。貧家狼狽亦太急。土鏗斷薪水淋漓。何堪促居逼塔牆。隨塔垂首嘆汪洋。孤電輕雷尙氣勢。沈綿那復更禁當。憶昨北鄰屋傾圮。半夜聲息驚魂魄。前日古坊倒汚泥。百年碧瓦墮朱題。堂下蜻蜓只羣喜。堂上行吟愁未已。少陵空欲誅雲師。女媧鍊石亦荒鄙。忽看霽色開瑤室。落水雲光曳練匹。皇天或更憫禾黍。造物杳冥人莫悉。偶更堂詩稿上

值南村草堂成觀刈麥觸事

四首錄一

國計存生計。高高未卜天。徧知勞載穫。幸已慰祈年。當路誰煩策。野人自有田。但期還舊籍。貢賦想依然。

偶更堂詩稿上

侯方域 壯悔堂文集十卷補遺一卷四憶堂詩集八卷

侯方域。字朝宗。商丘人。父恂。東林耆舊。方域以貴公子爲黨人。窮極聲技。而富于文辭。以致盛名。嘗入史可法幕。又客高傑軍中。入清。應順治八年鄉試爲副貢生。卒于十一年。年三十七。方域文實有才氣。早負盛名。或譏其有小說氣。此宗八家義法之說也。若如其言。則左馬當受譏彈。詩非當行。亦惠才多。汪琬輕方域。題壯悔堂集。舉末年來吳下。欲刻其集。集文有未脫稿者。一夕補輟立就一事。以譏其文。方域目中何嘗有汪琬。而汪琬心中時時有一侯方域。論者或謂以是知汪定不及侯。壯悔堂文集十卷。補遺一卷。四憶堂詩八卷。刻于順治十年癸巳。後一年卒。其子輯遺文與詩附于集後。嘉慶十九年甲戌。裔孫資

燦重刻本。刪馬伶傳。豫省試策。擬致祭闕里謝表。擬追復楊漣等官爵謝表。爲吳氏禱子疏。憫獐。盧告。蹇千里傳。定鼎說書。練貞吉日記後凡十四首。別從三家文鈔增宋牧仲文序。雪園六子社序。與方密之書。正百姓。額吏胥。重學校凡七首。蓋未見補遺。世稱方域有經世之略。特工語言耳。觀其說父斬許定國以立威。張李已燎原。且暮莫保。尙何威之可言。及定國殺高傑。遂謂有先見。使傑不死。果能與復乎。說傑餘衆退保蘇浙。不能守江北。安能守江南。屯田之議。滿紙空談。是知談經世者。決不能經世。

哀辭

萬里飄黑雲。壓摧金陵郭。鍾山熊羆號。長淮蛟龍涸。慘澹老臣心。望斷紫微落。千載史相公。齊恨凌烟閣。相公金臺彥。早年起孤弱。爰出司徒門。深契管鮑託。文終轉漢漕。殷富感神雀。高望著經綸。宸眷良不薄。南顧鳳陽宮。卜曆實舊洛。帝曰汝法賢。往哉壯鎮鑰。二陵堂構基。更爲塗丹雘。鎬京重樞密。論功酌開擴。福邸承大統。倫次適允若。應機爭須臾。乃就馬相度。馬相士英也坐失綸扉權。出建淮揚幕。進止頻內請。秉鉞威以削。當時領四藩。皆封公侯爵。飽颺恣跋扈。郊甸互紛擾。從來梟雄姿。駕馭貴大略。鞠躬本忠誠。報主惟澹泊。譬彼虎狼羣。焉肯食藜藿。二劉與靖南。久受馬阮約。惟有與平伯。末路秉斟酌。志驕喪其元。乃緩猛獸縛。遂起廣漠塵。負嵎氣轉惡。相公控維揚。破竹傷大掠。三鼓士不進。崩角何踴躍。自知事已去。下拜意寬綽。起與書生言。我受國恩廓。死此分所安。惜不見衛霍。子去覲司徒。幸爲奇然諾。白首謝知己。寸心庶無作。再來廣陵城。月明弔溝壑。嗚乎相公賢。汗青照鑿鑿。用兵武侯短。信國如可作。

少師建極殿大學士兵部尚書開府都督淮揚諸軍事史公可法。賈曰：史公燕京人。崇禎中爲戶部郎。與同官何楷倪嘉慶。皆爲司徒公所拔。嘗曰：三耶皆君子。然史君功名。後當過我。公感知己。事司徒公爲弟子。已而出爲安慶監司。進淮揚督撫視漕皆有績用。甲申燕京之變。公爲南京兵部尚書兼機務。時弘光以福邸當承大統。論事無可易者。公以強藩在外不即決。乃就鳳陽總督馬士英謀之。而擁立功靈歸士英矣。士英尋引用阮大帥。嫉公異己。出公以關部督師淮揚。公忠誠清謹。嘗食蔬菘。屢上疏抗陳大恥未雪。廟堂不宜荒縱。天下靜之。然短於兵略。不能駕馭諸將。東平侯劉澤清。興平伯高傑。增南侯黃得功。廣昌伯劉良佐。并建四藩。皆爲馬阮所用。傑後以疏救劉宗周。鄭三俊等。觸馬阮怒。乃更歸心公。會經略中原。至睢陽爲許定國所殺。定國遂來降。導賊王兵南下。公守維揚。諸將不肯戰。公嘆曰：事去矣。侯子避大帥之難在幕。公語之曰：南京固無可爲者。豈幸陵在天之靈。不能使將士一跨江背城耶。可法在兼將相當死。子嘗四憶堂生也當去。倘見司徒公。幸爲謝生平知己。今庶無愧。城陷。公乘一白驢出。意以南京尚在。欲有所爲也。既被執。公不屈死。詩集五

劉 榛 虛直堂文集二十四卷

劉榛。字山蔚。商丘人。諸生。卒于康熙二十九年。年五十六。清史列傳文苑有傳。商丘自侯方域以古文名世。一時繼起者。鄭廉有柳下堂集。田蘭芳有逸德軒集。榛有虛直堂集。榛以二徐麟唐爲師友。孫奇逢湯斌皆重之。生長亂離。有志用世。及其不遇。鬱勃不平之氣。一寓之于文。又深信文以載道之說。折入理學。故制行惟謹。以孝友稱。探虛直堂文集。文十六卷。賦一卷。詩六卷。詞一卷。詩斷自丁酉。順治十四年文自壬寅。康熙元年文有勁氣無腐氣。近三蘇。不近歐曾。詩由蘇窺杜。詞則蘇辛。才筆微遜于侯。視宋學則遠過之。劉與侯宋世爲昏姻。榛述兩家事甚備。謂順治八年鄉科。方域命力士劫徐作肅入試。此事世人不知之。然則方域應試非被迫也。

大梁

兩河一夕黃雲起。白日風生跳山鬼。持重條侯纔欲眠。毒波已殺蒼龍子。

繁華不必念疇昔。猶幸今朝荒萊闢。牛足顛時翻鬪體。鋤頭礙處拾金壁。虛直堂文集十八

拜墓

潦草從開土一抔。烽煙出沒幾重憂。孤城暫得黃巾散。落日難爲白馬留。飛雨霑濡元助淚。葬時細雨驟集驚鴻

歷亂不關秋。蒼黃弱子經營處。亂離中竟得先慈遺骸。遂與先大人倉卒同葬。時余方八齡也。腸斷山猿慟未休。

飄零一櫂瀉長流。亂後行藏可奈愁。痛哭巾車疑姓阮。驚魂鐵馬竟依劉。葬事甫畢。烽火又熾。遂渡河依侯輔之於曹南。無家忍望雲

山疊。異地遙傷稷黍秋。可怪歸來迷故里。蓬蒿深處覓荒丘。虛直堂文集十八

編蘆歎

沓豫之區河爲殃。繞岸千里無枯楊。借問茅茨何承藉。束秸密密聊排張。河淮交處民益巧。編蘆如簞撐爲房。綯索上下相聯綴。一色波紋疎容光。我來棲留當三月。四壁常苦春風颺。往歲劇寒井亦結。哀此民命胡能當。詎獨無有一人陶。不然版杵還差強。父老歎歎前致詞。如君憐我其誰行。君知其一不知二。昨夏回祿尤悲傷。星飛日墜火龍驚。地黑天赤霹靂狂。一然百燎撲不得。爛膚焦毛煎腎腸。餘喘復此插葭葦。豈其覆轍吾儕忘。人間何處覓樂國。忍死姑守舊井疆。貧家從無百年計。苟且爲之遮雨陽。河伯怒比閼伯甚。往往洶濤如堵牆。破隄直同灌蟻封。堅砌厚築安遮藏。更是夜來覆壓毒。不如籬落猶輕揚。我行聽此三歎息。恨不生逢文命王。無事之行今已矣。束縛焉得不潰防。回首萬夫方墜塞。誰惜脂膏填汪洋。虛直堂文集九十

湯 斌 湯子遺書十卷

湯斌。字孔伯。號荆峴。別號潛菴。睢陽人。順治九年進士。官檢討。出爲潼關道。調嶺北道。以父憂歸。從孫奇逢游。爲入室弟子。康熙十八年。舉鴻博。授侍講。歷官至內閣學士。二十三年。出爲江寧巡撫。勤于民事。以清介稱。後二年。入爲禮部尙書。管詹事府事。輔導東宮。二十六年。轉工部尙書卒。年六十一。謚文正。學者稱潛菴先生。著洛學錄二卷。潛菴先生擬明史稿二十卷。湯子遺書田蘭芳輯爲□卷。王廷燦復因蔡方炳所輯增爲十卷。一語錄。二奏疏。三序文。四碑記。五書牘。六賦頌論辨。七傳志述狀。八雜文。九告諭。十詩詞。事具清史列傳大臣傳。黃宗羲徐乾學所撰神道碑。汪琬撰墓志銘。斌頗繫人望。其死甚驟。世不能無疑。方苞撰湯司空逸事。述其死狀。謂聞之奇逢之孫澄云。十月十一日下晡。招鄉人某官與語。客退獨坐一室。向晦語家人。吾腹不寧。夜半遂歿。若不得其死者然。其實斌孫溥等所作行略。曰感風寒微嗽。言笑如平時。漏下二鼓。乃就寢。聞府君嗽聲轉急。披衣起視。則喉中有痰。疾呼尙能應。頃之遂卒。別無異狀。非中毒也。是時黨爭劇烈。斌與政府明珠余國柱積不相能。宗羲及苞備述國柱借董漢臣上書事以傾斌。謂出斌指使。聖祖不能無疑。欲置斌旗下。而宗羲遂謂遺學士德勒格至寓宣手詔。賜旗下田宅。迎母就養。爲旗下矜式。未免不核。李光地榕村語錄續錄謂以斌愛民有心救民無術告示進呈者。徐乾學也。所以陷斌。然乾學撰神道碑。盛推斌政事學行。其辭出姜宸英代筆。李語恐非實。

斌爲余國柱所陷至死。天下人皆知之。故吳祖修詩云。齊馬武昌余闕老。黑心讒害殺忠良。二十七年。徐乾學奉命嗾郭琇劾罷明珠余國柱。琇爲斌所舉吏。不啻爲斌報復。何金蘭復劾國柱罷政居江寧買第宅設錢店典肆。得旨勒令回籍。湯余之爭始結。方苞謂萬斯同爲斌作傳。姜宸英有遺事記。今與宗羲神道碑俱不載本集。蓋畏國柱也。

寄示兒溥二首

浪跡真無計。門庭汝暫持。雨多憐稼誤。地下慮牆危。官稅完應早。鄉租催漫遲。近聞文體變。前輩法須知。

汝祖墳前樹。今年看幾回。叔賢書共讀。弟幼酒同杯。藥裹宜常曬。柴扉莫浪開。初冬當返棹。候我竹林隈。湯子遺書十

西來菴贈水齋上人

上人舊爲軍夏總兵

白馬西來掃野雲。居人誰識舊將軍。楞嚴讀罷焚香坐。一鉢江泉到夜分。湯子遺書十

案西來菴在鎮江。

李繼白望古齋集十六卷

李繼白。字夢沙。安陽人。順治十二年進士。官戶部主事。十八年。權北新關。刻其所撰望古齋集十六卷。

詩學七子。文甚平實。紀事之作李黃門傳。趙連城先生傳。楊崎人傳。書王孺子事。北陳將軍殉難紀事。河南殉難紀事。故孝廉達觀全公墓誌。均可補記載之闕。其關於地方利害者。漕米折色本色議。水旱災傷蠲免議。墾荒虛實議。大兵過往封船議。皆順治時民不聊生之事。

緯夫嘆

淮海南征震鼓聲。王師十萬羽林兒。舳艫千里旌旗映。克敵赴桓過虎羆。挽緯丁夫人似螳。盡是山東良家子。雨檄星催赴郡城。十日裹糧今竭矣。揮汗蒸蒸鎖四圍。蓬屯無那掩重扉。可堪烈日秋陽下。誰買壺漿賜渴饑。嗷嗷萬口嗟無食。索水荷荷不可得。蠶繅不禁若轟雷。壓倒危垣動氣色。客夢驚飛風鶴中。披衣起聽思無窮。連年庸調誰爲恤。應念東人杼軸空。望古齋集四

灣頭死夫歌

東河灣頭屍如積。父老吞聲空慨惜。丁夫食盡力窮時。鞭扑須臾命輕擲。或見衝流啄饑鳥。援來三五猶牽掙。或爲僵臥舟道傍。皮膚血濺身狼藉。天子施仁萬物春。旦夕下令掩腐骸。憶昔驅夫赴役時。郡縣捧檄無寧夕。妻裹餘糧母績衣。兒女牽隨聲噴噴。計程往返三百里。倏去倏來耕田陌。數賤何能多易錢。比鄰借我五七百。屈指當歸問同行。家人笑語欲相逆。豈知力竭並身殉。游魂竟作他鄉魄。母哭兒啼妻痛號。遺骸遍索何曾獲。絡繹爭詢歸路人。黑羶喘喘步踟躕。當時彼此不相顧。首丘無地死何擇。嗟哉南征將士迅風航。尙惜此方仲行役。何如兵不病民民卽兵。海不揚波致重譯。望古齋集四

出兵行

臘月廿後寒風洒。長安市上觀出馬。將士南征滇黔平。宣威傳自八旗下。師行早日禱龍媒。雀旗隼旆雜青
赭。驪黃已多雲錦羣。穗幃毳帳高如廈。橐駝擁峯出帝門。須臾塵沙徧原野。何方駐牧集芻蕘。趙南古相
吾鄉社。吾鄉孔道達天都。往來輻輳盈車輗。去時兩歲三駐兵。村莊供億無完瓦。供億原爲子姓職。梟兵
催索怒遮打。銀錢索盡尙嗷呼。至今父老淚盈把。豆踐草豐費可支。催科別有傷心者。天子賜租給軍需。
年來衣被或云寡。嗟呼莫非王土皆王臣。中原豈止鄴城也。誰將民隱陳九關。更番代息愁懷瀉。望古齋集四

插稻謠

插稻插稻何勞爲。夏不暑雨民怨咨。桔槔聲喧手足疲。磬磬八口行苦饑。連歲年豐病穀賤。催租戶滿農
夫嘆。霖霖怕見三春雨。亢虐那堪六月旱。天道盈縮反其常。才遺此日歌雲漢。誰爲大地鞭毒龍。石燕翔
飛聞鶴鶴。龜痕柝土堅如石。黃犢牽耕無氣力。苦將婦子汲田疇。眼見溪河乾數尺。徂暑皇皇稻未秧。絲
絲初佈如針芒。白髮老農相對語。好將沛澤祈穹蒼。望古齋集四

劉體仁 七頌堂詩集九卷別集中語一卷文集四卷尺牘一卷

劉體仁。字公毅。潁川衛人。順治十二年進士。官吏部郎中。請告歸。卒于康熙十六年。年六十六。事具清
史列傳文苑傳。撰七頌堂詩集九卷。別集中語一卷。文集四卷。尺牘一卷。詩文好奇。詩摹晚唐。頗有

色澤。七頌堂者。生平慕成連。陸賈司馬。徽桓伊。沈麟士。王績。韋應物之爲人。有七頌詩。與書悔詩二十六首參看。可以得其爲人。在京師時。與王士禛。汪琬。主持風雅。罷官後。欲卜居百泉。從孫奇逢問學。又嘗訪傅山。太原松莊。致其殷勤。少游江南。娛情如水。老而流連黃鶴山頭之景。晚遂閉門。有出塵之思。讀其詩。時有奇氣。信畸人也。集傳世甚稀。四庫存目。缺詩第九卷。同治中。重刻本以空中語爲第九卷。後又求得第九卷。以爲第十卷。文則合文與尺牘爲二卷。缺文五篇。尺牘三則。而次第顛倒。非復舊觀。

曲阿燈屏

長安畫手作春燈。千盞一態垂青繩。曲阿燒鉛琉璃色。屏山十二圍氍毹。圖畫全鋪女嫖巧。剪綵細奪隋宮能。仙人五色現雲氣。初日千片裂鮫冰。好花笑入堂上鏡。嬌鳥恐落烟中矰。青巖壁立佛光現。寒瀑練掛雪花崩。魚藻名洞版爲屋。錢塘射弩潮作棚。蜃樓碧海眩飄越。寒火密管生鋒稜。山嵌石鏡游未至。水交藻荇間何曾。珠淵媚色迷罔象。玉田光采分溝塍。霍霍射日舞宜按。瑩瑩星的嬌堪懲。近遮人影衣香漏。遠奪明月朝光凝。素師顧毫罷草聖。孫郎錯眼彈蒼蠅。客醉綠淨不可睡。九微瑣瑣何足稱。七頌堂詩集二

書悔

二十六首錄一

南山荒草接。豺虎暴平原。兵甲兩方洗。饑寒跡更冤。語吞屢謝客。天夢早關門。薪火醜人甚。經冬不出

村。七頌堂詩集四

梁熙哲次齋稿十二卷

梁熙。字曰緝。鄆陵人。順治十二年進士。官陝西咸寧知縣。行取御史。告病歸。卒于康熙三十一年。年七十一。事具王士禛所撰傳。撰有哲次齋稿十二卷。熙與王士禛汪琬同年進士。同官京師。以詩相唱和。齊名。熙詩筆清新。惜篇詠寥寥。文亦安雅。唯多涉宗乘。紀事及議論之文無幾。或所尚者不在此也。觀其居官兵喪之後。首務安輯。居御史不肯以言事博聲名。居鄉閉門屏絕外事。澹泊無營。殆有所不爲者歟。集爲後人所編。奏議公牘入集可也。收入賀啓極聯。則子弟失學之過。故士禛爲作傳。而不肯序其集。

紀汴災

嗚呼壬午歲四月。我家誤入汴之阨。箭鋒滿眼蔽玉津。郊騰白馬夏無麥。藩庖官倉積應豐。猶望餘糧賑編氓。兩經犯陣稱能守。豈意再圖食驟窮。磬搜民蓄給健兒。今日鳩形明日尸。幽巷生燐見新鬼。市爐柝敲作晨炊。九月十七河伯怒。秋蛟孽城黃濤注。陰氣歛飛天欲墜。漩聲崩裂風成颺。匯水如塘倚雲堞。沈波細藻參漢樹。藩王冒霜衝逆流。七營鳴角遞乘舟。杖拂危樓空展轉。眼穿咫尺不可留。餘息那保頽簷墜。微軀已憑盛浪浮。猶有筏兵操刀疾。老鴟畫叫魚龍泣。祥符舊令王嬖來。督船忽載遺民出。病骸全身歸土丘。生人顧影疑天日。空城雲覆月冥冥。可惜有宋舊神京。碧瓦溜泥鐵鳳落。天吳據殿海獸鳴。冤鬼萬族紙錢斷。繁華百代歷市清。我家幸荷皇天慈。高堂衰白抱幼兒。嗚咽不敢怨河水。卽事一歌雙淚

垂。曾次齋
稿一

呂履恆 夢月巖詩集二十卷詞一卷

呂履恆。字元素。號月巖。河南新安人。康熙三十年進士。四十二年由青城縣知縣行取湖廣道御史。官至戶部侍郎。著夢月巖詩集二十卷。詞一卷。履恆爲維祺之孫。家世文學。與弟謙恆各有集行世。規模七子。俊快以出之。而皆不能錘鍊。奉王士禛陳廷敬爲師。詩格不類。集中有大愚集一首。備極崇奉。大愚者王鏞。與鐸昆弟行。鐸爲履恆外祖。或曾受教于鏞。其兄弟詩淵源當出于此。撰夢月巖詩集二十卷。詞一卷。凡詩千五百篇。于當時利病。尙肯直言。如斫榆謠。古城謠。函谷謳。捕蝗謠。鄰人別。紀事四首。則紀己未康熙十八年之旱。函谷。楚粟。皆詠輓楚粟貯秦中爲西征糧。沿河大擾。民盡流亡。感時五首。言秦中民變。今已不悉始末。皆不惜太息流涕以言之。喜與逸民游。許旭爲定其詩。謂七絕有風韻。有讀吳徵君街南文集。遙寄十韻。自注徵君文原本性道。力排二氏。其理取震川而氣逸于山陰。來徵先忠節軼事。歎歎者久之。又漫興三首。自注。嶺南屈子秦中李天生。皆愛而不見者。當康熙之季。海內遺老殆盡矣。履恆獨致其愛慕如此。

感時

三川流血土花腥。野哭如聞出錦屏。山名。在宜陽縣。源水舟疑深復淺。中山酒願醉無醒。百年身世供多病。何處

田廬貯一經。夢裏不知鄉路遠。仰天極望少微星。

鼎湖西去近秦關。曾進金沙月數錢。進之郡守豈問荆揚三品賁。忽來旌旆萬重山。哭聞岳麓風霜烈。血染河

濱草木殷。更說徵兵聞左戍。殘黎何日破愁顏。聞發士兵於關鄉

調劑還稱大府賢。檄傳軍倅下三川。纔聞礮石心如擣。未覩旌麾踵不前。院委某同知招安去宜陽五十里夜避四野何曾嘶戰

馬。千村從此絕炊煙。可憐牟麥登場候。火烈原田盡棄捐。時兵焚民刈麥

蒼煙幾點是中原。帝遣元臣爲洗冤。二陝分封連國土。時有戕及潼關衛者九重申命重王言。函關晚照河山在。灑

水秋風草樹蕃。不是遺民防口易。諸君何以對臨軒。

莫道傳聞盡子虛。即看西遞奏飛書。二陵誰瘞千家骨。三晉難營百堵居。宜陽關鄉民多流至晉碩鼠歌聞清夜夢。哀

鴻聲斷夕陽墟。登樓不敢南回首。聊望高雲賦遂初。夢月巖詩集十八

呂謙恆 青要山房詩選十二卷

呂謙恆。字天益。號澗樵。履恆弟。康熙四十八年進士。入翰林。官至光祿寺卿。湖廣分闈試士。其所請也。卒于雍正六年。年七十六。事具張漢所撰傳及方苞撰墓誌銘。河南呂氏。自宋以來。世爲甲族。明自太傅忠節公維祺。三傳而至謙恆。與兄履恆。同官禁近。白頭昆弟。以詩文相砥礪。又與孟津王氏。世爲婚姻。以文采相尙。方苞稱其詩不襲宋以下格調。而王摭評其兄弟詩。皆淵源七子。四庫提要。乃謂純作

宋格。非篤論也。實則才華稍遜。鍾鍊不足。未足與于作者之林。撰青要山房詩選十二卷。其集先後凡三刻。初門人范咸于雍正乙卯。刻青要集十二卷。至乾隆辛酉。門人張人崧汰百八十首。刻爲青要山房詩選十二卷。後九年。其孫肅高重刻此本。復題青要集。集中詩若咒蝗。婁界山漠北輓運奏凱歌。意存諷諫。有事可指。餘若慈仁寺松。自鳴鐘諸篇。亦足備故實。

城固聞老尼話故宮遺事二首

尼爲神廟宮人。隨瑞邸之舊。

寥落天涯一老尼。緇衣狼藉步行遲。前朝舊韻飄零盡。說向人間總不知。

城陰楊柳漸成絲。門外啼鴉欲暮時。回首漢宮淒絕處。浮雲直北是京師。青要山房詩選十二

萬如洛 愛吾廬遺詩四卷

萬如洛。字衡門。號匯菴。河南睢寧人。諸生。卒于康熙五十七年。年五十。有愛吾廬遺詩四卷。自撰愛吾廬記。謂性懶。寡交接當世。計終歲居廬。什已得九。蓋恬退人也。詩格清秀。風華掩映。有神似王士禛者。吳雯傲兀不可一世。獨與之爲友。集中于董秋水莫亞夫表章甚至。皆前朝舊人。姓字賴以流傳。紀事七首。鬻兒詞。書所見。流民歎。歎歲諸詩。鬻然仁者之言。豫中詩事。清初固自有人。

紀事

入夏十日雨。滴瀝不能休。農人咸蹙額。麥花恐損收。一夜雨翻盆。平地五尺流。但聞波滾滾。不見綠油

油。東家忙支屋。西舍疾牽牛。相見互相道。災變曾經不。睹此三歎息。難測是天謀。今年麥獨盛。覆隴復掩疇。腰鎌方及時。轉盼慰車籌。失望胡乃爾。酷哉此陽侯。雨前穀積山。雨後無一掬。日午市上還。相向嗟空腹。百錢持囊囊。富室聞潛罵。糴得米三升。如獲珠十斛。歸來薪何有。撤我園中屋。屋撤猶可補。命絕不可續。

麥收已無望。秋成尙可期。質衣易菽豆。播種當及茲。下田泥活活。勞苦不敢辭。卒歲惟此物。不絕命如絲。詎謂淫潦甚。六月無息時。高下百萬畝。盡爲蛙隰私。農人仰天歎。生生真無資。早知豆如此。作粥舊飢疲。

橫流如奔馬。疾濤如飛箭。長堤當其衝。不絕惟一線。崩騰忽奔決。桑田滄海變。莫問室中人。須臾室不見。三旬水稍退。白骨林間遍。近傍脫魚腹。持牒訴州縣。我聞心孔悲。淚下等飛霰。哀哉此時人。命如雞犬賤。

富家方酣歌。貧家方痛哭。貧富胡不均。歌哭聲相續。五日飢不耐。抱兒向市鬻。得錢祇三百。糴米歸作粥。粥熟開釜視。淚下忽蔽蔽。兒去無歸時。食盡終枵腹。

稗實雖充穀。屋椽雖充薪。暫焉非長計。難言在家貧。豐收聞他邑。就食仰傍隣。扶攜隨婦子。相將向河濱。泥淖深沒脛。衣襦不掩身。草行復水宿。羞澁難向人。三旬行將到。前往忽逡巡。傳聞縣帖下。昨日驅流民。保正與里老。嚴令日三申。去去既無計。住住欲何因。去住難爲情。相對益酸辛。

宋陳阜下地。頻年困洪波。糧粒不自保。其如國稅何。持牒赴大府。九重達殿阿。皇仁知浩蕩。發粟免催科。道路逢騎卒。大馬醉顏酡。開口方一問。旋即遭斥訶。何來不祥語。民言怪云訛。去去慎勿道。時方獻嘉禾。愛吾廬 遺詩二

鬻兒詞

哭聲聽漸低。淚下都成血。三歲兒乳懷。一朝母分別。一步一回頭。寸腸千萬結。得錢問幾何。掩淚不能說。愛吾廬 遺詩二

書所見

北隣有老友百結。形體律兀行躑躅。沿門日聽乞哀聲。一夜嚴寒聲遽絕。東隣有老把釣竿。五日前坐釣魚灘。今朝過門妻子哭。聞說三朝苦斷餐。嗚呼二老同日死。目中所見已如此。愛吾廬 遺詩二

何彝光 菱谿詩集四卷

何彝光。字叔獻。杞縣人。撰菱谿詩集四卷。彝光與賈開宗趙賓劉榛交好。輩行甚尊。其詩格調深穩。律法極細。頗有佳篇。本無宦情。而稱頌皇仁。隨場逐隊。蓋善于自全者。首有康熙三十三年呂潛序。自謂癸未崇禎十六年後流離東南四十二年而後歸蜀。歸十年復出省其弟旂山葉縣署中。適與彝光遇。爲序其集。貧老無依。跋涉千里。度其年已近耄耋矣。

京師宴許將軍林亭

將軍以開國勳封定南伯

案許定國封爵。官書失載。唯見于此。

徵侯池館在京華。感慨興亡日未斜。降表已空南渡業。璽書今賜寶融家。風飄鐵笛遙聞響。雨滴銅駝夜有花。舊府東山歌妓在。樽前含淚撥琵琶。菱船詩集一

春日村居

八首錄三

已分辭麟閣。猶堪挽鹿車。身孱知藥性。屋漏濕農書。午飯三更後。鶉衣百結餘。黃精一畝半。珍重帶經鋤。

獨坐披山海。閒居註馬蹄。石橋春落雁。花塢畫鳴雞。南國疲征斂。中原罷鼓鞮。寥寥桑柘外。紅日影初低。

索處經年久。依然鳥雀門。盤惟堆苜蓿。村自長兒孫。未返東甌使。難招雪苑魂。嵩高極望處。春草遍平

原。東甌雪苑謂韓買二君也。集二 菱船詩

高一麟矩菴詩質十二卷

高一麟。字玉書。號矩菴。登封人。諸生。嘗出游山左吳下兩浙八閩。歸而教授生徒以老。撰矩菴詩質十二卷。大約為康熙二十年至四十七年之詩。年已七十矣。詩不能工。然言之有物。間亦有可觀者。

麥秋怨

五月麥已穫。七月始登場。豈關手足情。水潦信非常。穗穗皆黝色。簸揚盡秕糠。蠶蛾障日黑。蠹蟲以斗量。存者什之一。腐敗不可嘗。入困究何益。無如棄道傍。歸而謀諸婦。家鮮宿春糧。轉眼禾黍熟。奚以饒空腸。相對復相泣。淚洒西風涼。矩菴詩 賀二

春雨嘆

雨暘祇此數。春多秋必寡。如何豔陽時。銀河反倒瀉。正月二月終。三月將入夏。白霧與黑雲。綿互迷上下。霖霖八十日。渾不辨牛馬。泥汚后土身。潦水溢城社。貧者頽短垣。富者傾大廈。可憐市井中。家家無全瓦。旱火燼扶桑。躑次失分野。麥死穀難播。坐見秋成捨。我也抱杞憂。有寐敢遑假。遙識廟堂客。應爲

變理者。矩菴詩 賀二

織女詞

返照入蓬蓽。老婦當戶織。何分早與暮。經緯無虛日。一日織丈九。兩日三丈七。十日八疋成。絲絲皆婦力。盡賈輸官糧。倚杼空獨立。不聞弄梭聲。惟聞婦嘆息。問婦何所思。問婦何所憶。婦亦無所思。鎮年工織作。短衣不蓋膝。感此心悄悄。露滴苔徑濕。矩菴詩 賀二

刈麥行

百日溼雨一日晴。大麥小麥倒縱橫。農夫敢惜泥淖濕。載穫錢鋪掣電明。同川萬畝人似蟻。語言囂雜鳥

無聲。五歲嬰兒荷稜走。八旬老叟引車行。引車荷稜莫辭倦。陰陽反覆傾刻變。脫使腐瀆委溝壑。豈止鳩形與鵠面。君不聞。上官移牒徵夏糧。昨夜三更已到縣。矩菴詩 賀三

運糧

紛紛火孽亂如麻。窮鄉到處催官車。麥焦糠碎無人問。五歲嬰兒驅野鴉。

三楚白糧盡入秦。運夫逐暑哭紅塵。誰家卜式能輸粟。活却中州數萬人。矩菴詩 賀十一

殷元福 候鳴集六卷知非草一卷讀易草四卷

殷元福。字夢五。新鄉人。康熙甲戌三十進士。改庶吉士。辛巳四十選柳城知縣。以艱歸。再補武進知縣。

告歸。晚歲主講杭州數文書院。以明體達用為教。人材奮起。時呼小白鹿洞。卒于乙巳。雍正三年年六十四。

專具清史列傳儒林傳上。撰有候鳴集六卷。刻于辛卯。康熙十年大約作于柳城。知非草一卷。刻于癸巳。

康熙五十二年官武進時所作。讀易草四卷。刻于丙申。康熙十五年時江南總督噶禮。嚴劾巡撫張伯行。辭連元福。羈留

待勘。故其時鬱抑。以寡過自解。而日讀易。元福與張伯行講學。皆尊程朱。詞章非其所長。痛詆錢謙益。

以其非毀程朱。謂詩貴真。必敦乎理。理基乎學。今觀其詩。真則有之。若理亦徒言之而已。

村老

瑤僮有村老。却非老大年。夥內定甲乙。鄉評在官先。計草為優劣。甲乙之際。以兩造前。置草多寡為優劣。違斷木刻穿。斷定具木。違者

木刻插入口中。盡日啖猪肉。斷畢瑤僅有酒瀉如泉。醉嘲綰符者。不如姑。姑者我也有權。候鳴集一

徵米

米完限九月。十月一分無。未見蒲鞭試。予比較不因遲租稅需。豐收猶易給。是歲大有吝出亦何愚。不記前年

事。背兒鬻作奴。前令催科太嚴。民候鳴鬻子女無虛日。集四

黨人碑

碑毀後。嘉定辛未沈公諱千之曾孫宰融邑。以家本刊石老君洞。

沈千事業少稱揚。洛蜀聯名奕葉光。每笑姦諛多拙計。翻教忠義得流芳。同文館獄空金闕。元祐黨刊壽

太常。摹紙千張時把玩。銀鉤欲動見鋒鋟。候鳴集四

次康對山讀中山狼元韻

有序。偶閱澄江李戒菴先生老人漫筆云。中山狼傳。馬左都中編撰。刺李空同悖德康對山。脫劉瑾之書耳。刺者雜之唐宋稗官諸傳之列。豈能了其意之所屬哉。未知何所

據。後於書賈購得對山抄本文集中。載讀中山狼傳絕句云。生平愛物未壽量。那記當年救此狼。笑我救狼狼噬我。物情人意各無妨。始信先生之言非無稽。對山此詩想先生亦未之見。先生為李忠毅公昇曾祖。諱翹。予感昔傷今。次對山元韻。率而成此。

拯溺縱然未暇量。豈容冒險救豺狼。懷州反顧能吞噬。養虎如馴尚不妨。知非草

劉青藜 高陽山人集二十卷

劉青藜。字太乙。號臥廬。別字嘯月。襄城人。康熙四十五年進士。選庶吉士。請養歸。越二年卒。年四十六。事具其子伯安所撰行述。有高陽山人集二十卷。青藜專意于詩。平生所作。不下數千首。沒後其弟青

震爲之編訂成集。詩不名一家。以古樂府一百一十五首得名。其他詠古憑弔諸作。皆有所託。頗受知于王士禛。謂其詩過于王鐸侯方域。不免過情。青藜素工書。嘗手寫漁洋集。而詩格不類何也。

蝗蟲謠

誰謂麥槁。我穀既好。雖則穀好。蝗蟲是飽。一東村擊鼓。西村鳴鑼。蝗乎蝗乎可奈何。二勸君莫擊鼓。擊鼓蝗蟲怒。勸君莫鳴鑼。鳴鑼蝗蟲多。三老農前爲蝗蟲祝。寧食我肉無食穀。穀充官租肉官扑。四蝗蟲忽大笑。叨叨無乃愚。縱我不食。爾寧其蘇。五吁嗟蝗蟲爾有羽。願見上帝爲我訴。不然攜我同飛去。六

高陽山人詩集三

廝蝗子

蝗蟲一產九十九。穴深三寸形如臼。上有白蟲當其口。十八日出子隨後。老蝗來。穀苗禿。老蝗去。蕃爾族。廝盈斛。聊作粥。爾食穀。我食肉。高陽山人詩集三

捕蝗紀事爲劉豹南明府作

天災非虛降。此語信如著。若云數適然。人力政可爲。爲之患不早。補牢羊安追。又患策不善。弊孔千百孳。前年蝗爲虐。田畝無子遺。民食既莫辦。國課能無虧。少壯苦流亡。老弱困鞭笞。種殃蓋有由。官與民分之。官乃千金軀。白羽扇羅帷。老胥喜有事。奉令猛虎貔。里正聞差來。戶剝到毫釐。徐徐歸上報。所在絕蛛蝨。薄俗昧同患。螻蟻各營私。此疆幸苟免。彼畝誰爲治。東西相嫁禍。詎許聲憂伊。白圭巧壑鄰。翻

笑神禹癡。有似玩寇兵。袖手失機宜。一朝羽翼成。輟亂靡旌旗。又恐煩官差。箝口莫聞知。初猶強驅嚇。久乃聽傷痍。男耕婦餉勞。俄頃飽肝脾。隴得蜀轉望。虞亡虢亦隨。老蝗鼓翅去。餘孽布滿陂。一穴百其卵。匝月再育兒。殘苗與滯穗。蠶食地餘皮。先時無良圖。噬臍空嗟悲。可憐上與下。公然相誑詒。此事嘗眼見。雙淚墮漣漣。請看今年蝗。捕逐功何奇。恭惟聖天子。南顧憂其咨。兩煩皇華使。將命恤窮黎。百僚承德意。羽檄日夜馳。先是邑侯劉。聞蝗已攢眉。相機籌方略。決計姚崇師。弭災守土分。天威況臨茲。時當五月中。僕僕冒炎曦。南至沙河旁。北抵潁水涓。東西百餘里。行行不知疲。法申吏膽破。意惻民忍欺。有蝗必來告。同心相扶持。四圍濬濠塹。萬夫稟指搗。但期殲族類。那用分雄雌。再令搜餘孽。掘地無使滋。計獲懸賞格。一炬爛如泥。回看壠上苗。既秀實離離。父老慶有秋。爲侯前致辭。刈我田間黍。釀酒千百卮。春我場頭穀。煮粥甘於飴。粥酬侯心勞。酒解侯面驚。今年不有侯。誰活鰥與鰥。已分填溝壑。翻得含哺嬉。侯曰吾何有。慙愧父老詞。上賴堯舜主。中託禹臯夔。下煩百姓力。糾集無參差。區區事奔走。筋力敢言罷。借手幸無過。貪功非所期。伊余生畎畝。八口仗耘耔。所願五穀登。俯仰足生涯。憶昔飛蝗至。利病稍稍窺。出言莫警省。肉食不免嗤。譬猶人疾病。原無不可醫。一經扁倉手。回生不盈匙。受證有根源。方法有由施。官逸吏乃縱。民愚戚自貽。徒薪苦不豫。同事心多離。是名助蝗虐。燭照理不疑。以思劉侯法。豈不妙班倕。此實百世則。奚但一時規。天災時流行。豐凶係安危。蝗本不難捕。但問捕伊誰。願截南山石。亭亭樹巨碑。其下龜爲趺。其首蟠蛟螭。憑借巧匠手。勸我捕蝗詩。

高陽山人詩集六

乞兒行

天寒歲暮暮。風雪無時休。行邁日遲遲。舉目增我愁。念彼流亡人。顛連滿道周。況復挽我車。哀呼聲啾啾。借問爾何鄉。何爲此淹留。答云家晉陽。耕桑頗自謀。頻歲遭水旱。田畝少所收。忍饑完正賦。不肯辭故丘。有司借名目。無藝日誅求。黠者依險阻。跳梁弄戈矛。軟弱守窮巷。鉤索反見仇。血淚洒公庭。繫頸等罪囚。低聲向老吏。乞歸鬻兒酬。咆哮甚猛虎。索保始領頭。脫身攜妻子。棄家到中州。聞說南陽界。荒陂足鋤耨。牛種既難辦。棲身何所投。匍匐大道旁。殘喘仰行輈。今日得苟延。明日信悠悠。見爾已心酸。聞語淚更流。嗟爾本良民。誰使填壑溝。羞澀客囊空。聊復遺乾餼。恭聞聖天子。西顧垂殷憂。赫怒誅貪殘。中丞行部搜。租逋槩蠲除。懷綏渥且優。勿作他鄉鬼。努力返田疇。高陽山人詩集九

聞張穉庵先生話大梁遺事 七首 錄二

史稿東都載幾車。寶甃雲散畫樓墟。中郎剩有文姬在。欲效曹公問父書。王損仲曾刪修宋史。寶甃其殿書樓也。穉庵子婦即其女。其遺集尙有藏板。

驅虜老將李空同。家住曹門古巷東。誰向大陽酌盃酒。結腸淒絕楚江蓬。大陽山在禹州。空同葬處也。州人劉玉威嘗于漢陽逆旅。遇一老嫗。自言爲空同女孫。口誦結。高陽山人賜篇云。詩集十一

稗子行

婦子紛紛攜筐篋。齊向荒郊收稗子。晨出暮歸收幾何。一斗才春二升米。莫嫌此物太艱難。猶勝田間把耒耜。今年五月日離畢。滄海倒翻瀉不止。拍天巨浪侵層城。平原窪地可知矣。小麥濕蠶秋禾空。辛苦何

曾咽糠粃。天生稗子惠予遺。殘喘暫延全仗此。只愁采掇會當盡。鴻雁嗷嗷饑欲死。高陽山人詩集十五

納穀行

雲愁風慘村村哭。簿吏如虎催官穀。春間賑貸秋收還。常年輸納寧煩督。芄芃秋稼綠如雲。屈指西成歌重穆。上充太倉無遺負。下餬八口足饘粥。平疇變作甬壘居。翻盆雨注一何酷。榆皮剝盡稗子空。奈此龜腸與蟬腹。追呼況復日到門。醫創何處更剝肉。九重天子真仁聖。饑溺萬里厘心目。但使繪圖能入告。矧看賜獨還發粟。爲語父老且吞聲。努力糴穀莫呼囂。汲黯不作鄭俠亡。眼見傳催星火速。簸揚糠粃添鼠耗。不然羸軀行鞭扑。高陽山人詩集十五

程正揆 青溪遺稿二十八卷

程正揆。本名正葵。字端伯。號鞠陵。又號青溪道人。孝感人。崇禎四年進士。歷官尙寶寺卿。入清更今名。官至工部侍郎。順治十四年放歸。遨遊東南山水。以詩畫自娛。畫入能品。百幅無一重者。卒于康熙十六年。年七十四。撰青溪遺稿二十八卷。詩文浩瀚。不可拘以繩墨。多題畫之作。己亥順治十六年江行五律三十首。和錢起江行詩一百首。尙皆有事可指。孟冬詞二十首。則宮詞也。其他念亂苦兵。語語譏刺。知是時禁忌未嚴。鴻博以後。頌揚盛而詩旨晦矣。

廟市篇

長安富兒青驄馬。金鞭玉勒稱都雅。肩摩趾錯來通衢。紛紛云自五都者。五都之市何豪華。鴛走癡人夢不捨。輸錢博得好古名。論直寧高不論假。商用聖作有儀型。彝鼎賈行奚爲也。天子貴德不貴貨。翡翠文綺不足睡。珍珠南海久寂寥。碧眼波斯無上座。會同貢獻逼遐荒。尙方朽積等芻莖。太平無俟錦繡粧。許史金張空勞暉。青溪遺稿三

戊戌歲大水澗川地十沒其五父老云自戊申後再見蓋五十年矣然未嘗以水災上聞

九月復苦連雨既無秋成又妨種麥民心遑遑靡所告予欲紀其事未逮也重陽日沈

子大悟冒雨來顧出所傷溺詩十首辭甚愴感因和之

十首錄一

鄰家斷火競鳴鐘。圖盡流離畫不成。共主自天皆受命。斯民無地可聊生。零丁凍合江魚氣。帶甲濤寒鐵馬聲。但願百川歸禹貢。波臣月耨五湖耕。青溪遺稿九

孟冬詞二十首

七錄

孟冬十月奉先壇。天子呈牲白玉盤。今日景山看騎射。鏗鏘劍佩促回鑾。玉樓星牖九天開。紫苑城邊飛鳥迴。玄武一弛車馬禁。婦兒都上夜粧臺。金鴨籠涎寶篆姿。教坊排隊舞天魔。西洋新進葡萄液。宣賜百官金巨羅。傳奇鳴鳳動宸顏。髮指分宜父子奸。重譚二十四大罪。特呼內院說椒山。勵精子夜上傳呼。案牘山高十日無。六曹官長形如土。此日相看憶五湖。

乾清宮殿紫霄通。八月功成子百工。御駕臨軒安寶頂。千官盡着哆囉紅。
名花妃子供金牋。一曲清平被管弦。弟子梨園多入選。不知誰是李龜年。清溪遺稿十五

兵至十二首

禁旅新徵十萬師。旄頭直指岳陽陲。觀察軍容尊貝勒。雕翎遍插羽林兒。
燕趙長驅豫楚間。旌旗日蔽太行山。黃河既渡傳飛檄。千里人烟晝閉門。
欽頰內帑湧流泉。一日軍需百萬錢。詔豁正供懷赤子。誰稽中飽叩皇天。
芻豆徵輸轉運多。迢迢阻絕奈山河。閭閻不惜捐皮肉。指望殲魁奏凱歌。
王師整旅蕭鳴鉦。野掠遊兵徧列營。聲亂已排鵝鴨陣。更驅草木助神兵。
將軍偃武法三章。虎賁前鋒躍冶疆。少女風高颺戰馬。餓夫連袂匿鬻桑。
破敵元戎十二乘。鷹弧山峩且先登。龍虎若非交戰鬪。何緣雞犬盡飛昇。
牛羊下坂已絕跡。婦女軍中氣更揚。繖錦夫人成一旅。九天遁甲掃機槍。
錦幕金貂玉唾壺。吳鉤手拂飲醍醐。捷書露布天顏喜。猶有流民可繪圖。
天兵赤白羽悠悠。雁落衡陽望鎧鍔。華胄驃騎俱掛印。捲旗談笑可封侯。
徵書萬里出皇畿。蒙古西番悉指揮。專閫熊羆猶伏險。處堂燕雀已全飛。
百靈八陣總勤王。廝養屠沽將相行。拊髀禁中思上將。翩翩裘馬憶金張。青溪遺稿十六

劉友光 香山草堂詩集一卷

劉友光。原名自燁。避諱以字行。更字魚計。攸縣人。崇禎九年舉人。名迹不詳。撰香山草堂詩集一卷。有丁景呂南游索書與梅村師聞師連舉三子却寄云。門餘三尺淹留雪。野墜同時痛哭簪。又云。門生老大諸兒稚。醉後何人可舉籃。作于康熙之初。集當刻于此時。江上乞米詩二首云。風濤竟日苦相凌。寂寂炊烟已不升。又云。何堪玩蟻徒終日。悔不爲農安鑿垣。灰盡壯心無可說。簫聲只合老吳門。大約入清不營仕進。而不免飢驅奔走。故詞旨悲憤。餘多諷刺之作。如有懷云。戲馬臺空寂。呼牛我亦安。才人鸚鵡岸。紅袖駱駝鞍。都下旅懷云。漢女金盤龍袖窄。粵裘珠貫獵連騎。故侯瓜向陽陂老。三摘空餘抱蔓思。其登臨覽眺。亦隨事增悲。如過玉泉山憩呂公洞遇王敬哉大宗伯談西山往事甚悉云。欲就白蓮弔太僕。愁聞粉墜不成妝。自注。擬過米太僕勺園。宗伯云。已鞠爲茂草矣。當日園皆植白蓮花也。是亦借以寓其滄桑之感。非徒傷米氏。詩學晚唐。雖篇章不富。而有極蘊藉纏綿者。同時楚中詩老。似尙少此風格。

來青頌

馬止筇升。雲在閣下。坤德爲文。遺翰藻足。銀鉤鸞迴。蛇蚓就冶。劍舞釵折。睿思滯酒。柏陰壽考。有秋無夏。斧尋童童。青惜峯赭。壑哀月苦。風泉爭瀉。侮及飄搖。解將及瓦。鑿石岡陵。誰有心者。巢傾卵空。龍應在野。雖則綉澀。摩挲誰捨。

香山草堂詩集

過廣平懷申晁盟

垂楊散馬錦連錢。遙望城南尺五天。三徑蓬蒿門似水。兩頭書畫屋如船。齊人蹈海長留恨。楚客逢秋倍可憐。一郡芙蓉宛澤畔。招魂時一爲予牽。香山草堂詩集

祖德詩應朱邃初給諫之索

朔風滿哀壑。三窟鮮狡兔。青燐入萋麥。賢愚魄同聚。生民百遺一。我偶備其數。凌寒到長沙。慙爲吏議註。南州朱夕郎。櫪下垂海顧。威鳳四十年。翺翔日振羽。相與陳往跡。恤緯同于婺。青箱開爛熳。祖德綿竹素。我昔游淮海。市酒討掌故。于公著廉平。雨洒孝婦墓。又有嚴屠伯。流血人無措。群麟與威鳳。飛揚各道路。惟公之先人。亦以法臺赴。取度而經緯。上下俱不附。公令祖司李淮安左遷漢南至清疑無徒。青蠅集何遽。露冕入點蒼。方懷漢大懼。文園結主知。豈獨凌雲賦。垂囊還西南。木爲菑醬污。獨抱五色瓜。歸托雲卿圃。偕隱復有人。弋取雁與鷺。舉案歌白首。鹿門人多慕。陰德果充閭。文孫盡玉樹。花萼並時輝。樓閣五鳳布。鳴珂排青瑣。批鱗龍不怒。家取漢庭樞。攀折何屢屢。公曾王父亦官諫垣玉步痛潛移。飄搖惜門祚。一坏傷人心。蒲葦冥雲霧。小人亦有母。八年委風露。同心望松楸。及泉何由訴。香山草堂詩集

秦中古農部枉過感謝一首

時余爲仇家所中。吉無一面。大實當事不爲直枉。

迢迢天半羨朱霞。碧映駒嘯未有涯。湘漲橫流迷杜若。春風宛在憶蒹葭。石渠藜沒三更焰。玉籟橫吹五月花。豈獨含情憐越石。更持太息到長沙。蓬心未解江湖遠。茅屋還依風雨斜。川媚珠明思化雀。杯留弓

影仍驚蛇。酒酣漫拭三搥鼓。春去全荒五色瓜。車馬不因門冷落。還來江上聽琵琶。香山草堂詩集

王 岱了菴詩集二卷文集九卷且園近詩五卷近集四卷

王岱。字山長。號了菴。又曰且園。湘潭人。崇禎十二年舉人。入清。屢赴公車不第。選安鄉教諭。遷隨州學正。順天府教授。舉康熙十八年鴻博不第。二十二年遷澄海知縣。卒于官。事具湘潭縣志。其詩初刻者爲了菴詩集二卷。曰山書。皆順治初傷亂之辭。有湖南災異詩。自注甚詳。楚招詩皆死于兵者。哀逝十二章則家人也。曰客簞。則乙未赴試時所作。後增爲二十卷。其文初刻者。爲了菴文集九卷。後刻者爲且園近詩五卷。且園近集四卷。詩文皆才氣縱橫。唯體近鍾譚。務以奇勝。客問四首。其最著者。所謂楚音。而聲名洋溢不可一世。標榜雖嫌過實。然一時知名之士。多見集中。又滄桑之際。其事湮沒不傳。得此猶可考見一二也。

贈汪魏美徐蘭生兩隱者

不入城者十餘年。絕足公車。冠履皆白。當道罕見其面。

南庵名尚在。東郭履全穿。寄食有僧舍。嘗居寺中歸耕無籍田。女言聊過日。甲子自書年。興至思同侶。呼兒

負笈前。子弟皆不應試

喪亂十年盡。餘生百戰圍。似余多難久。羨汝有家歸。白社清流聚。青門瓜豆肥。肯容隣卜宅。一榜釣魚

磯。了菴詩集一

馬裂哀

李翔雲孝廉死于兵。其婦陳媪迫呼。遇撫軍奔馳踏死。

天山腥烽血流赭。踞牙飲血踏中夏。北風騷嘶枯鬮寒。陰霾遊魂泣嗚啞。健兒高牙據追風。沙塵咫尺迷雙腫。橫鞍嚼勒踏石裂。那惜哀孀濺街血。官家追呼猛如虎。碎首裂身斷生苦。良人冠蓋汗燐青。一窟泉下孤冷冷。七十老媪何所惜。懷中黃口未乾翎。有庶出子三歲眼前鬼伯要促迫。頸血淋漓爲君赤。丁庵詩集二

乙酉秋過無過札寄永陽並緘易無畫秋曉詩有亂後鄰雞如野哭霜前歸鴈少南音之

句和之並寄無過無畫兩公

蒼梧秋動萬山陰。曉起孤吟百感深。芳草謾傷鸚鵡賦。枯桐誰惜廣陵音。雲迷瀟水舟藏壑。霜滿黃花杖出林。七載江頭君獨步。閑緘如夢落寒梅。丁庵詩集二

黃師憲夢澤堂詩集三卷資江唱和集一卷文集四卷

黃師憲。字當湖。應城人。崇禎十五年舉人。康熙初。官寶慶府學教授。撰夢澤堂詩集三卷。資江唱和集一卷。文集四卷。詩文頗有才氣。有懷潘章辰先生詩。自注。楚武岡有雲山。乃盧侯二先生避秦隱處。有管衡陽王而農年丈詩。寄懷青原和尚次王稚潛坐五嘯亭韻。自注。青原山在吉安廬陵七祖道場。和尚卽方密之先生。又答年丈王而農書。引工部朝看麋鹿爲喻。謂鹿邊者麋。麋邊者鹿。朝暮與游。始得遠害之術。因知方丈冥鴻。雲中野鶴。不受人間羈勒。夙有仙緣。不可強也。今同人中僵仆幾見告矣。是雖不足

以知而農。然于草衣木食者。未嘗不深羨之。列女朱氏傳。卽陳維崧婦人集洞庭女子賦詩十絕句。所謂寄語雙親休眷戀。入江猶是女兒身者也。當時盛傳其事。林茂之錢謙益黃周星賀貽孫朱彝尊。皆有紀載。其說不一。楚風補載。以爲辰州女子杜小英。此傳乃以爲武攸朱女。同時之人。傳聞異辭若此。以知紀事之難。

玉沙江圮

時漢雲未開

江神亦何怒。汎此六月潮。村農盡戟手。歎息撫良苗。須臾怒濤至。虎落室廬漂。兒女環婦泣。何處售吳舫。去年王師集。舟人已盡招。昨日吾夫去。賣貼送河橋。呼鄰尋淨地。一邑成沃焦。江陵一日還。暮雨接沔朝。生意哀哀盡。追呼胥正囂。十萬師無渡。羽檄責猶曉。狡哉彼滇窟。如何煩嫖姚。今豈挽天河。洗甲落雙雕。安能返峽波。殄育無遺儉。夢澤堂詩集一

射虎行

湖湘楚俗尙鬼巫。家家奉有乞靈符。神頭寶馬如傀儡。中堂血食未有已。道上復有小神祠。手執開山兩利斧。詢之神名梅山祖。神能封山射狸虎。因有鬼巫射虎人。禱祀作法廢農務。結伴不獨盈三五。善能登山當毒霧。深山大澤有龍蛇。更有猛虎張怒牙。鬼巫聞之興欲瀉。先期山下禁牛馬。結草爲隊書神符。勿令狂走逸中野。人持長鎗及箭弩。口作神號與鬼吼。山鬼陰靈助雨風。足凌荆棘忘嵒嶮。更有彎弓毒箭鏃。纔入膚理死亡速。遠徑迂曲俱藏弓。猛獸傍徨入檻中。一發便能捋虎鬚。不勞餘力加三矢。蒼兕乳麕

俱嬰鋒。么麼狐兔勿論已。須臾昇虎出平岡。飲血茹毛冥鬼王。虎文斑駁獻公府。惟有筋骨售胡賈。賈人得之邀厚饜。和藥煮酒筋力爽。自此籬落虎患寧。巫師神術鬼效靈。三時防農不出獵。巫鬼無食爲禍捷。

湖湘射虎術如許。無言猛將韓擒虎。如何南山尙有白額獸。十年不一逢周處。夢澤堂詩集一

答衡陽王而農年丈

幽棲鶴夢總無驚。眼底浮雲一葉輕。驥足名多楊子賦。客星絲遠漢王城。久慚下里甘奔逐。悔傍青門學種秔。咫尺湘涓流可遡。却言涇渭不同情。夢澤堂詩集二

劉子壯 祀思堂文集八卷詩集無卷數

劉子壯。字克猷。號稚川。黃岡人。順治六年一甲一名進士。官國史院修撰。八年。請告歸。翌年卒。年四十四。事具清史列傳文苑傳。撰祀思堂文集八卷。詩集無卷數。子壯夙工制舉文。與熊伯龍齊名稱熊劉。詩古文亦復豪邁。頗留心世務。與大司馬書。論楚省歲額餉銀十七萬。楚餉止十一萬。州縣止能徵十分之七。欠正額十萬。協濟無著。致以千錢一兩給兵。兵亦以千錢一兩買物。實則千錢僅值銀四錢。因議去無益之兵。以省有用之食。又楚事便宜與王雪樞直指書。論上傳荒田招民耕種。免租六年。以順治七年爲始。而楚中郡縣。不爲清理。及民米規則六錢八分八釐者。驟增爲七錢二分四釐。及差夫船戶橫被勒索之弊。語甚切直。子壯以巍科盛名入史館。未幾卽告歸。或以此不得于當事歎。宋元春秋序曰。水滸傳

也。曷以謂宋元春秋。曰志宋之將爲元也。自古國家崇賄賂而不修廉節者。必有民患。又曰。施羅二公。身居人國。而託之往代。不忍直言討童蔡四賊。而託之河北江南。蓋亦猶春秋之義云爾。子壯必嘗刻行水滸傳。更名宋元春秋。故爲之序。當作于明季。以警貪頑。宋將爲元之言。不幸竟驗。然清初賄賂公行。尤有甚焉。恐此序亦叢忌之一端耳。

問雨

不知雨意欲何以。我從問之天不理。大約未必有知耳。胡乃都不省記此。前時一滴不妄使。卽今用之何太侈。已分朝來刈禾始。俄而漠漠東雲起。怨尤全未觸怒爾。薄言訴之庶可已。或曰雨自天半止。雲則爲之非天指。山氣亦當告竭矣。大崎之帽仍如彼。神龍垂尾吸江水。弱蟄難升更倚徙。雨師何德政乃弛。珠璣狼籍如糠粃。河漢年久隄防圯。大傾小漏無停晷。乘槎試探星海裏。岸燥天空牛女喜。紀思堂詩集

避兵者

細雨吹風亂草隈。攜家荷擔自相催。分明子弟皆思治。盡道驍騎四面來。紀思堂詩集

熊伯龍熊學士詩文集三卷

熊伯龍。字次侯。漢陽人。順治六年一甲二名進士。授國史院編修。官至內閣學士。卒于康熙九年。年五十二。清史文苑有傳。伯龍工于制藝。詩文皆非當行。然所製冊文記傳大受守石山站。效力于錦州用兵

之時。楊名昇率包牛衆兵破『賊』二十萬人于入關之初。皆足備故實。傅蓋明將之爲清謀者。楊則擊李自成者也。

沈清遠座師定膠兵之亂以誕日凱旋奉賀二章

經營禹貢有神靈。兼領塗山接渤溟。羽扇夜侵秋月白。大旗直指燧烟青。五千卽墨樽前散。十二諸侯壁上聽。戈倒便披長命纆。中樞元是老人星。

客心念亂倍難堪。報道西征虎穴探。陌上紅塵飛露布。馬頭黃葉落霜柑。舞干豈待旬經七。解甲惟聞祝有三。此去倘承天語問。杞憂端不在東南。熊學士詩
文集上

樂城感懷

我來黃河口。流民爭南徙。舟子不敢渡。恐爲逃人詭。舉篙擊流民。舟中可掬指。我行又九日。緹負仍櫛比。夢夢向前去。冀緩須臾死。寧知行路難。破家誰容爾。太息問蒼天。死生亦大矣。受氣爲雞犬。還應有生理。河北潦不乾。河上工不止。肉食者何人。驅使泥沙委。史官時所卑。民窮發深恥。當日韓山童。乃自樂城起。熊學士詩
文集上

盧 紘 四照堂詩集十卷樂府二卷別集一卷

盧紘。字元度。號濟巖。蘄州人。崇禎九年舉人。順治六年進士。歷官新泰知縣。擢桂林府同知。東昌府知

府。長蘆鹽運使。康熙初元擢江南布政司左參政。管理蘇松常鎮糧儲。卒年未詳。所著四照堂詩集十卷。刻于順治十八年。樂府二卷。刻于康熙六年。別集一卷。刻于七年。絛爲吳偉業典試楚闈所得士。所以報之者無不至。奏銷之獄。偉業幾至破家。賴以彌縫。詩詞力摹偉業。而無其才華。絕句多至三卷。別出樂府一集。隨事刺譏。而屢入獻佛之法壽樂歌十二首。及齋醮用步虛辭十首。則偉業所無也。餘集爲填詞及曲子。自謂所作。不爲徒然。蓋癸未^{崇禎十六年}一歲。父如鼎以次男女死者七人。母羅驚悸後半年亦死。入清涉歷宦途。兵燹未復。井里蕭條。征戍徭役。不堪其苦。詩中率直紀之。如從軍行。寡婦行。奉使行。野殞行。健卒行。泛舟行。採石行。河役行。烹鴉行諸篇。讀之令人酸梗。其自注可以證事者。如哀莊棟如副戎略云。莊朝梁。三韓人。左良玉裨將。朱仙鎮之潰。朝梁獨不敗。癸未春。良玉以勤王爲名。順流東下。陰挾叛意。東抵貴池。復還屯懷寧。後朝梁行椒滌間。與黃得功素隙。爲其掩襲而死。又喜得李潁湖先生本草綱目云。先生吾蘄宿儒。博極羣書。精究醫理。刻行本草綱目。有功于世大矣。原刻有二。一藏吾楚藩司。一藏江右藩司。兵燹之餘。蕩燬殆盡矣。其後人多列科目。今存者亦不乏子衿。有志葺修。聞南中已有刻行者。余適從濟南得舊本。如獲希珍。報國寺古松歌云。己丑^{順治六年}春聞仲夏二十五日。大座師洪宋王三公命諸士會見報國寺松樹下。學諛云。時余以河清難俟四字獲罪當事。幾于不免。又有丁酉粵閩奉功令蔡稱師生詩。今皇御製爲明烈宗勸助修陵文詩皆可備故實。

田家苦二首

丁男苦晝耘。丁婦勤夜作。竭蹶一年中。曾無安息樂。草豨莠已除。年豐時非惡。仍憂卒歲貧。不知誰所削。

豪家督風通。蒼頭號其門。牽犢償子錢。烹雞供朝飧。我有未焚券。寧願爾無棍。婦子默無辭。飲泣聲自吞。

四照堂詩 集卷一

絲泉吟

禹貢青州之貢。配岱狀絲泉。考志新泰皆岱狀地。而絲泉之產。新尤夙最饒。泉則麻之別種。夏秋皆菽之。絲則家有蓄蠶。飼以桑。絲有二種。曰繅。曰繅。山蠶亦人所蓄。而食柘者曰柘繅。食楸者曰楸繅。食柘者曰柘繅。

即禹貢所謂聚絲者是也。地產不謂不裕。力作不謂不動。昔以上供而有餘。今以自贖而不給。其抑為疾徐用舒之理。有乖厥權宜者歟。聊賦以風當事者。

我聞土人言。茲地非沃灌。卑瘠易傷潦。山礪尤苦旱。十歲九不逢。小民輕流散。麥黍收屢儉。正供難以道。惟恃泉與絲。歲償額之半。今苦不在年。額徵亦有算。賦縮民仍貧。言之可深嘆。我怪詢其由。對者不敢護。咸曰正供外。有人虎而冠。借以方產名。給錢與之換。絲則不論劬。繭亦不計段。予一取者十。實未沾一貫。黠民以價售。無能救塗炭。雖以地利功。莫為吸膏贖。聞君脩新志。祈盡加刪竄。勿留絲泉名。取者無所按。四照堂詩 集卷一

西洋錦

段錦經南海。團花白浪紋。天孫輸巧織。霞彩借天分。春失名園麗。珍宜上筍熏。非供椒寢褥。亦適后宮裙。蠶口吹冰滑。鯨工襯玉氈。如何零落處。却溷泉麻羣。聞絕方來貢。俱從殿下焚。莫矜機杼貴。輕視等

浮雲。四照堂詩集卷三

王澤弘 鶴嶺山人詩集十六卷

王澤弘。字涓來。號吳廬。黃岡籍。鄱陽人。順治十二年進士。由庶吉士授編修。官至禮部尚書。康熙三十九年致仕。居江寧。四十七年卒。年八十三。撰鶴嶺山人詩集十六卷。已刻詩三卷。為少作。魏憲曾刻入補石倉詩選者。未刻詩十三卷。為丁巳康熙十年至庚辰三十年之詩。澤弘好獎藉士類。吳廬阮亭幾于同在人口。詩名或有不如。然詩中有人。且有事在。可取者或當在此。壬戌康熙二十一年假歸前。已有閉戶京華似老僧。近來事事學無能。殘棋盡斂誰成敗。舊史常拋忘廢興之句。戊辰二十七年北上沂州道中云。半生幾度住京華。報國無成每自嗟。未必此行能濟世。不如歸去伴梅花。仕途之險。王程之嚴。進退率不由己。中懷不樂。底裏畢露。晚得遂初。有園林之樂。差可無負。其行事最為人稱道者。諫止流人遠戍烏拉。及吳三桂之平。集資贖軍中難婦數百口。他所傳尚多。蓋好為善者。人必以善歸之矣。

贈柯三臺口號

初夏幽棲亂井蛙。每逢相慰待芳華。武昌市小英雄賤。誰問當年許負家。鶴嶺山人詩集三

歲暮

十載客長安。珥筆事官闕。孤踪寧見知。羣力諒已竭。漆室女誰憐。杞人憂自發。靜觀倚伏機。愁緒亂如

髮。鶴嶺山人
詩集五

定府莊

忽過荒原百感生。青蕪白骨幾人耕。吳宮梁苑無人問。何事仍留定府名。鶴嶺山人
詩集十

寄洪昉思

貝錦誰爲織。箝羅忽見侵。考功原有法。給諫本無心。一夕聞歌淺。諸賢獲累深。當筵人散盡。誰是最知音。

故人無所嗜。竟夕苦吟詩。老氣師天寶。希聲學義熙。著書家難後。避地數窮時。莫厭山田薄。歸耕正未

遲。鶴嶺山人
詩集十一

和友人雜詠

過雲莊邸舊名班。張沈清歌盡玉顏。曾未十年銷歇盡。舞衣渾漬淚痕斑。鶴嶺山人
詩集十六

王材任尊道堂詩鈔八卷別集六卷

王材任。字子重。號西澗。澤弘仲子。康熙十八年進士。由中書官至僉都御史。四十三年罷。未知所坐何事。父子皆未回原籍。一居江寧。一居常熟。卒于乾隆四年。年八十八。撰尊道堂詩鈔八卷。曰望雲集。爲丁卯康熙二十六年以前之詩。曰南沙集。爲丙申四十五年以後之詩。餘俱散佚。當有所避而不敢出。必與時事有關。

別集六卷。曰集唐。集杜。劍外。其詩清詞娓娓。情致綿邈。晚歲坎坷。有極貧士之所不能堪者。悠然自得。無一牢騷語。與鄂爾泰交好。時有酬唱。鄂方秉政煊赫。材任之貧自若。其介可知。初與陳大章詩合。刻爲黃岡二家詩鈔。後大章之子改刻其父詩。二家詩廢。此集行世遂稀。

癸丑生日

紅稠屋角海榴新。點綴貧家似不貧。爛學三千餘歲古。幸爲八十一人年。壽過絳老頻添歲。生後田文僅
泱旬。師友凋零身白首。皇天容作太平民。尊道堂詩鈔五

熊賜履經義齋集十六卷

熊賜履。字素九。一字敬存。號育岳。孝感人。順治十五年進士。由庶吉士授檢討。康熙初以屢疏忤輔臣鼐拜。親政後。得驟擢。十四年遂授武英殿大學士。復爲索額圖所惡。借票擬草簽事罷之。二十七年。起禮部尙書。調吏部。三十八年。授東閣大學士。閱四年。以年老乞休。卒于四十八年。年七十五。事具清史列傳大臣傳。撰經義齋集。爲文十二卷。詩四卷。刻于庚午。康熙二十九年賜履理學自負。詩文非其所長。然欲聘顧炎武與同修史。非不知黑白者。罷官居江寧。與杜濬最厚。簡札往還。幾無虛日。亦非尋常達宦所能。以忤權臣深結主知。身後猶卹其家官其子。世以爲眷念道學。殆不然矣。

于皇遭跌慰問

大火逐雲流。長空鋪日月。達人持靜幾。欲枕安樸拙。傷哉和氏兒。銜身嬰一刖。亦有樂正子。下堂理陳說。舉足皆危坳。鑿柄常格格。行矣慎登臨。寸陰齊浩劫。經義齋集十六

車萬育懷園集杜詩八卷

車萬育。字與山。號雲崖。又號鶴田。邵陽人。康熙三年進士。選庶吉士。散館改戶科給事中。轉兵科掌印。罷官後。僑居金陵。卜築懷園。頗有林亭之勝。是時舊京風流。未盡衰歇。山水清嘉。朋從可樂。所與游者。曹禾汪懋麟曹貞吉丁焯。皆名士也。其詩多流連光景。羈旅懷人之作。驅使烟雲。時抒感慨。遣辭造意。如自己出。可謂能事。縣志稱萬育記問。賅博。工書。在戶科上二勞。永佚疏。運道機宜六事。論漕運冗費。論督撫運轉激勸法。論招撫。論關課侵欺缺額。在兵科請冊立中宮。及東宮出閣講書。又有肅朝儀。及撫臣規避。直陳朝政得失三疏。皆人所不敢言。有奏疏十卷。子鼎晉三十五年丁丑入翰林。萬育猶及見之。後數年始卒。次子鼎豐。易名道南。副貢生。道貢諸生。兩人牽連曾靜之獄。論死。

輓汪蛟門

淮海維揚一俊人。清詞麗句必爲鄰。名垂萬古知何用。白水青山空復春。懷園集杜詩八

金德嘉 居業齋詩鈔二十二卷

金德嘉。字會公。廣濟人。康熙二十年會元。官檢討。二十六年典黔試。二十八年被劾革職歸。不再起。德嘉嘗與修明史及一統志。與徐乾學密。有餞東海出都門詩。又有挽東海詩。續京邸集有讀史次夏無易韻一首。深致慨于魏其武安。明明指當時黨局而作。德嘉以耳疾歸。見王九齡嫺雲書屋詩集。實則爲掌院李光地所劾。欲借以傾徐乾學。光地亦奪掌院。或即乾學報復。然未幾。乾學亦放歸。黨爭固烈。而操縱者則人主也。卒于康熙四十六年。前二年有七十六年今瓦全句。卒年當爲七十八矣。清史文苑傳四庫提要皆言其有文集二十卷。別集十卷。而不及其詩。德嘉與顧景星同縣同時齊名。而詩格獨超渾。架度不失。言皆有物。隨事可證。撰居業堂詩鈔二十二卷。分江澚集。石城集。顧廬集。京邸集。黔游集。續京邸集。南征集。續江澚集。涉湘集。江州集。釋甕集。鄂縣集。舳噓集。餐霞集。詠物集。堀堞集。稔裘集。史編雜識集。松窗集。漁唱集。提要譏其文爲張居正楊嗣昌頌冤。不免私其鄉里。不知此正德嘉之特識也。詩中但及熊廷弼耳。

楊令公祠

雁門北口楊無敵。血食祠堂古北城。一子馬頭先效死。百夫戲下總捐生。殘沙潞潞旌旗路。亂草蕭蕭劍槩聲。越戰王仇眞失律。還朝吏議只除名。
業雍熙中副潘美禦契丹將斜軫襄州。有王仇者。越戰敗績。業子廷玉死之。業被擒三日不食死。帳下壯士皆死之。凡百人。事聞。削美三任。除仇名。昭贖業太尉。業

夙號楊無敵。今祠居業齋古北口。或行營也。詩鈔六

岳宅

忠武子鎮黃梅五郡關者。名震。開家雖。歷大河民間。弟寔往從之。禮懣未釋。遂諱岳。從封姓郭。其十一代孫沐陽令全。全五世孫文海。當明萬曆初。始復姓岳。遺主廟祀。寔子三人。念二念五在黃梅。念八孫萬三從廣濟。為岳結族。

焚黃入廟祠忠武。鄂姓猶存岳姓身。長跼中唐何許客。頭顱鐵鑄大書秦。居業齋詩鈔十八

陳大章 玉照亭詩鈔二十卷

陳大章。字仲夔。號雨山。黃岡人。康熙二十六年進士。通籍後。即祈假歸。以教授為生。不再起。雖館選而未散館。竟以吉士終。卒于雍正五年。年六十九。詩奉王士禛之教。體格乃不甚類。亦無俊語。然抒寫性情。音和節緩。故為盛世之音。宜士禛稱許之。集中自述詩。境固非豐。而食貧入口。間課桑麻。堅却江漢書院之聘。蓋緣鴻冥近性。非比矯激立名。頗喜游山。翠微。廬山。金焦。北固。蘇臺。白門。游必有詩。詩必窮勝。可作游記。可補志乘。其他多表章隱逸。崇尚志節之作。于顧景星張仁熙尤志嚮往。知其微尚在此。酬楊長蒼二詩。即著孤兒顧天錄者。知是時楚人皆以嗣昌為冤。實公論也。不得以為鄉里之私。悼洪洪思句云。千金一字淋霖曲。不比尋常菊部頭。意婉而微。其為董鄂而作。又一左證。

東車雙亭余右弓囑訪杜茶村遺集

茶村名漳。黃岡人。寄寓白下四十餘年。往聞之郭弗如。茶村有未刻雜文一帙。詩三千餘篇。授上元張氏。秘不示人。弗如先生門人。其言不

妄。訪之宜可得。將用廣其傳焉。

清詩紀事初編卷八 陳大章

茶村不羈人。遜跡來江外。聲價沸三吳。絕學窺六藝。簡傲或寡諧。經奇亦可貴。身死訖不耀。遺文恐遂墜。世傳變雅堂。十百纔一二。頗聞石室藏。心精未茫昧。文章與世運。實用參否泰。麗正日星芒。耿介河嶽氣。碧海擊鷗鵬。幽潛出光怪。作者豈必同。道在無小大。乾坤萬萬古。此理終不易。兩君篤嗜學。蒐羅包巨細。一字苟見珍。心風甚抓疥。廣川無逆流。靈琥不辭芥。知音世誠稀。賤目昔所戒。誰爲定吾文。應雪桓譚淚。玉照亭詩 鈔十八

張明先洞庭文集二卷

張明先。字雪書。湖廣安鄉人。康熙二十四年進士。由庶吉士授檢討。官至中允。撰洞庭文集二卷。爲康熙二十三年至五十年之詩。大抵皆館課應制應教之作。亦頗工綴。特未足與言詩教。末附三十三年會課。擬皇太子無逸齋銘。乾清宮刻漏銘二首。

熱河行宮告成恭紀

聖代如春日。宸遊當夏時。涼風臨別館。爽氣集靈池。浩蕩三關外。潺湲一水湄。蓬萊形勝近。銀漢影光移。遠勝西湖景。近連北海涯。途從巖磴入。樹向石橋支。參錯亭臺勢。巖嶠館閣規。林花方競秀。魚鳥亦相嬉。庀物羣材集。鳩工萬姓馳。一人勞不憚。百爾瘁何辭。樂共輿情洽。恩從睿慮推。太和在宇宙。敬賦子來詩。洞庭文集下

案此詩作于康熙己丑。

陳鵬年道榮堂詩集十卷文集六卷

陳鵬年。字北溟。號滄洲。湘潭人。康熙三十年進士。由江西西安知縣。官至河道總督。卒于雍正元年。年六十一。謚恪勤。事具李果所撰家傳。宋岸恪勤別傳。及清史列傳大臣傳。撰有滄洲詩集三十九卷。分十集。曰水東。曰武事。曰蒿廬。曰耦耕。曰于山。曰香山。曰浮石。曰淮海。曰胸山。殿以喝月詞。後又續刻道榮堂詩集十卷。文集六卷。鵬年祖怡字子良。避仇依外家從其姓。更名郭金臺。字幼隗。隆武時。以副貢屢薦權江西巡撫。明亡爲僧。父式穀字無忝。兩世皆前朝舊人。且善爲哀怨之吟。鵬年習之。故致力于詩。音聲流露。時有滄桑之感。官蘇州時。總督噶禮撫其虎丘題壁。以爲大逆。幸從寬論。其詩不見集中。代謝已憐金氣盡一語。實難置辯。清未入關時。國號金也。先爲江寧知府。以總督阿山欲加火耗二三分。爲南巡之費。鵬年持之。阿山遂劾鵬年以南市娼樓改建鄉約講堂。列聖諭十六條。中懸天語丁寧扁額。會鵬年以供頓不力。罰修鎮江馬頭。一夕而就。復令督緯夫牽船至山陽。廢太子必欲殺之。賴織造曹寅叩頭流血力救之。猶令督撫會鞠論死。從寬免死。來京修書。所修者月令輯要。物類輯古略也。鵬年幾死者再。實則阿山與張鵬翮積不相能。噶禮復與張伯行互訐。鵬年先後爲鵬翮論薦。故搏撫鵬年以致憾。阿山又黨于廢太子。故廢太子助阿山必欲殺鵬年。其事糾結。以此致帝疑。得不死。太子既廢。阿山即坐

事免官。後嚙禮亦以他罪誅。其母帝乳母也。疑必與廢太子有連。康熙中葉以後黨爭。以廢太子爲主。幾五三十年。牽連者多矣。鵬年事不甚顯。因略釋之。

憂旱

朱夏攝羣動。長養變時曆。驕陽灼頽宇。僂僂畏赤日。庭花爲之萎。慘慘無顏色。昨日東家翁。荷鋤過南陌。含淚向予拭。未語先愴惻。云有前清溪。頻年儲蓄洩。豪右動橫截。下流滅涓滴。山陂無泉源。不保且暮竭。轉挽亦難辭。枯槁無地置。十日更不雨。田疇盡枯涸。哀哀窮簷子。危命在旦夕。側聞邑長吏。新法美疇昔。青苗不滿尺。預糶輸官室。斗米值青錢。凝眸望比櫛。租吏朝出門。米商暮橫宅。搖搖婦與子。生死不可測。昊天不降鑿。何以償膏血。水東集一

京江卽事

京江四月無雨澤。井泉竭盡秧苗枯。小麥待收怕久澇。欲晴欲雨雲踟蹰。長吏常如中風走。朝向金陵暮虎阜。上官箕畢好不同。萬姓雨暘復何有。醜壇擊鼓空紛紛。綠章飛天天不開。晝夜乾風爛地裂。昏霾滄氣成黑雲。刈麥要晴秧要雨。天公憫悵難自主。古時馳道遍天涯。江上行人盡塵土。滄洲近詩三

王 戡 突星閣詩鈔十五卷

王戡。字孟毅。漢陽人。康熙四十七年副貢生。事具清史列傳文苑傳。撰突星閣詩鈔十五卷。起康熙三年

甲辰迄五十五年丙申。先後五十三年。涉歷南北。多見老輩。讀其所作。足爲知人論世之資。馮承父士乾之教。博涉多能。兼工書畫。惜文不傳。王士禛稱其詩過歐陽。固爲虛譽。然少學溫李。老尙氣韻。修潔有與士禛相類者。又楚人不墮楚風。無鍾譚之習。所以極賞之。投贈之作。不免率爾。則鬻手給食之爲累也。嘗入滇賦滇雜詠十三章。可入滇志。清初鄂中風雅甚盛。顧景星胡承諾張仁熙劉醇驥王澤宏金德嘉外。馮與同邑李以篤彭心錦文師鴻江穎齊名。稱漢陽五家。又與湘潭王岱。稱先後二王。

捉船行

時征山賊。在鄖陽界中。

大船戕峩江中央。中船倚柁遙相望。小船泊岸起哭聲。長官馬箠難禁當。扼其吭繫以微纆。躡蘆葦內形倉皇。捉船捧郡符。星夜供軍須。遷延誰職咎。爾船難放手。軍須高壓山。捉船長願餘。戰馬蕩蕩烈無虛。犒賞將卒牛羊豬。君不見。大船小船乘風更何處。何爲有去有不去。突星閣詩鈔一

胡煦葆璞堂詩集四卷

胡煦。字滄曉。號紫弦。光山人。康熙五十一年進士。選庶吉士。授檢討。煦爲彰德府學教授八年。始登第。入詞林。年五十八矣。蓋由講易契合。雍正初。驟歷禮部侍郎。九年褫歸。自以生全爲幸。未知所坐何事也。乾隆元年復官。未幾卒。年八十二。後以其子季堂恩數。贈尙書。追謚文良。一生遭遇頗奇。撰葆璞

堂詩集四卷。擊壤之流。別有文集四卷。未見。

都門行樂詞

嬌紅嫩蕊開春帳。桃花李花豔相向。京都年少恣遊嬉。踏青賽廟紛游漾。百戲攢成錦簇圍。朱輪翠轡生光輝。初見長繩罵高架。騰身欲學烏鵲飛。別有高樓支兩竹。不踐泥塗踐平陸。亭亭孤鶴出雞羣。風迴電掣無停軸。凝眸倏覺塵如霰。云是嬌娃推寶轎。搖鞭橫攬彩雲斜。據鞍迴趨參差燕。六街鼓吹忽然喧。競擁粧臺穀轉旋。攢來百寶渾無價。驚起嫦娥那得眠。結璘宮裏霓裳爛。管向平臺露嬌面。空際飛盤弄小珠。掌中跳躍搖金鈿。三刀陡向青天起。百萬蒼龍齊掉尾。攔空碎遠攪銀河。白猿袖弄雙丸子。又有青獅鬪綵毬。秧歌動地曼聲收。春晝烟景繁華夢。熒電凌霞夾路稠。昇平遊樂情無既。鳳凰城畔人如蝟。歸來襟袖細摩挲。猶帶青郊草花氣。葆璞堂詩集一

抵家後口占

三首錄二

五十登途別舊隣。廣文寒暑涉通津。歸來七十還加七。多見人間五輩人。

向日親知少送迎。不堪回首問平生。兒童老大髭鬚白。強半登堂說小名。葆璞堂詩集四

胡世安秀巖集三十一卷

胡世安。字處靜。號菊潭。井研人。崇禎元年進士。屢官少詹事。入清官至武英殿大學士。順治十八年以

疾致仕。後二年卒。年七十二。事具清史列傳貳臣傳。撰有秀巖集三十一卷。詩曰秀巖存詠。石芝軒集。文曰客竹居偶存。石芝軒續存。以石芝名者。皆入清以後之作。詩文多以奇古自矜。文唯太常卿湯道味先生修新法曆文。及明刑部右侍郎肖彤孟公行狀爲有關係。詩頗詳于順治一朝人文。世安本暱于陳之遴。復與劉正宗倡和甚密。蓋摩稜人也。正宗之敗。遂亦牽連去位。

市炭行

墻戶咸俯陽。蟄根養潛脈。朔吹欺凍爐。村氓輸煖策。入林度炭材。洞地煉薪魄。囊衡五十斤。青蚨須三百。回計七年前。例從公廠索。如望遡陽中。日日餘薰燁。本折各百鈞。寧知籌市易。山居楫柎享。老幼環慰藉。亦省買遷泉。短糲隨所適。哀幹獸鏤形。對之誠脊脊。旅邸禦寒謀。不勝徵貴迫。牙僮笑進言。無以值浮責。濯濯及陵毛。樵蘇窮遠役。乘茲未涌時。程力圖廣積。物理閱羸虧。人情愴今昔。聲接頓心酸。三嘆增瘳瘳。秀巖集十一

九月廿五日朝散同部院諸老登眺新構天安門

象闕冠雲區。歷歷引崇階。旭光浮金碧。佳氣匝城來。帶潢疏太液。塵界辨天街。懸想重輪夕。烟蕪淨九垓。王衡端北位。符正協三台。鳩鵲曾標觀。鳳凰已去臺。曷壯勾陳居。名勝揆驪才。緬茲萃王會。銅龍管陽開。工師拜手語。柏梁匪所儕。經營成不日。無假梯航材。攀躋同昔侶。指顧起今猜。耿耿百年心。老眼重徘徊。秀巖集十一

聽李又日道人彈如意琴

有序 琴制小類瑟。惟首不磨。絃二十有四。長五尺有二寸。首郭微圓闊尺有二寸。頸九寸。環首二十四柱入腹。惟釘首浮面。腹柱即約絃者。蓋取象歲氣云。首底左右有兩孔。

象新月。末方闊尺有六寸。頸尺有二寸。末底二孔如日。首末頸際瓦山岳。每絃有承屬次第。自末布首。大約每八絃相次為度。四隅有足。其彈法左手指輕按絃。有內外無上下。右手執篋如意擊絃取聲而已。如意之制用薄篋寬一分強。長尺有

二寸。揉曲成之。琴實亦用佳桐。此道人所創。前此未見。道人原武弁。指妻子而修買太行有得者。名長新。

鏗謹聲久隔高聰。秣給名流謝弋鴻。杖履太行留得住。風朝月夕倚孤桐。孫枝苞蘊元和骨。坐對彌年諦清越。新成一段陰陽窟。折竹引之聲以發。箏瑟阮筑耳滿堂。隨所各得叶宮商。天然不受猿鶴媚。悠遠獨存山水意。驅除桓桓對壘豪。光風遞處振雲璈。廣陵散已委蓬蒿。且從羽士叩幽騷。秀巖集 十二

題岳朋海所藏武穆隸像卷

有序 余昔得觀武穆所頤曾南豐家譜。並滿江紅手蹟。蓋行草也。今復展此隸書。至德顯忠。細先啓後凡八字。差小於蠆見。乃題許虎侯卷者。懷懷如見其擲管時。公深

左氏春秋。孫吳兵法。於茲具見一斑矣。昔在武林拜遺廟。嘗謁祠宇。曾展其裔所藏像。較此小異。史稱常人處人成繪像。尸祝焉。知傳寫不互有異同。千秋下聞其風者。莫不起敬愛。又烏在區區翰墨形色間乎。爰賦七言近體。跋之以志憑弔。

建炎天不祚中興。五國游魂恨故陵。對馬願違驃騎略。誓江志切豫州能。功高擲舉供沙射。計峻巢傾爽屋徵。四字生銘三字死。昭回遺蹟起欽承。秀巖集 十六

市古嘆十首

四錄

善本標緇帙。肩任僅百文。寧知來鄴架。鑿鑿幾殷勤。古書
先哲輕黃金。死生茲墨寶。一朝委祖備。祇博粗酣飽。古手蹟
摹搨經睿謨。賜頌何鄭重。不邀賞鑿緣。故紙仍洵用。古法帖

賈琛叨什襲。俗案供盤餐。貴賤何常品。宜通域外觀。古 秀巖集 二十

李 蕃 雪鴻堂集十八卷

李蕃。字錫徵。號懶菴。通江人。順治十四年舉人。康熙九年選黃縣知縣。居官九載。有惠政。獨不取火耗。黃縣苦丁徭爲累。有以一二畝而納丁者。有以一二分而納丁者。有無地而上丁者。優免法濫。而一丁作五畝地入派下中之丁。一丁納銀五錢。又加十畝雜一丁而三兩不止。蕃悉釐革。人尤德之。十八年。上官中以失入論死下獄。黃之民走千里送之。得減流戍山海關。釋歸。卒于三十三年。年七十三。事具查雲標通江李錫徵先生傳。撰雪鴻堂集十八卷。詩文外附以入集者。有讀杜。周禮通義。問梅。紀略。隨說。鄉語。七種。皆可以叢說單行。其文亦頗讀書。不徒逞議論。詩則氣充辭沛。而皆不依準繩。蓋吏事精能。不暇究心于修辭者。

勘澇災宿艾山湯和碣上韻

秋淋空澗日。洪潦浸四野。淮河鬪味河。不辨牛與馬。依稀似堯年。都屋難吹雅。室廬逐逝波。哀哉此矜寡。誰繕流民圖。痛楚不勝寫。鄭重求民瘼。攬牘疑或假。咨我行按閱。來宿艾山下。匪爲滌塵垢。息肩道左廈。無以謝父老。食粟愧陶冶。吏胥叩覆辭。榻管惟顏緒。石火炎清泉。蒸鬱浮鷺瓦。聞說水功德。坐令瘡痕灑。尤裨戰塚人。三冬如長夏。我觀造化心。羞酌案上舉。多少貧病兒。念之淚盈把。安得挑藥金。忍

見相傳恚。願將此泉水。徧浴同患者。災害不復生。共躋清涼也。雲鴻堂集十七

農忙弛徵

催糧雖上考。力穡亦王成。且罷追呼吏。休令餉餽驚。耘耕畢爾力。收穫慰予情。我亦有餘適。閑來隴上行。雲鴻堂集十七

行雲鴻堂集十七

次黃山詔父老

福報當如許。偏逢大旱年。多因我薄命。致令汝憂天。一望惟青樹。幾家有厝煙。明知人去盡。猶自索租

錢。雲鴻堂集十七

捧檄徵間架約張龍弼同往張以疾辭和來韻

破屋窮邨不忍看。邀君同去實無端。高齋把筆題詩易。野店征租作計難。況是經年人旱暵。更加秋雨水

灑漫。籌量正拙佳篇到。却羨詢人心自寬。雲鴻堂集十七

己未冬月被逮黃民闔境皆約十四日相送郡守惡之先一日促余行日已暮矣送者猶

萬餘人口占以謝之

蓬萊涿水未荒涼。冷日悲風只自傷。只爲有心維國法。敢云無罪犯王章。此身甘供塞烟老。今日猶慚月

桂香。多謝殷勤賢父老。忍將涕淚送銀鎗。雲鴻堂集十七

李鍾璧燕喜堂詩文集四卷

李鍾璧。字鹿嵐。善子。康熙三十五年舉人。四十四年。官平南知縣。五十一年移疾歸。撰有燕喜堂詩文集四卷。重修土主李公祠序。謂通江祀前代官于此土。有功德者。謂之土主。是與雲南之土主又異。上劉棠溪給事書。述其父黃縣殺人案。縣報姦殺有據。糧無據。而改報盜殺。上官據之索賄不得。則坐縣官殺人之罪。而置殺人者不問。以此知其時吏治蓋不可究詰矣。詩自謂學蘇。與其文俱有才氣。而有時失之槎枒。

白雨

鄉人呼暴
雨爲白雨

夏日山居多奇創。白雨乘風魄力壯。虎嘯猿啼與俱之。草木拜起如臚唱。雷電頻交疑崩裂。坐視平囂與波浪。我着憤鼻向田中。聊與山農相揖讓。嘗笑山農徒口腹。原來遠謀虧卿相。燕喜堂詩
文集三

破被

漫道晨霜夜雪時。自沾秋夢已淒其。翻身謾護涼廳入。蒙首徐徐冷氣吹。蟻虱間從絮面得。紉縫難向輻邊施。將余高臥擬袁子。伸縮頻仍總未宜。燕喜堂詩
文集三

李鍾峨 垂雲亭詩文集二卷

李鍾峨。字西源。號芝麓。蕃子。康熙四十五年進士。散館授檢討。官至太常寺卿。五十八年。督學福建。刻其父雪鴻堂集。因以所撰垂雲亭詩文二卷附焉。文爲律賦。至盈一卷。乾隆以後。館閣最重此體。道光時與試帖詩同爲進退人才之具。而不知康熙中葉已開其端矣。詩多頌聖應制之作。然阻雨云。幽居近只在林間。人阻河干夢屢還。風雨悽然烟霧滿。從今最厭米家山。亦小有致。而不肯多作者。以其無關於仕宦也。

吳伯宗詩

伯宗。山西絳州稷山縣民。初伯宗兩弟俱幼。被略賣。莫知所往。伯宗歷年月關。問關踪跡數萬里。卒還兩弟。今相國澤州陳公安溪李公覽聞學宜興潘公皆著詩文傳其事。鍾峨展讀之餘。輒復有感。用成偈句。

中陵常棣華。韞韞覆其根。允矣庭幃內。所重在弟昆。既俱儻蓬豆。餘樂匪思存。嗟惟我同氣。緩急共朝昏。闕牆猶禦侮。良朋難俱論。稷山吳伯宗。早歲背椿萱。兩弟頗冲稚。友于性素敦。被星耕綠野。荷月出柴門。供他梨與栗。吹此篋與墳。何知人無良。略季潛飛奔。歸來摧五內。嗟咽幾傷魂。販負倘可爲。徒業辭家園。祇驚節序改。徒見日車翻。天空海復闊。惆悵難攀援。季去仲旋失。輾轉氣煩冤。生離在骨肉。此恨塞乾坤。揮手別妻孥。逝若鳥孤鶩。去去越都邑。緜緜歷寒暄。便須窮地角。何論探河源。皇皇京邑中。貴族多華軒。季也隸爲奴。爲言受主恩。厚恩良不薄。高義人咸尊。期爾仲氏來。借季返南轅。仲氏在何許。迤北薄崑崙。遙遙寧古塔。重裘尙匪溫。冰天雲色慘。雪窖路無痕。邊關嚴出入。匝地有艱屯。卓哉此

義士。制行實瑛璫。隻身度沙漠。易若踰籬樊。冒死白將軍。立談昭覆盆。栗烈無戰慄。羶酪飽風飡。還聚蓬華下。灑淚各潺湲。別來艱萬狀。會晤竟何言。天性豈云薄。苦節實難捫。垂雲亭集二

案清初逃人之律最嚴。皆入旗奴。有俘虜爲奴。有買賣爲奴。據此所詠。又有拐賣爲奴者矣。

釋讀徹 南來堂詩集四卷補編四卷附錄四卷

釋讀徹。字見曉。又字蒼雪。號南來。雲南呈貢趙氏子。幼落髮于妙湛寺。年十九。入吳受法諸高僧。奉通潤爲師。繼主中峯。善講華嚴。尤工詩。卒于順治十三年。年六十九。事具錢謙益撰蒼雪大師塔銘。著南來堂集。有雲南刻本四卷。近王培荀以康熙十七年陸汾所輯。及顧茂倫選刻殘本。校其異同。爲補編四卷。附錄四卷。而後乙酉弘光元年以後之詩始備。猶惜未得其書啓序跋。培荀復爲之注。采摭甚勤。微嫌辭費。通潤好學能詩。故讀徹詩學益進。吳偉業稱爲蒼深清老。沈著痛快。當爲詩中第一。不徒僧中第一。蓋賞其無浮辭。亦不作禪語也。有句云。誰能甘餓死。自喜比夷齊。故謙益謂師雖方外。于興亡之際。感慨泣下。每見之詩。全祖望直目爲僧中遺老。是時玉琳道忞被特徵爲王者師。禮部行文取天下高僧二十餘人入直萬善殿。讀徹獨不與。可謂遠于勢利者也。

金陵懷古

石頭城下水淙淙。水繞江關合抱龍。六代蕭條黃葉寺。五更風雨白門鐘。鳳凰已去臺邊樹。燕子仍飛磯

上峯。抔土當年誰敢盜。一朝伐盡孝陵松。南來堂詩集三下

胡清壑七十年逢鼎革

救世非無術。憂時莫問貧。畫圖聊引仗。詩板代炊薪。白雪驚人句。青山不老身。何當七十叟。又作亂離

民。南來堂詩集補編二

乙酉之變避跡喝獅窩臨年仍歸一把茅度歲

老我生逢乖命年。驚魂未定是何天。兵戈無地堪逃避。上下移居當播遷。竹榻不妨虛自設。茅庵有主便

依然。會心只合開窗面。好景都收在眼前。南來堂詩集補編三上

次答吳太史駿公

高閣清華憶木天。南山久不到西田。秋光惜別分三徑。月色思看坐一船。舉世不堪皆盡醉。獨醒誰更復

相憐。春秋著罷須藏稿。甲子書來又六年。南來堂詩集補編三下

趙士麟讀書堂綵衣全集四十六卷

趙士麟。字玉峯。雲南河陽人。康熙三年進士。由平遠推官。改容城知縣。行取吏部文選司主事。歷官撫浙吳。內擢兵部督捕右侍郎。轉吏部左侍郎。卒年未詳。撰讀書堂綵衣全集四十六卷。刻于康熙三十六年。時年六十六。母年九十四在堂。故以綵衣名集。凡文二十一卷。詩二十一卷。而以撫浙撫吳條約各二

卷殿焉。士麟特好名。是集序文題辭盈一卷。爲四庫提要所譏。又附于講學。文集之首。冠以會語四卷。詩文下筆不休。傷于率易。然頗愛士。士多歸之。嘗刻孫枝蔚詩澆堂集。爲人所稱。觀其奏疏條約。頗能盡心民事。是亦足貴矣。

和大司馬杜肇餘先生慈仁行

即報國寺

皇都壯麗居北極。聲明文物萬方集。古刹精藍繡陌多。屈指慈仁稱第一。慈仁敕賜乾統年。金殿嵯峨寶閣連。周圍長垣十餘里。畫棟朱甍碧砌妍。盤松勁柏濤聲壯。傳自齊梁尙無恙。龍鱗溜雨大十圍。黛色參天高百丈。每逢朔望二十五。百貨雜陳輝兩廡。曉來道上聲喧囂。肩摩穀擊人如堵。入門但聞花氣香。白紅紅雲錦張。纔交二月中和節。桃李芬菲蘭蕙芳。夏秋之際亦猶此。赤榴黃菊列如綺。一枝梅萼酬一金。不煩折寄隴頭使。左右羅紈儼成行。吳綾蜀錦來四方。人情好異兼尙古。尋常器物置路傍。歷級全升兜率宮。玉牀象几橫簾櫳。榴柎作枕懸苜蓿。屏風斜隔青芙蓉。芙蓉石畔異光騰。荆玉隋珠希世珍。清輝足奪三千客。聲價還高十五城。徧步迴廊驚未覩。估客誇豪波斯舞。盤中文犀名駭雞。木難火齊出秘府。石尉珊瑚未足奇。漢臯雜珮寧堪數。我聞華陽產金銀。良工採取制作新。蟠龍刻鳳爲釵鈿。尊壘倣古各絕倫。商周法物稱彝鼎。千年血繡胭脂冷。一朝出土色斑爛。秦漢銅玉皆下品。五季以來貴陶器。篤嗜莫與柴周比。殷紅瑩玉豆色鮮。官哥柴定備擬議。傍列菱花似水澄。襟帶懸之百魅驚。龜紐螭環大小印。刀法直逼周與秦。圖書充棟兼汗牛。標題一整且周。玉簡靈威授。瑤函蒼水投。崇文殿裏間零落。嘉則籛

前遜較讎。王充借閱苦未徧。安世亡書不外求。定武蘭亭不再見。嘉陵粉本應能辨。近代師法數大家。往往臨摹亂真贗。畫家獨取工遠勢。潑墨迅掃亦足異。古來真迹今罕存。此間購求非難事。文房翰墨靡不備。兌弓和矢良且銳。寶刀三尺舊龍泉。夜夜光鋌燭天地。靈壁石。端溪硯。斷紋琴。七輪扇。瑤笙象管懸四角。琵琶撥桿碾紫玉。成窰宣漆近亦希。鳳毛雀尾縈心目。忽聞香氣逗欄干。總非雞舌與龍涎。丁緩博爐微馥馥。疑是靈芸石葉燃。餞金佛藏來烏斯。袒肩露頂形容奇。吉光之裘火浣布。于闐玉子琢成棋。遐方珍物異常玩。投壺蹋鞠古來擅。博塞盤旋呼雉盧。英雄一擲輕百萬。其餘瑣細亦可喜。竹冠筇杖雜瑤珉。華鐘不擊時自鳴。玻璃小鏡薄如紙。徘徊把玩絢欲迷。仰觀法界結構齊。幢幡交綴祥烟繞。璘玢玳玉銀榜題。旂檀樓殿四天開。諸天散花雨花臺。蒲團趺坐真如鏡。入定高僧寂冷灰。再過方丈威儀肅。几案幽閒避塵俗。一片禪心江上峯。紫芝紅藥供清曠。傲居時集觀國寶。雄文絕技每超羣。酒闌月上鄉思切。銀箏寶瑟歌聲頻。有時僧客同歡悅。談詩說偈真奇絕。僧著袈裟誦法華。客臥蒼苔玩明月。游人雜遝去復還。鹿苑無如此地寬。王孫笑挾金丸彈。公子閒揮白玉鞭。公子王孫興盤礴。攝衣齊上毘盧閣。參差宮闕五雲平。西山東海隱叢薄。俯檻遙望桑乾河。驢驟歷歷穿城郭。中有大士像端嚴。手捧梵輪垂瓔珞。傳聞竊變或非訛。香花供養肩魚鑰。人謂慈仁譁。我謂慈仁寂。實相懸解盡已空。石上松間清露滴。人謂慈仁麗。我謂慈仁雅。騷人詞客多名流。每於勝地得瀟灑。人爲慈仁矜烜爛。我爲皇家慶清晏。億萬斯年常如此。梯航繪作畫圖獻。偶逢休澣命駕游。觸目琳瑯光氣浮。始信山川不愛寶。盡歸闐闐壯神州。自昔京

華物力饒。梵宇仙觀凌清霄。沉遇泰階調玉燭。□□□□□□□□。司馬新詩推獨步。離奇光怪耀細素。長安作者有如林。此事終輸杜武庫。讀書堂綠衣全集三十六

許賀來 賜硯堂詩集十卷

許賀來。字燕公。號秀山。石屏人。康熙二十四年進士。由庶吉士授編修。入值南書房。歷侍讀。四十四年告終養歸。卒于雍正二年。年六十三。撰賜硯堂詩集十卷。其詩不標家數。不趨時習。自抒胸臆。樸拙可喜。

鐵索橋

盤江之流合滇黔。匯歸南海下粵川。穿崖激石幾千疊。驚濤颺浪欲浮天。永寧坡下聳雙壁。鳥飛不過猿絕跡。漆水湯湯日夜流。勸公勿渡嗟行役。百尋鐵綆架山隈。水面飛虹實壯哉。白日風雷穿樹過。半空樓閣拂雲來。夾岸松篁森林薄。臨流倚檻塵懷濯。馬蹄人影畫裏行。樹色煙光鏡中落。何來竊據敢不臣。燒殘棧道斷要津。光回日月蠻煙掃。依舊雕欄煥水濱。卽今車馬通南北。貢賚梯輶來邊國。山呈銀甕水金缸。萬年磐石惟在德。賜硯堂詩集四

運米謠

充國屯田法久弊。以民養兵資捍衛。偏裨大帥鎮南荒。百萬軍儲供歲歲。廟堂宵旰軫瘡痍。蠲租詔下鳳

脚馳。歡呼父老焚香拜。得安耕鑿樂雍熙。忽聞府帖昨夜下。報道徵糧驚且訝。如何獨免荷皇仁。言出反遭官長罵。追呼吏橫如虎狼。批頭盡繫入公堂。逞威肆虐恣鞭撻。尅期殘臘上官倉。綺筵夜夜醉歌舞。剝盡脂膏用如土。沈冤囹圄總無聞。肯憐剝肉醫瘡苦。風淒除夜淚沾巾。明朝又是一年春。得緩須臾歸度歲。使君德沛如天仁。新官不來署官樂。祇貪耗羨飽溪壑。蠻煙瘴嶺別一天。排雲何處叫閭閻。賜硯堂詩


五集

五塘溝紀事

硯瓦山高亂雲鎖。一朝烽燧驚聞左。縱橫豕突與鴟張。夜深欲放城頭火。傳來消息祇茫然。倉皇防守笑空拳。天意不教民社殆。漏洩機關在禁煙。小醜貪癡心未已。牛酒招呼重聚蟻。轟雷猛雨倏消魂。烏合紛飛背遁矣。陰岩幽箐樹重重。虎豹窟多麋鹿踪。蔽日煙嵐竹林合。亂山何處走元兇。可憐編貝拖裙子。凌虐甘心因禍始。土兵纔過又官兵。搜盡牛羊到犬豕。低頭忍淚暗自傷。活命全憑君主張。但使田中禾好在。三秋得粟上官倉。我聞斯語深嘆息。誰使滋蔓至此極。書生有憤空激昂。請纓何自綏邊國。五塘溝。五塘溝。溫泉條作禍水流。那知天網終不漏。雲開霧散掃蚩尤。室家婦子歸來好。守爾田廬莫漫愁。耕食鑿飲歌帝力。共享昇平樂萬秋。賜硯堂詩集五

凶年嘆

去年災異起尋甸。尋甸州地震地裂山崩陵谷變。傷殘縱有幾家存。又被饑驅離鄉縣。災荒誰料遍南土。夏苦旱



龍從空下。此身宛似在層霄。倒看星河影動搖。蠻童歌舞鼙鼙鼓。吹蘆跳鬼鬧深宵。此節何曾載月令。豪
會昔日謀吞并。蠻婦幾先識禍興。灰中鐵釧猶堪認。野史流傳是耶非。畢竟此俗寰中稀。彷彿朝天聽玉
漏。明燈炬火爛交輝。老農向余進一斗。今宵火色良非偶。無風無雨倍光明。瑞兆三秋登大有。賜硯堂
詩集八

逃荒行

歲凶父老吞聲哭。粒米如珠面如鵠。六月得雨已後時。百室嗷嗷待秋熟。那知秋熟頓成空。收得稻粱約
幾斛。逋負敢將私償償。盡納官租猶不足。老秧谷暫飽饑腸。自分餓死填溝瀆。思量何地是樂郊。不辭煙
瘴走窮谷。囊空苦乏行李資。賣盡雞豚到耕犢。元江檳榔普洱茶。活計擬將末利逐。未知薄命可偷生。且
免催租吏詬辱。一村十室九遁逃。剩有荒田及破屋。飄搖風雨閉柴扉。煙火蕭條老樹綠。欲繪此圖達九
閩。那得鄭監司民牧。賜硯堂
詩集九

趙河待焚草三卷

趙河。字燕隣。雲南通海人。康熙四十年舉人。官四川蘆山知縣。數月告病歸。其詩澹適。居然王孟。與兄
子城。時相唱和。亦附集中。城字巨輿。少以純孝稱。康熙五十四年進士。入翰林。轉御史。峻擢湖南布政
使。鐫職歸。乾隆初起廣平知府。升山東督糧道。甘肅按察使。河南布政使。十一年內調通政司右通政。
年已六十餘。以重聽致仕。河事具雲南通志文學傳。城在卓行傳。通志稱河著待焚草一卷。有城跋云。季

父純孝。平生口不言阿堵物。唯于書未嘗釋手。過眼成誦。爲文率吐棄一切。抒寫性靈。于詩初愛太白。後乃心慕少陵。宋代推子由聖俞。斷句推臨川。所爲詩文多不存稿。嘗謂古詩十九首。尙不肯以姓名留人間。後因城力請。乃酌定此本。在任未半載。謝病歸。萬卷一瓢。陶然自足云。此本爲乾隆七年所刻。河已前卒。有高玠序而無城跋。詩分三卷。與通志所稱一卷者不合。疑滇繁滇志皆未見此刻本也。河父子罷官歸。賃屋以居。廉吏可風。詩亦可誦。集中闕字尙隱隱可辨。必禁書時凡涉怨望及字面可曲解者。皆亟刪去。雲南去天萬里。而禁忌若此。亦足見是時吹求之嚴矣。

石龍亭

今改石此亭。滇南勝境。土人掘地得石龍。郭撫軍爲亭覆之。徵詩滇人漫興。

何事泥蟠久。天飛未有門。風雷驚夜半。鱗甲動雲根。爲龍宜歸海。行宮且寄村。彩雲南國盛。應認此間屯。待焚草一

周起渭 桐野詩集四卷

周起渭。字漁潢。貴筑人。康熙三十三年進士。由檢討官至詹事府詹事。學詩于王士禛陳廷敬。與顧圖河湯右曾史申義齊名。爲後起之秀。卒于五十二年。年五十。事具清史列傳文苑傳。陳田黔詩略後編小傳。桐野詩集四卷爲丁丑迄甲午之詩。起渭生長邊方。詩頗清穩。故自可貴。查慎行與之酬唱。以其詩格近宋耳。安能狎主齊盟。更妄意分王士禛朱彝尊之席如陳田所稱乎。

以嘉靖醮壇杯二枚贈陂千並繫以詩

明帝齋心禮十洲。一杯深沍絳河流。茂陵不待金丹熟。塵世空隨玉椀留。欲近洪厓徒妄想。相逢白墮最消愁。送君日泛玻璃滑。雙頰長春更不秋。桐野詩集四

齊東婦

齊東婦。擔荷能追健兒走。古昔姬姜今則無。塵埃面目飛蓬首。丈人刈麥身在家。男驅黃犢女溫麻。向晚茅檐一歡笑。濁醪大餅非求賒。雞豚養在西偏屋。賣豚納官租稅足。殺雞祭神神降福。滿願多收麥與粟。渠識黃金是何物。桐野詩集四

黎士弘託素齋詩集四卷文集六卷

黎士弘。字媿曾。長汀人。少從李世熊游。留心禮樂兵刑天官律曆。順治十一年舉人。銓廣信府推官。洊至靈夏道。崎嶇兵間者八年。事平論功。請養歸。家居二十年。卒于康熙三十六年。年八十。事具清史列傳文苑傳。及其子文遠所撰行述。有託素齋詩集四刻。刻爲一卷。文集三刻。刻爲二卷。士弘詩文爲曾異撰徐世溥所賞。目爲異才。潘耒爲之序。謂不事蹈襲而暗與古合。士弘自稱四海初定。士之才者。驅車擁蓋。馳一旅之師而過人國。有司供張。稍不如意。命一卒譴呼。城中十萬戶。皆菜色引領。使一困頓諸生。立于其前。操卷而告之曰。我元白。我李杜。誰復聽之。信詩人之窮矣。故其詩苦語多而歡悰少。生丁喪

亂則然也。

入寧夏以來筆墨都懶就所見聞得截句二十章采風者或有取而覽觀焉丙辰六月之

一日 二十首
錄一

還記街亭舊戰場。古街亭在秦州新軍鎧甲白如霜。河西三軍多以白甲賀勝捷書到處飛塵起。半幅黃封付御塘。自都抵三秦。設御塘計日行六百里。

託素齋詩集三

毛鳴岐菜根堂全集二十八卷

毛鳴岐。字文山。侯官人。順治十一年舉人。康熙七年。選營山知縣。總督蔡毓榮特疏薦才能行取。會蜀亂不果。十八年始崎嶇出蜀。遂游食四方。晚主龍峯書院以終。撰菜根堂全集二十八卷。少以詩鳴。與胡介高兆唱和相得。尤工五言。專意學杜。為周亮工所稱。以為鴻厚渾明。閩中一人而已。文有議論。惜受人迫促。皆率爾酬應之作。不足以發其奇蘊。是則寒士之苦也。

靜海署中題同年陳湛苑祭蔽水魚文

縣令不可為。瀛海予益傷。斗大累土邑。周圍無完牆。驅馬入城中。觸目盡荒涼。百姓存數家。烟火半茅房。官舍古寺同。老樹啼鴉忙。庭前雀可羅。泱甸坐一堂。所苦供應繁。健卒不停裝。手無買米錢。剝肉與醫瘡。更值河水漲。遍地成汪洋。堤口決又決。縛草塞其傍。司空檄不寬。晝夜苦徬徨。三月春鰓間。委身

污泥場。聞有蔽水魚。獨爲此地殃。一簣功難成。聚族填水鄉。陳子拔劍起。爲予令一方。昌黎昔泣潮。曾有鱷魚章。古今人不同。予名附末光。臨河餞以詞。若屬盡遠藏。廉吏能格天。災殄亦致祥。榆次有鳳集。茂陵無飛蝗。渡虎與馴雉。漢代稱循良。卓哉瀛海令。懋蹟堪頡頏。菜根堂全集一

送天中傅箕山明府旋里詩

會城邑有九。玉融踞其上。名臣垂史策。管紳負侷僮。田賦素殷繁。戶口號衍旺。自奉移遷後。大半皆逃迂。轉徙出他鄉。饑殍溝壑葬。邑里三十六。二十八里喪。十已割其七。凋零不堪望。更兼征戰時。徭役倍悽愴。界外民流亡。界內獨轉餉。富者田爲石。貧者差難抗。撫字乏神君。凋殘不可狀。我侯驅車來。觸目如扼吭。天子念孑遺。不忍版圖曠。島嶼波已平。鯨鯢願歸向。展界令初下。官民盡挾纊。牛種勸捐輸。茅屋暫草創。所苦轉徙多。伶仃若盆盎。十家九家貧。苦無兒女償。繫昔膏腴田。盡歸狐兔藏。堙塹海潮噬。歲久付波浪。移住外郡民。不肯回鄉曠。計缺萬餘額。惟正無供帳。我侯感慨之。力爲救時相。急繪流民圖。四詳痛而亮。當事憐公誠。疏請達天仗。垂死得更生。殘黎倚保障。菜根堂全集一

魏憲 枕江堂集

魏憲。字惟度。福清人。諸生。撰枕江堂集詩十卷。文無卷數。憲嘗選詩持凡四集。蓋聲氣之流。卓爾堪遺民詩。曾錄其詩。然此集中稱法若真爲師。是豈隱逸所爲耶。詩文皆未成家。多闕字漫漶。抑後人避忌諱

剗去。杭世駿榕城詩話謂憲著有枕江樓集。訛堂爲樓。似未見此集。四庫提要亦言未見。竟以罕稱珍矣。

哀城東

驅車獨向榕城東。俯仰乾坤百感空。新蒲細柳春風裏。紫燕黃鸝落照中。憶昔城東雄甲第。衣冠文雅皆名裔。詩書屋裏欲充樑。車馬前途何迢遞。鶯花不繡三月天。笙管時紛中秋霽。編戶機絲織杼聲。半入雲中半天際。倏忽滄桑有變更。桓桓糾糾階之厲。壞垣破壁亦無存。萬瓦鱗鱗何須計。百族流離自昔無。男爲奴僕女爲隸。笳聲夜半響烏烏。砧杵秋深聽細細。八閩山水古稱奇。五虎全龍競相制。三山藏現隱列星。旗鼓控江雙奠麗。第一樓前跨馬過。海天如湧金雞閉。而今極目總淒然。感起城東傷全勢。英雄何處不歸來。桑梓功業徒泄泄。魏生落拓事多悲。縱有長裾不肯曳。手披杜甫哀江頭。江水江花昏戍樓。

枕江堂集三

嗟農歎次潘進也觀察韻

峨眉六月山顛雪。銷盡看成萬丈血。天地爲爐火色狂。江河如沸水源竭。田疇四望白草紛。呼畢呼箕天不聞。農家婦子哀聲起。甘霖何處息炎氣。皇華使者更愁絕。軫念民生土膏折。飛輓輸將賴有秋。況復軍興心如結。願天直瀉銀河漉。倒湧漳流往復還。千村萬畝溝澮溢。慰此蒼生俄頃間。枕江堂集三

城中

四野爲兵避。城中亦倍難。有聲喧犬豕。無計穩眠餐。暗息秋田沒。心憐草屋殘。徵輸飛遠檄。不敢問長

安。枕江堂
集五

林雲銘 損齋焚餘八卷吳山數音四卷

林雲銘。字西仲。閩縣人。順治十五年進士。官徽州府推官。康熙六年以裁缺歸。十三年為耿精忠所囚。踰二年得釋。居杭州。以賣文為活。所著有莊子因。古文析義。挹奎樓選稿。未詳沒于何年。其詩文集有損齋焚餘八卷。後增為十卷刻于康熙八年。吳山數音四卷。後增為八卷刻于二十年。雲銘喜言神鬼。以林四娘記知名。他文殊纖仄近鍾譚。差不及毛際可。而與陸次雲相亞。焚餘中徽鹽銷引議。漕船足料議。南米改折議。絲絹改折議。勸當議。追借文錢糧議。皆在官時所作。足知當時地方利病。詩詞不多。鬱勃之情如見。

登陣紀事 己亥七月

萬物當芻狗。海波傳警息。己亥夏六月。蹂躪江南北。官民不知兵。相繼自踢踣。延及宛與池。聞風墮疆域。新安失唇齒。訛言相煽惑。強者思走險。弱者競逃匿。我為新安吏。蒿目徒惻惻。七月方上旬。防兵反侵逼。驍騎薄西城。飛矢流如織。空拳宿城頭。有氣難吞賊。海諜七人來。詭辭誇戰克。廿三抵郡內。狼狽為鬼域。礮之演武場。觀者無人色。相挈避挑釁。半城生荒棘。叛兵拔營行。所至掠新特。更聞祁門令。邑破奔劣崩。萬山盡伏莽。民心多反側。紛紛羽書馳。軍情何其亟。議戰苦無兵。議守憂無食。書生何所能。惟有死報國。損齋焚餘八

白門治獄庚子

大軍致凶年。古人戒武黷。沉重以大獄。民生益其瘼。當被海波揚。郡邑多沉陸。治獄無均勞。哀予獨碌碌。白門路半千。一歲三往復。滯迹城南寺。盈牀盡文牘。晝夜不停披。情辭誠心目。事豈異人任。敢不動推鞠。堦下問何囚。昔曾乘華轂。負恩不死職。秦祖來雌伏。更有反側子。身家陷大戮。纍纍百千命。搶地囊三木。自知罪不容。相將堦下哭。辭窮嗆若哇。泥首願輸服。閣筆為求生。爰書三四讀。法律本如此。湯網何能祝。任勞且任怨。不遑爭禍福。渭水亦商君。言之淚成掬。刑官不可為。無計邀靈霽。良夜起徘徊。焚香拜丈六。損齋焚餘八

憫旱新安山峻田曠。頻年患旱。甲辰歲尤甚。步晴月餘不應。居民皇皇。愈疑靈龜為祟。因作靈龜曲。

靈龜來。三農哀。枯槁輓輓萬山隈。靈龜舞。振四羽。鳩婦同巢蟻穴開。居民十萬啼皆窺。驕陽不化土生煙。苦欲射烏無羿附。柳幘村兒仰首呼。靈宮兢拂迎龍鼓。我為請命屏車騎。朝夕僕行重阡陌。幾度山頭膚寸雲。颺颺又觸飛廉怒。韓公已往訟不與。蜥蜴罌中枯欲脯。聞說神巫雨可致。迎來跳伏高臺寐。詭傳帝子詔香車。三日為期驅旱祟。吏民環畫積薪草。至期不應焚巫禱。巫言禱雨護月同。月飽墓厝終復皓。告吏民。巫何與。我當明刑。或乖仁恕。孝婦誣死。雨師停御。戴令西京事可據。將我上臺受焚去。損齋焚餘八

猛虎詞乙巳感賦

採薪日暮荒逕歸。逕荒野樹攀人衣。駭見前林吼雷虎。躍來張頤展爪生雄威。負薪傍徨四顧。避無所之。

呼虎靈顏聽哀祈。樵夫老病肉無幾。五體不足當君養。虎言爾何誑。人食衆物命。豈論瘦和肥。啗噬如轉環。傳聞他山六駸更猛喜我充伊饑。爾作佞鬼向我勿惻惻。同爾交臂單角惡獸誨我食。損齋焚錄八

陳常夏 江園集十四卷

陳常夏。字長賓。泉州同安人。占籍南靖。順治八年舉人。十八年會元。順治中故事。會元無不入翰林。解元亦每留館。獨常夏殿試三甲。授官米脂知縣。遂不赴。歸隱南澗。築屋鄴山下曰江園。與二子躬耕馬歧山下。雖饑寒不恤也。事具乾隆龍溪縣儒林傳。志稱其爲諸生時。鬱陶蹇悴。恢恢有大志。清師入閩。獻安漳十策。海禁興。民苦追呼。常夏言于有司。行自徵法。請寬屯戶。又致書當事。陳地方利弊。娓娓數千言。蓋自以爲有志濟世。不拘拘于出處者也。撰江園集。詩四卷。文十卷。文奇崛不苟。言地方事。皆在集中。江園居士傳。比于五柳。獨十策不存。詩學黃陳。在其時爲獨具標格。贈林甫公詩。謂與甫公及杜楊二子。早歲定慷慨之交。丁亥順治四年冬楊子罹禍。是常夏當鼎革之際。亦常致力捍衛。及登第。黃景昉贈之詩云。吟咏遠師陶靖節。科名近似許同安。遂不之官。而謂自泰山南下縱觀白門震澤具區諸勝。皇皇求友。所遭皆皮相之士。以髡殘贈所畫歸林圖爲知己。蓋自是而天下已無可爲。廢然歸隱。乃有錯走黃埃累姓名之詠。築亭曰滄桑。詩若舊臘已爲天所逐。若應付鐵函藏以待。悲梗爲何如耶。非仕非隱。而不能不稱其義。是當入獨行。不當入隱逸者也。

觸目書所見

遺黎稿首此窮邊。深夜鞭敲補耗錢。時有委官沿村。比補耗錢糧。數尺烟波會約法。溪船所泊。皆有定處。稍有差池。即以撓牛筐魚

蟹莫生還。禁絕魚鹽之利。有村童捕。取田中細魚。立露杖下。官收丁壯償逃卒。時將遣投誠兵士適山西。逃者甚衆。因取民間壯年者以充其數。賊捉婦裝放短船。強徒自山谷夜行數十里。掩

捉婦人而去。汛兵不及追也。未忍盡投山谷去。墾荒猶待種溪田。江園集二

陳夢雷 松鶴山房詩集九卷文集二十卷

陳夢雷。字則震。號省齋。侯官人。康熙九年進士。選庶吉士。授編修。耿精忠之變。夢雷授偽職。謀與同年生李光地合進蠟丸報虛實。為兩人保身家之計。光地據為己功。事平。光地峻擢學士。而夢雷以從逆論斬。夢雷刻行與李光地絕交書。責其欺君賣友。謹短貪功。徐乾學王揆皆為夢雷不平。乾學密為之開脫。竟得減死流尚陽堡。以二十一年出關。三十七年召還。暫住椒園教書。翌年。命侍誠王讀書。四十年為誠王纂修彙編。集中有進彙編啓云。謹于康熙四十年十月為始。領銀雇人繕寫。蒙我王爺頒發協一堂所藏鴻編。合之雷家經史子集。約至一萬五千餘卷。至此四十五年四月內。書得告成。分為彙編者六。為志三十有二。為部六千有零。凡在六合之內。鉅細必舉。其在十三經二十一史。隻字不遺。其在稗史子集者。十亦只刪一二。以百篇為一卷。可得三千六百餘卷。五載之內。目營手檢。無間晨夕。幸而綱舉目張。差有條理。謹先臚目錄凡例為一冊上呈。夢雷自謂獨力檢點。然今本圖書集成曆象圖說小引。有壬午秋

訪友人于半圃。以律曆象數之類垂委。蓋楊文言所爲。壬午爲康熙四十一年。在開館之前。不能謂爲夢雷一手所成。或文言外遂無助修者耳。其賜名圖書集成。并開館纂修。以夢雷爲總裁。則不知何年。或即在進彙編之後不久也。今本圖書集成凡三十二典。曰乾象。歲功。曆法。庶徵。坤輿。職方。山川。邊裔。皇極。官闈。官常。家範。交誼。氏族。人事。閨媛。藝術。神異。禽蟲。草木。經籍。學行。文學。字學。選舉。銓衡。食貨。禮儀。樂律。戎政。祥刑。考工。每典復分門類。共六千一百九部。總一萬卷。五千冊。五百一十函。目錄二函。計二十冊。體例門目。一仍彙編之舊。唯增卷數三之二。知開館纂修。但欲增加篇幅。張廷玉澄懷園語所謂雍正初重加編校。正其譌訛。補其缺略者。不過徒託空言。實則一仍夢雷之舊。如此鴻編。而成于一人之手。其功自不可沒。蕭爽永憲錄云。雍正元年正月。以陳夢雷係從逆之人。不便留誠親王處。與家口仍遣發黑龍江船廠。詔逮時。狗庇疎縱之刑部尙書陶賴。張廷樞。福建司郎中汪天與。員外郎樊貞。主事金錐保。不收禁之中書舍人林佶。門生舉人金門詔。監生汪漢倬等。降調革杖蔡錮有差。佶侯官人。康熙壬辰^{五十年}進士。門詔漢倬皆入纂修館。當儲位未定。諸人妄臆誠親王依次當立。欲趨其門。故交結夢雷。以至俱敗。夢雷事可以考見者止此。時年已七十三。當即沒于戍所。共纂修者。林汪之外。必尙有人。今不可知矣。夢雷撰松鶴山房詩集九卷。文集二十卷。刻于康熙五十一年。才氣奔放。不可拘以繩墨。條奏奉天事宜。防海事宜。頗中竅要。其人實有才。故能奔走一切。別有文集三卷。與絕交書同。刻于康熙十五年。

半園八玩詩 八首
錄三

襪制傳自古。國朝獨華靡。紫鳳及天吳。膝腓增姿麗。吾襪皆布素。不欲炫奇異。冬月好就爐。日久易垢。趾踵竊覷人。幾如蟹延蹄。暑月納涼宜。御冬爲失理。憶昔在遼左。鰥居少僕婢。天潢延作師。寒暑歷三季。吾友顧虎頭。思予必違騎。一朝賓朋會。冒雪來招致。忍凍馳到門。虎頭驚且喜。急呼來就火。脫靴暖足易。予意尙逡巡。欲脫復徙倚。虎頭仰天笑。子足必垢膩。予答足否否。襪驚衆目視。虎頭促命僕。亟持新襪至。予謂新毋庸。但求襪有底。大衆爲閔堂。笑聲猶在耳。今則沐皇恩。出入侍朱邸。入侍有賜衣。退食何必爾。偶然失縫紉。已非昔日比。試較卜子衣。上配東郭履。要自有等差。請君爲次第。蟹目襪

昔人稱內助。余意頗不然。吾輩天地間。安資彼婦賢。計自失偶來。事事費周旋。或謂婦職曠。猶意此言偏。假令無米炊。難責巧婦燃。余性怯冬寒。兩被必相連。自冬歷春仲。垢膩頗不鮮。既無他被易。浣濯亦無緣。余昔嘗入侍。王出詣東偏。道遇皇七子。同步余榻前。展帳撫牀褥。覆被有敗氈。王笑令揭視。泥黑欲侵綿。相對一撫掌。此事殊堪傳。余聞亦小覩。易被今多年。舊單不復改。歲月仍屢遷。每臥必踟躕。失足恐爲穿。世風久則薄。吾被豈能堅。初疑猿挂樹。忽聽鳥驚弦。松蘿疑蝶夢。罾網類魚潛。九設名何取。思紹衮繡賢。牛衣卿相貴。長枕弟兄眠。易世皆佳話。何須戚戚焉。放言非玩世。聊掩細君愆。九設被

遼左承恩遇。寵渥異尋常。儉人生猜忌。機筭早施張。豫囑諸中涓。初至慎爲防。比予親詣闕。詔問居何方。時適御晚膳。受囑者在傍。跪言奴輩宅。實在苑東牆。比隨使使回。置屋買田莊。賜宅皆可給。彙能備

糗糧。天顏爲之喜。且勅善護將。且晚行宣召。服飾令輝煌。承詔駕四車。爲余運資裝。既至與一室。僅容一匡牀。指言此牆外。有宅君相當。歲暮難遷徙。來春定可望。一切君服用。吾家皆可商。僕馬與芻豆。吾皆爲紀綱。聞此喜過望。涕泗復徬徨。君恩何以報。入謝淚汪洋。叩首闕門外。未得覲天闕。歸來頗自疑。閉戶暫徜徉。是時有識者。聞此爲倉皇。寄言此虎口。君慮宜周詳。余答謂有天。奈何彼臧倉。自此所供億。大抵多荒唐。豈意時未久。其家自罹殃。妻非莫可問。余已侍天潢。此益彼所贈。折足固無傷。贈亦由君賜。敢不慎收藏。八磚文以二。鳧脛可令長。但期無覆餗。何必計低昂。物倘以人重。他年亦有光。安知百世後。不列鼎彝傍。支足 松鶴山人 益 詩集一

丁 煒 問山詩集十卷文集八卷

丁煒。字澹汝。號雁水。晉江人。以諸生從軍得官。由兵部職方司郎中。出爲贛南道。遷湖廣按察使。康熙二十八年。以目疾歸。後數年卒。事具清史列傳文苑傳。撰問山詩集十卷。編迄于己巳。康熙二十八年文集八卷。缺葉映榴傳。與目不符。詩摹唐賢。音調諧和。文亦修潔。王士禛論詩以煒與金臺十子之列。丙辰。康熙十五年所刻問山詩集二卷。附有問山詩餘。

長安雜興

戎馬經過半草萊。東南民力總堪哀。四知獨憶楊公操。三異誰徵魯令才。每歎荆山潛玉掩。那看合浦夜

珠迴。睽懷何日瘡痕起。擊壤謳歌遍九垓。

閩海揚波幾十秋。滄桑誰復柱中流。荒村夜雨青燐泣。故壘西風白骨愁。諸將有書徒馬服。生涯無地問菟裘。王師昨報重圍解。可泛戈船下鷺洲。問山詩集五

謝亦驥 浩園詩草五卷

謝亦驥。字玉路。龍溪人。康熙十四年舉人。撰浩園詩草五卷曰蒼園集。庚子順治十年至壬子康熙十一年之詩。

曰三山途謠。癸丑康熙十二年歲薦行役之詩。曰前集皆樂府也。曰河上謠。壬戌癸亥康熙二十二年會闈下第經過上

河下河之詩。曰出門吟。則甲寅康熙三年至戊午康熙七年之詩。

謁思陵

一堆黃土短牆紅。不似山陵雉堞中。有字豐碑啼夜鬼。自仁宗以下皆無字碑。惟成祖與懷宗有文。無蹊曠野泣秋蟲。明君自少知

人鑑。破國何須嬖女戎。殉難當時誰作伴。登天小豎笑英雄。王太監承恩陪葬陵側 浩園詩草二

張遠 無悶堂集文七卷詩十一卷

張遠。字超然。侯官人。康熙三十八年鄉舉第一。五十五年選官雲南祿豐知縣。卒于官。年七十。清史列傳文苑有傳。撰無悶堂集文七卷。詩十一卷。有醇賢題語。謂得之舊書襯紙。裝治成冊。知其時亦頗貴。

此。雖缺頁甚多。幾不銜接。然卷數可尋。詩自五言至七絕皆全。別附一目。詩凡二十三卷。四庫存目超然詩集八卷。傳云詩集四十卷。文一卷。傳蓋本于陳壽祺。似未足據。其文不止一卷。卽此冊可以知之。遠自謂文辭達而已。不知有左國兩漢八家。爲詩言志而已。不知有六朝三唐兩宋。故其天才騰蹕。不受羈勒。文筆天矯。詩則格老意新。出之少年。驚其長老。余思遠余恡皆折輩行與交。曹溶許其能繼大家。周貧欲得其序以傳。才名之盛。一時罕匹。今卽其詩文以考行事。大約生于順治五年戊子。至己卯鄉舉。年五十二。海虞詩苑謂年已七十者誤也。一生踪迹。多在客中。年二十餘苦于苛斂。自閩入吳。當在康熙六七年。詩中謂庚戌康熙九年滯永州是也。客游七年始歸。母已逝矣。適曹溶隨征至閩。與之酬唱。旋復入吳。乙卯康熙十年。贅于常熟何氏。遂家焉。自後丁巳康熙十六年。有登延平百角樓詩。辛酉康熙二十二年。有還閩詩。庚辰康熙十九年。有至後還閩詩。甲子康熙二十三年。丁卯康熙二十六年。甲戌康熙三十三年。庚辰康熙三十九年。丙戌康熙四十五年。皆在京師。凡兩入粵。甲子自京師赴粵西。除夕守歲羊城。乙丑康熙三十四年。夏度五嶺賦羊城。除夕再寓羊城。丙寅康熙三十五年。偕何不偕過白鶴嶺。遂由此以往潮州。觀其自稱志不在科名。送查德尹闕詩云。但堅巢許操。庶得重遨遊。集中詩有高廷評將之日本。寄謝君客日本。送沙子雨之日本。送友之日本諸什。又有歐羅巴穆老屬海客索詩。及送陳十兄之西洋詩。穆老或卽穆經遠也。葉燮有送張超然出洋詩。是固足證其時海通之盛。而遠之出游。豈必盡在謀食耶。破山集序云。予行天下。訪異人。耕雲集序云。鐵牛道人。不知之者。以爲何人也。予聞人。知其爲閩人。聰穎爲故大學士路振飛所知。偕之入粵。公卒後。兩粵亦陷。遂爲黃冠。于是序新

安戴生之火攻祕書。序秣陵謝修五之訓練輯要。非好奇也。蓋將有爲。及終無所遇。然後寄託于詩文書畫。于癸鼎。于永樂勅諭。于元明雜劇。甚至博一科守一縣。皆所以揜其迹也。而迹之不可揜。偶一流露者。則趙松雪集跋云。烏乎布衣疎賤之士。生之不辰。尙且遁迹丘園。爲農沒齒。況身爲帝裔。反面事仇。無作容焉。是豈宜令鄭所南見之哉。是蓋臺灣鄭氏既亡之後。死灰無再燃之望。無可如何。乃爲此悲憤之言也。魏禧臨沒。尙有書與遠。其同心可知。世不當徒以文采取禮。卽不當徒以文采取遠。其志節有進乎文采者也。

閩中雜感八首

岩巖城郭來山中。四面周遭一面空。霄漢不離牛女度。閭閻終是霸王風。炎方霜雪寒無力。大海波濤水所東。萬井桑麻連七郡。當年樂事本難窮。

奕葉承恩異姓王。龍輿宮殿擬汾陽。三年鼙鼓驚天地。當日清簫引鳳凰。藍水一丸爭鼠穴。仙霞千騎失羊腸。蓮花峯下荒墳月。慚愧他家白馬郎。

聞道年來宇宙寬。閩南亦復暨降竿。接天霧縠騰新騎。撲地嚴霜冷舊官。樓上東風愁李煜。山中叢桂憶劉安。孤航落日頻回首。西峽江頭思渺漫。

吹角鳴笳細柳營。無煩隻篋已功成。壺漿饘餼迎征旆。闐闐喧騰一寓兵。虎帳紅粧朝把酒。禁城銀燭夜調箏。乘時行樂閩中俗。競渡歡呼象太平。

清源紫帽夾崢嶸。海國金湯第一城。不盡林巒藏狡兔。無邊風雨走長鯨。兩家舊恨心初解。三載雄圖夢乍醒。試上洛陽橋上望。舳艫天遠漫縱橫。

又見漳南一檝平。旌旗搖曳插空城。裙釵魂怯兜鍪影。風雨人驚炸猛聲。大庾嶺頭梅信到。潮陽潭裏鯉魚清。登樓不盡悲秋思。滄海茫茫萬里情。

貔貅千隊透榕城。人物駢闐擬上京。裘馬輕肥飛列校。粟芻輸納走書生。恩波無限功名闊。牧守頻遷去住輕。閒殺深山村落叟。轆轤懸壁坐秋清。

近郊亦復漸桑麻。官糴紛紛價尙賒。已有夏租捐太府。不妨秋稅出田家。荔枝樹下屯征馬。茉莉花前聽暮笳。却喜兒童音語變。南音北曲亂交加。無悶堂集八

案八詩寫盡歌精忠之變。五六兩首言鄭經事。

林 信 樸學齋詩稿十卷文稿一卷

林信。字吉人。號鹿原。侯官人。康熙四十四年。以舉人獻日月合璧五星聯珠賦。及手寫御製詩集。召試入值武英殿。寫御製文集。後修書三館。五十一年特賜進士。補官內閣中書。與修圖書集成。雍正元年。以陳夢雷得罪。牽連下獄放歸。撰樸學齋詩稿十卷。文稿一卷。歸田後所刻。時年六十三。未知卒于何年。信嘗從陳廷敬王士禛學詩。從汪琬學古文。詩境不高。酬應之作。多不可存。而才氣汪洋。頗亦可喜。

集中不及圖書集成。蓋諱言之。文頗修潔。凡二十三篇。冠以御覽賦。及獻賦始末。有康熙四十年潘耒序。倍喜藏書。破產以求。閩中謝肇淛徐燉之書。多歸之。又好寫書。午亭文編。精華錄。堯峯文鈔。所以報其師。琬已前卒。尤見風義。然琬猶及見其經始。信所爲宋濂溪續文粹書後。及堯峯文鈔卷後題記。可證也。予所藏王士禛古夫子亭詩。顧嗣立書館閒吟。皆其所書。蓋以鈔書爲字課。妙迹流傳。當有不止于此者。

癸卯罷官出都宿磐石菴

銀鑰纔釋放歸田。願挈雞豚共上天。那意更遭嚴譴逐。頓令盡室播顛連。兒孫分析休官頃。行李倉皇去國先。暫借雲棲留信宿。驚魂尙悸敢安眠。樸學齋詩稿七

李開葉崇雅堂詩鈔十一卷

李開葉。字磁林。福清人。康熙六十年進士。由庶吉士改吏部員外郎。不樂棄去。復從子之官晉冀。刻此集時已七十矣。詩甚清約。間有可誦。頗有其鄉張遠陳一策之風。

鄂王祠

魂銷雪窖地天長。何日祠堂水一方。風雨六陵江上望。南枝不見樹蒼蒼。崇雅堂詩鈔三

林恥齋先生崇祀忠祠

有序 諱空。福清人。令海寧。民德之。創祠以祀。親老辭歸。明亡全節死。雍正三年。崇祀永福縣昭忠祠。

煙霧長隨入海隅。江湖渺渺此身孤。飄搖家室驚風雨。信誓河山指髮膚。往事悲歌存國史。遺編忠孝起

頑夫。衣冠鄉里追三世。祖父與先生同里居哭奠高天一束芻。崇雅堂詩鈔四

蕭正模 後知堂文集四十六卷

蕭正模。字端木。號深谷。將樂人。諸生。屢試不第。康熙五十六年。年將耆矣。乃哀其詩文刻爲後知堂文集四十六卷。馮柱雄稱其詩滔滔自運。未嘗有所摹擬。而奇偉悲壯。文汪洋千頃。而說理敘事。必中于成法。此集史論凡十八卷。王夫之魏禧皆喜作史論。借古以證今。又足爲應舉之資。故正模亦競爲之。詩僅六卷。而詠史復居其二焉。讀東林傳筆記。論當時門戶。尤有深識。所爲誌傳多可備參考。明諸生施公人瑞傳。乙丙世變。益藩來閩號召。四方遣使至人瑞家。人瑞心謂名義雖正。然其人無能爲也。拒不住。益藩怒以人瑞去。其弟田間鬻田產贖之歸。妖僧德容據建寧。人瑞竟爲所殺。益藩及德容事。爲他書所未記。正模與劉坊高兆爲友。尤善同里余思復。末卷附錄載思復贈詩一首。簡札二首。別有戴名世簡札一首。于正模極致推挹。有三公不易之一日。名山不朽之千秋語。輯戴文者似未及此。

苦憶

苦憶中村余處士。風流歇絕廿三年。悠悠慢世誰當屈。碌碌如余荷獨憐。片石銘幽慚後死。佳文垂世忝前編。多居記得公遺語。攀樹臨風一泫然。後知堂文集三十八

讀崇禎辛未後十餘年事

心匪不仁計則窮。滅夫派餉事重重。可憐三百年天下。斷送憂動惕厲中。
周溫煬蔽復楊劉。善者雖存孰與謀。一十七年貧又寡。空勞聖主萬般愁。
餞送登壇禮儘隆。倒戈降賊醜無窮。黃瞿左法諸君子。不在重瞳眷注中。

饑則索飯啼門東。諸公玩敵等兒童。飽颺更復何爲計。楊鶴收功是一熊。
後知堂文集三十八

李光坡臯軒文編十卷

李光坡。字茂夫。號臯軒。安溪人。光地弟。家居不仕。沒于康熙六十一年。撰臯軒文編十卷。詩文皆學昌黎。以拗折爲美。其文代光地撰者。幾十之七八。詩僅一卷。蓋光坡專意撰三禮述注一書。視文尙可載道。詩則餘事。存此二十餘首。示非不能而已。

雨用朱子原韻

大雨應時至。陰旌變晦明。百川和氣集。萬籟景風鳴。喝道憐誰子。甘津澤衆生。寒門來爽塏。天漢見濤傾。嘉願空千帀。煩懷却一清。泰交長伏潤。蕭洒樂遺榮。立造同身被。青雲自手營。蒼顏羞屢輶。歸老舊沮耕。
臯軒文編十

易弘雲華閣詩略六卷坡亭詞鈔一卷

易弘。字渭遠。號坡亭。又號雲華君。新會人。少工詩。爲陳恭尹獎許。以十年王謝半爲僧句。得總督吳興祚激賞。招爲上客。後邀之出塞。遂涉歷西北。以暨江海。五岳登其四。所至與文人學士游。詩益進。無家無子。臥醫慶法輪寺。謝絕人事。以著述自娛。顧所著者。道德經注。金丹會輯。青山外史。及沒。寺僧葬之西郭梅菴。書遂散亡。別傳雲華閣詩略六卷。坡亭詞鈔一卷。多紀游踪。每游必與妓偕。最善趙執信。兩人牢落有同嗜也。其詩實有才語。放言寄柬獨漉二首。勸其及時行樂。毋徒自苦。則憤激之談。

讀史四首

強秦并天下。縱橫世莫當。蠶食東諸侯。六國待來王。豈知國祚移。篡竊出幃房。大盜生柩席。居奇在販商。何必祖龍死。秦緒絕莊襄。

慷慨者孺子。行逢滄海君。英風震天下。博浪擊狂秦。聊借一鎚力。爲報五世恩。豈知帝者師。乃在圯上人。高步赤松去。千秋絕後塵。

秦網雖云密。輒漏吞舟魚。大澤餘長劍。鑄金事總虛。夜半呼孺子。黃石有遺書。大索徒十日。滄海竟遺珠。冤哉所坑人。撫膺一何愚。

寒風生易水。壯士函關遊。震驚者何爲。孺子豈其儔。西入虎狼區。生劫非良謀。曹沫邀桓盟。以爲後世羞。胡乃欺於期。行刺爲報仇。一誤燕丹國。再負將軍頭。雲華閣詩略一

程可則海日堂集七卷

程可則。字周量。南海人。順治九年會試第一。大學士范文程題參首藝紕繆與經旨不符。部議褫革。總裁學士胡統虞成克鞏降級留任。陳元孝謂由文程子落第。而陳名夏與統虞講學不相下。是在順治十四年丁酉科場之獄以前。已有人借科場爲報復者矣。可則後應闈試爲撰文中書。遷戶部主事。擢兵部郎中。出爲桂林府知府。卒于康熙十二年。年五十。其事具清史列傳文苑傳。撰海日堂集若干卷。元孝爲之序。此本詩五卷。文二卷。道光覆刻康熙本。附補遺數首。非其全也。可則廣交游。務聲施。與王士禛交好。負一時盛名。詩有才語。而格律不純。語病頗多。文不脫時藝之習。元孝爲梁藥亭詩序。論粵詩曰。鄭中祕湛若。王明經說作。卓然成家者也。羅司馬季作。薛高士劍公。陳給諫喬生。王中祕東村。程桂州周量。皆有當世名。而先民是程者也。吾與齒雁行者。梁子藥亭。屈子翁山。爲能發據性靈。自開面目。吳子山帶。王子蒲衣。陶子苦子。皆得源而未暢其流。後來之傑也。元孝與可則少同學。序其集不及其詩一字。而此但稱其有名而已。下筆頗有分寸。清初粵詩亦于此有定論矣。

燕京雜興

紺字鬱青蒼。離離天主堂。五雲花作棟。七寶玉爲梁。奇字鳩摩譯。殊香鶴蓋翔。言能辨星緯。測海遠來王。

京國無朝暮。三衢樂事多。綠楊人繫馬。紫陌夜鳴珂。銅盞敲冰賣。銀鐙載酒過。西河好顏色。乘興一聽歌。海日堂集三

蘇楫汝梅岡集四卷

蘇楫汝。榜姓黃。字用濟。新會人。順治十八年進士。選陽夏知縣。告終養歸。居于梅岡。有山水花竹之勝。所著梅岡集四卷。有康熙癸酉三十二年詩。大約即刻于此後一二年內。其詩體格健舉。意致閒適。與高蕩蕩王蒲衣爲友。皆高士也。秋月山房雜詠云。竹徑蕭條過草堂。當門空處補垂楊。經營未了園林趣。亦是閒中一段忙。置之河汾諸老遺詩中。幾不可辨。

林子介夫悞遭聖累兵憲陳公察其無辜命賦籠中孔雀林子援筆立成陳公大加稱賞

一時同人咸屬和其詩

未向雲霄振羽翰。華堂爭得倚欄看。生來五彩何曾損。乍出雕籠影尚寒。

迴翔數澤羨孤鶩。何事低飛入戟門。不學正平賦鸚鵡。銜環終報主人恩。梅岡集四

方殿元 九谷集六卷

方殿元。字蒙章。號九谷。番禺人。康熙三年進士。官郟城江寧知縣。居憂阻兵不得歸。僑居蘇州。家有廣

歌堂以延名士。酬唱極盛。撰九谷集六卷。凡詩四卷。文一卷。環書一卷。其詩純以神行。境界甚高。粵中以殿元及其二子還朝。並程可則陳元孝王邦畿梁佩蘭稱爲嶺南七子。集中舊邊八首。頗練習當代掌故。其他文告。留心民事。能知情僞。乃所著昇平二十書環書。欲以經術緣飾吏治。持論未免過高矣。

過故里

行行過故里。迷煩無所之。高臺盡荆杞。破瓦湮清池。城頭畫角動。秋至色慘悽。哀風吹枯楊。疑聞舊笙篴。白日欲西沈。鬼火燿已微。觸體雜長蒿。魂向誰家歸。狐狸顧我怒。蒼鴟愁我啼。百年就華屋。流竄將何栖。棄置勿復陳。四壁何足私。不見宗周道。長歌悲黍離。

九谷集三

石城門

且出石城門。十馬九健兒。一女在中央。顏色光陸離。勉強薄粧束。面上參差啼。上橋逢老翁。骨枯衣纍纍。急呼壘嬌語。不敢便下騎。老翁捨力奔。攀天號我兒。香魂絕欲墜。白馬亦踟躕。馬上問我母。汝母勿復辭。痛汝及汝弟。抱石沈江涓。老命已無家。乞食千里來。何意得見汝。汝弟今何之。我弟尙未殺。他家爲卒斲。年小怯視馬。一日九筆笞。五日分離去。不復知東西。我爲容貌苦。求死不得施。挾我向北行。無復相見期。我實令母死。父無痛我爲。父子欲相挽。雜遝怒鞭飛。馬嘶忽中斷。去去如雲馳。老翁踏地哭。助者盈路垂。茫茫章貢水。一半淚灘灘。

九谷集四

六歌

井序 西南烽火。幾牛天下。余遭憂去。官欲歸不得。作歌六首。聊以寫愁云爾。

褒斜道。三載烽煙令人老。嵯峨雲棧四百里。其下黑龍江中水。北走三秦南走蜀。長蛇猛虎盤深谷。張良一燒不可測。顧盼從容得秦鹿。諸葛艱難數出師。大星夜落三軍哭。英雄成敗且有數。況乃區區一狐兔。黃塵頽洞入秦川。風雪關山勞遠戍。鐵馬回頭望隴山。斷腸家過秦川路。更有子午與黃金。十里百折傷人心。懸崖削壁日月黑。使爾戰魂招不得。褒斜道

蜀山高。年年草木愁旌旄。西風凜冽心煩勞。絕壁巖巒開劍閣。棧道微茫千里窄。哀猿畫畫向人啼。豺虎嗥號夜相索。恨雨愁風煙燹豪。自古何曾帝王宅。當年昭烈漢王孫。羈旅風雲無所託。先起奸雄不讓人。草廬權定三分策。他如竊據公孫述。只作須臾狐兔窟。英雄步武自堂堂。險阻從來無用物。空使蛇龍作戰場。孤兒弱母家相失。不見君鄉昔日有望帝。化爲杜鵑一何細。日日催歸歸無計。倒啼血淚三春逝。蜀山高

洞庭波。欲淚不得愛如何。岷峨六月下雪水。九江不流平如砥。朝朝日月鏡中開。時時蘭芷香風起。自從氛祲飛鯨鱷。白浪如山斷衡霍。蛟龍一夜失窟宅。晝日冥冥風雨惡。四山陰火燒白骨。歸夢無津湖水闊。夜半寒笳吹一聲。哀猿盡叫丹楓脫。湘靈聽之罷鼓瑟。九疑無路千峯黑。一時彈斷五弦琴。惆悵南風來不得。江南日夜造樓船。澄清望斷在明年。羈客窮途誰不老。何日湖邊看春草。洞庭波

五溪深。魚鼈網盡傷人心。伏波昔下槃瓠國。豐鑠悲歌夜吹笛。十萬征人未盡歸。千年流水聲淒惻。今時

鼠竊是何意。幽谷深山盜名字。東南盜賊應聲氣。將帥旌旄橫滿地。官軍三載住長沙。萬馬齊驅非地利。壁壘堅營休士卒。食盡鋒摧待其斃。巴陵南畔最卑濕。瘴雨嵐風四時急。畫角吹殘刁斗斷。征人相抱旌竿泣。南天殺氣操生死。雁飛未到衡陽止。欲寄音書一問家。家過衡陽幾千里。五深

吳航頭。日夜滔滔使人愁。夫差當日臣於越。七閩一顧雄心發。乘船直盡大海東。回向中原事征伐。黃池會罷國已空。潮去潮來只明月。太伯子孫尙如此。何況鴻毛竊風起。未許苴茅戀不歸。化作戰場幾千里。海上波濤何日止。欲學田橫豈能比。近聞剽掠到循城。科頭跣足擁旌旄。吾家去此四百里。乘流一夜能兼程。有姊孀孤弟妹弱。滿地兵戈何所託。待得安瀾斬鯨鱷。羈旅憂多頭亦白。吳航頭

五羊城。我生之初猶太平。朱樓甲第滿大道。中宵擊鼓還吹笙。南隅地僻昧天意。二王赫怒來專征。城中諸將各留命。百萬蒸黎一日烹。家家宛轉蛾眉女。盡入王宮作歌舞。妙舞嬌歌雜鬼哭。瘡痕尙在重翻覆。亂後遺黎又化離。當日哀聲更竄獨。前秋奉母辭鄉里。弟妹牽衣憐我姊。日日高樓望母歸。誰知魂返烽煙裏。魂返烽煙不可知。靈輻倏忽滯三期。何年得度梅關去。泣血滇江向南注。五羊城

梁佩蘭 六瑩堂前集九卷二集八卷

梁佩蘭。字芝五。號藥亭。南海人。舉順治十四年鄉試第一。屢上春官不第。乃砥礪文學。究心詩事。聲稱藉甚。康熙二十七年。徐乾學主會試。用通榜法。得名士最多。佩蘭與焉。選庶吉士。謁假歸。主持風雅。

聲氣愈廣。四十二年。功令詞臣在籍者。官爲治裝。赴館供職。佩蘭不得已而出。散館以不習清書。革庶吉士。踰年歸。又踰年卒。年七十七。事具清史列傳文苑傳。撰六堂前集九卷。二集八卷。佩蘭才大無垠。早歲之作。尙不脫七子窠臼。及交王士禛朱彝尊。始參以眉山劍南。晚歲猶馳逐風氣。與後進爭名。王隼嘗選佩蘭及屈大均陳恭尹之詩。爲嶺南三大家詩選。隱以抗江左三家。後來洪亮吉遂有句云。尙得古賢雄直氣。嶺南猶似勝江南。大均與東南畸人逸士游。未改故步。佩蘭與中原士大夫游。俊逸勝而雄直減矣。平心論之。終遜屈陳。出處亦不倫。

耕田歌

三月穀雨春鳩呼。地脈井水占有無。此而不耕田胡爲乎。此而不耕田胡爲乎。壺中有酒。盤中有魚。水中
有蒲。此而不耕田胡爲乎。此而不耕田胡爲乎。堯舜大聖在上治天下。容我巢許在下安其愚。此而不耕
田胡爲乎。此而不耕田胡爲乎。后羿彎弓射九日。徒使萬世大笑空爾勞。此而不耕田胡爲乎。此而不耕
田胡爲乎。六堂堂前集三

養馬行

井序 庚寅冬。秋尙雨王入粵。廣州城居民流離竄徙于鄉。城內外三十里所有廬舍墳墓。悉令官軍築廄養馬。梁子見而哀焉。作養馬行。

賢王愛馬如愛人。人與馬並分王仁。王樂養馬忘苦辛。供給王馬王之民。馬日斲水草百斤。大麥小麥十
斗勻。小豆大豆驛遞頻。馬夜斲豆仍數巡。馬肥王喜王不嘔。馬瘠王怒王扑人。東山教場地廣闊。築廄養
馬凡千羣。北城馬廄先鬼墳。馬廄養馬王官軍。城南馬廄近大海。馬愛飲水海水清。西關馬廄在城下。城

下放馬馬散行。城下空地多草生。馬頭食草馬尾橫。王諫養馬要得馬性情。馬來自邊塞。馬不輕人有齒馬服以上刑。白馬王絡以珠勒。黑馬王絡以紫纓。紫駟馬以桃花名。斑馬綴玉纒。紅馬綴金鈴。王日數馬點養馬丁。一馬不見王心不寧。百姓乞爲王馬王不應。六鑿堂前集三

採珠歌

老夫採珠營生產。珠杷在手珠在眼。往時採珠得好珠。大珠小珠無時無。一顆一顆一星宿。龍女以此爲衣服。幾回海水光燭天。龍王驚動不敢眠。珠神放出老夫採。富兒買歸結珠佩。于今採珠空珠池。珠杷落水水瀾瀾。自是神物有呵護。珠神徙珠居別浦。大船採珠多順風。小船採珠風打簾。人各執杷下海底。有珠無珠拌一死。老夫採珠船作家。船頭見珠船尾耙。晚來珠船泊海角。滿船珠肉共珠殼。安得珠出如往時。老夫採取賣富兒。六鑿堂前集三

木瓜上人打鼓歌

上人在虎邱

木瓜上人時帶病。請醫無錢藥不應。僵僕身背癭瘤頸。一到打鼓精神勝。未打鼓前先索酒。酒以酌口鼓拊手。鼓椎維桐實之柳。椎而無繩翼以袖。初打格格角角聲。再打洞洞東東鳴。忽然天破驚雷霆。忽然耳靜吟蟪蛄。初打再打似相似。前打後打互相異。手中搏著小鴻濛。手中放出大聖智。智者打鼓愚者聞。眼前詎鼓何紛紛。共道上人會打鼓。豈知打鼓非上人。我從其旁拱而立。絕無一言讚歎及。但覺心靜口欲默。不知淋漓衣裳濕。是時斜陽落山晚。佛堂上燈擊雲板。童子呪食施香飯。鳥集齋鐘各飛散。上人愈打

不肯休。打得高興手若浮。將鼓移在山上頭。明月落在梅花樓。真孃墓前騰脂草。無端香氣吹入鼓。黃鸝亂啼蝴蝶舞。相忘月夜與日早。閻閻地下亦不寐。放出魚鳧弄金翅。白虎獐獐作生氣。劍池水擊蛟龍起。罡風一陣倏忽來。鬼神拉沓琉璃臺。浮屠金鈴聲聞哀。我時欲聽不敢聽。上人打得心定定。鼓聲邪者鬼有罰。鼓聲正者神亦敬。上人人吾愛爾打鼓通入神。打法可以前無人。禰衡書生大憤懣。宣王獵者傳失真。上人人吾愛爾打鼓異世人。鼓面鼓身從生塵。珊瑚作業牙作虞。世人不過求其新。上人吾安得爾打鼓入樂府。聖人明堂祀宗祖。命爾司鼓退曠瞽。雲門相和八風舞。上人吾欲請爾打鼓向敵場。塞上塞下塵沙揚。一打賊星沒。再打黃雲光。不然將汝打鼓向里社。新日融雲照桑柘。採桑蠶女來東頭。打麥田娘至西舍。不然打法一一按天時。以鼓救月古有之。蟾蜍放恣月失坎。麒麟不關日在離。徒然大處不打小處打。此中誰人知大雅。蕩子只會度歌曲。酒徒不過論杯壘。不如置鼓不打還僧寮。幽冥鐘動清晨朝。碑礮殿前僧禮佛。汝披戒衣與之立。此汝上人職。或乞佛力護病骨。胡爲已打後。猶似未打前。手勢長作隆隆然。豈是打鼓能參禪。從來音樂中。容易集悲喜。汝打我聽俱非已。我今不聽且歸已。上人打鼓請已矣。六盤堂前集三

歲維癸未行

歲維癸未歌太平。四海內外無甲兵。京師年登米價賤。民間飽飯還食麪。忽聞齊魯民水災。六郡州邑田汗萊。木皮草根煮充腹。饑來男女道傍哭。粵閩旱魃同慘悽。地土龜坼難鋤犁。三楚之田亦告水。農夫大

半色憔悴。往年聖慮諭捕蝗。處處大熟多餘糧。夏秋屢賜免租賦。報賽田神列成路。近者海運爲賑民。欲使顛仆沾皇仁。又發金錢自內帑。天地之恩誠浩蕩。堯湯水旱縱有時。氣數診害民受之。洪範八政古有紀。下民豈得同怨咨。腐儒不識暗垂淚。乞天雨金救凶歲。大臣體國多遠謨。草野何用深切膚。嗟嗟京師汝民幸豐足。慎勿養鷹令攫肉。六集堂二集四

緹騎行

長安五月生悲風。滿城刮地吹向東。夜來火光數百道。一一天上搖長虹。金吾緹騎奔絡繹。身衣繡甲金盤龍。居民見者盡舌咋。客舍聞者驚耳聾。相傳朱門列大戟。平時鼎食常歌鐘。黃紙詔下忽收逮。奉命不得久從容。男啼女哭被困苦。銀鑰鐵鎖來相攻。國家舉事慮深遠。草野不解真愚蒙。何況富貴不易保。古來烏盡藏良弓。韓彭祖醢了可見。寶田赫奕誰能終。儒者讀書慕前哲。只合貧賤安耕農。嗚呼只合貧賤安耕農。六集堂二集四

王隼 大樗堂初集十二卷

王隼。字蒲衣。番禺人。遺民邦畿子。少有羸疾。入匡廬學仙。六七年而歸。結淅廬于西山之麓者二十年。爲隱士之冠。寬衣博帶。妻潘字孟齋。通史漢。能作韻語。樂貧偕隱。隼性嗜音聲。每自度新曲。作崑山腔。女瑤湘吹簫以和之。又解彈琵琶。貧窘則彈之。窘愈甚。聲愈急。然得錢則高會。或周困乏。明日琵琶

聲又作矣。嘗取古今人詞曲之佳者。譜入琵琶。著有琵琶楔子。自謂得未曾有。卒于康熙三十九年。年五十七。專具陳恭尹王蒲衣五十序。撰大樽堂初集十二卷。蓋少作也。喜爲奇語。深入渺冥。然無題百首。無乃太多。陳恭尹梁佩蘭均亟稱準。佩蘭爲其詩作序。深以上有憐才之君。下有薦賢之相。惜其不得出。入承明。此言佩蘭自道可。以擬準則不可。準畸人也。未必有承明之想。

小麥童謠

去年小麥肥如珠。今年大麥枯如糞。去年打麥皆丈夫。今年打麥皆婦姑。噫。有麥不打胡爲乎。噫。有麥不打胡爲乎。大樽堂初集三

擬杜少陵七歌

若有人兮山之側。一謫人間二十七。入無父兮出無□。窮鳥賦成傷趙壹。安仁鬢影更添愁。枯株何處回春色。嗚呼一歌兮歌始發。獵獵悲風吹短髮。

黃余十五誦詩書。志回桀紂爲唐虞。吁嗟此志覺誰量。被褐懷寶守蓬廬。嚴霜颯颯委芳草。徒傷帝子瓊瑤裾。嗚呼二歌兮歌聲緩。長夜漫漫何時旦。

我兄昔從幽并兒。遠逐□□□□□。白狼河北無消息。鉞略城邊倒漢旗。□□□□身先死。弊廡空餘戰馬嘶。嗚呼三歌兮歌聲破。燭射雙瞳淚交墮。

我弟昔隱羅浮巔。夜掃梅花花裏眠。燒丹未得不死藥。藥爐寂寞生寒烟。空留王母瑤池牋。至今青鳥悲

黃泉。嗚噓四歌兮歌聲轉。目斷孤鴻雲片片。

思美人兮不能寐。起采芳蘭輯寒袂。盈盈明月入孤懷。靜撫焦桐發遙思。鍾期亡後絕知音。流水徒鳴咽幽意。嗚噓五歌兮歌思亂。哀猿爲我吟清怨。

我生之初亂方始。我生之後亂未已。風捲營門盡射雕。長城徒哭征人鬼。蹈海何曾見仲連。空餘五百田橫士。嗚噓六歌兮歌思竭。龍泉罷舞燈光裂。

策馬崑崙入元圃。河廣無梁森難渡。又無羽翼以高翔。臨風徒倚空延佇。惜瑤草之徒芳兮。白日嗚嗚其將暮。嗚噓七歌兮歌已終。月照青螢弔墓松。大樽堂初集六

杜門

杜門離亂日。麀鹿是吾徒。身賤慙人識。顏衰賴酒扶。寒雲飛眼闊。秋葉落心孤。何處尋知己。狂吟向楚

燕。大樽堂初集八

廖 燕二十七松堂集二十二卷

廖燕。本名燕生。字某。秦諸生後。改字夢醒。後字人也。號柴舟。曲江人。卒于康熙四十四年。年六十二。事具曾環廖燕傳。王源廖處士墓志銘。撰二十七松堂集二十二卷。凡文十八卷。詩四卷。乾隆三年。高綱官韶州府知府。始爲之刊行。綱以刊徧行堂集。獲罪身後。此集幸未波累。嘉慶中。日本人爲選刻其文十

六卷。以擬侯魏。謂爲朱明之殿。而不知甲申崇禎十七年明亡之年。燕始墮地也。清季鄧承脩嘗得日本刻本。所李慈銘爲序。欲重刻之粵中未果。慈銘序亦亡失。燕自負經世之略。善持議論。謂湯武篡弒而後可以順天應人。司馬炎劉裕不得援以自比。明太祖以八股取士。等于秦之焚書。皆有創見。不敢菲薄孔子。于孟子有微辭。程朱更非所喜。最善金堡。與陳元孝論交。附北田諸子之後。因得識魏禮。有同氣相求之雅。禮頗稱其文。實則雅馴尙不及元孝及屈大均。特稍能馳騁。命題用字。有極可笑者。慈銘稱其南陽李公傳。雜采野記而成。非別有見聞也。金聖歎傳。則瓣香所在。而自居何等。亦可知矣。王源稱其議論。間有高明之過。然實可繼魏先生以不朽。詩新警雄逸。亦非今人所能及。今觀其集。山居詩七律三十首。襟懷淡宕。寄託遙深。實足繼屈陳而起。詩之造詣。或在文上。

甲金聖歎先生

詩書塞天地。斯道益蔽虧。孰具點睛手。爲之扶其奇。君懷創古才。奮筆啓羣疑。五經尊尼父。一畫遡庖羲。諸子及百家。矩度患多岐。得君一披導。忽如新相知。面目爲改觀。森然見鬚眉。直追作者魂。紙上聞啼孀。高標七子作。分解三唐詩。其餘經賞鑒。衆妙紛陸離。陳者使之新。險者使之夷。昏憤使之靈。字字有餘思。掀翻鬼神窟。再闢混沌基。遂令千載下。人人得所師。我居嶺海隅。君起吳門湄。讀君所著書。恨不相追隨。才高造物忌。行僻俗人嗤。果以罹奇凶。遙聞涕交頤。今來闔閭城。宿草盈墓碑。斯人不可再。

知音當俟誰。二十七松
堂集十七

哀北徙者

戰馬南來血洗城。曾將人命換簪纓。至今劊手妻孥在。亦作哀鴻向北征。

富貴冰消勢莫支。王孫歸路更淒其。欲將別淚山頭灑。爭奈當年已仆碑。二十七松堂集二十二

梁以壯 蘭扁前集八卷

梁以壯。字又采。番禺人。祖闔門三百口死國難。父入道。以壯絕意仕進。身世頗同劉坊。好游亦同。而文采高尚過之。坊與李世熊萬斯同游。名頗重。粵中如鄭露屈大均陳恭孝皆與中原士大夫通聲氣。獨以壯不交名士。不近衡門。撰蘭扁前集八卷。刻于康熙六十一年。年過六十矣。讀其詩鬱勃深渾。雖離世而不忘世者也。梁佩蘭僅目爲胸襟高曠。發爲黃鐘大呂之音。未能知以壯者。

擊柝

兵馬難防盜。爲民夜夜辛。輪當擊柝子。來喚讀書人。磁枕前年夢。桃花何處春。莫多閒作賦。隨隊五更

頻。蘭扁前集三

鼓角

鼓角防秋入。兼風起暮城。舊時嚴北戍。今日肅南征。近海沈雲黑。通山落月清。故人昨投筆。騎馬出西

營。蘭扁前集五

清詩紀事初編卷八 鄧廷詒

九九四

舟過張家渡有懷文丞相

帆邊渡口照紅霞。丞相荒園在水涯。積血故宮啼杜宇。一聲殘木立烏鴉。歌傳里巷留生氣。恨入山川共日斜。浮海半航沈噩後。不應南國問臣家。關前集六

鄧廷詒 蓼園詩草一卷

鄧廷詒。字蓼伊。東莞人。舉人。官內閣中書。嘗分校會闈。又入直史館。後來遂無此等事矣。康熙五十八年。奉使安南。乃刻其所為蓼園詩草一卷。廷詒從梁佩蘭游。頗知詩法。雍容坐詠。從無感慨奮發之作。唯讀張文烈感賦有句云。秋草尚堪肥戰馬。朔風無復掃黃雲。稍有寄託。在閣幾三十年不遷。摧頹老矣。無復怨尤。守拙一首有云。獵書只訝董搬鼠。嗜古那堪獺祭魚。殆亦能自守之士。

國史館印事呈館中諸先生

簾疎冉冉逼芙蓉。一味南來頗自如。金匱纔開分校罷。御園又促去繙書。蓼園詩草



21101000157961